

Holy Bible

Aionian **Edition®**

भड्लाई बाइबिल

Bhadrawahi Bible

Holy Bible Aionian Edition ®

भइलाई बाइबिल
Bhadrawahi Bible

CC Attribution ShareAlike 4.0, 2018-2024

Source text: eBible.org

Source version: 7/12/2024

Source copyright: CC Attribution ShareAlike 4.0
The Love Fellowship, 2020

Formatted by Speedata Publisher 4.19.18 (Pro) on 7/19/2024

100% Free to Copy and Print

TOR Anonymously
AionianBible.org

Published by Nainoia Inc
<https://Nainoia-Inc.signedon.net>

We pray for a modern public domain translation in every language
Report content and format concerns to Nainoia Inc
Volunteer help is welcome and appreciated!

Celebrate Jesus Christ's victory of grace!

Preface

भद्रवाही at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

भद्रवाही at AionianBible.org/History

04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 135 languages.
05/01/24 - 371 translations now available in 151 languages.

Table of Contents

NEW TESTAMENT

मत्ती	1
मरकुस	26
लूका	46
यूहन्ना	73
प्रेरितों के काम	94
रोमियों	121
1 कुरिन्थियों	133
2 कुरिन्थियों	145
गलातियों	153
इफिसियों	157
फिलिप्पियों	161
कुलुस्सियों	164
1 थिस्सलुनीकियों	167
2 थिस्सलुनीकियों	170
1 तीमुथियुस	172
2 तीमुथियुस	176
तीतुस	179
फिलेमोन	181
इब्रानियों	182
याकूब	191
1 पतरस	194
2 पतरस	198
1 यूहन्ना	201
2 यूहन्ना	204
3 यूहन्ना	205
यहूदा	206
प्रकाशित वाक्य	208

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



यीशु ज़ोवं, “हे बाजी एन माफ़ करां एन न ज़ानन् कि एना कुन लोरेम केरने।”
ते तैनेई तैसेरे लिगड़ां केरे लेइ पेरची छेडतां शर्त रखवू ते एण्पू मामेई बंटां।
लूका 23:34

मत्ती

1 अब्राहमेरी औलादी मरां दाऊद राजो थियो, दाऊद राजेरे औलादी मरां यीशु मसीह थियो। यीशु मसीहेरे दादे-पड़दादां केरां नंवां इना आन। 2 अब्राहमेरू मट्टू इसहाक थियूं, इसहाकेरू याकूब, याकूबेरां मट्टां यहूदा ते तैसेरे ढला थिये। 3 यहूदा ते तामारेरां मट्टां पेरेस ते जेरह थियां, पेरेसेरू मट्टू हेस्रोन, हेस्रोनेरू एराम, 4 ते एरामेरू अम्मीनादाब, अम्मीनादाबेरू नहशोन, नहशोनेरू सलमोन, 5 ते सलमोन ते तैसेरी कुआन्श राहाबेरू मट्टू बोआज थियूं, ते बोआज ते तैसेरी कुआन्श रूतरू ओबेद, ओबेदेरू यिशै, 6 ते यिशैरू मट्टू दाऊद राजो थियो, दाऊद राजेरू मट्टू सुलैमान तैस कुआन्शी सेइं पैदा भोव, जै पेड़ली ऊरिय्याहरी कुआन्श थी। 7 सुलैमानेरू रहबाम, रहबामेरू अबिय्याह, अबिय्याहेरू आसा, 8 ते आसारू यहोशाफात, यहोशाफातेरू योराम, ते योरामेरे खानदानेरे मरां उज्जियाह पैदा भोव। 9 उज्जियाहेरू योताम, योतामेरू आहाज, आहाजेरू हिजकिय्याह, 10 ते हिजकिय्याहेरू मनश्शे, मनश्शेरू आमोन, आमोनेरू मट्टू योशिय्याह थियूं 11 ते योशिय्याहेरां पोटलड़ां यकुन्याह ते तैसेरे ढला थिये, जैना गिरफ्तार भोइतां बाबेलरी गुलैमी मां गानेरे वक्ते मां जर्मारां थियां। 12 गिरफ्तार भोइतां बाबेलरी गुलैमी मां गानेरे पत्ती यकुन्याहेरू शालतियेल ते शालतियेलेरू जरुब्बाबेल, 13 ते जरुब्बाबेलेरू अबीहूद, अबीहूदेरू एलयाकीम, एलयाकीमेरू अजोर, 14 ते अजोरेरू सादोक, सादोकेरू अखीम, अखीमेरू एलीहूद 15 ते एलीहूदेरू एलीआजर, एलीआजारेरू मत्तान, मत्तानेरू याकूब, 16 ते याकूबेरू यूसुफ, ते यूसुफ मरियमरो मुन्श थियो, ते मरियमरू मट्टू यीशु आए, जैस जो मसीह ज़ोतन। 17 एन्चरे अब्राहमे करां दाऊद राजे तगर च़ेवधे पीडी भोइ, ते दाऊद राजे करां यहूदी केरे गिरफ्तार भोइतां बाबेलरी गुलैमी मां गाने तगर च़ेवधे पीडी भोइ, ते गिरफ्तार भोइतां बाबेले मां गाने करां देइतां यीशु मसीह तगर च़ेवधे पीडी भोइ। 18 यीशु मसीहेरू ज़र्म एन्चरे सेइं भोव, कि ज़ैखन तैसेरी अम्मा मरियमरी कुड़माइ यूसुफ नंवे एककी मैन्हु सेइं भोरी थी, त तैन केरे इला भोने करां पेड़ले मरियम पवित्र आत्मा रे शक्ति सेइं दोर्जीती भोइ। 19 तैसारो मुन्श यूसुफ ज़ै धर्मी मैन्हु थियो, तै तैस बदनम केरनि न थियो चातो। तैनी चुपचारे इन सोचू, कि मीं एस सेइं इला नई बनानो। 20 हेजू तै एन सोचने लोरो थियो, त प्रभुएरे एककी स्वर्गदूते तैस सेइं सुपने मां एइतां ज़ोव, “हे यूसुफ! तू ज़ै दाऊदेरे खानदाने मरां आस, तू मरियम अपनि कुआन्श बनाने करां न डर, किजोकि ज़ैन तैसारे पेदे मां आए तैन पवित्र आत्मा रे तरफां आए। 21 तैस मट्टू भोनूए, ते तू तैसेरू नवं “यीशु” रेखां, किजोकि तैए अपने लोकन तैन केरे पापन करां मुक्ति देलो।” 22 एन सब किछ एल्हेरेलेइ भोव, कि ज़ैना वचन प्रभुए यशायाह नेबेरे ज़िरिये जोरे थिये पूरे भोए कि, 23 “हेरा, अक अड़लाई कुई पेदे भारी भोली, ते तैस अक मट्टू भोलू, ते लोक तैस जो इम्मानुएल

जोले” ज़ेसेरो मतलब ई आए, परमेशर असन सेइं साथी आए। 24 तैखन यूसुफ निड़लारां बींझो त तैनी परमेशरेरे स्वर्गदूतेरू ज़ोनू मन्नु, ते मरियमी सेइं इला बनाव ते अपने घरे आनी। 25 पन ज़ांतगर तैस मट्टू न भोवं तांतगर तै तैस सेइं साथी न झुल्लो ते ज़ैखन तैस मट्टू भोवं त यूसुफ तैस मट्टेरू नवं यीशु रखवू।

2 हेरोदेस राजेरे ज़माने मां जेइस यहूदिया इलाकेरे बैतलहम नगरे मां यीशु पैदा भोव, त पूर्वारां किछ जोष्टी लोक यरूशलेम नगरे मां आए। 2 ते तैना लोकन पुच्छने लगगे, “यहूदी लोकां केरो राजो ज़ै ज़र्मोरोए तै कोडि आए? किजोकि असेईं पूरबे मां तैसेरो तारो लोरोए, ते आस तैस कां मथ्यो टेकने ओरेम।” 3 ज़ैखन हेरोदेस राजे ए गल शुनी, त हेरोदेस राजो ते कने यरूशलेम नगरेरे सारे लोक घबराए। 4 ते हेरोदेस, यहूदी लोकां केरे प्रधान याजक ते शास्त्री लोक अकोट्टे केरतां तैन पुच्छने लगगे, “मसीह कोडि पैदा भोरो लोडे?” 5 तैनेई तैस सेइं ज़ोव, “यहूदिया इलाकेरे बैतलहम नगरे मां,” किजोकि (बड़े पेड़ले) मीका नेबे एन्चरे लिखोरूए, कि परमेशरे ज़ोव, 6 “हे बैतलहम नगर, तू ज़ैन यहूदिया इलाके मां आस, यहूदियारे इलाकन मां तू बडू खास नगर आस, किजोकि तीं मरां अक एरो हाकिम निसलेो ज़ै मेरे लोक इस्राएलेरी रखवाली केरेलो” 7 ज़ैखन हेरोदेस राजे एन शुनू, त तैनी जोष्टी चुपचारे कुजेइतां तैन करां तारो निसनेरे ठीक वक्तेरे बारे मां पतो कियो। 8 ते तैनी जोष्टी एन ज़ोइतां बैतलहम नगरे जो भेजे, कि “गाथ, ते तैस बच्चेरे बारे मां रोड़ेचारे पतो केरा ते ज़ैखन तुसन पतो लगगे, त (वापस एइतां) मीं भी पतो देइयथ ताके अवं भी तैस कां गेइतां मथ्यो टेकी।” 9 तैना जोष्टी (हेरोदेस) राजेरी गल शुन्तां (यरूशलेम नगरेरां) चले जे। ते अकदम तै तारो, ज़ै तैनेई पूरबे मां लोरो थियो, तैन अग्री-अग्री चलो ते तैस घरेरे बा रूको ज़ैडी तैन मट्टू थियूं। 10 ज़ैखन तैनेई तै तारो लव, त तैना बड़े खुश भोए। 11 तैखन तैना घरे अन्तर जे ते तैन मट्टू तैसेरी अम्मा मरियमी कां लाव ते तैस मट्टे कां मथ्यो टेको। तैखन तैनेई अपने-अपने खज़ानेरे झोले खोलतां सोन्नू, लोबान ते मुर तैस कां च़ाडू। 12 जोष्टी केरे तेइतां निसनेरां पत्ती, तैन सुपने मां ए बिस्तार मैल्लो कि वापस हेरोदेसे कां न गेइयथ। एल्हेरेलेइ तैना वापस कोन्ची होरि बत्तां अपने मुलखे जो चले जे। 13 जोष्टी केरे गानेरां पत्ती, अचानक प्रभुएरो अक स्वर्गदूत यूसुफे सुपने मां मैल्लो ते ज़ोने लगगे, “उठ, बच्चो ते तैसेरी अम्मा नेइतां मिस मुलखे जो नश्श। ते मेरे ज़ोने तगर तैडी रेइयां, किजोकि हेरोदेस राजो बच्चे तोपतां मारने चाते।” 14 यूसुफ निड़लारां उठो ते मट्टू ते तैसेरी अम्मा साथी नेइतां रातो-रात मिस मुलखे जो चलो जैव। 15 हेरोदेसेरे मरने तगर यूसुफ तैडी राव, ताके प्रभुएरू तैन वचन पूरू भोए, ज़ैन होशे नेबे लिखोरू थियूं, “मीं मिस मुलखे मरां अपनू मट्टू कुजाव।” 16 ज़ैखन हेरोदेसे जोष्टी केरे धोखे बैज़रो पतो लगगे, त तैस बड़ी सरक आई। तैनी अपने मैन्हु भेजतां, ज़ैन गल्लां केरो पतो तैस जोष्टन करां मैल्लोरो थियो, तैनी बैतलहम नगरे ते

तैसेरे आसेपासेरे इलाकन मां सिपाही भेजतां सारां मट्टां, जैना दूई सालां केरां या दूई सालन केरां निकड़ां थियां मारां। 17 जैखन एन भोव, त तैखन तैन वचन पूरू भोव, जैन यिर्मयाह नेबे जोरू थियूं। तैनी जोंव, 18 “रामाह नगर मां बेड़ि लेरां ते मातमेरि आवाज शूनोई, राहेल अपने बच्चां केरे लेइ लेरां देने लोरी, तैसारा दिल ठंडो न भोए, किजोकि तैसेरे बच्चे मेरि जोरन।” 19 हेरोदेसेरी मौतारां पत्ती, जैखन यूसुफ मिस मुल्खे मां थियो, त अचानक प्रभुएरो स्वर्गदूत तैस सुपने मां लेइहोव ते तैस सेइं ज़ोने लागो, 20 “उठ, बच्चो ते कने तैसेरी अम्मा साथी नेइतां इस्राएल मुल्खे जो वापस चलो गा, किजोकि जैना लोक बच्चे मारने चाते थिये, तैना मेरि जोरन।” 21 फिरी यूसुफ निडलारां बीड्डो, ते बच्चो ते तैसेरी अम्मा साथी एन्तां इस्राएल मुल्खे जो वापस अव। 22 पन जैखन यूसुफे एन शुनू कि अरखिलाउस अपने बाजी हेरोदेसेरी ठैरी यहूदिया इलाके पुड़ राज करेने लगगोरो, त तै तैड़ी गाने केरां डरो। एल्हेरेलेइ जैखन यूसुफे सुपने मां परमेशेरो बिस्तार मैल्लो, त तै गलील इलाके जो चलो जेव। 23 ते तैड़ी पुजतां ते नासरत नव्वेरे नगर मां राने लागो, ताके तैन वचन पूरू भोए, जैन परमेशेरे अपने नेबी केरे ज़िरिये ज़ोरो थियूं। तेनेई ज़ोव, “तैस जो नासरी ज़ोले।”

3 तैन दिहाइन मां यूहन्ना नव्वेरो मैन्हु, जै बपतिस्मो देनेबालो थियो, यहूदिया इलाकेरे सुनसान ठैरी मां अव। तै लोकन जैना तैस कां एइते थिये, तैन ई प्रचार केरतो थियो, 2 “अपने पापन केरां मनफिराथ, किजोकि स्वर्गेरू राज नेड़े ओरूए!” 3 ई तैए जेसेरे बारे मां यशायाह नेबे एन जोरू थियूं, “कोई सुनसान ठैरी मां लोकन, जैना तैस कां गातन, तैन उच्ची आवाजी सेइं ज़ोली कि ‘तुसन कां प्रभु एजनेबालो आए, एल्हेरेलेइ तैसेरी बत तियार केरा ते कने तैसेरेलेइ सड़कां सिद्धी केरा।’ (यानी, प्रभुएरे लेइ तुस अपने दिल साफ केरा)” 4 यूहन्ना आम लिगड़ां लातो थियो जैना लिगड़ां ऊँटेरे बालन सेइं बनोरां थियां। तै अपनि कमरी पुड़ चमड़ेरू मज़ बंधतो थियो। ते तै टिट्टां त कने जंगलेरू माछी खातो थियो। 5 तैखन यरूशलेम नगरेरे बड़े लोक ते यहूदिया इलाकेरे बड़े लोक ते यरदन दरियारे आसे-पासेरे इलाकन मरां लोक यूहन्नारी गल्लां शुन्नेरे लेइ तैस कां एइते थिये। 6 ते तैनेई अपने पाप मेन्तां यूहन्ना केरां यरदन दरियाए मां बपतिस्मो नीयो। 7 पन जैखन तैनी हेरू कि बड़े फरीसी ते सद्की लोक बपतिस्मो नेनेरे लेइ तैस कां एजने लोरेन, त तैनी तैन सेइं ज़ोव, “तुस ज़ेहरीले सप्पेरे ज़ेरे बुरे आथ! तुसन केनि ज़ोव कि, एजनेबाले परमेशेरे कोपे केरां नश्शा? 8 सज़ाई केरां बन्नरेरे लेइ तैना कम्मां केरा, जैन सेइं पतो लग्गे तुसेई सच्चे पापन केरां मन फिरावरोए। 9 ते अपने-अपने दिले मां एन न सोचा कि ‘अब्राहम इश्शो बाजी आए’ (परमेशर तुश्शे पाप सिर्फ एल्हेरेलेइ माफ़ न केरेलो कि तुस अब्राहमेरी औलाद आथ), किजोकि अव तुसन सेइं ज़ोताई कि परमेशर इन घोड़न मरां भी अब्राहमेरे लेइ औलाद पैदा केरि सक्ते! 10 ते हुन्ना त बुट्टां केरे

ज़ीलन पुड़ परमेशेरो मैक्कु रखबोरोए, एल्हेरेलेइ जै कोई तैस बुट्टेरो ज़ेरो भोते, जै रोड़ो फल न दे, तै कटनोए ते अग्गी मां छडनोए। 11 अव त तुसन पैनी सेइं बपतिस्मो देताई किजोकि तुसेई मनफिरोरोए, पन मसीह जै मेरे बाद एजनेबालोए, तै मीं केरां भी महान आए। अव त तैसेरो गुलाम भोनेरे काबल भी नई कि तैसेरे बूट छुई। तै तुसन पवित्र आत्माई सेइं ते अग्गी सेइं बपतिस्मो देलो (जैना मन फिरान, तैनन)। 12 तैसेरू छज्ज तैसेरे हथ्थे मां आए ते तै खलाइ रोड़ेचारे साफ केरेलो, तै गेहुं अपने कोठारे मां रखेलो, पन झाझी तैस अग्गी मां फुकेलो जै कथे न हिश्शे। (एल्हेरेलेइ पापन केरां मनफिराथ नई त परमेशर तुसन सज़ा देलो)” 13 तैस मौके यीशु गलील इलाके मरां यरदन दरियारे बन्ने पुड़ यूहन्ना कां अव, ताके तैस केरां बपतिस्मो ने। 14 पन यूहन्ना, यीशु जो इन ज़ोइतां रोकने लागो, “मीं तीं केरां बपतिस्मो नीयोरो लोड़ते, फिरी किजो तू मीं केरां बपतिस्मो नेने ओरोस?” 15 पन यीशुए तैस ई जुवाब दितो, “हुनी तू एन्चरे भोने दे, किजोकि एन्चरे केरतां अस तैन केरतम जैन परमेशर चाते।” तैखन यूहन्ना तैसेरी गल मन्नी। 16 ते यीशु जैखन बपतिस्मो नेइतां पैनी मरां बेइर अव, त तैस मौके हेरा अम्बर खुल्ली ज़ोव। ते तैनी पवित्र आत्मा कबूतरेरी शकली मां एप्पू पुड़ एइती लाई। 17 ते तैखन हेरा अम्बरे मरां ए आवाज आई (त यीशुएरे बारे मां ज़ोव), “एन मेरू ट्लारू मट्टू, अव एस पुड़ बड़ो खुश आई।”

4 तैल्ला पत्ती, पवित्र आत्मा यीशु सुनसान ठैरी मां नीयो, ताके शैतान तैसेरी अज़मैइश केरे। 2 40 दिहाड़े ते 40 रातन किछ न खानेरां पत्ती तैस ढलुख लग्गी। 3 त तैखन शैताने जैस जो अज़माने बालो भी ज़ोतन, तैस कां एइतां ज़ोव, “अगर तू परमेशेरेरू मट्टू आस, त इन घोड़न जो हुक्म देइतां साबत केर, कि एना रोट्टी बनन ताके तू खेइ सकस।” 4 यीशुए तैस जुवाब दितो, “अव न केरेलो किजोकि परमेशेरी किताबी मां लिखोरूए, ‘मैन्हु सिर्फ रोट्टेई सेइं ज़ीतो न राए, बल्के तै हर गल मन्ने सेइं ज़ीतो राते, जै परमेशर ज़ोते।” 5 फिरी शैताने तै पवित्र नगर यरूशलेमे मां नीयो ते मन्देरी उच्ची छम्पी पुड़ नेइतां खड़ो कियो। 6 तैखन तैनी यीशु सेइं ज़ोव, “अगर तू हकीकति मां परमेशेरेरू मट्टू आस त इट्टां बिछड़तां साबत केर, किजोकि पवित्रशास्त्रे मां लिखोरूए, ‘ते तेरे लेइ अपने स्वर्गदूतन हुक्म देलो, ते तैना तीं अपने हथ्थन मां ट्लाले, ताके तेरे पावन केन्ची घोड़न सेइं ठोकर न लगो।” 7 यीशुए तैस सेइं ज़ोव, “(नई, अव छाल न मारेलो, किजोकि) परमेशेरी किताबी मां एन भी लिखोरूए, ‘तू प्रभु अपने परमेशेरे अज़मैइतां इन साबत केरनेरी कोशिश न केर कि तै अपने वादे पूरे केरते या नई।” 8 तैखन शैताने, यीशु एक्की बड़े उच्चे पहाड़े पुड़ नीयो, ते तैड़ी दुनियारां सारां राज़ां ते तैन केरि धन दीलत तैस हिराई। 9 तैखन तैनी यीशु सेइं ज़ोव, “अगर तू मीं कां मथ्यो टेकस ते मेरी आराधना केरस, त अव इन सब किछ तीं देलो।” 10 यीशुए

तैस जो ज़ोवं, “हे शैतान! दूर भो, किजोकि परमेशरेरी किताबी मां लिखोरूप, ‘तू सिर्फ प्रभु अपने परमेशरे कां मथ्यो टेक ते तैसेरी आराधना केर!’” 11 तैखन शैतान तैस करां चलो जेव, ते अकदम किछ स्वर्गदूत यीशु कां एडतां तैसेरी सेवा केरने लग्गे। 12 एकसां केन्चे यीशु जो ज़ोवं, कि यूहन्ना ज़ै बपतिस्मो देनेबालो थियो, केद कियोरोए त यीशु यहूदिया इलाकेरां, गलील इलाके मां वापस अव। 13 ते नासरत नगर शैरतां कफरनहूम नगरे मां राने लग्गे, ज़ैन समुन्दरे बन्ने पुड़ आए, ज़ैड़ी जबूलून ते कने नप्ताली गोदलेरे लोक राते थिये। 14 ताके तैन वचन ज़ैन यशायाह नेबे ज़ोरु थियूं पूरु भोए, तैनी ज़ोवं, 15 “ज़ैना लोक जबूलून ते नप्ताली गोत्रां केरे इलाके मां आन, ज़ैना गलील समुन्दरे नेड़े यरदन दरियारे उस पार, गलील इलाके मां आन, ज़ैड़ी गैर यहूदी लोक भी रातन, 16 (तैना लोक) ज़ैना पापेरे आंधरे मां बिशशोरेन, तैनेई बड्डी लौ लई। तै लौ तैन पुड़ चमकी ज़ैना हमेशारे मौतारे आंधरेरे मुखे मां बिशशोरेन।” 17 तेइसेरु दैतू यीशुए परमेशरेरी खबर लोकन शुनानेरी सेवा शुरू की। तैनी लोकन ज़ोवं, “अपने पापन करां मनफिराथ, किजोकि स्वर्गेरु राज़ नेड़े ओरुए।” 18 एकसां ज़ैखन यीशु गलील समुन्दरे बन्ने चलोरो थियो, त तैनी दूई मैन्हु लाए ज़ैना मेछली टलानेबाले थियो। तैना मेछली टलानेरे लेइ समुन्दरे मां ज़ाल छेड्डी राओरे थियो। तैन मरां एक्केरु नवं शमौन, ज़ैस जो पतरस भी ज़ोतन, ते तैसेरो दूला ज़ेसेरु नवं अन्दियास थियूं। 19 यीशुए तैन सेइं ज़ोवं, “एज्जा मेरे चले बना। अवं तुसन शिखालेलो कि केन्चरां होरे मैन्हु मेरे चले बनानेन।” 20 तैना अकदम अपना ज़ालां छेडतां यीशु पत्ती चले जे। 21 ते तैना तैदं थोड़े ज़ेरे अगगर जे, त यीशुए होरे दूई दूला, यानी याकूब त कने तैसेरो दूला यूहन्ना अपने बाजी जब्दी सेइं साथी किशती मां लाए। तैना किशती मां ज़ालां ठीक केरने लगगेरे थियो। यीशुए तैना भी कुज़ाए (कि तैना तैसेरे चले बनन)। 22 ते तैना भी तैखने किशती ते अपने बाजी तैड़ी ज़ेरे छेडतां यीशु सेइं साथी चले जे। 23 तैल्ला पत्ती, यीशु सारे गलील इलाके मां हंठतो फिरतो राव। ते तैन केरे प्रार्थना घरन मां लोकन शिक्षा देतो राव ते परमेशरेरे राज़ेरी खुशखबरी शुनातो राव। ते तै लोकां केरि हर किसमेरी बिमेरी ते कमज़ोरी दूर केरतो राव। 24 यीशुएरे बारे मां ई खबर सारे सीरिया इलाके मां मुशूर भोइ जेई। एसेरे वजाई सेइं, ज़ैड़ी कोन्ची तै जेव, तैड़ी लोक सेब्भी बिमारन ज़ैना हर किसमेरी बिमेरी ते तकलीफन मां फसोरे थिये, ते ज़ैन लोकन पुड़ भूतां केरो सायो थियो, ते ज़ैना मिरगरे रोगी थिये, ते ज़ैना अधरंगेरे रोगी थिये, तैना यीशु कां आने ते यीशुए तैना सारे बज्ज़ाए। 25 एसेरे वजाई सेइं मैन्हु केरि बड़ी भीड़ यीशु पत्ती चली। तैना लोक गलील, दिकापुलिस इलाकां केरे, यरूशलेम नगरेरे, यहूदिया इलाकेरे, ते यरदन दरियारे पैरीं पारेरे इलाकां केरां ओरे थिये।

5 यीशु तैना हले लोक लेइतां एक्की पहड़ी पुड़ चलो जेव, ते ज़ैखन ते शिखालनेरे लेइ बिशशो त तैसेरे चले तैस कां आए।

2 तैखन यीशु तैन लोकन शिक्षा देने लग्गे, 3 “परमेशर तैन लोकन बरकत देते, ज़ैना ज़ानतन कि तैन परमेशरेरी ज़रूरते, किजोकि तै तैन पुड़ राज़ केरेलो। 4 परमेशर तैन लोकन बरकत देते, ज़ैना दुखी आन, किजोकि परमेशर तैन तस्सली देलो। 5 परमेशर तैन लोकन बरकत देते ज़ैना नम्र आन, किजोकि परमेशर तैन, तैना सैरी बरकतां देलो ज़ैन केरो तैनी वादो कियोरोए। 6 परमेशर तैन लोकन बरकत देते, ज़ैना परमेशरेरी नज़री मां रोड़ी गल्लां केरनेरी बड़ी इच्छा रखतन, (जेन्चरे कोई दलुखोरो खाने पीनेरी इच्छा रखते) तैन परमेशर अपनि मेज़ी पुड़ चलनेरे लेइ शक्ति देते। 7 परमेशर तैन लोकन बरकत देते, ज़ैना दया केरतन, किजोकि परमेशर भी तैन पुड़ दया केरेलो। 8 परमेशर तैन लोकन बरकत देते, ज़ैन केरे मन साफ आन, किजोकि तैन परमेशर दर्शन देलो। 9 परमेशर तैन लोकन बरकत देते, ज़ैना शैतनरां कम्मां केरतन, किजोकि तैन जो परमेशरेरे बच्चे ज़ोले। 10 परमेशर तैन लोकन बरकत देते, ज़ैना परमेशरेरी नज़री मां रोड़ि गल्लां केरनेरे वजाई सेइं सताए गातन, किजोकि परमेशर तैन पुड़ राज़ केरते।” 11 “परमेशर तुसन बरकत देलो, ज़ैखन लोक तुसन मेरे चेलो भोनेरे वाजाई सेइं तुश्शी तुहीन केरन ते स्तान ते झूठ ज़ोइतां हर किसमेरी बुरी गल्लां तुश्शे बारे मां ज़ोन। 12 तैखन तुस खुशी रेइयथ ते मघन भोइयथ, किजोकि परमेशरे ज़ैन इनाम स्वर्ग मां तुश्शे लेइ रखेखेरु तैन बडू बडूए, किजोकि लोकेई बड़े पेइले तैना नबी भी एन्चरे सतारे थियो।” 13 “तुस इस दुनियारे लोकां केरे लेइ लूनेरे ज़ेरे आथ, पन अगर लूनेरो स्वाद चेलि गाए, त फिरी दुबारां केन्चरे तैसेरो स्वाद वापस आनेले? फिरी तैन कोन्ची कम्मेरु न राए, सुवाए बेइरोवं शारनेरां ते लोकां केरे पावेइं सेइं दलुनोनेरां।” 14 “तुस इस दुनियारे लोकां केरे लेइ लोअरे ज़ेरे आथ। ज़ैन नगर पहाड़े पुड़ बसते तैन कथे भी छेप्पी न सके। 15 लोक बलतो दीयो हेटी मां न रखन, पन तैस उच्चि ठैरी रखतन ताके घरेरे सैरी मैन्हु लौ पुज़्जे। 16 ते एन्चरे तुश्शी लौ मैन्हु केरे सामने एरी चमके, ताके तैना तुश्शां रोड़ां कम्मां हेरतां तुश्शे स्वर्गेरे बाजेरी तारीफ़ केरन।” 17 “एन न बुझथ कि अवं मूसेरो कानून या नेबी केरे किताबन मां लिखोरी गल्लां रद केरने ओरोई। अवं तैन रद केरने नई बल्के पूरी केरने ओरोई। 18 किजोकि अवं तुसन सेइं सच ज़ोताई, कि ज़ां तगर धरती त अम्बर खतम न भोए, तांतगर परमेशरेरे कानूने मरां अक मात्रा या बिंदी भी न टलेली, ज़ां तगर सब किछ लिखोरु पूरु न भोए। 19 एल्लेरेलेइ ज़ै कोई इन निकड़े करां निकड़े हुक्मन मरां केन्ची एक्की ज़ेरे टलोइते ते होरन भी एन्ने केरनु शिखालते, तै स्वर्गेरे राज़े मां सेब्भन करां निकड़ो भोलो, पन ज़ै तैन हुक्मन पुड़ अमल केरते ते होरन भी एन हुक्मन पुड़ चलनेरे बारे मां शिखालते त ते स्वर्गेरे राज़े मां बड्डी भोलो। 20 किजोकि अवं तुसन सेइं ज़ोताई कि ज़ां तगर तुस शास्त्री ते फरीसी लोकन करां रोड़े चारे कानूने न मन्नेले, तांतगर तुस स्वर्गेरे राज़े मां दाखल न भोइ सकतथा।” 21

“तुसेईं शुनेरु थियूं कि परमेशरे इश्शे दादे-पड़दादन सेइं ज़ोरु थियूं, ‘खून नईं केरनो, ते ज़ै खून केरेलो त तैस आदालत सज़ा देली।’ 22 पन मेरु ज़ोनू एने कि ज़ै कोई अपने ढ़लाए पुड़ क्रोध केरते, परमेशर तैसेरो इन्साफ केरेलो, ते ज़ै कोई अपने ढ़लाए जो निकम्मो ज़ोते त तैस भी महासभा मां जुवाब देनो पेनोए, ते ज़ै कोई अपने ढ़लाए जो ‘बेवकूफ’ ज़ोली त परमेशर तैस नरकरे अगारी सज़ा देलो। (Geenna g1067) 23 एल्लेरेलेइ अगर तू अपनि चढ़तल मन्दरे मां आनस, ते तैड़ी तीं याद एज्जे कि मीं अपने ढ़लाए सेइं किछ गिलोए। 24 त तू अपनि चढ़तल बलिदान च़ाढ़नेरि ठैरी पुड़ छेड़तां पेड़ले अपने ढ़लाए सेइं मेल-मलाप केरां, फिरि अपनि चढ़तल च़ाढ़ां। 25 अगर कोई मैन्हु तीं पुड़ दाओ केरतां तीं आदालती मां नेनो चाते, त तू बत्तां तैस सेइं मेल-मिलाप केरां न त तैनी तू हाकिमे कां खड़ो केरनोस, ते तैनी तू सिपैहीएरे हवाले केरनोस ते सिपैहिए तू कैद केरतां छड़नोस। 26 अवं तुसन सेइं सच़ ज़ोताई कि ज़ां तगर तू पाई-पाई न देलो त तांतगर तैड़ां छुट्टी न सकेलो।” 27 “तुसेईं शुनेरु थियूं, कि ई हुक्म दित्तोरो थियो, ‘बदमाशी नईं केरनि।’ 28 पन अवं तुसन इन भी ज़ोताई कि ज़ै कोई केन्ची कुआन्शी पुड़ गेन्दी नज़रां सेइं तकते, तैनी अपने दिले मां पेड़ली तैस सेइं बदमाशी केरि छुट्टी। 29 अगर तेरी देइनी अछ तीं पाप केरनेरे लेइ ठोकर खुवाए, त तैस केढतां शार, किजोकि तेरी पूरी जान नरके मां छुट्टे गाने करां तेरे लेइ एन्ने रोडूए कि तेरी जानी मरां अक अंग नाश भोए (Geenna g1067) 30 अगर तेरो देइनो हथ तीं पाप केरनेरे लेइ ठोकर खुवाए त तैस केढतां शार, किजोकि तेरी पूरी जान नरकेरी अग्गी मां गाने करां तेरे लेइ एन्ने रोडूए कि तेरी जानी मरां अक अंग नाश भोए।” (Geenna g1067) 31 “एन भी ज़ोरु थियूं, ‘ज़ै कोई अपनि कुआन्श शारे त एन ज़रूरीए कि फारखी लिखतां हावाले केरे।’ 32 पन अवं तुसन सेइं ज़ोताई, कि ज़ै कोई अपने कुआन्शी बदमैशरे अलावा होरि केन्ची गल्ली पुड़ फारखी दे, त तै तैस केरां बदमैशी केरवाते। ते ज़ै कोई तैस शैरोरी कुआन्शी सेइं इला बनाते, त तै भी तैस सेइं बदमाशी केरते।” 33 “तुसेईं शुनेरु, कि ई हुक्म दित्तोरो थियो, ‘झूठी कसम नईं केरनि, पन कसम प्रभुएरे लेइ पूरी केरथ।’ 34 पन अवं तुसन सेइं ज़ोताई कि कथे कसम न केरथ, न स्वर्गरी, किजोकि तै परमेशरोरे तखत आए। 35 न ज़मीनारी किजोकि परमेशर तैड़ी पाव रखते, ते न यरूशलेम नगरेरी किजोकि तैन महा राजां केरु नगर आए। 36 ते न अपने दोगेरी कसम केरथ, किजोकि तुस अपनो अक बाल भी छित्तो या कालो न केरि सकतथ। 37 पन हांपरी ठैरी हाँ ते नांपरी ठैरी न ज़ोथ, किजोकि ज़ैन किछ एस करां जादे तैन बुरैई यानी शैतानेरे पासेरां आए।” 38 “तुसेईं शुनोरुए, कि मूसेरे कानूने मां लिखोरुए, कि अछरे बदले अछ ते दंतरे बदले दंत। 39 पन अवं तुसन सेइं ज़ोताई कि, बुरे मैन्हु करां बदलो न नेइयथ। अगर कोई तेरे देइनी खैखोड़ी पुड़ थप्पड़ बालो त तू बाएं पासो भी तैसेरे पासे रेख्खां। 40 ते

अगर कोई मुकदमो केरतां तेरी कमीज़ नेनी चाए त तू कोट भी तैसेरे हवाले केरां। 41 ते अगर कोई सिपाई तीं भारो छूने अक मील नेने चाए त तू दूई मील गेइयां। 42 ज़ै कोई तीं करां किछ मग्गे, तैस दे। ते ज़ै कोई तीं करां ओधार मग्गे त तुत्तर न फिरेइयां।” 43 “तुसेईं शुनोरुए, कि मूसेरे कानूने मां लिखोरुए, कि ‘अपने पड़ोसी सेइं अपनो ज़ेरो प्यार केरथ ते दुश्मने सेइं बेर रेखथ।’ 44 पन अवं तुसन सेइं ज़ोताई, कि अपने दुश्मन सेइं प्यार केरा, ते ज़ैना तुसन सतातन तैन केरे लेइ प्रार्थना केरा। 45 ज़ैस सेइं तुस अपने स्वर्गेरे बाजी केरे बच्चे बेनि सकतथ, ज़ै अपनो दिहाड़ो अपने रोड़े लोकन पुड़ चमकाते ते बुरे लोकन पुड़ भी, ते धेर्मी लोकन पुड़ झड़ी देते ते बुरे लोकन पुड़ भी। 46 किजोकि अगर तुस तेन्ने लोकन सेइं प्यार केरथ ज़ैना तुसन सेइं प्यार केरतन त तुसन कुन इनाम मैलेलू? कुन चुंगी धिन्ने बाले भी एन्ने न केरन?” 47 “ते अगर तुस सिर्फ अपने ढ़लान जो नमस्कार ज़ोथ, त तुस होरन करां जादे कुन केरतथ? कुन गैर कौमां केरे लोक ज़ैना परमेशरेरे कानूने न मननू तैना भी एरु न केरन? 48 तुसन तैन लोकन सेइं प्यार केरनेरी ज़रूरत आए, ज़ैना तुसन सेइं प्यार न केरन, एन्चरां तुस सिद्ध भोले ज़ेन्चरे स्वर्गे मां रानेबालो तुश्शो बाजी सिद्ध आए।”

6 “खबरदार, तुस अपने रोड़ां कम्मां सिर्फ लोकन हिरानेरे लेइ न केरा, नईं त तुश्शो स्वर्गेरो बाजी तुसन कोई इनाम न देलो। 2 एल्लेरेलेइ ज़ैखन तू गरीब मैन्हु दान देस, त तू ढुंढूरो न बजेइयां, ज़ेन्चरे पाखंडी लोक प्रार्थना घरन मां ते गेल्लन मां केरतन, ताके लोक तैन केरि तारीफ़ केरन। अवं तुसन सेइं सच़ ज़ोताई कि ज़ैन इनाम तैन मैलनू थियूं, तैन सिर्फ इन्ने, कि लोकेईं तैन केरि तारीफ़ की (परमेशरे करां तैनन् कोई इनाम न मैलेलो)। 3 पन ज़ैखन तू गरीब मैन्हु दान देस, त केन्ची पतो न लोड़े लगगोरो कि तीं कुन दित्तू। 4 ताके तेरु दान छप्पोरु भोए, तैखन तेरो बाजी ज़ै छेपतां तकते, तीं इनाम देलो।” 5 “ज़ैखन तू प्रार्थना केरस त पाखंडी लोकां केरो ज़ेरो न बेना, ज़ैना प्रार्थना घरन मां ते सड़कां केरे मोड़न पुड़ खेड़ोइतां प्रार्थना केरनि सुखातन, ताके लोक तैन तक्कन ते तैन केरि तारीफ़ केरन। अवं तुसन सेइं ज़ोताई कि ज़ैन इनाम तैनन् मैलेलोरु लोड़तू थियूं, तैन सिर्फ इन्ने, कि लोकेईं तैन केरि तारीफ़ की (परमेशरे करां तैनन् कोई इनाम न मैलेलू)। 6 पन ज़ैखन तू प्रार्थना केरस त अकैल्लो अपने कमरेरो अन्तर गा, ते दार बंद केरतां अपने परमेशरे कां ज़ै लेइहोए न तैस कां प्रार्थना केरा। तैखन तुश्शो बाजी परमेशर ज़ै लेइहोए न, ज़ै हर वक्त तीं तकतो राते तै तीं इनाम देलो। 7 प्रार्थना केरते बार, गैर कौमां केरु ज़ेरु बकबक न केरां, किजोकि तैना समझतन कि तैन केरे बकबक केरने सेइं तैन केरि प्रार्थना शुनी गाली। 8 तैन केरे ज़ेरे न बना, किजोकि तुश्शो बाजी तुश्शे मगने करां पेड़ले तुश्शी ज़रूरतां ज़ानते।” 9 “एल्लेरेलेइ तुस एन्चरे प्रार्थना केरा, हे इश्शे बाजी, तू ज़ै स्वर्गे मां आस, लोक तेरी आदर केरन किजोकि तू पवित्र

परमेश्वर आस। 10 तू सेबभी लोकन पुड़ ते चीजन पुड़ राज करस। तेरी मर्जी जेन्चरे स्वर्गें मां पूरी भोचे, इस धरती पुड़ भी भोए। 11 इश्वरी रोज़ेरी रोटी अज असन दे। 12 ते जेन्चरे अस ज़ैना इश्वरी खलाफ बुराई करतन, तैन माफ़ करतम, तेन्चरे तू भी इश्वरी बुरैई माफ़ केर। 13 अज़मैइश्वरे ज़िरिये असन पाप करने न दे, पन बुरैई यानी शैताने करां बचेइयां, (किजोकि राज, शक्ति ते महिमा हमेशा तेरी भोती राए। आमीन।)” 14 “एल्हेरेलेइ अगर तुस लोकां केरे पाप माफ़ केरेले, त तुश्वो स्वर्गेंरो बाजी भी तुश्वे पाप माफ़ केरेलो। 15 ते अगर तुस लोकां केरे पाप माफ़ न केरेले, त तुश्वो स्वर्गेंरो बाजी भी तुश्वे पाप माफ़ न केरेलो।” 16 “जैखन तुस बरत रखत, त पाखंडी लोकां केरु जेरु अपनू तुत्तर न बगैइथा। तैना अपनू तुत्तर बिगाड़तन, ताके लोकन पतो लगगे कि एनेई अज बरत रखोरुए ते तैन केरि तारीफ़ केरन। अवं तुसन सेइं सन्न ज़ोताई कि जैन इनाम तैन मैलनू थियूं तैन मैल्ली जेव। 17 बल्के जैखन तू बरत रखस त अपनू तुत्तर धोइयां ते दोग्गे तेल मेल्लां। 18 ताके लोक नई, पन तेरो स्वर्गेंरो बाजी, जै लेइहोतोए न तै लाए कि तीं बरत रखोरुए तै तीं इनाम देलो।” 19 “एप्पू जेई धरती पुड़ दौलत अकोट्टी न केरा, ज़ैडी कीडे खातन ते मौरचो लेगतां नाश केरते, ते चोर तुश्वे घर टलोइतां चोरी केरतन। 20 बल्के रोडू केरतां अपने लेइ स्वर्गें मां दौलत अकोट्टी केरा ज़ैडी न कीडो लग्गे, ते न मोरचो लग्गे ते न चोर चोरी केरेले। 21 किजोकि ज़ैडी तेरी दौलत भोली, तैडी तेरो दिल भी लग्गेलो।” 22 “अछ जानेरे लेइ दीयेरी जेरि आए, एल्हेरेलेइ अगर तेरी अछ रोडी साफ़ आए, त तेरी सारी जान लौ भोली। 23 अगर तेरी अछ खराब आए, त सारी जानी मां आंधरू भोलू। बस अगर जै लौ तीं मां आए तै आंधरू बेनि गाए, त तैन केरू आंधरू भोलू।” 24 “कोई मैन्हु दूई मालिकां केरि सेवा एककी वक्ते मां न केरि सके। न त एककी सेइं दुश्मनी केरेलो ते होरि सेइं प्यार केरेलो, या एककेरो बेनतां रालो त होरि न सुखालो। तुस परमेश्वरेरी ते दौलतरी, दुइयां केरि सेवा न केरि सकतथ। 25 एल्हेरेलेइ अवं तुसन सेइं ज़ोताई, कि तुस अपने ज़िन्दगरी ज़रूरतां केरे लेइ फ़िक्र न केरा, कि तुस कुन खाले या कुन पीले, ते न अपने जानारी कि कुन लामेले। कुन प्राण रोटी करां ते जान लिगड़े करां बेधतां नई।” 26 “अम्बरेरे चुड़ोल्लन हेरा! तैना न किछ बेन, ते न किछ कट्टन, ते न अकोट्टे केरतां रखन, फिरी भी तुश्वो स्वर्गेंरो बाजी तैन खाने जो देते ते तैन केरि हेरगेश केरते। कुन तुश्वी कदर तैन करां जादे नई? 27 तुसन मां एरो कौन आए, जै फ़िक्र केरतां अपनि उमर अक घड़ी भी बधेई सकते?” 28 “ते लिगड़े लेइ किजो फ़िक्र केरतथ? जंगले मां सोसनेरां फूडू हेरा कि तैना केन्चरे बेडोतन, न तैना मेहनत केरन, ते न तैना लिगड़ां बनान। 29 फिर भी अवं तुसन सेइं ज़ोताई कि राज़ो सुलैमाने भी अपने सारे धन दौलतरे बावजूद भी तैन केरां ज़ेरां लिगड़ा न लां। 30 एल्हेरेलेइ जैखन परमेश्वर मैइदानेरो घास, जै अज आए ते कालां

लौवने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड़ न देलो? 31 एल्हेरेलेइ तुस फ़िक्र केरतां एन न ज़ोइयथ, कि ‘कुन खामेले, या कुन पीमेले, या कुन लामेले?’ 32 किजोकि गैर कौमां एन गल्लां केरि फ़िक्री मां रेइचन। ते तुश्वो स्वर्गेंरो बाजी ज़ानते, कि तुसन कोनां कोनां चीज़ां केरि ज़रूरत आए। एल्हेरेलेइ तुस कोन्वी चीज़री फ़िक्र न केरा। 33 पन पेइले तुस अपने आपे परमेश्वरेरां राज़ेरे लेइ अर्पण केरा, ते तैन कम केरा जैन परमेश्वरेरी नज़री मां रोडू भोते, त इना सैरी चीज़ां भी तुसन मैल्ली गैली। 34 एल्हेरेलेइ कालेरे बारे मां फ़िक्र न केरथ, किजोकि कालेरी दिहाड़ी अपने लेइ एप्पू फ़िक्र आनेली। अज़ेरे लेइ अज़ेरो दुख सुद्धोए।”

7 “केन्वी पुड़ दोष न लेइयथ, तुसन भी दोष न लग्गेलो। 2 किजोकि जेन्चरे तुस होरि पुड़ दोष लाएले, तेन्चरे परमेश्वर भी तुश्वो इन्साफ़ केरेलो। जेन्चरे तुस होरि लोकन सेइं बर्ताव केरतथ, तेन्चरे परमेश्वर तुसन सेइं बर्ताव केरेलो।” 3 “तू अपने दूलाएरी एछछी मां कूडो किजो तकतां, पन तेरी एछछी मां त नग आए, ते तैसेरो तू खियाल भी न केरस? 4 ज़द तेरी एछछी मां नग आए, त तू कोस ऐशी सेइं अपने दूलाए जो ज़ोई सकतां कि, ‘एई, अवं तेरी एछछी मरां कूडो केड्डी!’ 5 हे पाखंडी! पेइले अपने एछछी मरां नग कद, ते फिरी अपने दूलाएरी एछछी मरां रोडे चारे तेकतां कूडो केड्डी सकतस।” 6 “जैना लोक परमेश्वरेरू वचन शन्नू न चान, तैन न शुनाथ। अगर तुस एन्चरे केरेले, त पवित्र चीज़ कुतरन कां छडनेरे बराबर ते कने मोती सूरन कां छडनेरे बराबर भोले, कि तैना तैन पव्वन हैठ ड्लन्चन ते बेदलोइतां तुसन पुड़ हमलो केरले।” 7 “परमेश्वरे करां मग्गा, त तुसन दित्तू गालू। ते तोप्पा, त तुसन मैल्ली गालू। ते दार गुडकाथ, त तुश्वे लेइ खोल्लू गालू। 8 किजोकि जै कोई मगते तै हासिल केरते, ते जै कोई तोपते तैस मैल्ली गाते, ते जै कोई दार गुडकाते त तैसेरेलेइ खोल्लू गालू। 9 तुसन मां एरो कौन आए, कि अगर तैसेरू मट्टू रोटी मग्गे, त तै तैस घोड़ दे? 10 या अगर मछली मग्गे, त तैस सप दे? 11 ते तुस बुरे भोनेरे बावजूद भी अपने मट्टन रोडी चीज़ां देनी ज़ानतथ, त तुश्वो स्वर्गेंरो बाजी तुसन रोडी चीज़ां कि न देलो, जैना तैस करां मगतन? 12 जेरु तुस चातथ कि लोक तुसन सेइं केरन, तुस भी तैन सेइं तेरहु केरा, किजोकि मूसेरे कानूनेरी त कने नेबी केरि लिखोरी शिक्षा ईए आए।” 13 “तुस परमेश्वरेरां राज़ेरे मां सिर्फ़ सुन्कड़े दारेरां बत्तां गेइ सकतथ। किजोकि तैन दार चौडू, ते तै बत बड़ी खुल्ली आए जै नाशेरे पासे गाचे, ते तैस बत्तां गानेबाले बड़े आन। 14 किजोकि तैन दार सोंकडू आए, ते तै बत असुखती आए, जै हमेशा ज़िन्दगरे पासे गाचे, ते तेरहां गानेबाले थोड़े आन।” 15 “झूठे नेबन करां खबरदार रेइयथ, जैना तुसन कां भैड्डां केरे रूपे मां एइतन पन असली मां तैना मारने बालां गिदां भोतन। 16 तुस तैन केरे कम्मन सेइं तैन पिशानेले, कुन लोक झल्लन सैहीयेरां दाछ कदतन ते केरी सैहीयेरां फैगू टलोइतन? 17

एल्हेरेलेइ हर एककी रोड़े बुट्टे रोड़ो फल लगते, ते हर एककी बुरे बुट्टे बुरो फल लगते। 18 रोड़े बुट्टे बुरो फल न लगगे, ते न बुरे बुट्टे रोड़ो फल लगगे। 19 ते जैस बुट्टे रोड़ो फल न लगगे तै केटतां अगगी मां फुकतां छुटतन, तेन्चरे झूठे नेबन भी सज्जा मैलेली। 20 बस्सा, तुस तैन केरे कम्मन सेइं तैन पिशानेले।” 21 “मींजो, ‘हे प्रभु, हे प्रभु,’ ज़ोनेबाले सारे मैन्हु स्वर्गेरे राज़े मां दाखल न भोले, पन जै, मेरे स्वर्गेरे बाजी केरे मेज्जीं पुड़ चलने बालोए तै ज़रूर दाखल भोले। 22 इन्साफेरे दिहाड़ी बड़े लोक मीं सेइं ज़ोले कि, ‘हे प्रभु, हे प्रभु,’ कुन असेईं तेरे नंवे सेइं भविष्यवाणी नईं कियोरी? ते तेरे नंवे सेइं भूतां नईं कढोरां ते तेरे नंवे सेइं बड़े चमत्कार नईं हेरेवरे? 23 तैखन अव तैन जो साफ ज़ोलो, ‘अवं तुसन कधे न ज़ैनी, ओ बुरां कम्मां केरने बालाव, मेरे तुतर अगारां दूर भोथा।” 24 “एल्हेरेलेइ जै मेरी गल्लां शुनते ते तैन पुड़ अमल केरते त तै तैस अक्लमन्द मैनेरो ज़ेरो भोलो, ज़ैनी अपनू घर शफड़ी पुड़ बनेवरुए। 25 झड़ि लगगी ते हड़ाई आई ते अंधगुबारी भोइ ते तैस घरे पुड़ पुजी, पन तैन घर न डुल्लू, किजोकि तैसेरी मुनीयाद पेक्की शफ़ड़ी पुड़ कढोरी थी। 26 पन जै मेरी गल्लां शुनते ते तैन पुड़ अमल न केरे, त तै तैस बेवकूफ मैनेरो ज़ेरोए भोलो, ज़ैनी अपनू घर रेती पुड़ बनेवरु थियूं। 27 झड़ि लगगी ते हड़ाई आई अंधगुबारी भोइ ते तैस घरे कां पुजी ते तैन घर डुल्ली ज़ोवं ते बरबाद भोवं।” 28 जैखन यीशुए एना सैरी गल्लां शुनेइतां झैड़ी, त सारे लोक तैसेरी शिक्षा शुन्तां हैरान भोए। 29 किजोकि यीशु तैन शास्त्री लोकां केरि ज़ेरि नईं, बल्के अधिकारे सेइं शिक्षा देतो थियो।

8 जैखन तै पहेड़ी पुड़ां उन्डो अव, त बड़े लोक तैस पत्पती चले। 2 तैखन एककी कोढ़े यीशु कां जैन्थु केरे भारे बिशतां तैस कां मिन्नत केरतां ज़ोवं, “हे प्रभु अगर तू चास त मेरू कोढ़ बज़्झोई सकतस।” 3 यीशुए तैस पुड़ हथ रेखतां ज़ोवं, “अवं चाताई, तू बज़्झोस।” ते ते कोढ़ी तैखने साफ भोइ जेव। 4 यीशुए तैस सेइं ज़ोवं, “हेर, एस गल्लेरे बारे मां केन्ची सेइं किछ न ज़ोइयां। बल्के अपनो आप याजक हिरा। तैल्ला पत्ती, तू अपने बेज़्झोनेरे वजाई सेइं चढतल च़ाढ़, ज़ेसेरे बारे मां मूसा नेबे कानूने मां हुक्म दित्तोरोए, ताके लोकन पतो चले कि तू बेज़्झोरोस।” 5 जैखन यीशु कफरनहूम नगर मां अव त अक रोमी सूबेदार जै 100 सिपेहिन केरो अफसर थियो, तैनी यीशु कां एइतां बिनती की। 6 “हे प्रभु, मेरो नौकर अधरंगेरो मरीज़ घरे बिमार भोरोए, तै चलनेरे काबल नईं, ते तै बेड़ि तकलीफी मां आए।” 7 तैनी तैस सेइं ज़ोवं, “अवं एज्जेलो ते तैस बज़्झोइलो।” 8 सूबेदार ज़ोने लगे, हे प्रभु अव एस काबल नईं कि तू मेरे घरे मां एज्जी सकस; पन तू अगर सिर्फ ज़बाना सेइं ज़ोस त मेरो नौकर बेज़्झोलो। 9 किजोकि अव भी केन्चेरे अधिकारे मां कम केरताई, ते सिपाही मेरे अधीन आन, ते जैखन एककी जो ज़ोताई कि गा, त तै गाते ते होरि जो ज़ोतां एई, त तै एइते, ते अपने सेवके जो ज़ोताई इन कम केर त तै केरते। 10 यीशु एन

शुन्तां हैरान रेइ जेव, ते एप्पू पत्ती चलने बाले मैनन् सेइं ज़ोने लगे, “अवं तुसन सेइं सच ज़ोताई, कि मीं इस्राएल मुलखे मां इस गैर यहूदी मैनेरो ज़ेरो मैन्हु नईं लोवरो जै मीं पुड़ एत्रो विश्वास केरे।” 11 अव तुसन सेइं ज़ोताई कि बड़े गैर कौमां केरे लोक पूर्बरां ते पछमेरां एइतां अब्राहमे, इसहाक ते याकूबे सेइं साथी परमेशरेरे राज़ेरी धामी मां शामिल भोले। 12 पन इस्राएली लोक बेइर आंधरे मां छुड़े गाले ज़ैड़ी तैना लेरां देते ते दंत चापते राले। 13 ते यीशुए तैस सूबेदारे सेइं ज़ोवं, “घरे जो गा, ज़ेरो तेरो विश्वासे तेरे लेइ तेरहु भोलू,” ते तैखने तैसेरो नौकर बेज़्झोइ जेव। 14 जैखन यीशु पतरसेरे घरे जेव, त तैनी हेरू, कि पतरसेरी शिखी बड़ो भुखारे, ते तै लेटोरी थी। 15 तैनी तैसारो हथ ट्लातो ते अकदम तैसारो भुखार उतरी जेव, ते तै खड़ी उठतां तैसेरी सेवा केरने लगगी। 16 जैखन ड़ोलोझ भोइ त लोकेई बड़े बिमार, ज़ैन पुड़ भूतां केरो सायो थियो तैस कां आने, ते तैनी तैना भूतां अपने वचने सेइं कढां, ते सारे बिमार बज़्झाए। 17 ताके यशायाह नेबेरी ज़ोरी तै गल पूरी भोए कि, “तैनी एप्पू इश्शी कमज़ोरी हटेइ ते इश्शी बिमैरी भी मुकेइ।” 18 यीशुए अपने चेरे पासन मैन्हु केरि भीड़ लेइतां अपने चेलन, गलील समुन्दरे पार गानेरो हुक्म दित्तो। 19 जैखन तैना पार गानेरी तियारी केरने लगगे, त तैखन अक शास्त्री मैन्हु तैस कां एइतां ज़ोने लगे, “गुरू, तू ज़ेरहां भी गालो त अव तीं पत्ती चलेलो।” 20 यीशुए तैस जो ज़ोवं, “लौई केरि कूढां, ते अम्बरेरे चुडोल्लू केरे आले भोतन, पन मैनेरे मट्टे यानी मीं कां कोई ठार नईं ज़ैड़ी अव झुल्ली सेक्खी।” 21 चेलन मरां एक्के होरे तैस सेइं ज़ोवं, “हे प्रभु, मीं घरे गानेरी अज़ाज़त दे, मेरे बाजरे मरनेरां बाद अव तैस देबतां एज्जेलो ते फिरी तीं पत्ती चलेलो।” 22 यीशुए तैस जो ज़ोवं, “तू मेरो चेलो बन ते मीं पत्ती चल, ते ज़ैना लोक आत्मिक तरीके सेइं मरने तैन अपने मैन्हु मरने बलगने दे।” 23 जैखन यीशु किशती मां च़ढो ते तैसेरे चले भी तैस सेइं साथी चले। 24 ते अचानक समुन्दरे मां अक बड़ी तूफान अव ते किशती छेलहेई सेइं छपने लगगी ते यीशु तैस मां झुल्लोरो थियो। 25 तैखन चलेई तै बींझोइतां तैस सेइं ज़ोवं, “हे प्रभु, असन बचा! अस त ड़ुबने लोरेम!” 26 तैनी तैन सेइं ज़ोवं, “हे घट विश्वासे बालाव, तुस किजो डरतथ?” तैखन तैनी खड़े उठतां तूफान त समुन्दर डांटो, तैखने तूफान रुकी जेव त समुन्दर बड़े शांत भोव। 27 लोक हैरान भोइतां ज़ोने लगे, “ए मैन्हु कौन आए कि तूफान त समुन्दर भी एसेरो हुक्म मन्तना!” 28 जैखन तै गलील समुन्दरे पार, गिरासेनी इलाके मां पुजो, त दूई मैन्हु ज़ैन पुड़ भूतां केरो सैयो थियो कब्रन मांमेइं यीशु कां मिलने आए। तैना एत्रे निग्गर थिये, कि कोई भी तैस बत्तां निस्सी न थियो बटतो। 29 तैना ज़ोरे-ज़ोरे चिन्डां मारने लगगे ते ज़ोने लगगे, हे परमेशरेरा मट्टां, तीं असन सेइं कुन कम्मे? कुन तू वक्ते करां पेइले असन नरके मां छुडने ओरोस? 30 तैन केरां दूर सूर्रां केरो अक बड़ो घान चरने लोरो थियो। 31 भूतेई यीशु कां मिनत केरतां ज़ोवं, “अगर

तू असन कढने चातस त उन सूरं केरे घाने मांजो भेज्।” 32 तैखन यीशुए ज़ोवं, “गाथ,” तैना भूतां तैट्ठां निस्तां तैन सूरं केरे घाने मां जेआं, ते सूरं केरो सारो घान उछड़तो-उछड़तो डैल्ले मां गेइतां सारे सूर मेरि जे। 33 तैखन सूरं केरे चारनेबालेई एन हेरू, त तैना डेरि जे, ते तैनेई नगरेरे लोकन सेइं सारो बिस्तार दित्तो, ते जैन पुड़ भूतां केरो सैयो थियो तैन केरो हाल भी शुनाव। 34 तैस नगरेरे सारे लोक यीशु सेइं मिलनेरे लेइ आए ते यीशु लेइतां लोक मिनत केरतां ज़ोने लगगे, इश्शे इलाके मरां चलो गा।

9 फिरी यीशु किशती मां च़ेढ़तां दरियाए पार जो जेव, ते अपने नगर मां अव। 2 ते हेरा, किछ मैनेई अक अथरंगी मैन्हु खट्टी पुड़ छुइतां तैस कां आनो, ज़ैखन यीशुए तैन केरो विश्वास हेरो, त तैस अथरंगी मैन्हु जो ज़ोवं, “मट्ठा, गा हिम्मत रख, तेरे पाप माफ भोए।” 3 एस गल्ली पुड़ किछ शास्त्री एप्पू मांमेइं ज़ोने लगगे, “ए त परमेशेरी तुहीन केरते!” 4 यीशुए तैन केरि मनेरी गल्लां बुझतां तैन जो ज़ोवं, “तुस अपने-अपने मने मां एन्चरां किजो सोचने लगगेरेथ? 5 एन ज़ोनू कुन सुखतुए कि गा ‘तेरे पाप माफ भोए,’ या एन ज़ोनू कि ‘उठ, ते चल फिर?’ 6 पन अव किछ केरनेबालेई, ज़ैस सेइं तुसेईं बुझनूए कि मैनेरे मट्टे (यानी मीं) धेरीत पुड़ लोकां केरे पाप माफ केरनेरो अधिकार आए।” तैखन तैनी तैस अथरंगी मैन्हु जो ज़ोवं, “अपनि खट छुइतां अपने घरजो च़लो गा।” 7 ते अथरंगी मैन्हु तैखने अपनि खट छुइतां घरजो च़लो जेव। 8 लोक एन हेरतां डेरि जे ते परमेशेरी बड़याई केरने लगगे, कि ज़ैनी मैन्हु एत्रो अधिकार दित्तोरोए। 9 ज़ैखन यीशु तैट्ठां अग्रोवं च़लो त तैनी अक मत्ती नंवेरो मैन्हु, चुंगी नेनेबालो दफ़तरे मां बिश्शोरो लाव, ते यीशुए तैस जो ज़ोवं, “तू मीं पत्ती च़ल।” ते तैखने यीशु पत्ती च़लो। 10 ते ज़ैखन यीशु अपने चेलेरे घरे गेइतां रोटी खाने बिश्शो ज़ेसेरू नवं मत्ती थियू, त बड़े चुंगी नेनेबाले ते पापी मैन्हु भी आए ते यीशु त तैसेरे चलन सेइं साथी रोटी खाने बिश्शे। 11 ज़ैखन फरीसी लोकेई एन हेरू, त तैनेई तैसेरे चलन पुछ्छू, “तुश्शो गुरू चुंगी घिन्ने बाले ते पैपी लोकन सेइं साथी रोटी किजो खाते?” 12 एन शुन्तां यीशुए तैन मिसाल देइतां ज़ोवं, “सझार लोकन डाक्टरेरी ज़रूरत न भोए, पन बिमारन भोचे।” 13 फिर भी तुस गेइतां एस गल्लरो मतलब कढा, “अवं बलिदान नई बल्के दया पसंद केरताई, किजोकि अवं धर्मी लोकन नई बल्के पापी लोकन कुजाने ओरोई।” 14 तैखन यूहन्नारे चले यीशु कां एइतां ज़ोने लगगे कि कुन वजा आए, कि अस ते फरीसी लोक त बरत रखतम, पन तेरे चले किजो बरत न रखन? 15 यीशुए तैन ज़ुबाब दित्तो, “इलाएरे दिहाड़े, ज़ैखन लाड़ो जैनी सेइं साथी राते, कुन जन शोग बनेइं सकतन? पन तैना दिहाड़े एज्जले, ज़ेइस लाड़ो तैन केरां अलग कियो गालो (यानी मारो गालो), तैखन तैना (अपने दुख्खेरे वजाई सेइं) बरत रखेले। 16 अवं तुसन अक होरि मिसाल देताई, नंवे लिगड़ेरी टलोई पुराने लिगड़े कोई न लाए। किजोकि नंवे लिगड़ेरी टलोई पुराने लिगड़े अपने पासे

खिच्ची छुडेली। ते तैन पेइले केरां भी जादे छिन्दोलू। 17 ते नंवे दाछारो रस पुरेनी मसकन मां न भरन, किजोकि मसकां फ़ैट्टी गाचिन ते दाछारो रस ज़ैया भोड़ गाते ते मसकां भी कोन्ची कम्मरी न रान। एल्लेरेलेइ नंवे दाछारो रस नेव्वी मसकी मां छड़तन ताके दुइये बरबाद न भोन।” 18 यीशु एन गल्लां हेजू मसां ज़ोने लोरो थियो, त प्रार्थना घरेरो अक प्रधान अव ते यीशु कां मथ्थो टेकतां ज़ोने लगगे, मेरी कुई मेरि जोरीए, “पन तू अगर एइतां तैस पुड़ हथ रखखस त तै हुन्ना ज़ींती भोड़ गानीए।” 19 यीशु तैस सेइं साथी च़लो जेव, ते चले भी तैस सेइं साथी जे। 20 ते एरू भोवं कि अक कुआन्श भी थी, ज़ैस 12 सालां केरि खून च़लनेरी बिमारी थी। तैसां यीशु पत्पती एइतां तैसेरे चोगे सेइं हथ लाव। 21 किजोकि तै अपने दिले मां एन ज़ोती थी, कि अगर अवं यीशुए चोगे सेइं हथ लाएली त अवं बेज़्झोइ गानीं। 22 यीशुए बेदलोइतां तैस कुआन्शरे पासे तकू ते ज़ोवं, “हे कुईए, विश्वास रख, तेरे विश्वासे सेइं तू बेज़्झोरस” ते तै तैखने बेज़्झोइ जेई। 23 ज़ैखन यीशु तैस प्रधानेरे घरे पुजो, त लोक नगारो बजाते ते लेरां देंते लाए। 24 तैखन यीशुए तैन लोकन सेइं ज़ोवं, “दूर भोथ, किजोकि कुई मरीं नई, बल्के झुल्लोरीए।” एन शुन्तां तैना लोक हसने लगगे। 25 पन ज़ैखन लोक तैट्ठां दूर कढे, त यीशुए अन्तर गेइतां कुइयो हथ ट्लाव, त तै ज़ींती भोड़। 26 ते एस गल्लरी खबर सारे इलाके मां फैली जेई। 27 ज़ैखन यीशु तैट्ठां अग्रोवं च़लो, त दूई काने तैस पत्ती चिन्दां मारते ज़ोने लगगे, “हे दाऊदेरा मट्ठां असन पुड़ दया केर।” 28 ज़ैखन तै घरे अन्तर जेव, त तैना काने तैस कां आए, ते यीशुए तैन सेइं ज़ोवं, “कुन तुसन विश्वासे, कि अवं तुसन बज़्झोइ सकताई?” तैनेई ज़ुबाब दित्तो “हाँ प्रभु, अस विश्वास केरतम, तू असन बज़्झोइ सकतस।” 29 तैखन तैनी तैन केरि एछछन सेइं हथ लाव ते ज़ोवं, “तुस विश्वास केरतथ कि अवं बज़्झोइ सकताई, अवं तुसन बज़्झोइलो।” 30 ते तैना लहने लाए, ते यीशुए तैन रोड़ेचारे समझोइतां ज़ोवं, “खबरदार ज़ैन मीं तुश्शे लेइ कियू तैसेरे बारे मां कोन्ची सेइं न ज़ोइयथा।” 31 पन तैनेई बेइर गेइतां सारे मुलखे मां एस चमत्कारेरे बारे मां ज़ोवं। 32 ज़ैखन तैना बेइर च़लोरोरे थियो, त लोकेई अक मैन्हु ज़ै गल्लां न थियो केरि बटतो, किजोकि तैस पुड़ भूतेरो सैयो थियो, ते तैनेई यीशु कां आनो। 33 ते ज़ैखन भूतेरो सैयो तैस मेरां कढो, त लट्टो गल्लां केरने लगगे, लोक बड़े हेरान भोड़जेइ ते ज़ोने लगगे, असेई एरो ज़ेरो माजरो इसाएले मां पेइले कथे नई लाहोरो। 34 पन फरीसी लोक ज़ोने लगगे, “ए त भूतां केरे गुरेरी मदी सेइं भूतां कढते।” 35 यीशु त कने तैसेरे चले गलील इलाकेरे इलॉव्न ते नगरन मां ते प्रार्थना घरन मां जे। ते तै शिक्षा देतो राव, ते परमेशेरे राज़ेरी खुशखबरी शुनातो राव, ते लोकां केरि हर किसमेरी बिमारी ते कमज़ोरी दूर केरतो राव। 36 ज़ैखन तैनी बड़े लोक लाए त तैस तैन लोकन पुड़ बड़ो तरस अव, किजोकि तैना तैन भेइतां केरे ज़ेरे थियो ज़ैन केरो कोई पुहाल न भोए, तैन केरो बड़ो बुरो

हाल थियो ते तैना टेपलोरे थियो। 37 तैखन यीशुए अपने चेलन सेइं ज़ोवं, “पकोरी फसलरे ज़ेरे बड़े लोक तियार आन ज़ैना परमेशररे वचने पुड़ विश्वास केरनू चातन, पन कम केरनेबाले थोड़े आन ज़ैना तैन परमेशरे राज़ेरे बारे मां ज़ोन। 38 एल्हेरेलेइ तुस फसलरे मालिके कां प्रार्थना केरा कि तै जादे कम केरनेबाले भेजे, कि तैना लोकन परमेशररे राज़ेरे बारे मां ज़ोन।”

10 फिरी यीशुए अपने 12 चले एप्पू कां कुजाए, ते तैन भूतां केरो सैयो कढनेरो ते हर बिमारी ते तकलीफ दूर केरनेरो अधिकार दित्तो। 2 12 प्रेरितां केरां नव्वां इना आन, शमौन जैस जो पतरस ज़ोतन ते तैसेरो ढ़ला अन्दिआस, जब्देरू मट्टू याकूब ते कने तैसेरो ढ़ला यूहन्ना, 3 फिलिप्पुस, बरतुल्मी, थोमा, ते मत्ती चुंगी घिन्ने बालो, हलफईरू मट्टू याकूब, ते तदै। 4 शमौन कनानी, ते यहूदा इस्करियोती ज़ैनी तै दलुवेवरो भी थियो। 5 एन 12 यीशुए एन ज़ोइतां भेजे, “गैर कौमां केरे पासे न गेइयथ, ते कने सामरी लोकां केरे केन्ची नगर मां न गेइयथ। 6 बल्के इस्राएलरे घरानेरी हेरोरि भैडुन कां गेइयथ। 7 ते चलते-चलते, एन ज़ोते गेइयथ कि स्वर्गूरू राज़ नेड़े ओरूए। 8 बिमारन बज़्ज़ेइयथ, मुडदन ज़ीते केरथ, कोढ़ी केरू कोढ़ साफ केरथ, ते भूतां केरो सैयो केढथ, तुसन एन सब किछ मुफ्त मैलोरूए ते मुफ्त देइयथ। 9 ते साथी सोन्नु, चाँदी ते पेंडसे न रेखथ। 10 ते न बतारे लेइ झोलो नेइयथ ते न दूई-दूई लिगड़ां, ते न बूट ते न सोटी, किजोकि मज़दूर अपनि मज़दूरारो हकदार भोते।” 11 “ज़ैखन तुस केन्ची नगर या इलोव्वं मां गाथ त तुस एरे मैनेरो पतो केरथ, कि कौन अतबाररे काबल? तैट्ठां ज़ां तगर गानेरो वक्त न एज्जे त तांतगर तैड़ी तैस्से कां रेइयथ। 12 ते घरे मां अन्तर गांते बार तैन जो शान्ति देइयथ।” 13 “अगर तैन घर तुशे काबल भोलू त शान्ति पुज़ेली, ते अगर तैन घर तुशे काबल न भोलू त तुशे शान्ति तुसन पुड़ वापस एज्जेली। 14 ज़ै तुसन कबूल न केरे ते तुशे गल न मन्ने त तैस घरे या नगर मरां बेइरोवं गांते बार अपने पावां केरि धूड़ तैड़ी झैइयथ।” 15 “अवं तुसन सेइं सत्र ज़ोताई कि इन्साफेरे दिहाड़े तैस नगरेरो हाल सदोम ते अमोरा नगरां केरे हाले करां भी जादे बुरो भोलो।” 16 “हेरा, अवं तुसन भैड्ठां केरे गिदन मां भेजने लोरोई, एल्हेरेलेइ तुस सप्पां केरे ज़ेरे हुशार ते कबूतरां केरे ज़ेरे सादे बेनथ। 17 मैनन् करां हुशार रेइयथ तैना तुसन दलेइतां सभान मां पैश केरेले ते प्रार्थना घरन मां तुसन कोड़ां केरि मार दुवाले। 18 ते तुसन मेरी वजाई सेइं गवर्नरन ते कने राज़न कां हाज़र केरेले, ताके तुस तैन मां ते गैर कौमान मां मेरे गवाह बन्थ। 19 पन ज़ैखन तैना दलुवेइतां हावाले केरेले, त तुस फिक्क न केरथ, कि अस कुन ज़ोमेले ते केन्चरे ज़ोमेले, किजोकि ज़ैन किछ ज़ोनू भोलू तैखने अवं तुसन ज़ोइलो। 20 किजोकि ज़ोने बाले तुस नई, बल्के पवित्र आत्मा भोलो ज़ै तुशे स्वर्गे बाजी परमेशररे तरफां आए।” 21 “ढ़ला, ढ़लाए ते बाजी मट्टे मारनेरे लेइ सोंफेले, ते मट्टां अपने अम्मा बाजी केरे खलाफ भोइतां

तैन माराले। 22 मेरे नव्वेरो वजाई सेइं सब लोक तुसन सेइं बैर केरेले, पन ज़ै आखरी तगर बरदाशत केरेलो तैस्से मुक्ति मैलेली। 23 ज़ैखन लोक तुसन एक्की नगर मां सताले, त होरि नगर मांजो नेश्शी गेइयथ, अवं तुसन सेइं सत्र ज़ोताई कि एस करां पेइले तुस इस्राएलरे सैरी नगरन मां तुशू सफर पूरू न भोलू, त अवं मैनेरू मट्टू एज्जी गालू।” 24 “चेलो अपने गुरू करां बड्डो न भोए, ते न नौकर अपने मालिके करां। 25 चेलेरे लेइ त एन्ने बड्डुए कि तै अपने गुरेरो ज़ेरो भोए, ते नौकरेरे लेइ एन्ने बड्डुए कि तै अपने मालिकेरे बराबर भोए, अगर तैनेई मालिके जो शैतान ज़ोवं, त तैसेरे घरेबालन जो केनू ज़ोनूए।” 26 “तुस तैन करां न डेरथ, किजोकि कोई चीज़ छप्पोरी नई, ज़ै खोल्ली न गाली, ते कोई भेद छप्पोरो न रालो, बल्के सारो भेद बांदो भोलो। 27 ज़ैन किछ अवं तुसन सेइं आंधरे मां ज़ोताई, तुस तैन दीसां ज़ोइयथ, ते ज़ैन किछ तुशे कन्ने पत्र बल्हे सेइं शुनावं गाते, तुस लाए पुड़ गेइतां तैसेरो प्रचार केरथ। 28 तुस तैन करां न डेरथ ज़ैना जानी त मारतन, पन आत्मा न मैरी बटन, परमेशरे करां डरा, ज़ै आत्माई ते जानी दुइने नरके मां नाश केरि बटते। (Geenna g1067) 29 कुन एक्की सिकेरी दूई चड़ोली न बिकन? फिरी भी तुशो बाजरे मेरज़ेरे बगैर तैन मरां अक भी धेरती पुड़ न झेड़ी बटन। 30 परमेशर तुशे हर गल्लरी फिक्क केरते इड़ी तगर तुशे दोगेरे बाल भी गन्नोरेन। 31 एल्हेरेलेइ डरा न, तुशे कदर बेड़ि चड़ोलन करां भी बड़ी जादे।” 32 “ज़ैना लोक, मैन्हु केरे सामने मेरो इकरार केरतन कि तैना मेरे चेलन, त अवं भी अपने स्वर्गेरो बाजी केरे सामने तैन केरो इकरार केरेलो, कि तैना मेरे चेलन। 33 पन ज़ैना लोक, मैन्हु केरे सामने इन ज़ोने करां डरेले, कि तैना मेरे चेलन, त अवं भी तैन केरो अपने स्वर्गेरो बाजरे सामने इन्कार केरेलो, कि एना मेरे चले नई।” 34 “इन न सैमझथ कि अवं धेरती पुड़ एल्हेरेलेइ ओरोई लोक मेल मिलापे सेइं रान, पन मेरू एज्जु लोकन एप्पू मांमेइं लड़नेरी वजा भोइ, मेल मलाप नई। 35 अवं एल्हेरेलेइ ओरोई कि मट्टे बाजी करां ते कुइये अम्मा करां ते नुशी शिखी करां अलग केरि। 36 मैनेरे दुश्मन त तैसेरे अपने घरेरे लोक भोनेन।” 37 ज़ै कोई अम्मा या बाजी मीं करां जादे ट़लारे समझते, तै मेरो चेलो बन्नेरे काबल नई ते ज़ै कोई मट्टे या कुइये मीं करां जादे समझते, तै भी मेरो चेलो बन्नेरे काबल नई। 38 ज़ै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नई, त तै भी मेरो चेलो बन्नेरे काबल नई। 39 ज़ै कोई मरने करां बचनेरे लेइ मेरो इन्कार केरेलो, त तैन हमेशारी जिन्दगी न मैलेली। पन ज़ै मीं पुड़ विश्वास केरनेरे वजाई सेइं अपने जान देनेरे लेइ भी तियार भोलो, त तैस हमेशारी जिन्दगी मैलेली। 40 “ज़ैना तुसन कबूल केरतन, तैना मीं कबूल केरतन, ज़ैना मीं कबूल केरतन, तैना सिर्फ मीं नई, पन तैना परमेशरे भी कबूल केरतन, ज़ैनी अवं इड़ी भेजोरोई।” 41 “ज़ै नेबन, नबी सेमझतां कबूल केरेलो, परमेशर तैस नेबी केरे बराबर इनाम देलो, ते ज़ै धेर्मी मैन्हु धर्मी

सेमझतां कबूल करेते, परमेश्वर तैस धेर्मी बराबर इनाम देलो। 42 जै कोई इन निकड़न मरां एक्की मेरो चेलो बुझतां सिर्फ अक कटोरो ठंडू पानी पियालो, अवं तुसन सेइं सच ज़ोताई तैस पक्कू इनाम मेलनू आए।”

11 ज़ैखन यीशुए अपने 12 चेलन हुक्म दित्तो, त तै तैट्ठां चलो जेव, ताके चेलां केरे नगरन मां गेइतां शिक्षा दे ते प्रचार केरे। 2 यूहन्ना नेबे कैदखाने मां मसीहरे कम्मां केरे बारे मां शुन्तां तैस कां अपने चले इन पुच्छने भेजे। 3 “तैनी तैन सेइं ज़ोवं, एजनेबालो मसीह तू आस, जेसेरे बारे मां परमेश्वर वादो कियोरोए, या आस केन्ची होरि बलगम?” 4 यीशुए तैन जुवाब दित्तो, “ज़ैन किछ तुस शुन्तन ते लातथ तैन गेइतां यूहन्ना सेइं ज़ोथ। 5 कि काने लातन, ते टोन्टे च़लतन, ते कोढ़ी केरू कोढ़ शुद्ध भोते, ते टोँऊने शुन्तन, ते मुड़दे ज़ींते भोतन, ते गरीबन खुशखबरी शुनाई गातीए 6 परमेश्वर तैस बरकत देते, ज़ै मीं पुड़ शक न केरे।” 7 ज़ैखन यूहन्नारे चले तैट्ठां चले जे, त यीशु लोकन सेइं यूहन्नारे बारे मां ज़ोने लगो, “तुस सुनसान ठैरी कुन हेरने जोरे थिये? कुन हवाई सेइं हिलते निरेठरे डाले? 8 त फिरी होरू कुन हेरने जोरे थिये? माघां लिगड़ां लेइतां कोई? हेरा ज़ैन माघां लिगड़ां लेइतां भोतन तैना महलन मां रातन। 9 फिरी तुस कुन हेरने जोरे थिये? कुन कोई नेबी? हाँ पन अवं तुसन सेइं ज़ोताई कि नेबी करां भी बड्डे हेरने जोरे थिये। 10 ई तैए यूहन्ना आए जेसेरे बारे मां परमेश्वर पवित्रशास्त्रे मां ज़ोते, कि हेरा, ‘अवं अपने बिस्तार देनेबालो तीं अग्री भेजताई, ज़ै तेरे लेइ बत तियार केरेलो।” 11 अवं तुसन सेइं सच ज़ोताई, कि ज़ै कुआन्शन करां ज़रमोरोए तैन मां यूहन्ना बपतिस्मो देनेबाले करां कोई बड्डो नई भोरो, पन ज़ै स्वर्गे राज़े मां निकड़े करां निकड़ोए तै तैस करां भी बड्डोए। 12 यूहन्ना बपतिस्मो देनेबालेरे दिहाइन करां अज़ तगर प्रचार भोइ रावरोए, ते स्वर्गे राज़ जल्दी बधने लोरूए, पन बडे निगगर लोक तैस पुड़ हमलो केरतन। 13 सारे नेबी केरे लेख, ते मूसेरो कानून यूहन्ना तगर भविष्यवाणी केरते राए। 14 अगर तुस चाथ ते मन्नथ, एलिय्याह जेसेरे बारे मां नेबेई ज़ोरू थियूं, कि तै एजनेबालो थियो तै ईए। 15 ज़ै कोई समझनू चाते, तै ध्याने सेइं शुने ते समझे। 16 “अवं इस ज़मानेरे लोकां केरि मिसाल केस सेइं देई, इना तैन मड्डां केरे ज़ेरेन ज़ैना बज़ारन मां बिश्तां अपने दोसन सेइं शिकैयत केरतन, 17 कि असेई तुश्वे लेइ बाज़ो बज़ाव, ते तुस न नछ्रे, ते असेई शौग कियो ते तुसेई छाती न पिट्टी। 18 किजोकि यूहन्ना बपतिस्मो देनेबालो जादे तर बरत रखतो थियो, ते शराब न थियो पीतो, ते तैना तैस जो ज़ोतन कि एस पुड़ भूतेरो सैयो आए। 19 ते मैनेरू मट्टू यानी अवं खातो पीतो अव, हेरा, ते तैना ज़ोतन पेटू ते शराबी मैन्हु ते चुंगी नेनेबाले ते पापी लोकां केरो दोस्त, पन अक्लमन्द कोने तेसेरे कम्मेई सेइं पतो च़लते।” 20 तैखन यीशु फिरी तैन नगरन मां गेइतां तैट्टेरे लोकन झिड़कतां ज़ोने लगो, ज़ैन मां तैनी चमत्कार कियोरे थी, पन तैनेई अपने पापन करां मन न फिराव। 21 “हे

खुराजीन नगरेरे लोकव! तुसन पुड़ अफ़सोस, हे बैतसैदा नगरेरे लोकव तुसन पुड़ अफ़सोस, कि ज़ैना चमत्कार तुसन मां कियो, अगर एना चमत्कार सूर ते सैदा नगरन मां कियोरे भोथे, त तैन लोकेई केइसेरे देंतेरी टाट पलेटतां ते मांज़नी मां बिश्तां अपने पापन करां मनफिरावरो भोथो। 22 पन अवं तुसन सेइं ज़ोताई, कि इन्साफेरे दिहाइ परमेश्वर, ज़ै सज़ा सूर ते सैदा नगरां केरे लोकन देलो, तुश्वी सज़ा तैस करां भी जादे भोली। 23 ते हे कफ़रनहूम नगरेरे लोकव, कुन तुस सोचतथ कि स्वर्ग मां तुश्वी आदर भोनीए! नई तुस त नरके गाले ज़ैडी पापी लोकन सज़ा मैलेली! किजोकि ज़ैना चमत्कार तुसन मां कियो, अगर मीं एना सदोम नगरे मां कियोरे भोथे त सदोम नगर अज़ तगर भी भोन्नू थियूं। (Hadēs 986) 24 पन अवं तुसन ज़ोतां कि इन्साफेरे दिहाइ परमेश्वर ज़ै सज़ा सदोम नगरेरे लोकन देलो, तुश्वी सज़ा तैस करां भी जादे भोली।” 25 तैखन यीशुए ज़ोवं, “हे बाजी, स्वर्ग ते थेरतेरे प्रभु, अवं तेरू शुक्र केरतां कि तीं एना गल्लां अक्लमन्द ते समझदार लोकन करां छपेइतां रेख्खी ते तैन लोकन पुड़ बैदी की, ज़ैना निक्के बच्चां केरे ज़ेरे आन। 26 हाँ, हे बाजी तीं एन्ने रोड़ू लगू। 27 “मेरे बाजेई सब किछ मेरे सुपुर्द कियोरूए; कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टू ज़ानते, या तै मैन्हु बाजी ज़ानते ज़ैस पुड़ मट्टू बांदो केरने चाए। 28 “हे मेहनत केरनेबाले लोकव, ते भार सेइं थकोरे लोकव मीं कां एज्जा; अवं तुसन आराम देइलो। 29 मेरे अधीन एन्चरे भोथ जेन्चरे दांत जूँए हैठ भोते, ते ज़ैन किछ अवं तुसन शिखालताई तैस शिख्खा, किजोकि अवं शरीफ आई ते दिलेरो नम्र आई ते तुश्वी जानी आराम मैलेलो। 30 ज़ै भार अवं तुसन देइलो तै पोल्लोए, तुस तैस आरामे सेइं छुई सकतथ।”

12 यीशु आरामेरे दिहाइ ऊडारन मांमेई एक्की बत्तां च़लोरे थियो, ते तेसेरे चेलन ढ़लुख लग्गी, ते तैना शिल्लां ढ़लोइतां खाने लागे। 2 फरीसी लोकेई एन लेइतां यीशु सेइं ज़ोवं, “तक! तेरे चले तैन कम केरने लोरेन ज़ैन आरामेरे दिहाइ केरनू जेइज़ नई।” 3 यीशुए तैन जुवाब दित्तो, “कुन तुसेई पवित्रशास्त्रे मां कथे नई पढ़ेरू कि ज़ेइस इश्शे पूर्वज दाऊद राज़ो त तेसेरे साथी ढ़लुखोरे थिये त तैनेई कुन कियोरू थियूं? 4 तै केन्चरे परमेश्वरेरे घरे मां जेव, ते ज़ैना च़ैद्वेरी रोटी थी तैट्ठां एन्तां एण्पू भी खेइ, ते अपने सैथन भी दित्ती, ते तैनेई भी खेइ हालांकी तैना रोटी खैनी तैन केरे लेइ जेइज थी, तैना सिर्फ याजक खेइ सकते थिये। 5 या तुसेई मूसेरो कानूने मां एन भी नई पढ़ेरू, कि याजक मन्दरे मां आरामेरे दिहाइरी विधि न मन्ने पुड़ भी बेकसूर भोतन। 6 पन अवं तुसन सेइं ज़ोताई कि इडी तैए, ज़ै मन्दरे करां भी बड्डोए। 7 अगर तुस एल्हेरो मतलब ज़ानेथे कि, अवं बलिदान नई बल्के दया पसंद केरताई, त तुस बेकसूर कुसुरवार न बनाथे। 8 किजोकि मैनेरू मट्टू यानी अवं आरामेरे दिहाइरी भी प्रभु आई।” 9 यीशु तैट्ठां निस्तां तैन केरे प्रार्थना घरे मां जेव। 10 तैडी अक मैन्हु थियो, जेसेरो हथ

शुक्कोरो थियो, तैनेई यीशु दोष लानेरे बहाने सेइं तैस पुच्छू, तैसेरे फल भी रोड़ी भोलो, अगर बुट बुरोए त तैसेरे फल भी बुरो “कुन आरामेरे दिहाड़े कोई बड़ानो जेइजे?” 11 तैनी तैन जो जोंव, “तुसन मरां कौने, जेसेरी अक्के भेड भोए, ते तै आरामेरे दिहाड़े गते मांजो बिछड़े, त तुस कुन तैस तैटुं बेइर न कढेले? 12 मैनेरी कीमत त भैडी करां केत्री जादे! एल्लेरेलेइ आरामेरे दिहाड़े रोडू कम केरनू जेइजे।” 13 तैखन यीशुए तैस मैन्हु जो जोंव, “अपनो हथ अग्रोंव केरा।” तैनी मैने अपनो हथ अग्रोंव कियो, ते अकदम तैसेरो हथ बेज्जोव। 14 तैखन फरीसी लोक बेइर गेइतां तैसेरी खलाफ साजिश केरने लगे, कि एस केन्चरे मारम? 15 इन बुझतां यीशु तैटुं चलो जेव। ते बडे लोक तैस पत्ती चले, ते तैनी तैना सब बड़झाए। 16 ते तैनी तैना खबरदार किये, कि मेरे बारे मां केन्ची सेइं न ज़ोइयथ। 17 ताके यशायाह नेबेरी ज़ोरी तै गल पूरी भोए: 18 “हेरा ई मेरो सेवके जै मीं चुनोरोए, ई मेरो ट्लारोए ज़ैस पुड़ मेरो दिल खुशे, अवं अपनि आत्मा तैस पुड़ छडेले, ते तै गैर कौमन मां गेइतां इन्साफेरी खबर शुनालो। 19 तै न लड़ाई केरेलो, ते न शौर, ते बज़ारन मां कोई तैसेरी आवाज़ न शुनेलो। 20 ते ए ढलेन्चोरे निरेठरे डाले न ट्लोडेलो, ते न बलतो दीयो हिशाहो ज़ां तगर इन्साफ भारी न भोए। 21 ते तैसेरे नंवे पुड़ गैर कौमां उमीद रेखेली।” 22 तैखन लोकेई अक मैन्हु यीशु कां आनो ज़ै कानो ते लट्टो थियो ते तैस पुड़ भूतेरो सैयो थियो, ते तैनेई तैस कां आनो, तैनी तै ठीक कियो, ते तै लहने लगे ते गल्लां भी केरने लगे। 23 एन हेरतां लोक हैरान भोइतां जोने लगे, “कुन एन दाऊदेरू मट्टूए?” 24 पन फरीसी लोकेई एन शुन्तां जोंव, “ए त भूतां केरे प्रधान शैतानेरी मद्दती सेइं भूतां केरो सैयो कढते।” 25 यीशुए तैन केरे मन्नां केरे खियाल ज़ैनतां तैन सेइं जोंव, “ज़ैस राज़े मां फूट पेचे, तैन राज़ बनोरू न रेइ सके, ते केन्ची नगर या खानदाने मां फूट पेचे, तैन भी बनोरू न राए। 26 अगर शैतान एप्पू अपने भूतां कढे, त तै अपनो मुखालफ एप्पू भुओ, त फिरी तैसेरू राज़ केन्चरे बनोरू रेइ सकते? 27 अगर अवं शैतानेरी मद्दती सेइं भूतां केरो सैयो कढताई त तुश्शे अपने मैन्हु केसेरी मद्दती सेइं कढतन? तैन्ना तुश्शो हाकिम भोले। 28 पन अगर अवं परमेशेरी आत्मा रे मद्दती सेइं भूतां केरो सैयो कढताई त परमेशेरू राज़ तुश्शे नेडे पुजोरूए। 29 या कोई मैन्हु केन्ची ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि ते पेइले तैस ज़ोरेबाले मैन्हु बेंधी न छुड़े। तैखन ते तैस ज़ोरेबाले मैनेरो माल लुट्टी सकते। 30 ज़ै मीं सेइं साथी नई ते मेरे खलाफे, ते ज़ै मीं सेइं साथी नई तै अकोट्टु न केरे ते इरां उरां बिदलते। 31 एल्लेरेलेइ अवं तुसन सेइं ज़ोताई कि, मैन्हु केरे सारे पाप ते तुहीन माफ़ भोली, पन पवित्र आत्मारी तुहीन माफ़ न भोली। 32 ज़ै कोई मैनेरे मट्टेरे खलाफ किछ ज़ोलो, त तैसेरो ए पाप माफ़ कियो गालो, पन ज़ै पवित्र आत्मारी तुहीन केरे, त तैस मैन्हु न इस दुनियाई मां माफ़ भोलू ते न एजने बैली दुनियाई मां माफ़ भोलू।” (aiōn g165) 33 “अगर बुट रोड़े, त

तैसेरे फल भी रोड़ी भोलो, अगर बुट बुरोए त तैसेरे फल भी बुरो भोलो, किजोकि बुट अपने फले सेइं पिशैनोते। 34 तुस ज़हरीले सपेरे बच्चां केरे बुरे भोइतां रोड़ी गल केन्चरे ज़ोई सकतथ? किजोकि ज़ैन दिले मां भोते तैन्ने ज़बानी पुड़ एइते। 35 रोड़े मैन्हु दिलेरे रोड़े खज़ाने मरां रोड़ी गल्लां कढते, ते बुरो मैन्हु बुरे दिलेरे बुरे खज़ाने मरां बुरी गल्लां कढते (दिल खज़ानेरो ज़ेरोए)। 36 अवं तुसन सेइं ज़ोतां, कि ज़ैना-ज़ैना निक्केमी गल्लां मैन्हु ज़ोले, इन्साफेरे दिहाड़े लोकन अपनि हर एककी तैस गल्लरो हिसाब देनो भोलो। 37 किजोकि तू अपने गल्लेई सेइं धर्मी ते अपने गल्लेई सेइं दोषी भोलो।” 38 इस पुड़ किछ शास्त्री ते फरीसी लोकेई तैस सेइं जोंव, “हे गुरु अस तीं करां कोई निशान हेरनो चातम।” 39 तैनी तैन जुवाब दित्तो, “इस ज़मानेरे बुरे ते बदमाश लोक निशान हेरनो चातन, पन तैन योना नेबेरे निशानेरे अलावा होरो कोई निशान न दित्तो गालो। 40 ज़ेन्चरे योना नबी ट्लाई दिहाड़े ते ट्लाई रातन मेछलरे पेटे मां राव, तेन्चरे मैनेरू मट्टू यानी अवं भी ट्लाई दिहाड़े ते ट्लाई रातन ज़मीनी मां रालो। 41 चीनवेरे लोक इन्साफेरे दिहाड़े इस ज़मानेरे लोकन सेइं साथी खडे भोइतां एन दोषी बनाले, एल्लेरेलेइ कि तैनेई योनारो प्रचार शुन्तां पापन करां मन फिराव, ते हेरा इड़ी तैए, ज़ै योना करां भी बड्डोए, पन तुसेई पापन करां मन फिरानो न चाव। 42 दक्षिणेरी रानी इन्साफेरे दिहाड़े इस ज़मानेरे लोकन सेइं साथी खडी भोइतां दोषी बनाली, किजोकि ते बडे दूरेरां सुलैमान राजेरू ज़ान शुन्नेरे लेइ ओरी थी, पन हेरा इड़ी तैए, ज़ै सुलैमाने करां भी बड्डोए।” 43 “ज़ैखन केन्ची मैन्हु मरां भूतां केरो सैयो निसते, त तै अपने आरामेरे लेइ बेरान ठारां हंठते, पन ज़ैखन तैस ठार न मैल्ले। 44 तैखन ज़ोते, कि अवं वापस अपने तैस्से घरे मां गाताई ज़ैस मरां निसोरो आई, ते ज़ैखन तै वापस एइते, त तैस तैन घरे खाली, धोवेरू ते साफ सुथरू सज़्जो-सज़ेवरू मैलते। 45 तैखन तैन गाते ते सत बुरां भूतां एप्पू सेइं साथी आनते, ते तैन सब तैस मां रहतन, ते तैस मैनेरो हाल पेइले हाले करां भी जादे बुरो केरतन, तेन्चरे इस ज़मानेरे बुरे लोकां केरो हाल भी एरो भोनोए।” 46 ज़ैखन तै मैन्हु सेइं गल्लां केरने लोरो थियो, त तैसेरी अम्मा ते कने तैसेरे ढूला खडे थी, तैना तैस सेइं गल्लां केरनि चाते थियो। 47 केन्चे गेइतां तैस सेइं जोंव, “बेइर तेरी अम्मा ते ढूला खडे आन, तैना तीं सेइं गल केरनि चातन।” 48 एन शुन्तां तैनी पतो देनेबाले जो जोंव, “कौने मेरी अम्मा, ते कौन मेरे ढूला?” 49 ते अपने चेलां केरे पासे हथ अग्रोंव केरतां जोंव, “हेरा मेरी अम्मा, ते मेरे ढूला इना आन। 50 किजोकि ज़ै कोई मेरे स्वगेरे बाजेरी मेर्ज़ी पुड़ चलते तैए मेरो ढूला ते मेरी बेइन्न, ते मेरी अम्मा आए।”

13 तैस दिहाड़े यीशु घरेरां निस्सो, ते गलील समुन्दरेरे बन्ने पुड़ गेइतां बिश्शो। 2 तैसेरे सेत्रे पासन लोकां केरि एत्री भीड़ अकोट्टी भोइ, ते ते एककी किशती मां चढो ते बिश्शी जेव, ताके तै सेबभी लोकन परमेशेरी गल्लां केरि शिक्षा देइ सके, ते

सारे लोक बन्ने पुड़ खड़े राए। 3 तैखन तैनी तैन सेइं कहैनी केरे तरीके सेइं बेड़ि गल्लां जोई, “एक्सां अक बीज़ बेनेबालो बीज़ बेने जो जेव। 4 बीज़ बेते बार किछ बीज़ बत्तेरे डुलेखी बिछड़ू त चुड़ोल्लेई एइतां तैन बीज़ चुनू। 5 किछ बीज़ घोड़नबाली ज़मीनी पुड़ बिछड़ू, जेड़ी तैस डुग्घी मिती न मेलनेरे वजाई सेइं तैन लूशी उग्गू ते बूटो लगो। 6 पन ज़ैखन दिहाड़ो निस्सो, त तै निकड़ो बूटो फुक्कोई जेव। ज़ील न छड़ुनेरे वजाई सेइं शुक्की जेव। 7 डाल भी साथी लग्गो। 27 मालिकेरे नौकरेई एइतां तैस सेइं ते किछ बीज़ कंटां केरे झैल्लन मां बिछड़ू। ज़ैखन तैड़ी बूटो लगो, त कंटां केरे झैल्लेई भी बेड़ोइतां तै बूटो दबेइ छड़ो। 8 पन ज़ैन रोड़ी ज़मीनी मां बिछड़ू, त तैस फल भी लगो केन्ची शौव गुणा केन्ची शठ गुणा, ते केन्ची ट्ली गुणा। 9 जै कोई समझनू चाते, तै ध्याने सेइं शुने ते समझो।” 10 चेलेई यीशु कां एइतां पुच्छू, “तू लोकन सेइं कहैनी केरे तरीके सेइं गल्लां किजो केरतां?” 11 तैने जुवाब दितो, “तुसन त स्वर्गेर राज़ेरे भेदां केरि समझ दितोरीए” पन होरि लोकन नई। 12 किजोकि ज़ैस कां परमेशेरी मर्जी समझनेरी इच्छा आए, तैस परमेशर जादे समझ देलो। पन ज़ैस कां परमेशेरी मर्जी समझनेरी इच्छा नई, तैस केरां, थोड़ी ज़ेरि समझ, जै तैस कां आए, तै भी नी गाली। 13 अवं तैन सेइं एल्हेरेलेइ कहैन्न मां गल्लां केरतां, कि तैन, तैना बार-बार शुनेले, पन मेरी गल न समझेले। 14 तैन केरे बारे मां यशायाह नेबेरी भविष्यवाणी पूरी भोतीए, “तुस कन्नेई सेइं त शुनेले पन समझेले न, तुस एछछन सेइं त लाएले पन पिशैनी न सकेले।” 15 “किजोकि एना लोकां केरे दिलन पुड़ चरभी भेरोरीए, ते एना कन्न सेइं उकड़ु शुन्तन, ते एनेई अपनि एछछी तुमोरिन, एरू न भोए कि तैना एछछेई सेइं लहन, ते कन्नेई सेइं शुन्न ते दिले सेइं समझन, ते मेरे पासे फिरन ते अवं तैन बड़्झेइ।” 16 “पन तुशशी एछछी धन आन, कि तुस लातथ ते तुशशे कन्न धन आन किजोकि तुस शुन्तन। 17 अवं तुसन सेइं सग्र ज़ोताई, कि बड़े नेबी ते थेरमी लोकेई चाव कि ज़ैन गल्लां तुस हेरतथ तैना हेरन, पन न हेरी बेटि, ते ज़ैना गल्लां तुस शुन्तन शुन्न, पन न शुनी बेटि।” 18 “हुनी तुस बीज़ बेनेबालेरी कहैनरो मतलब शुना। 19 बीज़ बेनेबालो तै आए, ज़ै परमेशेरी गल्लां लोकन शुनाते। ज़ैना मैन्हु परमेशेरी गल्लां शुन्तन, तैन मरां किछ लोक तैस बत्तेरे ज़ेरे आन, जेड़ी बीज़ बिछड़ते। तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केड़ी छड़ते। 20 ते ज़ैन घोड़नबाली ज़मीनी मां बेवं, एना तैना आन, ज़ैना खुशी सेइं वचन शुन्तन कबूल केरतन। 21 पन एण्णू मां ज़ील न रखनेरे वजाई सेइं तैन थोड़े दिहाड़ी केरूए, ते ज़ैखन वचनेरे वजाई सेइं तैन पुड़ मुसीबत या जुलम भोते त तैखने ठोकर खातन। 22 होरे किछ लोक ज़ैना परमेशेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। पन दुनियारो फिफ्र ते दौलतरे वजाई सेइं थोखो खातन, ते तैना बेफल रेइ गाते। (aiōn g165) 23 ज़ैन रोड़ि ज़मीनी मां बेवं, एन तैना लोकन ज़ैना वचन शुन्तन ते समझतन, ते तैस फल भी लगते कोन्ची शौव गुणा कोन्ची शठ गुणा, ते केन्ची ट्ली गुणा।” 24 यीशुए तैन अक होरि मिसाल देइतां ज़ोवं, “स्वर्गेर राज़ तैस मैनेरू ज़ेरूए ज़ैनी अपने ऊडारे मां रोड़ू बीज़ बेवं। 25 पन ज़ैखन लोक झुलोरो थिये, त तैसेरे दुश्मने एइतां तैसेरे ऊडारे मां गेहुं केरे बीजे मामेइं जंगली बीज़ बेवं। 26 ज़ैखन पट्लां ते शिल्लां लगां लगने त तै जंगली डाल भी साथी लग्गो। 27 मालिकेरे नौकरेई एइतां तैस सेइं ज़ोवं, “हे मालिक, कुन तीं अपने ऊडारे मां रोड़ू बीज़ न थियूं बेवरू, फिरी जंगली तैस मां कोठां अव?” 28 तैनी तैन सेइं ज़ोवं, एन केन्ची दुश्मनेरू कम्मे, नौकरेई पुच्छू कुन तू चातस, कि अस गेइतां तैन पुट्टी छडम? 29 पन तैनी ज़ोवं नन्ना, एरू न भोए कि तैस सेइं साथी तुस गेहुं भी पुटथ। 30 फसल लुन्ने तगर दुइये साथी बेडोने देथ, ते लुनते बार अवं एण्णू लुन्ने बालन सेइं ज़ोइलो, कि पेइले जंगली बीज़ लुन्तां अग्गी मां फुकनेरे लेइ अकोट्टू केरा, ते फिरी तुस गेहुं मेरे कोठारे मां जमहां केरतां रख्खा।” 31 तैनी तैन अक होरि मिसाल देइतां ज़ोवं, “स्वर्गेर राज़ शेरीएरे बीजेरू ज़ेरू आए, ज़ैन एक्के मैने आनू ते अपने ऊडारे मां बेवं। 32 एन बीज़ सेब्भी बीज़न करां निक्कु भोते, पन ज़ैखन तैन बीज़ बेव गाते, त तैन उगतां सारे निक्के-निक्के बुट्टन केरां बड्डू भोते। ते एरो बुट्ट बनते इड़ी तगर कि अम्बरेरां चुड़ोल्लू भी तैस पुड़ बिशतन।” 33 तैनी तैन अक होरि मिसाल देइतां ज़ोवं, “स्वर्गेर राज़ अम्लटेरू ज़ेरूए, ज़ैन केन्ची कुआन्थां आनू, ते हछे अट्टे मां मलाव ते सारू अट्टू खमीर बेनि ज़ोवं।” 34 एन सैरी गल्लां यीशुए तैन लोकन मिसाल देइतां शुनातो थियो, ते मिसाल देनेरे बगैर तै तैन किछ न थियो शुनातो। 35 ताके तैन वचन ज़ैन नेबे ज़ोवरो थियूं पूरू भोए, “अवं कहैनी केरे लेइ अपनि ज़बान खोल्लेलो, ते तैना गल्लां ज़ोइलो ज़ैना दुनिया बन्ने करां पेइली छेप्पोरी थी।” 36 तैखन यीशु लोकन करां अलग भोइतां घरजो अव, ते तैसेरे चेलेई तैस कां एइतां ज़ोवं, “तू असन ऊडारेरे जंगली बीजेरी कहैनरो मतलब समझा।” 37 तैनी तैन जुवाब दितो, “रोड़ू बीज़ बेनेबालो मैनेरू मट्टए। 38 ऊडार ई दुनियाए, ते रोड़ू बीज़ राज़ हासिल केरनेबालू लोक, ते जंगली बीज़ शैतानेरे लोक आन। 39 ते तै दुश्मन ज़ैनी तैन बेवरू थियूं तै शैताने, लुन्नेरो मतलब इस दुनियारो अन्त भोनोए, ते लुन्ने बाले स्वर्गदूतन। (aiōn g165) 40 ज़ेन्चरे जंगली बीजेरे ग्लेव अकोट्टे केरतां अग्गी मां फुकतन, तेन्चरे इस दुनियारो अन्त भोनोए। (aiōn g165) 41 मैनेरू मट्टू अपने स्वर्गदूतन भेजेलू, ते तैन केरे राज़े मां ठोकरारी वजा ते बुरां कम्मां केरनेबालन अकोट्टे केरेले। 42 ते तैन अग्गारे कुण्डे मां छडेले, ज़ैड़ी तैना लोक लेरां देते ते दंत च़ापते राले। 43 तेइस धर्मी लोक अपने बाजी केरे राज़े मां दिहाड़े ज़ेरे चमकेले। ज़ै कोई समझनू चाते, ते ध्याने सेइं शुने ते समझो।” 44 “स्वर्गेर राज़ तैस दौलतरू ज़ेरू ए, ज़ै एक्की ऊडारे मां दबोरी थी, ज़ै एक्की मैने तोप्पी, ते तैस मैल्ली भी, ते फिरी तैने छपेइतां छड़ी ते खुशी सेइं अपनू

सब किछ बेचतां तैन ऊडार धिनु। 45 “स्वर्गेरू राज तैस बुपैरू जेरूए, जै कीमती मोती तोपतो थियो। 46 जैखन तैस अक कीमती मोती मैल्लो, त तैनी अपनू सब किछ बेचतां तै मोती धिनी। 47 “स्वर्गेरू राज तैस मेछली जालेरू जेरूए, जैन समुन्द्रे मां छडू ते तैस मां हर किसमेरी मेछली लेगी। 48 ते जैखन जाल भरोई जोंव त झिरेई जाल खिचतां कनारे पुड़ आनू, ते बिश्तां रोड़ी-रोड़ी मेछली टोकरन मां रेख्खी ते बुरी-बुरी मेछली शैरी छेडी। 49 दुनियारे अन्ते मां भी एरू भोनूए, स्वर्गदूतेई एइतां दुष्ट लोक, धेर्मी लोकन करां अलग केनेन। (aiōn g165) 50 ते तैना अगारी भेठी मां छडनेन तैडी लेरां ते दंत चापने भोले। 51 “कुन तुसेई एन सैरी गल्लां सेमझी?” तैनेई जोंव, “हाँ” असेई सेमझी। 52 फिरी यीशुए तैन सेई जोंव, “हर अक शास्त्री जै स्वर्गेरू राजेरे चेलो बनोरोए एककी एरे मुकान मालिकेरो जेरोहे, जै अपने खजाने मरां नवीं ते पुरैनी चीजां कढते।” 53 जैखन यीशुए एना सब कहैनी शुनेई त तै तैटां अग्रोव चलो जेव। 54 ते अपने नगर मां एइतां तैट्टेरे प्रार्थना घरे मां गेइतां शिक्षा देने लगे, ते लोक तैसेरी शिक्षा शुन्तां हैरान भोए ते ज़ोने लगे: “ए अक्ल बुधी ते एना चमत्कार एस कोट्टां हासिल भोए। 55 एन त तैस दलखानेरू मट्टू आप ते एसेरे अम्मारू नवं मरियम ते एसेरे दूलां केरू नवं याकूब, यूसुफ, शमीन ते कने यहूदा आन, 56 ते एसेरी सब बेइनां इश्शे इडी रेडचन, फिरी एसमां ई काबलीत कोट्टां आई?” 57 एन्चरे तैन लोकेई इन्कार कियो। पन यीशुए तैन सेई जोंव, “नबी अपने नगर मां ते अपने घरेरे अलावा होरि कोन्ची ठारी बेइजत न भोए।” 58 ते तैने तैडी तैन केरे विश्वास न केरनेरे वजाई सेई जादे चमत्कार न हिराए।

14 जेइस हेरोदेस जै मुलखेरे चैवरोवं हिस्से पुड़ हकोमत केरतो थियो, तैनी यीशुएरे बारे मां शुनु। 2 तैनी अपने नौकरन सेई जोंव, “ए यूहन्ना आए जै बपतिस्मो देनेबालोए, ए मुड़दन मरां जीतो भोरोए, एल्लेरेलेइ तै चमत्कार हिराते।” 3 किजोकि हेरोदेसे अपने दूलाए फिलिप्पुसेरी कुआन्श हेरोदियासेरी वजाई सेई यूहन्ना टलेइतां बन्धोवरो ते कैदखाने मां छडोरो थियो। 4 किजोकि यूहन्ना हेरोदेस सेई ज़ोरू थियूं, कि ए रखनी तेरे लेइ जेइज नई। 5 ते हेरोदेस तैस कत्ल केरनो चातो थियो, पन लोकन करां डरतो थियो, किजोकि लोक तैस नबी मन्ते थिये। 6 पन जैखन हेरोदेसेरी जर्म दिहैडी आई, त हेरोदियासेरे कुइयां मेहमाना केरे सामने नेचतां हेरोदेस खुश कियोरो थियो। 7 एल्लेरेलेइ तैनी वादो कियोरो थियो, “कि जैन किछ तू मगगेली, अवं तीं तैन्ने देलो।” 8 तैसां अपने अम्मारे शिखालने पुड़ जोंव, “मींजेई यूहन्ना बपतिस्मो देनेबालेरी क्रोडी थाले मां मग।” 9 राजे बड़ी अफ़सोस भोव, पन अपने मेहमाना केरे सामने ते कसम खानेरी वजाई सेई हुक्म दित्तो कि देय। 10 ते तैनी कैदखाने मां लोक भेजतां यूहन्नारी क्रोडी कटाई। 11 ते तैसेरी क्रोडी थाले मां रेखतां कुइये कां दिती, ते तै अपनि अम्मा कां घिन्तां जेई। 12 तैखन तैसेरे चले आए, ते तैनेई तैसेरी लाश

नेइतां देबतां छडी ते गेइतां यीशुए पतो दित्तो। 13 जैखन यीशुए एन शुनु, त तै किश्तरे ज़िरिये अकेन्ती ठारी जो चलो जेव, ते लोक एन शुन्तां नगर नगरे पैदल तैस पत्ती चले जे। 14 जैखन यीशु किश्ती मरां ओरसो त तैनी बड़े लोक पतारां एइते लाए, ते तैस तैन पुड़ बड़ो तरस अव, ते तैनी तैन केरे बिमार लोक बज्झाए। 15 जैखन इलोइज़ भोड, त यीशुएरे चलेई तैस कां एइतां जोंव, “ई सुनसान ठार आए, त चिर भी बडू भोरू आए। ते एन लोकन भेजी छड ते कोस्कोई इलोव्वन मां गेइतां किछ खाने जो घिन्न।” 16 यीशुए तैन सेई जोंव, “एना भेजने ज़रूरी नई! तुस्से एन किछ खाने जो देय।” 17 चलेई तैस सेई जोंव, “इडी असन कां पंच रोटी ते दूई मेछली केरे अलावा होरू किछ नई।” 18 तैनी जोंव, “तैन इरां मीं कां आनां।” 19 तैखन यीशुए लोकन घासे पुड़ उन्डे बिश्नेरे लेइ जोंव, ते पंच रोटी ते दूई मेछली हथ्ये मां रेख्खी, ते अम्बेरेरे पासे तेकतां शुक्र कियूं, ते रोटी टलोडी-टलोडी अपने चेलन कां दिती, ते चलेई तैन लोकन दिती। 20 ते सारे मैन्हु खेइतां रेज्जी जे। तैल्ला पत्ती, यीशुएरे चलेई बचोरे टुकड़न सेई 12 टोकरी भेरि। 21 रोटी खानेबाले लोकां केरि तैधात कुआन्शां ते बच्चां केरे अलावा कोई 5000 मडद थिये। 22 तैल्ला पत्ती, यीशुए अपने चेलन हुक्म दित्तो कि, तुस किश्ती मां चेट्टां मीं केरां पेइले समुन्दरेरे उस पार जो गाथ ते अवं एन लोकन वापस भेजतां एइताई। 23 लोकन भेजनेरे पत्ती, यीशु तैटां निस्तां नेडे एककी पहैडी पुड़ प्रार्थना केरनेरे लेइ जेव। ते इलोइज़ी तै अकैल्लो थियो। 24 तैखन किश्ती बन्ने करां दूर पुजोरी थी, किजोकि एग्रोवरां बड़ी तेज हवा चलोरी थी। 25 ते लगभग झेज्जेरे चेत्रे बजेई जैखन हेजु आंधरू थियूं, यीशु समुन्दरेरे पैनी पुड़ चेलतां अपने चेलन कां अव। 26 जैखन चलेई यीशु समुन्दरे पुड़ चलतो लाव त तैना डेरि जे, तैनेई बुझू, “ए भूत ओरोए,” ते डेरतां चिन्डां लगे मारने। 27 यीशुए तैखने तैन सेई रोइघारे गल्लां की ते जोंव, “हिम्मत रेख्खा डरा नन्ना, अवं आई।” 28 पतरसे तैस जुवाब दित्तो, “हे प्रभु अगर तू आस, त मीं भी हुक्म दे ते अवं भी पैनी पुड़ चलतो तीं कां एज्जी।” 29 तैनी जोंव, “एई!” तैखन पतरस किश्ती मरां ओस्तां यीशु कां गानेरे लेइ पैनी पुड़ मेई चलने लगे। 30 पन तेज हावी सेई छेल्ली चलने लेगी ते तै डेरि जेव, ते डुबने लगे तैखन तैनी चिन्डां मैरतां जोंव, “हे प्रभु मीं बच्चा।” 31 यीशुए लूशी अपने हथ्ये सेई झाफ देइतां पतरस ट्लातो, ते तैस सेई जोंव, “हे घट भरोसे बाला तीं किजो शक की?” 32 जैखन तैना किश्ती मां बिश्शे ते हवां रुकी जेई। 33 तैखन जैना किश्ती मां बिश्शोरे थिये, त तैनेई तैस कां मथ्यो टेको ते ज़ोने लगे, “तू सच्चे परमेशेरू मट्टूस।” 34 जैखन तैना गलील समुन्दर पार केरतां गन्नेसरत नव्वेरे जगाई पुड़ पुज्जे। 35 त तैट्टेरे लोकेई यीशु पिशानो ते आसेपासेरे इलाके मां खबर दिती, ते सारे बिमार तैस कां आने। 36 ते तैनेई यीशु सेई मिन्त केरते थिये कि, तैन तैसेरे लिगड़न सेई हुरने दे। ते जेजेरे तैसेरे लिगड़न सेई हथ लाव तैना सब बेज्झोए।

15 तैखन किछ फरीसी ते किछ शास्त्री लोक यरूशलेम नगरे मरां यीशु कां आए ते ज़ोने लगगे। 2 “तेरे चले बुजुर्गा केरि रसमरे खलाफ किजो चलतन, तैना रोटी खाने करां पेड़ले हथ न धोन?” 3 तैनी तैन जुवाब दित्तो, “तुस किजो अपने रसमन सेइं परमेशेरो हुक्म टलोइतथ? 4 किजोकि परमेशेरो ज़ोरुए, कि अपने हाज बव्वेरी इज़्जत केरा, ते ज़े कोई अपने हाज बव्वे जो बुरु ज़ोलो ते मारो गालो। 5 पन तुस ज़ोतथ, कि ज़े कोई बाजी या अम्मा सेइं ज़ोए कि, मीं करां ज़े किछ मद्दत तुसन मैल्ली सकती थी, ते पेड़ली बलिदान भोरीए, यानी परमेशेरो जो चढ़तन ज़ाद्वेरीए 6 त ते अपने बाजी केरि इज़्जत न केरे, एन्चरे तुस अपने रसमन सेइं परमेशेरो हुक्म टलोइतथ। 7 हे पाखंडी लोकव, यशायाह नेबे तुशे बारे मां ई भविष्यवाणी ठीक कियोरीए, 8 एना लोक ऐशी सेइं त मेरी बड़ी तारीफ़ केरतन, पन एन केरे दिल मीं करां बड़े दूर आन। 9 एना लोक बेफैइदी मेरी आराधना केरतन, किजोकि एना मैन्हु केरे हुक्मां केरि शिक्षा देतन।” 10 फिरी मैन्हु एप्पू कां कुजेइतां ज़ोवं, “शुना, ते समझा। 11 ज़े चीज़ ऐशी मां गाचे तैस सेइं मैन्हु जुट्टो न भोए, पन ज़ैन तैसेरे ऐशी मरां बेइरोवं निस्ते, तैन्ने तैस जुट्टो केरते।” 12 तैखन चेलैई यीशु कां एइतां ज़ोवं, “कुन तू ज़ानतस कि फरीसी लोकेई ए गल शुन्तां ठोकर खाइ?” 13 तैनी जुवाब दित्तो, “ज़े बुट मेरे स्वर्गे बाजे नई लोरो ते ज़ीलना पुटतां छडोए। 14 तैन केरि परवाह न केरा, तैन काने बत हिराने बालेन, अगर अक कानो होरि काने बत हिराए, त तैना दुइये गढे मां बिछड़ेले।” 15 एन शुन्तां पतरसे ज़ोवं, “ए मिसाल असन समझा।” 16 यीशुए ज़ोवं, “कुन तुस हेजू भी बेसमझाथ?” 17 “कुन तुस न ज़ानतथ, कि ज़ैन किछ ऐशी मां गाते तैन पेटे मां गाते, ते फिरी पेटे मरां बेइर निस्ते? 18 पन ज़ैन किछ मैनेरे अन्त्रेरां निस्ते, तैन दिले मरां निसते, तैन्ने मैन्हु जुट्टो केरते? 19 किजोकि बुरे खियाल, कत्ल केरनो, अडलाए देइने गलत कम केरनू, बदमाशी, चोरी, झूठी गवाही देनी, ते तुहीन दिले मरां निसचे। 20 एन एरी गल्लन ज़ैना मैन्हु जुट्टो केरचन, पन हथ धोने बगैर रोटी खाने सेइं मैन्हु जुट्टो न भोए।” 21 यीशु तैह्वां चलो जेव, ते सूर ते सैदारे आसेपासेरे इलाकेरे नेड़े अव। 22 तैस इलाकेरी अक कनानी कुआन्श यीशु कां आई, ते चिन्डां मैरतां ज़ोने लगगी, “हे प्रभु दाऊदेरा मट्ठां, मीं पुड़ दया केर, मेरी कुइये पुड़ भूतेरो सैयोए, तैन भूत तैस बड्ड सताते।” 23 पन यीशुए कोई जुवाब न दित्तो, तैसेरे चले नेड़े एइतां तैस कां मिनत केरने लगगे, “एस भेज़, किजोकि ए चिन्डां मारचे ते इश्शो पीछो न छडे।” 24 तैनी जुवाब दित्तो, “अवं इसाएलेरी हेरोरि भैट्ठां केरे अलावा होरि कोन्ची कां नई भेजोरो।” 25 पन ते कुआन्श आई, ते तैस कां मथथो टेकतां ज़ोने लगगी, “हे प्रभु मेरी मद्दत केर।” 26 तैनी जुवाब दित्तो, “बच्चां केरि रोटी नेइतां कुतरन देनी ठीक नई।” 27 तैसां ज़ोवं “सच्चे प्रभु, पन ज़ैन टुकड़े मालिकेरी मेजे पुडेरं बिछड़तन तैना कुतरां भी खातन।” 28 यीशुए तैस जुवाब दित्तो, “ए कुआन्श तेरो विश्वास बड़ोए, ज़ेरू तू चातिस तेरे लेइ तेरहु भोए” ते तैसारी कुई तैखने बेज़्जोइ जेई। 29 यीशु तैह्वां निस्तां गलील समुन्दरे बन्ने पुड़ अव, तैखन ते एक्की पहाड़े पुड़ गेइतां बिश्शी जेव। 30 ते बड़े लोकां केरि भीड़ तैस कां आई, तैन लोकेई एप्पू सेइं साथी टोंटे, काने, लट्टे, डोंडे ते होरे काई एरे ज़ेरे मैन्हु साथी आने, ते तैसेरे पावन कां छुट्टे, ते तैनी तैना सब बज्ज़ाए। 31 ज़ैखन लोकेई हेरू कि लट्टे गल्लां केरतन कमज़ोर तकड़े भोतन, टोंटे चलतन ते काने लातन त तैना बड़े हैरान भोइ जे ते इसाएलेरे परमेशेरी तारीफ़ केरने लगगे। 32 यीशुए अपने चले कुजेइतां तैन सेइं ज़ोवं, “मीं एन लोकन पुड़ बड़ी तरस एइते, एना मैन्हु टलेइ दिहैदी केरे देंते बराबर मीं सेइं साथिन, ते एन कां खाने जो किछ भी नई। अवं एन नियन्ने भेज़ने न वैई, कोस्कोई एरू न भोए कि एना बत्ती मां रेइ गान।” 33 तैसेरे चेलैई तैस जुवाब दित्तो “अस इस सुनसान ठेरी मां एत्रे लोकां केरे लेइ रोटी कोट्ठां आनम, ज़ैना सेब्वी केरे लेइ पूरी भोन?” 34 यीशुए पुच्छू, “तुसन कां केत्री रोटी आन?” तैनेई ज़ोवं, “सत रोट्टिन ते किछ निक्की मेछली भी आन।” 35 तैखन तैनी लोकन ज़मीनी पुड़ बिश्नरे लेइ ज़ोवं। 36 ते यीशुए तैना सत रोटी ते मेछली टलेइ, ते परमेशेरेरू शुक्र केरतां टलोड़ी, ते अपने चेलन कां दित्ती ते चेलैई तैना मैन्न दित्ती। 37 सारे मैन्हु रोटी खेइतां रेज़्जी जे। तैल्ला पत्ती, यीशुएरे चेलैई मेछली त कने रोटी केरे बच्चोरे टुकड़न मरां सत टोकरे भेरतां सल्ले। 38 रोटी खाने बालां केरि तैधात कुआन्शां ते बच्चां केरे अलावा 4000 मड़द थिये। 39 तैखन तेने तैना सब लोक भेजे ते एप्पू किश्ती मां चेट्ठां मगदन इलाके जो चलो जेव।

16 किछ फरीसी ते किछ सद्की लोक यीशु कां आए, “ते तैस अज़मानेरे लेइ तैस सेइं ज़ोवं, असन कोई अम्बरेरो निशान हिरा।” 2 तैनी तैन जुवाब दित्तो, “ज़ैखन इलोइ भोतीए त तुस ज़ोतथ कि मौसम रोडोए किजोकि अम्बर लाले। 3 ते झेइतां ज़ोतथ कि अज़ आँधी एजनीए किजोकि अम्बर लाले ते बिदलारे, तुस अम्बर हेरतां अंदाज़ो लेइता ज़ोतथ, पन ज़मानेरो निशान न पिशैनी सकतथ! 4 इस ज़मानेरे बुरे ते बदमाशी केरनेबाले लोक निशान मगतन, पन तैन योना नेबेरे अलावा होरो कोई निशान न दित्तो गालो।” यीशु तैन शेरतां चलो जेव। 5 ते यीशुएरे चले समुन्दरे पार पुज़ी जे, पन तैनेई रोटी साथी नेनी बिसरोरी थी। 6 यीशुए तैन सेइं ज़ोवं, “खबरदार फरीसी ते कने सद्की लोकां केरे खमीरे करां हुशार रेइयथ।” 7 तैना एप्पू मांमेईं गलबात केरने लगगे, “असेई रोटी नई आनोरी, एल्हेरेलेइ ते एरू ज़ोने लोरोए।” 8 एन ज़ैनतां, यीशुए ज़ोवं, “हे घट विश्वेसव, तुस एप्पू मांमेईं किजो सोची राओरेथ, कि असन कां रोटी नई? 9 कुन तुसन याद नई? ज़ताली मीं 5000 मैन्हु केरे लेइ पंच रोटी टलोइतां दित्तोरी थी, त तुसेईं बादे मां बच्चोरी रोटी केरे केत्रे टोकरे भेरतां सल्लोरे थिये? 10 ते तैन 4000 मैन्हु केरे लेइ सत रोटी ते टुकां केरि केत्री टोकरी सैल्लोरी थी?

11 तुस की न समझथ, कि मीं तुसन रोटी केरे लेइ न थियूं जेई, तैसेरू तुत्तर दिहाड़ेरू जेरू चमकने लगू ते तैसेरां लिगड़ां जेरू? पन फरीसी ते कने सदकी लोकां केरे खमीरे करां हुशार रेइयथ।” 12 तैखन तैन केरि समझी मां अव, कि तैनी रोटी केरे लेइ नई, बल्के फरीसी ते कने सदकी लोकां केरे खमीर यानी शिक्षाई करां हुशार रानेरे लेइ जेरू थियूं। 13 जैखन यीशु केंसरिया फिलिप्पी इलाके मां अव, त तैनी अपने चेलन पुच्छू: “मैनेरू मट्ठू कौने, लोक एस बारे मां कुन ज़ोतन?” 14 चेलेई ज़ोतन, “किछ ज़ोतन यूहन्ना बपतिस्मो देनेबालोए, किछ ज़ोतन एलियाह, ते किछ ज़ोतन यर्मियाह नबी ते किछ ज़ोतन नेबन मरां कोई अक आए।” 15 यीशुए तैन पुच्छू, “पन तुस मेरे बारे मां कुन सोचतथ कि अवं कौन आई?” 16 शमौन पतरसे जुवाब दित्तो, “तू जीते परमेशेरू मट्ठू मसीह आस।” 17 यीशुए ज़ोतन, “ए शमौन योनारे मट्ठां तू धन आस, किजोकि ए गल मासे या खूने नई बल्के मेरे स्वर्गे बाजे तीं पुड़ बांदी कियोरीए। 18 ते अवं तीं सेइ ज़ोताई, तू पतरस आस ते अवं इस पक्के घोड़े पुड़ अपनि कलीसिया बनेइलो ते पातालारां दारां तैस पुड़ अस्सर न केरि बटेलां। (Mat 8:8) 19 अवं अपने स्वर्गे राज़ेरी चैबी तीं देइलो, ते जैन किछ तुस ज़मीनी पुड़ बंधेले तैन स्वर्ग मां बंधोलू, ते जैन किछ तू ज़मीनी पुड़ खोल्लेलो तैन सब किछ स्वर्ग मां खुल्लेलू।” 20 तैखन यीशुए चेलन जो ज़ोतन, ए गल केन्ची सेइ न ज़ोइयथ कि अवं मसीह आई। 21 एसेरे बाद यीशुए अपने चेलन ज़ोने लगे कि, “तैसेरू यरूशलेम नगरे मां गानू ज़रूरीए ताके यहूदी लोकां केरे बुजुर्गन, प्रधान याजकन ते शास्त्री लोकां केरे हथेई ते बड़ो दुःख झेल्ले, ते मारो गाए ते ते टलेइयोवं दिहाड़े फिरी जीतो भोलो।” 22 पतरस तैस अलग नेइतां झिड़कने लगे, “हे प्रभु, परमेशर न केरे, तीं सेइ एरू कथे न भोलू।” 23 यीशुए मुड़तां पतरसे सेइ ज़ोतन, “हे शैतान, मीं करां दूर भो, तू मीं करां पाप करानेरी कोशिश कराने लोरोस। किजोकि तू जेन्चरे परमेशर सोचते तेन्चरे नई बल्के जेन्चरे मैनु सोचन तेन्चरे सोचतस।” 24 तैखन यीशुए अपने चेलन सेइ ज़ोतन, “अगर कोई मीं पत्ती एजनी चाते त ते अपने आपेरो इन्कार केरे, ते अपनू क्रूस छुड़तां मीं पत्ती ज़ले।” 25 “किजोकि ज़ै कोई अपनि जान बचानी चालो, त ते तैस गुवालो, ते ज़ै अपनि जान मेरे लेइ गुवालो, त ते तैस हासिल केरेलो। 26 अगर कोई सारी दुनिया हासिल केरे, ते अपने हमेशारे ज़िन्दगी गुवाए, त तैस कुन फैदो भोलो? या मैनु हमेशारे ज़िन्दगरे बदले कुन देलो? 27 किजोकि ज़ैखन मैनेरू मट्ठू अपने बाजेरी महिमाई मां अपने स्वर्गदूतन सेइ साथी एज्जेलू, तैखन ते हर केन्ची तैन केरे कियोरे कम्मां केरो फल देलो। 28 अवं तुसन सेइ सच ज़ोतई कि ज़ैना इडी खड़े आन, ज़ां तगर मैनेरे मट्ठे अपने राज़े मां एइते न लाएले, तांतगर न मरेले।”

17 शेइ दिहाड़ना बाद, यीशु अपने चले पतरस, याकूब त तैसेरे ढला यूहन्ना सेइ साथी एककी पहाड़े पुड़ जेव, जेडी कोई भी न थियो। 2 तैडी तैन केरे सामने तैसेरी शकल बेदलोई

जेई, तैसेरू तुत्तर दिहाड़ेरू जेरू चमकने लगू ते तैसेरां लिगड़ां लोअरां ज़ेरां छित्तां भुआं। 3 तैखन तैनेई मूसा ते एलियाह नबी यीशु सेइ गल्लां केरते लाए। 4 पतरसे यीशु सेइ ज़ोतन, “हे प्रभु इशू इडी रानू रोडूए, अगर तू चातस त आस द्लाई डेरे बनाम, अक तेरे लेइ ते अक मूसेरे लेइ ते अक एलियाहरे लेइ।” 5 तै ए गल ज़ोई राहोरो थियो, अक बड़ी चमकती बिदलार तैन पुड़ एइतां रुकी, ते तैस बिदलारी मरां ई आवाज़ आई, “एन मेरू दलारू मट्ठूए, ज़ैस पुड़ अवं खुश आई, एसेरी शुना।” 6 चले एन शुन्तां तुत्तरे भारे बिछड़े ते बड़े डेरि जे। 7 पन यीशुए एइतां तैन सेइ हथ लाव, ते ज़ोतन, “उठा, डरा नन्ना।” 8 ज़ैखन तैनेई चेरे पासन तक्कू, त यीशुएरे अलावा होरो कोई न लाव। 9 ज़ैखन तैना तैस पहाड़े पुडेरं उन्हे ओरे थिये, त यीशुए तैन ई हुक्म दित्तो, ज़ैन किछ तुसेई लाहेरूए, “ज़ां तगर मैनेरू मट्ठू मुड़दन मरां जीतू न भोए तांतगर केन्ची सेइ न ज़ोइयथ।” 10 तैसेरे चलेई तैस पुच्छू, “शास्त्री किजो ज़ोतन कि मसीहेरे एजनेरां पेइले, एलियाह नेबेरू दुनियाई मां एजनु ज़रूरी आए?” 11 तैनी जुवाब दित्तो, “एलियाह ज़रूर एज्जेलो ते सब किछ बहाल केरेलो। 12 पन अवं तुसन सेइ ज़ोतई कि ‘एलियाह’ त पेइले ओरोए, पन लोकेई तैन पिशानो, पन ज़ैन चाऊ तैस सेइ तैने कियू, एन्चरे मैनेरू मट्ठू भी तैन केरे हथन सेइ दुःख भोगेलो।” 13 तैखन चलेई बुझू कि असन सेइ यूहन्ना बपतिस्मो देनेबालेरे बारे मां ज़ोने लोरोए। 14 ज़ैखन तैना हछे मैनु केरि बड़ी भीड़ी कां पुजे, त अक मैनु तैस कां अव, ते ज़ैधू केरे भारे बिश्तां ज़ोने लगे। 15 “हे प्रभु मेरे मट्ठे पुड़ दया केर, तैस मिरगरी वजाई सेइ दौवरे एइतन, ते तैस बड़ो दुखे, ते बार-बार अग्गी मां ते बार-बार पैनी मांजो खिरकते। 16 मीं तैन तेरे चेलन कां आनोरू थियूं, पन तैनेई तैन ठीक न केरि बट्।” 17 यीशुए ज़ोतन, “हे घट विश्वावैसव ते ढीठ लोकव, अवं केइस तगर तुसन सेइ साथी भोनोई, केइस तगर तुशरी झैलतो रेइलो? ते मीं कां आनां।” 18 तैखन यीशुए तैन भूत झिड़कू, ते तैस पुड़ां सैयो निस्सी जेव, ते तैन मट्ठू तैखने ठीक भोइ ज़ोतन। 19 तैखन चलेई अकैल्ले ज़ेरे यीशु कां गेइतां पुच्छू, “अस तैस मट्ठे मरां भूतेरो सायो की न केइी सके?” 20 तैनी तैन सेइ ज़ोतन, “अपने घट विश्वासेरे वजाई सेइ, अवं तुसन सेइ सच ज़ोताई, अगर तुशरो विश्वास शेरीएरे ग्लेवे ज़ेत्रो भी भोए, त तुस उस पहाड़े जो ज़ोले कि, ‘इइतां निस्तां उडी गा,’ त तैन गालू, ते तुशे लेइ कोई भी गल असुखती न भोली। 21 पन इस किसमेरां भूतां प्रार्थना ते बरते बगैर न निस्सन।” 22 ज़ैखन तैना गलीले मां थी, त यीशुए तैन सेइ ज़ोतन, “मैनेरू मट्ठू भी मैनु केरे हवाले कियूं गालू। 23 तैना तैस मारेले, ते तैन टलेइयोवं दिहाड़े फिरी जीतो भोलू।” चले एन शुन्तां बड़े परेशान भोए। 24 ज़ैखन तैना कफरनहूम नगर मां पुजे, त प्रार्थना घरेरे लेइ चुंगी घिन्ने बाले पतरसे कां एइतां पुच्छू, “कुन तुशरो गुरु प्रार्थना घरेरी चुंगी न दे?” 25 तैनी जुवाब दित्तो, “हाँ देते।” ज़ैखन पतरस घरे मां पुजो त

यीशुए तैसेरे पुछ्नेरे पेड़ले तैस सेइं ज़ोवं, “हे शमीन तू कुन समझतस? दुनियारे राजे कोन लोकन करां चुंगी घिन्तन अपने बचन करां या होरि लोकन करां?” 26 पतरसे तैस सेइं ज़ोवं, “होरन करां!” यीशुए तैस सेइं ज़ोवं, “त मट्ठां बरी भोइ जेआं। 27 फिरी भी एल्हेरेलेइ कि अस तैन ठोकर न देम, तू समुन्दरे पुड़ गेइतां कंटो लेइतां मेछली ट्लेइयां, ते ज़ै मेछली पेड़ली लग्गेली, तैसारू आशी खोल्लां, ते तीं अक सिक्को मैलनोए, ते तै सिक्को नेइतां मेरी ते अपनि चुंगी देइयां।”

18 तैखन चले यीशु कां आए ते पुछ्नेरे लग्गे, “स्वर्गेरे राज़्जे मां सेबन करां बड्डो कौने?” 2 तैनी अक निकड़ो बच्चो एप्पू कां कुजाव, ते मझाटे खड्डो कियो। 3 ते ज़ोने लगो, “अवं तुसन सेइं सच्च ज़ोताई, कि तुस अपनो आप बेदलतां निकड़े बच्चो ज़ेरे न बनथ, त तुस स्वर्गेरे राज़्जे मां कथी दाखल न भोले। 4 ज़ै कोई अपनो आप इस बच्चो ज़ेरो निकड़ो बनलो, त तै स्वर्गेरे राज़्जे मां बड्डो भोलो। 5 ते ज़ै कोई एरे ज़ेरे निकड़े बच्चे मेरे नव्वे सेइं कबूल करेते, त तै मीं कबूल करेते।” 6 “ज़ै कोई इन निकड़न मरां ज़ैना मीं पुड़ विश्वास केरतन एक्केरे लेइ ठोकर बने, त तैसेरेलेइ एन्ने रोड्डू आए कि बडे ढूलाटेरो ढूलेइटोले तैसेरे गल्ले उन्डो ढंढेइतां दुधे समुन्द्रे मां डोबतां छडोरो लोइते। 7 ठोकरां केरि वजाई सेइं दुनियाई पुड़ अफ्रसोस! ठोकरां लेगनी त ज़रुरन पन, अफ्रसोस तैस मैन्हु पुड़ ज़ेसेरी वजाई सेइं ठोकर लग्गतीए। 8 अगर तेरो हथ या तेरो पाव तेरे लेइ ठोकरारो ज़िरयो बनते, त तू तैस केटतां छड, किजोकि तेरू टेंडू या कानू बेनतां ज़िन्दगी मां दाखल भोनू रोड्डूए, ते तेरे दुइये हथ पाव सथे भोने सेइं अगर तू हमेशारी अग्गी मां गास त तैल्ला केरतां तू टेंडो या कानो बेनतां रोड्डोस। (aiōnios g166) 9 अगर तेरी अछ तेरे लेइ ठोकरि वजा बनती, त तू तैस केदतां शरी छड, कानू भोइतां ज़िन्दगी मां दाखल भोनू तेरे लेइ रोड्डूए, कि दुइये एछछी भोने सेइं तू नरकेरी अग्गी मां गास त तैल्ला रोड्डोस।” (Geenna g1067) 10 “हेरा इन निक्के चेलन मरां तुस केन्ची घटिया न बुझा, अवं तुसन सेइं ज़ोताई कि तैन केरे स्वर्गदूत हर वक्त स्वर्ग मां मेरे बाजी केरे हज़ूरी मां रातन। 11 (किजोकि मैनेरू मट्टू यानी अवं हेरोरे लोकन बचाने ओरोई!) 12 तुश्शो खियाल कुने? कि केसकोई कां 100 भैट्ठां भोन, ते तैस मरां अक हेरोए, त कुन तै नडेनुवं भैट्ठां ज़ैडी खतरो न भोए तैडी छेडतां, तैस हेरोरि न तोपेलो? 13 ते अगर एरू भोए, तैस तै मैल्ले, त अवं तुसन सेइं सच्च ज़ोताई कि तै तैना नडेनुवं केरे लेइ एत्री खुशी न मनालो, ते तैस एक्की भैडारे लेइ जादे खुशी बनलो। 14 एन्चरे तुश्शो बाजी ज़ै स्वर्ग मांए, तै एन न चाए कि एन निकन मरां भी कोई नाश न भोए।” 15 “अगर कोई मीं पुड़ विश्वास केरनेबालो ढूला तीं सेइं बुराई करेते, त तू अकैल्ले मां तैस समझा, अगर तै तेरी गल शुने, त तीं तै वापस परमेशरे कां आनो। 16 अगर तै तेरी गल न शुने, त तू एप्पू सेइं साथी अक या दूई मैन्हु नेइयां, किजोकि मूसरे कानूनेरे मुताबिक हर

शिकैइतरी मां दूई या ट्लाइ मैन्हु गवाह भोतन। 17 अगर तै तैन केरि भी न शुने, त तू कलीसियारे लोकन सेइं ज़ो, अगर तै कलीसियारे लोकां केरि भी न शुने, त तू तैस सेइं एरो बर्ताव केर ज़ेन्चरां तै गैर कौमरो भोए या चुंगी घिन्ने बालो भोए।” 18 “अवं तुसन सेइं सच्च ज़ोताई, ज़ैन किछ तुस ज़मीनी पुड़ बंधेले त समझा कि स्वर्ग पुड़ बंधोलू, ते ज़ैन किछ तुस ज़मीनी पुड़ खोल्लेले त तैन स्वर्ग मां खुल्लेलू। 19 फिरी अवं तुसन सेइं सच्च ज़ोताई, कि अगर तुसन मरां दूई ज़ने धेरती पुड़ अक मन भोइतां कोन्ची मसलेरे हल कदनेरे लेइ परमेशरे करां ज़ै स्वर्ग मां आए मद्दत मगन, त तै तैन केरि मद्दत ज़रूर केरेलो। 20 किजोकि ज़ैडी दूई या ट्लाइ मैन्हु, मेरे नव्वे सेइं परमेशरे करां मद्दत मगनेरे लेइ अकोट्टे भोतन, अवं तैडी तैन केरि मद्दत केरनेरे लेइ तैन मां भोइताई।” 21 तैखन पतरसे यीशु कां एइतां पुछ्छू, “प्रभु अगर कोई तीं पुड़ विश्वास केरनेबालो, मीं सेइं बुराई केरतो राए, त अवं केत्रे बार तैस माफ़ केरि? कुन सत बार?” 22 यीशुए ज़ुबाब दितो, “अवं तीं सेइं इन न ज़ोई सत बार, बल्के सत्तेरे सत्तर बार माफ़ करां (यानी लगातार माफ़ केरतू रानू)। 23 बरस्सा अवं तुसन सेइं इन ज़ोताई, स्वर्गेरू राज़ तैस राज़्जेरू ज़ेरू आए, ज़ैनी सोचू कि अवं अपने नौकरन करां हिसाब घिनी। 24 ज़ैखन तै हिसाब घिन्ने लगो, त अक मैन्हु तैस कां हाज़र कियो, ज़ै दश हज़ार सोन्नेरे सिक्कां केरे तोड़ां केरो कर्जदार थियो। 25 तैस कां कर्जो मुकाने जो किछ न थियू, राज़े हुक्म दितो, एसेरे बाल बच्चे ते कुआन्थ ते ज़ैन किछ भी आए सब बेचतां कर्जो उसुल केरा। 26 पन तै नौकर ज़ोवले हथ केरतां मालिके कां मिनत केरतां ज़ोने लगो, ‘मीं किछ मौको दे, ते अवं तेरो सारो कर्जो मुकालो।’ 27 मालिके तैस नौकरे पुड़ बड्डो तरस अव, ते तैनी तै छैडी दितो ते तैसेरो कर्जो भी माफ़ कियो।” 28 “पन ज़ैखन तै नौकर तैदां चलो जेव, त तैस अक एरो नौकर मैल्लो, ज़ै तैसेरो साथी थियो, ते तैस तैनी 100 दीनार दितोरे थिये, तैनी तै गलेरां ट्लाव ते ज़ोने लगो, ‘मेरो कर्जो कड।’ 29 तैसेरो साथी नौकर तैस्से कां मिनत केरने लगो, मीं किछ मौको दे ते अवं तेरो सारो कर्जो मुकालो। 30 पन तैनी तैसेरी अक गल भी न शुनी, ते तैनी तै ढेपतां छुट्टो कि ज़ां तगर कर्जो न देस तांतगर ढप्पोरो रा। 31 ज़ैखन होरि नौकरेई एन शुनू, त तैना बडे परेशान भोए, ते मालिके कां गेइतां सारो हाल शुनाव। 32 तैखन मालिके तै अपने नौकर कुजेइतां ज़ोवं, ‘ओ बेईमान नौकरा मीं तेरो सारो कर्जो माफ़ कियो, किजोकि तीं मीं कां छंदे कियोरे थिये। 33 कुन तेरे लेइ ज़रूरी न थियू, कि ज़ेन्चरे मीं तीं पुड़ दया केरतां तेरो कर्जो माफ़ कियो, तेन्चरे तू भी अपने सैथन पुड़ दया केरतां तैन केरो कर्जो माफ़ केरेथो?’ 34 मालिके सरक आई, ते तैनी तै नौकर सज़ा देनेबालां केरे हवाले कियो, कि ज़ां तगर मेरो सारो कर्जो न दे तांतगर ढप्पोरो भोए। 35 “एन्चरे अगर तुसन मरां हर कोई, तैस मैन्हु ज़ै मीं पुड़ विश्वास केरते दिले सेइं माफ़ न केरे त मेरो स्वर्गेरे बाजी यानी परमेशर भी तुसन सेइं एन्चरे पैश एज्जेलो।”

19 जैखन यीशुए एन गल्लां जोई छैडी, त तै गलीले मरां गेइतां यरदन दरियारे पार यहूदिया इलाके मां चलो अव। 2 बड़े लोक यीशु पत्ती चले जे, ते यीशुए तैना तेडी बज्झाए। 3 तैखन फरीसी लोकेई यीशु कां एइतां तैस अजमानेरे लेइ पुच्छू, “कुन मैन्हु अपनि कुआन्श केन्वी भी वजाई सेइं फारखती देनी जेइज्जे?” 4 तैनी जुवाब दित्तो, “कुन तुसेई नई पढ़ेरू कि जेने तेना बनां तैनी शुरू करां मड़द ते कुआन्श बनेवरां थियां। 5 एल्हेरेलेइ मड़द अपने हाज बच्चे करां कनारे बिश्तां अपनि कुआन्शी सेइं साथी रालो, ते तैना दुइये अक जान भोलां।” 6 एल्हेरेलेइ हुनी तैना परमेशेरी नजरी मां दूई नई, पन अक्के आन। एल्हेरेलेइ जैना परमेशेरे जोडोरेन, तैनू कोई मैन्हु अलग न केरे!” 7 तैनेई तैस पुच्छू, “फिरी मूसे ए हुक्म किजो दित्तो कि फारखती लिखतां छेडी देथ?” 8 तैनी तेन सेइं ज़ोवं, “मूसे तुशे सखत दिलेरी वजाई सेइं अपनि कुआन्शन छडनेरो हुक्म दित्तोरो थियो, पन शुरू करां एन न थियूं। 9 अवं तुसन सेइं सच ज़ोताई, कि ज़ै कोई अपनि कुआन्शी बदमैशेरे अलावा कोन्वी होरि गल्ली पुड़ फारखती दे, ते तै केन्वी होरि सेइं इला बनाते, त तै (एप्पू) बदमाशी केरते। ते ज़ै तैस शैरोरी कुआन्शी सेइं इला बनाते, त तै भी बदमाशी केरते।” 10 चेलेई यीशु सेइं ज़ोवं, “अगर मड़द ते कुआन्शारे रिशतेरो ई हाले त इला न लोड़े बनोरो।” 11 यीशुए तैन सेइं ज़ोवं, “ए गल सब कबूल न केरि बटन, सिर्फ तैना ज़ैन परमेशर ई काबलीत दित्तोरोए। 12 किछ त ज़र्मनेरे हिजड़े भोतन ते किछन लोक बनातन, ते किछ एरे भी आन, कि ज़ैन स्वर्गे राज़ेरे लेइ इला न बनान, ते ज़ैना इना गल्लां सेमझी सकतन तेना समझन।” 13 तैखन लोकेई बच्चे यीशु कां आने, कि तेन पुड़ हथ रेखतां प्रार्थना केरे, पन चेलेई तैना लोक झिड़के। 14 यीशुए ज़ोवं, “बच्चे मीं कां एजने देथ, तेन न ठाका, किजोकि स्वर्गे राज़ एरां केरूए।” 15 ते तै बचन पुड़ हथ रेखतां तैह्वां अग्रोवं चलो जेव। 16 हेरा, अक मैन्हु यीशु कां अव ते पुच्छने लागो, “हे गुरु अव कुन भलू कम केरि, कि हमेशारी ज़िन्दगी हासिल केरि?” (aiōnios g166) 17 यीशुए तैस सेइं ज़ोवं, “तू मीं भलैइये बारे मां किजो पुछतस? परमेशेरे अलावा होरो कोई भी रोड़ो नई, पन अगर तू हमेशारी ज़िन्दगी हासिल केरनि चातस त हुक्म मनन।” 18 तैनी ज़ोवं, “कोन हुक्मन पुड़?” यीशुए ज़ोवं, “खून नई केरनो, बदमाशी नई केरनि, चोरी नई केरनि, झूठी गवाही नई देनी, 19 अपने हाज बच्चां केरि सेवा केर, अपने पड़ोसी सेइं अपने बराबर प्यार केर।” 20 तैनी जवाने जुवाब दित्तो, “एना सब हुक्म अव बचपनेरो मन्तो ओरोई। हुनी मीं मां को कमीए?” 21 यीशुए तैस सेइं ज़ोवं, “अगर तू सिद्ध भोनु चातस, त गा ज़ैन किछ तीं कां आए तैन बेचतां गरीब मैन्नु दे, तैखन तीं स्वर्ग मां खज़ानो मैलेलो। ते एइतां मीं पत्ती चला।” 22 पन तैनी जवाने ए गल शुनी, त बड़ी उदास भोइतां चलो जेव, किजोकि तै बड़ो अमीर थियो। 23 तैखन यीशुए अपने चेलन सेइं ज़ोवं, “अवं तुसन सेइं सच ज़ोताई कि अमीर मैनेरू

स्वर्गे राज़े मां दाखल भोनु मुशकले। 24 फिरी अवं तुसन सेइं ज़ोताई, परमेशेरे राज़े मां अमीर मैनेरू दाखल भोने केरां ऊँटेरू सांधनेरे पाए मरां निम्नु सुखू आए!” 25 एन शुन्तां चेलेई हैरान भोइतां ज़ोवं, “फिरी कसेरी मुक्ति भोइ बटतीए।” 26 यीशुए तैन केरे पासे तेकतां ज़ोवं, “मैन्नु करां त एन न भोइ सके पन परमेशेरे करां सब किछ भोइ बटते।” 27 एस पुड़ पतरस ज़ोने लागो, “हेर अस सब किछ शैरतां तीं पत्ती चलोरेम ते असन कुन मैलनूए?” 28 यीशुए तैन सेइं ज़ोवं, “अवं तुसन सेइं सच ज़ोताई, कि नन्वे दुनियाई मां ज़ैखन अवं मैनेरू मट्टू अपने महिमारे तखते पुड़ बिशेलू, त तुस भी मीं पत्ती चलने बाले 12 तखतन पुड़ बिश्तां इस्राएलेरे 12 गोत्रां केरो इन्साफ केरेले। 29 ते ज़ैनी केन्चे अपना घरां ते दूला या बेड़न या हाज या बव या बच्चे या ऊडारां छुडोरेन, तैस 100 गुणा फल मैलेलो, ते हमेशारी ज़िन्दगी विरासत मैलेली। (aiōnios g166) 30 पन बड़े मैन्हु ज़ैना हुन्ना पेड़ले आन, तैना बादे मां पत्रोवं भोनेन। त ज़ैना हुन्ना पत्रोवं आन, तैना बादे मां पेड़ले भोनेन।”

20 “स्वर्गे राज़ तैस ज़िमदारेरू ज़ेरूए ज़ै झेइं उठतां ते अपने दाछरी बागी मां मज़दूर कम्मे लाए। 2 तैनी अक दीनार रोज़ मुजुरी देनेरे लेइ तैना बागी मां भेजे। 3 फिरी नौ बजेइं बेइर गेइतां तैनी बज़ारे मां काई लोक बेकार खड़े लाए। 4 तैनी तैन सेइं ज़ोवं, ‘तुस भी मेरी बागी मां गाथ, ते ज़ैन किछ जेइज्ज भोलू अवं तुसन देलो।’ तैना कम्मे पुड़ जो जे। 5 फिरी तैनी दुपहरेई ते टलेइ बज़न तगर एन्ने कियूं। 6 पंचे बजेइं तैनी बेइर निस्तां किछ होरे लोक भी खड़खड़े लेइतां तैन पुच्छू, ‘तुस झेइंरे देंते किजो खेडोरेथ?’ तैनेई जुवाब दित्तो, ‘अस केन्चे कम्मे नई लोरे।’ 7 तैनी तैन सेइं ज़ोवं, ‘तुस भी मेरे बागी मां गाथ ते कम केरा।’” 8 “इलोइनी तैनी बागरे मालिके अपने मुन्शी सेइं ज़ोवं कि, ‘पेड़ले लग्गोरे मज़दूर ते पत्ती कम्मे लग्गोरे मज़दूर सेबनन अक-अक दीनार दिहाड़ी दे।’ 9 ज़ैना पंचे बजेइं ओरे थिये, तैन भी अक दीनार पूरी दिहाड़ी मैल्ली। 10 ज़ैना मज़दूर झेइं कम्मे लग्गोरे थिये तैन केरि बारी आई त तैनेई सोचू कि असन जादे मैलनेन, पन तैन भी अक-अक दीनार मैल्लो। 11 ज़ैखन दिहाड़ी मैल्ली, त तैस मालिकेरे बारे मां तैना एप्पू मामेइं बुराई केरने लागे। 12 ‘पत्ती लोरे मज़दूरेई सिर्फ अक घन्टो कम कियोरूए, ते तीं तैन भी असन बराबर ज़ेनेई सैरी दिहैड़ी कम कियां मुजुरी दित्ती।’ 13 तैनी तैन मरां एककी जुवाब दित्तो, ‘दोस्त मीं तीं सेइं कोई बेइन्साफी नई कियोरी, कुन मीं तीं सेइं अक दीनार दिहैड़ी गल न थी कियोरी? 14 एल्हेरेलेइ ज़ै तेरी मज़दूरीए तै दूला ते चलो गा, ए मेरी मर्जीए कि बादे मां लग्गोरे मज़दूर भी एत्रे देई। 15 कुन मीं ए अधिकार नई कि अपने माले मरां ज़ैन चैई तैन केरि? तू मीं पुड़ एल्हेरेलेइ ज़लतस कि अवं खुल्ले दिले सेइं देने बालोई?’ 16 एल्हेरेलेइ बड़े मैन्हु ज़ैना हुन्ना पेड़ले आन, तैना बादे मां पत्रोवं भोनेन, ते ज़ैना हुन्ना पत्रोवं आन, तैना बादे मां पेड़ले भोनेन।” 17 यरूशलेम नगरे जो गांते बार यीशुए अपने

12 चेलन अलग नेइतां तैन सेइं जोवं, कि तैस सेइं कुन भोने बालूए। 18 “हेरा, अस यरूशलेम नगरे जो च़ल्लोरेम, मैनेरू मट्टू प्रधान याजकां ते शास्त्री लोकां केरे हवाले कियूं गालू, ते तैना तैस मारनेरे काबल ठेरेले। 19 तैस गैर कौमां केरे हवाले केरेले, ते तैना मैनेरे मट्टेरी यानी मेरी हासी बनाले, ते तैस कोड़े बाहेले, ते फिरी तैस कूसे पुड़ च़ाढ़ेले, ते अवं दलेइयोवं दिहाड़े फिरी ज़ीतो भोलो।” 20 तैखन जब्दी नंवेरे मैनेरां मट्टां केरि अम्मा अपने मट्टन सेइं साथी यीशु कां आई, ते तैस कां मिनत केरने लाई ते तैस करां किछ मगने लग्गी। 21 तैने तैस पुच्छू, “तीं कुन लोइते?” तैसां जोवं, “वचन दे, कि मेरां इन्ना मट्टां तेरे राज़े मरां अक तेरे देइने पासे त होरू तेरे बाएं पासे बिश्शन।” 22 पन यीशुए तैन सेइं जोवं, “तुस न ज़ानथ कि कुन मगने लग्गोरेथ! ज़ेन्चरे दुख अवं झलने बालोई, कुन तुस झेल्ली सकतथ? तैनेई जुवाब दितो, हाँ झेल्ली सकतम।” 23 तैनी तैन सेइं जोवं, “तुस मेरे ज़ेरो दुःख झललेले, पन एन मेरू कम नई कि एककी देइने पासे ते होरि बाएं पासे बिशैली, ए ठार ज़ेसेरे लेइ मेरे बाजेरे तरफां रखोरीए तै तैसेरे लेइए।” 24 एन शुन्तां होरि दश चेलोई तैन दूई दलान पुड़ नराज़ भोइ जे। 25 यीशुए अपने सारे चेल नेड़े कुजेइतां, तैन सेइं जोवं, “होरि कौमां केरे प्रधान अपने लोकन पुड़ राज़ केरतन, ते तैन केरे मालिक तैन पुड़ अधिकार रखतन। 26 पन तुसन मां एरू न लोड़े भोरू, बल्के तुसन मां ज़ै बड्डो बन्नो चाते, तै सेब्भी केरो सेवक बने। 27 ज़ै कोई तुसन मां प्रधान बन्नू चाए, तै सेब्भी केरो गुलाम बने, 28 ज़ेन्चरे कि मैनेरू मट्टू एल्हेरेलेइ नई ओरूए कि कोई तैसेरी सेवा केरे, बल्के एल्हेरेलेइ कि सेवा केरे, ते अपनि जान बड़े लोकां केरे छुटकारे लेइ दे।” 29 ज़ैखन यीशु त तैसेरे चेले यरीहो नगरे मरां च़ल्लोरे थिये, त बड़े लोक तैस पतपती च़ले। 30 दूई काने बत्ती मां बिश्शोरे थिये, तैनेई एन शुनू कि यीशु इस बत्तां च़ल्लोरोए, त तैना चिन्डां मारने लग्गे, “हे प्रभु दाऊदरा मट्टां असन पुड़ दया केर।” 31 लोक तैन झिड़कने ते ज़ोने लग्गे कि चुप राथ, पन तैना मना चिन्डां मारने लग्गे, “हे प्रभु, दाऊदरा मट्टां असन पुड़ दया केर।” 32 तैखन यीशु खेड़ोव ते तैन कुजेइतां पुच्छने लग्गे, “तुस कुन चातस अवं तुशे लेइ केरि?” 33 तैन कानेई जुवाब दितो, “हे प्रभु अस चातम कि इश्शी एछ़न लौ एज्जे।” 34 यीशुए तैन पुड़ बड़ो तरस अव, ते तैनी तैन केरे एछ़न पुड़ हथ रखवो ते तैना लहने लग्गे, ते दुइये काने यीशु पत्ती च़ले जे।

21 ज़ैखन यीशु ते कने तैसेरे चेले यरूशलेम नगरेरे नेड़े पुजे, त यीशुए ज़ैतून पहाड़े पुड़ बैतफगे मरां अपने दूई चेले एन ज़ोइतां अग्रोवं भेजे। 2 “अपने सामने उस इलव्वें मां गाथ, ते तैड़ी पुजेले, त तुसन अक गधी बंधोरी मैलनिये, ते तैस साथी तैसेरो बच्चो भी भोनोए, तैस खोलतां इड़ी मीं कां आनां।” 3 अगर तुसन कोई पुच्छे, त तुस ज़ोइयथ, कि प्रभुए एसेरी ज़रूरत आए, ते तै लूशी तैस वापस भेजेलो। 4 इन सब किछ एल्हेरेलेइ भोवं, कि नेबे ज़ैन वचन ज़ोरू थियूं, तैन पूरू भोवं, 5 “सिय्योनेरे

कुइये सेइं ज़ोथ, कि तेरो राज़ो तीं कां ओरोए, ते तै बड़ो हलीमी ते तै गैधी पुड़ च़ेढ़तां ओरोए, बल्के गधेरे बच्चे पुड़।” 6 चेले च़ले जे ते ज़ेन्चरे यीशुए ज़ोरू थियूं, तैनेई तेन्चरे कियूं। 7 तैनेई तै गधी ते तैसारो बच्चो आनो, ते तैन पुड़ अपना लिगड़ां छडां, ते यीशु तैस पुड़ च़ेढ़तां च़लो। 8 बड़े लोकेई अपना लिगड़ां बत्ती मां बिछां, ते किछेई बुट्टा केरे डाल केटतां बत्ती मांमेइं छडोरे थिये। 9 ते तैना लोक ज़ैना यीशु सेइं साथी अग्री-अग्री ते पत्ती-पत्ती च़ल्लोरे थिये, तैना नहरे देते थिये, “दाऊदरे मट्टेरी होशाना (तारीफ़), धने तै, ज़ै प्रभुएरे नंवे सेइं एइते, स्वर्गें मां होशाना।” 10 ज़ैखन यीशु यरूशलेम नगरे मां पुजो, त सारे नगर मां हलचल मेचि जेई, ते लोक ज़ोने लग्गे, “ए कौने?” 11 लोकेई जोवं, “ई गलीलैरे नासरत नगरेरो नबी यीशुए।” 12 यीशुए परमेशेरे मन्दरेरे अंगने मां गेइतां, ज़ैना बुपारी बुपार केरते थिये सब तैट्ठां कढे, तैनी सुनारां केरि दुकान ते कबूतर बेचने बालां केरि ठारां दलोड़ी। 13 ते तैनी जोवं, “लिखोरूए कि मेरे मन्दरे जो प्रार्थना केरनेरू घर ज़ोले, पन तुसेई त ए डैकू केरो अड्डो बनेवरोए।” 14 तैखन काने ते टोंटे मन्दरे मां यीशु कां आए, ते तैनी तैना सब बड़्झाए। 15 पन ज़ैखन मन्दरेरे प्रधान याजक ते शास्त्री लोक एना कम्मां ज़ैना तैनी कियां, ते मट्टन मन्दरे मां दाऊदरी औलादरी होशाना (तारीफ़) ज़ोते लाए, तैन बड्डी सरक आई। 16 ते तैस सेइं ज़ोने लग्गे, “तू शुन्ने लोरोस कि एना कुन ज़ोने लोरेन?” यीशुए तैन सेइं जोवं, “हाँ अवं शुन्ने लोरोई, तुसेई कथे नई पढ़ेरू कि, ‘तीं मट्टन ते दुद्ध पीते बच्चन करां भी तीं अपनि पूरी तारीफ़ कमाई?’” 17 तैखन ते तैन शेरतां नगरे बेड़ोवं च़लो जेव, ते बैतनिय्याह नगरे मां जेव ते तैड़ी रात गुज़ारी। 18 झेइतां ज़ैखन यीशु नगरे मांजो वापस ओरो थियो, त तैस दलुख लग्गी। 19 बत्तारे इलेखी अक फ़ेगोरो बूट लाव ते तैस कां जेव, ते पट्लां केरे अलावा तैस पुड़ किछ न लाव, तैनेई तैस जो ज़ोवं, “कथे भी तीं पुड़ फल न लग्गेलो ते तैखने तै बुट शुक्की जेव।” (aiōn g165) 20 एन हेरतां चेले हैरान भोइतां पुच्छने लग्गे, “ई फ़ेगोरो बुट अकदम केन्चरे शुक्की जोरोए?” 21 यीशुए जुवाब दितो, “अवं तुसन सेइं सच ज़ोताई कि अगर तुस विश्वास रखथ, ते शक न केरथ, ज़ैन फ़ेगोरे बुटे सेइं भोवं तैन तुस भी केरि सकतथ, बल्के उस पहाड़े जो ज़ोले कि इट्ठां उखड़तां समुन्द्रे मां गा, त तैन्ने भोलू।” 22 अगर तुशुओ विश्वास पक्कोए त ज़ैन किछ तुस प्रार्थनाई मां मग्गेले, तैन तुसन मैल्ली गालू? 23 यीशु मन्दरे मां शिक्षा देने लोरो थियो, त प्रधान याजक, ते लोकां केरे बुजुर्गेई तैस पुच्छू, तू एन कम कसेरे अधिकारे सेइं केरतस? ते तीं एन कम कैनी दितोरोए? 24 यीशुए तैन जुवाब दितो, “अवं भी तुसन अक गल पुछतई, अगर तुस तैसेरो जुवाब देले, त अवं भी ज़ोइलो कि अवं एन कम कसेरे अधिकारे सेइं केरताई। 25 यूहन्नारो बपतिस्मो कोट्ठां थियो? स्वर्गे तरफां थियो, या की इन्सानेरी तरफां थियो? तैना एप्पू मांमेइं गलबात केरने लग्गे, कि अगर अस ज़ोतम कि, स्वर्गे तरफां थियो, त फिरी तैनी

जोनूए कि फिरी तुसेई तैसेरु याकीन की नई कियेरु? 26 पन अगर अस ज़ोतम कि, 'इन्सानेरी तरफां थियो,' त लोकां केरो भी डरे किजोकि लोक यूहन्ना नबी मन्ते थिये।" 27 एल्हेरेलेइ, तैनेई यीशुए जुवाब दित्तो, "अस किछ न ज्ञानम।" तैनी भी तैन सेइं ज़ोवं, "अवं भी तुसन सेइं न ज़ोई कि अवं इन कम्मां कसेरे अधिकारे सेइं केरताई।" 28 पन तुस इस मिसालरे बारे मां कुन सोचतथ? केन्ची मैनेरां दूई मट्टां थियां, तैनी बड़े मट्टे कां गेइतां ज़ोवं, "अज़ दाछरी बागी मां गा ते कम केरा।" 29 तैनी जुवाब दित्तो, "अवं न गेई।" पन बादे मां पशतेइतां च़लो जेव। 30 फिरी बाजे होरि मट्टे कां भी गेइतां एन्ने ज़ोवं, तैनी जुवाब दित्तो, "अच्छा खरी गाताई।" पन जेव नन्ना। 31 "एन दुइने मरां केनि अपने बाजोरो हुक्म मन्तो?" तैनेई जुवाब दित्तो बड़े हुक्म मन्तो, यीशुए तैन सेइं ज़ोवं, कि अवं तुसन सेइं सच़ ज़ोताई, कि चुंगी घिन्ने बाले ते बदचलन कुआन्शां तुसन करां पेइले परमेशेरें राज़ मां दाखल भोली। 32 अवं इन ज़ोताई, यूहन्ना बपतिस्मो देनेबाले तुसन ज़ोवं, कि धार्मिकतारी ज़िन्दगी केन्चरां जीनीए पन तुसेई तैसेरु विश्वास न कियो, पन चुंगी घिन्ने बाले ते बदचलन कुआन्शेई तैसेरु विश्वास कियूं, एन हेरतां भी तुसेई पापन करां मन न फिराव ते तैस पुड़ विश्वास न कियो। 33 अक होरि मिसाल शुना, एक्की ज़मीनदारे अक दाछरी बाग लाई ते तैसेरे चेन्ने पासन बाड़ दित्तो, ते दाछारो रस कढेने लेइ अक हावज़ बनावं, ते तैस बागरी हेरगेश केरने लेइ अक उच्ची कूड़ी बनाई ते फिरी ते काशत केरनेबालन ठेके पुड़ देइतां कोन्च दूर प्रदेशे जो च़लो जेव। 34 ज़ैखन दाछ ट्लोइनेरो मौको अव त तैनी अपनो हिस्सो नेनेरे लेइ अपने नौकर तैन ठेकेदारन कां भेजे। 35 ते ठेकेदारें तैसेरे नौकर कोई झूसो कुटो कोई मारो ते केन्ची जेई घोड़ेई दित्ती। 36 फिरी तैनी होरे नौकर भेजे ज़ैना पेइलन करां जादे थिये, पन ठेकेदारें तैन सेइं भी तेरहो ज़ेरो सलूख कियो। 37 आखकार तैनी अपनू मट्टू तैन कां भेजू, ते सोचू कि मेरे मट्टेरो त लिहाज़ केरेले। 38 "पन ज़ैखन ठेकेदारें तैसेरु मट्टू लाव, त तैना एप्पू मांमेइं मुशोरो केरने लग्गे, कि एज्जा एस सेवां मारम ते एसेरी बागी पुड़ कळो केरम।" 39 "तैखन तैनेई तैन मट्टू ट्लाव ते बागारे बेइर शरी छुट्टू। 40 एल्हेरेलेइ ज़ैखन बागरो मालिक एप्पू एज्जेलो, त तैन ठेकेदारन सेइं केरो सलूख केरेलो?" 41 तैनेई जुवाब दित्तो, तै तैन बुरन, बुरे तरीके सेइं मेरतां बागरो ठेको होरि ठेकेदारन देलो, ज़ैना मौके पुड़ तैसेरो हिस्सो तैस देन। 42 यीशुए तैन सेइं ज़ोवं, "तुसेई पवित्रशास्त्रे मां कथे नई पढ़ेरु, ज़े घोड़ मिस्त्रेई रद्दी कियोरो थियो, तैए कूनेरो घोड़ भोलो, एन कम परमेशरे कियोरूप, ते इश्शी नज़री मां एन आजीब आए?" 43 एल्हेरेलेइ अवं तुसन सेइं ज़ोताई, कि परमेशेरु राज़ तुसन करां निव गालू, ते एरी कौमी कां दित्तू गालू ज़े वक्ते पुड़ तैस फल दे। 44 ते ज़े कोई इस घोड़े पुड़ बिछड़ेलो त तैसेरे दुक्ड़े-दुक्ड़े भोइ गाले, पन ज़े एस उन्डो बिछड़ेलो त तैस पड़तां छुडेले। 45 प्रधान याजक ते फरीसी लोकेई यीशुएरी

ए मसाल शुन्तां सेमझी जे, कि यीशु एन गल्लां इश्शे बारे मां ज़ोने लोरोए। 46 तैनेई यीशु ट्लानो चाव, पन लोकन करां डरते थिये किजोकि तैना यीशु नबी मन्ते थिये।

22 यीशु फिरी मसाल देइतां ज़ोने लगो। 2 "स्वर्गेरु राज़ एक्की राज़ेरु ज़ेरूप, ज़ैनी अपने मट्टेरे इला बनाव। 3 ते अपने नौकर भेजे कि तैना लोकन ज़ैन जेई इलाएरी धाम बनोरी थी, तैन कुजान पन तैना न आए। 4 तैखन तैनी अपने नौकर एन ज़ोइतां भेजे, कि ज़ैन जेई इलाएरी धाम बनेवरीए, तैन ज़ोथ, रोटी बनोरीए ते मीं बड़े-बड़े जानवर कटोरन, ते सब किछ तियार भोरूप, ते इलाएरी धामी मां शामल भोथ। 5 पन तैनेई ध्यान न दित्तू ते कोई परवाह न की, कोई अपने ऊडारे मां च़लो जेव, ते कोई अपने कारोबारे मां लगो ते कोई कोरां च़लो जेव। 6 किछेई तैसेरे नौकर ट्लेइतां तैन तैना बेइज़त किये, ते जानां भी मैरी छुट्टे। 7 ज़ैखन राज़े एन शुनू त राज़े बड़ी सरक आई, ते तैनी अपनि फौज भेजतां तैना कातली मैरी छुट्टे ते तैन केरां नगरां फुके। 8 तैखन तैनी अपने नौकरन सेइं ज़ोवं, इलाएरी धाम तियार आए, पन ज़ैन कुजोरे थिये तैन एस काबल नई। 9 एल्हेरेलेइ तुस हर पासे गाथ ते ज़ेरे तुसन मैलतन, तैना सब इरां कुजाथ। 10 तैखन तैना नौकर च़ले जे ते हर पासे गेइतां ज़ेरे खरे बुरे तैन मैल्ले, सब अकोट्टे इलाए मां आने ते मेहमानेइं सेइं घर भरतां भोवं। 11 "ते राज़ो मेहमान सेइं मिलने अन्तर अव, त तैसेरी नज़र एक्की मैन्हु पुड़ पेई ज़े इलाए मां इलेरां लिगड़ां लेइतां न थियो ओरो।" 12 राज़े तैस पुच्छू, हे दोस्त, तू इलाएरे लिगड़न मां की नई ओरो? पन तैने किछ न ज़ोवं। 13 "एस गल्ली पुड़ राज़े अपने नौकरन सेइं ज़ोवं, 'एसेरे हथ पाव बंधतां बेइर आंधरे मां छुट्टा ज़ैडी ए लेरां देंतो राए, ते दंत च़ापतो राए।' 14 किजोकि परमेशरे हमेशारे ज़िन्दगरे लेइ त बड़े कुजोरेन पन चुनोरे थोडेन।" 15 तैखन फरीसी लोक तैट्टां च़ले जे, ते एप्पू मांमेइं मुशोरो केरने लग्गे एस केन्चरे गल्लन मां फसाम। 16 एल्हेरेलेइ तैनेई अपने किछ च़ेले हेरोदेस राज़ेरे लोकन सेइं साथी यीशु कां भेजे, ते तैनेई ज़ोवं, "हे गुरु अस ज्ञानतम कि तू सच्चोस, ते परमेशेरि बत सच्चैई सेइं शिखालतस ते कोन्चेरी परवाह न केरस किजोकि तू मैन्हु केरु तुतर हेरतां गल्लां न केरस। 17 एल्हेरेलेइ असन ज़ो, तू कुन सोचतस? महाराजो जो चुंगी देनी जेइजे की नई?" 18 यीशु तैन केरि चाल सेमझतां ज़ोवं, "हे पाखंडी लोकव मीं किजो अज़मातथ? 19 ज़े सिको चुंगरे लेइ देतथ तैस मीं हिराथ, तैनेई अक दीनार तैस कां आनो। 20 यीशुए तैन पुच्छू, इस पुड़ कसेरी शकल ते कसेरु नवं लिखोरूप?" 21 तैनेई जुवाब दित्तो महाज़ेरु, तैखन तैनी तैन सेइं ज़ोवं, "ज़ैन महाराजेरूप तैन महाराजे जो देथ, ते ज़ैन परमेशेरु ए तैन परमेशरे जो देथा।" 22 तैना एन शुन्तां हैरान रेइजे, ते तैस तैडी छेइतां च़ले जे। 23 तैस्से दिहैडी किछ सदूकी लोक ज़ैना ज़ोते थिये कि मरनेरां बाद कोई जीतो नई भोनी, तैनेई तैस पुच्छू, 24 "हे गुरु मूसे ज़ोरूप

कि, 'अगर कोई मैंनु बेऔलाद मेरि गाए, त तैसेरो ढूला तैसेरी कुआन्शी सेइं डूला बनाए ताके अपने ढूलाएरे लेइ औलाद पैदा केरे।' 25 इश्शे इडी सत ढूला थिये, पेड़ले डूला बनेइतां मेरि जेव, तैस औलाद न थी तैनी अपनि कुआन्श अपने ढूलाएरे लेइ छेड़ी दित्ती। 26 ए वजा आए तैसेरे दुइयोवं ते टूलेइयोवं भी एन्चरे कियूं बल्के सत्ते ढूलान सेइं एने भौतू राऊं। 27 आखकार तै कुआन्श भी मेरि जेई। 28 हुनी ज़ो तै कुआन्श मुडदन मरां ज़ींते भोनेरे दिहाड़े तैन सत्ते ढूलान मरां कसेरी कुआन्श भोली? किजोकि तै सेबभी केरि कुआन्श बनोरी थी।" 29 यीशुए तैन जुवाब दितो, "तुस न पवित्रशास्त्र ते न परमेशेरी शक्ति ज्ञानथ, ते एस्से वजाई सेइं तुस टेपलरेथ। 30 किजोकि ज़ींते भोनेरां पत्ती तैना डूला न बनाले, पन तैना स्वर्ग मां परमेशेरे स्वर्गदूतां केरे ज़ेरे भोनेना।" 31 "पन मुडदन मरां ज़ींते भोनेरे बारे मां कुन तुसेईं इन वचन नई पढेरू जैन परमेशर तुसन सेइं ज़ोवं, 32 'अवं अब्राहमेरो परमेशर, ते इसहाकेरो परमेशर ते याकूबेरो परमेशर आई?' ते मूवोरां केरो नई बल्के ज़ींतां केरो परमेशरे।" 33 लोक तैसेरी ए शिक्षा शुन्तां हैरान रेइजे। 34 जैखन फरीसी लोकेई एन शुनू कि तैनी सटूकी केरू आशी बंद कियोरूए, त तैना तैस कां सब अकोट्टे भोए। 35 तैन मरां अक शास्त्री तैस अज़मानेरे लेइ यीशुए पुच्छू। 36 "हे गुरु, मूसेरे कानूने मां सेबभन करां बड्डो हुकम कौ आए?" 37 तैनी ज़ोवं, "तू परमेशरे अपने प्रभु सेइं अपने सारे दिले सेइं ते अपनि सैरी जानी सेइं ते अपनि सैरी अक्ली सेइं प्यार केरा। 38 सेबभन करां बड्डो ते खास हुकम ईए। 39 एसेरो ज़ेरो ईए, 'अपने पड़ोसी सेइं अपने बराबर प्यार केरा।' 40 इन्ना दूई हुकम मूसेरे कानून ते नेबी केरो आधार।" 41 जैखन फरीसी लोक भी तैड़ी जम्हां भोइजेइ, कि तैना यीशुए तैन पुच्छू। 42 "मसीहेरे बारे मां तुश्शो कुन खियाले, कि तैन केसेरू मट्टूए?" तैनेई जुवाब दितो, "दाऊदेरू मट्टू।" 43 यीशुए तैन सेइं ज़ोवं, "फिरी दाऊद आत्माई मां तैस जो प्रभु किजो ज़ोते?" 44 "प्रभुए मेरे प्रभु सेइं ज़ोवं, मेरे देइने पासे बिश ज़ां तगर अवं तेरे दुश्मन तेरे पावन हैठ न ढूलेन्नेई। 45 बस्सा, अगर दाऊद तैस जो प्रभु ज़ोते त तैन तैसेरू मट्टू केन्चरे सेइं भोइ सकते?" 46 तैन मरां केन्चे भी एककी गल्लरो जुवाब न देइ बटो। पन तैस वक्तेरे बाद फिरी कोन्ची तैस पुच्छनेरी हिम्मत न भोइ।

23 तैखन यीशुए बड़े लोकन सेइं ते अपने चेलन सेइं एन ज़ोवं। 2 "शास्त्री ते फरीसी लोक मूसेरो कानून समझाने बालेन। 3 एल्हेरेलेइ जैन किछ तैना तुसन ज़ोतन तैन तुस केरा ते मेन्ना, पन तैन केरां ज़ेरां कम्मां न केरा, किजोकि तैना ज़ोने त ज़ोतन पन केरन नन्ना। 4 तैना अपने मेर्जी सेइं कानून बनातन ज़ैना लोकां केरे लेइ मन्ने मुशकिल भोतन, पन एप्पू अपने कानूने मन्नेरी कोशिश भी न केरन। 5 तैना ज़ैन किछ केरतन सिर्फ मैनु हिरानेरे लेइ केरतन, तैना अपने कुपाए ते पैखड़न पुड़ पवित्रशास्त्रेरे वचन लिखतां बट्टे-बट्टे जन्त्रां केरे ज़ेरे बन्धतन, ते अपने चोगन पुड़ लम्मो गुच्छा लातन (ताके

लोक समझन तैना बड़े धर्मी आन)। 6 तैना धामन मां खास ठैरी बिशनु चातन, ते प्रार्थना घरे मां खास कुर्सन पुड़ बिशनु चातन। 7 ते तैना चातन कि लोक तैनन जो बज़ारन मां नमस्कार ज़ोन, ते तैनन जो गुरु ज़ोन। 8 पन तुस अपने आपे जो गुरु न जुवेइयथ, किजोकि तुश्शो अक्के गुरु आए, ते तुस सब ढूलां केरे ज़ेरे बराबर आथ। 9 ते दुनियाई मां केन्ची जो (आत्मिक) बाजी न ज़ोइयथ, किजोकि तुश्शो अक्के बाजी आए ज़ै स्वर्ग मां आए। 10 ते न केन्ची जो मालिक ज़ोइयथ किजोकि तुश्शो अक्के मालिके ज़ै मसीह आए। 11 पन ज़ै तुसन मां बड्डो भोनु चाते, त तै तुश्शो सेवक बने। 12 ते ज़ै कोई अपनो आप बड्डो बनानेरी कोशिश केरते, त तै निकडो बनाव गालो, ते ज़ै कोई अपनो आप निकडो बनाते त तै बड्डो बनाव गालो।" 13 तैखन यीशुए ज़ोवं, "हे पाखंडी शास्त्री ते फरीसी लोकव, तुसन पुड़ अफ़सोस, किजोकि तुस स्वर्गेरे राज़े मां लोकन दाखल भोने न देथ, किजोकि न तुस एप्पू दाखल भोथ, ते न होरन दाखल भोने देथ। 14 हे पाखंडी शास्त्री ते फरीसी लोकव तुसन पुड़ अफ़सोस, तुस विधवा कुआन्शां केरे घरन लुटतथ, ते लोकन हिरानेरे लेइ लेम्मी-लेम्मी प्रार्थना केरतथ, तुसन जादे सज़ा मैलेली।" 15 "हे पाखंडी शास्त्री ते फरीसी लोकव, तुसन पुड़ अफ़सोस! तुस अक मैंनु अपने धर्म मां आन्नेरे लेइ बड़े दूर-दूर गातथ, ते ज़ैखन ते तुश्शी शिक्षा मन्ते त तैस एप्पू करां दुगनो नरके मां गानेरे काबल बनातथ।" (Geenna g1067) 16 "हे बत हिराने बाले कानाव, तुसन पुड़ अफ़सोस, कि तुस ज़ोतथ कि अगर कोई मन्देरी कसम केरे त कोई हर्ज़ नई, पन अगर मन्देरे सोनेरी कसम केरे, त तैसेरी कसमारो पाबंद भोलो। 17 हे बेवकूफ ते कानाव, बड्डू कुन आए सोनू या मन्दर, ज़ेसेरी वजाई सेइं सोनू पवित्र समझू गाते?" 18 "तुस ज़ोतथ कि अगर कोई बलिदान चाढ़नेरे ठारारी कसम केरे, त कोई हर्ज़ नई, पन च़ैदोरी चीज़री कसम केरे त तैसेरो पाबंद भोलो। 19 हे कानाव! बड्डू कुन आए, चाढ़ोरी चीज़ या बलिदान चाढ़नेरे ठार ज़ेसेरी वजाई सेइं चाढ़ोरी चीज़ पवित्र समझी गाचे? 20 अगर ज़ै कोई बलिदान चाढ़नेरे ठारारी कसम केरते, त तै सेबभी च़ैदोरी चीज़ां केरि कसम केरते। 21 ज़ै कोई मन्देरी कसम केरते त तै मन्देरे मां रानेबाले परमेशेरी कसम केरते। 22 ते ज़ै कोई स्वर्गेरी कसम केरते, तै परमेशेरे तखतेरी ते तैस पुड़ बिशने बालेरी कसम केरते।" 23 "हे पाखंडी शास्त्री ते फरीसी लोकव, तुसन पुड़ अफ़सोस, तुस पुतनेरो ते सोंफ़ेरो ते ज़ीरेरो दशोवं हिस्सो त देतथ, पन मूसेरे कानूनेरी खास गल्लां ज़ेन्चरे इन्साफ़ केरनो, दया केरनि ते ईमानदार भोनु शारोरूए, ज़रूरी थियूं तुस एन भी केरते राथे ते तैन भी न शारेथे। 24 हे बत हिराने बाले कानाव! तुस मश्शे त छानतथ पन सथ्थो ऊँट निगलतथ।" 25 "हे पाखंडी शास्त्री ते फरीसी लोकव, तुसन पुड़ अफ़सोस, तुस कटोरो ते कने थाली बेइरमेई खूब मांज़तथ पन अन्त्रमेई लालव्र ते बे सबरीए भेरताए।" 26 "हे काने फरीसाव पेड़ले कटोरो ते

थाली अन्त्रमेई मांजा, ते फिरी बेइरमेई भी साफ भोए।” 27 “हे पाखंडी शास्त्री ते फरीसी लोकव तुसन पुड़ अफ़सोस, तुस तैन कबां केरे ज़ेरेथ जैन बेइरमेई त सफ़ेदीए ते बेडि रोड़ी लेहीयोचन, पन अन्त्रमेई मुड़दां केरि हट्टी ते सब किसमेरी गेन्दगी सेइं भरतन। 28 एन्चरे तुस बेइरमेई लोकन बड़े धर्मी लेइयोतथ, पन अन्त्रमेई दुनियारे पाखंडे ते अधर्मे सेइं भरतथ।” 29 “हे पाखंडी शास्त्री ते फरीसी लोकव तुसन पुड़ अफ़सोस, किजोकि तुस नेबी केरे आसथान सजातथ ते धर्मी लोकां केरि कबां बनातथ। 30 ते ज़ोतथ कि, ‘अगर अस अपने दादे-पड़दादां केरे ज़माने मां भोथे त नेबन मारने मां तैन केरू साथ न देथे।’ 31 एन्चरे तुस एप्पू मन्तथ कि तुस नेबी केरे कत्तल केरनेबालां केरि औलादी मरां आथ। 32 हुनी तुस अपने दादे-पड़दादां केरे पापेरे घड़ो भरते राथा।” 33 “हे ज़हरीले सप्पां केरे ज़ेरे बच्चाव! तुस नरकेरी सज़ाई करां केन्चरे बज़ेले? (Geenna g1067) 34 एल्हेरेलेइ हेरा अवं नेबन ते अक्लमन्दन ते शास्त्री लोकन तुसन कां भेज़ताई, तुस तैन मरां किछन कत्तल केरेले, ते किछन क्रूसे पुड़ च़ाढ़ेले, ते किछन अपने प्रार्थना घरे मां कोड़ेइं सेइं बाले, ते नगरे-नगरे मां तैन मारनेरे लेइ तैन पत्ती लग्गोरे राले। 35 एल्हेरेलेइ सारे धर्मी केरो कत्तल ज़ै इस धेरीती पुड़ भोरोए, तैन केरि सज़ा तुसन पुड़ एज्जे, धर्मी हाबिलेरे कत्तले करां लेइतां, ते बिरिक्याहरे मट्टे जकय़ाहरे कत्तले तगर ज़ै तुसेईं मन्दरेरे ते बलिदान केरनेरे ठारारे मज़ाटे मन्दरेरे अंगने मां कत्तल कियोरो थियो। 36 अवं तुसन सेइं सत्र ज़ोताई कि इस ज़मानेरे लोकन एना सैरी गल्लां केरे सज़ा मेलनी।” 37 फिरी यीशुए ज़ोव, “हे यरूशलेम नगरेरे लोकव, हे यरूशलेम नगरेरे लोकव, तुसेईं केत्रे नबी कत्तल किये ज़ैना बड़े पेइले तुसन कां आए, ते ज़ैना तुसन कां भेजे तुसेईं तैन घोड़ेईं बेई, मीं बड़े बार सोचू कि तेरे बचन अकोट्टे केरि जेन्चरे कुकड़ी अपने बचन अपने फंगन हैठ रखचे पन तुस राज़ी न भोए। 38 हेरा तुशू घर तुशे लेइ बेरान भोड़ गाते। 39 किजोकि अवं तुसन सेइं सत्र ज़ोताई, कि तुस मीं हुन्ना करां तैस दिहाड़े तगर कथे न लेईं सकेले, ज़ांतगर मेरे बारे मां इन न ज़ोले, ‘तैसेरी तारीफ़ भोए ज़ै प्रभुएरे अधिकारे सेइं एइते।”

24 ज़ैखन यीशु मन्दरे मरां निस्तां च़ल्लोरे थियो, ते तैसेरे च़ेले तैस कां आए, ताके तैस मन्दरेरे रोड़े-रोड़े भवन हिरान। 2 तैनी तैन सेइं ज़ोव, “कुन तुस एन सब किछ हेरने लोरेथ? अवं तुसन सेइं सत्र ज़ोताई कि इड़ी कोई घोड़े पुड़ घोड़ बाकी न रालो, ज़ै बछोड़ो न गालो।” 3 ज़ैखन तै ज़ैतून पहाड़े पुड़ बिशोरी थियो, त तैसेरे च़ेले अलग ज़ेरे तैस कां एइतां तैस सेइं ज़ोने लगगे, “असन ज़ो कि एन गल्लां केइस भोनिन? ते तेरे एजनेरो ते दुनियारो अन्त भोनेरो कुन निशान भोनीए?” (aiōn g165) 4 यीशुए तैन जुवाब दितो, “खबरदार राथ, कोई तुसन न टपलाए! 5 किजोकि बड़े मेरे नंवे सेइं एजनेन ते तैनेईं ज़ोनूए कि, ‘अवं मसीह आई,’ ते तैनेईं बड़े लोक टपलानेन। 6 तुस लड़ाई ते लड़ेईं केरि अफवाह शुनेले, खबरदार डेरथ नन्ना, किजोकि एन गल्लां

ज़रूरी भोनिन, पन तैस वक्ते खातमों नईं भोनी। 7 किजोकि कौमी पुड़ कौम, ते राज़े पुड़ राज़ चढ़हाई केरेलू, ते ठारी-ठारी काल पेलो, ते भुंजल एज्जेले। 8 मुसीबतां केरि शुरुआत भी एन्ने गल्लेईं सेइं भोनीए। 9 तैखन ज़ैना तुशे खलाफन तैना तुसन टलेइतां बड़ी सखत सज़ा देले, ते कत्तल केरेले, ते मीं पुड़ विश्वास केरनेरे वजाई सेइं, सैरी कौमां केरे लोक तुसन सेइं बैर रखेले। 10 तैखन बड़े लोक मीं पुड़ विश्वास केरनो शारेले, एक्की होरि टल्लुवाले, ते एप्पू मांमेइं भी बैर रखेले। 11 ते बड़े झूठे नबी दुनियाईं मां निसनेन ते बड़े लोक टपलानेन। 12 अधर्म बधने सेइं बड़े लोक एप्पू मांमेइं प्यार केरनो शारेले। 13 पन ज़ै कोई आखरी दम्में तगर मीं पुड़ विश्वास केरेलो, त तैस्से मुक्ति मेलनीए। 14 ते परमेशरेरे राज़ेरी ई खुशखबरी दुनियारे हर पासे शुनाईं गाली, ताके सैरी कौमां केरे लोकन मौको मैले कि तैना इस कबूल केरन, तैखन दुनियारो खातमों भोलो।” 15 “ज़ैखन तुस तैस उज़ड़ाने बाली भिट्टी चीज़ी, ज़ेसेरे बारे मां दानिय्येल नेबे ज़ोरू थियू, पवित्र ठैरी खड़ी लाएले, (त पढ़नेबालो भी समझो)। 16 कि ज़ैना तैस मौके यहुदिया इलाके मां भोले तैना पहाड़न पुड़ जो नशशन। 17 ते ज़ैना लाए पुड़ भोन त तैना कोई चीज़ नेने अन्तर न एज्जन। 18 ते ज़ै मैन्हु ऊडारे मां भोलो, त तै लिंगड़ां नेने अन्तर न एज्जे।” 19 तैन दिहाड़न मां ज़ैना दोज़ींती त दुद्ध पियाती कुआन्श भोली, तैन केरे लेइ अफ़सोस! 20 “ते प्रार्थना केरा कि तुसन हिंवतडे या आरामेरी दिहाड़ी नशशन न पे। 21 किजोकि तेइस एत्री बट्टी मुसीबत भोली, ज़ेरी दुनियारे शुरु करां अज़ तगर नईं ओरी, ते न कथी एज्जेली। 22 अगर तैन दिहाड़ां केरि तैधात घटेवरी न भोथी, त कोई प्राणी न थियो बच्चानो, पन चुनोरां केरे लेइ तैना दिहाड़े घटेवरेन। 23 अगर कोई तुसन सेइं ज़ोए कि, ‘तक्का, मसीह इड़ी आए! या उड़ी आए!’ त तुस विश्वास न केरथ।” 24 “किजोकि झूठे मसीह ते झूठे नबी दुनियाईं मां निसनेन, ते तैनेईं निशान ते बड़े-बड़े चमत्कार हिरानेन, ते भोइसखे त चुनोरे लोक भी टपलानेन। 25 हेरा, मीं तुसन सैरी गल्लां भोनेरे पेइले ज़ोरिन। 26 अगर कोई तुसन सेइं ज़ोए कि, ‘हेरा तै जंगले मांए,’ त तुस बेइर न गेइयथ; ‘हेरा, तै घरे मांए,’ त तुस विश्वास न केरथ।” 27 “किजोकि जेन्चरे बिजली पूबेरां, पछमें तगर चमकतीए एन्चरे मैनेरू मट्टू भी एज्जेलू।” 28 “ज़ैड़ी ज़िगग भोते तैड़ी इल्लां जम्हां भोइचन।” 29 “तैन दिहाड़ना बाद दिहाड़ो कालो भोइ गालो, त चाँदनी लौ न देली, त कने अम्बरेरां तारे बिछड़ने लगगेले, त अम्बरेरी सैरी शक्ति हिलेइ गेली। 30 तैखन मैनेरे मट्टेरो निशान अम्बरे मां लेइहोनोए, ते दुनियारी सैरी कौमां छाती पिट्टेली, ते मैनेरू मट्टू अम्बरे मरां बिदलारी पुड़ बेडि शक्ति ते महिमा सेइं एइते लाएले। 31 ते तै अपने स्वर्गदूत ते नड़शिगेरी बड़ी आवाज़ी सेइं साथी भेजेलो, ते तैसेरे चुनोरे लोकन च़ेरे पासन अम्बरेरे एक्की पासेरां होरि पासे तगर सेब्बन जम्हां केरेले।” 32 “फ़ेगेरे बुटे करां ई सबक शिखा, ज़ेरे तैसेरे डाल नर्म भोतन ते पट्लां

निसतन त तुस बुझतथ कि गेमॅरो मौसम एजनेबालो आए। 33 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुझ्झी छुट्टा कि मैनेरू मट्टू, यानी अवं बडे नेडे पुज्जोरोई। 34 अवं तुसन सेइं सत्र जोताई, कि ज़ां तगर एन सब किछ पूरू न भोए, तांतगर एस पीडरो खातमों न भोलो। 35 अम्बर ते धरती टेली गाली पन मेरी गल्लां कथे न टेलेली।” 36 “मेरे वापस एजनेरे दिहाड़े बरे मां, या तैस वक्तेरे बरे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन् त कने परमेशरेरू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते। 37 जेन्चरे नूहेरे ज़माने मां भोरू थियूं, तेन्चरे मैनेरे मट्टेरे एजनेरे वक्ते भोनूए। 38 किजोकि तूफान एजने करां पेइले भी लोक खाते पीते थिये, ते इला भी बनाते थिये, ते नूहेरे किशती मां गाने तगर एन सब किछ भोतू राऊं। 39 तैन पतो भी न थियो कि कुन भोने बालूए, इडी तगर कि तूफान अव ते तैनी सब किछ रुडेइतां नेव, ते मैनेरे मट्टेरू यानी मेरू एजन् भी एरू भोनूए। 40 तैखन ऊडारे मां दूई मैन्हु कम केरते भोले ते अक नीयो गालो, ते दुइयोवं तैडी रालो। 41 ते दूई कुआन्शां इलाट पिती भोली त अक नी गाली ते होरि तैडी राली। 42 तुस बींझे राथ किजोकि तुस न ज़ानथ कि तुश्शो प्रभू केइस एजोनोए। 43 पन याद रखा, अगर घरेरे मालिके पतो भोए कि घोर कताली एजनो, त तै बींझे बिशेथो ते अपने घरे घोरी न भोने देथो। 44 एल्हेरेलेइ तुस भी तियार राथ, किजोकि ज़ैखन तुसन शक भी नई भोनी त मैनेरू मट्टू यानी अवं एज्जी गानोई।” 45 “ईमानदार ते अक्लमन्द नौकर तैसेरो ज़ेरोए, जेसेरो मालिक तैस अपने नौकरन पुड़ पुछ्णो गन्ने रखे ताके ते तैन मौके पुड़ रोटी दे, ते फिरी दूर सफरे पुड़ गाए।” 46 “तै नौकर धने जेसेरो मालिक एइतां तैस करां एरू ज़ेरू केरतो लाए।” 47 अवं तुसन सेइं सत्र जोताई कि तै मालिक अपने घरेरो सारो अधिकार तैसेरे सुपर्द केरेलो। 48 “पन अगर तै बुरो नौकर अपने दिले मां एन ज़ोए कि मेरे मालिकेरे एजने हेजू बडू चिरे। 49 ते अपने सैथन मारने कुटने ते शरैपण सेइं खाए ते पीए। 50 त तैसेरो मालिक कोस्कोई एरी दिहैडी एज्जे जेइस तैस नौकरे उमीदे न भोए, ते तैसेरो मालिक वापस एज्जी गाए। 51 ते मालिक तैस पक्की सज़ा देलो, ते तैसेरो हिस्सो पाखंडी लोकन सेइं साथी भोलो, जैडी लेरां देनी ते दंत च़ापने भोलो।”

25 तैखन यीशुए अपने चेलन सेइं ज़ोवं, ज़ैखन मैनेरू मट्टू यानी अवं वापस एज्जेलो तैस मौके स्वर्गेरू राज़ तैन दश अइलैई कुइयां केरू ज़ेरू भोलू, ज़ैना अपनि मिसालां बैलतां लाड़े सेइं मिलनेरे लेइ निस्सी। 2 तैन मां पंच बेवकूफ थी, पन पंच अक्लमन्द थी। 3 ज़ैना बेवकूफ थी तैनेई मिसालां त नी, पन होरो तेल साथी न नीयो। 4 “पन ज़ैना अक्लमन्द थी तैनेई मिसालां केरे अलावा कुप्पन मां होरो तेल भी साथी नीयो।” 5 लाड़ो एजने चिर लग्गू, ते तैना सब बलगते-बलगते डिगरी लेइ देने, ते झुल्ली जेई। 6 “अध्दी रात भोइ त शौर मच्ची कि लाड़ो

ओरोए, ते तैस सेइं मिलनेरे लेइ एज्जा। 7 तैखन सैरी अइलैई कुइयां बींझी, ते अपनि-अपनि मिसालां ठीक केरने लेगि। 8 बेवकूफ कुइयेई अक्लमन्द अइलैई कुइयन सेइं ज़ोवं, ‘अपने तेल मरां थोड़ो ज़ेरो तेल असन भी देथ, किजोकि इश्शी मिसालां हिश्शने लोरिन।’ 9 पन अक्लमन्देई जुवाब दित्तो, ‘असन कां एज्जो तेल नई, कि इश्शे लेइ ते तुश्शे लेइ पूरो भोए, तुस एरू केरा कि बेचनेबालन करां आनां।’ 10 ज़ैखन तैना तेल घिन्ने ज़ेलोरि थी त तैत्रे मां लाड़ो पुजी जेव, ते ज़ैना तियार थी, तैना लाड़े सेइं साथी अन्तर इलाएरे घरे मां चेलि जेई, ते दार बंद केरतां छूइ। 11 बादें मां तैना होरि अइलैई कुइयां भी वापस पुजी ते लाड़े जो ज़ोने लेगि, ‘प्रभु! प्रभु!’ इश्शे लेइ दार खोल्ल। 12 पन तैनी जुवाब दित्तो, ‘अवं तुसन सेइं सत्र जोताई, अवं तुसन न ज़ैनी।’ 13 एल्हेरेलेइ खबरदार राथ, किजोकि तुस मेरे वापस एजनेरे दिहाड़े बरे मां न ज़ानथ।” 14 ज़ैखन मैनेरू मट्टू यानी अवं वापस एज्जेलो त स्वर्गेरू राज़ तैस मैनेरो ज़ेरू भोनूए, जै दूर मुलखे जेव, तैनी अपने नौकर कुजाए ते सारी दौलत तैन दित्ती, ते तैन ज़ोवं एस दौलती सेइं होरि भी कमाई केरा। 15 “तैनी एक्की पंच तोड़े दित्ते होरि दूई तोड़े दित्ते, ते एक्की अक्के तोड़ो दित्तो, हर एक्की तैसेरे काबलीतरे मुताबिक दित्ते, ते एप्पू होरि मुलखे जो च़लो जेव।” 16 ज़ैस नौकरे पंच तोड़े मैल्लोरे थिये, तैनी गेइतां कारोबार केरतां पंच तोड़े होरे कमाए। 17 एन्चरे ज़ैस नौकरे दूई तोड़े मैल्लोरे, तैनी दूई होरे कमाए। 18 पन ज़ैस नौकरे अक तोड़ो मैल्लोरे थियो, तैनी मित्ती घेइतां मालिकेरी रकम छपेइतां छूडी। 19 बडे चिरेरां पत्ती तैसेरो मालिक वापस अव, ते नौकरन सेइं हिसाब केरने लगो कि तैनेई तैन तोड़ां केरू कुन कियूं। 20 “ज़ैस नौकरे पंच तोड़े मैल्लोरे थिये, तैनी गेइतां पंच होरे तोड़े हाज़र कमाए ते ज़ोने लगो, ‘हे मालिक तीं पंच तोड़े दित्तोरे, ते हेर मीं पंच तोड़े होरे कमाए।’ 21 मालिके तैस सेइं ज़ोवं, ‘शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेडि चीज़ां केरो मुख्तियार बनालो, ते अपने मालिकेरी खुशी मां शामिल भो।” 22 ते ज़ैस दूई तोड़े मैल्लोरे थिये, तै भी अव ते ज़ोने लगो, “हे मालिक तीं मीं दूई तोड़े दित्तोरे थिये, ते हेर मीं दूई तोड़े होरे कमाए।” 23 मालिके तैस सेइं ज़ोवं, “शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेडि चीज़ां केरो मुख्तियार बनालो, ते अपने मालिकेरी खुशी मां शामिल भो।” 24 ते ज़ैस अक तोड़ो मैल्लोरे थियो, त तै भी हाज़र भोव ते ज़ोने लगो, “हे मालिक अवं ज़ानतो थियो तू बडो सखत मैन्हु आस, तू तैस मैनेरो ज़ेरोस ज़ैनी ऊडारे मां फसल नई बेवरी ते तै तैट्ठां फसल कटते।” 25 एल्हेरेलेइ अवं डरो कि अगर अवं तेरी दौलत हिरेइलो त तू मीं सज़ा देलो, तांए तेरी दौलत मीं ज़मीनी मां देबतां छूडी, हेर, “तेरी दौलत ई आए।” 26 तैसेरे मालिके जुवाब दित्तो, हे दुष्ट ते निकम्मे नौकरा अगर तीं पतो थियो, कि अवं तैस मैनेरो ज़ेरोई ज़ैनी ज़ैस ऊडारे मां नई बेवरू त तैट्ठां कटते।

27 त तीं एन लोड़तू थियूं कियोरू, कि मेरी दौलत शौकारां केरे हवाले केरस, तैखन अवं वापस एइतां अपनि दौलत सूते समेत उसुल केरेथो। 28 हुनी एन केरा कि एस करां तै तोड़ो नेइतां तैस देथ जैस कां दश तोड़ेन। 29 एल्हेरेलेइ जैस कां परमेशेरी मर्जी समझनेरी इच्छा आए, तैस परमेशर जादे समझ देलो। पन जैस कां परमेशेरी मर्जी समझनेरी इच्छा नई, तैस केरां, थोड़ी ज़ेरी समझ ज़ै तैस कां आए, तै भी नी गाली। 30 ते एस निकम्मे नौकरे आंधरे मां छुट्टा, ज़ैड़ी ए लेरां देंतो ते दंत ज़ापतो राए। 31 ज़ैखन मैनेरू मट्टू यानी अवं, अपने महिमा मां अपने स्वर्गदूतन सेइं साथी एज्जेलो त अपने महिमारे तखते पुड़ बिश्तां लोकन पुड़ राज़ केरेलो। 32 सैरी कौमां मीं कां अकोट्टी भोली, ते धर्मी लोक बुरे लोकन करां अलग किये गानेन, जेन्वरे पुहाल भैडन, छेल्लन मरां अलग केरते। 33 ते अवं धर्मी लोकन सेइं ज़ैना मेरे देइने पासे भोले, ते बुरे लोकन ज़ैना मेरे बांए पासे भोले। 34 तैखन राज़ो यानी अवं अपने देइने पासेरे लोकन सेइं ज़ोलो, “एज्जा मेरे बाजरे धन लोकव इन राज़, ज़ैन दुनियारे शुरु मां तुशे लेइ तियार कियोरू। 35 किजोकि अवं नियन्तो थियो, ते तुसेई मीं रोटी खुवाई, अवं ट्लिशोरो थियो, ते तुसेई मीं पानी पियावं अवं परदेशी थियो, ते तुसेई अवं अपने घरे मां कुजाव। 36 अवं नग्गो थियो, ते तुसेई मीं लिगड़ां दितां, ते अवं बिमार थियो, ते तुसेई मेरी हेरगेश की अवं कैद थियो, ते तुस मीं मिलने आए।” 37 तैखन तैना धर्मी मैन्न ज़ोलो, “हे प्रभु असेई कैखन तू नियन्तो लाव, ते असेई तीं रोटी खुवाई या तू ट्लिशोरो थियो, ते असेई तीं पानी पियावं।” 38 असेई कैखन परदेशी सेमझतां तू अपने घरे मां रखखो, या तू नग्गो थियो, ते असेई तीं लिगड़ां दितां? 39 ते अस कताली तीं बिमार या कैद लेइतां तीं सेइं मिलने आए? 40 तैखन राज़ो यानी अवं जुवाब देलो, “कि अवं तुसन सेइं सच ज़ोताई कि ज़ैखन तुसेई इन लोकन सेइं ज़ैनेई मीं पुड़ विश्वास कियो एक्की सेइं भी एरो बर्ताव कियो त एन बुझा कि एन तुसेई मीं सेइं कियूं।” 41 तैखन तै बांए पासे बालन सेइं ज़ोलो, “हे लानती लोकव मेरे तुत्तरे अगरां तैस हमेशारी बैलती अग्गी मांजो गाथ, ज़ै परमेशरे, शैतान त कने शैतानेरे दूतां केरे लेइ तियार कियोरीए। (aiōnios g166) 42 एल्हेरेलेइ ज़ैखन अवं नियन्तो थियो, ते तुसेई मीं रोटी न खुवाई अवं ट्लिशोरो थियो, ते तुसेई मीं पानी न पियावं। 43 अवं परदेशी थियो, ते तुसेई अवं अपने घरे मां न रखखो, अवं नग्गो थियो, ते तुसेई मीं लिगड़ां न दितां, ते अवं बिमार ते कैद थियो, ते तुस मीं सेइं मिलने न आए।” 44 तैखन तैना लोक भी ज़ोले, “हे प्रभु असेई कताली तू नियन्तो या ते ट्लिशोरो या परदेशी ते नग्गो या बिमार या कैद लाव ते असेई तेरी सेवा न की?” 45 तैखन अवं अपने बांए पासेरे लोकन जुवाब देलो, “अवं तुसन सेइं सच ज़ोताई कि ज़ैखन तुसेई मेरे इन निकड़े करां निकड़े लोकन पुड़ ज़ैना मीं पुड़ विश्वास केरतन एक्की सेइं भी एरो ज़ेरो बर्ताव कियो त एन बुझा कि एन मींए सेइं कियूं। 46 एल्हेरेलेइ एन लोकन हमेशारे

लेइ सज़ा भोली, पन धर्मी लोकन हमेशारी ज़िन्दगी मैलेली।”

(aiōnios g166)

26 ज़ैखन यीशुए एन गल्लां की, त तै अपने चेलन सेइं ज़ोने लगे। 2 “तुसन पतोए कि दूई दिहैडना बाद फ़सह तिहारे, ते मैनेरू मट्टू कूसे पुड़ चाढ़नेरे लेइ ट्लुवाव गाए।” 3 तैखन प्रधान याजक ते कौमरे बुजुर्ग कैफा महायाजकेरे अंगने मां अकोट्टे भोए। 4 ते तेनेई सल्लाह की, कि यीशु धोखे सेइं ट्लेइतां मैरी छडम। 5 पन तैना ज़ोते थी, कि फ़सह तिहारेरे मौके पुड़ नई, एरू न भोए कि लोक हंगामो केरन। 6 तैस मौके यीशु बैतनिय्याह इलव्वे मां शमौन कोद्रेरो घरे मां थियो। 7 ते अक कुआन्श शंखमरमरी भांडे मां इत्र घिन्तां यीशु कां आई, तैखन ते रोटी खानेरे लेइ बिशोरो थियो, त तैसेरे दोग्गो पुड़ ते इत्र उलटाव। 8 चेले एन लेइतां बड़े नाराज़ भोए ते ज़ोने लगगे, “कि ए किजो बराबर कियो?” 9 अगर ए बेजोरो भोथो, त बड़ी कीमत मैलनी थी, ज़ै गरीबन बेन्टतां देथे। 10 यीशुए एन शुन्तां तैन सेइं ज़ोवं, “तुस एस कुआन्शी किजो तंग केरने लोरेथ? एसां त मीं सेइं रोड़ू कियोरू। 11 गरीब त हमेशा तुसन सेइं साथी भोनेन, पन अवं तुसन सेइं साथी हमेशा नई भोने। 12 तैसां मेरी जानी पुड़ ज़ै ई इत्र उलटावरोए, तैसां मेरे दबनेरे लेइ कियोरू। 13 अवं तुसन सेइं सच ज़ोताई, कि सैरी दुनियाई मां ज़ैड़ी भी खुशखबरी शुनाई गाली, तैड़ी तैसेरी यादगैरी मां एस गल्लरे बारे मां भी ज़ोवं गालू।” 14 फिरी 12 चेलन मरां अक ज़ेसेरू नवं यहूदा इस्करियोती थियूं, प्रधान याजकन कां जेव ते ज़ोवं। 15 “अगर अवं यीशु तुसन ट्लुवेइ, त तुस मीं कुन देले? तेनेई तैस ट्लाही चेंदरे सिके दित्ते। 16 ते ते तेइसेरो ते ठीक मौके बलगने लगे कि यीशु केन्वरे सेइं ट्लुवाए।” 17 “अखमीरी रोट्टारे तिहारेरी पेइली दिहाड़ी चले यीशु कां एइतां पुच्छने लगगे कि, तू फ़सह तिहारेरी रोटी कोडि खानी चातस, ताके अस गेइतां तियारी केरम?” 18 तैनी ज़ोवं, “नगर मां अक फ़लानो मैनुए, ते तुस तैस कां गाथ ते तैस ज़ोथ, कि गुरु ज़ोने लगगोरोए, मेरो वक्त नेइ पुजोरोए ते अवं अपने चेलन सेइं साथी फ़सह तेरे घरे मां मनेइलो।” 19 बस्सा ज़ेरो यीशुए अपने चेलन हुक्म दित्तोरो थियो, तेनेई तेन्वरे फ़सह तिहारेरी रोटी तियार की। 20 ज़ैखन इलोझ भोइ त यीशु 12 चेलन सेइं साथी रोटी खाने बिश्शो। 21 ते रोटी खांते बार यीशुए तैन सेइं ज़ोवं, “अवं तुसन सेइं सच ज़ोताई कि तुसन मरां अक मीं ट्लुवालो।” 22 “एन शुन्तां तैना सारे चले उदास भोए, तैना बैरी-बैरी सेइं तैस पुच्छने लगगे, हे प्रभु कुन अव्वे त नई?” 23 तैनी जुवाब दित्तो, “ज़ैनी मीं सेइं साथी थैली मां हथ छुडोरोए, तैए मीं ट्लुवालो। 24 मैनेरे मट्टेरे लेइ त ज़ेरू तैसेरे बारे मां लिखोरू तैस सेइं तेरह कियूं गाते, पन अफ़सोस तैस मैनु पुड़ ज़ेसेरी वजाई सेइं तैन ट्लुवाव जेव, तैसेरेलेइ एन्ने रोड़ू थियूं कि तै ज़मोरो न भोथो। 25 तैखन ट्लुवानेबालो यहूदा ज़ोने लगगे, हे गुरु अव्वे त नई? तैनी तैस सेइं ज़ोवं, तीं एप्पू ज़ोवं।” 26 खांते बार यीशुए रोटी

ट्लाती, ते बरकत मेगतां टलोडी, ते चेलन कां देइतां ज़ोवं यांथ खाथ ई मेरी जाने। 27 फिरी यीशुए दाछरे रसेरो कटोरो ट्लातो, ते परमेशेरू शुक्र केरतां चेलन कां दित्तो ते ज़ोवं, “यांथ तुस सब इस मरां पीया। 28 किजोकि ई मेरे नंवे करारे मां मेरो तै खूने ज़ै बड़ां केरे पापां केरि मैफारे लेइ दित्तो गाते। 29 अवं तुसन सेइं ज़ोताई, कि अवं दाछारो ई रस फिरी कधे न पियेलो ज़ां तगर परमेशेरू राज़े मां तुसन सेइं साथी नंवी न पी।” 30 तैल्ला पत्ती, यीशु त कने तैसेरे चले परमेशेरू भजन ज़ोइतां, यरूशलेम नगरे बेइर ज़ैतून नंवेरे पहेडी पुड़ चली जे। 31 तैखन यीशुए तैन सेइं ज़ोवं, “तुस अजे राती मेरी वजाई सेइं ठोकर खाले, किजोकि लिखोरूए, ‘अवं पुहाले मारेलो ते धनेरी भैडुं तितर-बितर भोली।’ 32 पन अवं ज़ीतो भोइतां तुसन करां पेइले गलील इलाके मां गेइलो।” 33 पतरसे तैस सेइं ज़ोवं, “अगर सारे तेरी वजाई सेइं ठोकर खान त खान, पन अवं तेरे बारे मां कधी ठोकर न खेइलो।” 34 यीशुए तैस सेइं ज़ोवं, “अवं तुसन सेइं सच्च ज़ोताई कि अज राती कुकड़ बांग देन करां पेइले तू मेरो ट्लाई बार इन्कार केरेलो।” 35 पन पतरसे ज़ोवं, “अगर तीं साथी मीं मरनू भी पे, त तांभी अवं तेरो इन्कार न केरेलो ते सैरी चलेई भी एन्ने ज़ोवं।” 36 तैखन यीशु अपने चेलन सेइं साथी एककी ठेरी पुजो, ज़ैस ठारारू नवं गतसमनी थियूं, ते तै अपने चेलन सेइं जोने लगे, तुस इडी बिश्शा, ते तांतगर अवं उडी अगर गेइतां प्रार्थना केरताई। 37 तैनी पतरस ते जेब्देरां दुइये मट्टां साथी नियां, ते तैडी तै बड़े परेशान भोने त कने घबराने लगे। 38 फिरी यीशु तैन सेइं, इस दुखेरे वजाई सेइं मेरे प्राण निसने लोरेन इडी बिश्शारे राथ ते बींझे राथ। 39 फिरी थोडो ज़ेरे अगर गेइतां तल्ले मां मथ्यो टेकतां खिरको ते प्रार्थना की, “हे बाजी अगर भोइसखे त ई कटोरो मीं करां टेली गाए, फिरी भी ज़ैन अवं चाताई तैन नई बल्के ज़ैन तू चातस तैन्ने भोए।” 40 फिरी तै चेलन कां वापस अव ते तैना झुलोरे लाए, ते तैने पतरसे सेइं ज़ोवं, “कुन तुस अक घड़ी भी मीं सेइं साथी बींझे न बिश्शी सके?” 41 बींझे बिश्शा ते प्रार्थना केरते राथ ताके तुस अजमैइशी मां न राथ, आत्मा त तियारे पन जान कमज़ोरे। 42 यीशुए फिरी जेव, ते ई प्रार्थना की, “हे मेरे बाजी ई दुखेरो कटोरो मेरे पीने बगैर टेली न सखे, त तेरी मर्जी पूरी भोए।” 43 तैखन तै चेलन कां एइतां तैना फिरी झुलोरे लाए, किजोकि तैन केरि एछछी अंडले सेइं गिरकी भोरी थी। 44 तै तैन तैडी छेइतां चलो जेव, ते फिरी तैए प्रार्थना केरने लगे ज़ै पेइली कियोरी थी। 45 तैसेरां बाद तै चेलन कां वापस अव, ते तैन सेइं जोने लगे, “हुनी झुलोरे राथ ते आराम केरा, हेरा तै मौको नेडे पुजोरोए, ते मैनेरू मट्टू पापी लोकां केरे हवाले कियूं गाते। 46 उठा, चलम। हेरा! मीं टलुवानेबालो नेडे पुज्ज़ी जोरोए!” 47 तै एना गल्लां जोने लोरो थियो, त यहूदा ज़ै 12 चेलन मरां थियो तैडी पुजो, तैस सेइं साथी बड़े मैन्हु थिये ज़ैना तलवारां ते लठ्ठां धिन्तां ओरे थिये तैना प्रधान याजकन ते कौमरे बुजुर्ग लोकेईं भेजोरे थिये।

48 तैसेरे टलुवाने बाले तैन ई निशान दित्तोरो थियो, कि ज़ैस अवं फुम्मडी देइलो त तैए, ते तुस तैस टलेइयथ। 49 ते तैखन यहूदा, यीशु कां एइतां ज़ोवं, हे गुरु नमस्कार, ते एइतां तैस फुम्मडी दित्ती। 50 यीशुए तैस सेइं ज़ोवं, हे मेरे दोस्ता ज़ैस कम्मरे लेइ तू ओरोस तैन कम केर, तैखन लोकेईं एगरोइतां यीशु पुड़ हथ रखे ते ट्लाव। 51 यीशुए सैथन मरां एक्के अपनि तलवार कडी, ते महायाजकेरे नौकरे पुड़ बाई ते तैसेरो कन्न कटो। 52 तैखन यीशुए तैस जो ज़ोवं, तलवारी मियाने मां रख किजोकि ज़ैना तलवार चलातन तैना तलवारी सेइं मारे गाले। 53 “कुन तू न ज्ञानस अवं अपने बाजी करां मिनत केरि सकताई तै हुन्ना स्वर्गदूतां केरि 12 फौवजां बल्के तैस करां भी जादे भेजते। 54 पन फिरी तैना पवित्रशास्त्रेरी गल्लां केन्चरे पूरी भोनिन ज़ैन केरू पूरू भोनु ज़रूरीए?” 55 तैखन यीशुए तैन हछे लोकन सेइं ज़ोवं, “अवं कुन कोई डैकू आई ते तुस मींजो डांग सोटे ते तलवारां टलेइतां मीं टलाने ओरेथ? अवं त रोज़ मन्दरे मां बिश्तां शिक्षा देतो थियो ते तैखन तुसेईं अवं नई ट्लातोरो? 56 पन एन सब किछ एल्हेरेलेइ भोवं, कि पवित्र बचने मां नेबी केरि लिखोरी गल्लां पूरी भोन, तैखन सारे चले तैस तैडी छेइतां चले जे।” 57 ते यीशु टलानेबाले तैस महायाजक केफा कां धिन्तां जे, ज़ैडी तैना शास्त्री ते बुजुर्ग अकोट्टे भोरे थिये। 58 ते पतरस भी दूरां दंतो पत्पती तैस महायाजकेरे अंगनेरे तगर जेव, ते तैडी पेरेहेदारन सेइं साथी बिश्तां यीशुएरो अन्त लोरो थियो हेरने कि कुन केरतन। 59 प्रधान याजक ते कने सारी महासभा यीशुएरे खलाफ गवाही तोपनेरी कोशिश केरि राओरे थिये, कि ज़ैस सेइं यीशु कल्ल कियो गाए। 60 पन कोई गवाह न मैल्लो, हालांकी बड़े झूठे गवाह भी पैश भोए, आखकारि दूई गवाह पैश भोए। 61 ते ज़ोने लगे, एनी ज़ोरू कि “अवं परमेशेरू घर डोलतां टलेइ दिहाइन मां फिरी खडू केरि सकताई।” 62 तैखन महायाजक खडो भोइतां यीशु पुच्छने लगे, “कुन तू कोई जुवाब न देस, इना लोक तेरे खलाफ कुन गवाही देतन?” 63 पन यीशु चुप राव, “तैखन महायाजक फिरी पुच्छने लगे, तीं ज़ीते परमेशेरू कसम भोए कि असन ज़ो, कि तू परमेशेरू मट्टू मसीह आस? 64 यीशुए जुवाब दित्तो, तीं एप्पू ज़ोई छडू ते हुनी अवं भी ज़ोताई कि अज्जेरे बाद तुस मैनेरे मट्टे परमेशेरू देइने पासे बिश्शारे लाएले, ते अम्बरे पुड़ बिदलारी मां एइते लाएले।” 65 तैखन महायाजके अपना लिगड़ा छिंदा, ते ज़ोने लगे, एनी परमेशेरू तुहीन कियोरीए हुनी असन केन्ची गवाहेरी ज़रूरत नई, तुसेईं हुन्ना एसेरू झूठ थुनेरूए। 66 तुश्शी कुन राईए? तैनेई जुवाब दित्तो ए कतलेरे काबल आए? 67 तैखन तैनेई तैसेरे तुत्तरे पुड़ थुकू ते तैस घुसेइं ते होरेई थप्पड़ मैरतां ज़ोवं। 68 “हे मसीह अगर तू नबी आस त भविष्यवाणी केर ते ज़ो, तीं केनि बाहोरिए?” 69 पतरस बेइर अंगने मां बिश्शोरो थियो, ते अक नौकरानी तैस कां आई ते ज़ोने लग्गी कि तू भी यीशु गलीली सेइं साथी थियो। 70 तैनी सेब्भी केरे सामने इन्कार कियो ते

जोवं, “मीं नई पतो तू कुन लोरिस ज़ोने? 71 तैखन पतरस बेडर फाटकेरे पासे जेव, त अक होरि नौकरानी तैस लेइतां तैन सेइं जैन तैड़ी थी ज़ोने लाई, ई मैन्हु भी नासरतेरे यीशु सेइं साथी थियो।” 72 पन तैनी सेब्भी केरे सामने कसम केरतां इन्कार कियो, ते जोवं, अवं एस मैन्हु सैइयां न जैनी। 73 थोड़े चिरिंरां पत्ती तैना लोक ज़ैना तैड़ी खड़खड़े थिये, पतरसे कां आए ते ज़ोने लगगे, सच्चे तू भी तैन्ने मरां अक आस, किजोकि तेरी बोली सेइं बुझोते कि तू तैसेरो साथिस। 74 तैखन तै तैस जो गैई देइतां ज़ोने लगगे, ते कसम केरतां ज़ोने लगगे, “अवं एस मैन्हु सैइयां न जैनी।” तैखन कुकड़े बांग दिती। 75 पतरसे तैखन यीशुएरी ते गल याद आई, जै तैनी ज़ोरी थी कि कुकड़े बांग देने करां पेइले तू ट्लेइ बार मेरो इन्कार केरेलो, ते पतरस बेडर गेइतां हुस्बुकैइं-हुस्बुकैइं लेरां देने लगगे।

27 झेझ भोंते सारे लोक ते प्रधान याजक, ते कौमरे बुजुर्गैं मुशोरो कियो कि यीशुएरे कल्ल केरनेरो फैसलो कियो। 2 ते यीशु बंधतां नीयो, ते रोमी गवर्नर पिलातुसे कां नीयो। 3 जैखन यहूदा जैनी यीशु ट्लुवेवरो थियो तैस एसास भोव, कि यीशु मुर्जम बनोरोए त तैनी बडू पशतावं, ते तैना चेंदरे ट्लही सिक्के प्रधान याजक ते बुजुर्गन कां वापस आने। 4 ते ज़ोने लगगे, “मीं पाप कियो, कि अक बेकसूर मैन्हु, मारने लेइ ट्लुवाव,” ते तैना ज़ोने लगगे, “असन कुने? तू ज़ान ते तेरू कम ज़ाने।” 5 तैखन यहूदा तैना सिक्के मन्दरेरे अंगने मां शैरतां छडे, ते तैट्ठां गेइतां अपने आपे फांसी दिती। 6 प्रधान याजकेई तैना सिक्के सल्ले, ते ज़ोने लगगे, “इन सिक्के इश्शे कानूनेरे मुताबिक मन्दरेरे खज़ाने मां रखने जेइज़ नई, किजोकि ए कोन्ची मैन्हु मारनेरी कीमते।” 7 एल्हेरेलेइ तैनेई मुशोरो केरतां तैस रकमी सेइं कुम्हारे करां अक ऊडार घिन्नु, ताके परदेशी केरे लेइ कब्रास्तान बनावं गाए। 8 तांए त अज़ तगर भी तैस ऊडारे जो खूनेरू ऊडार ज़ोतन। 9 तैखन तै गल पूरी भोइ जै यिर्मयाह नेबे ज़ोरी थी, कि तैनेई तैसेरी पूरी कीमत चेंदरे ट्लही सिक्के निये, ए कीमत इस्राएलेरे लोकेई कियोरी थी। 10 ते तैन चेंदरे ट्लही सिक्केइं सेइं कुम्हारेरू ऊडार घिन्ने जो दिते ज़ेन्चरे प्रभुए मीं हुक्म दित्तोरो थियो। 11 जैखन यीशु हाकिमेरे तुत्तरे अगर खड़ो थियो, ते हाकिम तैस पुच्छू, “तू यहूदी केरो राज़ोस?” यीशुए ज़ुबाब दित्तो, “तू एप्पू ज़ोने लोरोस।” 12 ते जैखन प्रधान याजक ते बुजुर्ग तैस पुड़ इलज़ाम लाने लोरे थिये त यीशुए कोई ज़ुबाब न दित्तो। 13 तैखन पिलातुसे यीशु सेइं ज़ोवं, “हेर एना तेरे खलाफ केत्री गवाहैई लोरेन देने तू शुन्तस की नई।” 14 पन यीशुए तैस एक्की गल्लारो भी ज़ुबाब न दित्तो; ते इड़ी तगर कि हाकिम बड़ो हैरान भोइ जेव। 15 ते हाकिमेरो अक दस्तूर थियो, कि फ़सह तिहारेरे मौके पुड़ अक कैदी जैस लोक चाते थिये तैस हथरां छड़तो थियो। 16 तैस मौके तैन केरो अक बड़ो मुशूर कैदी थियो, जेसेरू नवं बरअब्बा थियूं। 17 जैखन तैना लोक पिलातुसे कां जम्हां भोए, त पिलातुसे तैन पुच्छू, “तुस कुन चातथ, अवं

केस हथरां छेड़ी? बरअब्बा कि यीशु जैस जो मसीह ज़ोतन?” 18 किजोकि तै ज़ानतो थियो, कि तैनेई सिर्फ जलनी सेइं ते ट्लुवोरोए। 19 जैखन तै आदालतरी तखते पुड़ बिशोरो थियो, त तैसेरी कुआन्शां तैस जो समाद भेजोरो थियो, “कि तू एस रोडे सेइं सुपने मां बड़ो दुःख भोरोए।” 20 पन प्रधान याजकेई ते बुजुर्ग लोकेई लोक बमकाए, कि तैना पिलातुसे करां बरअब्बा हथरां छड़न ते यीशु मारन। 21 जैखन हाकिमे तैन लोकन पुच्छू, “कि तुस एन दुईन मरां केस चातथ, अवं तैस हथरां छेड़ी,” तैन लोकेई ज़ोवं, “बरअब्बा।” 22 पिलातुसे तैन पुच्छू, “फिरी अवं यीशु जैस जो मसीह ज़ोतन तैस सेइं कुन केरि?” सब लोक ज़ोने लगगे “एस कूसे पुड़ चाढ़।” 23 हाकिमे ज़ोवं किजो? “एनी कुन बुराई कियोरीए? पन तैना मना ज़ोरे-जोरे ज़ोने लगगे कि एस कूसे पुड़ चाढ़।” 24 जैखन पिलातुसे हेरू कि किछ भी बन्ने बालू नई बल्के उलटो फसाद भोने बालोए, त तैनी पानी मेगतां तैन मैन्हु केरे सामने हथ धोए ते ज़ोवं, “कि अवं एस एक्की धेर्मी मैनेरे खूने करां बरी भोइताई, तुसे ज़ाना।” 25 ते सारे लोकेई ज़ुबाब दित्तो, “एसेरो खून असन पुड़ ते इश्शी औलादी पुड़ भोए।” 26 तैखन पिलातुसे बरअब्बा हथरां छड़ो, ते यीशुए कोड़े बावैहीतां तैन केरे हवाले कियो, ताके तैना तैस कूसे पुड़ चाढ़न। 27 ते तैखन हाकिमेरे सिपैहीयेइं यीशु महलेरे अंगने मां नेइतां सारे फौजरे सिपाही यीशुएरे चुफुरतां जम्हां भोए। 28 तैनेई तैसेरां लिगड़ां खोल्लां ते तैस अक लाल रंगेरो चोगो लुवाव। 29 फिरी कंटां केरू ताज तैसेरे दोगे पुड़ रखवू, ते तैसेरे देइने हथ्थे मां अक निरेठरी लैठ दिती, ते तैस कां मथ्थो टेकतां तैसेरी हासी बनाने लगगे, ते ज़ोने लगगे, “हे यहूदी केरे राज़ा नमस्कार।” 30 तैना तैस पुड़ थुकते ते सोटी सेइं तैसेरे दोगे पुड़ बाते थिये। 31 जैखन तैनेई तैसेरो मज़ाक बनाव, त तैसेरो चोगो खोल्लो, ते फिरी तैस तैसेरां लिगड़ां लुवां ते तैट्ठां चले, ताके तैस कूसे पुड़ चाढ़न। 32 जैखन तैना तैट्ठां चलोरे थिये, त तैन शमीन कुरेनी नंवेरो अक मैन्हु मैल्लो, तैन लोकेई तै ट्लातो ताके यीशुएरू कूस छुइतां चलाए। 33 ते यीशु गुलगुता नंवेरी ठेरी पुजे, जेसेरो मतलबे खोपड़ारी ठार। 34 तैड़ी तैनेई यीशु दाछारो रस ते ट्लिठो रस मिलेइतां पीने जेई दित्तो, पन तैनी पीनी न चाव। 35 जैखन तैनेई यीशु कूसे पुड़ चाढ़ो त शर्त रेखतां चिट्ठी छेइतां तैसेरां लिगड़ां भी एप्पू मामेइं बंटा। 36 ते तैड़ी बिश्तां तैसेरो पैरहो केरने लगगे। 37 ते तैनेई तैसेरो जुर्म एक्की पेखड़ी पुड़ लिखतां तैसेरे दोगे करां बा लाई जैस पुड़ एन लिखोरू थियूं, “ई यहूदी केरो राज़ो यीशु आए” 38 तैखन तैस सेइं साथी दूई डैकू भी कूसे पुड़ चाढ़े, अक यीशुएरे देइने पासे, ते होरो बांए पासे। 39 तैट्ठां गानेबाले सारे लोक दोग हिलेइतां गाते थिये ते तैसेरी तुहीन केरते थिये। 40 ते ज़ोते थी इस मन्दरे डोलने बाला ते ट्लेइ दिहइन मां बनाने बाला, अपनो आप त बड़ा, “अगर तू परमेशेरू मटू आस त एस कूसे पुड़रां उन्डो ओस।” 41 एन्चरे

प्रधान याजक ते शास्त्री ते बुजुर्ग भी तैसेरी हासी बनाते थिये, ते ज़ोते थिये। 42 “एनी होरे बचाए पन अपनो आप न बचेइ बटो, ‘ई त इसाएलेरो राज़ो आए।’ अगर हुन्ना भी तू कूसे पुड़रां उन्हो ओस्स, त अस तीं पुड़ विश्वास केरतम। 43 एसेरो भरोसो परमेशरे पुड़े, अगर तै एस चाते त एस बचाए, किजोकि एनी ज़ोरू थियू, ‘अवं परमेशरें मटू आई।’” 44 ते दूई डैकू भी ज़ैना तैस सेइं साथी कूसे पुड़ च़ाढ़ेरे थिये, तैना भी तैसेरी तुहीन केरते थिये। 45 दीसरे 12 बज़ेई सारे मुल्खे मां आंधरू भोवं ते टलेइ बज़न तगर रावं। 46 ते टलेइ बाज़ां केरे लगभग यीशुए बड़े ज़ोरे सेइं ज़ोवं, “एली, एली लमा शबक्तनी?” ज़ेसेरो मतलबे, “हे मेरे परमेशर, हे मेरे परमेशर, तीं अवं किजो शारो?” 47 ज़ैना लोक तैड़ी खड़खड़े थिये, तैन मरां किछ शुन्तां एन ज़ोने लगगे, कि ए त एलिय्याह फुकारने लोरोए। 48 तैखन अक मैन्हु देवड़तां जेव, ते अक गलास पैनी मां डोबतां ते निरैठेरो सोटी पुड़ टकेइतां पीमेरे लेइ तैसेरे ऐशी सेइं हुरावं। 49 किछ ज़ोने लगगे, “बलगा हुनी हेरतम, कि एलिय्याह एस बचाने एइते कि नई।” 50 ते यीशुए फिरी ज़ोरे सेइं चिन्ड मारी ते प्राण दिते। 51 तैखन मन्देरेरो पड़ो बां देता बुन तगर फेटतां दूई टुकड़े भोइ जे, ते पहाड़ां ते सारी ज़मीन हीलने लगगी। 52 कब्रां खुल्ली जेई, ते बड़े पवित्र लोक ज़ैना मौतरी निडला मां झुलोरे थिये, ज़ीते भोइ जे। 53 ते कब्रन मरां निस्तां ज़ीते भोनेरां पत्ती पवित्र नगर मां दाखल भोए, ते तैड़ी बड़े होरि लोकेई भी लाए। 54 तैखन तैनी सूबेदारे ते तैसेरे सैथेई ज़ैन यीशुएरी निगरानी केरने लोरे थिये, भुंज़ल गांता हेरो, त तैना डेरि जे, ते ज़ोने लगगे, “सच्चे एन परमेशरें मटू थियू!” 55 तैड़ी बेड़ि कुआन्शां ज़ैना गलील इलाके मरां यीशु सेइं साथी तैसेरी सेवा केरती तैस पत्ती ओरी थी, ते दूरेरां तकने लोरी थी। 56 तैन मां मरियम मगदलीनी ते याकूब त योसेसेरी अम्मा मरियम ते जब्देरे मट्टां केरि अम्मा साथी थी। 57 ज़ैखन इलोइज़ भोइ त अरिमतियाहरो अक अमीर यूसुफ नव्वेरो मैन्हु ज़े एप्पू भी यीशुएरो चेलो थियो अव। 58 तैनी पिलातुसे कां गेइतां यीशुएरी लाश मगी, ते पिलातुसे लाश देनेरो हुकम दित्तो। 59 यूसुफे लाश नेइतां एक्की रोड़ि ज़ेरि च़ाद्री मां पलैटी। 60 ते तै लाश एक्की नव्वीं कब्री मां ज़ै शफ़ड़ी मां घड़ोरी थी रख्खी, ते तैस कब्री आग्रोरां अक बड्डो घोड़ तैस उबरो छड़ो। 61 ते मगदलीन इलव्वेरी मरियम ते होरि मरियम तैड़ी तैस कब्रारे सामने बिशोरी थी ज़ैस मां यीशुएरी लाश रखोरि थी। 62 होरसां तियैरारे दिहाड़े बाद यहूदी केरे आरामेरे दिहाड़े प्रधान याजक ते फरीसी लोक मिलतां पिलातुसे कां पुज़े। 63 ते ज़ोने लगगे महाराज़ असन यादे कि तैनी धोखे बाज़े अपने ज़ीते सांसेइं ज़ोरू थियू, “अवं मरनेरे टलेइ दिहाड़ां बाद फिरी ज़ीतो भोनों। 64 एल्हेरेलेइ हुकम दे ताके टलाई दिहाड़न तगर कब्री पुड़ पेरहो दितो गाए, कि एरू न भोए कि तैसेरे चेले एइतां तैसेरी लाश चोरन, ते लोकन सेइं ज़ोन कि तै मुड़दन मरां ज़ीतो भोरोए, ए धोखे पेइले धोखे करां भी जादे बुरो भोलो।” 65

पिलातुसे जुवाब दित्तो, “तुसन कां पेरहो देनेबाले आन, गाथ ज़ेनू भोइसखे पेरहो देथ।” 66 तैखन तैनेई गेइतां घोड़े पुड़ मोहर लाई, ते कब्रारे पेरहे लेइ पेरहेदार रख्खे।

28 आरामेरे दिहाड़े बाद हफतेरे पेइले दिहाड़े टलेकडोंते-टलेकडोंते मगदलीन इलव्वेरी मरियम ते होरि मरियम ज़ैड़ी यीशुएरी लाश कब्री मां रख्खोरी थी, हेरने एई। 2 ते हेरा अक बड्डो भुंज़ल अव, किजोकि परमेशरें अक स्वर्गदूत स्वर्गोरां ओरो थियो, ते तैस कब्री अगरां घोड़ उन्हो बिछोइतां तैस पुड़ बिश्शी जेव। 3 तैसेरी शकल सूत दिहाड़ेरी ज़ेरि रोड़ी थी, ते तैसेरां लिगडां हीवरां ज़ेरां छितां सुफैद थियां। 4 पेरहेदार डेरतां थर-थर कम्बने लगगे ते ज़ेरे मुड़दे भोए। 5 स्वर्गदूते कुआन्शान सेइं ज़ोवं, “डरा नन्ना, अवं ज़ानताई कि तुस यीशुए तोपने लोरिथ, ज़े कूसे पुड़ च़ाढ़ोरोए। 6 तै इड़ी नई बल्के ज़ेन्चरे तैनी ज़ोरू थियू, तै ज़ीतो भोरोए, एज्जा ते ठार हेरा, ज़ैड़ी प्रभु थियो। 7 ते जल्दी गेइतां तैसेरे चेलन पतो देथ, कि तै मुड़दन मरां ज़ीतो भोरोए, ते तुसन करां पेइलो गलीले मां गाते, ते तुसेई तै लहनोए हेरा मां तुसन एन ज़ोरूए।” 8 तैखन तैना कुआन्शां डेरतां भी ते खुशी सेइं भी कब्री मरां बेइर एई, ते दौवड़ती-दौवड़ती जेई ताके चेलन पतो देन। 9 तैखन यीशु तैन मैल्लो, ते तैनी ज़ोवं तुसन शान्ति मैल्ले, ते तैनेई तैसेरे पाव बंते, ते तैस कां मथ्यो टेको। 10 तैखन यीशुए तैन ज़ोवं, डरा न ते गाथ ते मेरे चेलन सेइं ज़ोथ कि गलीले मांजो गान, तैना मां तैड़ी लाएले। 11 हेजू तैना कुआन्शां बत्तां थी कि ज़ैना चेलन खबर देने च़लोरी थी, त पेरहेदारन मरां किछ नगर मां जे ते प्रधान याजकन सेइं सारो बिस्तार शुनाव। 12 ज़ैखन महायाजकेई बुजुर्गन सेइं मिलतां मुशोरो कियो, ते तैनेई ई फैसलो कियो कि सिपेहिन बड़े पेइंसे देन, कि तैना ई गल केन्वी सेइं न ज़ोन, कि कब्र केन्चरे खाली भोइ। 13 तैनेई पेरहेदारन एन ज़ोवं, कि तुस एन ज़ोइयथ, कि ज़ैखन अस राती झुल्लोरे थिये त तैसेरे चले आए ते तैनेई तैसेरी लाश नी। 14 अगर ए गल गुवनरि तगर पुज़ेली त अस तैस एप्पू समझामेले त तुसन कोई परेशानी न भोली। 15 ते सिपेहेई पेइंसे नीए ते ज़ेन्चरे तैनेई ज़ोरू थियू तेन्चरे कमाव, ते अज़ तगर ए गल यहूदन मां मुशुरे। 16 11 चले गलीले मां जे, ते तैस पहाड़े पुड़ अकोट्टे भोए ज़ैड़ी गानेरे बारे मां यीशुए तैन ज़ोवरू थियू। 17 ज़ैखन तैनेई यीशु लाव त तैस कां मथ्यो टेको, ते किछन हेजू भी शक थी, कि तै ज़ीतो वापस ओरोए। 18 तैखन यीशु तैन केरे नेइ एइतां ज़ोवं, “धेरतरो ते स्वर्गोरो सारो अधिकार मां दित्तोरोए। 19 एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्र आत्मा रे नव्वे सेइं बपतिस्मो देथ। 20 ते तैन तैना सब हुकम मन्ने शिखाला ज़ैना मां तुसन दित्तोरेन, ते हेरा, अवं दुनियारे आखरी तगर हमेशा तुसन सेइं साथी आई।” (aiōn g165)

मरकुस

1 ई यीशु मसीहेरे बारे मां खुशखबरी शुरुआत आए, जैन परमेशेरू मट्ठू आए। 2 (बड़े पेड़ले) यशायाह नेबे अपनि चले बनावे। 3 “तै बिस्तार देनेबालो सुनसान ठैरी मां लोकन, जैना तैस कां गाले, तैन हक देइतां ज़ोली कि ‘तुसन कां प्रभु एजनेबालो आए, एल्लेलेइ तुस तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)” 4 जेनकरां लिखोरू थियूं, अक बिस्तार देनेबालो अव। तैस मैनेरू नवं यूहन्ना थियूं। लोक तैस जो बपतिस्मो देनेबालो भी ज़ोते थियो। तै यूहूदिया इलाकेरे सुनसान ठैरी मां अव। तैड़ी तै लोकन परमेशेरू गल्लां शुनातो थियो कि, “तुस अपने पापन करां मनफिराथ, त कने बपतिस्मो नेथ, ताके परमेशर तुशे पाप माफ़ केरे।” 5 यूहूदिया इलाकेरे बड़े लोक त यरूशलेम नगरेरे रानेबालन मरां बड़े लोक यूहन्नारी गल्लां शुनरेरे लेइ सुनसान ठैरी मां तैस कां आए। तैन लोकेई अपने पाप मेन्तां यूहन्ना करां यरदन दरियाए मां बपतिस्मो नीयो। 6 यूहन्ना आम लिगड़ां लातो थियो जैना लिगड़ां ऊँटेरे बालन सेइ बनोरां थियां। तै अपनि कमरी पुड़ चमड़ेरू मज़ बंधतो थियो। ते ते टिट्टां त कने जंगलेरू माछी खातो थियो। 7 तै लोकन शुनातो थियो कि, “कोई अक, जै मीं केरां भी महान आए, मेरे बाद एजनेबालोए। अव त तैसेरो गुलाम भोनेरे काबल भी नई कि लिक्तां तैसेरे बूटेरे तसमे खोल्ली। 8 अव त तुसन पैनी सेइ बपतिस्मो देताई, पन तै तुसन पवित्र आत्मा सेइ बपतिस्मो देलो” 9 तैल्ला पत्ती, तैन दिहाड़न मां एरू भोवं कि यीशु गलील इलाकेरे नासरत नगरेरां यूहन्ना कां अव। तैनी यूहन्ना करां यरदन दरियाए मां बपतिस्मो नीयो। 10 जैखन यीशु बपतिस्मो नेइतां पैनी मरां बेइर अव, त तैनी अम्बर खुलतू त पवित्र आत्मा कबूतरेरी शकली मां तैस पुड़ एत्तो लाव। 11 तैखन परमेशेरू स्वर्गेंरां यीशु सेइ ज़ोवं, “तू मेरू दलारू मट्ठू आस, अव तीं पुड़ बड़ो खुश आई।” 12 तैल्ला पत्ती, अकदम पवित्र आत्मा यीशु सुनसान ठैरी जो भेजो। 13 सुनसान ठैरी मां 40 दिहाड़न तगर शैताने यीशु अज़माव। त तैड़ी यीशु जंगली जानवरन साथी थियो। तैखन परमेशेरू स्वर्गदूत यीशु कां एइतां तैसेरी सेवा करने लागे। 14 किछ वक्तेरां बाद, यूहन्ना नबी कैद कियो जेव। तैल्ला बाद, यीशु गलील इलाके मां जेव। तैड़ी तै लोकन परमेशेरू राज़ेरे बारे मां खुशखबरी शुनाने लगे। 15 तैनी ज़ोवं कि, “ठीक वक्त ओरोए त कने परमेशेरू राज़ नेइ ओरूए! एल्लेलेइ, तुस अपने पापन करां मनफिराथ ते इस खुशखबरी पुड़ विश्वास केरा।” 16 एक्सां, जैखन यीशु गलील नव्वेरे समुन्दरेरे बन्ने चलोरो थियो,

तैखन तैनी दूई मैन्हु शमौन त तैसेरो दूला अन्द्रियास लाए, जैना मेछली दलानेबाले थियो। तैना मेछली दलानेरे लेइ समुन्दरे मां ज़ाल छेड़ी राओरे थियो। 17 यीशुए तैन सेइ ज़ोवं, “एज्जा मेरे चले बना। अव तुसन शिखालेलो कि केन्चरां होरे मैन्हु मेरे चले बनानेन।” 18 अकदम तैना अपना जालां छेड़तां यीशु पत्ती चले जे। 19 जैखन तैना थोड़े ज़ेरे अगगर जे, त यीशुए याकूब त कने तैसेरो दूला यूहन्ना लाए। तैना दुइये जेब्देरां मट्ठां थियां। तैना किशती मां जालां ठीक करने लगगेरे थिए। 20 अकदम यीशुए तैना अपने चले बनानेरे लेइ कुजाए। तैना दुइये, अपने बाजी जब्दी किशती मां मज़दूरन सेइ साथी छेड़तां, यीशु सेइ साथी चले जे। 21 तैल्ला पत्ती, यीशु त तैसेरे चले तैट्टां कफरनहूम नगरे मां जे। आरामेरे दिहाड़े, अकदम यीशु तैन केरे प्रार्थना घरे मां जेव। तैड़ी तै परमेशेरूरी गल्लां तैन लोकन शुनाने लगे। 22 तैना यीशुएरी शिक्षा शुन्तां हैरान भोए, किजोकि तैनी शास्त्री लोकां केरि ज़ेरी शिक्षा न दिती, पन तै अधिकारे सेइ शिक्षा देइ राओरो थियो। 23 जैखन यीशु तैड़ी थियो, त तैन केरे प्रार्थना घरे मां अक मैन्हु थियो, जैस पुड़ भूतेरो सायो थियो। 24 अचानक तैनी मैने चिन्डां मेरतां ज़ोवं, “हे नासरत नगरेरो यीशु! तीं सेइ असन कुन कम? कुन तू असन नाश केनेरे लेइ ओरोस? अव ज़ानताई कि तू कौन आस, तू परमेशेरू पवित्र मट्ठू आस!” 25 पन यीशुए तैस भूते झिड़कतां ज़ोवं, “चुप रा, एस मैन्हु मरां निस्सी गा!” 26 तैखन भूते तै मैन्हु इलेडेइतां त ज़ोरे सेइ चिन्डां मेरतां तैस मैन्हु मरां निस्सी जेव। 27 एन हेरतां सारे लोक बड़े हैरान भोए। तैना एप्पू मांमेइ गलबात केरतां एक्की होरि पुछने लागे कि, “ए कुन गल आए! ए त अक नव्वी शिक्षा आए जैस मां अधिकार आए! तै त भूतन भी अधिकारे सेइ हुकम देते ते तैना भी तैसेरो हुकम मन्तन।” 28 अकदम यीशुएरे बारे मां ए गल गलील इलाकेरे आसेपासेरे सेबभी ठैरन मां फैली जेई। 29 तैना अकदम प्रार्थना घरे मरां निस्तां, याकूब त कने यूहन्ना सेइ साथी शमौन त अन्द्रियासेरे घरे जे। 30 शमौनेरी शिखी भुखारे थियो ते तै लेटोरी थी। अकदम तैनेई तैसारे बारे मां यीशु सेइ ज़ोवं कि ऊ बिमार आए। 31 यीशुए तैस कां गेइतां तैसारो हथ दलेइतां खड़ी की। अकदम तैसारो भुखार ठीक भोव। ते तै तैन केरि सेवा केरने लगगी। 32 इलोइरी जैखन दिहाड़ो डुब्बो, त लोक सारे बिमार मैन्हु त कने जैन मैनन् पुड़ भूतेरो सायो थियो तैना यीशु कां आन्ने लागे, ताके तै तैनन् बड़ज़ाए। 33 तैस नगरेरे बड़े लोक तैस घरेरे दारे पुड़ अकोट्टे भोए। 34 यीशुए बड़े मैन्हु बड़ज़ाए, जैना बड़े किसमां केरि बिमैरन सेइ दुखी थियो। त तैनी बड़े मैनन् मरां भूतां केरो सायो कट्टो। पन यीशुए भूतन किछ ज़ोने न दित्तू, किजोकि तैना यीशु पिशानतां थियां (कि एन परमेशेरू मट्ठू आए)। 35 एरी दिहाड़ी, झेइज़ां-झेइज़ां दिहाड़ो निस्ने केरां बड़े पेड़ले, यीशु उठतां बेइर एक्की सुनसान ठैरी मां जेव। तैड़ी तै प्रार्थना केरने लगे। 36 पन थोड़े ज़िरेरां बाद, शमौन त तैसेरे साथी, यीशु तोपने जे। 37 जैखन तैनन् तै मैल्लो, त

तैनेई यीशुए सेइं ज़ोवं, “(वापस इलावें मां एई,) सारे लोक तीं तोप्पी राओरेन!” 38 पन यीशुए तैन सेइं ज़ोवं, “एज्जा, अस होरि केन्ची आसेपासेरे इलॉव्वन मां गाम, ताके अवं तैन लोकन भी परमेशेरी गल्लां शुनेई। किजोकि अवं एस्से कम्मेरे लेइ दुनियाई मां ओरोई।” 39 तैल्लेरेलेइ यीशु गलील इलाकेरे सारे इलॉव्वन मां गेइतां, तैन केरे प्रार्थना घरन मां लोकन परमेशेरी गल्लां शुनातो राव ते बड़े लोकन मरां भूतां केरो सायो कढतो राव। 40 तैल्ला पत्ती, एक्सां अक कोढ़ी मैन्हु यीशु कां अव। तैनी मैने यीशुएरे सामने ज़ैन्थु केरे भारे बिश्तां तैस कां मिन्नत केरतां तैस सेइं ज़ोवं, “अगर तू चास, त मीं बड़्झेई सकतस। (महरबानी केरतां मीं बड़्झा।)” 41 यीशुए तैस मैन्हु पुड़ तरस खाव। यीशुए अपनो हथ अग्रोवं कियो त तैस कोढ़ी मैन्हु सेइं हथ लेइतां ज़ोवं, “अवं चाताई, तू बड़्झोस।” 42 अकदम तै कोढ़ी बड़्झोई जेव। 43 तैखन यीशुए तै मैन्हु समझोइतां लूशी भेजो। 44 त तैनी तैस सेइं ज़ोवं, “हेर, एस गल्लरे बारे मां केन्ची सेइं किछ न ज़ोइयां। (तू यरूशलेम नगरेरे मन्दरे मां गा), त कने अपने आपे याजके हिरा। तैल्ला पत्ती, तू अपने बेड़ोनेरे वजाई सेइं चढ़तल च़ाढ़, ज़ेसेरे बारे मां मूसा नेबे कानूने मां हुक्म दित्तोरोए, ताके लोकन पतो च़ले कि तू बेड़ोरोस।” 45 पन तै मैन्हु बेइर गेइतां एस गल्लारे बारे मां लोकन बड़्झु शुनाने लगे ते इड़ी तगर फैलाने लगे कि यीशु फिरी बांटे नगरे मां न गेइ सको, पन बेइर सुनसान ठैरन मां राव ते च़ेरे पासां केरे लोक तैस कां एइते राए।

2 किछ दिहाइना बाद, यीशु फिरी कफरनहूम नगरे मां जेव। तैट्टेरे मैनेई शुनू कि तै तैड़ी एक्की घरे मां आए। 2 अकदम बड़े मैन्हु तैस घरे मां अकोट्टे भोए। तैड़ी ठार न राई, इड़ी तगर कि दारे केरां बेइर भी ठार न थी। यीशु तैन लोकन परमेशेरी गल्लां शुनाने लगे। 3 तैखन किछ मैन्हु एक्की अधरंगी मैन्हु छुइतां यीशु कां आए। तेच़ेरे मैनेई तै अधरंगी मैन्हु खट्टी पुड़ छुइतां आनोरो थियो। 4 मैन्हु केरि भीड़रे वजाई सेइं, तैना यीशुएरे नेड़े न पुज्जी सके। एल्लेरेलेइ तैनेई तैस घरेरी छत ज़ैस मां यीशु थियो पुट्टी छुड़ी। तैल्ला बाद, तैनेई तै खट ओसाली ज़ैस पुड़ अधरंगी मैन्हु थियो। 5 यीशुए तैन केरो विश्वास हेरतां अधरंगी मैन्हु सेइं ज़ोवं, “हे मट्टा, तेरे पाप माफ़ भोए।” 6 तैखन शास्त्री लोकन मरां किछ मैन्हु ज़ैना तैड़ी थिये, अपने-अपने मने मां सोचने लगगे कि, 7 “ए मैन्हु एन्चरां किजो ज़ोते? ए त परमेशेरी तुहीन केरते। परमेशेरे अलावा कौन पाप माफ़ केरि सकते?” 8 अकदम यीशुए ज़ैनी छुट्टू कि तैना अपने-अपने मने मां कुन सोचने लगगेरेन। एल्लेरेलेइ तैनी तैन सेइं ज़ोवं, “तुस अपने-अपने मने मां एन्चरां किजो सोचने लगगेरेथ? 9 एस अधरंगी मैन्हु सेइं कुन ज़ोनू सुखू आए? एन ज़ोनू कि ‘तेरे पाप माफ़ भोए,’ या एन ज़ोनू कि ‘उठ, अपनि खट छुइतां च़ल फिर?’ 10 अवं किछ केरनेबालोई, ज़ैस सेइं तुसेई बुज्झनूए कि मैनेरे मट्टे (यानी मीं) धेरती पुड़ लोकां केरे पाप माफ़ केरनेरो

अधिकार आए!” फिरी तैनी तैस अधरंगी मैनेरे पासे मुइतां तैस सेइं ज़ोवं, 11 “अवं तीं सेइं ज़ोतई, उठ, अपनि खट छुइतां अपने घरजो गा।” 12 अकदम तै खडो उठो ते अपनि खट छुइतां सारे मैन्हु केरे सामने निस्तां च़लो जेव। एस वजाई सेइं सारे मैन्हु हैरान भोए, त परमेशेरी बड़्याई केरतां ज़ोने लगगे, “असेई एरू ज़ेरू कधी नई लावरू!” 13 तैल्ला पत्ती, यीशु तैट्टां निस्तां फिरी गलील समुन्दरेरे बन्ने जेव। तैखन मैन्हु केरि सारी भीड़ तैस कां आई। तै तैन लोकन परमेशेरी गल्लां केरि शिक्षा देने लगे। 14 समुन्दरेरे बन्ने गाते-गाते, यीशुए लेवी नंखेरे मैन्हु लाव, ज़ैन हलफ़ईसेरू मट्टू थियू। तै मैन्हु चुंगी नेनेरे दफ़तेरे मां कम केरतो थियो। तैखन यीशुए तैस सेइं ज़ोवं, “मीं पत्ती एई, ते मेरो चेलो बन।” अकदम लेवी उठो त यीशु पत्ती च़लो। 15 बांटे मां, यीशु त तैसेरे चेले लेवेरे घरे मां रोटी खाने बिश्शे। तैखन बड़े चुंगी नेनेबाले त होरे पापी मैन्हु (लोक तेन केरे बारे मां सोचते थिये कि एना पापिन।) भी यीशु त तैसेरे चेलन सेइं साथी रोटी खाने बिश्शे, किजोकि एन केरे ज़ेरे बड़े लोक यीशु पत्ती च़लते थियो। 16 ज़ैखन किछ शास्त्री लोकेई त कने फरीसी लोकेई हेरू कि यीशु पापी मैन्हु त चुंगी नेनेबालन सेइं साथी रोटी खाने लगगेरोए, तैखन तैनेई यीशुएरे चेलन सेइं ज़ोवं, “तै चुंगी नेनेबालन त पैपन सेइं साथी किजो खाते पीते?” 17 यीशुए तैन केरि गल शून्तां तैन मिसाल देइतां जुवाब दित्तो, “सझर लोकन डाक्टेरेरी ज़रूरत न पे, पन बिमार मैन्हु ज़रूरत पेचे। तेन्चरां, अवं तैन मैन्हु केरे लेइ नई ओरोई ज़ैना अपने आपे धर्मी समझतन, पन पापी मैन्हु कुजाने ओरोई, ताके तैना अपने पापन केरां मन फिरान।” 18 यूहन्नारे चेले त कने फरीसी लोक बरत रखते थिये, पन यीशुएरे चेले बरत न थिये रखते। किछ लोकेई यीशु कां एइतां तैस पुच्छू, “यूहन्नारे चेले ते फरीसी लोकां केरे चेले बरत रखतन, पन तेरे चेले बरत की न रखन?” 19 यीशुए तैनन् जुवाब दित्तो, “इलाएरे दिहाडे, ज़ैखन लाड़ो ज़ैनी सेइं साथी राते, कुन तैना बरत रेख्खी सकतन? (बिलकुल नई) तैल्लेरेलेइ, ज़ांतगर लाड़ो तैन सेइं साथी राते, तांतगर तैना बरत न रेख्खी सकन। (किजोकि तैना खुशी आन।) 20 मेरे चेले भी तैन केरे ज़ेरे आन, किजोकि अवं तैन सेइं साथी आई। पन तैना दिहाडे एज्जले, ज़ैखन लाड़ो तैन केरां अलग कियो गालो (यानी मारो गालो), तैस मौके तैना (अपने दुखेरे वजाई सेइं) बरत रेख्खेले।” 21 “अवं तुसन अक होरि मिसाल देताई, नंखे लिगड़ेरी टलोई पुराने लिगड़े कोई न लाए। अगर कोई एन्चरां केरे, त धोनेरे पत्ती नंखे लिगड़ेरी टलोई पुराने लिगड़े अपने पासे खिचवी छुट्टेली। त तैन पेड़ले केरां भी जादे छिन्दोलू। 22 तेन्चरे कोई भी पुरैनी मसकन मां नंखे दाछारो रस न रखे, किजोकि दाछारो रस अम्लो भोइतां फुलते बार मसकन छिन्दी छुट्टेलो। दाछारे रस त कने मसकां, एना दुइये बरबाद भोइ गाले। एल्लेरेलेइ नंखे दाछारे रस हमेशा नंखे मसकन मां रेख्खोरो लोड़े, ताके मसकन न छिन्दी।” 23 एक्की आरामेरे दिहाडे, यीशु त

कने तैसेरे चले बत्ती मांमेइं चलने लगगोरे थिये, जै गेंवां केरे ऊडारन मांमेइं थी। चलते-चलते तैसेरे चले गेंवां केरे किछ शिल्लां टलोइतां खाने लगगे। 24 पन किछ फरीसी लोकेईं तैन हेरतां यीशु सेइं ज़ोवं, “तक! एना आरामेरे दिहाड़े तैन कम किजो केरतन, जैन मूसेरे कानूनेरे मुताबिक जेइज़ नई?” 25 यीशुए तैन सेइं ज़ोवं, “कुन तुसेईं परमेशेरी किताबी मां एन कथी नई पढ़ोरूए कि (बड़े पेइले) दाऊद राजे कुन कियूं ज़ैखन तैस त तैसेरे सैथन ढलुख लगगी त तैननु रोट्टी ज़रूरत थी? 26 तुसन पतोए कि दाऊद राजे परमेशेरे घरे मां गेइतां, अबियातार नंवेरे महायाजक करां खाने जो रोट्टी मग्गी। दाऊदे तै रोट्टी खाइ, जै परमेशेरे जो चढ़ोरी थी। कानूनेरे मुताबिक याजक केरे अलावा होरि केन्ची तैना रोट्टी खानेरी अज़ाज़त नई थी। पन दाऊदे अपने सैथन भी रोट्टी दित्ती त तेनेईं भी तैना रोट्टी खेइ? (पन फिरी भी परमेशेरे दाऊदे पुड़ दोष न लाव।)” 27 तैखन यीशुए तैन फरीसी लोकन सेइं ज़ोवं, “परमेशेरे आरामेरी दिहाड़ी लोकन मदत केरनेरे लेइ बनोरीए, न कि आरामेरे दिहाड़े कानून मननेरे लेइ तैनी लोक रचे। 28 एल्हेरेलेइ, मैनेरू मट्टू यानी अव आरामेरे दिहाड़ेरो भी प्रभु आई।”

3 तैल्ला पत्ती, यीशु एक्की प्रार्थना घरे मां जेव। तैड़ी अक मैनु थियो, जेसेरो हथ शुक्कोरे थियो। 2 तैड़ी किछ फरीसी लोक भी थिये, जैना यीशु पुड़ इलज़ाम लानो चाते थिये। एल्हेरेलेइ तैना यीशु ध्याने सेइं हेरने लगगोरे थिये कि आरामेरे दिहाड़े तै तैस मैनु बज़्जाते की नई। 3 तैखन यीशुए शुक्कोरे हथेबाले मैनु सेइं ज़ोवं, “मज़्जाटे खड़े भो।” (ते तै मैनु खड़ो भोव।) 4 त यीशुए तैन लोकन पुच्छू, “आरामेरे दिहाड़े कुन केरनू जेइजे, मैनेरू भलू केरनू या बुरू केरनू, मैनेरी जान बचानी या मारनी?” पन तैना चुप राए। 5 त तैनी सरकी सेइं तैन केरे चेरे पासन तक्कू, पन तैन केरे सखत दिलेरी वजाई सेइं उदास भोव। तैखन तैनी तैस मैनु सेइं ज़ोवं, “अपनो हथ अग्रोवं केरा।” तैनी मैने अपनो हथ अग्रोवं कियो। त अकदम तैसेरो हथ बेज्जोव। 6 तैखन फरीसी लोक प्रार्थना घरे मरां बेइर जे। अकदम तैना हेरोदेस राजेरे लोकन सेइं साथी यीशुएरे खलाफ साज़िश केरने लगगे कि यीशुएरो कोस तरीके सेइं कत्ल केरम। 7 तैल्ला पत्ती, यीशु अपने चलन सेइं साथी गलील समुन्दरेरे पासे जेव। मैनु केरि बड़ी भीड़ तैस पत्ती चली। गलील त यहूदिया इलाकां केरे लोक तैस कां आए। 8 यरूशलेम नगरेरे लोक, इदूमिया इलाकेरे लोक ते यरदन दरियारे पारेरे लोक त कने सूत त सैदारे आसेपासेरे लोक भी तैस कां ओरे थिये। तैना सब यीशु कां आए, किजोकि तैनेईं यीशुएरे सारे चमत्कारेरे कम्मां केरे बारे मां शुनोरू थियूं। जैना तै केरतो थियो। 9 यीशुए बड़े लोक हथ लेइतां बज़्जावरे थिये, एल्हेरेलेइ होरे बड़े लोक जैना बड़े बिमार थिये, तैना तैस सेइं हथ लानेरे लेइ तैस पुड़ बिछड़ी गाते थिये, ताके तैना भी बेज्जोन। मैनु केरि भीड़ बड़ी जादे थी। एल्हेरेलेइ यीशुए अपने चलन सेइं ज़ोवं, “मेरे लेइ अक किशती तियार

केरा, ताके एना लोक मीं ढलेन्नी न सकन।” 11 त जैन लोकन पुड़ भूतां केरो सायो थियो, तैना भी यीशु लेइतां तैसेरे पावन पुड़ बिछड़ी गाते थिए। तैना भी ज़ोरे-ज़ोरे सेइं ज़ोते थिए कि, “तू परमेशेरे मट्टू आस।” 12 यीशुए तैन भूतन सखत हुक्म दित्तो कि, “मेरे बारे मां लोकन न ज़ोथ कि अव कौन आई।” 13 तैल्ला पत्ती, यीशु एक्की पहाड़े पुड़ चढ़ो। जैना मैनु तै अपने चले बनानो चातो थियो, तैना एप्पू कां कुजाए। तैना तैस कां आए। 14 यीशुए तैन मरां 12 मड़द चुने, ते तैन प्रेरित नवं दित्तू कि तैना तैस सेइं साथी-साथी रान, ताके तै तैन लोकन खुशखबरी शुनाने भेजे। 15 यीशुए तैननु, लोकां केरि बिमैरी बज़्जाने त कने मैनु मरां भूतां केरो सायो कढनेरो अधिकार दित्तो। 16 तैना 12 मैनु केरां नंवां इना थियां: शमोन जेसेरू नवं यीशुए पतरस रखू, 17 याकूब त तैसेरो ढ्ला यूहन्ना, एना दुइये जेब्देरां मट्टां थियां, त यीशुए एन दुइयां केरू नवं बुअनरगिस रखू, मतलब कि, गुड़नेरां मट्टां। 18 त अन्द्रियास, फिलिप्पुस, बरतुल्लै, मत्ती, थोमा, याकूब जैन हलफईसेरू मट्टू थियूं, त तदै, शमोन जै पेइले रोमी सरकारारे खलाफ यहूदी लोकां केरि आज़ेदेरे लेइ लड़नेबालो थियो। 19 त कने यहूदा इस्करियोती जैनी बादे मां यीशु धोखे सेइं टलुवाव। 20 तैल्ला पत्ती यीशु कफरनहूम नगरेरे एक्की घरे मां जेव। फिरी मैनु केरि भीड़ तैस घरे मां अकोट्टी भोइ, कि यीशु त तैसेरे चलन रोट्टी खानेरे लेइ भी मौको न मैल्लो। 21 ज़ैखन यीशुएरे रिशतेदारेई एन शुनु, त तैना तैस टलेइतां अपने घरे वापस आन्नेरे लेइ जे, किजोकि तैना ज़ोने लगगोरे थिये कि तैसेरो दिमाग ठीकाने नई। 22 किछ शास्त्री लोक, जैना यरूशलेम नगरेरां ओरे थिये, तैना लोकन सेइं ज़ोई राओरे थिये कि, “यीशु मां शैतान आए।” त एन भी ज़ोई राओरे थिये कि, “ते भूतां केरे प्रधानेरी शक्ति सेइं लोकन मरां भूतां केरो सायो कढते।” 23 एल्हेरेलेइ यीशुए तैना नेडे कुजाए ते तैन मिसाल देइतां ज़ोने लगगे, “शैतान केन्चरां अपने भूतन लोकन मरां केड्डी सकते? 24 अगर एक्की राज़ेरे लोक अपने राज़ेरे खलाफ लड़ाई केरन, त तैन राज़ बनोरू न रेइ सके। 25 अगर केन्ची टब्बेरे लोक अपने टब्बेरे खलाफ लड़ाई केरन, त तैन टब्बर भी बनोरू न रेइ सके। 26 तेन्चरे, शैतान भी अगर एप्पू अपने भूतां केरे खलाफ लड़ाई केरे, त तै केन्चरां बनोरो रेइ सकते? तैसेरो त बिलकुल खातमां भोइ गालो। 27 अव होरि मिसाल देताई, कोई मैनु केन्ची ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैनु बेंधी न छुट्टे। तैखन तै तैस ज़ोरेबाले मैनेरो माल लुट्टी सकते। अव भी शैतानेरे भूतां केरो सायो लोकन मरां केड्डी सकतां। (शैतान तैस ज़ोरेबाले मैनेरो ज़ेरोए) 28 अव तुसन सेइं सच ज़ोतई कि मैनु केरे सारे किसमां केरे पाप त कने परमेशेरी तुहीन, जै तैना केरतन, अगर तैना मन फिरान त परमेशर तैन माफ़ केरेलो। 29 पन जै कोई पवित्र आत्माारी तुहीन केरे, त तैस कथी भी परमेशर माफ़ न केरेलो। पन तै मैनु

हमेशरे पापेरो दोषी बेनि गालो।” (aiōn g165, aiōnios g166) 30 यीशुए एन्चरां ज़ोवं किजोकि तैना यीशुएरे बारे मां एन ज़ोते थिये कि तैस पुड़ भूतेरो सायो आए। 31 तैखन यीशुएरी अम्मा त कने तैसेरे ढूला तैडी आए। तैना घरेरे बेइर खड़े भोइतां तैस जो बिस्तार भेजो। 32 तैना घरेरे अन्तर न गेइ सके किजोकि मैन्हु केरि भीड़ यीशुएरे चेब्रे पासन बिश्शोरी थी। एल्हेरेलेइ तैन लोकेई यीशु सेइं ज़ोवं, “तक, तेरी अम्मा त तेरे ढूला बेइर खड़े आन। तैना तीं सेइं मिलनू चातन।” 33 पन यीशुए तैनन् जुवाब दितो, “अवं तुसन ज़ोताई मेरी अम्मा त कने मेरे ढूला कौन आन!” 34 तैखन यीशुए तैन लोकां केरे पासे तेकतां ज़ोवं, ज़ैना तैसेरे चेब्रे पासन बिश्शोरे थिये, “तक्का, मेरी अम्मा त कने मेरे ढूला इना आन। 35 किजोकि ज़ै कोई परमेशरेरी मेर्जी पुड़ चलते, तैए मेरो ढूला, मेरी बेइन ते मेरी अम्मा आए।”

4 तैल्ला पत्ती, यीशु फिरी गलील समुन्दरे बन्ने लोकन शिक्षा देने लगे। मैन्हु केरि एत्री भीड़ तैस कां अकोट्टी भोइ। यीशु समुन्दरे मां एककी किशती मां चढ़ो ते बिश्शी जेव, ताके तै सेबभी लोकन परमेशरेरी गल्लां केरि शिक्षा देइ सके। मैन्हु केरि सारी भीड़ तैसेरी गल्लां शुन्तां समुन्दरे बन्ने पुड़ खड़ी राई। 2 यीशुए तैनन् बेड़ि गल्लां मिसालन मां ज़ोई। तैनी शिक्षा देइतां तैन लोकन सेइं ज़ोवं, 3 “ई कहानी शुना! एक्सां अक बीज बेनेबालो बीज बेने जो जेव। 4 बीज बेते बार किछ बीज बत्तेरे इलेखी बिछड़ू त चुड़ोल्लेई एइतां तैन बीज चुनू। 5 किछ बीज घोड़नबाली ज़मीनी पुड़ बिछड़ू, जेड़ी तैस डुग्घी मिती न मेलनेरे वजाई सेइं तैन लूशी उग्गू त बूटो लगे। 6 पन ज़ैखन दिहाड़ो निस्सो, त तै निकड़ो बूटो फुक्कोई जेव। ते ज़ील न छड़ुनेरे वजाई सेइं शुक्की जेव। 7 होरू किछ बीज कंटां केरे झैल्लन मां बिछड़ू। ज़ैखन तैडी बूटो लगे, त कंटां केरे झैल्लेई बेडोइतां तै बूटो दबेइ छड़ो, त तैनी बुटे फल न दितो। 8 पन किछ बीज रोड़ी ज़मीनी पुड़ बिछड़ू, त तैन उग्गू त बेडोवं त फलदार भोवं। तैन मरां केन्ची बीजे टलही गुणा फल दितो, त केन्ची बीजे शठ गुणा, त केन्चे शौव गुणा।” 9 ए मिसाल शुनानेरे बाद, यीशुए लोकन सेइं ज़ोवं, “ज़ै कोई समझनू चाते, तै ध्याने सेइं शुने त समझो।” 10 तैल्ला पत्ती, ज़ैखन यीशु मैन्हु केरि भीड़ी करां अलग थियो, त तैखन तैसेरे सैथेई त कने तैसेरे 12 चेलेई यीशु तैस मिसालेरे बारे मां पुच्छू। 11 यीशुए तैन सेइं ज़ोवं, “अवं तुसन परमेशरेरे राज़ेरो भेद समझोइलो। पन होरि लोकां केरे लेइ मिसालन मां ज़ोवं गाते। 12 ताके ज़ेन्चरां परमेशरेरी किताबी मां लिखोरूए तेन्चरां भोए कि, “ज़ैन अवं केरतई, तैन तैना बार-बार हरेले, पन तैना तैसेरो मतलब न बुझोले। ज़ैन अवं ज़ोतई, तैन तैना बार-बार शुनेले, पन मेरी गल न समझोले। एरू न भोए कि तैना अपने पापन करां मन फिरान त तैन केरे पाप माफ़ किये गान।” 13 तैल्ला पत्ती, यीशुए तैन सेइं ज़ोवं, “कुन तुसेई तै मिसाल न समझी? अगर तुस तैस मिसाली न समझथ, त फिरी होरि सब मिसालां केन्चरां समझोले? 14

अवं तुसन तै मिसाल समझताई। बीज बेनेबालो तै आए, ज़ै परमेशरेरी गल्लां लोकन शुनाते। 15 ज़ैना मैन्हु परमेशरेरी गल्लां शुन्तन, तैन मरां किछ लोक तैस बत्तेरे ज़ेरे आन, जेड़ी बीज बिछड़ते। तैना त परमेशरेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशरेरी गल्लां केड्डी छड़ते। 16 किछ होरे लोक, ज़ैना परमेशरेरी गल्लां शुन्तन, तैना तैस घोड़नबाली ज़मीनेरे ज़ेरे आन। तैना परमेशरेरी गल्लां शुन्तन त खुशी सेइं तैन कबूल भी केरतन। 17 पन ज़ेन्चरां निकड़ो बूटो घोड़नबाली ज़मीनी मां मिती घट भोनेरे वजाई सेइं लूशी लगते, तेन्चरां एना मैन्हु भी भोतन। तैना मज़बूत विश्वास न रखन। एल्हेरेलेइ तैना थोड़े दिहाड़न तगर विश्वास रखतन। पन ज़ैखन परमेशरेरी गल्लां केरे मुताबिक चलनेरे वजाई सेइं तैन पुड़ मुसीबतां एचन त कने ज़ैखन लोकन केरां सताए गातन, त तैखन तैना अकदम अपने विश्वास छेड़तां ठोकर खातन। 18 होरे किछ लोक, ज़ैना परमेशरेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। तैना परमेशरेरी गल्लां त शुन्तन, 19 पन तैना इस दुनियारी फिक्क केरतन, त कने दौलतरे वजाई सेइं धोखो खातन, त तैना बड़े चीज़ां केरू लालच केरतन। एसैरे वजाई सेइं तैना परमेशरेरी गल्लां बिसरी छड़तन त तैन गल्लन पुड़ न चलन। (aiōn g165) 20 पन किछ लोक, ज़ैना परमेशरेरी गल्लां शुन्तन त कने तैन पुड़ चलतन, तैना तैस रोड़ी ज़मीनेरे ज़ेरे आन। तैना परमेशरेरी गल्लां शुन्तन त कबूल भी केरतन त फल देतन, मतलब की तैना परमेशरेरी गल्लां केरे मुताबिक ज़िन्दगी ज़ीतन। कोई टलही गुणा, कोई शठ गुणा त कोई शौव गुणा फल देतन।” 21 तैल्ला पत्ती, यीशुए मैन्हु केरि भीड़ी सेइं ज़ोवं, “कोई बलतो दीयो एन्तां हेटी मां या खट्टी हठ न रखे। पन केन्ची उच्ची ठैरी पुड़ रखो गाते। (ताके सारे घरे लौ भोए।) 22 कोई गल छप्पोरी न राली, पन सैरी गल्लां बेदी भोली, ते न कोई भेद छप्पोरो रालो, पन सारो भेद बांदो भोलो। 23 ज़ै कोई समझनू चाते, तै ध्याने सेइं शुने त समझो।” 24 तैल्ला पत्ती, यीशुए मैन्हु केरि भीड़ी सेइं ज़ोवं, “होशियार राथ कि अवं तुसन कुन शिक्षा देइ राओरोई। मेरी शिक्षाई शुन्तां, जेत्री तुस मेरी गल मन्नेले तेत्री परमेशर तुसन समझ देलो। हाँ, परमेशर तुश्शी समझ होरि भी बधालो। 25 किजोकि ज़ैस कां परमेशरेरी मर्जी समझनेरी इच्छा आए, तैस परमेशर जादे समझ देलो। पन ज़ैस कां परमेशरेरी मर्जी समझनेरी इच्छा नई, तैस केरां, थोड़ी ज़ेरि समझ, ज़ै तैस कां आए, तै भी नी गाली।” 26 तैल्ला पत्ती, यीशुए मैन्हु केरि भीड़ी सेइं ज़ोवं, “परमेशरेरू राज़ एरू ज़ेरू आए, कि अक मैन्हु ज़मीनी पुड़ बीज बेते। 27 तै मैन्हु हर राती झुलते त दीसां बींझते। तैन बीज उगने लगोरूए त बडोने लगोरूए, पन तैस पतो न चले कि तैन केन्चरां भोते। 28 केन्चेरी मद्दतरे बगैर ज़मीन एप्पू फल आन्चे। पेइले मुन्केरे निस्तन, बादे मां शिल्लां निस्तन, तैल्ला पत्ती शिल्लन ग्लेव लगतन। 29 आखरी मां, ज़ैखन ग्लेव पेक्की

गातन, तैखन अकदम तै मैन्हु कटाई केरनेरे लेइ मैन्हु भेजते, मेरतां ज़ोवं, “हे यीशु, परमप्रधान परमेशेरि मद्रा, मीं तीं सेइं किजोकि कटाईरो वक्त ओरो भोते।” 30 तैल्ला पत्ती, यीशुए मैन्हु केरि भीड़ी सेइं ज़ोवं, “अस परमेशेरू राज़ेरी मसाल कोस चीज़ी सेइं देइ सकतम? कोस मिसाली सेइं अस तैस समझैइ सकतम? 31 परमेशेरू राज़ शेरीएरे बीजेरू ज़ेरू आए (ज़े शेरीयो इस्राएले मां भोते)। ज़ैखन तैन बीज़ ज़मीनी मां बेव गाते, तैन सारे बीज़न केरां निकडू भोते। 32 पन ज़ैखन तैन बीज़ बेव गाते, तै उगातां सारे निकके-निकके बुट्टन केरां बड्डो भोते। तैसेरी एज़ी बेड्डी डेलडी निस्चन, कि अम्बरेरां चुडोल्ली तैसेरी छावी मां अपने आले बनेइ सकतन।” 33 एन्चरां बेडि मिसालां ज़ोइतां, यीशु तैन लोकन परमेशेरू गल्लां शुनातो थियो, ज़ेत्रू तेना शुनी सकते थिये। 34 तै हमेशा मिसाल देइतां परमेशेरू राज़ेरे बारे मां तैन सेइं ज़ोतो थियो। पन ज़ैखन मैन्हु केरि भीड़ी मरां यीशु त तैसेरे चले अलग बिशे थिये, तैखन यीशु अपने चेलन सेइं सैरी मिसालां केरो मतलब समझोतो थियो। 35 तैस दिहाड़ेरे बादे मां, ज़ैखन ड़ोलोझ भोइ, यीशुए अपने चेलन सेइं ज़ोवं, “एज्जा, अस गलील समुन्दरेरे पार च़लमा।” 36 तैल्हेरेलेइ मैन्हु केरि भीड़ छेइतां तेना तैस किशती मां च़ढ़े ज़ैस मां यीशु पेइलो थियो, त तैना तैट्ठां च़ले जे। होरि किछ किशती मां भी लोक तैन सेइं साथी जे। 37 ज़ैखन तैना समुन्दर पार केरने लगगेरे थिये, तैखन अक बड्डो तूफान च़लो, त छेल्ली एडी तगर पुज़्जी कि किशती पैनी सेइं भेरोई जेई। 38 पन यीशु किशतेरी पेत्री पासे, शेराहने पुड़ क्रोडी रेखतां ड़ुल्लोरो थियो। तैखन तैसेरे चेलेई तै बीङ्गेइतां तैस सेइं ज़ोवं, “हे गुरु, कुन तीं फ़िक्र नई, अस त मरने बालेमा!” 39 तैखन यीशुए उठतां तूफान डांटो, त समुन्दरे सेइं ज़ोवं, “शान्त रा, रुकी गा!” अकदम तूफान रुकी जेव त समुन्दर शान्त भोव। 40 तैखन यीशुए अपने चेलन सेइं ज़ोवं, “तुस किजो डरतथ? कुन तुसन हेजू भी मीं पुड़ विश्वास नई?” 41 पन तैना बडे डेरि जे त एप्पू मामेइं ज़ोने लगगे, “ए मैन्हु कौन आए कि तूफान त समुन्दर भी एसेरो हुक्म मन्तन!”

5 यीशु त तैसेरे चले गलील समुन्दरेरे पार, गिरासेनी इलाके मां पुज़्जे। 2 ज़ैखन यीशु किशती पुड़ेरां ओस्सो, त तैखन अक मैन्हु, ज़ैस पुड़ भूतां केरो सायो थियो, कब्रन मामेइं यीशु कां मिलने अव। 3 तै मैन्हु कब्रस्ताने मां रातो थियो। (तै मैन्हु बड्डो खतरनाक थियो।) कोई तैस शंगली सेइं भी न बेंधी सकतो थियो। 4 किजोकि (पेइले बडे बार) लोकेई तैसेरे हथ पाव शंगलन सेइं बंधोरे थिये। पन हर बार तै हथ्यां केरि शंगलां ट़लोइतो थियो त पव्वां केरि शंगलां केरे टुकड़े-टुकड़े केरतो थियो। कोई तैस कैबू न केरि सकतो थियो। 5 तै हमेशा रात-दिहाड़ी कब्रस्ताने मां त कने पहेइन पुड़मेइं हन्ठतो थियो त चिन्डां मारतो थियो, त अपने आपे घोड़न सेइं ज़ख्मी केरतो थियो। 6 ज़ैखन तैनी मैने यीशु दूरेरां लाव, त तै दौइतां यीशु कां अव ते तैस कां मथ्यो टेको। 7 यीशुए भूते सेइं ज़ोवं, “हे भूता, एस मैन्हु मरां निस्सी गा!” तैनी भूते ज़ोरे सेइं चिन्डां

मेरतां ज़ोवं, “हे यीशु, परमप्रधान परमेशेरि मद्रा, मीं तीं सेइं कुन कम? अवं तीं परमेशेरू कसम देताई, मीं दुख न दे।” 9 एल्हेरेलेइ यीशुए तैस पुच्छू, “तेरू कुन नवं आए?” तैनी यीशु सेइं ज़ोवं, “मेरू नवं फौज आए, किजोकि अस बडे आमा।” 10 तैखन तैनी यीशु कां बडी मिन्नत की, “इस इलाके मरां असन बेइर न भेज।” 11 तैडी पहेडी पुड़ सूर्रां केरो अक बड्डो घान च़ेरी राहोरो थियो। 12 तैल्हेरेलेइ तैन भूतेई यीशु कां मिन्नत की, “महरबानी केरतां असन उन सूरन मां भेजि दे ताके अस उन मां गामा।” 13 तैखन यीशुए तैनन, सूरन मां गानेरी अज़ाज़त दिती, त तैना भूतां तैस मैन्हु मरां निस्तां सूरन मां जेआं। तैखन सूर्रां केरो घान, ज़ैस मां लगभग दूई हजार सूर थिये, टिब्बे पुड़ेरां बिछड़तां अकदम समुन्दरे मां ड़ुबतां मेरि जे। 14 ज़ैखन सूर्रां केरे च़ारनेबालेई एन हेरू, त तैना डेरि जे। तैनेई तैट्ठां नेशतां नगरी मां त कने आसेपासेरे ड़लौव्वन मां ए खबर शुनाई। तैल्हेरेलेइ लोक एप्पू हेरनेरे लेइ तैडी आए। 15 ज़ैखन नगरेरे लोक यीशु कां पुज़्जे, त तैस मैन्हु, ज़ैस मां पेइले भूतां केरि फौजेरो सायो थियो, हुनी लिगडां लगगेरे त कने होशी मां लेइतां डेरि जे। 16 ज़ैनेई तेना गल्लां पेइले लेवरी थी, तैनेई तैस मैनेरे बारे मां ज़ैस पुड़ भूतेरो सायो थियो त कने तैन सूर्रां केरे बारे मां पूरो हाल लोकन शुनाव। 17 तैना यीशु कां मिन्नत केरतां ज़ोने लगगे कि, “इशे इलाके मरां च़ेलि गा!” 18 ज़ैखन यीशु वापस गानेरे लेइ किशती मां च़ढ़ने लगगे, त तैनी मैने ज़ैस मां पेइले भूतां केरो सायो थियो, यीशु कां मिन्नत की कि, “मीं एप्पू सेइं साथी च़लने दे।” 19 पन यीशुए तै एप्पू सेइं साथी च़लने न दितो। पन तैनी तैस सेइं ज़ोवं, “अपने घरे जे गा त कने अपने लोकन सेइं ज़ो, कि प्रभु परमेशेरू तीं पुड़ दया केरतां तेरे लेइ केत्रू बड्डू कम कियोरूए।” 20 एल्हेरेलेइ तै मैन्हु गेइतां दिकापुलिस इलाके मां लोकन शुनाने लगगे कि यीशुए मेरे लेइ केत्रू बड्डू कम कियोरूए। सारे लोक ए गल शुन्तां हैरान भोइ जे। 21 तैल्ला पत्ती, यीशु फ़िरी किशती मां गलील समुन्दरेरे इस पासे वापस अव, त मैन्हु केरि बडी भीड़ तैस कां अकोठी भोइ। यीशु समुन्दरेरे बन्ने पुड़ थियो। 22 तैखन याईर नव्वेरो मैन्हु तैडी अव, ज़ै यहूदी लोकां केरे प्रार्थना घरेरे प्रधान मरां अक थियो। ज़ैखन तैनी यीशु लाव, त तैसेरे पावन पेव। 23 तैनी एन ज़ोइतां यीशुए सेइं बडी मिन्नत की, “मेरी निकडी कुई मरनेबाली आए। तू मीं सेइं साथी एइतां तैस पुड़ अपनो हथ रख, ताके तै बेइज़ोए ते ज़ींती राए।” 24 एल्हेरेलेइ यीशु तैस सेइं साथी तैसेरे घरे जेव। मैन्हु केरि अक बडी भीड़ यीशु पती च़ली, इडी तगर कि लोक यीशु पुड़ बिछड़ते थियो। 25 तैस भीडी मां अक कुआन्श भी थी, ज़ैस 12 सालां केरि खून च़लनेरी बिमारी थी। 26 तैसां बडे बेइदन केरां बड्डो दुख झल्लो। बिमारी ठीक भोनेरे लेइ तैसां अपने सब पेंडसे खेर्ची दित्ते, पन तैस कोई फ़ैइदो न भोव। पन तै होरि भी जादे बिमार भोइ जेई। 27 तै यीशुएरे बारे मां शुन्तां अपने दिले मां ज़ोती थी, “अगर अवं सिर्फ तैसेरे लिगडे सेइं हथ लाएली, त अवं बेइज़ोई

गाली।” एल्हेरेलेड तै मैन्हु केरि भीड़ी मां यीशुए पत्रेवरं आई ते तैसेरे लिगड़े सेइं हथ लाव। 29 जैखन तैसां यीशुए लिगड़े सेइं हथ लाव, त अकदम तैसेरो खून चलनेरी बिमारी बेज्जोरी। तैसां अपनि जानी मां बुज्जू कि अवं तैस बिमारी केरां बेज्जोरी आई। 30 यीशुए अकदम बुज्जू कि मीं मरां शक्ति निस्सोरीए। एल्हेरेलेड तैनी मैन्हु केरि भीड़ी मां चेब्रे पासन मुड़तां लोकन पुच्छू, “मेरे लिगड़े सेइं केनि हथ लाव?” 31 तैसेरे चेलेई तैस सेइं ज़ोवं, “तू हेरतस कि मैन्हु केरि भीड़ तीं पुड़ बिछड़ने लग्गोरी, फिर भी तू किजो पुछतस कि ‘केनि मीं सेइं हथ लाव?’” 32 पन यीशु तैस हेरनेरे लेइ, जैनी एरु कियोरु थियूं, चेब्रे पासन तकने लगो। 33 तैखन तै कुआन्श डरती ते थर्कती थी, किजोकि तै ज्ञानती थी कि तैसां मूसोरो कानून टलोडरोए। तै अगगर आई ते यीशुए पावन पुड़ बिछड़तां, तैस सेइं सैरी गल्लां सच-सच ज़ोने लग्गी। 34 पन यीशुए तैस सेइं ज़ोवं, “हे कुईए, तेरे विश्वास, जै तीं मीं पुड़ रखखोरो, तैनी तू बज्ज़ाई। खुशी सेइं घरजो गा, ते हुनी तू एस बिमारी केरां बेची जेई।” 35 ज़ताली यीशु ई गल मसां ज़ोई राओरो थियो, तैखन प्रार्थना घरेरे लीडरेरे घरेरां किछ मैनेई एइतां तैस सेइं ज़ोवं, “तेरी कुई मेरि जोरीए, हुनी गुरु किजो तकलीफ देतस?” 36 पन यीशुए तैन केरि गल न शुन्तां प्रार्थना घरेरे लीडरे सेइं ज़ोवं, “न डर। सिर्फ मीं पुड़ विश्वास रखा।” 37 यीशु ते याईर चलने लागे, पन यीशुए पतरस, याकूब ते तैसेरो द्वाला यूहन्नारे अलावा, होरो कोई एप्पू सेइं साथी एजने न दित्तो। 38 प्रार्थना घरेरे लीडरेरे घरे मां पुज्तां यीशुए हल्लो मचोरो लाव ते कने लोक बड़े लेरां देते त शोग केरते लाए। 39 तैखन यीशुए घरे मां गेइतां तैन सेइं ज़ोवं, “तुस किजो रोलो मच्रातथ त लेरां देतथ? कुई मरीं नई, पन झुल्लोरीए।” 40 जैखन तैन लोकेई एन शुन्, त तैना तैसेरो मज़ाक बनाने लग्गे, किजोकि तैना ज्ञानते थिये कि कुई मेरि जोरीए। तैखन यीशुए सारे मैन्हु तैङ्गां केढतां, सिर्फ कुईअरे हाज-बव त कने अपने टलाई चेलन सेइं साथी कमरेरे अन्तर जेव, ज़ेड़ी कुई पेव्री थी। 41 तैखन यीशुए कुईएरो हथ टलेइतां तैस सेइं अपनि भाषाई मां ज़ोवं, “तलीता कूमी!” ज़ेसेरो मतलब कि, “हे निकड़ी कुईए, अवं तीं सेइं ज़ोतई, खड़ी उठ!” 42 अकदम कुई उठतां चलने फिरने लग्गी, किजोकि तै कुई 12 सालां केरि थी। एन हेरतां तैना बड़े हैरान भोए। 43 पन यीशुए तैन हुक्म देइतां ज़ोवं कि, “ए गल केन्ची सेइं न ज़ोइयथ। एस कुईए किछ खाने जो देथ।”

6 तैल्ला पत्ती, यीशु तैङ्गां निस्तां अपने नगर नासरते जो जेव। तैसेरे चेले तैस सेइं साथी चले। 2 आरामेरे दिहाड़े, यीशु तैन केरे प्रार्थना घरे मां गेइतां तैन लोकन परमेशरेरी गल्लां केरि शिक्षा देने लगो। तैसेरी शिक्षा शुन्तां बड़े लोक हैरान भोए ते एक्की होरि पुछने लग्गे, “एनी मैने एना गल्लां कोट्ठां शिख्खी? एस एत्री अक्ल कोट्ठां आई? एस एत्रे चमत्कार केरनेरी शक्ति कोट्ठां मैल्ली! 3 ए त टलखान आए, जैन मरियमारु मट्टु आए। ए त याकूब, योसेस, यहूदा, ते शमीनेरो द्वाला आए। एसेरी बेइनां

भी इश्शे इड़ी रेइचन!” एल्हेरेलेड तैनेई यीशुएरो इन्कार कियो। 4 तैखन यीशुए तैन लोकन अक कहावत ज़ोई, “नबी बेइरीए लोकन मां इज़्ज़तदार भोलो, पन अपने नगरेरे लोकन केरां ते कने अपने रिश्तेदारन केरां त कने अपने घरेबालन मां बेइज़्ज़त भोलो।” 5 तैन लोकेई यीशु पुड़ विश्वास न केरनेरे वजाई सेइं, तैनी तैस नगरी मां सिर्फ थोड़े ज़ेरे बिमार मैन्हु पुड़ हथ रेखतां तैना बज्ज़ाए, तैन केरे अलावा होरो कोई चमत्कार न केरि सको। 6 यीशु नासरत नगरेरे लोकां केरो अविश्वास हेरतां हैरान भोव। तैल्ला पत्ती, तै अपने चेलन सेइं साथी चेब्रे पासन केरे इल्लोव्वन मां परमेशरेरी गल्लां केरि शिक्षा देतो राव। 7 तैल्ला पत्ती, यीशुए अपने 12 चेले एप्पू कां कुजेइतां, तैन दूई-दूई केरतां भेजने लगो। भेजने केरां पेइले, तैनी अपने चेलन, लोकन मरां भूतां केरो सायो कढनेरो अधिकार दित्तो। 8 ते तैनी तैन हुक्म दित्तो, “बत्तां चलते-चलते सोटेरे अलावा होरु किछ न नेइयथ। न रोटी न झोलो त कने बेटवे मां पेंडसे भी न नेइयथ। 9 पन बूट लेइयथ, पन दूई-दूई कुरते न लेइयथ। 10 जैखन तुस केन्ची इल्लोव्वे मां गाथ, अगर कोई अपने घरे बिश्नेरेलेइ तुस कुजाए, त तैस्से घरे मां बिश्शथ, ज़ांतगर तैस इल्लोव्वेरां न निस्सथ। 11 अगर केन्ची इल्लोव्वेरे लोक तुसन कबूल न केरन त कने तुश्शी गल्लां न शुन्न, त तैङ्गां चलते-चलते तुस अपने पावां केरि धूड़ झेड़ी छेड्ढथ ताके तैन केरे खलाफ गवाही भोए। (अवं तुसन सेइं सच ज़ोतई कि परमेशरेरे आदालतेरे दिहाड़े बुरे लोकन सज़ा देलो, जैना सदोम त कने अमोरा नगरन मां रहते थिये। पन जैना लोक तुश्शी गल्लां न शुन्ले, तैस नगरेरे लोकन परमेशर बड़ी जादे सज़ा देलो)” 12 यीशुएरो हुक्म शुन्नेरे बाद, तैनेई तैङ्गां निस्तां बड़े नगरन मां गेइतां लोकन परमेशरेरी गल्लां शुनेई कि, “तुस अपने पापन केरां मनफिराथ।” 13 ते तैनेई बड़े लोकन मरां भूतां केरो सायो भी कड्डो, त कने बड़े बिमार मैन्हु पुड़ तेल लेइतां बज्ज़ाए। 14 हेरोदेस राजे भी यीशुएरे बारे मां शुन्, किजोकि यीशुए नव मुशूर भोरु थियूं। तैनी यीशुएरे बारे मां ज़ोवं कि, “शायद, यूहन्ना, जै बपतिस्मो देनेबालो थियो, मुड़दन मरां ज़ीतो भोरोए। एल्हेरेलेड, तै एना चमत्कार केरि सकते।” 15 होरेई मैनेई यीशुएरे बारे मां ज़ोवं कि, “शायद, तै मैन्हु एलिय्याह नबी आए!” पन किछ होरेई मैनेई ज़ोवं कि, “तै त पराने ज़मानेरे परमेशरेरी गल्लां ज़ोनेबालां केरो ज़ेरो अक नबी आए!” 16 पन हेरोदेस राजे लोकां केरि गल्लां शुन्तां ज़ोवं कि, “तै मैन्हु त यूहन्ना आए, ज़ेसेरी क्रोड़ी मीं कट्टेरी थी। तै मुड़दन मरां ज़ीतो भोरो आए!” 17 हेरोदेस राजे एन्चरां सोचू, किजोकि थोड़े दिहाड़ना पेइले, तैनी एप्पू अपने सिपाही भेजतां यूहन्ना कैद केरतां छुड्डोरो थियो। तैनी अपने द्वाला फिलिप्पुसेरी लाड़ी हेरोदियासेरी वजाई सेइं एन्चरां कियोरु थियूं ज़ैस सेइं तैनी इला बनोरो थियो। 18 एल्हेरेलेड, यूहन्ना हेरोदेस राजे सेइं बार-बार ज़ोतो थियो कि, “तीं अपने द्वालाएरी लाड़ी सेइं इला बनानो जेइज़ नई।” 19 तैल्हेरेलेड

हेरोदियास रानी यूहन्ना सेइं दुश्मनी रखती थी ते तैस कल्ल ज़ोवं, “ई सुनसान ठार आए, ते ज़िर भी बडू भोरू आए। 36 एन केरनो चाती थी। पन तै तेन्त्रां न केरि सकती थी, 20 किजोकि हेरोदेस राजे पतो थियो कि यूहन्ना अक धर्मी ते पवित्र मैन्हु गेइतां अपने लेइ खाने जो रोटी घिन्ना।” 37 पन यीशुए तैनन् थियो। तैल्हेरेलेइ, हेरोदेस राजो तैसेरी बडी इज़्जत केरतो थियो जुवाब दित्तो कि, “तुस्से एन खाने जो रोटी देथा।” पन तैनेई तैस त कैदखाने मां हेरोदियास रैनी केरां बचेइतां रखतो थियो। त सेइं ज़ोवं, “कुन अस दूई शौव दिहाड़ी केरि कमाई सेइं रोटी तै यूहन्नारी गल्लां शुन्तां बडी डरतो थियो, पन तैसेरी गल्लां घिन्तां एन मैन्न् खुवाम? एन न भोइ सके!” 38 एल्हेरेलेइ, खुशी सेइं शुन्तो भी थियो। 21 आखकार यूहन्ना मारनेरो ठीक यीशुए तैन सेइं ज़ोवं, “तुसन कां केत्री रोटी आन? गेइतां हेरा।” मौको मैल्लो। हेरोदेस राजे अपने ज़रमेरी दिहाड़ी मां अक धाम पतो केरनेरे पत्ती, तैनेई यीशु सेइं ज़ोवं कि, “पंच रोटी त कने रख्खी। तैस धामी मां तैनी अपने बड़े खास अफसरन, त कने दूई मेछली आन।” 39 तैखन यीशुए अपने चेलन हुक्म दित्तो फौजी अफसरन, त कने गलील इलाकेरे बड़े-बड़े मैन्हु कुजाए। कि, “सारे मैन्हु नीले घासे पुइ बिशाला।” 40 एल्हेरेलेइ तैना मैन्हु शौव-शौव त कने पज़ां-पज़ां केरि हुन्डी मां बिशशी जे। 41 तैखन यीशुए अपने हथ्ये मां पंच रोटी ते दूई मेछली ट्लेइ, त अम्बरेरे पासे तेकतां शुक्र कियूं तैल्ला पत्ती, यीशु तैना रोटी टलोइतां चेलन कां देते जेव कि लोकन खाने जो देन। तेन्त्रां दूई मेछली भी तैन सारे लोकन बेंटी दिती। 42 ते सारे मैन्हु इडी तगर कि अवं अपनू अथ्यू राज़ भी देलो।” 24 तैल्हेरेलेइ खेइतां रेज़्ज़ी जे। 43 तैल्ला पत्ती, यीशुएरे चेलई बेज़्ज़ोरी रोटी त तैस कुइयां बेइर गेइतां, अपनि अम्मा पुच्छू, “अवं हेरोदेस राजे कने मेछली केरे टुकड़न सेइं 12 टोकरी भेरि। 44 जैनेई रोटी त केरां कुन मेग्गी?” तैखन तैसेरी अम्मा ज़ोवं, “यूहन्ना बपतिस्मो मेछली खेइ, तैन मां 5000 मड़द थिये। 45 तैल्ला पत्ती, यीशुए देनेबालेरी क्रोडी मगा।” 25 अकदम तै कुई अन्तर राजे कां आई अपने चेलन हुक्म दित्तो कि, “तुस किशती मां च़ेढ़तां मीं केरां त तैस कां मिन्नत की, “अवं चाताई कि, तू यूहन्ना बपतिस्मो पेइले समुन्दरेरे उस पार बैतसैदा नगरे जो च़ली गाथ, ज़ांतगर अवं एन लोकन न भेजी।” त तैना तैइं जे। 46 लोकन भेज़नेरे गल शुन्तां राजो बडो दुखी भोव, पन अपनि कसमेरे वजाई सेइं पत्ती, यीशु तैइं निस्तां नेइ एककी पहड़ी पुइ प्रार्थना केरनेरे लेइ त कने अपने मेहमानां केरे वजाई सेइं तैने इन्कार केरनो न जेव। 47 जैखन इलोइ भोइ, त तै किशती, जैस मां यीशुएरे चेले चाव। 27 तैल्हेरेलेइ, तैनी अकदम एककी सिपाही हुक्म दित्तो थिये, समुन्दरेरे मझाटे थी, त यीशु अकैल्लो ज़मीनी पुइ थियो। 48 तैनी हेरू कि तैसेरे चेले किशती मां च़ेपू देइ-देइ परेशान भोने किजोकि एग्रोवरां बडी तेज़ हवा च़लोरी थी। लगभग लमगोरेन, किजोकि एग्रोवरां बडी तेज़ हवा च़लोरी थी। लगभग झेज़्ज़ेरे च़ेरे बजेई जैखन हेजू आंधरू थियूं, यीशु समुन्दरेरे पैनी पुइ च़ेलतां अपने चेलन कां अव। तै तैन केरां अग्रोवं निस्नू चातो थियो। 49 पन जैखन तैनेई यीशु समुन्दरेरे पैनी पुइ च़लतो लाव, त तैनेई सोचो कि तै भूत आए। तैल्हेरेलेइ, तैनेई चिन्डां मैरी, 50 किजोकि तैना सारे तैस हेरतां बड़े डेरि जोरे थियो। पन तैनी अकदम तैन सेइं गल्लां की ते ज़ोवं, “हिम्मत रखा! अवं आई। डरा न।” 51 तैखन तै तैन केरि किशती मां च़ढो, ते तूफान च़लनो बन्ध भोइ जेव। तैखन चेले बड़े हैरान भोए, 52 किजोकि तैनेई न थियूं समझोरू कि यीशु केन्त्रां रोटी त कने मेछली बधोरी थी, पन तैन केरे मन बेसमझ भोरे थिये। 53 तैल्ला पत्ती, यीशु त तैसेरे चेले गलील समुन्दर पार केरतां गन्नेसरत नव्वेरे जगाई पुइ पुज्जे। तैडी तैनेई किनारे पुइ किशती बंधतां रख्खी। 54 जैखन तैना किशती पुइरां ओस्से, त तैट्टेरे लोकेई यीशु पिशेनी पुइ छुट्टो। 55 एल्हेरेलेइ, तैनेई सारे इलाके मां गेइतां लोकन खबर शुनाई कि यीशु ओरोए। जेडी-जेडी लोकेई शुनू कि यीशु ओरोए, तैडी लोकेई बिमार मैन्हु खट्टी पुइ छुइतां यीशु कां आन्ने लगगे, ताके तै तैनन् बज्ज़ाए। 56 जेडी कोन्ची इल्लोवन मां, नगरन या बेस्तन मां यीशु गातो थियो, तैडी लोक बिमार मैन्न् बज़ारन मां

यीशु कां एन्तां रखते थिये। तैना यीशु सेइं मिन्त केरते थिये कि, तैन सिर्फ तैसेरे लिगड़े सेइं हरने देन। जेत्रे बिमार मैन्हु यीशु सेइं हथ लाते थिये, तैना सारे बेइजोते थिये।

7 एक्की दिहाड़े किछ फरीसी लोक त कने शास्त्री लोकन मरां किछ लोक, जैना यरूशलेम नगरेरां ओरे थिये यीशुए कां अकोट्टे भोए। 2 ते तैनेई हेरू कि यीशुएरे किछ चले रीति रुवाजरे खलाफ अधोए हथ्यन सेइं रोटी खेइ राओरेन। 3 किजोकि फरीसी लोक त कने सारे यहूदी लोक, ज्ञातगर हथ न धोन तांतगर रोटी न खाते थिये। अपने बुजुर्गां केरि परमपरा च़लानेरे लेइ तैना एन्चरां केरते थिये। 4 ज़ैखन तैना बज़ारेरां घरे एइते थिये, ज्ञातगर तैना निहान न देन तांतगर रोटी न थिये खाते। होरे भी बड़े रीति रुवाज थिये, जैना तैन केरे बुजुर्गन केरां ओरे थिये, जेन्चरां कटोरे, घड़े, दलामेरां भांडां रुवाजरे मुताबिक धोना। 5 एल्हेरेलेइ फरीसी लोकेई त कने शास्त्री लोकेई यीशु पुच्छू, “तेरे चले इश्शे बुजुर्गां केरि परमपरा पुड़ की न चलन? पन तैना रुवाजरे खलाफ अधोए हथ्यन सेइं रोटी खातन!” 6 तैखन यीशुए तैन सेइं ज़ोवं, “बड़े पेइले यथायाह नेबे तुश्शे ज़ेरे पाखंडी केरे बारे मां ठीक भविष्यवाणी कियोरीए कि परमेशरे ज़ोवं, ‘एना लोक ऐशी सेइं त मेरी बड़ी तारीफ़ केरतन, पन एन केरे दिल मीं केरां बड़े दूर आन। 7 एना बेफाइदी मेरी आराधना (पूजा) केरतन, किजोकि एना त मैन्हु केरि बनोरी परमपरान, परमेशरे हुक्मां केरे ज़ेरे लोकन शिक्षा देतन।’” 8 तैखन यीशुए तैन सेइं ज़ोवं, “तुस भी तैन लोकां केरे ज़ेरे आथ, जैना परमेशरेरे हुक्मन देलतां मैन्हु केरि बनोरी परमपरान मन्तन, जेन्चरां घड़े त कने कटोरे रुवाजरे मुताबिक धोने, त कने एसरे ज़ेरे होरे भी बड़े रुवाज न मन्तथ।” 9 फिरी तैनी तैन सेइं ज़ोवं, “तुस केतू गलत केरतथ, कि अपने रीति-रुवाज मन्नेरे लेइ परमेशरेरे हुक्म दलोइतथ। 10 किजोकि मूसा नेबे जोरूए कि, परमेशरे सारी मैन्न ई हुक्म दितो कि, ‘तू अपने हाज बव्वेरी केरि इज़्ज़त केर। त ज़े कोई अपने हाज बव्वे जो बुरू ज़ोलो, तै ज़रूर मारो गालो।’ 11 पन तुस ज़ोतथ कि अगर कोई मैन्हु अपने हाज बव्वे सेइं सिर्फ एन ज़ोए, त तैन बड़ू आए कि, ‘मीं केरां ज़ै किछ मदत तुसन मैल्ली सकती थी, तै पेइली बलिदान भोरीए, यानी परमेशरे जो च़दतल च़ाढोरीए। एल्हेरेलेइ, अवं तुसन किछ न देइ सकी।’ 12 एरी शिक्षा देइतां तुस लोकन तैन केरे हाज बव्वां केरि किछ मदत केरने न देथ। 13 एन्चरां तुस अपनि परमपरा च़लानेरे लेइ, परमेशरेरी गल्लां टेली छड़तथ। एरी ज़ेरि तुस होरि भी बेइ गलत परमपरा मन्ते ओरेथ।” 14 तैखन यीशुए फिरी सारे लोक एप्पू कां कुजेइतां तैन सेइं ज़ोवं, “तुस सारे लोक, मेरी गल ध्याने सेइं शुना ते समझा। 15 एरी कोई चीज़ नई ज़ै बेइरेरां मैनेरे अन्तर गेइतां तैस जुट्टो केरे। पन जैना बुरी चीज़ां मैनेरे अन्त्रां, यानी तैसेरे दिले मरां बेइर निस्चन, तैन्नां तैस जुट्टो केरचन। 16 अगर कोई समझनो चाते, त तै ध्याने सेइं शुने!” 17 बादे मां, यीशु मैन्हु केरि भीड़ी मरां घरे जो जेव। तैखन तैसेरे

चेलेई तैस मिसालारे मतलबेरे बारे मां तैस पुच्छू। 18 तैनी तैन सेइं ज़ोवं, “होरि मैन्हु केरे ज़ेरे कुन तुस भी न समझथ? कुन तुस न समझथ कि ज़ै चीज़ बेइरां मैनेरे अन्तर गाचे, तै तैस जुट्टो न केरि सके? 19 किजोकि तै तैसेरे दिले मां नई, पन तैसेरे पेदे मां गाचे ते बादे मां पेदे मरां निस्सी गाचे!” एन ज़ोइतां यीशुए समझावं कि खानेरी चीज़ कोई भी असन जुट्टो न केरे। 20 तैखन तैनी अपने चलन सेइं ज़ोवं, “जैन मैनेरे अन्त्रेरां निस्ते, तैन्ने परमेशरेरी नज़री मां मैन्हु जुट्टो केरते, 21 किजोकि मैनेरे अन्त्रेरां, यानी मैनेरे दिले मरां बुरे खियाल, बदमाशी, चोरी, कत्ल केरनो, 22 अइलाए देइने गलत कम केरनू, लालच, दुष्ट कम केरनू, बेइमानी, बदचलन, जलन, तुहीन, घमण्ड, ते बेवकूफी एच्चन। 23 एना सैरी बुरी गल्लां मैनेरे अन्त्रेरां, यानी दिले मरां निस्तां मैन्हु जुट्टो केरचन।” 24 तैल्ला पत्ती, यीशु तैद्वां निस्तां सूर त सैदा नगरेरे आसेपासरे इलाकेरे नेड़े अव। ते तैड़ी तै एक्की घरे मां जेव। ते तै चातो थियो कि कोई न जैनी सके कि अवं इड़ी आई। पन तै छेप्पी न सको। 25 तैड़ी अक कुआन्था थी, जेसेरी निकड़ी कुईए पुड़ भूतेरो सायो थियो। तै यीशुएरे बारे मां शुन्तां अकदम तैड़ी आई ते तैसेरे पावन पुड़ पेई। 26 त तै कुआन्था गैर कौमरी थी ते सुरुफिनीकी इलाकेरी थी। तैसां यीशु सेइं मिन्नत की कि, “मेरी कुईए पुड़ेरां भूतेरो सायो केड्डी देथ।” 27 पन यीशुए तैस सेइं ज़ोवं, “पेइले बच्चन रज़ने दे, किजोकि बच्चां केरि रोटी नेइतां कुतरन जो देनी ठीक नई!” 28 तैसां जुवाब दित्तो, “सच्चे, प्रभु! पन कुतरां भी मेजे हेठोरां बच्चां केरि रोटन मरां बिछड़ोरे टुकड़े खातन।” 29 तैखन यीशुए तैस सेइं ज़ोवं, “मीं पुड़ तीं एजो विश्वास रखबोरोए, एल्हेरेलेइ तू आरामे सेइं घरे जो गा। तेरी कुईए मरां भूतेरो सायो निस्सी जोरोए।” 30 तैसां कुआन्थां तैद्वां अपने घरे वापस एइतां हेरू कि कुई खड़ी पुड़ आरामे सेइं झुल्लोरी थी, त भूतेरो सायो तैस मरां निस्सी जोरो थियो। 31 यीशु फिरी अपने चलन सेइं साथी सूर त सैदारे नगरेरे इलाकन मरां निस्तां, दिकापुलिस इलाके मांमेइं भोइतां गलील समुन्दरेरे नेड़े पुज़्जो। 32 तैड़ी किछ लोकेई अक टोन्नो मैन्हु, ज़ै खेखो भी थियो, यीशु कां एन्तां तैस सेइं मिन्नत की कि, “तू अपनो हथ एस पुड़ रख कि ए मैन्हु बेइजोए।” 33 यीशुए मैन्हु केरि भीड़ी मरां तै मैन्हु अलग नीयो। तैखन तैनी अपनि एंगलोई तैस मैनेरे कन्ना मां छेड्डी, त अपनि एंगलोई सेइं थुक तैस मैनेरी ज़िभभी सेइं लावं। 34 तैल्ला पत्ती, यीशु अम्बरेरे पासे तेकतां ओशा छड़ो, त तैस मैन्हु सेइं अपनि (इब्रानी) भाषाई मां ज़ोवं, “इप्फ्तह!” जेसेरो मतलब “खुल्ली गा।” 35 अकदम तै रोड़ेवारे शुन्ने लगे ते तैसेरी ज़िभ भी ठीक भोइ जेई, ते तै साफ-साफ गल्लां केरने लगे। 36 तैखन यीशुए तैन मैन्न हुक्म दित्तो कि, “ए गल केन्ची सेइं न ज़ोइयथ।” पन जेत्रू जादे यीशुए तैन हुक्म दित्तोरो थियो, तेत्रू जादे तैना होरि लोकन ए गल शुनाने लगे। 37 यीशुएरे चमत्कारेरां कम्मां केरे वजाई सेइं, तैना बड़े हैरान भोइतां ज़ोने लगे, “कमाल आए!

यीशुए जैन किछ भी कियूं सब किछ रोडू कियोरूए! तै टोवन शुन्नेरी ते लट्टन गल्लां केरनेरी शक्ति देते।”

8 तैन दिहाइन मां एरू भोव कि, मैनु केरि बड़ी भीड़ यीशु कां फिरी अकोट्टी भोड़। तैन कां किछ खाने जो न थियूं। तैखन यीशुए अपने चले एप्पू कां कुजेइतां तैन सेइं ज़ोवं, **2** “मीं एन मैनु केरि भीड़ी पुड़ तरस एइते, किजोकि एना ट्लेइ दिहाइं केरे देंते मीं सेइं साथी आन, ते एन कां खाने जो किछ नई राओरू। **3** अगर अवं एन ट्लुख्खोरे घरे जो भेज़ी, त च़लते-च़लते बत्ती मां थेकतां रेइ गानेन, किजोकि एन मरां कोई-कोई दूरं भी आना।” **4** तैसेरे चेलेई तैस जुवाब दितो, “इड़ी सुनसान ठैरी एन मैनु जो एत्री रोटी कोट्ठां आनम कि एन मैनु रेज़तां खान?” **5** तैखन यीशुए तैन पुच्छू, “तुसन कां केत्री रोटी आन?” तैनेई जुवाब दितो, “सत रोटी आना।” **6** तैखन यीशुए मैनु केरि भीड़रे पासे मुड़तां तैन जो हुक्म दितो कि, “ज़मीनी पुड़ बिशशी गाथा।” तैखन तैनी तैन सत रोटी ट्लेइतां परमेशेरू शुक्र केरतां ट्लोड़ी, ते अपने चेलन कां देते जेव कि तैना लोकन खाने जो देन। ते चेलेई मैनु रोटी दित्ती। **7** तैन कां थोड़ी ज़ेरि निक्की मेछली भी थी। यीशुए मेछली केरे लेइ भी परमेशेरू शुक्र केरतां अपने चेलन सेइं ज़ोवं, “इना भी लोकन खाने जो देथा।” तेन्चरां तैसेरे चेलेई कियूं। **8** तैना सारे मैनु रोटी खेइतां रेज़्ज़ी जे। तैल्ला पत्ती, यीशुएरे चेलेई मेछली त कने रोटी केरे बच्चोरे टुकड़न मरां सत टोकरे भरतां सल्ले। **9** तैड़ी लगभग 4000 मड़द थिये। लोकन रोटी खुवाने पत्ती यीशुए मैनु भेज़ी दिते। **10** तैखन तै अकदम अपने चेलन सेइं साथी किशती मां च़ेढ़तां दलमनूता इलाके जो च़लो जेव। **11** फिरी किछ फरीसी लोक यीशु कां एइतां तैस सेइं बेंस केरने लागे। तैना तैस अज़मानेरे लेइ तैस पुछने लागे, “असन अम्बरेरां कोई निशान हिरा।” **12** ज़ैखन यीशुए एन शुनु, त तैनी अक बड्डो ओशा छेइतां ज़ोवं, “इस ज़मानेरे लोक मीं केरां किजो निशान मगतन! अवं तुसन सेइं सत्र ज़ोतई कि इस ज़मानेरे लोकन, यानी तुसन अवं कोई भी निशान न हिरैई।” **13** तैल्ला पत्ती, यीशु तैन लोकन छेइतां, फिरी किशती मां च़ढो ते गलील समुन्दरेरे पार च़लो जेव। **14** ज़ैखन यीशुएरे चेले किशती मां च़ढे, त तैना एप्पू सेइं साथी रोटी नेनी बिसरी जे। किशती मां तैन कां अक्के रोटी थी। **15** ज़ैखन तैना समुन्दरे पार केरि राओरे थिये, त यीशुए तैन समझावं कि, “खबरदार! फरीसी लोकां केरे खमीरैरे बारे मां ते कने हेरोदेस राज़ेरे खमीरैरे बारे मां होशियार रेइयथा।” **16** चेले यीशुएरी गल गलत सेमझतां एप्पू मांमेइं गलबात केरने लागे कि, “असन कां त रोटी नई, एल्लेरेलेइ यीशुए एन्चरां ज़ोवं।” **17** तैखन यीशुए तैन केरि गल ज़ेनतां, तैन सेइं ज़ोवं, “तुस एप्पू मांमेइं एन्चरां किजो सोची राओरेथ कि असन कां रोटी नई? कुन तुस हेजू भी मेरी गल न समझी ते कने न बुझी? कुन तुशे मन बेसमझ भोड़ जोरेन? **18** कुन तुसन एछछी भोड़तां भी न लेइहोए? ते कन भोड़तां भी न शुनोए? कुन तुसन याद नई? **19** ज़ताली

5000 मैनु केरे लेइ पंच रोटी ट्लोइतां दित्तोरी थी, त तुसेईं बादे मां बच्चोरी रोटी केरे केत्रे टोकरे भरतां सल्लोरे थिये?” तैनेई तैस जुवाब दितो, “बारहे टोकरे।” **20** तैखन तैनी तैन पुच्छू, “ज़ताली मीं 4000 मैनु केरे लेइ सत रोटी ट्लोइतां दित्तोरी थी, त तुसेईं रोटी केरे केत्रे टोकरे भरतां सल्लोरे थिये?” तैनेई तैस जुवाब दितो, “सत टोकरे।” **21** तैखन तैनी तैन पुच्छू, “कुन तुसन हेजू भी समझ न आई?” **22** तैल्ला पत्ती, यीशु त तैसेरे चेले बैतसैदा नगरे मां आए। लोकेई अक कानो मैनु यीशु कां आनो ते तैस कां मिन्नत की कि, “एस मैनु सेइं हथ लाथ ताके ए बेज़्ज़ोए।” **23** तैखन यीशुए तैस काने मैनेरो हथ ट्लेइतां इलॉव्वे केरां बेइर नीयो। तैखन तैनी तैस काने मैनेरी एछछन पुड़ थुकतां, तैस पुड़ हथ रखे, ते तैस पुच्छू, “कुन तू किछ लातस?” **24** तैखन तैनी मैने उबरे तेकतां ज़ोवं, “हाँ, अवं मैनु हेरी सकतई, तैना मीं च़लते बुट्टां केरे ज़ेरे लेइहोतन।” **25** तैखन यीशुए दुइयोवं हटे तैसेरी एछछन पुड़ हथ रखे। तै कानो ध्याने सेइं लाने लागे। तैसेरी एछछी ठीक भोड़ जेई, त तै सब किछ साफ-साफ हेरने लागे। **26** तैल्ला पत्ती, यीशुए तै मैनु एन ज़ोइतां घरे जो भेज़ो, “तू इस इलॉव्वे मां पाव भी न रेखां (ते कने ई गल केन्ची सेइं न ज़ोइयां।)” **27** तैल्ला पत्ती, यीशु ते तैसेरे चेले बैतसैदा नगरे मरां निस्तां कैसरिया-फिलिप्पी नंवेरे नगरेरे इलॉव्वन मां च़ेलि जे। बत्तां च़लते-च़लते यीशुए अपने चेलन पुच्छू, “ज़ैखन लोक मेरे बारे मां गल्लां केरतन, त तैना मेरे बारे मां कुन ज़ोतन कि अवं कौन आई?” **28** तैसेरे चेलेई जुवाब दितो, “किछ ज़ोतन कि तू यूहन्ना आस, ज़ै बपतिस्मो देनेबालो थियो, पन किछ होरे मैनु ज़ोतन कि तू एलिय्याह आस, ज़ै नबी थियो, पन किछ होरे मैनु एन भी ज़ोतन कि तू परमेशेररी गल्लां ज़ोनेबालन मरां अक मैनु आस।” **29** तैखन यीशुए अपने चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दितो, “तू मसीह आस।” **30** त यीशुए तैनन् समझावं कि, “मेरे बारे मां ई गल केन्ची सेइं न ज़ोइयथा।” **31** तैखन यीशु अपने चेलन शिक्षा देनो लागे कि, “मेनेरे मट्टेरे लेइ, यानी मेरे लेइ एन ज़रूरी आए कि मीं बड़े दुख झल्लनेन। यहूदी लोकां केरे बुजुर्गन, प्रधान याजकन, त कने शास्त्री लोकन केरां अवं निकम्मो समझो गानोई त मारो गानोई। पन ट्लेइ दिहाइना पत्ती अवं फिरी ज़ीतो भोनोई।” **32** यीशुए एना गल्लां तैन सेइं साफ-साफ ज़ोई। तैखन पतरस तैस अलग नेइतां डॉटने लागे, “मसीह न मेरे।” **33** पन यीशुए मुड़तां अपने बाकी चेलां केरे पासे तक्कू, ते पतरसे सेइं झिड़केइतां ज़ोवं, “हे शैतान, मीं केरां दूर भो! (मतलब एन्चरां न सोच! शैतान तीं केरां एन्चरां जुवाते) मीं केरां दूर भोइ गा। तू परमेशेररी गल्लन पुड़ नई, पन मैनु केरि गल्लन पुड़ मन लातस।” **34** तैखन यीशुए अपने चेले त कने मैनु केरि भीड़ एप्पू कां कुजेइतां सेबभन सेइं ज़ोवं, “तुस अगर मेरे चेलो बन्नु चातथ, त तुस अपने आपेरो इन्कार केरा त कने तुस अपनू क्रूस छुइतां मीं पत्ती

चला। 35 किजोकि जै कोई अपनि ज़िन्दगी बचानी चाते, त तै हमेशारी ज़िन्दगी गुवालो। पन जै कोई मेरे वजाई सेइं त कने मेरे बारे मां खुशखबरी होरि लोकन शुनानेरी वजाई सेइं अपनि ज़िन्दगी गुवाते, यानी बलिदान केरते, त तै तैस बचालो, यानी हमेशारी ज़िन्दगी हासिल केरेलो। 36 मैन्हु अगर सारी दुनियाई हासिल केरे त अपनि हमेशारी ज़िन्दगी गुवाए, त तैस फिरी कुन फैइदो भोलो? 37 मैन्हु अगर अपनि हमेशारी ज़िन्दगी गुवालो, त गुवानेरे पत्ती तै कुन देइतां तैस वापस घिन्नी सकते? 38 अज़ेरे ज़मानेरे लोक परमेशरे केरां दूरन त कने पापी आन। एस ज़माने मां, अगर कोई मैन्हु मीं केरां त कने मेरी गल्लन केरां शरमाते, त मैनेरू मट्टू भी, यानी अवं भी तैस केरां शरमालो। ज़ेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो।”

9 तैखन यीशुए तैन सेइं ज़ोवं, “अवं तुसन सेइं सत्र ज़ोतई कि ज़ैना इड़ी खडे आन, तैन मरां किछ मैन्हु एरे आन कि ज़ांतगर तैना परमेशरेरे राज़ेरी शक्ति न हेरेले, तांतगर तैना न मरेले।” 2 शेइ दिहाड़ना बाद, यीशु अपने चले पतरस, याकूब त कने यूहन्ना सेइं साथी एक्की पहाड़े पुड़ चढ़ो, जेड़ी कोई भी न थियो। तैड़ी तैन केरे सामने यीशुएरी शकल बेदलोई जेई। 3 तैसेरां लिगड़ां हियेरां जेरां बड़ां चमकने लग्गां कि एत्रे छित्तां भुआं कि धेरती पुड़ कोई भी लिगड़ां धोनेबालो एरां जेरां छित्तां न केरि सके। 4 तैखन तैड़ी मूसा नबी त कने एलिय्याह भी यीशु सेइं साथी लेइहोए। ते तैना यीशु सेइं गल्लां केरने लगगे। 5 ज़ैखन पतरसे एन हेरू, त तैनी यीशु सेइं ज़ोवं, “हे गुरू, इश्शू इड़ी रानू रोडू आए! एल्लेरेलेइ, अस ट्लाई डेरे बनाम, अक तेरे लेइ, अक मुसेरे लेइ, त कने अक एलिय्याहरे लेइ।” 6 पतरसे एन्चरां एल्लेरेलेइ ज़ोवं किजोकि तैस पतो न थियो कि कुन ज़ोई, किजोकि तै त कने होरे दूई चले भी बड़े डेरि जेरे थियो। 7 तैखन तैड़ी तैन पुड़ बिदलार आई ते तैस बिदलारी मरां परमेशरेरी आवाज़ आई, “एन मेरू ट्लारू मट्टू आए। ध्याने सेइं एसेरी गल शुना!” 8 अकदम, ज़ैखन यीशुएरे चलेई चेत्रे पासन तक्कू, त यीशुएरे अलावा तैड़ी तैन कोई भी न लेइहोव। 9 पहाड़े पुड़रां ओस्ते-ओस्ते यीशुए अपने चलन हुकम दितो कि, “ज़ांतगर मैनेरू मट्टू, यानी अवं, मेरतां ज़ींतो न भोई, तांतगर ज़ैन किछ तुसेईं पहाड़े पुड़ लावरूए, तैन केन्ची सेइं न ज़ोइयथ।” 10 तैनेई तैन केन्ची सेइं न ज़ोवं, ते तैना एण्पू मांमेइं गलबात केरने लगगे कि, “मेरतां ज़ींतो भोनेरो कुन मतलब भोइ सकते।” 11 तैखन तैनेई यीशुए पुच्छू, “शास्त्री लोक किजो ज़ोतन कि मसीहरे एजनेरां पेइले एलिय्याह नेबरू दुनियाई मां एजन् ज़रूरी आए?” 12 यीशुए तैन जुवाब दितो, “ते तै सज़्जी गल आए कि मसीहरे एजने केरां पेइले एलिय्याह एजतां सैरी गल्लां ठीक केरनिन। पन परमेशरेरी किताबी मां मैनेरे मट्टेरे बारे मां, यानी मेरे बारे मां एन किजो लिखोरूए कि, “मीं बड़े दुख झल्लनेन त लोक मीं निकम्मो समझेले?” 13 पन अवं तुसन सेइं ज़ोतई कि

‘एलिय्याह’ त पेइले ओरोए, (यूहन्ना, एलिय्याहरे जगाई अव) त ज़ेन्चरां तैसेरे बारे मां परमेशरेरी किताबी मां लिखोरू थियूं, तेन्चरां तैनेई तैस सेइं कियूं, यानी ज़ेन्चरां तैना चाते थिये, तेन्चरां तैनेई तैस सेइं बुरू कियूं।” 14 तैल्ला पत्ती, यीशु त तैसेरे ट्लाई चले पहाड़े पुड़रां ओस्तां, होरि चलन कां पुज़्जे, ज़ैना बुन थियो। तैड़ी एजतां यीशुए तैन चलन केरे चेत्रे पासन मैन्हु केरि बड़ी भीड़ लाई। शास्त्री तैन चलन सेइं बेंस केरि राओरे थियो। 15 यीशु लेइतां सारे लोक बड़े हेरान भोए। तैना तैसेरे पासे दौइतां आए ते तैस जो नमस्कार कियूं। 16 तैखन यीशुए तैन पुच्छू, “मेरे चलन सेइं कुन बेंस केरि राओरेथ?” 17 मैन्हु केरि भीड़ी मरां एक्की मैने यीशु जुवाब दितो, “हे उस्ताद, मीं अपनू मट्टू तीं कां आनेरू थियूं, ताके तैन ठीक भोए। किजोकि तैस पुड़ भूतेरो सायो आए, ते तैस गल केरने न दे। 18 कोन्ची भी ठैरी तैन भूत मेरे मट्टे ट्लाते, ते ज़मीनी पुड़ बिछोइते। तैखन तैसेरे ऐशी मरां शैम्फ्र एच्चे ते तैन दंत कटते ते ठठमुकर भोइ गाते। मीं तेरे चलन सेइं ज़ोरू थियूं कि, ‘मेरे मट्टे पुड़रां भूतेरो सायो केड्डी देथ।’ पन तैना केड्डी न सके।” 19 एन गल्लां शुन्तां यीशुए तैन जुवाब दितो, “हे गैर विश्वासी मैनाव! अवं केइस तगर तुसन सेइं साथी रालो? त केइस तगर अवं तुश्शो अविश्वास झैल्ललो? तैस मट्टे मीं कां आनां!” 20 तैखन तैनेई तैन मट्टू यीशु कां आनू। ज़ैखन तैनी भूते यीशु लाव, त तैनी अकदम तैन मट्टू मरोडू, ते मट्टू तल्ले बिछडू। ते तैसेरी ऐशी मरां शैम्फ्र निस्ने लग्गी त तैन इल्लेडने लग्गू। 21 यीशुए तैसेरे बाजी पुच्छू, “एसेरी ए हालत केइसेरी देंती आए?” तैसेरे बाजे ज़ोवं, “बचपनेरी देंती। 22 एस मारनेरे लेइ एन भूत बड़े बार कधी अग्गी मां ते कधी पैनी मां बिछोइतू राते, पन अगर तू किछ केरि सकतस, त असन पुड़ तरस खेइतां इश्शी मदत केर।” 23 यीशुए तैस मट्टेरे बाजी सेइं ज़ोवं, “तू ए को गल केरतस! अगर तू विश्वास केरस, त एन भोइ सकते। किजोकि मीं पुड़ विश्वास केरनेबालां केरे लेइ सब किछ भोइ सकते।” 24 तैस मट्टेरे बाजे अकदम ज़ोरे सेइं लेरां देइतां ज़ोवं, “हे प्रभु, अवं विश्वास केरतई, मेरी मदत केर कि अवं शक न केरि।” 25 ज़ैखन यीशुए हेरू कि बड़े लोक दौइतां अकोट्टे भोने लगगेरेन, त तैनी भूत एन ज़ोइतां डांटू, “हे भूता, ज़ै एस मट्टे टोन्वू त लट्टू बनातस। अवं तीं हुकम देताई, एस मट्टे मरां निस्सी गा, ते एसमां फिरी कधी भी न एज्जां!” 26 तैखन तैनी भूते चिन्डां मारी त तैन मट्टू मरोडू, फिरी तैन तैस मट्टे मरां निस्सी जेव। त मट्टू मरू ज़ेरू भोइ ज़ोवं, इड़ी तगर कि बड़े लोक ज़ोने लगगे कि मट्टू मेरि ज़ोवं। 27 पन यीशुए मट्टेरो हथ टलेइतां खडू कियूं। ते मट्टू ठीक भोइतां खडू भोवं। 28 तैल्ला पत्ती, यीशु ते तैसेरे चले घरे जो जे। ज़ैखन तै अकैल्लो थियो तैखन तैसेरे चलेई तैस पुच्छू, “अस तैस मट्टे मरां भूतेरो सायो की न केड्डी सके?” 29 यीशुए तैन सेइं ज़ोवं, “बगैर प्रार्थनारे (त कने बगैर बरत रखनेरे) अलावा, होरि केन्ची तरीके सेइं, तुस एरे ज़ेरे भूतेरो सायो न केड्डी सकतथ।” 30 तैल्ला पत्ती, यीशु त तैसेरे

चेले तैदुं निस्तां गलील इलाके मामेंडुं जेलि राओरे थिये। यीशु न चातो थियो कि कोई तैसेरे बारे मां ज्ञाने कि तै तैडी ओरोए, 31 किजोकि तैखन तै अपने चेलन शिक्षा देतो ते तैन सेइं ज़ोतो थियो कि, “मेरे दुश्मनेई मैनेरू मडू, यानी अवं कैद केरनोई। त तैनेई अवं मारनोई, पन मारनेरां दलेइयोवं दिहाडे अवं मुड़दन मरां फिरी ज़ीतो भोनीई।” 32 पन यीशुएरी ए गल चेलां केरि समझी मां न आई, ते तैना एस गल्लारो मतलब पुछने केरां भी डरते थिये। 33 तैल्ला पत्ती, यीशु ते तैसेरे चेले कफरनहूम नगरे मां आए। तैना तैडी एक्की घरे मां जे। तैखन यीशुए अपने चेलन पुच्छू, “बत्तां चलते-चलते तुस एप्पू मामेंडुं कोस गल्लारे बारे मां बेंस केरि राओरे थिये?” 34 तैना सब शरमेइतां चुप राए, किजोकि तैनेई बत्तां एप्पू मामेंडुं एसेरे बारे मां बेंस कियोरी थी कि असन मां बड्डो मैन्हु कौन आए। 35 तैखन यीशुए तल्ले बिश्तां अपने 12 चेले कुजाए ते तैन सेइं ज़ोवं, “अगर कोई परमेशेरी नज़री मां बड्डो बनू चाते, त तै सेब्वन केरां निकडो बने, ते कने सेब्वी मैन्हु केरो सेवक बने।” 36 तैखन यीशुए अक निकडो बच्चो हथ्यन मां दलेइतां, तैन केरे मझाटे खडो कियो। तैनी तै बच्चो अपने कुम्मे मां रेखतां अपने चेलन सेइं ज़ोवं, 37 “जैना लोक मीं सेइं प्यार केरनेरे वजाई सेइं एरे ज़ेरे बच्चन मरां अक भी कबूल केरतन, तैना मीं कबूल केरतन। जैना मीं कबूल केरतन, तैना सिर्फ मीं नई, पन तैना परमेशेरे भी कबूल केरतन, जैनी अवं इडी भेजोरोई।” 38 तैखन यूहन्ने यीशु सेइं ज़ोवं, “हे गुरु, असेई अक मैन्हु लाव, जै तेरू नंव घिन्तां लोकन मरां भूतेरो सायो केडी राओरे थियो। एल्हेरेलेइ, असेई ते मैन्हु ठाको, किजोकि तै असन सेइं साथी तीं पत्ती नई चले।” 39 पन यीशुए जुवाब दितो, “तैस न ठाका, किजोकि अगर कोई मेरे नंव घिन्तां चमत्कारेरां कम्मां केरे, त तै मेरे बारे मां लूशी बुरी गल्लां न जोए। 40 किजोकि जैना इश्शे खलाफ कम न केरन, तैना इश्शे पासेन। 41 अगर कोई मेरे नव्वे सेइं तुश्शी मदत केरे, अक गिलास पानी भी तुसन पियाए, कि मसीहेरे आथ, त अवं तुसन सेइं सच ज़ोतां कि तै मैन्हु परमेशेरे केरां अपनो फल ज़रूर हासिल केरेलो। 42 “जै कोई इन निकडे बच्चन मरां जैना मीं पुड़ विश्वास केरतन, केन्ची भी पाप करवाए, त तैस मैनेरे लेइ एन रोडू आए कि ढलाटेरो अक बड्डो ढलेइटोल तैसेरे गल्ले सेइं बंधतां समुन्द्रे मां शारो गाए। 43 अगर तेरो हथ तीं पाप केरनेरे लेइ ठोकर खुवाए, त तैस केटी छड। किजोकि तेरे लेइ दूई हथ भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू डोण्डो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे। (Geenna g1067) 44 तैडी तैन केरे कीड़े, जैना तैन खातन न मरन ते कने अग भी न हिश्शे। 45 त अगर तेरो पाव तीं पाप केरनेरे लेइ ठोकर खुवाए, त तैस केटी छड। किजोकि तेरे लेइ दूई पाव भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू टोंटो भोइतां हमेशारी ज़िन्दगी मां दाखल भोस।

किजोकि नरकेरी अग कधी भी न हिश्शे। (Geenna g1067) 46 तैडी तैन केरे कीड़े, यानी जैना तैन खातन न मरन त अग भी न हिश्शे। 47 अगर तेरी अछ तीं पाप केरनेरे लेइ ठोकर खुवाए, त तैस केटी छड। किजोकि तेरे लेइ दूई एछछी भोंते सांते नरकेरी अग्गी मां छड़े गाने केरां एन रोडू आए, कि एक्की अछछी सेइं तू परमेशेरे राज़े मां दाखल भोस। (Geenna g1067) 48 नरके मां तैन केरे कीड़े, जैना तैन खातन न मरन त अग भी न हिश्शे। 49 जेन्चरां हर बलिदाने मां लून छडन ज़रूरी आए, तेन्चरां परमेशर हर एक्की मैनेरी अज़मैइश घिन्तलो, जै बडी दुखे बाली भोनी आए, जेन्चरां कि अग्गी मामेंडुं निसनूए। 50 लून त रोडू आए, पन अगर लूनरो स्वाद जेलि गाए, त फिरी दुबारा केन्चरे तैसेरो स्वाद वापस आनेले? तेन्चरां तुस भी एप्पू मां लून रखा, यानी परमेशेरो हुक्म मन्ना, त एप्पू मामेंडुं मेल मिलापे सेइं राथ।”

10 तैल्ला पत्ती, यीशु त तैसेरे चेले तैदुं उठतां यहूदिया इलाके मां आए, त फिरी यरदन दरियारे उस पार चले जे। तैडी मैन्हु केरि भीड़ फिरी तैस कां अकोटी भोइ। त तै अपने रीतरे मुताबिक तैन फिरी शिक्षा देने लगे। 2 तैखन फरीसी लोकेई यीशु कां एइतां तैस अज़मानेरे लेइ तैस पुच्छू, “कुन एन जेइज़ आए कि मड़द अपनि कुआन्शी फारख्ती दे?” 3 पन यीशुए तैनन् पुच्छू, “बडे पेइले मूसा नेबे तुसन कुन केरनेरो हुक्म दित्तोरो थियो?” 4 तैखन तैनेई यीशुए जुवाब दितो, “मूसे मड़दे अज़ाज़त दित्तोरीए कि तै लिखतां फारख्ती दे।” 5 तैखन यीशुए तैनन् जुवाब दितो, “तुश्शे सखत दिलेरी वजाई सेइं, मूसे तुश्शे लेइ ए हुक्म दित्तोरो थियो। 6 पन दुनियारी शुरुआती मां, जैखन परमेशेरे मैन्हु केरि रचना की, तैखन तैनी तैना मड़द ते कुआन्श बनोरेन। 7 एल्हेरेलेइ, इलाएरे पत्ती मड़द अपने हाज-बव्वे केरां अलग भोइतां अपनि कुआन्शी सेइं साथी रालो, 8 ते तैना दुइये अक्के जान भोले।” तैल्ला पत्ती यीशुए ज़ोवं, “एल्हेरेलेइ तैना हुनी परमेशेरी नज़री मां दूई नई, पन तैना अक्के आन। 9 एल्हेरेलेइ जैना परमेशेरे ज़ोडोरेन, तैनन् कोई मैन्हु अलग न केरे!” 10 बादे मां, जैखन यीशु ते तैसेरे चेले घरे मां थिये, तैखन तैसेरे चेलेई फारख्ती देनेरे बारे मां तैस फिरी पुच्छू। 11 यीशुए तैन सेइं ज़ोवं, “जै कोई अपनि कुआन्शी फारख्ती देइतां होरो इला बनाए, त तै तैस पेइली कुआन्शारे खलाफ बदमाशी केरते। 12 त अगर कुआन्श अपने मड़दे छेइतां होरो इला बनाए, त तै अपने पेइले मड़देरे खलाफ बदमाशी केरचे।” 13 तैल्ला पत्ती, किछ लोक अपने निक्के बच्चन यीशु कां आन्ने लगगे ताके तै तैन पुड़ हथ रेखतां आशिर्वाद दे, पन तैसेरे चेलेई तैना लोक डांटे। 14 यीशुए एन हेरतां सेरकोइतां अपने चेलन सेइं ज़ोवं, “निक्के बच्चन मीं कां एजने देथ, तैनन् न ठाका, किजोकि परमेशेरे राज़ एरे ज़ेरे लोकां केरे लेइ आए। 15 अवं तुसन सेइं सच ज़ोतई कि जै कोई परमेशेरे राज़े निकडे बच्चेरू ज़ेरू कबूल न केरे, त तै परमेशेरे राज़े मां कधी भी दाखल न भोइ सके।” 16 तैखन यीशुए तैना बच्चे कुम्मे मां रेखां, तैन पुड़ हथ

रेखतां तैनन् आशिर्वाद दित्तो। 17 तैल्ला पत्ती, जैखन यीशु त तैसेरे चले घरेरां बेइर निस्तां बत्तां चेलि राओरे थिये, ते अक मैन्हु यीशु कां दौड़तो अव। तैनी तैस कां मथ्यो टेकतां तैस पुच्छू, “हे रोड़े गुरु, हमेशारी ज़िन्दगी हासिल केरनेरे लेइ अवं कुन केरि?” (aiōnios g166) 18 पन यीशुए तैस पुच्छू, “किजो तू मींजो रोड़ू ज़ोतस? परमेशरेरे अलावा होरो कोई भी रोड़ो नई। 19 तू त परमेशरेरे हुकमन ज्ञानतस, यानी ‘खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बच्चां केरि इज़्जत केरा।” 20 पन तैनी मैने यीशु जुवाब दित्तो, “हे गुरु, एना सब हुकम अवं बचपनेरो मन्तो ओरोई।” 21 तैखन यीशुए तैस तेकतां तैस सेइं प्यार कियो, त तैस सेइं ज़ोवं, “तीं मां एक्की गल्लारी कमी आए। गा, जैन किछ तीं कां आए तैन बेचतां गरीब मैन्न दे, तैखन तीं स्वर्गें मां खज़ानो मैलेलो। तैल्ला पत्ती, एइतां मेरो चेलो बना, त अपनू कूस छुइतां मीं पत्ती चला।” 22 यीशुएरी ए गल शुन्तां तैस मैनेरू तुत्तर टूलक्कु, त तै बड़ो दुखी भोइतां चलो जेव, किजोकि तै बड़ो अमीर थियो त तै अपनो धन छुडने न चातो थियो। 23 तैखन यीशुए चेन्ने पासन अपने चेलन तेकतां तैन सेइं ज़ोवं, “अमीर मैन्हु केरू परमेशरेरे राज़्जे मां दाखल भोनू बड़ू मुश्किल आए।” 24 यीशुएरे चले तैसेरी गल्लां शुन्तां हैरान भोए। पन यीशुए फिरी तैन सेइं ज़ोवं, “हे मट्ठाव, ज़ैना धने पुड़ भरोसो रखतन, तैन केरे लेइ परमेशरेरे राज़्जे मां दाखल भोनू बड़ू मुश्किल आए! 25 परमेशरेरे राज़्जे मां अमीर मैनेरू दाखल भोने केरां ऊँटेरू सांधनेरे पाए मरां निस्नू सुखू आए!” 26 तैखन तैना बड़े हैरान भोइतां एण्णू मांमेइं ज़ोने लगगे, “अगर अमीर मैनेरे लेइ मुक्ति हासिल केरनि नमुमकिन आए, त फिरी केसेरी मुक्ति भोइ सकचे?” 27 यीशुए तैन केरे पासे तेकतां ज़ोवं, “मैन्हु अपने आपे न बचेइ सकन, यानी मुक्ति हासिल न केरि सकन, पन परमेशर एन केरि सकते, किजोकि परमेशर सब किछ केरि सकते।” 28 तैखन पतरस यीशु सेइं ज़ोने लगगे, “तक, अस त सब किछ छेइतां तीं पत्ती चलोरेम! असन कुन इनाम मैलेलू?” 29 यीशुए अपने चेलन सेइं ज़ोवं, “अवं तुसन सेइं सच ज़ोतई कि, ज़ैनेई मेरे लेइ त कने मेरे बारे मां खुशखबरी होरे लोकन शुनानेरे लेइ अपने घर या ढूला या बेइन या हाज या बव या बच्चे या ऊडारां शारोरन, 30 तैनन् इस दुनियाई मां शौव गुणा मैलेलू। तैना घरन, ढूलान, बेइनन, हेईयन, बच्चन त कने ऊडारां हासिल केरेले। लोक भी तैनन् सताले, पन एजनेबाली दुनियाई मां परमेशर तैनन् हमेशारी ज़िन्दगी देलो। (aiōn g165, aiōnios g166) 31 पन बड़े मैन्हु ज़ैना हुन्ना पेइले आन, तैना बादे मां पत्रोवं भोनेन। त ज़ैना हुन्ना पत्रोवं आन, तैना बादे मां पेइले भोनेन।” 32 तैल्ला पत्ती, यीशु त तैसेरे चले ते किछ लोक यरूशलेम नगरे जो चलते-चलते, तैना हेजू बत्तां थिये। यीशु तैन केरे अग्री-अग्री पासे चेलि राओरो थियो। ते तैसेरे चले हैरान भोए त होरे लोक डरते-डरते तैस पत्ती चली राओरे थिये। तैखन यीशु अपने 12 चेलन बत्ती मरां

अलग नेइतां फिरी तैन सेइं तैना गल्लां ज़ोने लगगे, ज़ैना तैस सेइं भोनेबेली थी। 33 तैनी ज़ोवं, “शुना, अस सारे यरूशलेम नगरे जो गेइ राओरेम। तैड़ी मैनेरू मट्ठू (यानी अवं) प्रधान याजकन त कने शास्त्री लोकन केरां कैद कियो गानोई, त तैना मीं मारनेरो हुकम देले त गैर यहूदी लोकां केरे हवाले केरेले। 34 त होरि कौमां केरे लोक मेरो मज़ाक बनाले, त मीं पुड़ थुकेले, त मीं कोड़े मारेले, त तैना मीं मैरी छेइले, पन टूलेइ दिहाइना पत्ती अवं मुडदन मरां फिरी ज़ाँतो भोलो।” 35 तैखन याकूब त यूहन्ना, ज़ैना जब्दी नंवेरे मैनेरां मट्ठां थियां, यीशुएरे नेड़े एइतां तैस सेइं ज़ोने लगगे, “हे गुरु, अस चातम कि ज़ैन किछ अस तीं केरां मगमग, तैन तू असन देइयथ।” 36 यीशुए तैन पुच्छू, “तुसन कुन लोइते, ज़ैन अवं तुसन देई?” 37 तैनेई तैस सेइं ज़ोवं, “असन एन दे कि ज़ैखन तू महिमा सेइं साथी राज़ केरेलो, तैखन तीं सेइं साथी राज़ केरनेरे लेइ असन मरां अक तेरे देइने पासे त होरो तेरे बाएं पासे राज़गेदी पुड़ बिशेश।” 38 पन यीशुए तैन सेइं ज़ोवं, “तुस न ज्ञानथ कि तुस कुन मगने लगगेरेथ! ज़ेन्चरे दुख अवं झलने बालोई, कुन तुस झेल्ली सकतथ? ज़ेन्चरे अवं मारनोई कुन तुस भी मारे गानेरे लेइ तियारथ?” 39 तैनेई तैस जुवाब दित्तो, “हाँ, अस एन केरि सकतम।” एल्हेरेलेइ, यीशुए तैन सेइं ज़ोवं, “सच्चे, ज़ेन्चरे अवं दुख झलने बालोई, तेन्चरे तुस झललेले? ज़ेन्चरे अवं मारनोई तेन्चरे तुस मारे गाले। 40 पन ते ठार ज़ैन केरे लेइ पेइले तियारी कियोरीए, तैन छेइतां होरे केन्ची अपने देइने पासे त कने अपने बाएं पासे राज़गेदी पुड़ बिशालनू मेरू कम नई।” 41 एन शुन्तां यीशुएरे बाकी दश चले याकूब त कने यूहन्ना सेइं नराज़ भोइ जे। 42 तैखन यीशुए अपने सारे चले नेड़े कुजेइतां, तैन सेइं ज़ोवं, “तुसन पतोए कि ज़ैना होरि कौमां केरे लोकां केरे राज़ केरनेबाले समझे गातन, तैना अपने लोकन पुड़ राज़ केरतन। तैन मरां ज़ैना बड़ो अफसर आन, तैना अपने लोकन पुड़ हकोमत चलातन। 43 पन तुसन मां एरी ज़ेरि गल न लोड़े, पन ज़ै कोई तुसन मां बड़ो बन्नू चाए, त तै निकड़ो बेनतां तुश्शो सेवक बने। 44 त ज़ै कोई तुसन मां प्रधान मैन्हु बन्नू चाए, त तै सारे मैन्हु केरो सेवक बने। 45 किजोकि मैनेरू मट्ठू, यानी अवं एस दुनियाई मां एल्हेरेलेइ नई ओरो कि कोई मेरी सेवा केरे, पन एल्हेरेलेइ ओरोई कि अवं होरि लोकां केरि सेवा केरि त कने बड़े लोकां केरे लेइ अपनि जान बलिदान केरि, ताके तैन अपने पापां केरे सज़ाई केरां छुटकारो मैलेलू।” 46 तैल्ला पत्ती, यीशु त तैसेरे चले यरीहो नगरे मां पुज्जे। बादे मां, ज़ैखन तैना मैन्हु केरि बड़ी भीड़ी सेइं साथी यरीहो नगरी मरां निस्सी राओरे थिये, त तैखन बरतिमाई नंवेरो कानो भिखारी सड़केरे इलेखी बिश्तां भीख मेग्गी राओरो थियो। त तैसेरे बाजी केरू नंवं तिमार्इ थियू। 47 ज़ैखन तैनी शुनू कि नासरत नगरेरो यीशु इलमेइं निस्सी राओरोए, त तै भिखारी जोरे सेइं ज़ोने लगगे, “हे यीशु, दाऊद राज़ेरा मट्ठा! मीं पुड़ दया केर!” 48 त बड़े लोकेई तै डांटो कि, “चुप रा।” पन ते पेइले

केरां जादे चिन्दां मारने लगे, “हे दाऊद राजेरा मट्टा, मीं पुड दया केरा!” 49 तैखन यीशुए रुकतां लोकन सेइं ज़ोवं, “तुस तैस इरां कुजाथ।” लोकेई तै कानो कुजेइतां तैस सेइं ज़ोवं, “हिम्मत रख! उठ! यीशु तीं एप्पू कां कुजाने लग्गोरेन।” 50 तै अपनि च़ादर शैरतां लूशी उठो, ते यीशु कां अव। 51 तैखन यीशुए तैस पुच्छू, “तीं कुन लोइते कि अवं तेरे लेइ केरि?” काने मेने जुवाब दितो, “हे गुरु, अवं लानू चाताई।” 52 तैखन यीशुए तैस सेइं ज़ोवं, “तू गा। तीं मीं पुड विश्वास कियूं एल्हेरेलेइ अवं तीं बज़्जाताई।” अकदम तै लाने लगे त कने यीशु पत्ती च़लो।

11 ज़ैखन यीशु त तैसेरे चले यरूशलेम नगरेरे नेडे आए, त तैखन ज़ैतून नंवेरे पहाड़ेरे नेडे, बैतफगे त कने बैतनिय्याह इल्लोव्वन कां पुज्जे। तैखन यीशुए अपने चेलन मरां दुइयन सेइं एन ज़ोइतां पेइले भेजे कि, 2 “अपने सामनेबाले इल्लोव्वे मां गाथ। तैड़ी पुज्जेते तुसन अक गैधेरो बच्चो बंधोरो मैलेलो, ज़ैस पुड कथी कोई नई च़ढोरो। तैस खोलतां इड़ी मीं कां आनां। 3 अगर तुसन कोई पुच्छे, ‘किजो एन केरने लग्गोरेथ?’ त तैस सेइं ज़ोइयथ, ‘प्रभुए एसेरी ज़रूरत आए।’ त तै अकदम गधेरे बच्चे तुसन सेइं साथी इड़ी भेजेलो।” 4 तैना दूई चले तैस इल्लोव्वे मां जो। तैड़ी गैधरो बच्चो एक्के घरेरे दारे बेइर बंधोरो लाव, त तैना तैस खोलने लगे। 5 ज़ैना तैड़ी खड़े थिये, तैन मरां किछ मैनेई तैन पुच्छू, “एन कुन केरने लग्गोरेथ, गधेरे बच्चे किजो खोलने लग्गोरेथ?” 6 ज़ेन्चरां यीशुए अपने चेलन सेइं ज़ोरु थियूं, तेन्चरां तैनेई तैन मैन्न सेइं ज़ोवं। तैखन तैन मैनेई चले तैट्ठां गाने दिते। 7 यीशुएरे चलेई बच्चो यीशु कां एन्तां यीशुए तैस पुड बिशालनेरे लेइ, तैस पुड अपने लिगड़ां छुडो। त यीशु तैस पुड बिशो (त तैना यरूशलेम नगरेरे पासे जो च़लने लगे)। 8 तैखन बड़े लोकेई (तैसेरी इज़्ज़त केरनेरे लेई) अपना लिगड़ां बत्ती मां बिछां त कने किछ मैनेई पटलनबाली डैलड़ी एन्तां बत्ती मां बिछेई। 9 ज़ैना यीशुएरे अग्री-अग्री त कने पत्ती-पत्ती च़लने लग्गोरे थिये, तैना खुशी सेइं ज़ोरे सेइं ज़ोने लगे, “होशाना! (परमेशेरी तारीफ़ भोए) परमेशर तैस बरकत दे, ज़ै प्रभु-परमेशेरे अधिकारे सेइं साथी एज्जी राओरोए!” 10 “परमेशर तीं आशिर्वाद दे, ज़ैखन तू इश्शे पड़दादे दाऊदेरू राजेरू ज़ेरू राज़ केरे! परमेशेरी होशाना (तारीफ़) भोए, ज़ै उच्चे स्वर्गे मां आए!” 11 तैल्ला पत्ती, तैन लोकन सेइं साथी, यीशु यरूशलेम नगरी मां पुज्जां मन्दरे मां जेव। यीशु मन्दरे मां च़ेरे पासन तक्कू कि ज़ैन तैड़ी भोइ राओरू थियूं। तै अपने 12 चेलन सेइं साथी नगरे मरां निस्तां, राती बिशनेरे लेइ बैतनिय्याह इल्लोव्वे जो वापस च़लो जेव, किजोकि इलोझ भोइ जोरी थी। 12 त एग्री दिहाड़ी, ज़ैखन यीशु त तैसेरे चले बैतनिय्याह इल्लोव्वेरां निस्तां यरूशलेम नगरे जो वापस एज्जी राओरे थिये, तैखन यीशुए दलुख लग्गी। 13 ते दूरोरां फ़ेगोरो अक नीलो बुट लेइतां तैसेरे नेडे जेव कि खाने जो शायद तैस मां किछ मैल्ले। पन, ज़ैखन ते बुटे कां जेव, त तैड़ी पट्लां केरे अलावा तैस किछ न मैल्लू, किजोकि तै फल्लेरो मौसम न

थियो। 14 तैखन यीशुए तैस बुटे फिटकार देइतां तैस सेइं ज़ोवं, “हुन्नेरे पत्ती, तीं मां कोई फल कथी न लगलो!” त तैसेरे चले एन शुनी राओरे थिये। (aiōn g165) 15 तैल्ला पत्ती, तैना फिरी यरूशलेम नगरे मां पुज्जे, त यीशु मन्दरेरे अंगने मां जेव। तैड़ी लोक जानवरां केरु त कने मन्दरे मां च़ादनेरू सामान घिन्नेरू त कने बेचनेरो कारोबार केरि राओरे थिये। यीशु तैनन् बेइर कढने लगे, ते तैनी तैड़ी पेंइसे बदलनेबालन केरे मेज़न त कने कबूतर बेचनेबालन केरि कुर्सी उलटेइ दित्ती। 16 त मन्दरेरी ठैरी मां केन्ची बेचनेरे लेइ कोई चीज़ एन्तां च़लने न दित्त्। 17 तैखन यीशुए तैन लोकन शिक्षा देइतां ज़ोवं, “परमेशेरी किताबी मां एस मन्दरेरे बारे मां एन लिखोरूए कि परमेशेरे ज़ोवं, मेरू मन्दर सैरी कौमां केरे लोकां केरे लेइ प्रार्थनारू घर भोलू! पन तुस लोकेई इन मन्दर डैकू केरो अड्डो बनोरोए।” 18 एन शुन्तां प्रधान याजक त कने शास्त्री लोक यीशु कल्ल केरनेरो मौको तोपने लगे। पन तैना यीशु केरां डरते थिये, किजोकि सारे लोक तैसेरी शिक्षाई शुन्तां हैरान भोते थिये। 19 ज़ैखन इलोझ भोइ, त यीशु त तैसेरे चले (रात गुज़ारनेरे लेइ) नगरेरां बेइर च़ेलि जे। 20 एग्री दिहाड़ी, झेज्ज़ां यीशु त तैसेरे चले तैट्ठां यरूशलेम नगरे जो च़ले त तैनेई तै फ़ेगोरो बुट लाव, ज़ैस यीशुए पेइले फिटकार दित्तोरो थियो। तै बुट ज़ीलन तगर शुक्की जोरो थियो। 21 पतरसे तै गल याद आई कि यीशुए एस बुटे फिटकार दित्तोरो थियो, त तैनी यीशु सेइं ज़ोवं, “हे गुरु, तक! ए फ़ेगोरो बुट ज़ैस तीं फिटकार दित्तोरो थियो, शुक्की जोरोए! (एन केन्चरां भोवं)” 22 यीशुए अपने चेलन जुवाब दित्तो, “तुस परमेशेरे पुड विश्वास रखा। 23 अवं तुसन सेइं सच़ ज़ोताई कि ज़ै कोई एस पहाड़े सेइं ज़ोए, ‘तू उखड़तां समुन्द्रे मां बिछड़ी गा,’ त एन्चरां ज़ोइतां अपने दिले मां शक न केरे, पन विश्वास केरे कि ‘ज़ैन अवं ज़ोतई तैन भोइ गालू,’ त तैसेरेलेइ तैन्ने भोलू। 24 एल्हेरेलेइ अवं तुसन सेइं ज़ोतई कि, ज़ैखन तुस प्रार्थना केरतां परमेशेरे केरां ज़ैन भी मगेले, त विश्वास केरा कि तुसन तैन ज़रूर मैल्ली गालू, तैखन परमेशेरे केरां तैन तुसन दित्त् गालू। 25 ते ज़ैखन कथी तुस खड़े भोइतां परमेशेरे कां प्रार्थना केरतथ, त अगर तुसन केन्ची सेइं गिलो भोए, त पेइले तुस तैस माफ़ केरा, ताके तुश्शो स्वर्गेरो बाजी भी तुश्शे पाप माफ़ केरे। 26 अगर तुस होरि लोकन माफ़ न केरतथ, त तुश्शो बाजी परमेशर भी, ज़ै स्वर्गे मां आए, तुश्शे पाप माफ़ न केरेलो।” 27 तैल्ला पत्ती, यीशु त तैसेरे चले फिरी यरूशलेम नगरे मां आए। ज़ैखन यीशु मन्दरेरे अंगने मांमेइ हंठने लग्गोरो थियो, त तैखन प्रधान याजक त कने शास्त्री त कने यहूदी लोकां केरे बुनुर्ग तैस कां आए, त तैस सवाल पुछने लगे, 28 “तू एन कम्मां कोस अधिकारे सेइं केरतस, त कने एन कम्मां केरनेरो तीं केनि अधिकार दित्तोरोए?” 29 पन यीशुए तैन सेइं ज़ोवं, “अवं भी तुसन अक सवाल पुछतई। मीं तैसेरो जुवाब देथ, तैखन अवं भी तुसन ज़ोलो कि अवं एन कम्मां कोस अधिकारे सेइं केरतई। 30 मीं जुवाब देथ। यूहन्ना

जै बपतिस्मो देनेबालो थियो, तैस बपतिस्मो देनेरो अधिकार कोट्ठा मैल्लो, परमेशरेरी तरफां मैल्लो या मैन्हु केरि तरफां?” 31 तैखन तैना एप्पू मांमेई गलबात केरने लागे कि, “अगर अस ज़ोम कि, ‘परमेशरेरी तरफां मैल्लो,’ त एनी पुछ्नुए कि, ‘फिरी तुसेई तैसेरो विश्वास की न कियो?’” 32 पन अस एन भी नई ज़ोई सकम कि, ‘यूहन्ना अधिकार, मैन्हु केरि तरफां मैल्लो,’ किजोकि असन लोकां केरो डर आए कि तैना असन पुड़ क्रोध केरले, किजोकि सारे लोक समझते थिये कि सच्चे यूहन्ना नबी आए।” 33 एल्हेरेलेइ तैनेई यीशु एन जुवाब दितो कि, “असन नई पतो।” यीशुए तैन सेइ ज़ोवं, “अवं भी तुसन सेइ न ज़ोई कि अवं एन कम्मां कोस अधिकारे सेइ केरतई।”

12 तैल्ला पत्ती, यीशु यहूदी लोकां केरे लीडरन सेइ मिसालन मां गल्लां केरने लागे, “एक्सां, एक्की मैने दाछरी बाग लाई, ते बागारे चेन्ने पासन बाड़ दितो, त दाछारो रस कढेरे लेइ कुण्ड बनावं, ते तैनी तैस बागारी रखवाली केरनेरे लेइ अक उच्ची कूड़ी बनाई। तैल्ला पत्ती, तै मैन्हु तैस बागारो ठेको किछ ज़मीनदारन देइतां होरि मुल्खे जो च़लो जेव। 2 ज़ैखन फल्लेरो मौसम अव, त तैनी ज़मीनदारन कां अक नौकर भेजो कि ज़मीनदारन केरां दाछारे बागारे फल्लां केरो अपनो हिस्सो आने। 3 पन ज़ैखन तै नौकर बागी मां पुज्जो, त तैन किसानेई तै टलेइतां मट्टो त खाली हथ्येइ वापस भेजो। 4 ज़ैखन बागारे मालिके शुनु कि तैनेई एन कुन कियूं, त तैनी होरो अक नौकर फिरी भेजो। पन तैनेई तैसेरो भी दोग बन्नो ते तैसेरी बेज़ती केरतां भेज़ी दितो। 5 फिरी तैनी मालिके होरो अक नौकर तैन कां भेजो। तैनेई तै भी मैरी छुटो। तैखन तैनी होरे जादे नौकर भेजो। तैन मरां तैनेई किछ मट्टे, ते किछ मारे। 6 तैस मालिके कां अक्के रेवरो थियो, ज़ैन तैसेरू ट़लारू मट्टू थियूं। आखरी मां, तैनी तै भी तैन कां एन सोचतां भेजु कि तैना मेरे मट्टेरी इज़्जत केरले। 7 पन ज़ैखन मालिकेरू मट्टू तैन कां अव, त तैन किसानेई एप्पू मांमेई ज़ोवं, ‘ए त एस बागारो वारिस आए। एज्जा, अस एस भी मैरी छुटूम, तैखन एसेरी जेइदात इश्शी भोनी।’ 8 एल्हेरेलेइ, तैनेई तै टलेइतां मैरी छुटो, ते बागारे बेइर शेरी छुटो।” 9 तैखन यीशुए तैन मैन्न पुच्छू, “हुनी बागारो मालिक तैन ज़मीनदारन सेइ कुन केरेलो? अवं ज़ोतई कि तैनी कुन केरनु, तै एइतां तैन किसानां केरो नाश केरेलो, ते बागारो ठेको होरि केन्ची ज़मीनदारन देलो!” 10 “कुन तुसेई पवित्रशास्त्रे मां मसीहेरे बारे मां ई गल नई पढ़ोरी? तैस मां लिखोरूए कि, ‘जै घोड़ राज़-मिस्त्रेई निकम्मो ठहरेवरो थियो, तै मकानेरो खास घोड़ बेनि जेव। 11 एन प्रभु परमेशरेरी तरफां एन्चरां भोव, ते कने इश्शी नज़री मां ए हैरान भोनेरी गल आए।” 12 ज़ैखन यहूदी लोकां केरे लीडरेई एन शुनु, त तैनेई सेमझी छुटु कि यीशुए ई मिसाल इश्शे खलाफ़ ज़ोरीए। एल्हेरेलेइ, तैना सैरकोए। त तैनेई यीशु कैद केरनु चाव। पन तैना लोकन केरां डरे, एल्हेरेलेइ तैस छेइतां च़ेलि जे। 13 तैल्ला पत्ती, यहूदी लोकां केरे लीडरेई यीशु कां

किछ फरीसी लोक त कने हेरोदेस राज़ेरे लोक भेजे, ताके तैना यीशुए अपनि गल्लन मां फसान। 14 तैनेई यीशु कां एइतां तैस सेइ ज़ोवं, “हे गुरु, अस ज़ानतम कि तू सच्चो आस, त केन्चेरी परवाह न केरस, किजोकि तू सारे मैन्न बराबर समझतस, त तू परमेशरेरी गल्लां लोकन सच्च़ाई सेइ शुनातस। एल्हेरेलेइ असन ज़ो, कुन रोम-मुल्खेरे महाराजे जो चुंगी देनी जेइज़ आए कि नई? 15 अस देम या न देम?” यीशुए तैन केरू पाखंड ज़ेनतां तैन सेइ ज़ोवं, “मीं किजो अज़मातथ? अक सिक्को (दीनार) मीं कां आनां कि अवं तैस हेरी।” 16 तैनेई आनो, तैखन यीशुए तैन पुच्छू, “इस सिक्के पुड़ केसेरी शकल त केसेरू नवं आए?” तैनेई जुवाब दितो, “महाराजेरू आए।” 17 यीशुए तैन सेइ ज़ोवं, “ज़ैन महाराजेरू आए तैन बड्डे राज़े देथ, ते ज़ैन परमेशेरू आए तैन परमेशरे देथ।” ज़ैखन फरीसी लोकेई ते कने हेरोदेस राज़ेरे लोकेई एन शुनु, त तैखन तैना बडे हैरान भोए। 18 तैल्ला पत्ती, सदूकी लोक यीशु कां आए। तैना ज़ोतन मुड़दे ज़ीते न भोन। त तैनेई यीशु पुच्छू, 19 “हे गुरु, बडे पेइले मूसे असन जो कानूने मां लिखोरू थियूं कि अगर कोई मैन्हु बेऔलाद मेरि गाए त तैसेरी कुआन्श रेइ गाए, त तैसेरो ढ़ला तैसेरी लैड़ी सेइ इला बनाए, त अपने ढ़लाएरे लेइ औलाद पैदा केरे, ताके तैसेरी खानदानी राए। 20 सत ढ़ला थिये। पेइलो ढ़ला इला बनेइतां बेऔलाद मेरि जेव। 21 तैखन दुइयोवं ढ़लाए तैस कुआन्शी सेइ इला बनाव। तै भी बेऔलाद मेरि जेव। तेन्चरां टलेइयोवं ढ़लाए भी कियूं। 22 त सते ढ़लाएई तैस कुआन्शी सेइ एक्केरे पत्ती एक्के इला कियो, पन औलाद न भोइ। सैरेन पत्ती तै कुआन्श भी मेरि जेई। 23 एल्हेरेलेइ, परमेशर लोक मुड़दन मरां ज़ीते केरनेरे पत्ती, यानी ज़ैखन लोक ज़ीते भोले, त तैखन तै कुआन्श तैन सत्तन मरां केसेरी लाड़ी भोली? किजोकि तै इड़ी धेरती पुड़ सत्तां केरि लाड़ी भोरी थी।” 24 यीशुए तैन सेइ ज़ोवं, “तुश्शी सोच केत्री गलत आए! कुन तुसन पतो किजो? किजोकि तुस पवित्रशास्त्रे मां लिखोरी गल्लन त कने परमेशरेरी शक्ति न ज़ानथ! 25 तुसेई ज़ै कहानी ज़ोई, तैस मां तै कुआन्श तैन सत्तन मरां केन्चेरी लाड़ी नई भोनी, किजोकि ज़ैखन लोक मुड़दन मरां ज़ीते भोले, त तैखन कोई केन्ची सेइ इला न बनारो, पन तैना स्वर्ग मां परमेशेरे स्वर्गदूतां केरे ज़ेरे भोले, ज़ैना इला न बनान। 26 मुड़दां केरे ज़ीतो भोनेरे बारे मां, कुन तुसेई मूसेरी किताबी मां एन नई पढ़ोरू ज़ैखन मूसे बलतू झैल्ल लाव, तैखन (यानी अब्राहम, इसहाक त याकूब मरनेरे बडे सालना पत्ती) परमेशरे मूसा सेइ ज़ोवं, ‘अवं अब्राहमेरो परमेशर, ते इसहाकेरो परमेशर, ते याकूबेरो परमेशर आई?’ 27 परमेशर मुड़दां केरो परमेशर नई, पन ज़ीतां केरो परमेशर आए, एल्हेरेलेइ तुश्शी सोच बिलकुल गलत आए।” 28 तैखन शास्त्री लोकन मरां एक्की मैने एजतां यीशु ते सदूकी लोकां केरि गलबात शुनी। तैस पतो च़लो कि यीशुए तैनन् ठीक जुवाब दितो, ते तैनी यीशु कां एइतां तैस पुच्छू, “परमेशेरे सारे हुक्मन मरां बडो खास

हुक्म को आए?” 29 यीशुए तैस जुवाब दित्तो, “सारे हुक्मन मरां बड़ो खास हुक्म ई आए, जेन्चरां परमेशरे कीताबी मां लिखोरूए कि, ‘हे इस्राएलरे लोकव शुना, प्रभु इश्शो परमेशर, अक्के प्रभु आए, 30 एल्हेरेलेइ प्रभु अपने परमेशरे सेइं तुस अपने सारे दिले सेइं, त अपनि सैरी जानी सेइं, त अपनि सैरी अक्ली सेइं, त अपनि सैरी ताकती सेइं प्यार केरा।’ ए बड़ो खास हुक्म आए। 31 तैसेरो जेरो दुइयोवं बड़ो खास हुक्म ई भी आए कि, ‘तू अपने पेड़ोसन सेइं अपने बराबर प्यार केर।’ एन दूई हुक्मन केरां होरो कोई भी बड़ो हुक्म नई।” 32 तैखन शास्त्री मैन्हु यीशु सेइं ज़ोवं, “हे गुरु, तीं बड़ू ठीक ज़ोवं! त तीं सच ज़ोवं कि परमेशर अक्के आए, ते तैसेरे अलावा होरो कोई नई। 33 त असेई परमेशरे सेइं अपने सारे दिले सेइं, ते अपनि सैरी जानी सेइं, ते अपनि सैरी अक्ली सेइं, त अपनि सैरी ताकती सेइं प्यार कियोरो लोड़े। ते कने असेई अपने पेड़ोसन सेइं अपने बराबर प्यार कियोरो लोड़े। जानवरां केरू बलिदान केरनू या होरि चीज़ां केरि चढ़तल चढ़ावे करां भी बेधतां, एना दुइये हुक्मन मन्ने परमेशरेरे लेइ बड़े खास आन।” 34 ज़ैखन यीशुए हेरू कि तैनी अक्ली सेइं जुवाब दित्तो, त तैनी तैस सेइं ज़ोवं, “तू परमेशरेरे राज़े मां दाखल भोने करां दूर नई।” ते तैल्ला पत्ती, केन्ची यीशु किछ पुछनेरी हिम्मत न भोइ। 35 मन्दरे मां शिक्षा देते बार यीशुए लोकन अक सवाल पुछ्ठो, “शास्त्री किजो ज़ोतन कि ज़ै मसीह आए, तै दाऊद-राजेरी औलादी मरां भोलो? 36 बड़े पेड़ले दाऊद राजे एप्पू पवित्र आत्मा रे शक्ति सेइं एन्चरां ज़ोरू थियू कि, प्रभु परमेशरे मेरे प्रभु मसीहे सेइं ज़ोवं, ‘तू मेरे देइने पासे बिश, ज़ातगर कि अवं तेरे दुश्मन बिलकुल न हारेई।’ 37 दाऊद राजे त एप्पू मसीहेरे बारे मां एन ज़ोवं कि ‘तै मेरो प्रभु आए,’ फिरि मसीह तैसेरू मट्टू केन्चरां भोइ सकते?” त मैन्हु केरि भीड़ यीशुएरी गल्लां खुशी सेइं शुन्ती थी। 38 यीशुए शिक्षा देते बार लोकन सेइं ज़ोवं, “शास्त्री लोकन करां खबरदार राथ, ज़ैना लम्मे-लम्मे चोले लेइतां हन्ठनू चातन, ताके लोक समझन कि तैना बड़े धर्मी आन, त तैना चातन कि बज़ारन मां लोक असन बड़ी इज़्ज़ती सेइं नमस्कार केरन। 39 त कने प्रार्थना घरन मां बड़े खास मैन्हु केरे लेइ रख्खोरी कुर्सी पुड़ बिशनू चातन, त धामन मां भी गेइतां बड़े खास मैन्हु केरे लेइ रख्खोरी कुर्सी पुड़ बिशनू चातन। 40 तैना विधवां केरे घरन लुटतन त कने होरि मैन्हु हिरानेरे लेइ लेम्मी-लेम्मी प्रार्थना केरतन, ताके लोक समझन कि तैना बड़े धर्मी आन। परमेशर तैनन् बड़ी जादे सज़ा देलो।” 41 लोकन शिक्षा देनेरे पत्ती, यीशु मन्दरेरे दान-पेट्टेरे सामने बिशतां एन तकने लगगोरो थियो कि, लोक दान-पेट्टी मां केन्चरां पेंडसे छड़तन। बड़े मैनेई, ज़ैना अमीर थिये, तैड़ी एइतां तैस मां बड़े पेंडसे छड़ने लगगोरे थिये। 42 तैखन अक गरीब विधवां एइतां दूई सिक्के छड़े, ज़ैन केरि कीमत बड़ी घट थी। 43 ज़ैखन यीशुए तैन हेरू, तैनी अपने चले एप्पू कां कुजेइतां तैन सेइं ज़ोवं, “अवं तुसन सेइं सच ज़ोतई कि मन्दरेरे दान-पेट्टी मां

पेंडसे छड़नेबालन मरां, एस गरीब विधवां तैन सारे मैन्हु करां जादे छड़ोरेन। 44 किजोकि तैन सैरेई अपने जादे पेंडसन मरां थोड़े ज़ेरे छड़े, पन ए विधवा त बड़ी गरीबी आए, फिरि भी तैसां सब किछ ज़ैन तैस कां थियू छेड़ी दित्तू, यानी अपनि ज़रूरतरे लेइ रख्खोरे पेंडसे भी छेड़ी दित्तो!”

13 ज़ैखन यीशु त तैसेरे चले मन्दरे मरां निस्सी राओरे थिये, तैखन तैसेरे चेलन मरां एक्के तैस सेइं ज़ोवं, “हे गुरु, इड़ी हेर! केत्रे बट्टे-बट्टे घोड़न सेइं बनोरी दिवारां कने केन्नु रोड़े भवन आए।” 2 यीशुए तैन सेइं ज़ोवं, “हुन्ना त तुस एना बट्टे-बट्टे घोड़न सेइं बनोरे भवनन लातथ, पन एक्की दिहाड़े इड़ी घोड़े पुड़ घोड़ भी न रालो, यानी सब नाश भोइ गालू!” 3 तैल्ला पत्ती, यीशु ज़ैतून नंक्वेरे पहेड़ी पुड़ चढ़ता पार मन्दरेरे सामने बिश्शो। तैखन पतरस, याकूब, यूहन्ना ते अन्द्रियास यीशु कां अलग गेइतां तैस केरां पुछने लगगे, 4 “असन ज़ो कि एना गल्लां केइस भोनिन? तैन दिहाड़ी केरो कुन निशान आए, ज़ैखन एना सब गल्लां पूरी भोनिन?” 5 तैखन यीशु तैन सेइं ज़ोने लगगे, “खबरदार राथ कि कोई तुसन धोखो न दे। 6 किजोकि बड़े मैन्हु मेरे नंक्वे सेइं एइतां ज़ोले कि, ‘अवं मसीह आई।’ ते तैना बड़े मैन्हु धोखो देले। 7 ज़ैखन तुस लड़ाई ते कने लड़ाइयां केरि अफवाह शुनेले, त तुस घबरेइयथ न, किजोकि लड़ाइयां केरू भोनू ज़रूरी आए, पन एस दुनियारो अन्त अकदम न भोलो। 8 किजोकि एक्की ज़ातारे लोक होरि कौमरे लोकां केरे खलाफ लड़ाई केरले, त अक मुखल होरि मुखलेरे खलाफ लड़ाई केरेलो। हर ठैरी भुंजल एज्जले, त काल पेलो। एन सब त सिर्फ मुसीबतां केरि शुरुआत आए। 9 “पन तुस अपने बारे मां खबरदार राथ, किजोकि लोक तुसन सभां केरे हवाले केरले, प्रार्थना घरन मां नेइतां मड्डले, त तुस मेरे वजाई सेइं गवर्नरन ते कने राजन कां खड़े किये गाले, ताके तुस तैन केरे सामने मेरे गवाह भोथ। 10 पन इस युग्गेरो अन्त भोनेरे पेड़ले एरू भोनू ज़रूरी आए कि परमेशरेरे राज़ेरे बारे मां खुशखबरी सैरी कौमां केरे लोकन शुनेई गाए।” 11 ज़ैखन लोक तुसन नेइतां आदालतां केरे हवाले केरले, त पेड़ले फिक्क न केरथ त न सोचथ कि अस कुन ज़ोमेले, पन ज़ैन किछ परमेशर तुसन तैस घड़ी ज़ोनेरे लेइ ज़ोवं गालू, तैन्ने ज़ोइयथ। किजोकि ज़ोनेबाले तुस नई, पन पवित्र आत्मा तुश्शे ज़िरिये ज़ोलो। 12 ढ़ला (ज़ै मीं पुड़ विश्वास न केरे, तै) अपने ढ़लाए मरानेरे लेइ हवाले केरेलो। त बाजी भी अपने मट्टे तेन्चरां हवाले केरेलो, ते बच्चे अपने हाज-बच्चेरे खलाफ भोइतां तैनन् मैरी छड़ेले। 13 मीं पुड़ विश्वास केरनेरे वजाई सेइं सारे लोक तुसन सेइं नफरत केरले, पन ज़ै मरने तगर विश्वासे मां बनोरो रालो, तैस परमेशर मुक्ति देलो। 14 तैल्ला पत्ती, यीशुए तैन सेइं ज़ोवं, “बड़ी बुरी गंदी चीज़, ज़ै नाश केरचे, एजनेबाली आए। तै भिटी चीज़ तैस जगाई पुड़ खड़ी भोली, ज़ेड़ी तैसारू खड्डू भोनू जेइज नई। बड़े पेड़ले दानिय्येल नेबे तैस चीज़ेरे बारे मां ज़ोरू थियू। (ज़ै कोई एन पढ़े, तै ए गल समझो।) ज़ैखन तुस

तै चीज़ी तैड़ी खड़ी लाएले, त तैखन ज़ैना लोक यहूदिया इलाके मां रातन, तैना बचनेरे लेइ पहाड़न पुड़ नेश्शी गान। 15 ते अगर कोई मैन्हु अपने घरेरे छते पुड़ भोलो, त तै अकदम तैह्नां नेश्शी गाए, ते अपने घरेरां किछ नेने अन्तर न गाए (ताके वक्त बरबाद न भोए)। 16 ते अगर कोई मैन्हु ऊडारे मां कम केरि राओरो भोलो, त तै भी अकदम तैह्नां नेश्शी गाए। तै अपना लिगड़ां भी नेनेरे लेइ पत्रोवं न एज्जे। 17 तैन दिहाड़न मां ज़ैना दोज़ींती त दुद्ध पियाती कुआन्शां भोली, तैन केरे लेइ अफ़सोस! (किजोकि तैन केरे लेइ बड़ी मुश्किल भोली।) 18 ते तुस प्रार्थना केरा कि एन हियूतड़े दिहाड़न मां न भोए। 19 किजोकि तैन दिहाड़न मां लोकन बड़ी मुसीबत भोली, कि दुनितयारी शुरुआती केरां देंती ज़ैन परमेशेर बनोरीए, अज़ तगर एरी मुसीबत नई ओरी। ते एरी ज़ेरि मुसीबत फिरी कधी न भोली।” 20 “अगर प्रभु परमेशर तैन मुसीबतेरी दिहाड़न न घटाए, त कोई मैन्हु भी न बचलो। पन परमेशर अपने चुनोरे लोकां केरे वजाई सेइं तैन दिहाड़न घटालो। 21 तैस मुसीबतेरे दिहाड़न मां, अगर कोई तुसन सेइं जोए कि, ‘तक्का, मसीह इड़ी आए!’ या ‘तक्का, उड़ी आए!’ त विश्वास न केरथ। 22 किजोकि झूठे मसीह ते कने झूठे नबी एज्जले। तैना लोकन धोखो देनेरे लेइ निशान ते कने चमत्कारेरां कम्मां हिराले, कि अगर भोइ सके, त तैना परमेशरे चुनोरे लोकन भी धोखो देले। 23 एल्हेरेलेइ, तुस होशियार राथ! हेरा, मीं तुसन सैरी गल्लां भोनेरे पेइले ही ज़ोरिन।” 24 तैल्ला पत्ती, यीशुए तैन सेइं ज़ोवं, “तैन दिहाड़न मां, तैस मुसीबतेरे वक्तेरे पत्ती, ‘दिहाड़ो कालो भोइ गालो, त चाँदनी ली न देली, 25 त अम्बरेरां तारे बिछड़ने लगगेले, त अम्बरेरी सैरी शक्ति हिल्लेली।” 26 “तैखन लोक मैनेरे मट्टे (यानी मीं) बड़ी शक्ति त कने बड़ी महिमा सेइं साथी धरती पुड़ जो बिदलारी मां एजते हेरेले। 27 तैखन अवं अपने स्वर्गदूतन सारी दुनियाई मां भेजतां धरतारे हर पासेरां अपने चुनोरे लोकन अकोट्टे केरेलो।” 28 तैल्ला पत्ती, यीशुए तैन सेइं ज़ोवं, “फेगरे बुटेरे मिसाले केरां अक सबक शिख्खा! ज़ैखन तैसेरी डैलड़ी नरम भोइतां, त नंवां पट्ठां निस्ने लगतन, ते तुस बुज्झी छड़तथ कि गेमेरो मौसम एजनेबालो आए। 29 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुज्झी छड़्हा कि मैनेरू मट्टू, यानी अवं बड़े नेड़े पुज्जोरोई। 30 अवं तुसन सेइं सच ज़ोतई कि ज़ांतगर एना सैरी गल्लां न भोली, तांतगर एना लोक, ज़ैना हुन्ना ज़ीतेन, तैना न मरेले। 31 अम्बर त कने धरती टेली गाली, पन मेरी गल्लां कधी न टेलेली।” 32 तैल्ला पत्ती, यीशुए तैन सेइं ज़ोवं, “मेरे वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन त परमेशेरू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते। 33 एल्हेरेलेइ, मेरे वापस एजनेरे लेइ हमेशा तियार राथ, ते प्रार्थना केरते राथ, किजोकि तुस न ज़ानथ कि तै वक्त कताली एज्जलो। 34 मैनेरे मट्टेरू, यानी मेरू वापस एजनु तैस मैनेरू

ज़ेरू आए, ज़ै अपनू घर छेड़तां होरे मुल्खे जो गाते। गाने केरां पेइले, तै अपने नौकरन कुजेइतां अपने घरेरी रखवाली केरनेरो अधिकार देते, ते हर एककी अपनू-अपनू कम देते, त दारे पुड़ रखवाली केरनेरे लेइ संत्री बींझो रानेरो हुक्म भी देते, किजोकि तै कधी भी वापस एज्जी सकते।” 35 “एसेरे ज़ेरे, तुस भी हमेशा मेरे वापस एजनेरे लेइ तियार राथ, किजोकि तुस न ज़ानथ कि घरेरो मालिक यानी अवं कताली वापस एज्जेलो। शायद इलोइजी या एथ्थी राती या कुकड़ेरे बांग देनेरे मौके या झेज्ज्जां। 36 एल्हेरेलेइ तियार राथ! एरू न भोए कि अवं अचानक एइतां लेई कि तुस तियार नई। 37 ज़ैन अवं तुसन सेइं ज़ोतई, तैने सारे मैन्नू सेइं भी ज़ोतई कि, ‘हमेशा तियार राथ!’”

14 फ़सहेरू तिहार त कने अखमीरी रोट्टारू तिहार दूई दिहाड़न पत्ती एजनेबालां थियां। प्रधान याजक त कने शास्त्री मौको तोपने लगगेरे थिये कि अस यीशु केन्चरां चुपचारे दलाम ते तैस मैरी छड्डम। 2 पन तैनेई एप्पू मांमेइं ज़ोवं कि, “अस तिहारेरे दिहाड़न मां यीशुए कैद न केरम, किजोकि तैन दिहाड़न मां बड़े लोक चेरे पासन भोतन, ते एरू न भोए कि यीशुएरे कैद भोनेरे वजाई सेइं लोकन मां दंगोफ़साद भोइ गाए।” 3 यीशु बैतनिय्याह इलॉव्वे मां शमीन नंवेरे मैनेरे घरे मां थियो, ज़ैस पेइले कोद्रेरो रोग थियो। ज़ैखन यीशु तैड़ी रोटी खेइ राओरो थियो, त तैखन अक कुआन्श संगमरमेरे सेइं बनोरे भांडे मां इत्र एन्तां यीशु कां आई, ज़ै बड़ो कीमती थियो त कने ज़ैस जो जटामासी ज़ोतन। तैसां तै इत्र बोतल दलोइतां खोल्ली ते यीशुएरी इज़्ज़त केरनेरे लेइ तैसेरे दोग्गे पुड़ इत्र उलटव। 4 पन किछ मैन्हु, ज़ैना तैड़ी खड़े थिये, तैस कुआन्शी हेरतां अपने दिले मां सेरकोइतां एप्पू मांमेइं ज़ोने लगगे, “ए कुआन्श किजो एस बड़ी कीमतारो इत्र ज़ाया केरवे? 5 ए इत्र त एककी सालेरी मजदूदारे पेंडसन केरां भी जादे भाए मां बेचतां, ते तैना पेंडसे गरीब मैन्नू देइ सकती थी!” ते तैना सेरकोइतां तैस सेइं डांटने लगगे। 6 पन यीशुए तैन सेइं ज़ोवं, “एस छेड़ी देथ! एस किजो तंग केरतथ? एसां त मीं सेइं भलाई कियोरीए। 7 गरीब मैन्हु त हमेशा तुसन सेइं साथी रातन। ज़ैखन भी तुस चाथ, तैखन तैन सेइं भलाई केरि सकतथ, पन अवं तुसन सेइं साथी हमेशा न रालो। 8 ज़ैन किछ ए कुआन्श केरि सकती थी, तैन एसां कियूं। एसां मेरी जानी पुड़ खुशबूदार तेल लेइतां मेरे मरनेरां पेइली मेरी जान दबनेरे लेइ तियार कियोरीए। 9 अवं तुसन सेइं सच ज़ोतई कि सैरी दुनियाई मां ज़ेड़ी कोन्वी मेरे बारे मां खुशखबरी लोकन शुनाई गाली, तैड़ी ज़ैन कम एसां मीं सेइं कियोरूए तैन भी एसेरी यादी मां ज़ोवं गालू।” 10 तैल्ला पत्ती, यहूदा इस्करियोती, ज़ै 12 चेलन मरां अक थियो, प्रधान याजकन कां जेव कि तै यीशु दलुवानेरे लेइ तैन केरि मदद केरे। 11 एन शुन्तां तैना बड़े खुश भोए, ते तैसेरे मददतेरे लेइ तैनेई चैंदेरे रुपेइये देनेरो वादो कियो। एल्हेरेलेइ, तै ठीक मौके बलगने लगगे कि यीशु केन्चरां सेइं दलुवाए। 12 अखमीरी रोट्टारे तिहारेरी पेइली दिहाड़ी, ज़ैखन

लोक फ़सहरे तिहारे गबड़े बलिदान करते थिये, तैखन यीशुए नेशशेलो।” 30 यीशुए पतरसे सेइं ज़ोवं, “अवं तीं सेइं सच ज़ोतई चेलैई तैस पुच्छू, “तू कोड़ि चातस कि अस गेइतां तेरे लेइ फ़सह कि अज़्जेरी राती कुकड़े दूई बार बांग देने केरां पेइले, तू दूलाई तिहारेरी रोटी तियार केरम?” 13 तैखन यीशुए अपने दूई चले बार मेरो इन्कार केरेलो कि तू मीं न ज़ानस।” 31 पन पतरसे एन ज़ोइतां भेजे, “यरूशलेम नगरे मां गाथ, ते अक मैनु तुसन मना ज़ोरे सेइं यीशु सेइं ज़ोने लगे, “अगर मीं तीं सेइं साथी पैनेरो घड़ो छुवोरो मैलेलो, तैस पत्ती-पत्ती गेइयथ। 14 ते तै मरनू भी पे, त फिरी भी अवं तेरो इन्कार कधी न केरेलो।” ज़ैस घरे मां गालो, तैस घरेरे मालिके सेइं तुस एन ज़ोइयथ कि, एन्चरां होरि चेलैई भी ज़ोवं। 32 तैल्ला पत्ती, यीशु ते तैसेरे चले इश्शे गुरे ज़ोवरूप कि, ‘मेरे लेइ तियार कियोरो मेहमान कमरो गतसमनी नंवेरे एककी बागी मां जे, ते तैड़ी यीशुए अपने किछ कोड़ि आए, ज़ेड़ी अवं अपने चेलन सेइं साथी फ़सह तिहारेरी चेलन सेइं ज़ोवं, “इड़ी बिश्शोरे राथ, ज़ां तगर अवं प्रार्थना न रोटी खेइ?” 15 तैखन घरेरो मालिक तुसन दुइयोवं छती पुड़, केरि।” 33 फिरी यीशुए पतरस ते याकूब ते यूहन्ना एण्पू सेइं तियार कियोरो, अक बड़ो कमरो हिरालो। तैड़ी इश्शे लेइ रोटी साथी बागी मां अगगर निये, ते तैड़ी तै बड़े परेशान भोने ते कने तियार केरथ।” 16 ते चले तैट्ठां निस्तां नगरे मां आए, त जेन्चरां घबराने लगे। 34 ते तैखन यीशुए तैन सेइं ज़ोवं, “मेरो दिल बड़ो यीशुए तैन सेइं ज़ोरू थियूं तेन्चरां तैनेई लावं। ते तैनेई फ़सह उदास आए, इड़ी तगर कि अवं मरनेबालोई। तुस इड़ी बलगा, ते तिहारेरी रोटी तियार की। 17 ज़ैखन ड़ोलोझ भोड़, त यीशु अपने बीड़ो राथ।” 35 फिरी तै बागी मां थोड़ी ज़ेरे अगगर गेइतां, तल्ले 12 चेलन सेइं साथी मेहमान कमरे मां अव। 18 ज़ैखन तैना मां ज़ैनु केरे भारे बिश्तां प्रार्थना केरने लगे कि अगर भोड़ सके बिश्तां रोटी खेइ राओरे थिये, त यीशुए तैन सेइं ज़ोवं, “अवं त ए दुखखेरी घड़ी मीं पुडेरं देली गाए। 36 ते तैनी प्रार्थनाई मां तुसन सेइं सच ज़ोतई कि तुसन मरां अक, ज़ै मीं सेइं साथी एन ज़ोवं, “बैपू! हे मेरे बाजी, तुसन केरां सब किछ भोड़ सकते। रोटी खेइ राओरोए, मीं धोखे सेइं दलुवालो।” 19 एन शुतां तैना एस दुखखेरो कटोरो मीं केरां दूर केरा। फिरी भी ज़ैन अवं चाताई सारे चले उदास भोए, ते तैना अक-अक केरतां यीशु सेइं पुछने तैन नई, पन ज़ैन तुस चातथ तैन्ने भोए।” 37 फिरी ते अपने लगे, “कुन अवं आई? कुन अवं आई?” 20 यीशुए तैन सेइं दलाई चेलन कां वापस अव, त तैना झुल्लोरे मैल्ले, ते तैनी ज़ोवं, “तै तुसन बारहन मरां अक आए, ज़ै मीं सेइं साथी बिश्तां तैना बींझाए, त तैनी शमौन-पतरसे सेइं ज़ोवं, “हे शमौन, कुन इश्शी एककी थैली मां रोटी खेइ राओरोए। 21 जेन्चरां मैनेरू तू झुल्लोरोस? कुन तू अक घड़ी भी बींझो न रेइ सकस?” मट्टू यानी मेरे बारे मां परमेशेरी किताबी मां लिखोरूप, तेन्चरां 38 तैखन यीशुए तैन सैरेन सेइं ज़ोवं, “बींझे ते प्रार्थना केरते अवं मारो गानोई। अफ़सोस! (किजोकि तैस मैनु बड़ी सज़ा राथ ताके तुस अज़मैइशी मां न पेथ। तुस त अज़मैइश रोकनी मैल्लनीए एजने बालीए) ज़ेसेरे वजाई सेइं मैनेरू मट्टू यानी अवं चातथ, पन तुसन कां रोकनेरी ताकत नई।” 39 ते यीशु फिरी दलुवाव गानोई। अगर तै मैनु ज़रमोरो न भोथो, त तैसेरे लेई अपने चेलन केरां थोड़े दूर चलो जेव, त ज़ैना गल्लां तैनी पेइले तैन भलू थियूं।” 22 ज़ैखन यीशु त तैसेरे चले फ़सहेरी रोटी खेइ ज़ोइतां प्रार्थना कियोरी थी, तैनां गल्लां दुबारां ज़ोइतां प्रार्थना राओरे थिये, यीशुए अक रोटी दलेइतां परमेशेरेरू शुक्र केरतां की। 40 ते फिरी वापस एइतां हेरू कि तैना चले झुल्लोरेन, दलोड़ी। तैल्ला पत्ती, तैनी ते अपने चेलन दिक्ती, ते तैन सेइं किजोकि तैन एत्री निडली थी, कि तैन केरि एछछी भी न थी ज़ोवं, “द्लाथ ते खाथ। ई मेरो जिसम आए।” 23 फिरी यीशुए लोरी खुलने। ज़ैखन यीशुए तैना बींझाए, त तैना शरमाने लगे दाछारे रस्सेरो कटोरो दलेइतां परमेशेरेरू शुक्र कियूं। तैल्ला कि यीशुए कुन ज़ुवाब देम। 41 फिरी दलेइयोवं बार गेइतां यीशुए पत्ती, तैनी ते अपने चेलन दिक्ती, ते तैनेई सैरेई पियो। 24 तैखन प्रार्थना की ते वापस एइतां फिरी तैन सेइं ज़ोवं, “कुन तुस हेजू तैनी तैन सेइं ज़ोवं, “ए दाछारे रस मेरो खून आए, ज़ै परमेशर त झुल्लोरेथ! बड़ू आए! हुनी घड़ी एज्जी जोरी! हेरा, मैनेरू मट्टू कने लोकां केरे मट्टाटे नव्वों करार बनाते, ज़ै बड़े लोकां केरे (यानी अवं) पापी मैनु केरे हथ्यन मां दलुवेइयोव गानोई। 42 मैफारे लेइ बगाव गालो। 25 अवं तुसन सेइं सच ज़ोतई कि उठा, चलम। हेरा! मीं दलुवानेबालो नेडे पुज़्जी जोरो!” 43 यीशु अवं दाछारो रस तैस दिहाड़ी तगर फिरी कधी न पीलो, ज़ांतगर एन्ने ज़ोई राओरो थियो कि अकदम यहूदा ज़ै 12 चेलन मरां परमेशेरेरे राज़े मां अवं नव्वो दाछारे रस पीं। 26 तैल्ला पत्ती, अक थियो, एण्पू सेइं साथी मैनु केरि अक बड़ी भीड़ एन्तां तैड़ी यीशु त कने तैसेरे चले परमेशेरेरू भजन ज़ोइतां, यरूशलेम पुज़्जी जेव, ज़ैन कां तलवारां ते डंडे थिये। तैना प्रधान याजक ते नगरेरे बेइर ज़ैतून नंवेरे पहेड़ी पुड़ चले जे।” 27 तैखन यीशुए शास्त्री लोक ते कने यहूदी लोकां केरे बुजुर्गां केरि तरपां यीशु अपने चेलन सेइं ज़ोवं, “तुस सारे मीं छेइतां नशशेले, किजोकि कैद केरनेरे लेइ भेजोरे थिये। 44 यीशुएरो दलुवानेबालो यहूदा तैड़ी पुजने केरां पेइले, तैन मैनु जे निशान दिक्तीरो थियो कि भैट्टां इरां उरां नेशशी गाली।” 28 पन अवं मेरतां मुडदन मरां फिरी ज़ैस अवं फुम्मड़ी देलो तैए यीशु आए, तैस दलेइतां ध्याने सेइं जीतो भोनीई। तैल्ला पत्ती, अवं तुसन केरां पेइले गलील इलाके नेइयथ। 45 ज़ैखन यहूदा ते मैनु केरि भीड़ बागी मां आई, त जो गालो त तैड़ी तुस मीं लाएले।” 29 तैखन पतरसे यीशु सेइं तैनी अकदम यीशु सेइं ज़ोवं, “हे रब्बी (गुरु)” ते तैस फुम्मड़ी ज़ोवं, “अगर सारे तीं छेइतां नशशेले त नशशन, पन अवं कथे न दिक्ती। 46 तैखन तैनेई यीशु दलेइतां कैद कियो। 47 यीशुए

चेलन मरां, ज़ैना तैसेरे नेडे खड़े थिये, एक्के अपनि तलवारे सेइं महायाजकेरे एक्की नौकरे पुड़ चलाई त तैसेरो अक कन केट्टी छट्टो। 48 यीशुए तैन मैनन् सेइं ज़ोवं, “कुन तुस मीं डैकू समझतां द्वालेरे लेइ तलवारां ते डंडे चिन्तां ओरिथ? 49 अवं त हर दिहाड़ी मन्दरे मां तुसन सेइं साथी रेइतां परमेशेरे बारे मां लोकन शिक्षा देतो थियो, पन तैखन तुसेईं अवं न द्वावा। पन एन एल्हेरेलेइ भोने लगेरू कि पवित्रशास्त्रे मां मेरे बारे मां ज़ैना गल्लां लिखोरिन तैना पूरी भोन।” 50 तैखन यीशुए सारे चले तैस छेइतां नेशशी जे। 51 ते अक जवान ज़ैनी अपनि नगगी जानी पुड़ अक लिगड़ पलेट्टेरू थियूं, यीशु पत्ती चलो। ते भीड़ी मरां किछ मैनेई तै द्वावा। 52 पन तै तैन केरे हथ्थन मां अपनू लिगड़ छेइतां नगगी नेशशी जेव। 53 तैल्ला पत्ती, मैन्हु केरि भीड़ां यीशु महायाजकेरे घरे मां नीयो। ते सारे प्रधान याजक ते कने बुजुर्ग त कने शास्त्री यीशुएरू इमतिहान नेनेरे लेइ महायाजके सेइं साथी तैड़ी अकोट्टे भोए। 54 यीशु त कने मैन्हु केरि भीड़ी केरा दूर-दूर रेइतां पतरस तैन पत्ती-पत्ती महायाजकेरे महल्लेरे अंगने तगर पुज़्ज़ी जेव। ते तैड़ी तै महायाजकेरे पैरदारे सेइं साथी बिश्तां अग तपने लगे। 55 मेहल्लेरे अन्तर, प्रधान याजक त कने सारी महासभा यीशुएरे खलाफ गवाही तोपनेरी कोशिश केरि राओरे थिये, ताके तैना तैस मैरी सकन, पन तैनन् किछ न मैल्लू। 56 किजोकि बड़े मैन्हु यीशु पुड़ झूठी गवाही देने लगगेरे थिये, पन तैन केरि गवाही अक्कां ज़ेरि न थी। 57 आखरी मां किछ मैनेई उठतां तैसेरे खलाफ ई झूठी गवाही दिती कि, 58 “असेईं एस केरां एन ज़ोते शुनेरू कि, ‘अवं मैन्हु केरू बनोरू एस मन्दरे बिछोइतां द्वाले दिहाइन मां होरू मन्दर बनालो, ज़ैन मैन्हु केरू बनोरू न भोलू।” 59 पन एन ज़ोइतां भी तैन केरि गवाही अक्कां ज़ेरि न निस्सी। 60 तैखन महायाजके आदालतेरे मझाटे खड़े भोइतां यीशु पुच्छू, “एना लोक तेरे खलाफ गवाही देतन, कुन तू कोई जुवाब नई देस?” 61 पन यीशु चुप राव, ते किछ जुवाब न दिती। तैखन महायाजके तैस फिरी पुच्छू, “कुन तू परमेशेरेरू मट्टू मसीह आस?” 62 यीशुए ज़ोवं, “हाँ, अवं तै आई। ते ज़ेन्चरां परमेशेरी किताबी मां लिखेरू कि ‘तुस सारे लोक, मैनेरू मट्टू (यानी मीं) सर्वशक्तिमान परमेशेरी देइने पासे बिश्शेरे त अम्बरे मरां बिदलारे सेइं साथी धेरीती पुड़ एजते हेरेले।” 63 तैखन महायाजके सेरकोइतां, अपना चोगो छिन्दतां आदालतेरे मैनन् सेइं ज़ोवं, “हुनी असन होरि केन्चेरी गवाहेरी ज़रूरत नई। 64 तुसेईं एप्पू परमेशेरी तुहीन शुनी! ते तुस एसेरो कुन फैसलो करतथ?” तैखन तैनेई सारे मैनेई ज़ोवं कि, “ए मैन्हु दोषी आए किजोकि एनी परमेशेरी तुहीन की, एल्हेरेलेइ, एस मौतरी सज़ा दे।” 65 तैखन तैन मरां किछ मैन्हु, तैसेरी बेजती केरनेरे लेइ, तैस पुड़ थुकने लगगे। ते किछ मैन्हु तैसेरी एछ्छी लिगड़े सेइं ठेकतां तैस मुक्केई बाने लगगे ते तैस सेइं ज़ोने लगगे, “भवियिवाणी केर कि केनि तीं बाई।” ते नौकरेई भी तैस द्वालेइतां थप्पड़ बाए। 66 ज़ैखन पतरस,

महायाजकेरे महल्लेरे अंगने मां थियो, त महायाजकेरे नौकरेनन मरां अक कुआन्श तैड़ी आई। 67 तैसां पतरस अग तपतो लाव। ते तै कुआन्श पतरस तेकतां तैस सेइं ज़ोने लगगी, “तू भी एस नासत नगरेरो यीशु सेइं साथी थियो।” 68 पन पतरसे यीशुएरो इन्कार कियो ते ज़ोवं, “अवं न ज़ैनी ते न सेमझी कि तू कुन लगोरिस ज़ोने।” फिरी तै तैट्टां बेइर डेवढी मां जेव। तैखन कुकड़े बांग दिती। 69 ज़ैखन तैसां नौकरेनां फिरी पतरस लव, त तै तैन सेइं, ज़ैना नेडे खड़े थिये, ज़ोने लगगी, “ए मैन्हु तैसेरे चेलन मरां अक आए!” 70 पन पतरसे फिरी यीशुएरो इन्कार कियो। थोड़े चिरे बाद, ज़ैना पतरसेरे नेडे खड़े थिये, तैनेई तैस सेइं ज़ोवं, “पक्को तू भी तैसेरे चेलन मरां अक आस, किजोकि तू गलील इलाकेरो मैन्हु भी आस।” 71 तैखन पतरस कसम केरतां ज़ोने लगे, “मीं फिटकार लगगे, अगर अवं झूठ ज़ोई कि अवं एस मैन्हु ज़ानतो भोई, ज़ेसेरे बारे मां तुस गल्लां केरने लगगेरेथ।” 72 तैखन अकदम दुइयों बर कुकड़े बांग दिती। ज़ै गल यीशुए पतरसे सेइं पेइली ज़ोरी थी, तै गल तैस याद आई कि, “कुकड़ेरे दूई बार बांग देने केरां पेइले तू द्वालेइ बार मेरो इन्कार केरेलो कि तू मीं न ज़ानस।” तैखन तैनी बड़ी लेरां दिती, किजोकि तैनी यीशुएरो इन्कार केरनेरे वजाई सेइं बड़ी दुखी भोव।

15 झेज़्ज़ा भोंते, अकदम प्रधान याजकेई, ते यहूदी लोकां केरे बुजुर्गेई, ते कने शास्त्री लोकेई ते कने सारे महासभारे मैनेई यीशुएरे खलाफ सलाह केरतां ते बन्धाव ते तैट्टां नेइतां रोमी गवर्नर पिलातुसेरे हवाले कियो। 2 पिलातुसे यीशु पुच्छू, “कुन तू यहूदी लोकां केरो राज़ो आस?” यीशुए तैस जुवाब दिती, “तू एप्पू ज़ोई राओरोस।” 3 तैखन प्रधान याजक तैस पुड़ बेड़ि गल्लां केरो झूठो इलज़ाम लेइ राओरे थिये। पन यीशुए किछ न ज़ोवं। 4 पिलातुसे तैस फिरी पुच्छू, “तू किछ भी जुवाब की न देस? हेर, एना लोक तीं पुड़ केत्री गल्लां केरो इलज़ाम लेइ राओरेन।” 5 हांलाकि यीशुएरी किछ भी गलती न थी, तैनी किछ जुवाब न दिती, इड़ी तगर कि पिलातुस बड़ो हैरान भोव। 6 हर साल फ़सह तिहारिरे वक्ते पुड़ यहूदी लोकां केरे लेइ केन्ची एक्की कैदी, ज़ैस तैना लोक चाते थिये तैस पिलातुस छेड़ी देतो थियो। 7 तैन दिहाइन बरअब्बा नन्वेरो अक मैन्हु किछ दंगेफसाद केरनेबालन सेइं साथी कैदखाने मां थियो, ज़ैनेई दंगेफसादे मां कल्ल कियोरो थियो। 8 तैखन मैन्हु केरि भीड़ पिलातुसे कां गेइतां मिन्नत केरने लगगी कि, “ज़ैन तू इश्शे लेइ हर साल केरतो ओरोस तैने केर।” 9 पन पिलातुसे तैनन् पुच्छू, “तुस कुन चातथ कि अवं तुश्शे लेइ यहूदी केरे राज़े यानी तुश्शे राज़े छेड़ी देई?” 10 पिलातुसे लोकन एन्चरां पुच्छू, किजोकि तै ज़ानतो थियो कि प्रधान याजक यीशु पुड़ ज़लतन तांए तैनेई तै द्वावोरोए। 11 पन प्रधान याजकेई लोक बमकाए, ताके पिलातुस तैन केरे लेइ यीशुएरे बदले बरअब्बा छेड़ी दे। 12 एन शुन्तां पिलातुसे लोकन फिरी पुच्छू, “अगर अवं बरब्बे छेड़ी देई, त ज़ैस तुस यहूदी लोकां केरो राज़ो ज़ोतथ, तैसेरू अवं कुन

केरि?" 13 तैना पिलातुसे सेइं फिरी शोर केरतां ज़ोने लगगे कि, "एस क़ूसे पुड़ चाढ़!" 14 पिलातुसे तैनन् पुच्छू, "किजो ए क़ूसे पुड़ चाढ़नो, एनी कुन बुराई कियोरीए?" पन तैना लोक पेड़ले केरां जादे शोर केरने लगगे कि, "एस क़ूसे पुड़ चाढ़!" 15 तैखन पिलातुसे लोक खुश केरनेरे इरादे सेइं, बरअब्बा तैन केरे लेइ छुट्टी दित्तो, ते यीशु कोड़े लुवेइतां सिपेही केरे हवाले कियो कि तैना यीशु क़ूसे पुड़ चाढ़न। 16 तैखन सिपाही यीशुए पिलातुसेर महलरे अंगने मां नेइ जे, जैस जो प्रीटोरियम ज़ोतन। ते तैनेई सारी रोमी पलटन कुजेइतां आनी। 17 तैखन तैनेई यीशुएरो मज़ाक बनानेरे लेइ तैसेरां लिगड़ां खोल्लां, ते तैस लाल रंगेरो चोलो लुवाव ते कने कंटं केरू ताज बनेइतां तैसेरे दोगगे पुड़ रख्खू। 18 ते एन ज़ोने लगगे कि, "हे यहूदी केरा राज़ा, नमस्कार!" 19 तैना यीशुएरे दोगगे पुड़ अक्केरे पत्ती अक केरतां सोटी सेइं बाने लगगे, ते तैसेरी बेज़ती केरनेरे लेइ तैस पुड़ थुकने लगगे, ते मज़ाक बनानेरे लेइ तैसेरे अगगर जैन्थु केरे भारे बिश्तां तैस नमस्कार केरते राए। 20 तैसेरो मज़ाक बनानेरे पत्ती, तैनेई तैस पुड़ेरां लाल रंगेरो चोगो खोलतां तैसेरां लिगड़ां लुवा। तैखन तैना यीशु क़ूसे पुड़ चाढ़नेरे लेइ यरूशलेमेरे नगरे केरां बेइर नीयो। 21 ज़ताली तैना तैट्ठां च़ेलि राओरे थिये, त तैखन शमौन नंवेरो मैन्हु इलॉव्वेरां तैलमेइं एज्जी राओरो थियो। तै मैन्हु कुरेनी नंवेरे नगरेरां ओरो थियो ते तै सिकन्दर ते कने रूफुसेरो बाजी थियो। तैखन सिपाहेई शमौन मजबूर कियो कि तै यीशुएरे लेइ तैसेरी क़ूसे छुइतां च़ले। 22 ते तैनेई यीशु गुलगुता नंवेरी ठेरी पुड़ आनो, ज़ेसरो मतलब "खोपड़ा ठार" आए। 23 फिरी किछ लोकेईं मुर्ं नंवेरी दवाई, दाछारे रस्से मां मिलेइतां यीशु पीने जो दिती, पन तैनी तैसेरो इन्कार केरतां न पी। 24 तैखन तैनेई यीशु क़ूसे पुड़ चाढ़ो ते तैसेरां लिगड़ां केरे लेइ पेरची छुट्टी कि तैसेरां लिगड़ां केस मैलतन। तैल्ला पत्ती, तैनेई तैसेरां लिगड़ां बेन्टी छुट्टा। 25 ज़ैखन तैनेई तै क़ूसे पुड़ चाढ़ो, तैखन झेज़्ज़ेरे नौ बज़्ज़ोरे थिये। 26 ते एक्की फेटी पुड़ तैसेरी सज़ारी वजा लिखतां तैसेरे क्रोड़ी केरां बां लेइ छुट्टी। तैस मां लिखोरू थियूं कि, "ए यहूदी लोकां केरो राज़ो आए।" 27 सिपाहेई यीशु सेइं साथी होरे दूई डैकू भी, अक तैसेरे देइने पासे ते अक तैसेरे बाए पासे अलग-अलग क़ूसन पुड़ चाढ़े। 28 तैखन परमेशरेरी किताबी मां लिखोरी गल पूरी भोइ। तैस मां मसीहेरे बारे मां एरू लिखोरू थियूं कि, "ते पापी मैन्हु केरे साथी गनो गालो।" 29 तैखन बत्तां च़लनेबालन मरां किछ मैन्हु अपनि क्रोड़ी हिलेइ-हिलेइतां ते कने एन ज़ोइतां तैसेरी तुहीन केरते थिये कि, "वाह! वाह! मन्दर बिछोड़नेबालो, त कने टलेइ दिहाइन मां बनानेबालो! 30 अगर तू शक्तिशाली आस त क़ूसे पुड़ेरां ओस्तां अपने आपे बचा!" 31 एन्चरां प्रधान याजक भी शास्त्री लोकन सेइं साथी तैसेरो मज़ाक बनेइ राओरे थिये, त तैना एप्पू मांमेइं ज़ोते थिये कि, "एनी होरे मैन्हु त बचाए, पन अपने आपे बचेइ न सको। 32 ए ज़ोरो थियो कि 'अवं इसाएल लोकां केरो राज़ो

आई, यानी मसीह आई,' अगर ए गल सच आए त हुन्ना क़ूसे पुड़ेरां ओस्से, ताके अस हेरतां विश्वास केरम कि ए इश्शो राज़ो आए।" त दूई डैकू, ज़ैना तैस सेइं साथी क़ूसे पुड़ चाढ़ोरे थिये, तैनेई भी तैसेरी बेज़ती की। 33 दीसारे बारे बजेई सारे मुल्खे मां आंधरू भोवं, ते टलेइ बज़न तगर रावं। 34 टलेइ बजेई यीशुए बड़ी ज़ोरे सेइं अपनि बोली मां ज़ोवं कि, "इलोई, इलोई, लमा शबक्तनी!" ज़ेसेरू मतलब, "हे मेरे परमेशर, हे मेरे परमेशर, तीं किजो अवं छेट्टी दित्तो!" 35 तैखन ज़ैना तैड़ी नेड़े खड़े थिये, तैन मरां किछ मैनेई एन शुन्तां गलत सेमझतां एप्पू मांमेइं ज़ोवं, "हेरा, ए मैन्हु एलियाहा जे मद्दत केरनेरे लेइ कुजेई राओरोए।" 36 तैखन तैन मरां एक्की मैने दौड़तां स्पन्जे (ज़े पेनेरी ज़ेरि चीज़ चूसी सकचे) खटे दाछारे रस्से मां डुबेइतां डांगी पुड़ रेखतां यीशु जो चुसावं त ज़ोवं, "बलगा, हेरम, एलियाहा एस क़ूसे पुड़ेरां उसालने एजते कि नई।" 37 तैखन यीशुए बड़े ज़ोरे सेइं आवाज़ देइतां प्राण दित्ते। 38 ते तैखन मोटो पर्दो, ज़ै मन्दरे मां लोरो थियो, बां देंता बुन तगर फेटतां दूई टुकड़े भोइ जे। 39 ज़ैखन फौजी-अफसर, ज़ै यीशुएरे सामने खड़ी थियो, यीशु एन्चरां ज़ोरे सेइं आवाज़ देइतां प्राण देंतो लाव, तैखन तैनी ज़ोवं, "सच्चे, ए मैन्हु परमेशेरू मट्टू थियूं!" 40 किछ कुआन्शां भी दूरेरां एन हेरी राओरी थी। तैन मां मगदलीन नगरेरी मरियम, निकडो याकूब ते योसेसेरी अम्मा मरियम, त कने सलोमी भी थी। 41 ज़ैखन यीशु गलील इलाके मां थियो, त तैखन एना कुआन्शां तैस पत्ती-पत्ती च़लती थी त तैसेरी सेवा केरती थी। त तैड़ी होरि भी बड़ी कुआन्शां थी, ज़ैना तैस सेइं साथी गलील इलाके मरां यरूशलेम नगरे मां ओरी थी। 42 ज़ैखन इलोइ भोइ, ते एल्हेरेलेइ कि तै तिहारेरी दिहाड़ी थी, यानी आरामेरे दिहाड़े पेड़ली दिहाड़ी ज़ैखन लोक आरामेरी दिहाड़े लेइ तियार भोते थिये, त तैखन 43 अरिमतियाह नगरेरो रानेबालो यूसुफ नंवेरो मैन्हु तैड़ी अव, ज़ै यहूदी लोकां केरे बड्डे आदालतेरे खास मैन्म मरां अक थियो। तै एप्पू भी परमेशरेरे राज़े बलगने लोरो थियो। ते मैन्हु हिम्मत केरतां गवर्नर पिलातुसे कां जेव ते यीशुएरी लाश मग्गी, ताके ते तैस दबनेरे लेइ ने। 44 तैखन पिलातुस हैरान भोव कि केन्चरां तै एत्री लूशी मेरि जेव। त तैनी फौजी-अफसर कुजेइतां पुच्छू, "कुन तै मेरि जोरोए?" 45 ज़ैखन तैनी फौजी-अफसरे केरां हाल ज़ानो कि यीशु सच्चे मेरि जेव, त तैनी यूसुफे लाश नेनेरी अज़ाज़त दित्ती। 46 तैखन यूसुफे अक कीमती लिगड़ धिन्नु ते यीशुएरी लाश क़ूसे पुड़ेरां ओसैलतां यहूदी लोकां केरि रसमेरे मुताबिक तैस लिगड़े मां पलेटतां एक्की कब्री मां छेट्टी, ज़ै पहेड़ी पुड़ एक्की घोड़े मां घडोरी थी। त तैस कबरे बेइर दारे पुड़ अक बड्डो घोड़ घिसेइतां छुट्टो। 47 मगदलीन इलव्वेरी मरियम, ते योसेसेरी अम्मा मरियम, एना दुइये हेरी राओरी थी कि यीशुएरी लाश कोड़ि रखतन।

16 होरसां इलोइ, ज़ैखन आरामेरी दिहाड़ी खतम भोरी थी, त तैखन मगदलीन इलव्वेरी मरियम, त कने याकूबेरी

अम्मा मरियम, त कने सलोमी, एन सेब्भेई रोड़ी मुशकी बालो तेल आनो, ताके यहूदी लोकां केरि रसमेरे मुताबिक यीशुएरी लाशी पुड़ तेल लान। 2 हफ्तेरे पेड़ले दिहाड़े झेज़्ज़ां-झेज़्ज़ां, ज़ैखन मसां दिहाड़ो निस्सी राओरो थियो, त तैना कब्री कां जेई जैस मां यीशुएरी लाश रखोरि थी। 3 तैखन तैना एप्पू मामेइं चेलैई बेइर हर जगाई गेइतां लोकन खुशखबरी शुनाने लग्गे। ते ज़ोती थी, “इशे लेइ कब्रे दारे पुड़ेरां घोड़ कौन गिसालो?” 4 किजोकि तै घोड़ बड़ो बड़ो थियो। पन तैड़ी पुज़नेरे बाद, तैनेई कब्रे पासे उब्री तक्कू त हेरू कि घोड़ पेड़लो कब्रे दारे पुड़ेरां गिस्सोरो थियो। 5 तैनेई कब्रे अन्तर गेइतां अक जवान लाव ते तैना बेड़ि हैरान भोइ जेई। तैस छित्तां लिगड़ां लेग्गोरां थियां, ते तैड़ी तैन केरे सिध्दे पासे बिशशोरो थियो। 6 तैनी जवाने तैन सेइं ज़ोवं, “डरा न, अव ज़ानताई कि तुस नासरत नगरेरे यीशु तोप्पी राओरिथ, ज़ै कूसे पुड़ चाढ़रो थियो। तै मुड़दन मरां ज़ींतो भोरोए। तै इड़ी नई। हेरा, ई तैए ठार आए, जेड़ी तैसेरी लाश रखखोरी थी। 7 पन तुस गेइतां तैसेरे चेलन सेइं त कने पतरसे सेइं भी ज़ोइयथ कि यीशु तुसन करां पेड़लो गलील इलाके जो गालो। जेन्चरां तैनी पेड़लू तुसन सेइं ज़ोरू थियू, तेन्चरां तुस तैस तैड़ी लाले।” 8 तैना कुआन्शां कब्री मरां बेइर निस्तां तैट्ठां नेश्शी जेई, किजोकि तेनन् थर्क लग्गोरी त घेबरोरी थी। बत्तां तैनेई केन्ची सेइं किछ न ज़ोवं, किजोकि तैना डेरी थी। 9 (note: The most reliable and earliest manuscripts do not include Mark 16:9-20.) हफ्तेरे पेड़ले दिहाड़े झेज़्ज़ा भोते, यीशु मुड़दन मरां ज़ींतो भोइतां पेड़ले मगदलीन नगरेरी मरियमी लेइहोव, जैस मरां तैनी पेड़लां सत भूतां केरो सायो कड्डोरो थियो। 10 मरियमां यीशु लानेरे पत्ती, गेइतां तैसेरे चेलन खबर दित्ती, ज़ैना यीशुएरे लेइ शोग केरने लग्गोरे ते कने लेरां देने लग्गोरे थिये। 11 पन ज़ैखन तैनेई तैसारी गल शुनी कि यीशु फिरी ज़ींतो भोरोए ते तैसां लेवरोए, त तैनेई तैसारी गल्ली पुड़ याकीन न कियू। 12 तैल्ला पत्ती, यीशु अपने चेलन मरां दूई चेलन होरि रूपे मां लेइहोव, ज़ैखन तैना (यरूशलेम) नगरेरां अपने इल्लोव्वे जो ज़लारे थिये। 13 तैखन तैनेई भी नगरे वापस एजतां यीशुएरे होरे चेलन खबर दित्ती, पन तैनेई तैन केरि गल्लारो भी विश्वास न कियो। 14 तैल्ला पत्ती, यीशु अपने 11 चेलन भी लेइहोव, ज़ैखन तैना रोट्टी खेइ राओरे थिये। त तैन केरे अविश्वास त कने सखत दिलेरे वजाई सेइं यीशुए तैना डांटे, किजोकि तैनेई तैन केरो विश्वास न कियो, ज़ैनेई यीशु ज़ींतो भोनेरे पत्ती ते लेवरो थियो। 15 यीशुए अपने चेलन ज़ोवं, “तुस सैरी दुनियाई मां गेइतां सारे लोकन मेरे बारे मां खुशखबरी शुनाथ। 16 ज़ै कोई मीं पुड़ विश्वास केरे ते बपतिस्मो ने, तैस पापां केरि सज़ाई करां मुक्ति मैलेली। पन ज़ै कोई विश्वास न केरे, तैस अपने पापां केरि सज़ा मैलेली। 17 ज़ैना मीं पुड़ विश्वास केरतन, तैना एरां चमत्कारेरां कम्मां (निशाना) केरले कि तैना मेरे नंवे सेइं लोकन मरां भूतां केरो सायो कढेले, ते नंवी-नंवी बोली केरले। 18 ते अगर तैना ज़ेहरीले सप्पन ट़लाले त कने ज़ेहरीली चीज़ भी पीले,

तांभी तेनन् किछ नुकसान न भोलो। ते ज़ैखन तैना बिमारन पुड़ हथ रखखेले, ते तैना बेज़्ज़ोइ गाले।” 19 यीशु अपने चेलन सेइं गल्लां केरनेरां पत्ती, परमेशरे तै स्वर्गे जो नीयो। ते यीशु परमेशरेरे देइने पासे राज़गेदी पुड़ बिशशी जेव। 20 ते यीशुएरे चेलैई बेइर हर जगाई गेइतां लोकन खुशखबरी शुनाने लग्गे। ते प्रभु तैन सेइं साथी कम केरतो राव। तैना चमत्कारेरां कम्मां (निशानन) केरे ज़िरिये, ज़ैना साथी-साथी भोतां थियां, प्रभु साबत केरतो राव कि तैन केरि गल्लां सन्न आन। आमीन।

लूका

1 जनाब थियुफिलस, बडे लोकेई तैना गल्लां हेरी जैना प्रभु-यीशुए कियोरी थी, जैखन तै असन सेई साथी थियो, जेइसेरां तैनी अपनू सेवारू कम शुरू कियोरू थियू। तैन मैनेई होरि मैनु यीशुएरे बारे मां शिक्षा देइतां परमेशेरी सेवा की। बडे मैनेई तैन केरि गल्लां शुन्तां यीशुएरे बारे मां इशे लेइ इतिहासेरी किताब लिखी। 3 मीं एण्णू तैन सैरी गल्लां केरि बडे रोइचारे छानबीन की। एल्हेरेलेइ, मीं एन रोडू लग्गू, कि अवं भी तुशे लेइ तैन गल्लां केरे बारे मां ठीक डंगे सेई इतिहासेरी किताब लिखी। 4 अवं चाताई कि तीं पतो लग्गे कि यीशुएरे बारे मां तैना गल्लां सच्चरी आन, जैन केरे बारे मां तुसन शिक्षा मैल्लोरी थी। 5 यहूदिया इलाके मां, जैखन हेरोदेस राज़ो राज़ केरतो थियो, त तैखन जकयर्हा नंव्वेरो अक यहूदी याजक थियो। तै मैन्हु याजकां केरे टोली मां अबिय्याह नंव्वेरो टोली मरां थियो। तैसेरी कुआन्शा नवं एलीशिबा थियूं। एलीशिबा हारुनेरे खानदेनी मरां थी, (हारुन इस्राएल लोकां केरो पेइलो याजक थियो)। 6 तैना दुइये प्रभु-परमेशेरी नज़री मां धर्मी थियां ते कने परमेशेरे सारे कानून ते सारे हुकमन पुड़ बेइलज़ाम चलेनेबालां थियां। 7 पन तैन केरि कोई औलाद न थी, किजोकि एलीशिबा बाँझ थी, ते तैना दुइये बुढां थियां। 8 एक्की फेरे, जकयहिरी टोली यरूशलेम नगरेरे मन्दरे मां सेवारू कम केरि राओरे थी, तैखन तै प्रभु परमेशेरी हज़ूरी मां अपनू याजकेरू कम लोगोरो थियो केरने। 9 याजकां केरे रीतेरे मुताबिक तैनेई परची छेइतां जकयर्हा चुनो कि तै प्रभु-परमेशेरे मन्दरे मां गेइतां गुग्गल बाले। 10 जैखन तै गुग्गल बालने लोरो थियो, त तैखन मैन्हु केरि सारी भीड़ मन्दरेरे बेइर प्रार्थना केरि राओरी थी। 11 तैखन अचानक प्रभु-परमेशेरो अक स्वर्गदूत गुग्गल बालनेरी ठारारे देइने पासे खडे भोइतां जकयर्हा लेइहोव। 12 जैखन जकयर्हि स्वर्गदूत लाव, त ते घेमरोव ते बड़ी डेरि जेव। 13 पन स्वर्गदूते तैस सेई ज़ोवं, “हे जकयर्हा, न डर! जैखन तीं प्रार्थना की, त परमेशेरे तेरी प्रार्थना शुनी। एल्हेरेलेइ, तेरी कुआन्शा एलीशिबाई मट्टू भोनूए, ते तू तैसेरू नवं यूहन्ना रेख्खां। 14 तैसेरे ज़र्म भोने सेई तू बड़ो खुश भोलो। त बडे लोक भी खुश भोले। 15 तै प्रभु-परमेशेरी नज़री मां महान भोलो, ते तैनी कोन्ची भी किसमेरी नश्शे बाले चीज़ त कने शराब कथे न लोइे पियोरी, ते तै अपनि अम्मारे पेटे मां भोते वक्तेरां परमेशेरी पवित्र आत्मारी शक्ति सेई भरपूर भोलो। 16 तै इस्राएली लोकन मरां बडे लोक परमेशेरे पासे ज़ै तैन केरो प्रभु परमेशेरे वापस तैस कां आनेलो, जैना अपने पापां केरि वजाई सेई परमेशेरे करां दूर भोरे थिये। 17 ते तै एरो मैन्हु भोलो जैस पुड़ एलिय्याहरी आत्मा ते कने शक्ति भोलो। ते परमेशेरी बत तियार केरेलो, तैस अग्री-अग्री चलेलो ताके हाज बव्वां केरो दिल औलादरे पासे ते परमेशर न मन्नेबाले लोकन धर्मी लोकां केरे बत्तां केरे पासे बदलेलो, ताके जैखन

प्रभु एज्जे त लोक तियार भोन।” 18 जकयर्हि स्वर्गदूते पुच्छू, “अवं केन्चरे मेन्नी एन असन सेई भोनूए, अवं त बुढोई ते मेरी कुआन्शा भी बुढी भोरीए।” 19 स्वर्गदूते जुवाब दित्तो, “अवं जिब्राईल आई अवं परमेशेरे कां खडो भोताई, अवं एल्हेरेलेइ भेजोरोई, कि अवं तीं सेई गल केरि ते तीं ए खुशखबरी शुनेई। 20 ते हेर ज़ां तगर एना गल्लां पूरी न भोन तेरी ज़बान बंद भोली, ते तू गल न केरि सकेलो किजोकि तीं मेरी गल्लां केरू याकीन नई कियेरू जैना अपने वक्ते पुड़ पूरी भोनिन।” 21 ते जैखन जकयर्हा ते स्वर्गदूत मन्दरे मां गल्लां लोरे थिये केरने त लोक मन्दरेरे बेइर अंगने मां जकयर्हि बलगने लोरे थिये, तैना बडे हैरान भोइजेइ कि जकयर्हि मन्दरे मां एत्रू चिरि किजो लाव। 22 जैखन तै बेइर निस्सो, त तै कुजी न बटो ते तैन लोकेई बुझी छुडू, कि एनी मन्दरे मां किछ दर्शन लाहेरूए किजोकि ते इशारो केरतो थियो, पन कुजी न थियो बटतो। 23 जेइस यरूशलेम नगरेरे मन्दरे मां जकयर्हारू एक्की हफतेरे याजकेरी सेवारू कम पूरू भोवं, त तै अपने घरे जो चलो जेव। 24 किछ वक्तेरां बाद तैसेरी कुआन्शा एलीशिबा दोर्जीतीए भोइ, ते तै पंच महीन् तगर बेइर लोकन मां न जेई। तैसां ज़ोवं, 25 “प्रभुए मीं पुड़ दया केरतां केत्रू महान कम कियूं, ते अवं दोर्जीती भोइ, ते जैस गल्लरे वाजाई सेई लोक मीं घटिया समझते थिये, तै गल दूर की।” 26 एलीशिबारे दोर्जीती भोनेरे शेइयोवं महीने जिब्राईल स्वर्गदूत परमेशेरी तरफां गलील इलाकेरे नासरत नगरे मां, 27 एक्की अड्लैई कुइये कां भेजो। तैसारी कुड़माइ दाऊदरे खानदाने मरां एक्की मड़दे सेई भोरी थी जेसेरू नवं यूसुफ थियूं, ते तैस कुइयरू नवं मरियम थियूं। 28 स्वर्गदूते तैस कां एइतां ज़ोवं, “आनन्द ते ज़ीत तेरी भोए, तीं पुड़ परमेशेरी बड़ी दया भोरीए, प्रभु तीं सेई साथिये!” 29 मरियम स्वर्गदूतेरी गल शुन्तां परेशान भोइतां सोचने लगी एन केरहु नमस्कारे? 30 स्वर्गदूते तैस सेई ज़ोवं “हे मरियम, डर न, किजोकि परमेशेरो तीं पुड़ बड़ो अनुग्रह भोरोए। 31 तू दोर्जीती भोली तीं अक मट्टू भोलू, ते तू तैसेरू नवं यीशु रेखां। 32 तैन महान भोलू ते तैस जो परमप्रधान परमेशेरेरू मट्टू ज़ोले, ते परमेशर तैस तैसेरे पूर्वज दाऊद राजेरू ज़ेरो राज़ो बनालो। 33 ते तै याकूबेरे खानदाने पुड़ हमेशा राज़ केरेलो, ते तैसेरू राज़ कथे खतम न भोलू।” (aiōn g165) 34 मरियमा स्वर्गदूते पुच्छू, “एन केन्चरे भोइ सकते? अवं त अड्लैई आई।” 35 स्वर्गदूते जुवाब दित्तो, “पवित्र आत्मा तीं पुड़ उतरेलो, ते परमप्रधान परमेशेरी शक्ति तीं पुड़ सैयो केरेली एल्हेरेलेइ तै बच्चो ज़ै ज़र्मएलो ते पवित्र भोलो तैस जो परमेशेरेरू मट्टू ज़ोले। 36 ते हेर तेरी रिशतेदार एलीशिबाई भी बुडे बारे मट्टू भोने बालूए तैस जो लोक बाँझ ज़ोते थिये, तैस दोर्जीती शा महीने भोरेन। 37 किजोकि परमेशेरे लेइ किछ भी नमुमकिन नई।” 38 मरियमा स्वर्गदूते जुवाब दित्तो, “अवं परमेशेरी सेवा केरती ज़ैन तीं ज़ोरूए तैन भोए।” तैखन स्वर्गदूत तैस करां चलो जेव। 39 किछ दिहाइन पत्ती मरियम तियार

भोइतां यहूदियारे इलाकेरे एककी पहाड़ी नगरे मां जेई। 40 ते जकर्याहरे घरे मां गेइतां एलीशिबा जो नमस्कार कियूं। 41 जैखन एलीशिबा मरियमारू नमस्कार शुनू त बच्चो तैसेरे पेटे मां उछड़ने लगे ते एलीशिबा पवित्र आत्माई सेइं भरोई जेई। 42 ते बड़े ज़ोरे सेइं ज़ोने लगी, “तू कुआन्थन मां धन आस ते ज़ै बच्चो तीं ज़ांनोए ते भी धने! 43 ते मेरे लेइ बड़ी इज़्जतरी गल आए कि, मेरे प्रभुएरी अम्मा मीं कां आई! 44 किजोकि हेर ज़ेरि तेरे नमस्कारेरी आवाज़ मीं शुनी त बच्चे खुशी सेइं मेरे पेटे मां छालां लगे मारने। 45 तू धन आस तीं तैन गल्लन पुड़ विश्वास कियो ज़ैना प्रभुए तीं सेइं जोई कि, तैना पूरी भोली।” 46 ते मरियमा ज़ोवं, “अवं प्रभुएरी तारीफ़ करेती। 47 ते मेरी आत्मा मेरे मुक्ति देनेबाले परमेशरे सेइं खुशी भोइ। 48 किजोकि तैनी अपन सेवा केरने बैलरी गिरोरी हालती पुड़ नज़र की, अज़ेरां देइतां हर ज़मानेरे लोक मींजो धन ज़ोले। 49 किजोकि परमेशरे मेरे लेइ बड़ा-बड़ा कम्मां कियोरन ते तैसेरू नवं पवित्र भोए। 50 तैसेरी दया तैस करां डरने बालन पुड़ पीड़ी-पीड़ी तगर राचे। 51 तैनी अपने शेक्ति सेइं बड़ा-बड़ा कम्मां कियोरन तैनी घमण्डी तितर-बितर कियो। 52 तैनी राज़े राज़ केरने करां रोके, ते तैनी नम्र लोकन आदर दिती। 53 तैनी नियन्ने रोड़ी-रोड़ी चीज़ेइं सेइं रज़ाने ते धन दोलती बाले खाली हथेइं भेजे। 54 तैनी अपने वादे ज़ैना तैनी इश्शे दादन-पड़दादन सेइं कियोरे थिये याद कियो, तैनी अपन सेवा केरनेबाले इस्राएली लोकां केरि मदद की, 55 तैनी हमेशारे लेइ अब्राहमे पुड़ ते तैसेरी औलादी पुड़ दया केरनि याद रख्खी।” (aiōn g165) 56 मरियम कोई ट्लाई महीन्ना तगर एलीशिबा सेइं साथी राई ते फिरी अपने घरजो आई। 57 एलीशिबारो गल्हे बिशनेरो वक्त एज्जी अव ते तैस मट्टू भोवं। 58 तैसारे आसेपासेरे रिशतेदारेइ एन शुनू कि परमेशरे तैस पुड़ बड़ी दया कियोरिये ते तैस सेइं साथी खुशी मनाई। 59 अठोवं दिहाड़े तैना मट्टेरो खतनो केरने आए, ते तैना तैसेरू नवं तैसेरे बाजी केरे नव्वें पुड़ जकर्याह रखनू चाते थिये। 60 पन तैसेरी अम्मा ज़ोने लगी, “नई एसेरू नवं यूहन्ना भोली।” 61 किछ तैस जो ज़ोने लगे, “तुश्शी खानदेनी मां कोई भी एस नव्वेरो नई।” 62 तैखन तैन लोकेई जकर्याहरे पासे इशारे सेइं पुच्छू कि तू मट्टेरू नवं कुन रखनू चातस? 63 ते तैनी पटारी मगी ते तैस पुड़ लिखू, “एसेरू नवं यूहन्ना आए,” ते सब लोक हैरान रेइजे। 64 तैखने तैसेरी जिभ खुल्ली ते जकर्याह गल्लां लगे केरने ते परमेशरेरी तारीफ़ केरने लगे। 65 ते आसे-पासेरे लोक एस तमाशे हेरतां हैरान रेइजे, ते यहूदियारे इलाकेरे एककी पहाड़ी नगर मां एस गल्लरी चरचा भोने लगी। 66 ते शुन्ने बाले अपने-अपने मन्न मां सोचते थिये, “एन मट्टू बट्टू भोइतां केरहु भोनूए?” किजोकि परमेशरेरी शक्ति अज़ेरी देती एस सेइं साथीए? 67 तैखन तैसेरो बाजी जकर्याह पवित्र आत्माई सेइं भेरोवं ते भविष्यवाणी केरने लगे। 68 “प्रभु इस्राएलेरो परमेशर धन भोए, किजोकि तैनी एइतां अपने लोकन मुक्ति दितोरिये। 69 ते तैसेरे दास दाऊदरे घराने

मरां इश्शे लेइ अक मुक्ति देनेबालो भेज़ोरोए। 70 (बड़े पेइले ज़ेन्चरे पवित्र नेबी केरे ज़िरिये ज़ोरू थियूं, ज़ैन शुरू करां देंते ओरूए।) (aiōn g165) 71 असां अपने दुश्मन करां ते बैर रखने बालन करां मुक्ति हासिल केरम। 72 ते तै इश्शे दादे पड़दादन पुड़ दया केरे ते अपनो पवित्र करार याद केर। 73 ते करार ज़ै तीं इश्शे पूर्वज अब्राहमे सेइं कियोरो थियो। 74 कि तै असन हिम्मत देलो, कि असां अपने दुश्मन करां बगैर केन्ची भी डरे सेइं बेंची सखम। 75 ते अपन जिन्दगी तैस सौफ़म ते सारी जिन्दगी पवित्रेइ ते धार्मिकता ज़ीम। 76 ते हे बच्चां तू नबी भोलो किजोकि तू परमेशरेरे अग्रि-अग्रि चेलतां लोकन तियार केरेलो कि परमेशर एजोनोए। 77 तै अपने लोकन तैन केरे पाप माफ़ केरनेरे ज़िरिये मुक्तेरे बारे मां ज्ञान देलो। 78 ते इश्शे परमेशरेरी दया एरी भोली ज़ेन्चरे दिहाड़ो लौ देते तेन्चरे मसीह स्वर्गारां एज्जेलो। 79 ताके तैन केरे लेइ ज़ैना पापे मां जीतन ते हमेशारे मौतरे खतरे मां रातन लौ दे, ते तै असन बत हिराए ताके अस सुखे सेइं जिन्दगी ज़ीम।” 80 तैन मट्टू यानी यूहन्ना बेडोतो जेव ते आत्माई मां बढ्दतो जेव ते इस्राएलेरे लोकन प्रचार केरने तगर सुनसान ठैरन मां राव।

2 तैन दिहैइन मां रोम मुलखेरे महाराजे औगस्तुसे एलान कियूं कि, दुनियारे सारे मैन्हु केरि गिनती की गाए। 2 ए पेइली मैन्हु केरि गिनती थी, ज़ै सीरिया इलाकेरे गवर्नर क्विरिनियुसेरे वक्ते मां भोइ। 3 ते सारे लोक, मैन्हु केरि गिनतरे लेइ नवं लिखाने अपने-अपने पूर्वजां केरे नगर जो चले जे। 4 यूसुफ़ भी गलील इलाकेरे नगर नासरते मरां यहूदिया इलाके मां दाऊदरे नगर बैतलहम मांजो चलो, किजोकि ते दाऊद राज़ेरे खानदाने मरां थियो। 5 ताके तैड़ी मरियमी सेइं साथी ज़ैस सेइं तैसेरी कुड़माइ भोरी थी ते तै दोज़ींती थी नवं लिखाए। 6 तैन केरे तैड़ी रेइतां तैसारे गल्हे बिशनेरो वक्त अव। 7 ते तैस पेइलू मट्टू भोवं ते तैसां तैन फैल्हड़ी मां पलेटतां खुरली मां रख्खू किजोकि तैन धर्मशाली मां कोन्च ठार न थी मैल्लोरी। 8 किछ पुहाल राती एककी इलबड़े मां गब्बां केरो पैरहो केरते थिये। 9 ते परमेशरेरो स्वर्गदूत तैन कां बांदो भोव ते परमेशरेरी महिमारी लौ तैन केरे ज़ेरे पासन बलने लगी ते तैना बड़े डेरि जे। 10 तैखन स्वर्गदूते तैन जो ज़ोवं, “डरा नन्ना, किजोकि अवं तुसन अक बड़ी खुशखबरी शुनाने ओरोई, ज़ै खुशी सैरी लोकां केरे लेइ भोली। 11 अज़ बैतलहमे मां ज़ैन दाऊद राज़ेरू नगर थियूं, तुश्शे लेइ अक मुक्ति देनेबालो ज़रमोरोए यानी यीशु मसीह प्रभु। 12 तैसेरो तुश्शे लेइ ए निशान भोलो कि तुसन अक मट्टू फैल्हड़ी मां पलैट्रेरू गाल्हरे बेइर खुरली मां मैलेलू।” 13 ते अकदम तैस स्वर्गदूते सेइं होरे भी स्वर्गदूत बांदे भोए ते तैना परमेशरेरी तारीफ़ केरने लगे ते एन ज़ोने लगे, 14 “स्वर्ग मां परमेशरेरी महिमा भोए, ते ज़मीनी पुड़ तैन मैन्न शान्ति मैल्ले, ज़ैन पुड़ परमेशर खुशे।” 15 ज़ैखन स्वर्गदूत पुहालां केरे सामने वापस स्वर्ग मांजो चले जे। पुहाल एप्पू मांमेइं ज़ोने लगे, “एज्जा अस बैतलहम नगरे मां गाम ज़ै

बिस्तार प्रभुए असन दितोरोए तैस हेरम।” 16 एल्हेरेलेइ तैना लूशी तैट्ठां चले जे ते तैडी पुजे ते सच्चे तैडी मरियम, यूसुफ ते निकडो बच्चो फैल्हडी मां पलेटोरो गोरू केरि गाल्हरे बेडर खुरली मां मैल्लो। 17 ते पुहाल एन हेरतां जै गल तैन एस बच्चे बरे मां जोरी थी सेब्भन सेइं ज़ोने लगे। 18 पुहालां केरि गल्लां शुन्तां सारे लोक हैरान रेइजे। 19 पन मरियम सैरी गल्लां अपने दिले मां रेखतां सोचने लगी। 20 ते पुहालन ज़ेन्चरे तैनी स्वर्गदूते ज़ोरू थियू, तैनेई अपनि एछ्छेई तैन सब किछ लेइतां परमेशेरी तारीफ़ केरते वापस घरजो चले जे। 21 अठोवं दिहाड़े ज़ेइस तैसेरो खतनो केरनेरो वक्त अव त तैसेरू नवं यीशु रख्खू। एन तैन नवं आए, ज़ैन स्वर्गदूते मरियमारे दोर्जीतीए भोने करां पेइले रख्खेरू थियू। 22 ज़ैखन मूसरे कानूनरे मुताबिक तैसेरे शुच्चे भोनेरे दिहाड़े पूरे भोए, त यूसुफे ते मरियमा यीशु यरूशलेम नगरे मांजो नीयो ताके तैस प्रभुए कां अर्पण केरन। 23 ज़ेन्चरे प्रभुएरे कानूने मां लिखोरूए, “सारां पेइलां मट्ठां परमेशेरे लेइ पवित्र भोलां।” 24 ज़ेन्चरे प्रभुएरे कानूने मां लिखोरूए कि, “अक जोड़ी गुघू केरि या कबूतरेरे दूई बच्चे बलिदानेरे लेइ आन।” 25 तैस वक्ते यरूशलेम नगरे मां अक मैन्हु थियो, तैसेरू नवं शमौन थियू, तै बड़ो धर्मी ते भक्त मैन्हु थियो, तै मसीह बलगने लोरो थियो, कि तै एज्जेलो ते इस्राएली लोकन शान्ति देलो, ते तैस पुड़ पवित्र आत्मा थियो। 26 पवित्र आत्मा तैस पुड़ बांदू कियू, कि ज़ां तगर तू प्रभुएरे मसीह न लाएलो तांतगर न मरेलो। 27 तैस दिहाड़े शमौन पवित्र आत्मा चलाव, तै आत्मिक शक्ति सेइं मन्दरे मां अव तैखन यीशु भी तैसेरे अम्मा बाजेई अन्तर आनोरो थियो, कि तैसेरेलेइ मूसरे कानूनरे मुताबिक कमाम। 28 त शमौने बच्चो कुम्मे मां टलातो ते परमेशेरी तारीफ़ केरने लगे। 29 “हे प्रभु तीं ज़ै अपनो वादो कियोरोए अपने दासे आनन्दे सेइं मरने दे। 30 किजोकि मीं अपने एछ्छेई सेइं मुक्ति देनेबालो लाव, ज़ै तीं सैरी लोकां केरे लेइ भेजोरोए। 31 ज़ै तीं सैरी कौमां केरे सामने तियार कियोरोए। 32 तै, परमेशर गैर कौमन पुड़ बांदो केरनेरे लेइ लौ आए, ते इस्राएली लोकां केरे लेइ अक बड़ी महिमा भोए।” 33 यीशुएरे अम्मा बाजी शमौनेरी एना गल्लां शुन्तां हक्के-बक्के भोए। 34 तैखन शमौने तैन बरकत दिती, ते तैसेरी अम्मा मरियम सेइं ज़ोवं, “हेरा, इन मट्ठू एल्हेरेलेइ ठहरावरो, कि इस्राएले मां बड़े लोकां केरे लेइ नाश भोनेरी ते मुक्ति मैलनेरी वजा भोए, तै परमेशेरी तरफां अक निशान आए पन बड़े लोक तैसेरे खलाफ भोले। 35 ताके बड़े दिलां केरे खियाल खुल्ली गान ते तीं बड़ो दुःख भोनीए ज़ेन्चरे तलवार कटतीए।” 36 तैडी अक कुआन्श थी ज़ै नबिन थी, तैसारू नवं हन्नाह थियू, अशेरेरे खानदाने मरां अक मैन्हु ज़ेसेरू नवं फनूएल थियू, हन्नाह तैसेरी कुई थी ते बड़ी बुढी थी तै अपने इलाहेरां बाद सत साल अपने मुन्शे सेइं साथी रहोरी थी। 37 तै विधवा थी तैसारी उमर चूरासी साल थी ते मन्दरे मरां न थी गाती ते रात दिहैडी प्रार्थना ते कने बरतां रखती ते परमेशेरी आराधना

केरती रहती थी। 38 तैखन तै भी तैडी एइतां परमेशेरू शुक्र केरने लगी ते बच्चेरे बारे मां तैन सेब्भन सेइं गल्लां लाई केरने, ज़ैना बलगने लोरे थिये कि परमेशेरे यरूशलेम नगरेरे लोकन छुटानेरे लेइ मसीह भेजोए। 39 ज़ैखन मरियम ते यूसुफे मूसरे कानूनरे मुताबिक यीशुएरो खतनो कियो, त तैना गलील इलाके मरां अपने नगर नासरते मांजो जे। 40 तैन मट्ठू बड़ोतू जेवं ते अक्लमन्द भोतू जेवं किजोकि परमेशेरो तैस पुड़ बड़ो अनुग्रह थियो। 41 यीशुएरे अम्मा बाजी हर साल फ़सह तिहारेरी दिहाड़ी बनाने यरूशलेम नगरे मां गाते थिये। 42 ज़ैखन यीशु 12 सालां केरो भोव त तैना रीतरे मुताबिक यरूशलेम नगरे मां जे। 43 ज़ैखन तिहार बीतू त यीशुएरे अम्मा बाजी वापस घरजो आए त यीशु यरूशलेम नगरे मां रेइ जेवं ते तैसेरे अम्मा बाजी कोई पतो न थियो। 44 तैनेई बुझू कि यीशु होरि मैन्नु सेइं साथी अग्रोवं जोरोए, तैना अपने रिशतेदारन ते ज़ान पिशानी बालन मां तोपने लगे। 45 ज़ैखन तैन यीशु न मैल्लो त तैना वापस तोपते-तोपते यरूशलेम नगरे मां पुजे। 46 टलेइयोवं दिहाड़े तैन यीशु मन्दरेरे अंगने मां बुजुर्ग लोकन सेइं गलबाट केरतो ते तैन सेइं सवाल जुवाब केरतो मैल्लो। 47 ज़ैना लोक तैसेरी गल्लां शुन्ने लोरे थिये तैना यीशुएरी गल्लां शुन्तां हैरान रेइजे। 48 ज़ैखन तैसेरे हाज बच्चेई यीशु लाव त तैना हैरान रेइजे ते ज़ोने लगे, “मट्ठां तीं असन सेइं एन कुन कमाव? तेरे हाज बव तीं तोपते-तोपते परेशान भोइ जे।” 49 यीशु तैन सेइं ज़ोवं तुस मीं किजो तोपने लगोरो थिये? “तुसन पतो नई कि मीं अपने बाजेरे घरे मां रानू ज़रूरी थियू?” 50 पन तैन तैना गल्लां केरि समझ न आई कि, एन केरो कुन मतलब आए। 51 तैखन तै अपने अम्मा बाजी सेइं साथी नासरत नगरे मां अव ते अपने अम्मा बाजी कां राव ते मरियमा एना सैरी गल्लां अपने दिले मां रेख्खी। 52 यीशु अक्ली मां भी ते कदे मां भी बेडोतो जेवं ते परमेशेरी ते इन्सानेरी कृपाई मां बद्धतो जेवं।

3 तिबिरियुस महाराजरे हुकुमतेर परनोहूँ साले मां जेइस पुन्तियुस पिलातुस यहूदिया इलाकेरो गवर्नर थियो, ते गलीलेरे इलाके मां हेरोदेस गवर्नर थियो, तैसेरो दूला फिलिप्पुस इतूरैया ते त्रखोनीतिस इलाकां केरो गवर्नर थियो, लिसानियास, अबिलेन इलाकेरो गवर्नर थियो। 2 तैस वक्ते हन्ना ते कैफा महायाजक थिये, तेइस परमेशेरे जकर्याहरे मट्ठे यूहन्ना सेइं गल्लां की। ज़ैन सुनसान ठैरी मां रातू थियू। 3 ते यूहन्ना यरदन दरियारे आसेपासेरे इलाकन मां गेइतां ई प्रचार केरने लगे, कि अपने पापन करां मनफिराथ, ते बपतिस्मो नेथ ताके परमेशर तुश्शे पाप माफ़ केरे। 4 ज़ेन्चरे यशायाह नेबेरी किताबी मां लिखोरूए, “सुनसान ठैरी मां फुकारने बालेरी आवाज़ एइचे कि, ‘प्रभुएरी बत बनाथ ते तैसेरी बत्तां पैठ्ठी केरा।’” 5 “डुग्घी ठारां सैरी भेरोई गैनिन, हर अक पहाड़ ते च़ौदू बछोइनीए ते ज़ैना टलेडी बत्तन तैना सिधी केरनिन ज़ैना उन्डी उबरिन तैना पैठ्ठी केरनिन। 6 ते सब लोक तैस हेरेले, ज़ै परमेशेरे तैन मुक्ति देने

भेजोरोए।” 7 ते यूहन्ना तैन लोकन सेइं ज़ोवं, ज़ैना जथन मां तैस करां बपतिस्मो नेने ओरे थिये, “तुस ज़ेहरीले सप्पेरे ज़ेरे बुरे आथ! तुसन केनि ज़ोवं कि, एजनेबाले परमेशेरे कोपे करां नश्शा? 8 बरसा, सज़ाई करां बचनेरे लेइ तैना कम्मां केरा, ज़ैन सेइं पतो लगगे तुसेईं सच्चे पापन करां मन फिरावरोए। ते अपने-अपने मने मां एन न ज़ोथ कि, अब्राहम ज़ेन्चरे इश्शो बाजीए, किजोकि अवं तुसन सेइं ज़ोताई कि परमेशर इन घोड़न मरां अब्राहमेरे लेइ औलाद पैदा केरि सकते। 9 ते हुन्ना त बुट्टां केरे ज़ीलन पुड़ परमेशेरे मैक्कु रख्खोरोए, एल्हेरेलेइ ज़ै कोई तैस बुट्टेरो ज़ेरो भोते, ज़ै रोडो फल न दे, तै कटनोए ते अग्गी मां छड़नोए।” 10 लोकेई तैस पुच्छू, “फिरी असां परमेशेरी सज़ाई करां केन्चरे बचम?” 11 यूहन्ना तैन सेइं ज़ोवं, “ज़ैस कां दूई कुरतेन त अक कुरतो तैस देथ ज़ैस कां अक भी नई ते ज़ैस कां रोटी आए त तै भी रोटी बंटे ज़ैन कां नई।” 12 ते धड़त नेनेबाले भी बपतिस्मो नेने ओरे थिये तैनेई तैस पुच्छू, “हे गुरु जी असां कुन केरम?” 13 तैनी तैन सेइं ज़ोवं, “ज़ैन तुशे लेइ सरकारी कानूनेरे हिसाबे सेइं रक्खोरोए तैस करां जादे धड़त न नेइयथ।” 14 ते तैखन होरि सिपाहीएई भी तैस पुच्छू, “असां कुन केरम?” यूहन्ना तैन सेइं ज़ोवं, “केन्ची पुड़ जुलम केरतां बेहक न नेइयथ, ते न केन्ची पुड़ झूरो दोष लेइयथ, पन अपनि तनखुवाही पुड़ गुजारे केरथ।” 15 तैखन लोक इंतज़ारे मां थिये कि, मसीह जल्दी एजोनोए, ते सब लोक अपने दिले मां यूहन्नारे बारे मां सोचते थिये कि ज़ै ओरोए ते मसीह आए या नई? 16 त यूहन्ना तैन जुवाबे मां तैन सेइं ज़ोवं, “अवं त तुसन पैनी सेइं बपतिस्मो देताई पन ज़ै मीं करां महाने तै एजनेबालो आए। अवं तैसेरो गुलाम बेनतां तैसेरी जुदी केरे तसमे भी खोलनेरे काबल नई। तै तुसन पवित्र आत्माई ते अग्गी सेइं बपतिस्मो देलो। 17 तैसेरु छज्ज तैसेरे हथ्ये मां आए ते तै खलाइ रोडेचारे साफ केरेलो, ते गेहुं अपने कोठारे मां रखेलो पन झाझी तैस अग्गी मां फुकेलो ज़ै कधी हिशनेरी न भोली।” 18 बरसा तै बड़े रोडेचारे लोकन समझेइतां परमेशेरी खुशखबरी शुनातो राव। 19 हेरोदेस ज़ेवरोवं मुलखे पुड़ राज़ केरतो थियो। यूहन्ना तै झिड़कावरो थियो, कि हेरोदेस अपने दूला फिलिप्पुसेरी कुआन्श हेरोदियास ज़ै थी तैस सेइं इला कियोरो थियो, ते होरां भी बड़ां बुरां कम्मां कियोरां थियां। 20 हेरोदेस एन सेबनन करां जादे बुरु कम कियू कि यूहन्ना कैद केरतां छड़ो। 21 ज़ैखन सब लोक बपतिस्मो नेने लोरे थिये त यीशुए भी बपतिस्मो नीयो, ते ज़ैखन तै प्रार्थना लोरो थियो केरने, त एरू भोवं कि स्वर्ग खुल्ली जेवं। 22 ते पवित्र आत्मा कबूतरेरी शकली मां यीशु पुड़ उत्रो ते अम्बरे मरां ई आवाज़ अई, “तू मेरु टलारू मट्टू आस, अवं तीं पुड़ बड़ो खुश आई।” 23 ज़ैखन यीशुए अपने सेवारू कम शुरु कियू त तैसेरी उमर 30 साल थी (ज़ेन्चरे समझू गातू थियू) एन यूसुफेरू मट्टूए, ते तैन एलेरू 24 एली मत्तातेरू ते तैन लेवेरू ते तैन मलकेरो ते तैन यन्नेएरो ते तैन यूसुफेरू मट्टू थियू,

25 ते तैन मत्तित्याहेरू ते तैन आमोसेरो ते तैन नहूमेरू ते तैन असल्य्याहेरू ते तैन नग्गीएरू मट्टू थियू। 26 ते तैन मत्तातेरो ते तै मत्तित्याहेरू ते तैन शिमीएरू ते तैन योसेखेरू ते तैन योदाहेरू मट्टू थियू। 27 ते तैन यूहन्नारू ते तैन रेसारू ते तै जरूबाबेलेरू ते तैन शालतियेलेरू ते तैन नेरेरू मट्टू थियू। 28 ते तैन मलकीएरू ते तैन अदीयेरू ते तैन कोसामेरू ते तैन एल्मदामेरू ते तैन एरेरू मट्टू थियू। 29 ते तैन येशूएरू ते तैन एलीएजेरेरू ते तैन योरीमेरू ते तैन मत्तातेरू ते तैन लेवेरू मट्टू थियू। 30 ते तैन शमौनेरू ते तैन यहूदेरू ते तैन यूसुफेरू ते तैन योननेरू ते तैन एलयाकीमेरू मट्टू थियू। 31 ते तैन मलेआहेरू ते तैन मिन्नाहेरो ते तैन मत्तातेरो ते तैन नातानेरो ते तैन दाऊदेरू मट्टू थियू। 32 ते तैन यिशोएरो ते तैन ओबेदेरो ते तैन बोआजेरो ते तैन सलमोनेरो ते तैन नहशोनेरू मट्टू थियू। 33 ते तैन अम्मीनादाबेरू ते तैन अरनेरू ते तै हेसोनेरू ते तैन पेरेसेरू ते तैन यहूदेरू मट्टू थियू। 34 ते तैन याकूबेरू ते तैन इसहाकेरो ते तैन अब्राहमेरू ते तैन तेरहेरो ते तैन नाहोरेरू मट्टू थियू। 35 ते तैन सरूगेरो ते तैन रऊएरो ते तैन पेलेगेरो ते तैन एबेरेरू ते तैन शिलहेरू मट्टू थियू। 36 ते तैन केनानेरू ते तैन अरफक्षदेरो ते तैन शेमेरो ते तैन नूहेरो ते तैन लेमेकेरू मट्टू थियू। 37 ते तैन मथूशिलहेरू ते तैन हनोकेरो ते तैन यिरिदेरू ते तैन महललेलेरू ते तैन केनानेरू मट्टू थियू। 38 ते तैन एनोशेरू ते तैन शेतेरू ते तैन आदमेरो ते तैन परमेशेरू मट्टू थियू।

4 फिरी यीशु पवित्र आत्मा सेइं भरपूर भोइतां यरदन दरियाए मरां वापस अव त 40 दिहाड़े पवित्र आत्मा रे चलाने सेइं सुनसान ठेरी जो चलो जेव। 2 तैन 40 दिहाड़न मां शैतान तैस अज़मातो राव, तैन दिहेड़न मां तैनी किछ न खाव पीवं ते ज़ैखन तैना दिहाड़े पूरे भोए त तैस ढलुख लगगी। 3 शैताने तैस जो ज़ोवं, “अगर तू परमेशेरू मट्टू आस त इन घोड़न जो ज़ो कि एना रोटी बनन।” 4 यीशु तैस जुवाब दित्तो, “पवित्रशास्त्रे मां लिखोरूए, ‘मैन्हु सिर्फ रोड़ेइं सेइं जीतो न राए।’” 5 फिरी शैताने यीशु एककी उच्चे पहाड़े पुड़ धिन्तां जेव ते तैट्ठां एककी पले मां तैस तैड़ी दुनियां सारां राज़ां हिरां। 6 ते तैनी यीशु सेइं ज़ोवं, “एन सब किछ मेरे अधिकारे मां आए, ते एसेरी सारी धन दौलत अवं तीं देलो एन मेरे स्पुई। अवं ज़ैस चाताई तैस देइ सकताई। 7 बस अगर तू मीं कां मथ्यो टेकस त एन सब किछ तेरू भोलू।” 8 यीशुए तैस जुवाब दित्तो, “पवित्रशास्त्र मां लिखोरूए, ‘तू सिर्फ अपने प्रभु परमेशेरे कां मथ्यो टेकतां ते सिर्फ तैसेरी भक्ति केरां।’” 9 ते तैनी यीशु यरूशलेम नगरेरे मन्देरी उच्चि छम्पी पुड़ नेइतां खड़ो कियो ते तैस सेइं ज़ोवं, “अगर तू परमेशेरू मट्टू आस त अपनो आप इट्ठां उन्दो बछोइ। 10 किजोकि पवित्रशास्त्रे मां लिखोरूए, ‘तै तेरे लेइ अपने स्वर्गदूतन ज़ोलो ते तैना तेरी हफाज़त केरेले।’ 11 ते ‘तैना तीं अपने हथ्यन पुड़ छूले ताके एरू न भोए कि तेरे पावन घोड़न सेइं ठोकर लगगे।’” 12 यीशु तैस जुवाब दित्तो, “पवित्रशास्त्रे मां इन भी लिखोरूए तू अपने प्रभु परमेशेरी अज़मैइश न केरां।” 13 ज़ैखन शैताने तैसेरी बड़े

तरीकेई अजमैइश की, त किछ चिरेरां बाद तैस करां चलो जेव। 14 फिरी यीशु पवित्र आत्माारी शक्ति सेई भरपूर भोइतां गलील इलाके मां वापस अव, ते सारे इलाके मां तैसेरी मुशूरी भोइजेइ। 15 यीशु तैन केरे प्रार्थना घरन मां शिक्षा देतो राव, ते सब लोक तैसेरी तारीफ़ केरते थिये। 16 फिरी तै नासरत नगर मां वापस अव ज़ैडी ते पलोरो थियो। अपने रीतरे मुताबिक आरामेरे दिहाड़े ते प्रार्थना घरे मां जेव ते वचन पढ़नेरे लेइ खड़ी भोव। 17 ते तैस यशायाह नेबेरी किताब दिती ते तैनी खोलतां तैन वचन कढ़ ज़ैडी लिखेरू थियूं, कि, 18 “प्रभुएरी आत्मा मीं पुड़े, एल्हेरेलेइ कि तैनी गरीबन खुशखबरी शुनामेरे लेइ मेरू अभिषेक कियोरूए, तैनी अवं भेजोरोई कि कैदन हथरां छेड़ी (जैना शैतानेरे कब्जे मां आन) ते कांना केरि एछछन ठीक भोनेरी खबर शुनेई, ते जैन पुड़ जुलम भोते तैन लोकन आज़ाद केरि। 19 ते तैस वक्तेरू एलान केरि जेइस परमेशर लोकन पुड़ दया केरेलो।” 20 फिरी तैनी ते किताब बंद केरतां सेवके कां वापस देइतां बिशशी जेव। जेते प्रार्थना घरे मां थिये सब तैसेरां तकते थिये। 21 ते तै तैन सेइ ज़ोने लगे, “अज पवित्रशास्त्रे तैन वचन तुशे सामने पूरू भोव।” 22 ते सब तैसेरी तारीफ़ केरने लगे, ते तैसेरी गल्लन पुड़ बड़ी अनुग्रह थियो, जैना गल्लां तैसेरे ऐशेरां निसती थी, ते लोक हैरान भोइतां ज़ोने लगे, “कुन एन यूसुफेरू मट्टू नई?” 23 यीशु तैन सेइ ज़ोने लगे, “ए कहावत तुस मीं पुड़ ज़ुरू ज़ोले, ‘कि हे बेईद जी अपनो आप त ठीक केर, जैन किछ असेई कफरनहूम नगर मां केरतू शुनेरूए, तैन इड़ी अपने नगरे मां भी केर।” 24 ते तैनी इन भी ज़ोव, “अवं तुसन सेइ सत्र ज़ोताई, कि कोई नबी अपने मुलखे मां कबूल न कियो गाए। 25 अवं तुसन सेइ सत्र ज़ोताई कि एलिय्याह नेबेरे वक्ते मां ज़ैखन साड़े टलाई साल अम्बर बंद भोव (यानी झड़ी न भोइ) ते इड़ी तगर कि सैरी मुलखे मां बड़ी काल पेई जेव ते तैस वक्ते बेड़ि विधवा कुआन्शां इस्राएले मुलखे मां थी। 26 पन एलिय्याह नबी, तैन मरां केन्ची कां नई पन सैदा नगरेरे नेड़े सारफत नगर मां एक्की विधवा कां भेजो, जै यहूदी न थी। 27 ते एलीशा नेबेरे ज़माने मां इस्राएलेरे मुलखे मां बड़े कोड़ी थिये पन तैन मरां कोई भी कोढ़े करां साफ न थियो भोरो, पन सिर्फ अक सीरियारो रानेबालो नामान कोढ़े करां साफ भोरो थियो, जै गैर काँमी मरां थियो।” 28 जेते लोक प्रार्थना घरे मां थिये एना गल्लां शुन्तां सरकी सेइ लाल-लाल भोइ जे। 29 ते खड़े उट्टां तैस नगर करां बेइर निस्से ते ते तैस पहाड़ेरी चोटी पुड़ घिन्तां जे जैस पुड़ तैन केरू नगर आबाद थियूं ताके तैस तैङ्ग उन्हे बछोइतां मारन। 30 पन यीशु तैन मरां निस्तां चलो जेव। 31 फिरी तै गलील इलाकेरे कफरनहूम नगरे मांजो जेव। ते आरामेरे दिहाड़े तैन शिक्षा देने लगगोरो थियो। 32 ते लोक तैसेरी शिक्षा शुन्तां हैरान रहते थिये किजोकि तैसेरी शिक्षा बड़े अधिकारे सेइ थी। 33 प्रार्थना घरे मां अक मैन्हु थियो, जैस पुड़ भूतेरो सायो थियो। ते बड़े जोरे सेइ चिन्दां मारने लगे। 34 “हे नासरत नगरेरे यीशु! असन तीं सेइ कुन कम? कुन तू

असन नाश केरनेरे लेइ ओरोस? अवं ज्ञानताई कि तू कौन आस, तू परमेशेरू पवित्र मट्टू आस!” 35 यीशुए तैस झिडक देइतां ज़ोव, “चुप रा, एस मैन्हु मरां निस्सी गा!” तैखन भूते ते मैन्हु ज़मीनी पुड़ शैरी दितो, ते तैस मरां निस्सी जेव। 36 एन हेरतां सारे लोक बड़े हैरान भोए ते एप्पू मांमेइ ज़ोने लगे, “ए कुन गल आए! ते अधिकारे ते शक्ति सेइ भूतन हुक्म देते ते तैना तैस मरां निस्सी गातन।” 37 ते सारे मुलखेरे मां जेते पासन तैसेरी खबर फैली जेई। 38 फिरी तै प्रार्थना घरे मरां उट्टां शमौनेरे घरे जेव ते शमौनेरी शिखी बड़ी भुखार थियो, ते लोकेई तैसारे बारे मां यीशु सेइ ज़ोव। 39 ते खड़ी भोइतां तैसारे पासे फिरी ते बिमारी झिडकी, ते तैसारे सारो भुखार उतरी जेव ते ते खड़ी भोइ, ते तैन केरि सेवा केरने लगी। 40 ज़ैखन दिहाड़ी लाई डुबने त लोकेई तैना सब लोक जैन मां किसमां-किसमां केरि बिमैरी थी तैस कां आने, ते यीशुए तैन पुड़ हथ रेखतां तैना सब बड़झाए। 41 भूतां भी चिन्दां मारतां थियां, ते ज़ोतां थियां, “तू परमेशेरू मट्टूस!” ते बड़े लोकन मरां भूतां केरो सैयो निस्सी जेव, ते ते तैन झिडकतो थियो, ते तैन गल भी न थियो देतो केरने, किजोकि तैना भूतां ज्ञानतां थियां कि ए मसीह आए। 42 ज़ैखन झेझ भोइ त यीशु उट्टां बेइर एक्की सुनसान ठैरी मां जेव, ते पतोरां सारे लोक तैस तोपते-तोपते तैस कां पुज़े ते रोकने लगे कि तू असन करां न गा। 43 पन यीशुए तैन सेइ ज़ोव, “मीं होरि नगरन मां भी परमेशेरे राज़ेरी खुशखबरी शुनानी ज़रूरीए किजोकि अवं एल्हेरेलेइ भेजोरोई।” 44 ते ते यहूदिया इलाकेरे प्रार्थना घरन मां प्रचार केरतो राव।

5 एक्की दिहाड़े यीशु गन्नेसरतेरे समुन्देरे बन्ने पुड़ खेड़ोरो थियो, ते बड़े लोक तैस कां करां परमेशेरू वचन शुन्नेरे लेइ ते उन्हे बिछड़ी गाते थिये। 2 तैनी दूई किशती बन्ने लेगोरी लेई, ते मेछली ट्लानेबाले किशती इलेखी छेइतां अपना ज़ालां धोने लगगोरो थिये। 3 यीशु एक्की किशती मां चढ़ो ते किशतेरे मालिके शमौने सेइ ज़ोने लगे, तुस किशती इट्ठां बन्ने पुड़ेरां नेइतां थोड़ी दूर लाथ। फिरी यीशु किशती मां बिश्तां तैन लोकन उपदेश देने लगे। 4 ज़ैखन तैनी लोकन शिक्षा दिती त तै शमौने सेइ ज़ोने लगे, “तुस किशती डुग्घी ठैरी चलाथ ते मेछली ट्लानेरे लेइ ज़ाल छडा।” 5 शमौने जुवाब दितो, “हे गुरु, असेई सैरी राती तरले कियोरेन ते अक मेछली भी नई ट्लेइयोरी, पन असां तेरे ज़ोने सेइ ज़ाल छडतम।” 6 आखकार पतरस ते तैसेरे सैथेई ज़ालां छैडी दितां ते एत्री मेछली लेगि, कि ज़ालां छिन्दोइतां मेछली बेइरोवं निस्सने लेगि। 7 तैखन तैनेई अपने सैथन जो जैना होरि किशती पुड़ थिए, इशारो कियो कि एज्जा इश्शी मदत केरा, ते तैना भी आए ते किशती मेछलेई सेइ एत्री भेरोई जेई कि किशती डुबने लगी। 8 शमौन पतरस एन हेरतां यीशुएरे पावन पुड़ पेइतां ज़ोने लगे, “हे प्रभु, अवं पापी मैन्हु आई तू मीं करां दूर भो!” 9 गल ए थी कि ते त तैसेरे साथी एत्री मेछली लेइतां हैरान भोइ जोरे थिये। 10 तेरहो हाल जेबेरे मट्ठां केरो

यानी याकूब त कने यूहन्नारो भी थियो, जैना शमौने सेइं साथी थिये, यीशुए शमौने सेइं ज़ोवं, “डर नन्ना अज़्जेरे बाद तू मेछली टलाने बालो नई, बल्के मैन् न अकोट्टे केरतां मेरे चले बनानेबालो भोलो।” 11 तैनेई किशती इलेखी एन्तां लेई, ते अपनू सब किछ छेडतां यीशु पत्ती चले जे। 12 जैखन यीशु एक्की नगर मां थियो, ते एरू भोवं कि तैड़ी अक मैन्हु थियो, जेसेरे सैरी जानी कोढ़ थियूं, तैनी यीशु लाव, ते तै ज़ैन्हु केरे भारे बिश्तां तैस कां मिन्नत केरतां ज़ोने लगे, “हे प्रभु तू चास त मेरू कोढ़ बज़्जोई सकतस।” 13 यीशुए अपनो हथ तैस पुड़ रख्खो ते ज़ोवं, “अवं चाताई, तू बज़्जोस।” ते तैखने तैसेरू कोढ़ साफ भोइ जेवं। 14 तैखन यीशुए तैस मैन्हु हुक्म दित्तो, “हेर, एसेरे बारे मां केन्ची सेइं किछ न ज़ोइयां। बल्के अपनो आपे याजके हिरा। तैल्ला पत्ती, तू अपने बेज़्जोमेरे वजाई सेइं चढ़तल च़ाढ़, जेसेरे बारे मां मूसा नेबे कानूने मां हुक्म दित्तोरोए। ताके लोकन पतो चले कि तू बेज़्जोरोस।” 15 पन यीशुएरे बारे मां सेबन्धन पतो लगे ते लोक दूरां देंते एजने लगे ताके यीशुएरी गल्लां शुन्न कने अपनि बिमेरन करां बेज़्जोन। 16 पन यीशु जादे केरतां सुनसान ठेरी च़लो गातो थियो, ते प्रार्थना केरतो रातो थियो। 17 एक्की दिहैड़ी एरू भोवं कि यीशु शिक्षा देने लगगोरो थियो, ते तैखन किछ फरीसी ते शास्त्री लोक ज़ोते थिये, तैना गलील इलाके ते यहूदियारे सैरी इलाकन मरां यरूशलेम नगरे मां ओरे थिये; ते परमेशेरी शक्ति यीशु सेइं साथी थी, ते बिमार बेज़्जोइतां गाते थिये। 18 किछ मैनेई अक अधरंगी मैन्हु खट्टी पुड़ छुइतां आनोरोए थियो, ते तैना कोशिश लगे केरने कि एस अन्तर नेइतां यीशु कां पुज़ाम। 19 पन अन्तर एन्नी तंगी थी कि तैना अन्तर न गेइ सके फिरी तैनेई तैस घरेरी छत पुट्टी ज़ैस घरे मां यीशु थियो, ते खट्टां सने ते अधरंगी मैन्हु अन्तर यीशुएरे तुतरे अगर ओसालो। 20 यीशु तैन केरो विश्वास हेरतां ज़ोवं, “हे दोस्त तेरे पाप माफ़ भोए।” 21 शास्त्री ते फरीसी लोक सोचने लगे, “ए कौन मैन्हु आए, ज़े परमेशेरी तुहीन केरते, परमेशेरे अलावा कौन पाप माफ़ केरि सकते?” 22 यीशुए तैन केरि गल्लां बुझी ते तैन जुवाब दित्तो, “तुस अपने-अपने मने मां एन्चरां किजो सोचने लगगेरेथ? 23 कुन ज़ोनू सुखतुए, ‘तेरे पाप माफ़ भोए,’ या एन ज़ोनू ‘उठ, ते च़ल फिर?’ 24 पन तुसन पतो लगगे, मैनेरे मट्टे ज़मीनी पुड़ पाप माफ़ केरनेरो अधिकारे,” फिरी यीशुए तैस बिमारे जो ज़ोवं, “अपनि खट सल्ल ते घरजो च़लो गा।” 25 ते अधरंगी बिमार मैन्हु सेबन्धी केरे सामने ते खड़े उठो ते ज़ैस खट्टी पुड़ ते झुलतो थियो, अपने दोगे पुड़ छुइतां परमेशेरी बड़याई केरतो-केरतो घरजो च़लो जेवं। 26 तैना सारे लोक हैरान राए ते परमेशेरी तारीफ़ केरने लगे ते कने ज़ोने लगे, “ए त असेई अज़ नक्वीं गल लाई।” 27 एना गल्लां बीतनेरां बाद यीशु तैट्टां निस्सो, ते एक्की चुंगी धिन्ने बाले कां च़ले जेवं, तैसेरू नवं लेवी थियूं। ते ते चुंगी नेनेबाले दफ़्तरें मां बिश्शोरो लाव, ते यीशुए तैस जो ज़ोवं, “तू मी पत्ती च़ल ते मेरो चेलो बना।” 28 ते तैखने

यीशु पत्ती च़लो जेवं। 29 ते फिरी लेवी यीशुएरे लेइ अपने घरे अक बड़ी धाम दित्ती। ते तैड़ी चुंगी नेनेबाले ते होरे भी बड़े लोक थिये ज़ैना तैस सेइं साथी रोटी खाने बिश्शे। 30 फरीसी लोक ते शास्त्री यीशुएरे चेलन सेइं ज़ोने लगगे, “तुस चुंगी नेनेबालन ते पापी लोकन सेइं साथी किजो खातथ पीतथ?” 31 यीशुए तैन सेइं ज़ोवं, “बिमारन डाक्टरेरी ज़रूरत भोचे, न कि सझार लोकन। 32 अवं धर्मी लोकन नई, पन पापी लोकन कुजाने ओरोई कि, तैना अपने पापन करां मन फिरान।” 33 तैना लोक यीशु सेइं ज़ोने लगे, “यूहन्नारे चले त बरत रखतन ते प्रार्थना भी केरतन ते एन्चरे फरीसी लोक भी केरतन, पन तेरे चले त खातन पीतन?” 34 यीशुए तैनन् जुवाब दित्तो, “इलाएरे दिहाड़े, कुन लाड़ो साथी भोंते सांते जन बरत रेखी सकतथ? 35 पन तैना दिहाड़े एज्जले, ज़ैखन लाड़ो तेन केरां अलग कियो गालो (यानी मारो गालो)। तैन दिहैड़न मां तैना (अपने दुखखेरे वजाई सेइं) बरत रखखेले।” 36 फिरी यीशु तैन अक होरि मसाल दित्ती, “पुराने लिगड़े पुड़ नव्वे लिगड़ेरी टलोई कोई न लाए, नता तै टलोई तैस मरां होरू भी छिंदेली, ते कने पुराने सेइं तै मिले भी नन्ना। 37 नव्वो दाछारो रस पुरैनी मसकी मां कोई न छुड्डे, नन्ना त नव्वे दाछारो रस सेइं मसक भी फैट्टी गाचे, ते दाछारो रस भी डुल्ली गाते, ते तै मसक भी बरबाद भोचे। 38 किजोकि नव्वो दाछारो रस नक्वीं मसकन मां भररो लोइते। 39 कोई मैन्हु पुरानो दाछारो रस पीतां नक्वीं न पीनो चाए, किजोकि तै ज़ोते कि पुरानो दाछारो रस जादे रोड़ोए।”

6 एक्की फेरे यीशु त तैसेरे चले आरामेरे दिहाड़े ऊडारन मामेइं एक्की बतां च़लोरे थिये, ते तैसेरे चले शिल्लां हथेइं सेइं प्रोइतां खाने लगगे। 2 एन लेइतां किछ फरीसी लोकेई तैन सेइं ज़ोवं, “तुस एन कम किजो लोरेथ केरने, ज़ैन आरामेरे दिहाड़े केरनू जेइज़ नई?” 3 यीशुए तैन जुवाब दित्तो, “कुन तुसेईं पवित्रशास्त्रे मां कथे नई पढ़ेरू कि ज़ेइस इश्शो पूर्वज दाऊद राज़ो त तैसेरे साथी ढ़लुखोरे थिये त तैनेई कुन कियेरू थियूं? 4 तैनेई केन्चरे परमेशेरे घरे मां गेइतां च़ैद्वोरी रोटी खोरी थी, ते अपने सैथन भी दित्तोरी थी। तैना रोटी खैनी सिर्फ़ याजकां केरे लेइ जेइज़ थी।” 5 फिरी तैने तैन सेइं ज़ोवं, “मैनेरू मट्टू, यानी अवं आरामेरे दिहाड़ोरी भी प्रभु आई।” 6 एक्की बार यीशु प्रार्थना घरे मां गेइतां उपदेश शुनेई राहोरो थियो, ते तेइस भी आरामेरी दिहाड़ी थी तैड़ी अक मैन्हु थियो, जेसेरो देइनो हथ शुक्कोरो थियो। 7 शास्त्री त फरीसी लोक यीशुएरी ताके मां थिये कि अगर यीशु आरामेरे दिहाड़े केन्ची बझालो त असन इलज़ाम लानेरो मौको मैलनोए। 8 पन यीशु तैन केरे बारे मां सेमझी जेवं, यीशुए तैस शुक्कोरे हथेबाले मैन्हु सेइं ज़ोवं, “मझाटे खड़े भो।” ते खड़ी भोव। 9 तैखन यीशु तैन सेइं ज़ोवं, “अवं तुसन पुछतां कि आरामेरे दिहाड़े भलाई केरनि रोड़ीए या बुराई केरनि रोड़ीए, मैनेरी जान बचानी या मारनी?” 10 ते तैनी च़ेरे पासना तेन केरां तक्कू ते तैस मैन्हु जो ज़ोवं, “अपनो हथ हिरा।” तैनी

मैंने अपनी हथ अग्रों कियो। त अकदम तैसेरो हथ बेज्झोव। 11 पन याजकन त फरीसन बड़ी सरक अई तैना एप्पू मांमेइ बेंस करने लगगे, कि असां यीशुए सेइं कुन केरम? 12 तेइस एरू भोवं कि यीशु प्रार्थना केरनेरे लेइ एक्की पहाड़े पुड़ चढो, ते सैरी राती परमेशरे कां प्रार्थना केरतो राव। 13 जैखन टूलेकड़ोने लगू त तैनी अपने चले एप्पू कां कुजाए ते तैन मरां 12 प्रेरित चुने। 14 अक शमीन जैस जो पतरस भी ज़ोते थिये तैसेरो दूला अन्द्रियास, याकूब, यूहन्ना, फिलिप्पुस, बरतुलमै, 15 मत्ती, थोमा, हलफईरू मट्टू याकूब, ते शमीन जैस जो जेलोतेस ज़ोतन। 16 ते याकूबेरू मट्टू यूहूदा ते यूहूदा इस्करियोती जै तैसेरो दलुवाने बालो बनो। 17 तैखन यीशु तैन सेइं साथी चौरस ठैरी मां खड़ो भोव, ते तैसेरे चले भी तेड़ी अकोट्टे भोए ते सारे यूहूदिया ते यरूशलेम नगरन त कने सूरे ते सैदारे आसेपासेरे लोक समुन्दरे बन्नेरे बड़े लोक जैना तेड़ी थिये। 18 एन लोक यीशु करां ज्ञान शुन्ने ते अपनि-अपनि बिमैरी तैस कां बड़ाने ओरे थिये, ते जैन लोकन पुड़ भूतां केरे सैये सेइं दुखे मां थिये तैना भी बेज्झोइ जे। 19 सब लोक तैस सेइं हथ लानेरी कोशिश केरते थिये किजोकि तैस मां शक्ति थी जैस सेइं तैना बेज्झोते थिये। 20 तैखन यीशु अपने चेलां केरे तकने लगगे ते ज़ोने लगगे, “परमेशर तुसन बरकत देलो जैना नमरथ, किजोकि स्वर्गेरू राज़ तुशू आए। 21 परमेशर तुसन बरकत देलो जैना दलुखोरेथ, किजोकि तुस रज़नेथ, परमेशर तुसन बरकत देलो जैना अज़ लेरां देतथ, किजोकि तुसेईं हसनुए।” 22 “परमेशर तुसन बरकत देलो, जैखन मैनेरे मट्टे, यानी मेरे चेलो भोनेरे वाजाई सेइं लोक तुशू तीहीन केरन, ते तुसन भाईघारे करां कनारे छड़ेले, ते तुसन बेइज़त केरेले, ते तुशू नवं केटी छड़ेले।” 23 “तैस दिहाड़े खुशी भोइतां उछड़थ, किजोकि हेरा तुशे लेइ स्वर्ग मां बड़ इनामे। तैन केरे दादे-पड़दादे नेबन सेइं भी एरो ज़ेरो बर्ताव केरते थिये।” 24 “पन अफ़सोस! तुसन पुड़ जैना दौलतमन्दथ, किजोकि तुसन सब किछ मैलेरू। 25 अफ़सोस! तुसन पुड़, जैन तुस चाते थिये, तुसन तैन मैल्लू, किजोकि तुस नियन्ने भोले, अफ़सोस! तुसन पुड़ जैना अज़ हसतथ किजोकि तुस शोग केरेले ते लेरां देले। 26 पन अफ़सोस! तुसन पुड़ जैखन लोक तुसन जो भलू ज़ोन, किजोकि तुशे दादे-पड़दादेई भी झूठे नेबन सेइं एरो बर्ताव कियोरो थियो।” 27 “अवं तुसन शुन्नेबालन सेइं ज़ोताई कि अपने दुश्मन सेइं प्यार केरा। जैना तुसन सेइं बैर रखतन तैन केरू भलू केरा। 28 जैना तुसन जो बरू ज़ोतन तुस तैन केरे लेइ बरकत मग्गा, जैन तुसन बेइज़त केरन तुस तैन केरे लेइ प्रार्थना केरा। 29 अगर कोई तुशे एक्की खैखोड़ी पुड़ थप्पड़ बाहे त होरो पासो भी तैसेरे पासे रखा, ते अगर कोई तुशू कोट नेते त कमीज़ भी तैस देथ। 30 जै कोई तीं करां किछ मग्गे त तैस देथ अगर कोई तेरो सबाब नेते ते तैस करां वापस न मग्गा। 31 ते जेन्चरे तुस चातथ कि लोक तुसन सेइं केरन तेन्चरे तुस भी तैन सेइं तेरहु केरा। 32 अगर तुस तैन्ने सेइं प्यार केरथ जैना

तुसन सेइं प्यार केरतन त तुशू कुन एवसाने? किजोकि पापी लोक भी अपने प्यार केरनेबालन सेइं प्यार केरतन। 33 अगर तुस तैन केरू भलू केरतथ जैना तुशू भलू केरतन त तुशू कुन एवसाने? किजोकि पापी लोक भी अपने प्यार केरनेबालन सेइं प्यार केरतन। 34 अगर तुस तैन्ने ओधार देतथ जैन करां तुसन वापस भी मैलनेरी उमीदे, त परमेशर तुशू बड़याई किजो केरे? किजोकि बुरे लोक भी अपने प्यार केरनेबालन पेइसे देतन ताके तैन करां वापस मैलन। 35 पन तुस अपने दुश्मन सेइं प्यार केरा ते तैन केरू भलू केरा, ओधार देइयथ पन तैन करां वापस मैलनेरी उमीद न रेखथ, एल्हेरो स्वर्ग मां तुशे लेइ अक बड़ो फले, किजोकि तुस परमप्रधान परमेशरे बच्चे भोले, किजोकि ते परमेशर न मन्ने बालन पुड़ ते ज़ालमन पुड़ भी दया केरते। 36 जेरो दया दिल तुशो बाजी तेरहे दया दिल तुस भी भोथा।” 37 “दोष न लाथ, तुसन पुड़ भी दोष न लव गालो, निन्दा न केरा, तुशू भी निन्दा न की गाली, तुस होरन माफ़ केरेले त तुसन भी माफ़ कियू गालू। 38 तुस होरि किछ देले त तुसन भी किछ दिनु गालू तुशू बरकतरू भांड जेन्चरे अन्नेरी हाटी हिलेइतां देतां तैन भी तेन्चरे जैस हैटी सेइं तुस होरि केरे लेइ मिनतथ तेस्से सेइं तुशे लेइ भी मिनेले।” 39 यीशुए तैन अक मिसाल शुनाई, “कुन कानो होरि काने बत हेरेई सकते? तैना त दुइये गढे मां बिछड़ेले? 40 चेलो अपने गुरू करां बड़ो न भोए पन हर एक्की गल्ली मां जैखन सब शिखेलो त अपने गुरो ज़ेरो भोलो। 41 तू अपने दूलाएरी एछड़ी मां कूड़ो किजो तकतस, पन तेरी एछड़ी मां त नग आए, ते तैसेरो तू खियाल भी न केरस? 42 तू अपने दूलाए केन्चरे ज़ोई सकतस कि, ‘तेरी एछड़ी मरां कूड़ो केडी?’ हे पाखंडी पेइले अपनि एछड़ी मरां नग कढ फिरी अपने दूलाएरी एछड़ी मरां कूड़ो केडी सकतस।” 43 “किजोकि केन्ची भी रोड़े बुटे बुरो फल न लगगे ते न केन्ची बुरे बुटे रोड़ो फल लगगे। 44 हर बुट अपने फले सेइं पिशेनोते। किजोकि न झलन सेइं फैगू लगन ते न झल्लन सेइं दाछ लगगे। 45 रोड़ो मैन्हु अपने दिलेरे रोड़े खज़ाने मरां रोड़ी चीज़ां कढते ते बुरो मैन्हु अपने दिलेरे बुरे खज़ाने मरां बुरी चीज़ां कढते किजोकि जैन दिले मां भरेरू भोते तैन्ने ज़बानी पुड़ एइते।” 46 “जैखन तुस मेरे ज़ोने पुड़ अमल न केरथ त मींजो, ‘हे प्रभु, हे प्रभु,’ किजो ज़ोतथ? 47 जै मीं कां एइते ते मेरी गल्लां शुन्तां तैन पुड़ अमल केरते त अवं तुसन सेइं ज़ोताई कि ते केसरो ज़ेरो भोलो? 48 ते तैस मैनेरो ज़ेरोए ज़ेनी अपनू घर डुग्घी खाइ केढतां पेक्की ठैरी घर बनाव जैखन हड़ाई आई त तैस घरे किछ न भोवं, किजोकि तैसेरी मुनीयाद पेक्की ठैरी थी। 49 पन जै मेरी गल्लां शुन्तां तैन पुड़ अमल न केरे त तैस मैनेरो ज़ेरोए, ज़ेनी अपनू घर रेती पुड़ बनाव ते जैखन हड़ाई अई त तैन घर डुल्ली जेवं ते तब्बा भोइ जेवं।”

7 जैखन तैनी लोकन एपनी सब गल्लां शुनेई छैडी, त ते कफरनहूम नगर मां अव। 2 तेड़ी केन्ची सुवेदारेरो अक दलारो सेवक बिमार थियो ते मरने बालो थियो। 3 तैनी यीशुएरी

मुशूरी शुन्तां यहूदी केरे किछ बुजुर्ग तैस कां मिनत केरनेरे लेइ जैखन यूहन्नारे बिस्तार देनेबाले लोक वापस चले जे, त यीशु भेजे, कि तै एइतां मेरो सेवक बज्झाए। 4 तैना यीशु कां आए ते यूहन्नारे बारे मां गवाही देने लगे, “तुस जंगले मां कुन हेरने जोरे तैस कां मिनत केरने लगे, “तै इस काबले, कि तू तैसेरेलेइ इन केरस। 5 किजोकि ते इश्शी कौमी सेइं बड़ी हमदरदी रखते, ते इश्शू प्रार्थना घर तैन्नी बनेवरुए।” 6 यीशु तैन सेइं साथी-साथी चलो जेव, पन जैखन तैस घरे नेडे पुजो त सूबेदारे होरि दोस्तन सेइं समाद भेजो कि, “प्रभु तकलीफ न केर, किजोकि अवं एस काबल नई कि तू मेरे घरे मां एज्जी सखत। 7 एस्से वजाई सेइं अवं भी अपनो आप तीं कां एजनेरे काबल न सेमझी बल्के अपनि ज़बानी सेइं जोस त मेरो नौकर बेज्झोइ सकते। 8 तै मैन्हु जोने लगे कि अवं भी केन्चेरे अधिकारे मां कम केरताई, ते सिपाही मेरे अधीन आन, ते जैखन एककी जो ज़ोतां कि ‘गा,’ त तै गाते, ते होरि जो ज़ोतां एई, त तै ‘एइते,’ ते अपने सेवके जो ज़ोताई, ‘इन कम केर,’ त तै केरते।” 9 यीशु एन शुन्तां हेरान रेइ जेव, ते पत्रोंव लोकां केरे पासे लगे तकने जैना तैस पत्पती ओरे थिये तैन जो जोने लगे, “कि अवं तुसन सेइं सघ ज़ोताई कि मीं इस्राएल मुलखे मां इस गैर यहूदी मैनेरो जेरो मैन्हु नई मर्जी अपने बारे मां टाली। 31 “बस्सा, अवं इस ज़मानेरे लोकां केरि मिसाल केस सेइं देई, तैना केसेरे ज़ेरेन? 32 तैना तैन मट्ठां केरे ज़ेरेन जैना बज़ारे मां बिशोरां एककी होरि जो हक देइतां ज़ोतन, ‘असेई तुश्शे लेइ बेंशोई बज़ाइ, ते तुस न नच्चे, असेई शौग मनाव, पन तुसेई लेरां न दिती!’ 33 किजोकि यूहन्ना बपतिस्मो देनेबालो न रोटी खांतो अव, न शराब पीतो अव, ते तुस ज़ोतथ, कि एस पुड़ भूतेरो सैयो आए। 34 मैनेरू मट्टू खातू पीतू अव, ते तुस ज़ोतथ, ‘हेरा, ते पैटू ते शराबी मैन्हु, कने धड़त नेनेबाले ते पापी लोकां केरो दोस्त।’ 35 पन अक्ल अपने सेबभी मट्टन करां जादे सच्ची साबत भोइ।” 36 फिरी केन्चे फरीसे यीशु कां मिनत की, कि मीं सेइं साथी रोटी खा, बस्सा, तै तैस सेइं साथी तैसेरे घरे जेव, ते तैस सेइं साथी रोटी खांने लगे। 37 त हेरा, अक बदचलन कुआन्श जै तैस नगरेरी थी एन बुझतां कि यीशु फरीसेरे घरे रोटी खांने बिशोराए, संगमरमरेरे एककी भांडे मां इत्र आनो। 38 ते यीशुएरे पावन कां नेडे लेरां देंती खड़ी भोइ, ते तैसेरे पाव एंखेइं सेइं सेले ते अपने दोगेरे बालेई सेइं पोंछने लगी ते तैसेरे पावन फुमड़ी देने लगी कने पावन पुड़ इत्र लाव। 39 जैनी फरीसे यीशु कुजोरो थियो, तैनी एन लाव, त जोने लगे, “अगर ए मैन्हु नबी भोथो त बुझेथो कि जै कुआन्श तैस कांए तै कौने ते ए केरि कुआन्श? किजोकि ए बदचलने।” 40 यीशु तैसेरे इन खियाल ज़ैनतां तैस सेइं ज़ोवं, “हे शमीन, मीं तीं सेइं किछ ज़ोनूए।” फरीसे ज़ोवं, “हे गुरू ज़ो।” 41 यीशुए तैस सेइं मिसाल देइतां ज़ोवं “केन्ची शोहुकारेरे केन्ची दुई ज़न्न कां कर्जो थियो, एककी कां 500 दीनार, ते होरि कां 50 दीनार थियो। 42 जैखन किछ तुसेईं लाहेरुए ते शुनेरुए गेइतां यूहन्ना सेइं ज़ोथ, कि काने लातन, ते टेंटे चलतन, ते कोढ़ी केरू कोढ़ साफ भोते, ते टोंऊने शुत्तन, ते मुड़े जीते भोतन, ते गरीबन खुशखबरी शुनाई गाचे। 23 परमेशर तैस बरकत देते, जै मीं पुड़ शक न केरे।” 24 यीशुए ज़ोवं, “तीं ठीक फैसलो कियो।” 44 यीशु

तैस कुआन्शरे पासे तेकतां शमीने ज़ोवं, “कुन तू इस कुआन्शरां ज़मीनी मां बेवरू बीज़ तैने, जैना वचन शुन्तां खुशी सेइं मन्तन तकतस? अवं तेरे घरे अव, तीं मीं (रीतरे मुताबिक) पव धोने जो पानी न दिन्तू, पन इसां मेरे पाव एंखेइं सेइं पव धोए ते अपने दोगरे बालेईं सेइं पोंछे।” 45 तीं मीं (रीतरे मुताबिक) फुमड़ी न दिती, पन एसां जैखनेरो अवं इड़ी ओरोईं मेरे पव्वन फुमड़ी देनी न उडैईं। 46 तीं मेरे दोग्रे पुड़ तेल न मल्लो, पन एसां मेरे पावन पुड़ इत्र मल्लो। 47 “एल्हेरेलेइ अवं तीं सेइं ज़ोताई कि, एसारे जादे पाप ज़ैना एसां कियोरे थिये, माफ़ भोए, किजोकि एसां जादे प्यार कियो, पन ज़ेसेरे थोड़े पाप माफ़ भोतन तै थोड़ो प्यार केरते।” 48 यीशुए तैस कुआन्शी जो ज़ोवं, “गा तेरे पाप माफ़ भोए।” 49 एस गल्ली पुड़ ज़ैना तैस सेइं साथी रोटी खाने बिशोरे थिये, अपने-अपने मने मां सोचने लगे, “ए कौने ज़ै पाप भी माफ़ केरते, पाप त सिर्फ परमेशर माफ़ केरते?” 50 पन यीशुए तैस कुआन्शी सेइं ज़ोवं, “परमेशरे तू एल्हेरेलेइ बचाई कि तीं मीं पुड़ विश्वास कियो, हुनी तू खुशी सेइं गा।”

8 थोड़े चिरेंरा बाद एरू भोवं यीशु अपने तैन 12 चेलन सेइं साथी नगर-नगर ते इलव्वे-इलव्वे हंठतो ते प्रचार केरतो राव, ते परमेशरे राज़ेरी खुशखबरी शुनातो राव। 2 किछ कुआन्शां भी तैन सेइं साथी थी, जैन मरां भूतां केरो सैयो कढोरो थियो। ते जैन केरि बिमैरी दूर भोरी थी, तैना केरां नव्वां इना आन, मरियम ज़ै मगदलीन इलव्वेरी राने बाली थी, जैस पुड़ां सत भूतां केरो सैयो कढोरो थियो, 3 हेरोदेस राज़ेरे भण्डारी खोज़ेरी कुआन्शा योअन्ना ते सूसन्नाह ते होरि भी काई कुआन्शां थी ज़ैना अपनि जेइदात देइतां यीशु ते तैसेरे चेलां केरि सेवा केरती थी। 4 फिरि ज़ैखन बड़े लोक तैस कां अकोठे भोए, ज़ैस मां नगरां-नगरां केरे लोक तैस कां एइते थिये। यीशुए तैन मिसाल देइतां ज़ोवं। 5 “एक्सां अक बीज़ बेनेबालो बीज़ बेने जो जेव। बीज़ बेते बार किछ बीज़ बत्तेरे इलेखी बिछड़ू ते अम्बरेरे चुडोल्लेई एइतां तैन बीज़ चुनू। 6 ते किछ बीज़ घोड़नबाली ज़मीनी पुड़ बिछड़ू, ते लगू पन जल्दी शुक्की जेव, एल्हेरेलेइ कि तैस पानी न मैल्लू। 7 किछ बीज़ कंटां केरे झैल्लन मां बिछड़ू। ज़ैखन तैड़ी बूटो लगे, त कंटां केरे झैल्लेईं भी बेडोइतां ते बूटो दबेइ छड्डो। 8 ते किछ बीज़ रोड़ी ज़मीनी मां बिछड़ू, ते लगू ते शौव गुणा फल लगे,” एन शुनेइतां तैनी तैन सेइं उच्ची आवाज़ी मां ज़ोवं, “जै कोई समझनू चाते, तै ध्याने सेइं शुने ते समझे।” 9 तैसेरे चेलेईं तैस पुच्छू, “एस मिसालरो कुन मतलबे?” 10 यीशुए तैन ज़ोवं, “तुसन परमेशरे राज़ेरे भेदां केरि समझ दितोरीए, पन अवं होरि लोकन मिसाल देइतां ज़ोताई, तैन तैना बार-बार शुनेले, पन मेरी गल न समझोले।” 11 “एस मिसालरो ई मतलबे, कि बीज़ परमेशरेरू वचने। 12 जैना मैन्हु परमेशरेरी गल्लां शुन्तन, तैन मरां किछ लोक तैस बत्तेरे ज़ेरे आन, ज़ैड़ी बीज़ बिछड़ते। तैना त परमेशरेरी गल्लां शुन्तन, पन शैतान अकदम एइतां तैन मैन्हु केरे दिले मरां तैन वचन धिनी गाते, कि एरू न भोए कि तैना विश्वास केरन ते तैन मुक्ति मैल्ले। 13 ते घोड़नबाले

ज़मीनी मां बेवरू बीज़ तैने, जैना वचन शुन्तां खुशी सेइं मन्तन पन ज़ील न छडने सेइं तैना थोड़े चिरे तगर विश्वास रखतन ते अज़मैइशरे मौके मुड़ी गातन। 14 ते जैन झल्लन मां बीज़ झाडू तैना इना आन, जैना वचन शुन्तन, पन अग्रोवं चेलतां फिक्क ते दौलत ते ज़िन्दगरो एशो-अशरती मां फेसी गातन ते तैन केरो फल न पक्के। 15 पन रोड़ी ज़मीनी पुड़ेरू बीज़ तैन्न, जैना वचन शुन्तन ते अमल भी केरतन, ते रोड़ेचारे दिले मां बसातन ते सबरी सेइं फल भी लगते। 16 “कोई दीयो बैलतां केन्ची भांडे हैठ ओड़कतां न रखे, ते न खट्टी हैठ रखे बल्के उच्ची ठेरी रखतन ताके दीयो अन्तर एजने बालन लौ दे। 17 किजोकि कोई एरी चीज़ छपोरी नई, जै बांदी नई भोनी, ते कोई भेद छपोतो न रालो, पन सारो भेद बांदो भोलो। 18 बस्सा हुशार राथ, कि तुस केन्चरे शुन्तथ? ज़ैस कां परमेशरेरी मज़ीं समझनेरी इच्छा आए, तैस परमेशर जादे समझ देलो। पन ज़ैस कां परमेशरेरी मज़ीं समझनेरी इच्छा नई, तैस केरां थोड़ी ज़ेरि समझ, जै तैस कां आए, तै भी नी गाली।” 19 फिरि तैसेरी अम्मा ते तैसेरे ढ़ला तैस कां आए, पन हछे मैन्हु केरि वजाई सेइं तैस कां न पुज़ी सके। 20 ते यीशुए पतो दितो, “तेरी अम्मा ते तेरे ढ़ला बेइर खड़े आन ते तैना तीं सेइं गल केरनि चातन।” 21 यीशुए तैन जुवाब दितो, “मेरी अम्मा ते मेरे ढ़ला इना आन जैना परमेशरेरू वचन शुन्तन ते तैस पुड़ अमल भी केरतन।” 22 फिरि एककी दिहाड़े एरू भोवं, कि यीशुए अपने चेलन सेइं ज़ोवं, “एज्जा, समुन्दरे पार गाम ते तैना किशती मां च़ेढतां समुन्दरे पार च़ले जे।” 23 पन ज़ैखन किशती च़लोरी थी, त यीशुए झुली जेव ते समुन्दरे पुड़ बड़ी तूफान अव, ते किशती पैनी सेइं भरोने लगगी, ते तैन खतरो भोइ जेव। 24 चेलेईं ते बींझेइतां तैस सेइं ज़ोवं, “हे गुरु, असां मेरि गातम यीशु खड़े उठो ते हवाई जो ते पैनी जो ज़ोवं, रुकी गाथ ते तूफान रुकी जेव।” 25 यीशुए अपने चेलन सेइं ज़ोवं, “तुशो विश्वास कोरां जेव?” तैना डेरि जे ते हैरान भोइतां एप्पू मांमेइं ज़ोने लगे, “ए कौने! ए हवाई त पैनी भी हुक्म देते ते तैना एसेरो हुक्म मन्तन।” 26 फिरि तैना गिरासेनी इलाके मां पुजे, जै गलील समुन्द्रे सामने पारे। 27 ज़ैखन तै बन्ने पुड़ ओस्सो, त तैस नगरेरो अक मैन्हु मैल्लो ज़ैस पुड़ भूतां केरो सायो थियो, ते तै बड़े दिहाड़े केरो देंतो न लिगड़ां लातो ते न घरे रातो थियो, बल्के कन्न मां रातो थियो। 28 तैनी मैने यीशु लाव ते चिन्डां लगे मारने, ते तैसेरे सामने झुकतां ज़ोरे सेइं ज़ोने लगे, “हे यीशु परमप्रधान परमेशरेरा मट्ठां! तीं मीं सेइं कुन कम्मे? अवं तीं कां मिनत केरताई मीं दुख न दे।” 29 किजोकि यीशु तैस भूते तैस मैन्हु मरां निसनेरो हुक्म देने लोरो थियो, एल्हेरेलेइ तै बड़े बुरे तरीके सेइं दलेइतां रखोरो थियो, ते लोक तैस कैबू केरनेरे लेइ अग्री भी रसन ते शंगलन सेइं बेंधतां रखते थिये, ते तै तैन भी टूलोड़तो थियो, ते भूत तैस मैन्हु जंगले मां नेतू थियू। 30 यीशुए तैस पुच्छू, “तेरू कुन नवं आए?” तैनी ज़ोवं “मेरू नवं फौज आए,” किजोकि तैस मां बड़ां भूतां थियां।

31 ते तैनेई तैस कां मिन्नत की, “असन अथाह कुण्डे मां गानेरो हुक्म न दे।” (Abyssos g12) 32 तैड़ी पहैड़ी पुड़ अक सूरं केरो बड़ो घान थियो, ते तैनेई तैस कां मिन्नत की, “असन एन मां गाने दे ते यीशुए गाने दित्तां।” 33 ते तैना भूतां तैस मैनु मरां निस्तां तैन सूरन मां छेलि जेअं, ते सूरं केरो सारो घान उत्रेई उन्हे छालां मेरतां समुन्दरे मां डुबतां मेरि जेव। 34 सूरं केरे चारनेबाले एन हेरतां नेश्शी जे, ते नगर मां ते ड्लोव्वन मां एस गल्लरी खबर शुनाई। 35 लोक तै तमाशो हेरने आए, ते यीशु कां जैस मैनु मरां भूतां केरि फौजरो सैयो निसोरो थियो, तैनी लिगडां लां ते होशी मां एडतां यीशु कां बिश्शोरो लाव ते डेरि जे। 36 जैनेई तैना गल्लां पेडले लेवरी थी, तैनेई ज़ोवं, इस मैनु पुड़ भूतां केरो सैयो थियो ते ए केन्चरे बेज़्ज़ोव। 37 ते गिरासेनियो इलाके मां च़ेरे पासां केरे लोक यीशु कां मिन्नत केरने लगे, कि इट्ठां च़लो गा, किजोकि तैना बड़े डरं थिये, ते यीशु किशती मां बिश्तां वापस च़लो जेव। 38 पन जैस मैनु मरां भूतां निस्सोरां थियां तै यीशु कां मिन्नत केरतां ज़ोने लगे, मीं एप्पू सेइं साथी रख पन यीशुए तै भेजे ते ज़ोवं। 39 “अपने घरे च़लो गा ते लोकन सेइं ज़ो, कि प्रभु परमेशरे तीं पुड़ दया केरतां तेरे लेइ केतू बडू कम कियोरूए। तैखन ते च़लो जेव ते सारे नगर मां एस गल्लारी प्रचार केरने लगे, कि यीशुए मेरे लेइ केतू बडू कम कियोरूए।” 40 ज़ैखन यीशु वापस एज्जी राहोरो थियो, ते लोक बड़े खुशी सेइं तैस सेइं मिले, किजोकि तैना सब तैस बलगते थियो। 41 ते हेरा यार्डर नव्वेरो अक मैनु ज़ै प्रार्थना घरेरो अक प्रधान थियो, यीशु कां अव ते तैसरे पावन पुड़ पेडतां मिन्नत केरने लगे, “तू मेरे घरे च़ल।” 42 किजोकि तैसेरी अक्के कुई ज़ै 12 सालां केरि थी, तै मरनेबाली थी। ते ज़ैखन यीशु च़लोरो थियो, त लोक तैस उन्हे बिछड़ते थिये। 43 ते अक कुआन्श भी थी, ज़ैस 12 सालां केरि खून च़लनेरी बिमारी थी। ते तैसां अपनो सारो जिन्दगरो पेंडसो हकीमन कां अल्लाजरे लेइ खर्च कियोरो थियो, ते तै केन्चरे हथ्ये ठीक न भोड़। 44 तै कुआन्श यीशु पतोरां एडतां तैसरे चोगे सेइं हुरी, त अकदम तैसेरी खून च़लनेरी बिमारी बेज़्ज़ोई। 45 यीशुए ज़ोवं, “मेरे लिगड़े सेइं केनि हथ लाव?” ज़ैखन सब लोक इन्कार केरने लगे, त पतरसे ते तैसरे सैथेई ज़ोवं, “ए गुरु, लोक तीं दूलांचने ते तीं उन्हे बिछड़ने लोरेन।” 46 पन यीशु ज़ोवं, “केन्चे मीं सेइं हथ लोरोए किजोकि मीं पतो लगे कि मीं मरां शक्ति निसोरिए।” 47 तैखन तैस कुआन्शां हेरू, कि अवं छेप्पी न बेटि, त तै डरती-डरती सामने अई ते यीशुए पावन पुड़ बिछड़तां सैरी लोकां केरे सामने ज़ोने लगी, मीं तीं सेइं हथ लोरोए, ते ज़ेरो मीं हथ लोरोए अवं अकदम बेज़्ज़ोरी। 48 यीशुए तैस कुआन्शी ज़ोवं, “हे कुईए, तेरे विश्वास तू बज़्ज़ाई ते खुशी सेइं च़ली गा।” 49 यीशु एन हेजू ज़ोतो थियो, त प्रार्थना घरेरे प्रधानेरे तैट्ठां केन्चे मैने एडतां ज़ोवं, “तेरी कुई मेरि जेवरिए, हुनी गुरु तकलीफ न दे।” 50 पन यीशु एन शुन्तां जुवाब दित्तो, “न डर। सिर्फ मीं पुड़ विश्वास रख कुई बेबी

गानीए।” 51 ज़ैखन तै तैस घरे मां जेव, त तैनी पतरस यूहन्ना ते याकूब ते कुइयरे हाज बव्वेरे अलावा होरो कोई अन्तर एजने न दित्तो। 52 सब लोक तैस कुइयरे लेइ लेरां देंते थिये, पन यीशुए ज़ोवं, “लेरां न देथ, ए कुई मूओरी नई बल्के झूलोरोए।” 53 लोक एन शुन्तां हसने लगे, किजोकि तैना ज़ानते थिये कुई मेरि जेवरिए। 54 पन यीशुए तैस कुइयरो हथ द्लाव ते ज़ोवं, “कुइये खड़ी उठ।” 55 ते तैसारे प्राण वापस आए ते तै लूशी खड़ी भोड़, ते यीशुए तैन ज़ोवं, एस कुइये किछ खाने जो देथ। 56 तैस कुइयरे हाज बव हैरान रेइजे, पन तैनी तैन सेइं समझेइतां ज़ोवं, ज़ैन किछ इड़ी भोवं एन केन्ची सेइं न ज़ोइयथ।

9 यीशुए अपने 12 चले एप्पू कां कुजाए ते तैन शक्ति ते अधिकार दित्तो कि सैरी भूतन कडन ते बिमैरी दूर केरन। 2 ते यीशुए तैना परमेशरेरे राज़ेरो प्रचार केरनेरे लेइ ते बिमार बज़्ज़ानेरे लेइ भेजे। 3 तैनी तैन सेइं ज़ोवं, “बत्तां जो किछ न नेइयथ, न सोटी न झोलो न रोटी न पेंडसे ते न दुइयोवं लिगडां। 4 जैस घरे मां गाथ त तैड़ी बिश्शी रेइयथ ज़ां तगर तुस तैस नगरे मरां न गाथ। 5 ते ज़ैस नगरेरे लोक तुसन कबूल न केरन त तैस नगर मरां गांते बार अपने पांवां केरि धूड़ ठुड़कथ, ताके तैन पुड़ गवाही भोए।” 6 बस्सा, तैना च़ले जे, ते ड्लोव्वे-ड्लोव्वे गेइतां परमेशरेरी खुशखबरी शुनाते, ते लोकन बिमैरन करां बज़्ज़ाते च़ले जे। 7 मुलखेरो च़ेवरोवं हिस्से पुड़ हेरोदेस राज़ो राज़ केरतो थियो, तै एन सब शुन्तां डेरि जेव। किजोकि किछ ज़ोते थिये यूहन्ना मुइदन मरां जीतो भोरोए। 8 ते किछ ज़ोते थिये एलियाह लेइहोरोए, ते किछ ज़ोते थिये नेबन मरां कोई जीतो भोरोए। 9 पन हेरोदेसे ज़ोवं, “यूहन्नारी क्रोड़ी त मीं कट्टेरी थी, पन ए कौन आए, ज़ेसेरे बारे मां एरी ज़ेरि गल्लां शुन्ने मां एजने लोरिन?” ते हेरोदेस यीशु हेरनेरी इच्छा की। 10 फिरी प्रेरितेई वापस एडतां ज़ैन किछ कियेरू थियूं, यीशु सेइं शुनावं, ते यीशु तैन अलग नेइतां बैतसैदा नव्वेरे नगर मां च़लो जेव। 11 ते बड़े लोक तैस पत्ती च़ले, ते यीशु बड़े खुशी सेइं तैन सेइं मिलो। ते तैन सेइं परमेशरेरे राज़ेरी गल्लां केरने लगे, ते ज़ैना बिमार ठीक भोनु चाते थिये, तैनी तैना बज़्ज़ाए। 12 ज़ैखन दिहाड़ी डुबने लगी त तैन 12 चलेई यीशु सेइं ज़ोवं, “एन लोकन भेजी छड एना कोस्कोई ड्लोव्वन मां गेइतां बिशन ते रोट्टारो इंतज़ाम केरन। किजोकि असां गैर आबाद ठैरी आम।” 13 तैनी तैन सेइं ज़ोवं, “तुस्से एन किछ खाने जो देथ।” तैनेई ज़ोवं, “असन कां पंच रोटी ते दूई मेछलीन करां जादे किछ भी नई, पन असां गेइतां एन जेई रोटी मुल्ले धिन्तां आनतम, त इन भोड़ बटते।” 14 (किजोकि तैन लगभग 5000 मड़द थिये।) यीशुए अपने चेलन सेइं ज़ोवं, “एन लोकन 50-50 मैनु केरि हुन्डी मां बिशाला।” 15 ते चलेई तैन्ने कियूं ते तैना तेन्चरे बिशाले। 16 तैखन तैनी तैना पंच रोटी ते दूई मेछली नी, ते अम्बरेरां तेकतां शुक्र कियूं, फिरी तैनी तैना रोटी टूलोटी ते चेलन कां दित्ती, कि तैन बिशालोरे लोकन खाने जो देन। 17 सारे मैनु खेइतां

रेज़्ज़ी जे। तैल्ला पत्ती, यीशुएरे चेलैई बजोरे टुकड़न सेइं 12 टोकरी भेरि। 18 एककी बार यीशु अकेल्लो प्रार्थना करेने लोरे थियो, ते चले भी तैस सेइं थियो। यीशुए तैन पुच्छू, “कि लोक मींजो कुन ज़ोतन?” 19 चेलैई जुवाब दित्तो, “किछ ज़ोतन यूहन्ना बपतिस्मो देनेबालो, ते किछ ज़ोतन एलिय्याह, ते किछ ज़ोतन नेबन मरां कोई अक ज़ीतो भोरोए।” 20 तैखन यीशुए चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू परमेशरेरो मसीह आस।” 21 तैखन तैनी तैन खबरदार केरतां ज़ोवं, “कि ए गल केन्ची सेइं न ज़ोइयथ।” 22 यीशुए ज़ोवं, “मैनेरे मट्टेरे लेइ ज़रूरी आए, कि तै बड़ो दुःख झैल्ले, यहूदी लोकां केरे बुजुर्गन, प्रधान याजकन, ते शास्त्री तैस घटिया सेमझतां मारेले, ते तै ट्लेइयोवं दिहाड़े फिरी ज़ीतो भोलो।” 23 फिरी यीशुए तैन सेबभन ज़ोवं, “अगर कोई मीं पत्ती एज्जो चाए, त अपने आपोरे इन्कार केरे, ते रोज़ अपनू कूस छूए ते मीं पत्ती चले। 24 किजोकि ज़ै कोई अपनि जान बचांनी चाते तै तैस गुवालो, पन ज़ै मेरे लेइ अपनि जान गुवालो त तै तैस बचालो। 25 मैन्हु अगर सारी दुनिया हासिल केरे, ते अपनि जानरो नुकसान केरे, या अपनो आप गुवाए, त तैस कुन फैइदो? 26 किजोकि अगर कोई मैन्हु मीं करां त कने मेरी गल्लन करां शरमाते, त मैनेरू मट्टू यानी अवं भी तैस केरां शरमालो। ज़ेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो।” 27 “अवं तुसन सेइं सच ज़ोतई कि ज़ैना इडी खड़े आन, तैन मरां किछ मैन्हु एरे आन कि ज़ांतगर तैना परमेशरेरे राज़्जेरी शक्ति न हेरेले, तांतगर तैना न मरेले।” 28 एन गल्लां केरे लगभग अठ दिहाड़ना बाद पतरस, ते यूहन्ना ते याकूब साथी नेइतां एककी पहाड़े पुड़ प्रार्थना करेने चले जे। 29 ते ज़ैखन यीशु प्रार्थना लोरो थियो करेने, त तैसेरी शकल बेदलोई जेई, ते तैसेरां लिगड़ां लोआं ज़ेरां चमकने लगो। 30 ते हेरा, मूसा, ते एलिय्याह, इन्ना दूई मड़द तैस सेइं गल्लां करेने लगगे। 31 इन्ना महिमा सेइं साथी लेइहोए, ते तैसेरे मरनेरी गलबात करेने लोरे थियो, ज़ैन किछ यरूशलेम नगरे मां भोनेबालू थियूं। 32 पन पतरस ते तैसेरे सैथी केरि एछ्छी निडली सेइं गिरकी भोरी थी, ज़ैखन तैना बींझे, त तैनेई तैसेरी महिमा ते तैना दूई मड़द भी लाए, ज़ैना तैस सेइं साथी खड़े थियो। 33 ज़ैखन तैना तैस करां चले, त पतरसे यीशु सेइं ज़ोवं, “हे गुरु, इश्शू इडी रानू रोडोए, कि असां ट्लाई डेरे बनाम, अक तेरे लेइ, ते अक मूसेरे लेइ, ते एलिय्याहरे लेइ।” तैस पतो न थियो, कि तै कुन लोरोए ज़ोने। 34 तै इन ज़ोई राओरो थियो, तैन पुड़ बिग्लार घिरी जेई, ते ज़ैखन तैन केरे चेन्ने पासन बिदलारी घिरी त तैना डेरि जे। 35 तैखन तैस बिदलारी मरां अक आवाज़ आई, “एन मेरू ट्लारू मट्टू आए। ध्याने सेइं एसेरी गल शुना!” 36 ते तैस आवाज़ी सेइं साथी तैनेई यीशु अकेल्लो लाव, ते तैना चुप राए ते ज़ैन किछ लाहेरू थियूं, तैन केन्ची सेइं न ज़ोवं। 37 होरसां

एरू भोवं कि ज़ैखन तैना पहाड़े पुड़रां उन्हे ओरे थियो, त बड़े मैन्हु केरि भीड़ तैन कां आई। 38 ते हेरा, एककी मैने तैन लोकन मरां बड़े ज़ोरे सेइं हक देइतां ज़ोवं, “ए गुरु अवं तीं कां ज़ोवले हथ केरतां कि मेरे मट्टे पुड़ दया केर; तैन मेरू अक्के मट्टूए। 39 ते हेर, अक भूत तैस अपने कब्जे मां केरते, ते तैन अकदम चिन्दां मारते, ते कम्बने लगते, ते तैसेरे ऐशेरां शैमफ निसचे, ते भूत तैस बड़े बुरे तरीके सेइं ज़ख्मी केरतां शारते। 40 ते मीं तेरे चेलन कां बिनती कियोरी थी, कि तैस कढन, पन तैना न केढी सके।” 41 यीशुए जुवाब दित्तो, “हे विश्वास न केरने बालाव ते ढीठ लोकव, अवं केइस तगर तुसन सेइं साथी रेइलो ते तुश्शी भूते तैन मट्टू मुरोइतां शाऱू, पन यीशुए भूत झिड़कतां कढू, ते तैन मट्टू बज्झैइतां तैसेरे बाजोरे हवाले कियूं। 43 ते सब लोक परमेशरेरी बेड़ि कुदरती हेरतां हेरान रेइजे, ते ज़ैखन सब लोक तैन कम्मां ज़ैन यीशु केरतो थियो हेरान रहते थियो। त तैनी अपने चेलन सेइं ज़ोवं। 44 “मेरी इन गल्लां रोइच्चेरे शुना किजोकि मैनेरू मट्टू मैन्हु केरे हवाले भोने बालूए।” 45 पन यीशुएरी ए गल चेलां केरि समझी मां न आई, किजोकि तैन करां ए गल छपोरी थी। कि तैन न समझन, ते चेले एस बारे मां यीशु पुच्छने करां डरते भी थियो। 46 फिरी चेलन एप्पू मामेइं बड़ी बेंस भोइ, कि असन मां बड़ो कौन आए? 47 यीशु तैन केरि दिलेरी गल्लां बुझतां निकडो बच्चो आनो ते तै एप्पू कां खडू कियूं। 48 ते अपने चेलन सेइं ज़ोवं, “जै इस बच्चे मेरे नव्वे सेइं कबूल केरते, ते मीं कबूल केरते, ते जै मीं कबूल केरते, ते मेरे भेजने बाले कबूल केरते। किजोकि ज़ै तुसन मां निकडे करां निकडीए तै सेबभन करां बड़ोए।” 49 तैखन यूहन्ना यीशु सेइं ज़ोवं, “ए गुरु, असेई अक मैन्हु तेरे नव्वे सेइं भूतां केरो सैयो कढतो लाव, ते असेई तैस ठाकू किजोकि तै असन सेइं साथी मिलतां तीं पत्ती न चले।” 50 पन यीशुए जुवाब दित्तो, “तैस न ठाका, किजोकि जै तुश्शे खलाफ नई ते तुश्शो पासे।” 51 ज़ैखन यीशुएरे उबरे नेनेरे दिहाड़े पूरे भोने पुड़ थी त तैनी पक्के चारे यरूशलेम नगरेरे पास गानेरो खियाल कियो। 52 ते एप्पू करां अग्री-अग्री किछ बिस्तार देनेबाले लोक भेजे। ते लोक सामरी लोकां केरे एककी इलोव्वं मां जे ताके यीशुएरे एजनेरी ठार तियारी केरन। 53 पन लोकेई तै एजने न दित्तो, किजोकि तै यरूशलेम नगरे जो चलोरो थियो। 54 एन हेरतां तैसेरे चेले याकूब ते यूहन्ना ज़ोने लगगे, “हे प्रभु, कुन तू चातस, कि अस हुक्म देम, अम्बरेरां अग बखेनतां एन लोकन भस्म केरे?” 55 पन तैनी बेदलोइतां तक्कू, ते तैना झिड़के (ते ज़ोवं, “तुस न ज़ानथ कि तुस कौस आत्मा रे आथ। 56 किजोकि मैनेरू मट्टू लोकां केरे प्राणन नाश करेने लेइ नई बल्के बचांने ओरोए।” तैखन तैना होरि इलोव्वेरे पासे चले जे। 57 ज़ैखन तैना बत्तां चलोरे थियो, त केन्चे तैस सेइं ज़ोवं, “तू ज़ैडी-ज़ैडी भी गालो, अवं तीं पत्ती चलेलो।” 58 यीशुए तैस सेइं ज़ोवं, “लौई केरि कूदां ते अम्बरेरे चुडोल्लू केरे आले भोतन, पन

मैनेरे मट्टे यानी मीं कां कोई ठार नई जैड़ी अवं झुल्ली सेक्खी।” 59 फिरी यीशु एककी होरि जो ज़ोवं, “मीं पत्ती च़ल, ” पन तैनी मैने ज़ोवं, “हे प्रभु मीं घरे गानेरी अज़ाज़त दे, मेरे बाजरे मरनेरां बाद अवं तैस देबतां एज्जेलो ते फिरी तीं पत्ती च़लेलो।” 60 यीशुए तैस जो ज़ोवं, “जैना लोक आत्मिक तरीके सेइं मर्रन तैन अपने मैन्हु मरने बलगने दे, पन तू गा ते परमेशरेरे राज़ेरे बारे मां लोकन मां प्रचार केरा।” 61 एक्के होरे भी ज़ोवं, “ए प्रभु अवं तीं पत्ती च़लेलो, पन पेड़ले मीं भेज़ कि अवं अपने घरेबालन जोई।” 62 यीशुए तैस सेइं ज़ोवं, “जै कोई हल्ली पुड़ हथ रेखतां पत्रोवं फिरतां तकते, ते परमेशरेरे राज़ेरे काबल नई।”

10 ते इन गल्लां केरे बाद प्रभुए 70 होरे चले ठहराए, कि तै ज़ैस-ज़ैस नगर ते ठैरी तैनी एप्पू गानेरे बारे मां सोचोरु थियूं, तैड़ी दूई-दूई मैन्हु एप्पू अग्री भेजे। 2 ते तैनी तैन सेइं ज़ोवं, “पकोरी फसलरे ज़ेरे बड़े लोक तियार आन जैना परमेशरेरे वचने पुड़ विश्वास केरनू चातन, पन कम केरनेबाले थोड़े आन जैना तैन परमेशरे राज़ेरे बारे मां ज़ोन। एल्लेरेलेइ तुस फसलरे मालिके कां प्रार्थना केरा कि ते जादे कम केरनेबाले भेजे, कि तैना लोकन परमेशरेरे राज़ेरे बारे मां ज़ोन।” 3 गाथ, अवं तुसन भेड्डां केरे ज़ेरे गिदन मां भेज़ताई। 4 एप्पू सेइं साथी न बेटवे, न झोलो, न बूट नैइयथ, ते न बत्तां केन्ची जो नमस्कार जोइयथ। 5 ज़ेसेरे घरे मां गाथ त पेड़ले ज़ोथ कि, “इस घरे मां शान्ति भोए।” 6 अगर तैड़ी एरे लोक जैना परमेशरेरी शान्ति चातन तैड़ी रहते भोलो, त तुशुशी शान्ति तैस पुड़ राली, नई त तुशुशी शान्ति तुसन पुड़ एज्जेली। 7 तैस्से घरे मां राथ, ते ज़ैन किछ तैन करां मैल्ले, तैन्ने खाथ-पीथ किजोकि मज़दूर अपनि मज़दूरां हकदार भोते, घरे-घरे न गेइयथ। 8 ते ज़ैस नगर मां गाथ, ते तैट्टेरे लोक तुसन अपने घरे मां नेन, त ज़ैन किछ तुशुशे सामने रखवू गाए तैन्ने खाथ। 9 तैट्टेरे बिमारन बज़्ज़ाथ, ते तैन सेइं ज़ोथ, “परमेशरेरू राज़ नेड़े ओरूए।” 10 पन ज़ैस नगर मां गाथ, ते तैट्टेरे लोक तुसन कबूल न केरन, त तैट्टेरे बज़ारन मां गेइतां ज़ोथ। 11 “कि तुशुशे नगरेरी धूड़ भी इश्शे पावन सेइं ज़ै लगोरीए अस तुशुशे सामने ठुड़कतम ते फिरी भी बुझा कि परमेशरेरू राज़ तुशुशे नेड़े पुजेरूए।” 12 अवं तुसन सेइं सत्र ज़ोताई, तैस दिहाड़े तैस नगरेरी हालत सदोम नगरेरी हालत झैल्लेरे काबल भोली। 13 “हे खुराजीन! तीं पुड़ अफ़सोस! हे बैतसैदा तीं पुड़ अफ़सोस! कि एना चमत्कार मीं तुसन इड़ी हिराए अगर मीं एना कम्मां सूर ते सैदा मां हरेवरां भोथां, त तैन लोकेई केइसेरे देते टाट पलेटतां ते दोम्गे पुड़ मांज़न छेड़तां पापन करां मनफिरावरो भोथो। 14 पन फिरी भी इन्साफेरे दिहाड़े तुशुशे हाल सूर ते सैदारे हाले करां जादे बुरो भोलो। 15 ते हे कफ़रनहूम नगरेरे लोकव, कुन तुस सोचतथ कि स्वर्गें मां तुशुशी आदर भोनीए! ई तुस त नरके गाले जैड़ी पैपी लोकन सज़ा मैलेली! (Hadēs 986) 16 ज़ै तुशुशी शुन्ते, ते मेरी शुन्ते ज़ै तुसन घटिया समझते ते मीं घटिया समझते, ते ज़ै मीं घटिया समझते ते मेरे भेजने बाले घटिया समझते।” 17

तैना सतर चले खुशी सेइं वापस आए, ते ज़ोने लगे, “हे प्रभु तेरे नव्वे सेइं भूतां भी इश्शो हुक्म मन्तन।” 18 तैनी तैन सेइं ज़ोवं, “मीं शैतान एन्चरे बिछड़तो लाव जेन्चरे च़ड़क अम्बरेरां पेचे। 19 हेरा, मीं तुसन सप्पन ते बिचन इल्लेन्नेरो, ते दुश्मनेरी (शैतानेरी) सैरी शेक्ति पुड़ अधिकारे दितोरोए, ते केन्ची चीज़ी सेइं तुसन नुकसान न भोलो। 20 फिरी भी तुस इस गल्ली सेइं खुशी न भोइयथ कि भूतां तुशुशो हुक्म मेनचन, पन इस गल्ली सेइं खुश भोइयथ कि तुशुशू नवं स्वर्गें मां लिखोरूए।” 21 तेखन यीशु पवित्र आत्मा सेइं मघन भोवं, ते ज़ोने लगो, “हे बाजी, स्वर्गेर ते धरतेर प्रभु, अवं तेरू शुक्र केरताई, कि तीं इना गल्लां, अक्लमन्द ते समझदारन करां छपेइतां रेख्खी, ते बच्चन पुड़ बेंदी की, हॉ, हे बाजी, किजोकि तेरी खुशी एस्से मां थी। 22 सैरी चीज़ां मेरे बाजरी तरफां मेरे सुपर्द कियोरिन, कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टू ज़ानते, या तै मैन्हु बाजी ज़ानते ज़ैस पुड़ मट्टू बांदो केरने चाए।” 23 तैखन तैनी अपने चेलां केरे पासे फिरो अकैल्ले मां ज़ोवं, “धन आन तैना एछड़ी जैना एना गल्लां हेरचन जैना गल्लां तुस लातथ, 24 किजोकि अवं तुसन सेइं ज़ोतां, कि बड़े नेबन ते राजां केरि खुवैइश थी, कि एना गल्लां हेरन, जैना तुसेईं लेई, पन न लेई सके, ते एना गल्लां शुन्न जैना तुस शुन्तथ पन न शुनी बेटि।” 25 एक्सां यीशु लोकन शिक्षा देने लोरो थियो, ते हेरा, अक शास्त्री खडो भोव, ते इन ज़ोइतां तैस अज़माने लगो, “ए गुरु, हमेशारी ज़िन्दगी हासिल केरनेरे लेइ अवं कुन केरि?” (aiōnios 166) 26 तैनी तैस जुवाब दितो, “मूसेरे कानूने मां कुन लिखोरूए? तू केन्चरे समझतस?” 27 तैनी जुवाब दितो, “तू प्रभु अपने परमेशरे सेइं अपने सारे दिले, सैरी जानी सेइं, ते अपनि सैरी ताकती सेइं ते अपनि सैरी अक्ल सेइं प्यार रख, ते अपने पड़ोसी सेइं अपने बराबर प्यार केरा।” 28 तैनी तैस सेइं ज़ोवं, “तीं ठीक जुवाब दितो एन्ने केर, फिरी तीं हमेशारी ज़िन्दगी मैलेली।” 29 पन तैनी अपनो आप धर्मी ठहरानेरे लेइ यीशु पुच्छ, “फिरी मेरो पड़ोसी कोने?” 30 यीशुए तैस मिसाल देइतां जुवाब दितो, “अक मैन्हु यरूशलेम नगरेरां यरीहो नगरे जो च़ल्लोरो थियो, ते तै डैकेइं तैस पुड़ हमलो कियो, ते ज़ैन किछ तैस कां थियूं नेव। ते तैसेरां लिगड़ां खोल्लां, ते मारो कुट्टो ते ज़ख्मी केरतां अधमरो बनेइतां तैड़ी ज़ेरे छड़तां च़ले जे। 31 ते एरू भोवं कि, अक याजक तैस बत्तां च़ल्लोरो थियो, तैनी तै लव ते थरकतो तैसेरी मद्दत केरने बगैर इलखमेइं निस्सो। 32 एन्चरे अक मन्दरे मां कम केरनेबालो लेवी भी निस्सो, ते तैस लेइतां तै भी इलखमेइं निस्सो। 33 फिरी अक सामरी मुसाफर भी तैस बत्तां निस्सो, ते तैस लेइतां तैस बड़ी तरस अव। 34 ते तै तैस कां जेव, ते तैसेरे ज़खमन तेल मल्लो ते दाछोरो रस लाव, ते तैसेरे ज़खमन पट्टी बंधी ते अपने गधे पुड़ च़ेढ़तां एक्की धर्मशाली मां तैसेरी सेवा की। 35 होरसां तैनी दूई दीनार केढतां धर्मशालेरे मालिके कां दिते, ते ज़ोवं, ‘एसेरी हेरगेश करां अगर

जादे लग्गले त अवं वैपसी पुड़ देलो।’ 36 तेरे समझी मां एन कोई अक अम्बरेरो निशान मग्गो। 17 पन यीशुए तैन केरे मन्नां द्लेइन मरां कौन तैसेरो पड़ोसीए ज़ै डैकेइं द्लातोरो थियो?” केरे खियाल ज़ैनतां तैन सेइं ज़ोवं, “ज़ैस-ज़ैस राज़े मां फूट 37 तैनी जुवाब दित्तो, “ज़ैनी तैस पुड़ दया की।” यीशुए तैस सेइं ज़ोवं, “गा, तू भी एरू केरा।” 38 फिरी ज़ैखन यीशु त कने तैसेरे चले गेइ रावरे थियो, त तैना एक्की इलव्वें मां जे, ते मार्या नव्वेरी एक्की कुआन्शां यीशु अपने घरे नीयो। 39 ते मरियम नव्वेरी तैसेरी अक बेइन थी, तै यीशुएरे पावन कां बिश्तां तैसेरी गल्लां शुनती थी। 40 पन मार्या किछ खास चीज़ बनेइ रावरी थी, ते यीशु कां आई ते ज़ोने लगी, “हे प्रभु तुसन ज़रां भी खियाल नई कि, मेरी बेइनां अवं कम केरनेरे लेइ अवं अकैल्ली छडोरी? ते एस ज़ोथ, ते मेरी मदत केरे।” 41 प्रभुए तैस जुवाब दित्तो, “मार्या, हे मार्या, तू बेइ गल्लां केरे फिक्क करतिस, 42 पन अक गल ज़रूरीए, मरियमा तै रोड़ो हिस्सो चुनोरोए, ज़ै तैस करां कोई न नेइ सके।”

11 फिरी यीशु एक्की ठैरी प्रार्थना लोरे थियो केरने। ते ज़ैखन तैनी प्रार्थना की, त तैसेरे चेलन मरां एक्के ज़ोवं, “हे प्रभु, ज़ेन्चरे यूहन्ना अपने चेलन प्रार्थना केरनि शिखालोरिये तेन्चरे तू भी असन शिखाल।” 2 यीशुए तैन सेइं ज़ोवं, “ज़ैखन तुस प्रार्थना केरथ, त एन ज़ोइयथ, ‘हे बाजी, लोक तेरी आदर केरन किजोकि तू पवित्र परमेशर आस। ते तेरू राज़ एज्जे।’ 3 ‘इश्शी रोज़ेरी रोटी असन दे। 4 इश्शे पाप माफ़ केर, किजोकि अस भी ज़ैना इश्शे खलाफ़ बुराई केरतन, तैन माफ़ केरतमा। अज़मैइशेरे ज़िरिये असन पाप केरने न दे।” 5 फिरी यीशुए तैन सेइं ज़ोवं, “फ़र्ज़ केरा तुसन मरां केन्चरे अक दोस्त एध्नी राती अपने दोस्ते ज़ोए, ‘तू मीं द्लाई रोटी दे। 6 किजोकि मेरो अक दोस्त बड़े दूरां हंतो मेरे कां ओरोए, ते मेरे कां रोटी नई, कि अवं तैस रोटी देइ सेखी।’ 7 ते तै तैसेरो दोस्त अत्रां जुवाब दे, मीं दुःख ने दे, हुनी त दार बंदे, मीं कां मेरे बच्चे झुलोरेन, ते अवं तीं रोटी न देइ सेखी। 8 अवं तुसन सेइं ज़ोताई कि, अगर ते तैसेरो दोस्ते ते तैस रोटी न दे, त तैसेरो दोस्तेरे बार-बार मिनत केरने सेइं ज़रूर तैस रोटी देलो ते ज़ेत्री रोटी केरि तैस ज़रूरत भोली देलो। 9 ते अवं तुसन सेइं ज़ोताई, मग्गा त तुसन दित्तू गालू। ते तोप्पा, त तुसन मैल्ली गालू। ते दार गुडकाथ, त तुश्शे लेइ खोल्लू गालू। 10 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई दार गुडकाते त तैसेरेलेइ खोल्लू गाते। 11 तुसन मरां कौन ज़ेरो बाजी एरो भोए, कि ज़ैखन तैसेरू मट्टू रोटी मग्गे त तैस घोड़ दे? या मछली मग्गे, ते तै सप दे? 12 या ठूल मग्गे त तैस बिच्चू दे? 13 ते तुस बुरे भोनेरे बावजूद भी अपने मट्टुन रोड़ी चीजां देनी ज़ानतथ त तुश्शो स्वर्गोरो बाजी तैन, ज़ैना तैस करां मगतन पवित्र आत्मा किना देलो।” 14 फिरी तैनी एक्की लट्टे मरां भूतेरो सैयो कढो, ज़ैखन भूतेरो सैयो निस्सो, त तै लट्टो गल्लां लगे केरने, ते लोक हैरान रेइजे। 15 पन तैन मरां किछ मैनेई ज़ोवं, “ए त भूतां केरे गुरू शैतानेरे मदती सेइं भूतां कढते।” 16 ते किछेई अज़मानेरे लेइ तैस करां

कोई अक अम्बरेरो निशान मग्गो। 17 पन यीशुए तैन केरे मन्नां केरे खियाल ज़ैनतां तैन सेइं ज़ोवं, “ज़ैस-ज़ैस राज़े मां फूट पेचे, तैन राज़ बनोरू न राए, ते ज़ैस खानदाने मां फूट पेचे, तैन भी बनोरू न राए। 18 अगर शैतान अपनि खलाफ़त एप्पू केरे, त फिरी तैसेरू राज़ केन्चरे रेइ सकते? फिरी तुस केन्चरे ज़ोतथ कि अवं शैतानेरे मदती सेइं भूतां कढताई। 19 अगर अवं शैतानेरी मदती सेइं भूतां कढताई त तुश्शी औलाद कसेरे मदती सेइं कढती? तैन्ना तुश्शो फैसलो केरनेबाले हाकिम भोले। 20 पन अगर अवं परमेशरेरे शक्ति सेइं भूतां कढताई त परमेशेरू राज़ तुश्शे नेइ पुजोरूए। 21 ज़ैखन कोई ज़ोरेबाले मैन्हु अपने घरेरो पैरहो केरते, त तैसेरू सब किछ बंचेरू रहते। 22 पन ज़ैखन तैस करां कोई निगर मैन्हु तैस पुड़ हमलो केरते त तैस अपने कब्जे मां केरतां तैसेरे सारे हथियार धिनी गाते ज़ैस पुड़ तैसेरो भरोसो थियो, ते तैसेरी सारी जेइदाद लुटी गाते। 23 ज़ै मीं सेइं साथी नई तै मेरे मुखालफे, ते ज़ै मीं सेइं साथी अकोट्टु न केरे ते तै खिलारते। 24 “ज़ैखन केन्ची मैन्हु मरां भूत निस्ते त तैन शुक्कोरो ठैरन मां आराम तोपते ते ज़ैखन तैस तै आराम न मैल्ले त ज़ोते कि अवं वापस तैस्से घरे मां गालो ज़ेइं अवं निसोरोई। 25 ते तैखन तैन भूत वापस एइतां तैन घर साफ़ सुथरू रोड़ू लाते। 26 तेखन तै एप्पू सेइं साथी सत होरां भूतां साथी धिन्तां तैस मां अन्तर गेइतां बिश्शतन, ते तैस मैनेरो हाल पेइले हाले करां जादे बुरो भोते।” 27 ज़ैखन यीशु इना गल्लां ज़ोने लग्गोरो थियो, त भीड़ी मरां अक कुआन्शा ज़ोरे सेइं ज़ोने लगी, “धने तै कुआन्शा ज़ैसां तीं ज़र्म दित्तू ते तू पालो।” 28 पन यीशुए ज़ोवं, “हाँ, पन धन आन तैना लोक ज़ैना परमेशेरू वचन शुन्तन ते तैस पुड़ अमल केरतन।” 29 ज़ैखन हछे लोक भोने लगे त यीशु ज़ोवं, “इस ज़मानेरे लोक बुरेन, तैना निशान तोपतन, पन योनेरे निशानेरे अलावा एन होरो कोई निशान न दित्तो गालो। 30 किजोकि ज़ेन्चरे योना नबी नीनवेरे लोकन जो निशान बनो तेन्चरे मैनेरू मट्टू भी इस ज़मानेरे लोकां केरे लेइ निशान बनेलू। 31 पन दक्षिणेरी रानी आदालतरे दिहाइ इस ज़मानेरे लोकन दोषी बानाली, किजोकि तै बड़े दूरां सुलैमानेरे ज़ानेरे बारे मां शुन्तां ओरी थी। ते इड़ी हेरा सुलैमाने करां भी बड्डोए। 32 नीनवेरे लोक आदालतरे दिहाइ इस ज़मानेरे लोकन सेइं साथी खड़े भोइतां मुर्जम बानाले। किजोकि तैनेई योनारे प्रचार सेइं पापन करां मनफिरावरो थियो, पन इड़ी हेरा तै आए, ज़ै योना करां भी बड्डोए। 33 “कोई मैन्हु दीयो बैलतां भांडे हैठ या ओइकतां न छडे, बल्के उच्ची ठैरी रखतन ताके अन्तर एजने बालन लौ भोए। 34 अछ जानेरे लेइ दीयेरी ज़ेरि आए, अगर तेरी अछ रोड़ीए, त तेरी जानी मां भी लौए, ते अगर तेरी अछछे बुरीए त तेरी जान भी आंधरीए। 35 एल्हेरेलेइ खबरदार रेइयां, कोस्कोई एरू न भोए कि ज़ै लौ तीं मां आए तै आंधरू न भोए। 36 अगर तेरी जानी मां लौए, त तैसेरो कोई भी हिस्सो आंधरो न भोए, त सब एरू भोलू, ज़ैखन दीयो चमकतां लौ देते।” 37 ज़ैखन तै एना

गल्लां ज़ोने लोरो थियो, त केन्चे फरीसे यीशु कां मिनत की, कि मीं सेइं साथी रोटी खा, ते यीशु तैसेरे घरे जेव ते तैसेरे कां गेइतां रोटी खाने बिश्शो। 38 फरीसी लोक एन हेरतां हैरान भोव, कि ए बगैर हथ-पाव धोने रोटी खाने बिश्शी जेव। 39 पन प्रभुए फरीसी सेइं ज़ोवं, “हे फरीसाव तुस कटोरो, ते थाली बेइरमेई त बड़ी साफ केरतथ, पन तुश्शे अन्तर जुलम ते लालच भरताए। 40 हे बेअक्लाव, ज़ैनी बेरीयोवं हिस्सो बनावरोए, तैनी आंट्लेइयों हिस्सो नई बनेरो? 41 बस्सा एन्त्री चीज दान केरा, त हेरा, सब किछ तुश्शे लेइ साफ भोइ गालू। 42 पन हे फरीसाव, तुसन पुड़ अफ़सोस! तुस पुतनेरो ते ज़िरीरो ते कने सेब्जारो दशोवं हिस्सो देतथ, पन तुस इन्साफ केरने करां त परमेशेरे प्यारे करां दूर रातथ, लोड़तु थियूं कि दशोवं हेसे सेइं साथी इन भी केरेथे। 43 हे फरीसाव, तुसन पुड़ अफ़सोस! तुस लोक चातथ कि प्रार्थना घरन मां तुसन एग्री कुर्सन पुड़ बिशालन ते बज़ारन मां लोक तुसन कां झुकतां नमस्कार केरन। 44 पन हे फरीसाव तुसन पुड़ अफ़सोस! तुस तैन छेपोरी कब्रां केरे ज़ेरेथ, जैन पुड़ लोक झलतन, पन तैन पतो न भोए।” 45 तैखन शास्त्री मरां एक्के तैस जुवाब दित्तो, “हे गुरु एना गल्लां ज़ोइतां तू इश्शी तुहीन लोरोस केरने।” 46 यीशुए ज़ोवं, “हे शास्त्री लोकव, तुसन पुड़ अफ़सोस! तुस मैन्न पुड़ त एत्रो भारो लदतथ ज़ै छूनो असुखतो भोते ते पन एप्पू अपने कानूने मन्नेरी कोशिश भी न केरन। 47 तुसन पुड़ अफ़सोस! तुस नेबी केरि कब्रां बनतथ ते तुश्शे दादे-पड़दादेई तैना मारोरे थिये। 48 बस्सा, तुस शहातथ कि तुस अपने दादे-पड़दादां केरे कम्मां केरि पूरी तैइद केरतथ, किजोकि तैनेई त नबी कल्ल कमाए ते तुस तैन नेबी केरि कब्रां बनातथ। 49 एल्हेरेलेइ प्रभु परमेशेरी अक्लां ज़ोवं, नबी त प्रेरित तैन कां भेजनेन तैना तैन मरां किछ कल्ल केरेले ते किछन सताले। 50 बस्सा ई कौम सारे नेबी केरे खूनेरे ज़ै दुनियारे शुरू करां देंतो बगेवरोए ज़िमेवार भोली। 51 हाबिलेरे खूने करां देंतो ते जकर्याहरे कल्ले तगर ज़ै तुसेई मन्दरेरे ते बलिदान केरनेरे ठारो मझाटे मन्दरेरे अंगने मां कल्ल कियोरो थियो। अवं ज़ोताई कि ए कौम तैन केरे खूनेरी ज़िमेवार भोली। 52 पन हे फरीसाव तुसन पुड़ अफ़सोस! तुसेई शास्त्री लोकेई चाबी त अपने कब्जे मां रखबी, पन तुस एप्पू भी दाखल न भोए ते ज़ैना दाखल भोनू चाते थिये तैना भी रोके।” 53 ज़ैखन यीशु तैट्ठां निस्सी जेव त शास्त्री ते फरीसी लोकेई तै घेरो ते सरकरे मारे चेन्ने पासना बड़े असुखते सवाल पुच्छने लगे। 54 ताके यीशुएरे ज़बा एरी गल निस्से ज़ैस सेइं लोक तैस पुड़ गलती लांन।

12 एत्रे मां हज़ारेई मैन्हु अकोट्टे भोइ जे, ते एककी होरि उन्दे खिरकते थिये त यीशुए सेब्बन करां पेड़ले अपने चेलन खड़े भोइतां ज़ोवं, “फरीसी लोकां केरे पाखंडेरे खमीरे यानी तैन केरे रीति रूवाज़न करां हुशार रेइयथ। 2 कोई चीज़ ओड़कोरी नई ज़ै बांदी न भोए, ते न कोई चीज़ छेपोरीए ज़ै ज़ानी न गाए। 3 एल्हेरेलेइ ज़ैना गल्लां तुसेई आंधरे मां ज़ोरिन तैना गल्लां लोई

मां शुनोनिन, ते ज़ैना गल्लां तुसेई अन्तर ज़ोरिन तैन केरू एलान लाए पुड़ भोनूए। 4 “दोस्तव अवं तुसन सेइं सच ज़ोताई कि तैन करां न डेरथ ज़ैना जानी नुकसान पुजातन तैसेरे बाद तैना किछ न केरि बटन। 5 पन अवं तुसन सेइं सच ज़ोताई कि केस करां डरू लोड़ते, ज़ैस जानी मारनेरे बाद तैसेरी आत्माई नरके मां छड़नेरो अधिकारे, हॉ अवं तुसन सेइं सच ज़ोताई कि तैस करां डरा। (Geenna g1067) 6 कुन दूई पेंडसन मां पंच चड़ोली न बिकन? पन परमेशर तैन मरां केन्ची भी न बिसरे। 7 बल्के तुश्शे दोगेरे सारे बाल गनोरेन डरा नन्ना तुस त काई चुड़ोलन करां भी जादे कीमती आथ। 8 “अवं तुसन ज़ोताई कि ज़ै कोई मैन्हु केरे सामने मेरो इकरार केरेलो, त अवं मैनेरू मट्टू भी परमेशेरे स्वर्गदूतां केरे सामने इकरार केरेलो 9 पन ज़ै मैन्हु केरे सामने मेरो इन्कार केरेलो त तैसेरो इन्कार परमेशेरे स्वर्गदूतां केरे सामने कियो गालो। 10 “ज़ैना लोक मैनेरे मट्टेरे खलाफ किछ ज़ोले तै तैस माफ़ केरेलो पन ज़ै पवित्र आत्मा तुहीन केरेलो तैस माफ़ न केरेलो। 11 “ज़ैखन तैना तुसन प्रार्थना घरन मां ते बड़े-बड़े ते अधिकैरन कां नेले त फिफ़्र न केरथ कि अस कुन ज़ोम ते केन्चेरे जुवाब देम। 12 किजोकि पवित्र आत्मा तुसन तैस वक्ते ज़ोलो कि तुसेई कुन ज़ोनूए।” 13 फिरी भीड़ी मरां केन्चे एक्के यीशु सेइं ज़ोवं, “हे गुरु जी मेरे दूलाए जो ज़ो, कि इश्शे बाजी केरि जेइदाती मरां मेरो हिस्सो मेरे हवाले केरे।” 14 यीशुए तैस जुवाब दित्तो, “अवं केनि तुश्शो हाकिम या बंटने बालो बनेवरोई?” 15 ते यीशुए तैन सेइं ज़ोवं, “हर किसमेरे लालच करां दूर भोइयथ ते न केन्चेरी जेइदाद केन्चेरी जानी करां जादे भोए।” 16 तैखन यीशुए तैन अक मिसाल शुनाई, “केन्ची अमीरेरे ज़मीनी मां बड़ी फसल बनी। 17 तै अपने दिले मां सोचतां ज़ोने लगे, कि अवं कुन केरि, मीं कां ठारे नई कि ज़ैड़ी अवं अन्न रेख्खी सेखी? 18 तैखन तैनी ज़ोवं कि, ‘अवं अक कम केरताई, अपने पुराने कोठार पुटतां होरे बड्डे कोठार बनेइ ते अपनू सारू अन्न तैस मां रखेलो। 19 फिरी मीं अपने आपे सेइं ज़ोनूए कि, मीं कां त बड़े सालन तगर अन्न जम्हां भोरूए, मेरी जान आरामे सेइं खा ते एश केरा।’ 20 पन परमेशरे तैस मैन्हु जो ज़ोवं, ‘हे बेवकूफ अजे राती तू मरेलो, ते ज़ैन किछ तीं अपने लेइ जम्हां केरतां रखेरूए तैन केसेरू भोलू?’ 21 एल्हेरेलेइ ज़ै अपने लेइ दौलत जम्हां केरते, पन परमेशेरी नज़री मां तै अमीर न भोए एसेरो भी एरो हाल भोनोए।” 22 तैखन यीशुए अपने चेलन सेइं ज़ोवं, एल्हेरेलेइ तुस न अपने ज़िन्दगरी ज़रूरतरे लेइ फिफ़्र केरा, कि तुस कुन खाले, ते न अपने जानारी कि कुन लामेले। 23 किजोकि प्राण रोटी करां ते जान लिगड़े करां बेधतां भोते। 24 कांवां करां तक्का, तैना न बेन ते न कटन ते न तैन कां गुदाम या कोठार भोन, तांभी परमेशर तैन खाने जो देते ते तुस त चुड़ोलन करां भी जादे कीमती आथ। 25 तुसन मां एरो कौन आए, ज़ै फिफ़्र केरतां अपनि उमर अक घड़ी भी बधैई सकते? 26 बस्सा, ज़ैखन तुस ए अक निकड़ी ज़ेरि गल भी न केरि बटथ,

त बाकी बेड़ी चीजां केरि फिक्र किजो केरतथ? 27 सोसनेरे फूडू बेड़माना केरि जेरि भोली। 47 हर तै नौकर जै ज्ञानते कि तैसेरे केरे तक्का कि तैना केन्नेरे बडोतन? तैना न मेहनत केरन ते न कत्तन, फिरी भी अवं तुसन सेइं जोताई कि राजो सुलैमाने भी अपने सारे धन दौलतरे बावजूद भी तैन केरां जेरां लिगड़ा न लां। 28 बस्सा जैखन परमेशरे मैइदानेरो घास, जै अज आए ते कालां लौवंने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगाइ न देलो? 29 ते एस फिक्रे मां न रेइयथ, कुन खामेले, या कुन पीमेले, या कुन लामेले, ते न शक केरतथ। 30 किजोकि दुनियारी सैरी कौमां एस्से फिक्रे मां लेगोरी रेइचन, पन तुशशो बाजी ज्ञानते, कि तुसन कोनां-कोनां चीजां केरि ज़रूरत आए। 31 पेइले परमेशरेरे राज़ेरे तलाश केरा, फिरी तुसन एना सैरी चीजां मैल्ली गैली। 32 “तुस भैडू केरे निकड़े केन्नेरे ज़ेरथ, तुस कोन्ची गल्लरे लेइ न डरा, किजोकि तुशशे बाजेरी खुशी एस्से मां आए, कि तै तुसन राज दे। 33 अपनू घरबार बेचतां धर्मरथ देथ, ते एप्पू जो अक बेटुवो बनाथ, जै पुरानो न भोए, स्वर्ग मां दौलत जम्हां केरा जै कथे न मुक्के, जैड़ी न ज़ोर पुजे ते न कीड़ो खाए। 34 किजोकि जैड़ी तेरी दौलत भोली, तैड़ी तेरो दिल भी लग्गेलो। 35 “सेवा केरनेरे लेइ रोड़ेचारे कमर बँद्धतां तियार भोथ, ते तुशशे दीये सैरी राती बलते रान। 36 तुस मेरे एजनेरे लेइ एन्चरे तियार राथ, जेन्नेरे मैन्हु केरे अपने मालिके, जै इलाएरे धामी मरां वापस एजने बलगतन, कि जैखन तै एज्जे ते दार गुड़कान त अस दार खोल्लम। 37 तैना नौकर धन आन ज़ैना अपने मालिकेरे वापस एजने पुड़ बींझो मैलतन, अवं तुसन सेइं सच ज़ोताई, कि तै एप्पू तैन रोड़ेचारे नौकरन लिगाइं लेइतां तियार लाएलो, ते मालिक तैन सेइं खुश भोइतां एप्पू सेइं साथी रोटी खाने बिशालेलो ते तैन केरि सेवा केरेलो। 38 अगर मालिक एध्दी राती या झेइरेपार एइतां अपने नौकरन बींझो लाए त तैन नौकरां केरे लेइ केन्नी रोड़ी गल्ले। 39 पन याद रखा, अगर घरेरे मालिके, चोर एजनेरो पतो भोए त तै बींझो राथो ते अपने घरे चोरी न देथो भोने। 40 बस्सा, तुस भी मेरे वापस एजनेरे लेइ तियार राथ, मैनेरू मट्टू यानी अवं तैस वक्ते एज्जेलो जेइस तुसन खियाल भी न भोलो।” 41 पतरसे पुच्छू, “हे प्रभु जै मिसाल तीं शुनाई तै सिर्फ इशे लेइए या सेबभी केरे लेइए?” 42 प्रभुए ज़ोवं, “कौने ईमानदार अक्लमन्द नौकर जेसेरो मालिक तैस अपने नौकरन पुड़ मुन्शी रखे ताके तैन केरि खूराक ठीक मौके पुड़ रोड़ेचारे बंटतो राए? 43 तै नौकर धने कि जेसेरो मालिक एज्जे ते मालिक तैस रोड़ेचारे कम केरतू लाए। 44 अवं तुसन सेइं सच ज़ोताई कि तै अपने सारे घरबारेरी हेरगैशरो अधिकार तैसेरे सुपुर्द केरेलो। 45 पन अगर तै नौकर अपने दिले मां ज़ोए कि मेरे मालिके एजने हेजू बडू चिरे ते होरि नौकरन ते नौकरनन मार धाड़ केरनि शुरू केरे ते खेइ पीतां नशे मां मसत भोइ गाए। 46 ते तैस नौकरेरो मालिक केन्ची एरे दिहाड़े एज्जे जेइस तैस नौकरे एजनेरो पतो न भोए ते ते मालिक एज्जी गाए त तैस नौकरेरे टुकड़े-टुकड़े केरतां ते तैसेरी हालत

मालिकेरी कुन मर्जी आए, कि तै कुन केरे, मगर तै अपने आपे कम केरनेरे लेइ तियार न केरे ते अपने मालिकेरी मर्जी पूरी न केरे तैस पक्की मार बजनीए। 48 पन अगर कोई नौकरे जैस नई पतो कि मेरे मालिकेरी कुन मर्जी, कि अवं कुन केरि, ते तैन केरे जैस सेइं तैस सज़ा मैल्ले, त तैस घट सज़ा मैलेली।” 49 यीशुए ज़ोवं, “अवं धेरती पुड़ अग लांने ओरोई ते अगर अग लग्गोरी भोथी त रोडू थियू। 50 पन मीं बड़े जल्दी दुःख झैल्लनोए, ते अवं बड़ो परेशानई ज़ां तगर दुख न झैल्ली। 51 कुन तुस एन सोचतथ कि अवं धेरती पुड़ मेल कराने लेइ ओरोई? नई! अवं तुसन सेइं ज़ोताई, कि अलग केरने ओरोई। 52 अज़्जेरे बाद अगर एक्की घरे मां पंच मैन्हु भोले त तैना एप्पू मांमेइ बेंटोले, ट्लाई ज़ैना मीं पुड़ विश्वास न केरन तैना दुइयां केरे खलाफ भोले, ते दूई, टलेइयां केरे खलाफ भोले। 53 बाजी मट्टेरे खलाफ भोलो ते मट्टू बाजेरे खलाफ भोलू, हैई कुइयरे खलाफ ते कुई हैईयरे खलाफ ते शिख नुशारे ते नुश शिखारे खलाफ भोनीए।” 54 फिरी यीशुए बड़े मैन्न् मां ज़ोवं, “कि जैखन तुस बिदलार डुबते पासेरां च़लती लातथ त तुस ज़ोतथ कि झड़ी एजने बालीए ते तैन्ने भोते। 55 ते दक्षिणेरे पासेरां हवा च़ली त तुस ज़ोतथ गर्मी भोरीए ते तैन्ने भोते। 56 हे पाखंडी लोकव, तुस धरती ते अम्बरेरो हाल हेरतां मौसमेरो अंदाज़ो केरनो ज्ञानतथ, पन इन न ज़ैनी बटथ कि, परमेशर कुन चाते? 57 “तुस एप्पू फैसलो केरा कि, तुशशे लेइ कुन रोडूए। 58 जैखन तू लीडरे सेइं साथी हाकिमे कां गाथ त बत्ते मां तेस सेइं फैसलो की न केरस, एरू न भोए ते तीं हाकिमे कां ने ते हाकिम सिपाहीएरे हवाले केरे, ते तू कैद भोइ गास। 59 अवं तुसन सेइं ज़ोताई कि ज़ां तगर तू पाई-पाई न देले त तांतगर तैडुं छुट्टी न सकेलो।”

13 तैस मौके किछ लोक तैड़ी आए, तैना यीशु सेइं तैन गलील इलाकेरे लोकां केरे बारे मां ज़ोने लगे, जैन केरो खून, रोमेरे गवर्नर पिलातुसे मन्दरे मां जानवरां केरे बलिदाने सेइं साथी मलेवरो थियो। 2 यीशुए तैन जुवाब दित्तो, “कुन तुस एन समझतथ कि तैन गलीलेरे लोकां केरो एत्रो बुरो हाल एल्हेरेलेइ भोवं, कि तैना बाकी गलीलेरे लोकन करां जादे पापी थिये? 3 अवं तुसन सेइं ज़ोताई कि, अगर तुस भी पापन करां मन न फिराले त सब एन्चरे नाश भोनेथ। 4 या कुन तैना अठारे ज़न्हे जैन उन्ढो शीलहेरो गुम्मत बिछड़ोरो थियो, ते तैना सब तैस हैठ मेरि जे, ते तैना यरूशलेम नगररे होरि लोकन करां पापी थिये? 5 अवं तुसन सेइं सच ज़ोताई, कि नई बल्के अगर तुस भी पापन करां मन न फिराले त तुस सब एन्चरे नाश भोइ गानेथ।” 6 तैसरां बाद यीशुए तैन अक मिसाल देइतां ज़ोवं, “केन्वे मैने अपनि बागी मां अक फ्रेगोरो बुट लोरो थियो, ते तैस बुट्टे पुड़ हर साल फल तोपने अव पन तैस फल न मैल्लो। 7 तैखन तैनी बागबने सेइं ज़ोवं, ‘हेर अवं ट्लाई सालां केरो देंतो इस फ्रेगरे बुट्टे पुड़ फल लोरोई तोपने, पन अज तगर एस पुड़ फल न

मैल्लो एस केट्टी छड़ एनी किजो रोड़ी ठार चिकतां रखोरीए?’ 8 पन तैनी तैस जुवाब देइतां ज़ोवं, मीं निदतां एसेरे चेन्ने पासन खाद छड़नियें। 9 अगर फिरी भी फल न लगे त फिरी केट्टी देनोए।” 10 एककी आरामेरे दिहाड़े यीशु प्रार्थना घरे मां शिक्षा देने लोरो थियो। 11 हेरा, तैड़ी अक कुआन्श थी ज़ैस अठारे सालां केरि देंती भूतेरे सेइयेरे वजाई सेइं कुबड़ी भोरी थी। तै सिंधी न थी भोड़ बटती। 12 यीशुए तै कुबड़ी कुआन्श लाई त एप्पू कां कुजाई ते ज़ोवं, “हे कुआन्श, तू अपनि तकलीफी करां छुटी जेई।” 13 ते यीशुए तैस कुआन्शी पुड़ हथ रखे ते तै लूशी बेज़्ज़ोइं ते परमेशेरी तारीफ़ केरने लगी। 14 पन प्रार्थना घरेरो प्रधान यीशु पुड़ नराज़ भोव कि, एनी ए कुआन्श, आरामेरे दिहाड़े किजो बज़्ज़ाई ते ज़ोने लगे, “हफते मां शा दिहाड़े कम काज़ केरनेरे लेइ आन, ते तेन्ने मां कोई बज़्ज़ावरो भी लोड़चे, ते आरामेरी दिहैड़ी न।” 15 प्रभु यीशुए तैस जुवाब दित्तो, “ए पाखंडी लोकव कुन तुस आरामेरी दिहाड़ी अपने दांत या गधे खोलतां तैन पानी पियाने न नेथ? 16 त कुन एन रोडू न भोवं कि ज़ै कुआन्श बेज़्ज़ोइ त अब्राहमेरे खानदाने मरां ए, ज़ै अठारे सालां केरि देंती शेताने गुलैमी मां रखोरी थी त आरामेरे दिहाड़े ए कुआन्श छुटानी न थी?” 17 ज़ैखन यीशुए एना गल्लां जोई त तैसेरे खलाफ ज़ोने बाले सेब्भी केरि बेड़ज़ती भोड़, ते सारे लोक यीशुए ज़ैना महिमारां कम्मां अपने हथेइं कियोरां थियां खुशी मनाने लगे। 18 तैखन यीशु तैन सेइं ज़ोने लगे, “परमेशेरू राज़ कौस चीज़री ज़ेरूए अवं केस सेइं जोई? 19 तन शेरीएरे बीज़ेरू ज़ेरू आए, ज़ैन एककी मैने एन्तां अपनि बागी मां बेवं, पन ज़ैखन तैन बीज़ बेव गाते, तै उगातां सारे निक्के-निक्के बुटन केरां बड़ो भोते। ते अम्बरेरां चुड़ोल्लू भी तैस पुड़ बिशने लगां।” 20 यीशुए फिरी ज़ोवं, “अवं परमेशेरें राज़ेरी मसाल केस सेइं देई? 21 तैन खमीरेरू ज़ेरूए, ज़ैन केन्ची कुआन्शां आनू, ते हछे अट्टे मां मलाव ते सारू अट्टू खमीर बेनि ज़ोवं।” 22 यीशु अपने चेलन सेइं साथी यरूशलेम नगरे मांमेइं गाते बार नगरन मां ते इल्लोव्वन मां शिक्षा देंतो च़ल्लोरो थियो। 23 केन्चे यीशु पुच्छू, “हे प्रभु कुन थोड़े ज़ेरे लोक हमेशारी सज़ाई करां बचेलें?” यीशु तैन सेइं ज़ोवं। 24 “परमेशेरें राज़े मां सुन्कड़े दारेरां बत्तां गानेरी कोशिश केरा, किजोकि अवं तुसन सेइं ज़ोताई कि बड़े लोक अन्तर गानेरी कोशिश केरेले पन न गेइ सकेले। 25 ज़ैखन घरेरो मालिक एककी बार दार बंद केरि छड़ते, त तुस बेइर खड़ खड़े दार गुड़काते, ते बिनती केरते राथ कि, ‘हे प्रभु इश्शे लेइ दार खोल्ल,’ ते तै तुसन जुवाब देते कि अवं तुसन न ज़ैनी तुस कौन आथ ते कोठां ओरिथ? 26 तैखन तुस ज़ोले कि, ‘असेईं तीं सेइं साथी खोरी पियोरी नई, ते तीं इश्शे अंगने मां असन शिक्षा नई दित्तोरी।’ 27 पन तै तुसन सेइं ज़ोलो, ‘अवं तुसन न ज़ैनी तुस कौन आथ, ते कोठां ओरिथ हे बेइमानव मीं करां दूर भोथ।’ 28 ज़ैखन तुस अब्राहम, इसहाक ते याकूब ते सब नेबन परमेशेरें राज़े मां सामने लाएले ते अपनो आप बेइरोवं कढते लाएले, त

लेरां देते ते दंत चापते राले। 29 लोक पूर्वरां ते पछमेरां ते उत्तर ते दक्षिणेरे देंते यानी दुनियारे सारे लोकन मरां लोक परमेशेरें राज़ेरी धामी मां एइते लाएले। 30 ते हेरा किछ एरेन कि ज़ैना पेइले आन, तैना पत्रोवं भोनेन ते ज़ैना पत्रोवं आन, तैना पेइले भोनेन।” 31 तैखने किछ फरीसी लोक यीशु कां आए ते ज़ोने लगे, “इड्डां निस ते च़लो गा, किजोकि हेरोदेस तीं मारने चाते।” 32 पन यीशुए तैन ज़ोवं, तैस मैन्हु सेइं ज़ै लोई अरो ज़ेरो आए, गेइतां तैस सेइं ज़ोथ कि, “अवं अज़ ते कालां भूतां केरो सैयो कढने ते बिमारन बज़्ज़ानेरू कम केरने लोरोई ते एन कम टलेइ दिहाइन मां मीं पूरू केरनूए। 33 बस्सा मीं अज़ ते कालां ते टलेईदी मीं सफर केरनूए, किजोकि नबी सिर्फ़ यरूशलेम नगरे मां मारे गाले। 34 “हे यरूशलेमे नगरेरे लोकव, हे यरूशलेमे नगरेरे लोकव, तुसेईं केन्ने नबी कल्ल किये, ज़ैना बड़े पेइले तुसन कां आए, ते ज़ैना तुसन कां भेजे तैन घोड़ेई बेई, मीं केही फेरेई सोचू कि तेरे बच्चन अकोट्टे केरि ज़ेन्चरे कुकड़ी अपने बच्चन अपने फंगन हैठ रखचे, पन तुस राज़ी न भोए। 35 हेरा तुश्शू घर तुश्शे लेइ छड़ू गाते, ते अवं तुसन सेइं ज़ोताई कि तुस मीं केन्ची तरीके भी न लेई सकेले, ज़ांतगर तुसन एन ज़ोनेरो मौको न एज्जेलो, धने तै ज़ै प्रभुएरे नंचे सेइं एइते।”

14 यीशु फिरी आरामेरे दिहाड़े एककी फरीसेरे घरे रोटी खाने जेव त बड़े फरीसी लोक ध्याने सेइं लोरे थिये तकने, ताके तैसेरी कोई गलती ट्लान। 2 तैड़ी अक बिमार मैन्हु थियो ज़ेसेरी जंघां पैखड़ी शोजती थी ते पस-पाक च़लती थी, तै तैड़ी बिशोरो थियो। 3 यीशुए शास्त्री ते फरीसी लोकन पुच्छू, “कि आरामेरे दिहाड़े कानूनेरे मुताबिक कोई बज़्ज़ानो जेइजे की नई?” 4 तैना चुप राए, तैखन यीशुए तैस बिमारे पुड़ अपनो हथ रखखो ते तै बज़्ज़ाव, ते घरजो भेजो। 5 ते फरीसन सेइं ज़ोवं, “तुसन मरां एरो कौने, ज़ेसेरू मट्टू या दांत खट्टे मां खिरके ते आरामेरी दिहाड़ी भोए, ते तैस तैट्ठां बेइर न कढे?” 6 ते तैन लोकेई यीशुएरी गल्लां केरो जुवाब न देइ बटो। 7 ज़ैखन यीशुए हेरू कि, ज़ैना लोक धाम ज़ोइतां रोटी खाने कुजोरेन केन्चरे खास लोकां केरि ठार चुनतन, तैनी तैन अक मिसाल दित्ती। 8 “ज़ैखन तुसन कोई इलाएरी धामी मां कुजाए। ज़ै तेनेई खास मैन्हु केरे लेइ ठार रखखोरी भोए, तुस तैड़ी न बिश्शथ, भोड़ सकते कि होरो कोई तुसन करां जादे खास मैन्हु कुजेवरो भोए। 9 ते तुसन दुइये ज़न्न कुजाने बालो तुसन कां एइतां जोए, ए ठार होरि केरे लेइए ते तुसन शरमेइतां खड़े उठनू पे, ते सेबभन करां पत्र बिश्नू पे। 10 ज़ैखन भी कोई तुसन धाम ज़ोइतां कुजाए त सेबभन करां पत्र बिश्शा, ताके ज़ैखन तेरो कुजाने बालो एज्जे ते जोए, ‘दोस्त, अगर एइतां खास ठैरी बिश्,’ त तैन लोकां केरे सामने तेरी केत्री बड़याई भोनीए। 11 किजोकि ज़ै कोई अपनो आप बड़ो बनालो त तै निकड़ो बनाव गालो ते ज़ै कोई अपनो आप निकड़ो बनालो त तै बड़ो बनाव गालो।” 12 फिरी यीशुए, तैस फरीसी मैन्हु सेइं ज़ैनी तै कुजोरो थियो ज़ोवं, “ज़ैखन

तुस दिसेरी या रातरी धामी मां मैनन् कुजाथ, त अपने दोस्तन या ढलान रिशतेदारन या अपने अमीर पडोसन न कुजेइयथ। किजोकि तैना भी तीं कुजेइतां तेरु एवसान मुकेइ छडेले। 13 बल्के जैखन तुस धाम देथ त टोंटे, कानो, गरीब गुरबे, परदेशी कुजेइयथ। 14 ते परमेशर तुसन बरकत देलो, किजोकि तैन कां किछ भी नई जैस सेइ तैना तुशू एवसान मुकेइ बटन, ते तेरे एस एवसानेरो फल धेमी लोकन जीते भोने सेइ साथी फैसलेरी दिहैड़ी मैलेलो।” 15 टलाहनन् मरां एक्के एन गल्लां शुन्तां यीशु सेइ जोंव, “परमेशरेर राज़ेरी धामी मां खाने बालो धन भोलो।” 16 यीशुए तैस जुवाब दितो, “केन्चे मैने अक बड़ी धाम दिती ते बड़े लोक कुजाए। 17 जैखन रोटी खानेरो वक्त अव त तैनी अपनो नौकर भेजो कि तैन लोकन जैन जो इलाएरी धाम बनोरी थी, ‘एज्जा, रोटी बनोरोए।’ 18 पन धामी बालेई सेभेई मिलतां एतराज़ कियो ते पेड़ले मैने जोंव, ‘मीं ऊडार घिन्नेरु आए, मीं तैस हेरने गानूए ते अवं तीं कां मिनत केरतां कि मीं राने दे।’ 19 त होरो ज़ोने लगे, ‘मीं पंच हल्लां दांत घिन्नेरेन ते अवं तैन लाने परखने चलोरोई। अवं तीं कां मिनत केरतां कि मीं राने दे।’ 20 अक होरो मैन्हु लगे ज़ोने, ‘मीं इला बनावरोए, एल्हेरेलेइ अवं न एज्जी बेटि।’ 21 तैखन नौकरे वापस एइतां एन सैरी गल्लां अपने मालिके शुनेई, त मालिके बड़ी सरक अई, तैनी अपने नौकरे जो ज़ोव, ‘इस नगर मां गा ते लेंगे लुथे, गरीब गुरबे नगरे, नियन्ने भत्ते, टोंटे, कानो इरां कुजा।’ 22 नौकरे ज़ोव, ‘हे मालिक जैन तीं ज़ोव, मीं तैन्ने कमाव, पन फिरी भी ठार खाली आए।’ 23 मालिके नौकरे सेइ ज़ोव, ‘बतारे आसे पासे ऊडारन मामेई गा ते लोक मजबूर केरतां आन, ताके मेरु घर भरतां भोए। 24 किजोकि अवं तीं सेइ ज़ोताई कि जैन लोक पेड़ले कुजेवरे थिये, यानी खास ठैरारे लेइ कुजेवरे थिये, तैन मरां कोई भी मेरी धामी मां रोटी न खेइ सकेलो।” 25 बड़े लोक यीशु पत्ती चलोरे थिये, यीशुए पत्रोंव तक्कू ते ज़ोव। 26 “अगर कोई मीं कां एज्जे, ते अपने अम्मा बाजी, कुआन्हा, बच्चन, ढलान ते बेइन्न ते अपने जानी करां जादे प्यार मीं सेइ न केरे त तै मेरो चेलो न भोइ सके। 27 ते ज़ै कोई मेरो चेलो भोनेरी वजाई सेइ दुःख झैल्लनेरे लेइ त कने मरनेरे लेइ तियार नई, त तै मेरो चेलो न भोइसखे। 28 तुसन मरां एरो कोई भोए, ज़ै गुम्मत बनानू चाए, ते पेड़ले बिश्तां हिसाब न केरे, कि पूरो केरनेरे लेइ मीं कां खर्चों आए कि नई। 29 कथे एरु न भोए कि खाइ कटनेरे बाद तैस बनेइ न सके ते तकने बाले हसते रान। 30 ‘ते ज़ोन एनी मैने बनानू त शुरू कियूं, पन बनेइ न बटो।’ 31 या फर्ज़ केरा कि कोई राज़ो होरि राज़े सेइ लड़ाई केरनेरे लेइ सोची राहोरो भोए त कुन पेड़ले एन न सोचे कि 10000 फौजी जवानन् सेइ अवं 20000 फौजी जवानन सेइ तैसेरो मुकाबलो केरि सकतां कि नई? 32 अगर तै मुकाबलो न केरि सखे त तैस फौजी सेइ ज़ै दूरे, मैन्हु भेजतां तैस सेइ सल्लारी मिनत केरेलो। 33 एन्चरे अगर ज़ै कोई तुसन मरां अपनू सब किछ न छडे त मेरो चेलो न

भोइसखे। 34 “लून रोड़ी चीज़े, पन अगर लूनेरो लूनार मुकी गाए त तैन कोस सेइ लूने बनाव गालू? 35 लोक तैस बेइरोवं शेरी देले, ज़ै कोई समझनू चाते, तै ध्याने सेइ शुने ते समझो।”

15 बड़े लोक धड़त घिन्ने बाले ते पापी लोक यीशु कां एइतां तैसेरी गल्लां शुन्ने लोरे थिये। 2 फरीसी ते शास्त्री लोक शिकयत केरतां ज़ोने लगे, “कि ए मैन्हु पापी लोकन सेइ तालमेल रखते, ते तैन सेइ साथी खाते पीते।” 3 यीशुए तैन अक मिसाल देइतां ज़ोवं। 4 “तुसन मां एरो कोई आए ज़ैस कां 100 भैड्ठां भोन ते तैन मरां अक हेरोए ते 99 भैड्ठां तैड़ी ज़ेरे जंगले मां छेइतां तोपने न गाए, ज़ां तगर तैस मैल्लोरी नई? 5 ते ज़ैखन ते तैस मैल्ले त खुशी सेइ कंधे पुड़ छुइतां आने। 6 ते अपने घरे एइतां अपने दोस्तन ते भियालन कुजेइतां ज़ोए कि, ‘अज़ मीं सेइ साथी खुशी मनाथ, किजोकि अज़ मेरी हेरोरि भैड मैलोरीए।’ 7 अवं तुसन सेइ ज़ोताई कि, एन्चरे 99 धर्मी ज़ैनेई पेड़ले अपने पापन करां मनफिरावरो तैन करां जादे ज़ैखन अक पापी, पापन करां मन फिराते स्वर्ग मां बड़ी खुशी बनाई गाचे। 8 “कुन एरी भी कोई कुआन्हा भोली जैस कां चेंदरे दश सिके भोन ते अक हेरोए ते ते दीयो बैलतां घरे अन्तर धूनी न दे, ते ज़ां तगर मैल्ले न तांतगर तोपती न राए? 9 ते तोपनेरे बाद अपने पडोसन ते अपनि सेहेलन कुजेइतां एन न ज़ोए कि, ‘एज्जा मीं सेइ साथी खुशी मनाथ किजोकि अज़ मेरो हेरोरो सिको मैलोरोए।’ 10 बस्सा, अवं तुसन सेइ ज़ोताई कि एक्की पैपेरे, पापन करां मन फिराने सेइ परमेशरेरे स्वर्गदूतां केरे सामने बड़ी खुशी मनाई गाचे।” 11 यीशु फिरी होरि मिसाल दिती, “केन्ची मैनेरां दूई मट्ठां थियां। 12 तैन मरां निकड़े मट्ठे अपने बव्वे सेइ ज़ोव, ‘हे बाजी जेइदाती मां ज़ै मेरो हिस्सो बनते तै मीं दे।’ तैनी दुइने हिस्सो बंटतां दितो। 13 थोड़े दिहैइना पत्ती निकड़े मट्ठे अपनू सब किछ जेइदात होरि मुखखे जो नी, ते बुरे कम्मन मां लुट्टाई। 14 ज़ैखन तैनी सब किछ मुकेइ छडू त तैस मुखखे मां बड़ो काल पेव, ते तैस कां खाने जो किछ न राऊं। 15 तैखन तै तैस मुखखेरे एक्की रानेबाले कां कम तोपने पुज़ो। तैनी तै अपने ऊडारन मां सूर चारनेरे कम्मे लाव। 16 तैड़ी तै बड़ो ढलुखोरो थियो, तै तैन खाने मां राज़ी थियो ज़ैन सूर खाते थिये, किजोकि तैस केन्चे किछ खाने जो न दित्तू। 17 तैखन तैस समझ आई ते ज़ोने लगे, ‘मेरे बाजी केरे मज़दूर रेजतां रोटी खातन, पन अवं इड़ी फाके लोरोई मरने। 18 मीं खड़े उठतां अपने बाजी कां गानूए ते तैस सेइ ज़ोनूए हे बाजी अवं परमेशरेरी नज़री मां ते तुशूरी नज़री मां पापी आई। 19 हुनी अवं एस काबल त नई, कि तुशू मट्ठू भोइ, पन मीं भी अपने मज़दूर मां रखा।” 20 “बस्सा, तैनी तै मुखखे शारो ते वापस अपने बाजी कां चलो, ते हेजू ते बड़े दूरे थियो, ते तैसेरे बाजे तै लाव ते तैसेरे बाजी तैस पुड़ बड़ो तरस अव, ते तै दौवड़तो अपने मट्ठे कां जेव, ते तैन गले लाव ते बड़ी खुशी भोव। 21 मट्ठे अपने बाजी सेइ ज़ोव, ‘ए बाजी अवं परमेशरेरी नज़री मां ते तुशूरी नज़री मां पापी आई। हुनी अवं एस काबल त नई कि,

अपने आपे जो तुशू मट्टू जोई।' 22 पन बाजे अपने नौकरन सेइं ज़ोवं, 'लूश केरा ते सेबनन करां पेइले रोड़ां लिगड़ां एस मट्टे लुवाथ, ते एसेरे हथ्ये आंवठी ते पावन बूट लुवाथ। 23 ते अक जानवर मारो ते बड़ी धाम बनेइतां बड़ी खुशी मनाई। 24 किजोकि मेरू मट्टू ज़ैन जेन्चरे मेरि जोरू थियूं, अज़ ज़ींतू भोरूए, हेरोरू थियो, ते मैलोरूए।' बरसा तैना खुशी मनाने लगे।" 25 "तेइस बडू मट्टू ज़ैन ऊडारे मां कम केरतां घरजो ओरू थियूं, ज़ैखन ते घरे नेई पुजो त तैनी गीतां केरि त नचनेरी शौर शुनी। 26 तैनी अक नौकर कुजाव ते तैस पुच्छू, 'ए शौर कीजेई लोरी भोने?' 27 नौकरे तैस सेइं ज़ोवं, 'तेरो निकडो दूला वापस घरे ओरोए ते तेरे बाजे अक जानवर मैरतां धाम बनोरीए, किजोकि ते ठीक ठाक घरे पुजोरोए।' 28 पन तैस मैनेरू बडू मट्टू नाराज़ भोवं ते अन्तर घरे मां भी न लगे एजने, पन तैसेरो बाजी बेइर अव, ते तैस मिठानेरी कोशिश की, कि घरे अन्तर एज्जे। 29 बडे मट्टे अपने बाजी सेइं ज़ोवं, 'हेरा अव केत्रे सालां केरि देंती तुशू सेवा केरने लोरोई, ते कथे तुशूओ हुक्म नई मोडोरो ते तुसेई कथे कोई छेडू नई दित्तोरोए कि अव भी अपने दोस्तन सेइं खुशी मनेई। 30 पन ज़ैखन तुशू निकडू मट्टू अपनू सब किछ लुटेइतां वापस अव, त तैसेरेलेइ जानवर मारो ते अक बड़ी धाम बनाई।' 31 तैसेरो बाजी ज़ोने लगे, 'भेरा मट्टां तू त मीं कां आस ते ज़ैन किछ मीं कांए तैन सब तेरूए। 32 पन असेई खुशी मनानी ज़रूरी थी किजोकि तेरो ए निकडो दूला ज़ै जेन्चरे मेरि जोरो थियो, अज़ ज़ींतो भोरोए, हेरोरो थियो ते अज़ मैलोरोए।"

16 फिरी यीशुए अपने चेलन अक होरि मिसाल दित्ती कि, "केन्वी अमीरेरो अक मुन्शी थियो, लोकेई तैसेरी शकैइत तैसेरे मालिके सेइं लाई कि, ए तेरो माल बरबाद केरने लोरोए। 2 मालिके ते कुजाव ते ज़ोवं, 'एन कुने ज़ैन अव तेरे बारे मां शुन्ने लोरोई? सारो हिसाब-किताबे मां अजेरां बाद तू मेरो मुन्शी नई रालो।' 3 मुन्शे अपने दिले मां सोचू मेरो मालिक मेरे कम्मे करां मीं कढने लोरोए, मीं मज़दूरी भी न केरोए ते शमरिमारे भीख भी न मैगोए। 4 'अव ज़ानताई कि, मीं कुन केरनूए इट्ठां कढनेरे बाद मीं लोक खुशी सेइं अपने घरे मां कबूल केरतन।' 5 बरसा तैनी अपने मालिकेरो अक कर्जदार तोपते, पेइले एककी पुच्छू तीं कां मेरे मालिकेरे केत्रे रुपेइयेन? 6 तैनी जुवाब दित्तो, ज़ैतूनेरे तेलेरे 100 पीपां केरि कीमते, तैनी ज़ोवं इना रां तेरां काकलां, ते बिश्तां 50 पीपे बना। 7 फिरी तैनी मुन्शे होरि सेइं ज़ोवं, 'तीं कां केत्रो कर्जोए?' तैनी ज़ोवं, 'गेहुं केरि 100 बोरी,' तैनी ज़ोवं, 'यां काकलां ते बिश्तां 80 लिखी।' 8 मालिके तैस बेईमान मुन्शेरी तारीफ़ की, एल्हेरेलेइ कि तैनी बेडि च़लैकी सेइं कम कियेरू थियूं। किजोकि इस दुनियारे लोक अपने लोकन सेइं सौदो केरनो परमेशेरे लोकन करां बडे हुशारी सेइं केरतन। (aiōn g165) 9 अव तुसन सेइं जोताई कि दौलत खर्च केरतां इस दुनियारे लोकन दोस्त बनाथ, तुसन मरनेरां बाद हमेशारू घर मैलनूए। (aiōnios g166) 10 ज़ै थोड़े ज़ेरे मां इमानदेरी सेइं रहते

ते हछे मां भी ईमानदार रहते। ज़ै थोड़े करां थोड़े मां भी बेइमाने ते हछे मां भी बेइमाने। 11 बरसा अगर तुस बेइमानेरे धन दौलती मां ईमानदार न भोए, त अपनि सज़्जी दौलत ज़ै स्वर्गे मां आए, कौन तुशे हवाले केरेलो? 12 अगर तुसेई होरि केरे माले मां ईमानदार न भोए, त ज़ै तुशो अपनो माले कौन तुसन देलो? 13 कोई नौकर दूई मालिकां केरि सेवा एककी वक्ते मां न केरि सके। न त एककी सेइं दुश्मनी केरेलो ते होरि सेइं प्यार केरेलो, या एककेरो बेनतां रालो त होरि न सुखालो। तुस परमेशेरी ते दौलतरी, दुइयां केरि सेवा न केरि सकतथा।" 14 तैखन फरीसी लोक ज़ैना दौलतरे लालची थिये, एन गल्लां शुन्तां यीशुएरी हासी बनाने लगे। 15 यीशु तैन जो ज़ोवं, "तुस तैना आथ ज़ैना लोकन मां अपनो आप बड़ी धर्मी हिरातन। पन परमेशर तुशे दिलेरी हालत ज़ानते किजोकि ज़ै चीज़ लोकां केरे लेइ बड़ी बड्डीए ते ते परमेशेरी नज़री मां भिट्टी आए।" 16 "मूसेरे कानून ते नेबी केरि गल्लां यूहन्ना बपतिस्मो देनेबाले तगर रेइ, ते फिरी परमेशेरे राज़ेरी खुशखबरी शुनाने लगे ते हर कोई तैस मां दाखल भोनेरी बड़ी कोशिश केरने लगारेन। 17 पन धरती अम्बर देली गालू पन परमेशेरे कानूने मरां अक बिंदी भी न मिटेली। 18 ज़ै कोई अपनि कुआन्श शेरतां होरि सेइं इला बनाते ते तैस सेइं बदमाशी केरते ते ज़ै शैरोरी कुआन्शी सेइं इला बनाते ते भी बदमाशी केरते।" 19 "अक मैन्हु बडो अमीर थियो, ते तै बैंगनी लिगड़ां लातो थियो, ते बड़ां माघो लिगड़ां लातो थियो। ते रोज़ एश अशरती मां मसत रातो थियो। 20 अक बडो गरीब मैन्हु जेसेरू नव लाज़र थियूं तैसेरे दारे कां एन्तां रखोरो थियो, तैसेरी सारी जान खेराइइं सेइं भेरतां थी। 21 ते चातो थियो, कि अमीर मैनेरे टुकेइं सेइं अपनू पेट भेरि, पन तैडी कुतरां एइतां थियां ते तैना तैसरां खेरड़ां भी च़टतां थियां। 22 फिरी एरू भोवं कि ते गरीब लाज़र मेरि जेव स्वर्गदूतेई ते छुइतां अब्राहमे कां पुज़व, ते अमीर मैन्हु भी मेरि जेव ते तै दैब्बी छुड़ो। 23 ज़ैखन तैनी पातालेरे दुखे मां अपनि एछछी घेड़ी? त दूरेरां तैनी अब्राहम ते तैस कां नेइ लाज़र लाव। (Hadēs g86) 24 ते चिन्दां मैरतां ज़ोने लगे, 'ए बाजी अब्राहम मीं पुड़ दया केर, एस लाज़रे भेज़ ते ए अपनि अंगलोई पैनी सेइं सेलतां मेरे ज़िभी पुड़ लाए, किजोकि अव अग्गी मां तड़फने लोरोई।' 25 पन अब्राहमे ज़ोवं, 'मट्टां याद केर तीं त अपनि जवेंनी मां सब रोड़ी चीज़ां मैल्ली ते इस लाज़रे सिर्फ़ बुरी चीज़ां मैल्ली, पन ए हुन्ना इडी आरामे मांए ते तू तकलीफी मां आस। 26 ते एन गल्लां केरे अलावा इश्शे ते तुशे मझाटे अक बड्डी खाईए, ताके ज़ै कोई पार गानू चाए न गोइ सखे ते ज़ै वार एजनु चाए न एज्जी सखे।' 27 तैनी मैने ज़ोवं, ए बाजी अब्राहम, अव ज़ोवले हथ केरतां ज़ोताई कि, तू लाज़रे दुनियाई मां मेरे बाजी केरे घरे भेज़। 28 तैडी मेरे पंघ दूला आन ते ते तैन हदायत दे कि, एरू न भोए ते तैना भी इस अग्गी मां एजान। 29 पन अब्राहमे तैस ज़ोवं, 'तैन केरि हदायतरे लेइ तैन कां मूसेरो कानूने ते नेबी केरि किताबां त आन तैना तैन शुनन् ते

मनन।' 30 तैनी मैने ज़ोवं, 'नई ए बाजी अब्राहम अगर कोई मुडन मरां ज़ीतो भोइतां गाए त तैना ज़रूर पापन करां मन फिराले।' 31 पन अब्राहम तैस सेइं ज़ोवं, 'अगर तैना मूसेरी ते नेबी केरि न शुनी ते अगर कोई मुडन मरां ज़ीतो भोइतां गाए त तैना तैसेरू भी याकीन न केरेले।' 20

17 फिरी तैनी अपने चेलन सेइं ज़ोवं, 'एन न भोइसखे कि लोकन ठोकर न लागे, पन अफ़सोस तैस मैन्हु पुड़ ज़ै होरि केरे लेइ ठोकर बनते। 2 तैसेरेलेइ त एन्ने रोड़ थियूं, कि दूलाटेरो दूलेइटोल तैसेरे गल्ले उन्डो छेइतां ते समुन्द्रे मां शैरतां छुटो गाथो, ताके तै होरि जो ज़ैना विश्वासो मां कमज़ोरन ठोकर न बने। 3 बरसा हुशार राथ तुस कुन केरतथ, अगर तुशशो विश्वासी दूला पाप केरते त तैस समझाथ ते अगर तै पापन करां मन फिराए त तैस माफ़ केरा। 4 अगर तै एक्की दिहैड़ी मां तेरो सत्ते बार तेरो पाप केरे त अगर तै सत्ते फेरेई तीं कां एइतां माफ़ी मग्गे त तू सत्ते फेरेई तैस माफ़ केरां।' 5 प्रेरितेई प्रभु सेइं ज़ोवं, 'हे प्रभु, इशरी मदत केर कि अस होरे भी मज़बूती सेइं विश्वास केरम।' 6 प्रभु यीशुए ज़ोवं, 'अगर तुशशो विश्वास सिबलारे गलेवे बराबर भी भोलो त तुस इस तूतरे बुटे जो ज़ोई सकतथ इट्ठां उखड़ ते समुन्द्रे मां लग त तै तुशशो हुक्म मनेलो। 7 'तुसन मां एरो कौन आए, ज़ेसेरो नौकर ऊडारां बेंतो भोए या गोरू च़ारतो भोए ते ज़ैखन ते ऊडारे मरां घरे एज्जे त तैसेरो मालिक तैस ज़ोए कि, 'लूशी बिश्श ते रोटी खा।' 8 या एन न ज़ोए कि मेरी रोटी तियार केरथ ते ज़ां तगर अवं खेइ पीं नन्ना ते ज़ां तगर अवं रेज़्ज़ी नन्ना तू मेरी सेवा केरतो राए, तैल्ला पत्ती तू भी खा?' 9 कुन तै एल्हेरेलेइ नौकरेरू अहसान केरेलो कि, तीं तैन कियूं ज़ैन तीं केरनेरे लेइ ज़ोवरू थियूं? 10 एन्चरे ज़ैखन तुस एन सब केरेले ज़ैस केरनेरो तुसन हुक्म दित्तोरो थियो, त ज़ोथ कि, 'असां निकम्मे नौकर आम? असेई तैन्ने कियूं ज़ैन केरन चाते थियो।' 11 एक्की फेरे यीशु त कने तैसेरे चेले यरूशलेम नगरेरे पासे च़लारे थियो। तैना सामरिया ते गलीले इलाके मांमेइं च़लारे थियो। 12 ज़ैखन तैना एक्की इलव्वें मां पुज़ने बाले थियो ते तैड़ी दश कोढ़ी मैल्ले ज़ैना दूर खेडोरे थियो। 13 तैनेई बड़े ज़ोरे सेइं ज़ोवं, 'हे यीशु, हे प्रभु, असन पुड़ दया केर।' 14 यीशुए तैन लेइतां ज़ोवं, 'यरूशलेम नगरेरे मन्दरे मां गाथ ते अपनो आप याजकन हिराथ, ते सच्चे एरू भोवं कि गाते बार बत्तां तैन केरू कोढ़ साफ़ भोइ जेवं।' 15 पन तैन मरां अक कोढ़ी अपनू कोढ़ हेरतां कि, तैसेरू कोढ़ साफ़ भोरुए खुशी भोइतां बड़े ज़ोरे सेइं परमेशेरी तारीफ़ केरतो वापस यीशु कां अवं 16 ते ते यीशुएरे पावन पुड़ दोग्ग रेखतां शुक्रु लगो केरने। ए मैन्हु सामरी थियो। 17 यीशुए तैस पुच्छू, 'कुन तैन दश कोढ़ी केरू कोढ़ साफ़ नई भोवरू? फिरी तैना कोरां जे? 18 कुन एस गैर यहुदी मैनेरे अलावा तैन होरन एत्री हिम्मत न अई, कि गेइतां परमेशेरी महिमा केरम?' 19 तैखन यीशुए तैस ज़ोवं, 'खडो उठ ते च़लो गा तीं मीं पुड़ विश्वास कियो तांए तू बेज़़ोरोस।' 20

फरीसी लोक यीशु पुच्छने लगे, 'कि परमेशेरेरू राज़ केइस एजनुए? यीशुए तैन जुवाब दित्तो कि परमेशेरेरू राज़ एरू नई कि कोई तैस लेई बटे। 21 ते ज़ोन कि हेरा इड़ी या उड़ीए एन्चरे नई बल्के परमेशेरेरू राज़ तुशशे मझाटे।' 22 यीशुए अपने चेलन सेइं ज़ोवं, 'तै दिहाड़ी भी एजनीए कि, ज़ेइस तुस परमेशेरी दिहैइन मरां अक दिहाड़ी हेरनेरी इच्छा रखले, ज़ेइस मैनेरू मट्टे यानी अवं वापस एजनोई, पन तुस न लेई बटेले। 23 लोक तुसन सेइं ज़ोले कि, 'हेरा, मसीह इड़ीए,' या 'उड़ीए या हेरा तै इड़ीए!' पन तुस तैरां न गेइयथ ते न तैन पत्ती न च़ेलथ। 24 किजोकि ज़ेन्चरे बिजली अम्बरे मरां चेमकतां एक्की पासेरां होरि पासे च़ली गाचे, तेन्चरे मैनेरू मट्टू यानी अवं तैस दिहैड़ी बांदो भोलो। 25 पन ज़रूरीए कि तै पेइले दुःख झैल्ले ते इस ज़मानेरे लोक तैस घटिया समझन। 26 ते ज़ेरू इशशे पूर्वज नूहरे ज़माने मां भोरू थियूं, तेरहु मैनेरे मट्टेरे ज़माने मां भी भोलू। 27 तेइस भी लोक खाते पीते थिये ते इला भोंते रहते थिये। ते ज़ां तगर नूह किशती मां न थियो जोरो तांतगर सब किछ भोतू राव। ते फिरी तूफान अव ते सब किछ खतम भोइ जेवं। 28 ते ज़ेरू इशशे पूर्वज लूतेरे ज़माने मां भोरू थियूं, कि लोक खाते पीते थिये बुपार केरते, बागां लाते ते घरां बनाने मां मघन थिये। 29 पन ज़ैस दिहैड़ी लूत सदोम नगरे मरां बेइर निस्सो त पत्रोवं अम्बरेरां गंधकेरी अग बैखतां सब किछ खतम केरि छुटू। 30 ते मैनेरे मट्टू यानी मेरू वापस एजनु भी अचानक भोलू। 31 'तैस दिहैड़ी ज़ै लाए पुड़ भोलो त तैसेरो माल सबाब अगर घरे मां भोलो त तैस नेने तै अन्तर न एज्जे, ते ज़ै ऊडारे मां भोलो तै भी वापस न गाए। 32 लूतेरी कुआन्शी सेइं कुन भोवं याद रख्खा। 33 ज़ै अपनि जान बचांनेरी कोशिश केरेलो तै तैस गुवालो, ते ज़ै तैस गुवालो तै तैस बचालो। 34 अवं तुसन सेइं ज़ोताई कि तैस राती दूई मैन्हु एक्की खट्टी पुड़ झुल्लोरे भोले, ते अक नीयो गालो, ते दुइयोवं तैड़ी रालो। 35 दूई कुआन्शां हिट्लाट पइती भोली त अक नेनीए ते अक तैड़ी छडनियें। 36 दूई मैन्हु ऊडारे मां भोले त अक नेनीए ते अक तैड़ी छडनोए।' 37 एन शुन्तां तैनेई यीशुए पुच्छू, 'हे प्रभु असन सेइं ज़ो, एन कोड़ि भोलू?' यीशुए तैन ज़ोवं, 'ज़ैड़ी ज़िग्ग भोते तैड़ी इल्लां ज़मां भोइचन।'

18 यीशु अपने चेलन अक मिसाल देइतां ज़ोवं, कि हिम्मत हारनेरे बगैर प्रार्थना केरती रावरी लोड़। 2 'एक्की नगर मां अक हाकिम रातो थियो। तै न परमेशेरे करां डरतो थियो, ते न कोन्ची मैनेरी परवाह केरतो थियो। 3 तैस नगर मां अक विधवा कुआन्श रहती थी ज़ै तैस हाकिमे कां एइती रहती थी, ते तैस कां मिनत केरती रहती थी कि, मेरो इन्साफ़ केरतां मीं मेरे दुश्मने करां छुटा। 4 पेइले त तैनी एत्रो खियाल न कियो पन ज़ैखन ए हिसाब च़लतो राव, त तैनी अपने मने मां ज़ोवं, 'अवं न परमेशेरे करां डेरि ते न मैनेरी परवाह केरि। 5 पन ए विधवा कुआन्श मीं परेशान केरती राचे, एल्हेरेलेइ अवं एसारो इन्साफ़ केरेलो, नई त एसां अवं बड़ो ज़लील केरनोई।' 6 तैखन प्रभु

यीशुए ज़ोवं, “शुना ए बेईमान हाकिम कुन लोरोए ज़ोने। 7 बस कुन परमेशर अपने चुनोरे लोकां केरो फैसलो केरने मां चिर लालो, ज़ैना रात दिहैडी फरयाद केरते रातन? 8 अवं ज़ोताई, कि तै तैन केरो फैसलो केरेलो ते लूशी केरेलो। पन फिरी भी ज़ेइस मैनेरू मटू यानी अवं एज्जेलो त कुन लोक मीं पुड़ हेजू तगर विश्वास केरते भोलो?” 9 यीशुए किछ एरे लोकन अक मिसाल दित्ती कि, ज़ैन अपनो आपे बड़ो धर्मी समझते थिये ते होरन किछ न थिये बुझते। 10 “दूई मैन्हु प्रार्थना केरने मन्दरे मां जे अक फरीसी मैन्हु थियो, ते होरो धड़त (टेकस) घिन्ने बालो थियो। 11 फरीसी मैन्हु खड़ो भोड़तां प्रार्थना केरने ते अपने बारे मां सोचने लगे, कि हे परमेशर अवं तेरू शुक्र केरताई, अवं होरि मैन्हु केरो ज़ेरो नई ज़ैना डैकू, अधर्मी, बदमाशी केरनेबाले, ते इस धड़त नेने बालेरो ज़ेरोई नई, 12 अवं हफते मां दूई बार बरत रखताई, ते अपनि कमेईयरो दशोंवं हिस्सो तींजो देताई। 13 “पन तै धड़त नेनेबालो ज़ै दूर खड़खड़ो थियो, तैनी एत्रू भी न केरि बटु, कि अम्बरेरे पासे तक्के बल्के छाती पिट्टां ज़ोने लगे, ‘हे परमेशर मीं पैपी पुड़ दया केरतां माफ़ केर!’ 14 अवं तुसन सेइ सत्र ज़ोताई, ए धड़न नेनेबाले मैन्हु तैस फरीसी मैन्हु करां धर्मी निस्तां अपने घरजो जेव। किजोकि ज़ै कोई अपनो आप बड़ो बनालो तै निकड़ो बनाव गालो ते ज़ै अपनो आप निकड़ो बनालो तै बड़ो बनाव गालो।” 15 फिरी किछ लोक निक्के बच्चन यीशु कां आन्ने लगे ताके यीशु तैन पुड़ हथ रेखतां बरकत दे। चेलेई तैन लाव त तैन धमकाए ते ठाकू। 16 पन यीशुए बच्चे एप्पू कां कुजाए ते चेलन सेइ ज़ोवं, “बच्चन मीं कां एजने देथ एन न ठाका, किजोकि परमेशेरू राज़ एरां ज़ेरां केरूए। 17 अवं तुसन सेइ सत्र ज़ोताई, ज़ै कोई परमेशेरू राज़ मां गानेरे लेइ अपनो आप निक्के बच्चन बराबर न बनाए, तांतगर परमेशेरू राज़े मां दाखल न भोइसखे।” 18 केन्ची यहूदी मैने यीशुए पुच्छू, “हे रोड़े गुरू हमेशारी ज़िन्दगी हासिल केरनेरे लेइ अवं कुन केरि?” (aiōnios g166) 19 यीशु जुवाब दित्तो, “तू मींजो रोड़ु किजो ज़ोतस? परमेशेरू अलावा होरो कोई भी रोड़ो नई। 20 तू त परमेशेरू हुकमन ज्ञानतस, यानी ‘खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बच्चां केरि इज़्ज़त केरा।” 21 तैनी मैने ज़ोवं, “एना सब हुकम अवं बचपनेरो मन्तो ओरोई।” 22 ज़ैखन यीशुए एन शुन्तां ज़ोवं, “तीं मां एक्की गल्लारी कमी आए, तू ज़ैन किछ तीं कां आए, तैन बेघतां गरीब मैन्नु दे, तैखन तीं स्वर्गें मां खज़ानो मैलेलो। ते एइतां मीं पत्ती च़ल।” 23 ए गल शुन्तां तै बड़ो उदास भोइ जेव किजोकि तै बड़ो अमीर थियो। 24 यीशुए तैस हेरतां ज़ोवं, “अमीरां केरू परमेशेरू राज़े मां दाखल भोनु केरू आसुखतुए। 25 परमेशेरू राज़े मां अमीर मैनेरू दाखल भोने केरां ऊँटेरू सांधनेरे पाए मरां निस्नु सुखतू आए!” 26 ज़ैनेई ए गल शुनी त तैना पुच्छने लगे, “फिरी कसेरी मुक्ति भोइ सखे।” 27 यीशुए जुवाब दित्तो, “मैन्नु करां त एन न भोइ सके पन

परमेशेरू करां सब किछ भोइ बटते।” 28 पतरसे यीशु सेइ ज़ोवं, “हेर असां त सब किछ छेड़तां तीं पत्ती च़लोरैमा।” 29 यीशु तैन सेइ ज़ोवं, “अवं तुसन सत्र ज़ोताई, कि एरो कोई नई ज़ैनी परमेशेरू राज़ेरे लेइ अपनू घर या कुआन्श ते हाज या बव, दूला या बच्चे शारोरे भोन। 30 तैस इस दुनियाई मां बड़ू जादे, ते एजने बैली दुनियाई मां हमेशारी ज़िन्दगी मैलनीए।” (aiōn g165, aiōnios g166) 31 यीशुए अपने 12 चेले एप्पू सेइ साथी निये ते तैन ज़ोने लगे, हेरा, “अस यरूशलेम नगरे जो च़लोरैम ते नेबेई ज़ैन किछ मैनेरे मट्टेरे बारे मां लिखोरूए तैन पूरू भोलू। 32 तै गैर कौमां केरे हथ्थे देनोए, ते तैना तैसेरो मज़ाक बनाले ते तैस बे इज़्ज़त केरेले ते तैसेरे तुतरे पुड़ थुकनूए। 33 तैस कोड़े मारले ते तैस मैरी छेड़े पन ते टूलेइयोवं दिहाड़े फिरी ज़ाँतो भोलो।” 34 तेनेई ए गल न सेमझी बटी ते यीशुपरी एस गल्लरो मतलब तैन करां छुप्पोरो राव। 35 ते एरू भोवं कि ज़ैखन तैना यरीहो नगरेरे नेड़े पुज़्जे त अक कानो मैन्हु बत्तारे इलेखी बिशोरो भीख मगतो थियो। 36 ज़ैखन तैनी हछे मैन्हु केरि छैड़ शुनी त ते पुच्छने लगे, “ए कोलहेरी शौर लोरी भोने?” 37 लोकेई तैस ज़ोवं, “यीशु नासरी कोस्कोई च़लरोए।” 38 तै चिन्डां मैरतां ज़ोने लगे, “हे यीशु नासरी दाऊदेरा मट्टां मीं पुड़ दया केर।” 39 यीशुए सेइ साथी च़लने बाले लोक तैस काने मैन्हु झिड़कने ते ज़ोने लगे, चुप रा, पन तै मना जादे ज़ोरे-ज़ोरे चिन्डां मैरतां ज़ोने लगे, “हे यीशु नासरी दाऊदेरे मट्टा मीं पुड़ दया केर।” 40 यीशु खेड़ोव ते हुकम दित्तो, एस मीं कां आनां ज़ैखन तै तैस कां अव त यीशुए तैस पुच्छू। 41 ज़ो, “अवं तेरे लेइ कुन केरि?” तैनी काने मैने ज़ोवं, “हे प्रभु अवं चाताई कि अपनि एछछेई सेइ लेई बेटि।” 42 यीशुए तैस सेइ ज़ोवं, “बेज्जोई गा तेरे विश्वासे तू बज़्ज़ावरिस।” 43 तै तैखने बेज्जोव ते लहने लगे ते परमेशेरू तारीफ़ केरतो यीशु पत्ती च़लो जेव। एन हेरतां सब लोक परमेशेरू तारीफ़ केरने लगे।

19 यीशु यरीहो नगरे मांमेइ निस्तां च़लोरै थियो। 2 तैड़ी अक मैन्हु थियो, ज़ेसेरू नवं जक्कई थियू, तै धड़त घिन्ने बालां केरो अफसर थियो, तै बड़ो अमीर थियो। 3 तैस यीशु हेरनेरो चाऊ थियो, पन तैसेरू कद छोटू थियू, तांए तै हछे मैन्नु मरां लेई न थियो बटतो। 4 एल्लेरेलेइ तै देवइतां अगर जेव ते फ़ेगेरे बुट्टे उबरो गुस्सो किजोकि ज़ैखन यीशु एज्जे त तै तैस रोड़ुचारे लेई सके। 5 ज़ैखन यीशु तैस ठैरी पुजो त तैनी उबरू तेकतां ज़ोवं, “जक्कई लूशी उन्ढो ओस, किजोकि अज़ मीं तेरे घरे दूलाहन च़ारेई एजनूए।” 6 जक्कई तैखने उन्ढो ओस्सो ते यीशु बेड़ि खुशी सेइ अपने घरे नीयो। 7 एन हेरतां सब लोक शकैइत केरतां ज़ोने लाए, “कि यीशु त एक्की पैपी मैनेरो मेहमान बनोरोए।” 8 जक्कई रोटी खांते बारे खड़ो भोड़तां प्रभु सेइ ज़ोने लगे, “हे प्रभु यीशु तक अवं अपनि अध्डी जेइदात कंगालन देताई, अगर केन्चेरू किछ खोरू भोलू त तैस सेत्रे हिस्से वापस देइलो।” 9 तैखन यीशुए तैस सेइ ज़ोवं, “अज़ इस घरे मां मुक्ति ओरिए,

एल्हेरेलेइ इन भी पूर्वज अब्राहमेरू अक मट्टूए। 10 किजोकि मैंनेरू मट्टू यानी अवं होरि लोकन हमेशारी सज़ाई करं मुक्ति देने एवरोई।” 11 जैखन लोक यीशुएरी गल्लां शुन्ने लगगोरो थिये त तैनी तैन अक मिसाल देइतां ज़ोवं, किजोकि तैना यरूशलेम नगरेरे नेड़े पुजोरे थिये ते लोकां केरो खियाल थियो परमेशरेरू राज़ लूशी एजनू आए। 12 तैनी तैन ज़ोवं, “अक बड़ो अमीर मैन्हु होरि मुलखे मां ब्रलो, ताके तैस मुलखेरो मेंत्रेरो ओदो घिन्तां वापस एज्जे। 13 तैनी अपने सेवादारन मरां दश ज़न्हे कुजाए, ते तैन दश मोहरां देइतां ज़ोवं, ‘मेरे वापस एजने तगर इस पेंडसे सेइं कारोबार केरथा।’ 14 पन तैस ठैरी लोक तैस सेइं नफरत केरते थिये, तैनेई किछ लोक भेज़तां तैस जो बिस्तार भेज़ो, कि अस न चाम ए मैन्हु असन पुड़ राज़ केरे।” 15 “जैखन ते हुकुमतरो ओदो हासिल केरतां वापस अव त तैनी अपने सेवादारे जो समाद भेज़ो। ज़ैना तैनी कारोबारेरे लेइ पेंडसे दित्तोरे थिये ताके सेम्बी केरो पतो केरे कि केनि केनू कियेरू आए। 16 पेइले मैने एइतां ज़ोवं, ‘हे मालिक मीं तेरी दश अश्रेफेइं सेइं दश होरि कमेई।’ 17 तैनी तैस सेइं ज़ोवं, ‘तीं दश अश्रेफेइं सेइं इमानदेरी सेइं कम कियू गा तीं दश नगरन पुड़ अधिकार दित्तो गाते।’ 18 दुइयोवं मैने एइतां ज़ोवं, ‘हे मालिक मीं तेरी पंच अश्रेफेइं सेइं पंच होरि कमेई।’ 19 तैनी तैस सेइं भी ज़ोवं, ‘तीं भी पंच नगरन पुड़ अधिकार दित्तो गाते।’ 20 तैखन एककी मैने एइतां ज़ोवं, ‘हे मालिक इना रेइ तेरी अश्रेफी मीं एन रूमाले मां बेंधतां रखोरि थी।’ 21 किजोकि तू सखत मैंनूस ते अवं तीं करां डरतो थियो। किजोकि तू ते चीज़ ज़ै तीं न भोए रखोरि तू तैस भी नेतस ते ज़ैन न भोए बेवरू तू तैन भी लुनतस। 22 तैनी तैस सेइं ज़ोवं, ‘हे दुष्ट नौकरा अवं तेरी गल्लेईं सेइं तींए मुर्जम बनताइं। ज़द तीं पतो थियो, कि अवं बड़ो सखत मैन्हु आई, ते ज़ै चीज़ मीं नई रखोरि अवं तैस भी सलहतां ते ज़ैन नई बेवरू अवं तैन भी लुनतां। 23 फिरी तीं मेरे रुपैइये केन्ची कां किजो नई रखोरे ताके अवं वापस एइतां तैस करां सूते समेत उसुल केरेथो?’ 24 तैखन तैनी तैन सेइं ज़ोवं, ‘जैन तेड़ी खड़खड़े थिये एस करां एन अश्रेफी एन्तां उस देथ ज़ैस कां दश अश्रेफीन।’ 25 तैना ज़ोने लगे हे मालिक एस कां पेइली दश अश्रेफीन! 26 तैनी तैन जुवाब दित्तो, अवं तुसन सेइं ज़ोताई कि, ‘ज़ैस कां परमेशरेरी मर्ज़ी समझनेरी खुवाइश आए, तैस परमेशर जादे समझ देलो। पन ज़ैस कां परमेशरेरी मर्ज़ी समझनेरी खुवाइश नई, तेस केरां, थोड़ी ज़ेरि समझ ज़ै तैस कां आए, तै भी नी गाली।’ 27 पन मेरे इन दुश्मन ज़ैन मीं न थिये सुखाते कि, ए असन पुड़ राज़ केरे एन इरां आनां ते मेरे सामने एन मैरी छुड़ा।” 28 एना गल्लां ज़ोइतां यीशु अपने चलन सेइं साथी अग्रोवं जेव कि यरूशलेम नगरे मां गाए। 29 जैखन तैना ज़ैतूनेरे पहाड़े बैतफगे ते बैतनिय्याह मां पुजे त यीशुए दूई चले एन ज़ोइतां अग्रोवं भेजे। 30 “तुस सामने उस डलव्वे मां गाथ ते तेड़ी तुसन अक गधेरो बच्चो बन्धोरो मैलनोए। ज़ैस पुड़ अज़ तगर कोई नई चढ़ोरो तैस खोलतां इडी

मीं कां आनां। 31 ते अगर तुसन कोई पुच्छे, कि तुस एस किजो लोरेथ खोलने त तुस ज़ोइयथ, कि प्रभुए एसेरी ज़रूरत आए।” 32 अग्रोवं गानेबाले चेलेईं तैन्ने कियू ज़ैन यीशुए ज़ोरू थियुं। 33 जैखन तैना गधेरो बच्चे खोलने लगगोरो थिये त तैसेरो मालिक तैन पुच्छने लगे, “तुस एस बच्चे किजो लोरेथ खोलने?” 34 तैनेई जुवाब दित्तो, “प्रभुए एसेरी ज़रूरते।” 35 तैनेई ते बच्चो खोलतां यीशु कां आनो, ते यीशुए तैस पुड़ अपना लिगाइं छेइतां तैस पुड़ च़ेइतां च़लो जेव। 36 जैखन तैना च़लोरे थिये त लोकेई अपना लिगाइं बत्ती मां बिछां। 37 जैखन तैना यरूशलेम नगरे नेड़े पुजे त ज़ैइं बत ज़ैतून पहाड़े पुड़ेरां उन्डी गातीए तैड़ी सारे चेलेईं एना चमत्कार हेरतां ते खुशी भोइतां परमेशरेरी तारीफ़ केरने लगे कि, 38 “धने तै राज़ो ज़ै परमेशरे नव्वे सेइं एइते! ते स्वर्ग मां महिमा ते अम्बरे मां शान्ति भोए।” 39 तैन मैंनू मां किछ फरीसी लोक भी थिये। तैना यीशु सेइं ज़ोने लगे, “हे गुरू अपने चलन ज़ो कि चुप केरन।” 40 यीशुए तैन जुवाब दित्तो, “अवं तुसन ज़ोताई, अगर एना लोक चुप केरन त इना घोड़ ज़ोरे सेइं परमेशरेरी तारीफ़ केरेले।” 41 यरूशलेम नगरे मां पुज़तां यीशु यरूशलेम नगरेरो हाल हेरतां तैस लेरां छुटी। 42 ते ज़ोने लगे, “अगर तुस सिर्फ़ इस दिहैइरे बारे मां ज़ानते भोथे, ज़ै तुसन शैन्तरे पासे नेती! पन ई गल हुना तुशे एछ्छन करां छपोरीए। 43 तीं तैना दिहाड़े हेरने पेनेन ज़ेइस तेरे दुश्मन तेरे च़ेरे पासन मोरचो बेंधतां ते तीं घेरो देले, ते हर पासेरां तीं पुड़ हमलो केरेले। 44 तुशे दुश्मन तुसन नाश केरेले, ते सैरी लोकन मारेले, ते तीं पुड़ घोड़े पुड़ घोड़ बाकी न रालो। किजोकि ज़ेइस परमेशर तुसन बच्चानेरे लेइ ओरो थियो तुसेईं न पिशानो।” 45 तैखन तै मन्दरे मां जेव ते तेड़ी तैने बुपारी ते गाक बेइरोवं कढने शुरू किये। 46 तैनी तैन सेइं ज़ोवं, “पवित्रशास्त्रे मां लिखोरूए ‘मेरू मन्दर प्रार्थनारू घर भोलू,’ पन तुसेईं त डैकू केरो अड्डो बनेइतां रखोरोए।” 47 ते तै तैस पवित्र दहैड़ी मन्दरे मां शिक्षा देतो थियो, पन प्रधान याजक ते शास्त्री लोकेई यीशु मारनेरी कोशिश मां लगगोरो थिये। 48 पन तैन एन केरनेरो मौको न थियो मैलतो, किजोकि सारे लोक यीशुएरी गल्लां शुन्नेरे लेइ च़ेरे पासन बिश्शोरे रहते थिये।

20 एककी दिहाड़े जैखन यीशु मन्दरे मां शिक्षा लोरो थियो देने, ते तैन खुशखबरी लोरो थियो शुनाने त प्रधान याजक ते शास्त्री ते यहूदी बुजुर्ग यीशु कां पुजे। 2 ते तैना ज़ोने लगे, “तू एन सैरी गल्लां कसरे अधिकारे सेइं केरतस या तीं ए अधिकारे केनि दित्तोरोए?” 3 यीशु तैन जुवाब दित्तो, “अवं भी तुसन अक गल पुछतई, मीं ज़ोथ। 4 यूहन्नारो बपतिस्मो स्वर्गे तरफां थियो या मैन्हु केरे तरफां थियो?” 5 तैना एप्पू मांमेई बँस केरने लगे, “कि अगर अस ज़ोम, ‘स्वर्गे तरफां थियो,’ त तै पुछेलो कि, ‘फिरी तुसेईं याकीन की नई कियेरू?’ 6 पन अगर अस ज़ोम कि, ‘मैन्हु केरे तरफां थियो,’ त लोकेई असन घोड़ेईं देनिन, किजोकि तैना यूहन्ना नबी मन्ते थिये।” 7 एल्हेरेलेइ तैनेई जुवाब

दितो, “कि अस न ज्ञानम कि केसेरी तरफां थियो।” 8 यीशु तैन सेइं ज़ोवं, “त अवं भी तुसन सेइं न ज़ोई कि एना कम्मां कसेरे अधिकारे सेइं केरताई।” 9 फिरी यीशु तैन लोकन अक मिसाल देइतां ज़ोने लगे, “एक्की मैने दाछरी बाग लाई ते तै ठेकेदारन ठेके पुड़ देइतां एप्पू खरे घिरे कोस्कोई दूर मुखले चलो जेव। 10 जेइस दाछ पकनेरो मौसम अव त तैनी अपनो हिस्सो नेनेरे लेइ अक नौकर बागी मां भेजो। पन तैनेई तै खूब कुटो ते खाली वापस भेजो। 11 ते फिरी तैनी अक होरो नौकर भेजो, पन तैनेई तैसेरी भी बेइजती की, ते तै भी झुस कुट केरतां खाली वापस भेजो। 12 फिरी तैनी अक टलेइयोवं होरो नौकर भेजो, पन तैनेई तैसेरी भी बेइजती की ते ज़ख्मी केरतां कढो। 13 तैखन बागारे मालिके ज़ोवं, ‘अवं अपनू ट्लारू मट्टू भेजताई शैड तैना तैसेरो लिहाज केरेलो।’ 14 पन ज़ैखन ठेकेदारें तै लाव त एप्पू मांमेइं मुशोरो केरने लगे, ए मालिके, एज्जा एस्से मारम ताके जेइदात इश्शी भोइ गाए। 15 तैनेई तैन मट्टू बागी मरां बेइर शैरी छट्टू, ते मारू तुस सोचा कि फिरी बागारे मालिके तैन सेइं कुन केरेलो। 16 ते मालिक एइतां तैन मैरी छड़ेलो ते बाग होरि केरे हवाले केरेलो।” तैनेई एन शुन्तां ज़ोवं, “परमेशर न केरे एरू न भोए।” 17 तैनी तैन केरे पासे तेकतां ज़ोवं, “फिरी इन कुने ज़ैन पवित्रशास्त्रे मां लिखोरूए कि, ‘जै घोइ मिस्त्रेई रद्दी कियो, तैए घोइ कूनेरो घोइ भोलो।’ 18 जै मैनुहु इस घोड़े पुड़ बिछड़ेलो त तैसेरे टुक्के-टुक्के भोइ गाले, ते ज़ैस उन्ढो ए घोड़ बिछड़ेलो तैस ए पितां छड़ेलो।” 19 शास्त्री लोकेई ते प्रधान याजकेई यीशु ट्लानेरी कोशिश की। किजोकि तैना बुझी ज़ोरे थिये, कि तैनी ए मिसाल एन केरे बारे मां शुनेवरी थी, पन तैना लोकन करां डरते थिये। 20 तैना लोक यीशुए ट्लानेरो मौको तोपने लोरे थिये, तैनेई विशवैसी केरे रूपे मां जासूस भेजे ताके तैसेरी कोई गल टलेइ सखन ते फिरी राज़ेरे अधिकारे मां देइ देन। 21 तैनेई यीशु पुच्छू, “हे गुरु अस ज्ञानतम कि तू सच्चो आस ते सच्चेरी शिक्षा देतस, ते केन्चेरी तरफदारी न केरस बल्के सच्चे सेइं परमेशरेरी बत्तरी शिक्षा देतस। 22 कुन असन महाराजे जो थड़त देनी जेइजे कि नेई?” 23 यीशुए तैन केरि चलाकी बुझतां तैन जो ज़ोवं। 24 “मीं अक दीनार हिराथ ते एस पुड़ केसेरी शकल ते केसेरू नंवे?” तैनेई ज़ोवं, “महाराजेरी।” 25 यीशु तैन सेइं ज़ोवं, “जैन महाराजेरू तैन महाराजे जो देथ, ते ज़ैन परमेशेरू ए, तैन परमेशरे जो देथ।” 26 ते तैना लोकां केरे सामने तैसेरी कोई गल न टलेइ सखे बल्के तैसेरे जुवाबे सेइं तैना हैरान भोइतां चुप रेइजे। 27 फिरी सद्की ज़ैन ज़ोते थिये कि मुवोरे ज़ीते न भोन ते फिरी किछ यीशु कां एइतां पुच्छने लगे। 28 “हे गुरु असन जो मूसरो हुक्मे कि अगर केन्चेरो दूला अपनि कुआन्शारे भोंते संते ओईटल मेरि गाए त तैसेरो दूला तैस कुआन्शी सेइं इला बनाए, ताके तै अपने दूलाएरे लेइ औलाद पैदा केरे। 29 सत दूला थिये पेइले इला बनाव ते ओईटले मेरि जेव। 30 फिरी होरे तैस सेइं इला बनाव। 31 फिरी तैल्ला पत्ती टलेइयोवं तै

कुआन्श रखवी फिरी एन्चरे सेइं सत्तेई ज़नेई इला बनाव, पन सब बेऔलाद मेरि जे। 32 ते आखरार तै कुआन्श भी मेरि जेई। 33 ते ज़ीते भोने पुड़ तै केसेरी कुआन्श भोली? किजोकि तै सत्ते दूलां केरि कुआन्श बनोरी थी।” 34 यीशुए तैन सेइं ज़ोवं, “इस दुनियारे लोकन मां त इला बनानेरो दस्तूर। (aiōn g165) 35 पन ज़ैना लोक एजने बैली दुनियारे काबल भोले, ते ज़ैना मुइदन मरां ज़ीते भोले तैना इला न बनाले। (aiōn g165) 36 तैना मेरेले भी नन्ना एल्हेरेलेइ की तैना स्वर्गदूतां केरे ज़ेरे भोले ते तैन जो ज़ीते भोनेरां ते परमेशेरां मट्टां ज़ोले। 37 ते ज़ैडी तगर मुइदां केरो ज़ीते भोनेरी गल्ले, जेन्चरे मूसा नेबेरे ज़लते झैल्लोवेरे बारे मां, तेन्चरे इशारो कियो किजोकि तै परमेशर अब्राहमेरो परमेशर, इसहाकेरो परमेशर ते याकूबेरो परमेशर जोइतां फुकारतो थियो। 38 पन परमेशर मुइदां केरो नई बल्के ज़ीतां केरो परमेशरे। किजोकि तैसेरे नेडे सब ज़ीतेन।” 39 शास्त्री लोकन मरां किछेई जुवाब दितो, “हे गुरु तीं त बड्डू रोडू ज़ोवं।” 40 फिरी तैन मरां केन्वी हिम्मत न अई, कि एस होरू किछ पुछन। 41 फिरी यीशुए तैन सेइं ज़ोवं, “फिरी मसीह जो दाऊदेरू मट्टू केन्चरे सेइं ज़ोतन? 42 किजोकि दाऊद त एप्पू भजना केरे किताबी मां ज़ोते, परमेशरे मेरे प्रभु सेइं ज़ोवं, मेरे देइने पासे बिश। 43 कि ज़ां तगर अवं तेरे दुश्मन तेरे पावन हैठ न बिशेली। 44 दाऊद त तैस जो प्रभु ज़ोते, फिरी तैन तैसेरू मट्टू केन्चरे भोवं?” 45 ज़ैखन सब लोक शुनी राहोरे थिये त यीशुए अपने चलन सेइं ज़ोवं। 46 “शास्त्री लोकन करां हुशार रेइयथ तैना लम्मे-लम्मे कुरते लाने पसंद केरतन, ते होरू एन चातन कि लोक बज़ारन मां तैन जो नमस्कार ज़ोन, ते तैना प्रार्थना घरे मां उच्चि कुर्सी तोपतन ते धामन मां बडे खास बनू चातन। 47 तैना विधवां कुआन्शां करां घरां लुटतन ते लोकन हिरानेरे लेइ बडी लम्मी प्रार्थना केरतन। तैन हछछी सज़ा मैलनीए।”

21 यीशु अमीर लोकां केरे पासे तकने लगे, ज़ैना-ज़ैना दान-पेट्टी मां दान लोरे थिये छडने। 2 तैनी अक बडी गरीब विधवा कुआन्श लाई ज़ैसां दूई पेंडसे यानी अक धेलो च़ाढो। 3 तैखन यीशुए ज़ोवं, “अवं तुसन सेइं सज़ ज़ोताई कि दान-पेट्टी मां दान देने बालन मरां सेबन्धन करां जादे इस विधवा कुआन्शां दान दितू। 4 किजोकि तैनेई तै अपनि दौलती मरां सिर्फ धगसेरे पेंडसे परमेशरे घरे मां दितोरेन पन इस कुआन्शां अपनि गरीब हालती सेइं ज़ैन किछ एसार पल्ले थियूं सब किछ देइ छडू।” 5 किछ लोक मन्दरे बारे मां ज़ोने लोरे थिये, कि बडे माघे घोड़ेई सेइं ते दान कियोरी चीज़न सेइं बनोरूए, त यीशुए ज़ोवं। 6 “तैना दिहाड़े एजने बालेन कि इन चीज़ां ज़ैना तुस इडी लहने लोरेथ इडी घोड़े पुड़ घोड़ नई रानो ज़ै बछोड़ो न गालो।” 7 तैनेई यीशुए पुच्छू, “हे गुरु जी एन गल्लां केइस भोनिन? ते तैन केरो दुनियाई मां एजनेरो कुन निशान भोनोए।” 8 यीशुए तैन ज़ोवं, “खबरदार टेपलोईयथ नन्ना, किजोकि काई लोक मेरे नंवे सेइं एजनेन ते तैनेई ज़ोनूए कि अव्वें मसीह आई, ते मौको भी नेडे

पुजोरोए तुस तैन पत्ती न गेइयथ। 9 ते जैखन तुस लडेइयरी त उलझनरी अफुवां शुनेले त डेरथ नन्ना, किजोकि एन गल्लां केरू पेइले भोनू ज़रूरीए, पन तेइसे खातमों नई भोनो।” 10 तैखन यीशुए ज़ोवं, “किजोकि कौमी पुड़ कौम, ते राज़े पुड़ राज़ चढहाई केरेलू। 11 ठारी-ठारी बडे-बडे भुंजल एजनेन ते काल पेनोए ते बिमारी फैलनिएं ते बुरी-बुरी गल्लां भोनिन ते अम्बरे मां आजीब निशान लेइहोनेन। 12 एन सब गल्लां भोने करां पेइले तुशे दुश्मन तुसन सिर्फ मेरे नख्खे वजाई सेइं ढपेले ते तुसन सताले ते प्रार्थना घरेरी आदालती मां हाज़र केरेले ते कैद केरेले ते गवर्नरन ते कने राज़न कां पैश केरेले। 13 तैखन तुसन मेरी गवाही देनरो रोडो मौको मैलेलो। 14 पन तुसन कोई ज़रूरत नई, कि पेइले फिक्क केरने लगथ कि अस कुन ज़ोमेले। 15 किजोकि अवं तुसन एरी ज़बान ते अक्ल देइलो, कि कोई भी मुखालफ तुशे सामने खडो न भोइ सकेलो ते न लोक तुशे खलाफ किछ ज़ोई सकेलो। 16 ते तुशे हाज बव ते दूला ते रिशतेदार ते दोस्त तुसन सेइं बैर केरेले ते तुसन मरां किछन मारेले भी। 17 ते मेरे नख्खे वजाई सेइं सारे लोक तुसन सेइं नफरत केरेले। 18 पन तुशे दोगेरो कोई बाल बांको न भोलो। 19 सब किछ झेलतां तुस अपनि जान बचेइ साखेलो।” 20 “ज़ेइस तुस यरूशलेम नगर च़ेरे पासन फौवजेइं सेइं घेरू लाले, त बुझथ कि एस नाश भोनेरे दिहाड़े नेडे ओरेन। 21 तैस मौके ज़ैन यहूदिया मां भोले तैना पहाड़े पुड़ जो नेशशी गान ते ज़ैना यरूशलेम नगरे मां भोले त तैन बेइरोवं निसन ते ज़ैना इलॉव्वन मां भोले त तैना नगर मांजो न गान। 22 किजोकि एना बदलेरे दिहाड़े भोले, एन मां तैन सब किछ ज़ैन पेइलू पवित्रशास्त्रे मां लिखोरूए तैन पूरू भोनूए। 23 तैन दिहाड़न मां ज़ैना दोर्जीती त दुद्ध पियाती कुआन्श भोली, तैन केरे लेइ अफ़सोस! किजोकि थेरती पुड़ बड़ी मुसीबत एजनीए ते एस कौमी पुड़ बड़ी आफत एजनीए। 24 तैना सब तलवारी सेइं मारे गाले ते गुलाम बेनतां सेब़्भी कौमन मां पुजेले ते गैर कौमां केरो मौको पूरो भोने तगर यरूशलेम नगर गैर कौमेईं सेइं पस्त भोंतो रालू। 25 “दिहाड़े चेंदनरी ते तारन मां निशान बांदे भोनेन ते थेरती पुड़ कौमन बड़ी तकलीफ पुजनिंयें, किजोकि समुन्द्रेरी लैहेरां केरि शौरी सेइं तैना डेरि गानेन। 26 डरें मारे एजने बैली मुसीबतरे इंतज़ार केरते-केरते तैन केरे होश उड़ी गानेन, किजोकि अम्बरेरी सैरी शक्ति हिल्लेली। 27 तैखन लोक मैनेरू मट्टू बेडि शक्ति ते महिमा सेइं बिदलारी मां एंडतू लाएले। 28 ज़ैखन एन गल्लां भोनी शुरू भोली त सिधे खडे भोइतां उबरू तेकथ, किजोकि तुशे छोटकारो भोने बालोए।” 29 फिरी यीशुए तैन अक मिसाल देइतां ज़ोवं, “तुस फ़ेगरे बुट ते होरि बुट्टन भी हेरतथ। 30 ज़ेरि तैस गुडी लेगनी शुरू भोइचन? त तुस हेरतां बुझतथ कि नेला ओरोए। 31 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुझ्जी छड्डा कि परमेशरेरू राज़ नेडे ओरूए। 32 अवं तुसन सेइं सज़ ज़ोताई, कि ज़ां तगर एन गल्लां पूरी

न भोन, एस कौमरो खातमों न भोलो। 33 धरती अम्बर टेली गालू पन मेरी गल्लां कथे न टेलेली। 34 “बस्सा खबरदार भोथ कोस्कोई एरू न भोए कि तुशे दिल नशे मां मसत भोइतां इस ज़िन्दगरे फिक्के सेइं कमज़ोर भोए, ते तैस दिहाड़े तुशे लेइ अक मुसीबत बने। 35 किजोकि ते इस सैरी थेरती पुड़ ज़ेरे लोकन तैन सेब़्भन पुड़ एन्चरे एजनीए। 36 बस्सा, हर वक्त तियार राथ ते प्रार्थना केरते राथ, ताके तुस एन गल्लन करां ज़ैना भोने बैलिन बेंचतां राथ, ते मैनेरे मट्टे कां खडे भोनेरे काबल भोथ।” 37 यीशु रोज़ मन्दरे मां शिक्षा देतो थियो, ते राती ज़ैतन पहाड़े पुड़ रातो थियो। 38 झेझां सारे लोक यीशुएरी गल्लां शुन्नेरे लेइ मन्दरे मां तैस कां एइते थिये।

22 अखमीरी तिहारेरी दिहाड़ी ज़ैस जो फ़सह ज़ोतन नेडे ओरी थी। 2 प्रधान याजक ते शास्त्री मौको तोपने लोरे थिये कि यीशु केन्चरे मारम। किजोकि तैना लोकन करां डरते थिये। 3 ते शैतान यहूदा मां बेस्सी जेव तैस जो इस्करियोती भी ज़ोते थिये, ते तै यीशुएरे 12 चेलन मां गनो गातो थियो। 4 दे तै प्रधान याजकन ते प्रार्थना घरेरे किछ खास पुच्छने गन्ने लोकन कां जेव ते तैन सेइं मुशोरो केरने लगे कि केन्चरे सेइं यीशु तैन केरे हवाले केरी बटते। 5 तैना बडे खुशी भोए ते तैस पेंडसे देनरो वादो कियो। 6 तैनी तैन केरि गल मन्नी ते मौको तोपने लगे, कि यीशु केन्चरे सेइं तैन केरे हावाले केरे ते केन्ची पतो न लगे। 7 अखमीरी रोट्टू तिहार नेडे ओरू थियू, ज़ैस फ़सह तिहारे मां गबड़ेरू बलिदान देनू ज़रूरी थियू। 8 यीशुए पतरस ते यूहन्ना एन ज़ोइतां भेजे, “कि गथ ते इश्शे लेइ फ़सह तिहारेरी रोटी तियार केरा।” 9 चेलेई पुच्छू, “कि तू कोडि चातस कि अस तीजो फ़सह तिहारेरी रोटी तियार केरम?” 10 यीशुए तैन जुवाब दितो, “नगर मां गाते तुसन अक मैन्हु मैलनोए ज़ै पेनरो घड़ी घिन्तां त्रलोरो भोनोए, तैस पत्ती गेइयथ ते ज़ैस घरे मां तै गालो तुस भी गेइयथ। 11 तैसेरे मालिके सेइं ज़ोइयथ कि गुरे ज़ोरूए कि ट्लाहना केरि ठार कोडि आए, ज़ैड़ी अवं अपने चेलन सेइं साथी फ़सह तिहारेरी रोटी खेइ सेखी? 12 ते तुसन दोपरे नेइतां अक बड्डो कमरो हिरालो ज़ै खूब रोड़ेचारे सज़ेवरो भोनोए तैड़ी इश्शे लेइ तियारी केरथ।” 13 तैनेई तैड़ी गेइतां सब किछ तेरहु लाव ज़ेरू तैनी ज़ोरू थियू, ते तैड़ी फ़सह तिहारेरी रोटी तियार की। 14 ज़ैखन रोटी खानेरो मौको अव त यीशु अपने प्रेरितन सेइं साथी बिश्शारे थिये। 15 ते यीशुए तैन सेइं ज़ोवं, “मेरी ए बड़ी इच्छा थी, कि अपनो दुःख झल्लने (मरने) करां पेइले एककी बार फ़सह तिहारेरी रोटी तुसन सेइं साथी खेइ। 16 किजोकि अवं तुसन सेइं ज़ोताई, कि अज़ेरां पत्ती तांतगर न किछ खेइ सेखी, ज़ां तगर परमेशरेरे राज़ेरू कम पूरू न भोए।” 17 फिरी यीशुए दाछरे रसेरो कटोरो ट्लातो ते परमेशरेरू शुक्र केरतां चेलन दितो ते ज़ोवं, “यांथ ते एप्पू मांमेइं बंटा। 18 किजोकि अवं तुसन सेइं ज़ोताई कि अज़ेरां पत्ती दाछारो ए रस फिरी तांतगर न पीलो ज़ां तगर परमेशरेरू राज़ न एज्जे।” 19 फिरी यीशुए रोटी ट्लाती ते

परमेश्वर शुक्र केरतां टलोडी ते तैसेरे दुकडे बनेइतां अपने चलन एन ज़ोइतां दित्ती, “कि ई मेरी जाने जै तुशशे लेइ अवं देताई ते तुस भी मेरी यादगैरी मां एन्ने केरते रेइयथ।” 20 एन्चरे रोह्नी खानेरे बाद तैनी कटोरो टलातो ते चलन कां दित्तो ते ज़ोवं, “कि ई कटोरो मेरो तैस खूनेरो नव्वो करारे जै तुशशे लेइ दित्तोरोए। 21 पन हेरा मीं टलुवाने बालो मीं सेइं साथी खाने लोरोए। 22 किजोकि मैनेरू मट्टू त हुनी चलोरोस ज़ेन्चरे कि तैसेरेलेइ पेइले एन पक्कू भोरूए पन तैस मैन्हु पुइ अफ़सोस ज़ेसेरे हथेइं तै गिरफ़्तार भोए।” 23 एन शुन्तां तैना एप्पू मांमेइं पुच्छने लगे, “असन मां एरो ज़ेरो कौने जै एन कम केरेलो?” 24 तैन एस गल्ली पुइ एप्पू मांमेइं बेंस भोइ कि असन मां बड्डो कौने? 25 यीशु तैन सेइं ज़ोवं, “गैर कौमन पुइ तैन केरे राज़े राज़ केरतन, ते ज़ैन केरो तैन पुइ अधिकारे भोते तैन जो भलाई केरनेबाले ज़ोतन। 26 पन तुसन मां एरू लोडे भोवरू, तुसन मां ज़ै बड्डोए तै निकडेरें बराबर बने ते ज़ै खास आए तै सेवकेरे बराबर बने। 27 किजोकि बड्डो कौने? ज़ै तैस कां साथी बिशोरोए या तै ज़ै तैसेरो चेलोए? कुन तै तैस कां नई बिशोरो? पन अवं त तुसन मां अक सेवकेरे बराबर आई। 28 पन तुस तैना आथ ज़ैना मेरी अज़मैइशरे मौके बराबर मीं सेइं साथी रातथ। 29 ज़ेन्चरे बाजी मीं अक राज़ दितोरूए अवं भी तुसन अक राज़ देताई। 30 ताके तुस मेरे राज़े मां मीं सेइं साथी बिशतां खाथ पीथ, बल्के बडे-बडे शाही तखतन पुइ बिशतां इस्पाएलें 12 गोत्रां केरो इन्साफ़ केरेले।” 31 “शमौन, शमौन, खबरदार रा, शैताने परमेश्वरे करां अज़ाज़त मग्गोरीए कि तुसन सेबभन परखे, कि रोडे बुरे करां अलग केरे ज़ेन्चरे ज़मीनदार गेहुंन करां झाझ अलग केरते। 32 पन मीं तेरे लेइ प्रार्थना की, कि तू मीं पुइ विश्वास केरनो न शारस, ज़ैखन तू मन फिरास त अपने विश्वासी दलान मज़बूत केरां।” 33 पतरसे यीशु सेइं ज़ोवं, “हे परमेश्वर तीं सेइं अवं कैद भोने बल्के मरनेरे लेइ भी तियार आई।” 34 पन यीशुए ज़ोवं, “हे पतरस अवं तीं सेइं ज़ोताई कि अज़ कुकडे बांग देने करां पेइले तू मेरो टलाई बार इन्कार केरेलो कि अवं एस न ज़ैनी।” 35 यीशुए तैन सेइं ज़ोवं, “कि ज़ेइस मीं तुस खुशखबरी शुनाने, बगैर बेटवे, बूटां ते झोलेरें बगैर भेजोरे थिये त तुस केन्ची चीज़ारे घटी भोइ?” तैनेई ज़ोवं, “केन्ची चीज़री नई।” 36 यीशु तैन सेइं ज़ोवं, “पन हुनी ज़ैस कां बेटवो भोए ते साथी रखे ते एन्चरे झोलो भी ते ज़ैस कां तलवार न भोए तै अपनू कोट बेचतां भी तलवार घिन्ने। 37 अवं तुसन सेइं ज़ोताई कि ई गल्ले ज़ै पवित्रशास्त्रे मां लिखोरीए, कि तै पूरी भोए। तै बुरे लोकन सेइं साथी गनो जेव! एल्हेरेलेइ मेरे बारे मां लिखोरी गल्लां पूरी भोने लोरिन।” 38 तैनेई ज़ोवं, “हे प्रभु हेर इडी दूई तलवारन।” तैनी तैन सेइं ज़ोवं “बेडि आन।” 39 फिरी तै बेइर निस्सो ते ज़ेन्चरे तैसेरो दस्तूर थियो, ते ज़ैतून पहाडे पुइ जो चलो जेव ते तैसेरे चले भी तैस सेइं साथी चले जे। 40 तैस ठैरी पुजतां तैनी तैन सेइं ज़ोवं, “प्रार्थना केरा ताके तुस अज़मैइशी मां न पेथ।” 41

यीशुए तैन करां थोडे ज़ेरे अग्गर गेइतां ज़ैधू केरे भारे बिशतां प्रार्थना केरने लगे। 42 “हे बाजी अगर तेरी मर्जी भोए त ई दुखेरो कटोरो मीं करां दूर केर, पन फिरी भी मेरी मर्जी पूरी न भोए बल्के तेरी मर्जी पूरी भोए।” 43 तैखन तैनी अम्बरेरां अक स्वर्गदूत लाव ज़ै तैस शक्ति देतो थियो। 44 ते ते परेशान भोइतां होरि जादे दिले सेइं प्रार्थना केरने लगे ते तैसेरो पिस्सीनो बुझा कि खूनेरे बडे-बडे तेप्पु तल्ले झाड़ते थिये। 45 प्रार्थना केरनेरे बाद यीशु अपने चलन कां वापस अव ते तैना गम्मेरे मारे झूलोरे मैल्ले। 46 यीशुए तैन सेइं ज़ोवं, “तुस किजो झुल्लोरेथ उठा ते प्रार्थना केरा ताके अज़मैइशी मां न राथ।” 47 हेजू यीशुए गल ज़ोने लोरो थियो, त मैन्हु केरो अक जथो तैडी पुजो ते बारहन मरां अक ज़ेसूरु नवं यहूदा थियू, तैन सेइं अग्री-अग्री थियो, ते तै यीशु फुम्मडी देने अगर अव। 48 पन यीशुए तैस सेइं ज़ोवं, “यहूदा कुन तू एक्की फुम्मडी सेइं मीं मैनेरे मट्टे टलुवातस?” 49 ज़ैखन यीशुएरे सेथेई एन सब हेरू त तैनेई ज़ोवं, “हे प्रभु कुन अस तलवार चलाय?” 50 ते तैन मरां एक्के महायाजकेरे नौकरे पुइ तलवारां चलाई ते तैसेरो तैनी कन्न उड़ाव। 51 पन यीशुए जुवाब दित्तो, “बस्सा बडू भोइ जेवं।” ते यीशुए तैसेरो कन्न तैखने हथ लेइतां बड़ाव। 52 तैखन यीशुए प्रधान याजकन ते मन्दरेरे सिपाही ते बुजुर्ग ज़ैन तैस गिरफ़्तार केरने ओरे थिये तैन जो ज़ोवं, “तुस कुन तलवारां ते डंडे घिन्तां मीं डैकू बुझतां दलाने ओरेथ?” 53 ज़ेइस अवं तुसन सेइं साथी मन्दरे मां भोतो थियो, त तुसेईं मीं सेइं हथ न लाव, पन ई त तुशशे आंधरेरे मौकेरो अधिकारे।” 54 ज़ैखन तैनेई यीशु टलातो तैस तेट्ठां नेइतां महायाजकेरे घरे नीयो, पतरस भी पत्तपति बल्हे-बल्हे तैरां जेव। 55 तैनेई अंगने मां अग बालोरी थी ते सब बिशतां अग तपने लोरे थिये ते पतरस भी तैन मां थियो। 56 ते अक कुआन्श अगगी कां बिशोरी तकने लोरी थी ते पतरसेरां तेकतां ज़ोने लगी, “कि ई मैन्हु भी तैस सेइं साथी थियो।” 57 पन पतरसे इन्कार केरतां ज़ोवं, “हे कुआन्शे अवं एस न ज़ैनी ए कौने।” 58 थोड़ी सैइत्रां पत्ती होरे एक्के पतरसेरां तेकतां ज़ोवं, “तू भी तैना केरो साथिस।” पन पतरसे ज़ोवं, “नई अवं नई।” 59 कोई एक्की घंटेरे बाद केन्चे होरे बडे याकीने सेइं ज़ोवं, “ई मैन्हु पक्को तैस सेइं साथी थियो, किजोकि ए भी गलीली आए।” 60 पन पतरसे इन्कार केरतां ज़ोवं, “अवं एस न ज़ैनी तू कुन ज़ोतस?” हेजू पतरसे ए गल ज़ोने लोरो थियो, त कुकडे बांग दित्ती। 61 ते प्रभुए फिरतां पतरसेरे पासे तक्कू ते पतरसे परमेश्वरेरी तै गल याद आई, ज़ै तैनी पतरसे सेइं ज़ोरी थी, “कि अज़ कुकडे बांग देने करां पेइले तू मेरो टलाई बार इन्कार केरेलो।” 62 ते पतरस बेइर गेइतां ज़ेरे-ज़ेरे लेरां देने लगे। 63 ज़ैने मैनेई यीशु अपने कळ्जे मां कियोरो थियो, तैना तैसेरी हासी बनाते थिये ते कने तैस बाते थिये। 64 तैना यीशुएरी एछ्छन पुइ पट्टी बेन्थतां बाते थिये ते पुछते थिये, “भविष्यवाणी केर ते जो केनि बाहोरिए?” 65 ते तैनेई एन्चरे होरि भी बेडि गल्लां ज़ोई ते तैसेरी तुहीन की।

66 झेझां बुजुर्ग लोक ते प्रधान याजक ते शास्त्री लोकेई यीशु भोरो थियो। 20 पिलातुसे यीशु हथरां छडनेरे इरादे सेई लोकन अपने महासभाई मां आनो, 67 ते जोने लगे, “अगर तू मसीह आस त जो!” यीशुए तैन सेई जोंव, “अगर अवं तुसन जोई भी त तुस मेरु याकीन न केरेले। 68 ते अगर अवं तुसन पुछी त तुस जुवाबे न देले। 69 पन अजेरां बाद मैनेरु मट्टू परमेशरेरे देइने पासे बिशोरु लाएले।” 70 एस गल्ली पुड़ तैना सब जोने लगे, “तू परमेशरेरु मट्टू आस?” यीशुए जुवाब दितो, “तुस एप्पू मींजो ज़ोतथ कि तू आस?” 71 तैनेई जोंव, “हुनी असन होरि शाहादातां केरि कुन ज़रूरीए? किजोकि असेई एसेरी ज़बान शुनेरुए।”

23 तैखन तैना सब तैठां उठे ते यीशुए पिलातुसे कां चिन्तां जे। 2 ते तैस जो एन ज़ोइतां ए इलज़ाम लांने लगे, “कि ए इश्शे लोकन भड़काते ते महाराजे जो धड़त देनेरे लेइ ठाकते, ते अपने आपे जो मसीह राज़ो ज़ोते।” 3 तैखन पिलातुसे यीशुए पुछ्छ, “तू यहूदी केरो राज़ोस?” यीशु तैस जुवाब दितो, “तू एप्पू ज़ोतस!” 4 पिलातुसे प्रधान याजकन ते लोकन सेई जोंव, “कि अवं एस मैन्हु मां कोई कसूर न लेई।” 5 पन तैना बड़े घमण्डे सेई जोने लगे, “ए यहूदियारे इलाके करां गलील इलाके तगर बल्के इडी तगर लोकन अपनि शिक्षाई सेई भड़काते।” 6 ज़ैखन पिलातुसे एन शुनू त तैनी पुछ्छ, “कुन ए मैन्हु भी गलील इलाकेरो आए।” 7 ते ज़ेरो तैस पतो लगे, कि ए हेरोदेसेरे इलाकेरो रानेबालोए, त पिलातुसे तै हेरोदेस कांजो भेजो। किजोकि तैस वक्ते मां तै एप्पू भी यरूशलेम नगरे मां थियो। 8 ज़ैखन हेरोदेसे यीशु लाव त बड़ो खुशी भोव। किजोकि तैस च़रोक्नी देंती यीशु हेरनेरी इच्छा थी। तैनी तैसेरे बारे मां बेड़ि गल्लां शुनोरी थी, ते तैस बड़ी उमीद थी, कि यीशुएरो कोई चमत्कार हेरे। 9 तैनी यीशुए बड़ू किछ पुछ्छ, पन यीशुए तैस कोई जुवाब न दितो। 10 पन याजक ते प्रधान याजक ते कने शास्त्री लोक बड़े ज़ोरे शोरे सेई यीशु पुड़ इलज़ाम लांने लगे। 11 तैखन हेरोदेस भी अपने सैथन सेई मिलतां यीशुएरी तुहीन की, ते तैसेरी हासी बनाई फिरी तैस अक चमकतो कुरतो लुवेइतां पिलातुसे कां वापस भेजो। 12 पेइले पिलातुस त हेरोदेस दुश्मन थिये, तैस दिहाड़े तैना दोस्त बेनि जे। 13 तैखन पिलातुसे प्रधान याजक ते सरदार ते होरे लोक अकोट्टे किये। 14 “ते पिलातुसे तैन सेई जोंव तुसेई ए मैन्हु मीं कां एन ज़ोंतो आनोरोए कि, ए लोकन भड़काते ते मिमी एसेरी पुछ्छ गन की, पन ज़ैस जुर्मोरो दोष तुस एस पुड़ लातथ, अवं एल्हेरो एसमां कोई कसूर न लेई। 15 ते न हेरोदेस ज़ैनी ए असन कां भेजोरोए तैस भी कोई दोष न मैल्लो, ते असन कां एरु कोई सबूत बरामद न भोंव, ज़ैस सेई ए कत्ल कियो गए। 16 तैल्हेरेलेइ अवं एस कोडेइं बाएतां छैडी देताई।” 17 पिलातुस यहूदी केरे फ़सह तिहारेरे मौके पुड़ अक कैदी हथरां छडतो थियो। 18 तैना सारे लोक चिन्दां लगे मारने, “कि एस मैन्हु सज़ा देथ ते बरअब्बा इश्शे लेइ हथरां छड्डा।” 19 बरअब्बा नगर मां गड़बड़ी केरनेरे ते कतलेरे बारे मां पाबंद

धीरो थियो। 20 पिलातुसे यीशु हथरां छडनेरे इरादे सेई लोकन दुबारु पुछ्छ। 21 पन तैना लोक मना चिन्दां लगे मारने, “कि तू एस कूसे पुड़ च़ाढ़ एस कूस पुड़ च़ाढ़।” 22 तैखन पिलातुसे तैन टलेइयोवं फेरे फिरी जोंव, “किजो आखर एनी कुन जुर्म कियोरोए? हेरा एसमां एरु कोई सबूत बरामद न भोंव, कि ए मौतरे सज़ारो हकदार भोए, तैल्हेरेलेइ अवं एस कुटेइतां छैडी देताई।” 23 पन तैना चिन्दां मैरी-मैरी जोने लगे, ए कूसे पुड़ च़ाढ़ोरो लोइते, ते तैन केरि चिन्दां मारनेरी उमीद पूरी भोइ। 24 बस्सा, पिलातुसे जोंव कि तैन केरे मेरज़ेरे मुताबिक कियूं गए। 25 ते ज़ै मैन्हु हुकुमतेरे खलाफ ते खूनेरे जुर्म मां कैद थियो, ते ज़ैस हथरां छडनेरे लेइ तैनेई दरखुवास कियोरी थी, ते हथरां छड्डो पन यीशु तैन केरि मेर्ज़ी सेई सिपाही केरे हवाले कियो। 26 ज़ैखन तैना यीशु नेइतां च़लोरे थियो, त तैनेई शमीन कुरेनी ज़ै एक्की इल्लोवेंरां ओरो थियो, टलातो ते कूस तैस कां छूने जो दित्तू, कि तू ई कूसे छुइतां यीशु पत्ती च़ला। 27 ते बड़े लोक तैस पत्ती च़लोरे थिये ते किछ कुआन्शां भी थी ज़ैना यीशुएरे लेइ शौग बनैती थी। 28 यीशुए तैन केरे पासे मुड़तां जोंव, “हे यरूशलेम नगरेरी कुइयाव मेरे लेइ लेरां न देथ, बल्के अपने बच्चां केरे लेइ लेरां देथ। 29 किजोकि तैना मुशकिल दिहाड़े एजने बालेन ज़ैखन लोक एन ज़ोले कि, ‘धन आन तैना कुआन्शां ज़ैना बेऔलादन ते बच्चे न पाले।’” 30 “तैस वक्ते लोक पहाड़न सेई ज़ोले, ‘असन उन्हे बिछड़ा ते उच्ची ठारन जो ज़ोले, कि असन छपाथ।’ 31 किजोकि ज़ैखन तैनेई सबज़ बुट्टे सेई एन केरु, त शुक्कोरे बुट्टे सेई कुन न केरेले?” 32 ते सिपाहेई दूई होरे मुर्ज़म भी यीशु सेई साथी च़लवरे थिये ताके तैन भी मारन। 33 ज़ैखन तैना तैस ठैरी पुज़े ज़ैस जो “खोपड़ी” ज़ोतन त तैडी यीशु कूसे पुड़ च़ाढ़ो, ते तैना दूई मुर्ज़मन भी एक्की यीशुएरे देइने पासे ते होरि बांए पासे कूसे पुड़ च़ाढ़े। 34 यीशु जोंव, “हे बाजी एन माफ़ करां एन न ज़ानन् कि एना कुन लोरेम केरने।” ते तैनेई तैसेरे लिगडां केरे लेइ पेरची छेइतां शर्त रख्खू ते एप्पू मामेइं बंटां। 35 लोक खड्खडे एन सब किछ हेरने लोरे थिये ते सरदार ज़ोरे-ज़ोरे सेई ज़ोते थिये, “एनी होरे त बचाए ते अगर ए मसीहे ते परमेशरेरो चुनोरे त अपने आपे किजो न बचाए।” 36 सिपाही भी तैस कां एइतां तैसेरी हासी बनाने लगे (किजोकि तै अपनो आप राज़ो बनातो थियो), ते घटया दाछ़ारो रस पीनेरे लेइ तैस देने लगे। 37 “ते ज़ोते थिये तू अगर यहूदी केरो राज़ोस त अपनो आप बचा!” 38 ते तैस कूसे पुड़ यानी यीशुएरे दोग्गे करां बहा अक पखड़ी लिखतां लेवरी थी, ते तैस पुड़ एन लिखेरु थियूं, “ए यहूदी केरो राज़ आए।” 39 तैन दूई डैकू ज़ैना मारे जे तैन मरां एक्के यीशु जो तुहीन केरतां जोंव, “अगर तू मसीह आस त एप्पू भी बंच ते असन भी बचा।” 40 पन होरे दुइयोवं डैके तैस जो झिड़कतां जोंव, “तीं परमेशरेरो भी डर नई? ज़ै सज़ा तैस मैलने लावरी तीं भी त तैए सज़ा मैलने लोरीए। 41 असन त इन्साफेरे मुताबिक अपने बुरे कम्मां केरि सज़ा मैलने

लोरी पन एनी त कोई गलत कम नई कियेरु।” 42 तैखन तैनी ज़ोवं, “हे यीशु ज़ैखन तू अपने राज़े मां एज्जेलो त मीं भी याद केरां।” 43 यीशुए तैस जो ज़ोवं, “अवं तीं सेइं सच ज़ोताई कि तू अज़े मीं सेइं साथी स्वर्गें मां भोलो।” 44 दीसारे 12 बजेईं सारे मुलखे मां आंधरु भोवं, त दलेइ बज़न तगर रावं। 45 दिहाड़ो भी कालो भोव ते मन्दरेरो पड़दो बां देंता बुन तगर फेटतां दूईं टुकड़े भोइ जे। 46 यीशुए बड़े ज़ोरे सेइं ज़ोवं, “हे बाजी अवं अपनि आत्मा तेरे हथ्थे मां सोंफताई,” ते एन ज़ोइतां यीशुए प्राण दिते। 47 ज़ैखन रोमी सूबेदार एन सब हेरु त परमेशेरी तारीफ़ केरते ज़ोवं, “ए मैनु सच्चे धर्मी थियो।” 48 ते सारे लोक ज़ैना तैड़ी थिये ए अनर्थ हेरतां छाती पिट्टे चले जे। 49 पन यीशुए सारे दोस्त ते तैना कुआन्शां ज़ैना गलील इलाके मरां यीशुए पत्पती ओरी थी दूर ज़ेरे खेड़ोइतां, ज़ैन किछ भोइ रावरु थियूं सब किछ हेरी रेवरी थी। 50 अक मैनु थियो, ज़ेसेरु नवं यूसुफ थियूं, तै यहूदी केरि आदालतरो अक मुलाज़म भी थियो, ते अक बड़ो नेक ते धर्मी मैनु थियो। 51 तै बेड़ी आदालत अफसरं केरे फैसलेरे हके मां न थियो। तै यहूदी केरे नगर अरिमतियाह रानेबालो थियो, ते परमेशेरे राज़ेरे तलाशीं मां थियो। 52 तैनी पिलातुसे कां गेइतां यीशुएरी लाश मगी। 53 ते लाश कूसे पुड़ेरां ओसेलतां मलमलेरे कपड़े मां पलेटतां ते एक्की कब्री मां रख्खी, ज़ै एक्की शफ़्दी मां बनेवरी थी, तैस कब्री मां पेइले कोई लाश न थी रखोरि। 54 तै तियेरां दिहाड़ी थी ज़ै आरामेरी दिहाड़ी शुरु भोने बाली थी। 55 ते तैना दूईं कुआन्शां ज़ैना गलील इलाके मरां यीशुए पत्पती ओरी थी, यूसुफे पत्पती जेई ते तैनेईं तै कब्र हेरी, कि यीशुएरी लाश एसमां केन्चरे सेइं रखोरिए। 56 तैखन तैना अपने घरे वापस आए, ते खुशबूदार चीज़ां ते इत्र तियार कियो ते आरामेरे दिहाड़े मूसरे कानूनेरे मुताबिक आराम कियो।

24 हफतेरी पेइले दिहेड़ी झेझां किछ कुआन्शां खुशबूदार चीज़ां नेइतां जेई, ज़ैना तैनेईं तियार कियोरी थी ते एन्तां कब्री कां पुज़ी। 2 पन तैनेईं तै घोड़ कब्री करां बिछड़ोरो लाव। 3 ज़ैखन तैना अन्तर जेई त तैन यीशुएरी लाश न मैल्ली। 4 तैखन तैना एन हेरतां परेशान भोइ त दूईं मैनु ज़ैन छित्तां लिगड़ां लेगोरां थियां, तैन कुआन्शान कां एइतां खेड़ोए। 5 तैना कुआन्शां डेरि जेई ते तैना ज़मीनेरे पासे तकने लग्गी। तैन मैनेईं तैन जो ज़ोवं, “तुस ज़ीति, मुइदन मां किजो लोरिथ तोपने। 6 तै इड़ी नईं बल्के ज़ीति भोरोए तुसन याद नईं कि जेइस तै गलीले मां थियो, त तैनी तुसन ज़ोरु थियूं कि, 7 मैनेरु मठु यानी अवं पापी लोकां केरे हथ्थे देनोए ते कूसे पुड़ च़ाढ़नोई ते फिरी दलेइ दिहाड़ां बाद फिरी ज़ीति भोनोई।” 8 तैखन तैना यीशुएरी गल्लां याद एई। 9 तैखन तैना कब्री करां ज़ेलि जेई, त तैनेईं यीशुएरी 11 चेलन ते बाकी होरि चेलन भी एस गल्लरो पतो दित्तो। 10 ज़ैनेईं प्रेरितन सेइं गल्लां की, मरियम मगदलीनी योअन्ना ते याकूबेरी अम्मा मरियम ते तैस सेइं साथी होरि भी काई कुआन्शां थी। 11 पन तैन, तैन केरि गल्लां कहानी लग्गी, ते

तैनेईं तैन केरु याकीन न कियूं। 12 पन पतरस उठो ते तै कब्रे पासे दौवड़तो तैस ठेरी कां जेव, ते तैड़ी तैनी लिक्तां अन्तर तकवू ते सिर्फ कफन तैड़ी लाव, ते एस गल्ली पुड़ हैरान भोइतां तैट्टां च़लो जेव। 13 फिरी एरु भोवं कि तैन मरां दूईं चले तैस दिहेड़ी एक्की इलॉव्वेरे पासे च़लोरे थिये, तैस इलॉव्वेरु नवं इम्माऊस थियूं। तैन यरूशलेम नगरेरां 11 किलोमीटर दूर थियूं। 14 तैना एप्पू मांमेइं एस्से बारे मां गल्लां केरते च़लोरे थिये ज़ै बितना बीतोरी थी। 15 ज़ैखन तैना गल्लन मां मसत थिये, ते एप्पू मांमेइं गलबात लोरे थिये केरने त यीशु एप्पू तैन कां नेड़े एइतां तैन सेइं साथी-साथी च़लने लगो। 16 पन तैनेईं यीशु न पिशानो किजोकि परमेशेरे तैना पिशान्ने करां रोकोरे थिये। 17 यीशुए तैन जो ज़ोवं, “तुस लोक एप्पू मांमेइं कुन गल्लां केरने लोरिथ?” तैना रुकी जे, ते तैन केरु तुतर उदास लेइहोने लग्गु। 18 तैखन तै ज़ेसेरु नवं क्लियुपास थियूं, तैस सेइं ज़ोने लगो, “यरूशलेम नगरे मां सिर्फ तू अक मैनु आस ज़ैस पतो नईं कि, आखरी दिहाड़न मां कुन-कुन भोने लोरुए।” 19 यीशुए ज़ोवं, “कुन लोरुए भोने?” तैनेईं तैस सेइं ज़ोवं, “नासरत नगरेरो यीशु, ज़ै नबी थियो, तै परमेशेरे ते मैनु केरे सामने कम्मन मां ते शिक्षा देने मां बेड़ि शेक्ति बालो थियो। 20 तै प्रधान याजकेई ते हाकिमेईं केन्चरे सेइं रोमी गवनीरे हवाले कियो ते तैस जो कतलेरे हुक्म देइतां ते कूस पुड़ च़ाढ़ो। 21 पन असन त उमीद थी कि ए मैनुए, ज़ै इस्राएली लोकन रोमेरे राज़े करां आज़ाद केरेलो, एन गल्लन अज़ दलेइयोवं दिहाड़ीए। 22 हुन्ना असन मरां किछ कुआन्शां अज़ झेझां कब्री कां जोरी थी, तैन केरे ज़ोने सेइं असां हैरान भोए। 23 ज़ैखन तैन लाश न मैल्ली त तैना एन ज़ोती एई, असेईं स्वर्गदूत लाए ते तैनेईं ज़ोवं, कि यीशु ज़ीति भोरोए। 24 तैखन किछ इश्शे साथी भी कब्री कां जे, ते ज़ेन्चरे कुआन्शेईं ज़ोरु थियूं, तेरहु लाव पन यीशु न लाव।” 25 यीशु तैन दूईं चेलन सेइं ज़ोवं, “हे बेअक्ल लोकव! तुश्शे लेइ पवित्रशास्त्र मां नेबी केरि ज़ोरी गल्लन पुड़ भी विश्वास केरनो केत्रो मुशकले। 26 कुन मसीहरे लेइ ज़रूरी न थियूं, कि दुःख झल्लले ते फिरी अपनि महिमा मां दाखल भोए?” 27 यीशु अपने बारे मां तैना सैरी गल्लां समझेइ, ज़ैना पवित्रशास्त्रे मां मूसा करां देंते सारे नेबेईं ज़ोरिन। 28 एत्रे मां तैना तैस इलव्वें नेड़े पुजे ज़ैड़ी तैनेईं गानु थियूं, तैनेईं बुझ कि यीशु अग्रोवं गानूए। 29 पन तैनेईं एन ज़ोइतां मजबूर कियो, “कि असन कां बिश किजोकि दिहाड़ी डुबोरीए आंधरु भोने बालूए।” बस्सा ते बिशनेरे लेइ तैन सेइं साथी अन्तर च़लो जेव। 30 ज़ैखन तै तैन सेइं साथी रोटी खाने बिश्शो त तैनी रोटी ट्लाती ते बरकत देइतां टलोड़ी ते तैन देने लगो। 31 तैखन तैन केरि एछड़ी खुल्ली ते तैनेईं तै पिशानो, पन तै तैन करां आलोप भोइ जेव। 32 तैना एप्पू मांमेइं ज़ोने लगो, “ज़ैखन तै बत्तां असन सेइं साथी गल्लां लोरो थियो केरने, ते असन पवित्रशास्त्रेरो मतलब मसमझातो थियो, त असन केरी उमीद भोरी थी।” 33 तैना तैखने तैट्टां उठे ते यरूशलेम नगरे मां

आए ज़ैड़ी तैना यारहे चले ते हारे तैन केरे साथी एक्की ठैरी मैल्ले। 34 तैना ज़ोने लोरे थिये, “कि प्रभु सच्चे ज़ीतो भोरोए ते शमौन पतरसे लाहोरोए।” 35 तैनेई बत्तरी सैरी गल्लां शुनेई ते फिरी केन्चरे असेई यीशु रोटी टलोड़ते बार पिशानो। 36 तैना गल्लां करने लोरे थिये त यीशु तैन केरे मझाटे खड़ो भोड़तां ज़ोने लंगो, “तुसन शान्ति मैल्ले।” 37 पन तैना एत्रे डेरि जे, कि तैना समझने लगे कि असां आत्मा लहने लोरेम। 38 यीशुए तैन सेइं ज़ोवं, “तुस किजो डरेंथ ते तुशे मने मां शक किजो भोतीए। 39 मेरे हथ पाव हेरा अवं तैए आई, मीं हथ लेड़तां हेरा, किजोकि आत्माई हट्टी त कने मास न भोए ज़ेरू तुस मीं मां लातथ।” 40 एन ज़ोनेरे पत्ती तैनी अपने हथ पाव हिराए। 41 पन खुशी सेइं तैन याकीन न भोवं, कि यीशु ज़ीतोए, ते तैना हैरान भोए, यीशुए तैन सेइं ज़ोवं, “तुसन कां खाने जो किछ आए?” 42 तैनेई तैस ट्लाड़ोरी मेछलरो अक टुकड़ो दित्तो। 43 तैनी ट्लाती ते तैन केरे सामने खाइ। 44 तैनी तैन सेइं ज़ोवं, “ज़ैखन अवं तुसन सेइं साथी थियो, त मीं तुसन एना गल्लां ज़ोरी थी, कि मूसेरे कानूने मां ते नेबी केरि किताबन मां ते भजना केरि किताबी मां मेरे बारे मां जैन किछ लिखोरूए तैन पूरू भोनू ज़रूरीए।” 45 तैखन तैनी तैन केरि मदत की, ताके पवित्रशास्त्रे सेमझी सखन। 46 ते तैन सेइं ज़ोवं, “एन पवित्रशास्त्र मां लिखोरूए कि मसीह दुःख झल्लेलो ते टलेइयोवं दिहाड़े मुड़दन मरां ज़ीतो भोलो। 47 ते तैसेरे नंवे सेइं यरूशलेम नगरेरां शुरू केरतां सैरी कौमन मां पापन करां मनफिरानेरे मैफारो प्रचार कियो गालो। 48 किजोकि तुस एना सैरी गल्लां केरे गवाहथ। 49 हेरा, अवं एप्पू तुसन पवित्र आत्मा देइलो, जेसेरो वादो बाजी परमेशरे कियोरोए। पन ज़ां तगर स्वर्गेरां शक्ति न मैल्ले तांतगर इस नगर मां राथ।” 50 फिरी यीशुए तैना नगरेरे बेडर बैतनिय्याह डलॉव्वेरे नेड़े ने। ते अपनो हथ खड़ो केरतां तैन बरकत दित्ती। 51 ज़ैखन तै तैन बरकत देने लोरो थियो, त तैन करां अलग भोड़ जेव ते परमेशरे तै स्वर्गे जो नीयो। 52 चलेई तैसेरी आराधना की ते फिरी खुशी सेइं यरूशलेम नगरे जो वापस चले जे। 53 ते तैना हर वक्त मन्दरे मां एड़तां परमेशरेरी तारीफ़ केरते थिये।

यूहन्ना

1 (दुनियारे रचनेरे पेड़लो) शुरुआती मां वचन थियूं। तैन वचन परमेशरे सेइं साथी थियूं। तैन वचन परमेशर थियूं। 2 शुरुआती मां परमेशरे सेइं साथी तैन वचने थियूं। 3 सब किछ वचनेरे जिरिये बनाव जेव। त जैन किछ बनाव ज़ोवं, तैस मरां कोई भी चीज़ तैसेरे बागैर न बनाई जेई। 4 तैस (वचने) मां जिन्दगी थी; ते तै जिन्दगी सारे मैनन् लौ देचे। 5 त तै लौ आंधरे मां (हमेशा) चमकचे, त आंधरू लोई कधी कैबू न केरि सके। 6 परमेशरेरी तरफां अक मैन्हु भेजो जेव, जेसेरू नवं यूहन्ना थियूं। 7 तै तैस लोअरे बारे मां ज़ोने ओरो थियो, ताके सब लोक तैसेरे जिरिये सेइं (तैस लोई पुड़) विश्वास केरन। 8 तै एप्पू लौ न थियो, पन लोअरे बारे मां लोकन गवाही देने ओरो थियो। 9 सच्च्यी लौ ज़ै हर एक्की मैन्हु (परमेशरे बारे मां ज़ान्नेरी) लौ देचे, तै दुनियाई मां एजनेबाली थी। 10 तैन वचन दुनियाई मां (ओरू) थियूं, त दुनिया तैसेरे जिरिये बनाई जेई, पन दुनियारे लोकेई तैन न पिशानू (कि तै कौन आए)। 11 तै अपने लोकन कां अव, पन तैसेरे अपने लोकेई तै कबूल न कियो। 12 पन जेत्ते लोकेई तै कबूल कियो, तैनी तैनन् परमेशरेरे बच्चे भोनेरू हक दिनु; यानी सारे लोकन ज़ैना तैसेरे नंवे पुड़ विश्वास केरतन। 13 तैना न हाज-बच्चे सेइं, न मैन्हु केरे मेर्जी सेइं, न तैस मैनेरे मेर्जी सेइं ज़ै बच्चे पैदा केरनेरी इच्छा रखते, बल्के परमेशरेरे मेर्जी सेइं पैदा भोरन। 14 तैन वचन मैन्हु बेनतां किछ वक्त असन सेइं साथी रावं, ते (इस दुनियाई मां) डेरो कियो। तैनी असन पुड़ बड़ो अनुग्रह कियो ते परमेशरेरे बारे मां सारी सच्च्य़ाई हिराई। (जताली तै इडी थियो, तैखन) असेई तैसेरी महिमा लाई। (जेन्वरां की) तै अपने बाजी परमेशरे करां अव, त तैसेरी ज़ेरि महिमा कोन्ची मां नई थी। 15 यूहन्ने तैसेरे बारे मां गवाही दिती, ते ज़ोरे सेइं लोकन सेइं ज़ोवं, “ई तै आए, जेसेरे बारे मां मीं ज़ोरू थियूं, कि ज़ै मेरे बाद एज्जी राओरोए, तै मीं करां बड़ो महान आए, किजोकि तै मीं करां पेड़लो थियो। 16 तैसेरी भरपूरी सेइं (यानी, तैसेरे सारे अनुग्रह ते सच्च्य़ाई सेइं) असन सेबन आशिर्वाद पत्ती आशिर्वाद मैल्लू। 17 मूसा नेबेरे जिरिये असन कानून मैल्लो, पन यीशु मसीहरे जिरिये असन कां (परमेशरे करां) अनुग्रह ते सच्च्य़ाई पुज्जी। 18 परमेशर केन्चे कधी भी नई लावरो, पन तैसेरू अक्के मट्टू (यीशु) ज़ैन बाजी परमेशरेरे कुम्मे मां आए, तैन्ने असन परमेशर हिराव।” 19 यूहन्ने यीशु मसीहरे बारे मां ई गवाही दिती, (एक्सां) ज़ैखन यहूदी लोकां केरे लीडरेई यरूशलम नगरेरां यूहन्ना कां किछ याजक त लेवी भेजे, त तैनेई तैस पुच्छू, “तू कौन आस?” 20 यूहन्ने तैन सेइं सच ज़ोवं ते किछ भी छपानेरी कोशिश न की, त तैनी तैन सेइं ज़ोवं, “अवं मसीह नई।” 21 तैखन तैनेई तैस पुच्छू, “फिरी तू कौन आस? कुन तू एलिय्याह नबी आस?” यूहन्ने तैनन् जुवाब दित्तो, “अवं तै नई।” तैनेई फिरी पुच्छू,

“कुन तू कोई नबी आस?” तैनी जुवाब दित्तो, “नई।” 22 तैखन तैनेई तैस पुच्छू, “फिरी तू कौन आस? (असन ज़ो) ताके अस तैनन् जुवाब देम ज़ैनेई अस भेजोरेम। तू अपने बारे मां कुन ज़ोतस?” 23 तैनी जुवाब दित्तो, “जेन्वरे यशायाह नेबे (मेरे बारे मां) ज़ोरूए, तेन्वरे अवं सुनसान ठैरी मां लोकन हक देइतां ज़ोताई कि, ‘तुसन कां प्रभु एजनेबालो आए, तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)” 24 फरीसी लोकां केरे तरफां किछ मैन्हु यूहन्ना कां भेजोरे थिये। 25 तैनेई यूहन्ना पुच्छू, “अगर तू न मसीह आस, न एलिय्याह, त न नबी, त फिरी (तीं कुन अधिकार आए) लोकन बपतिस्मो किजो देतस?” 26 यूहन्ने जुवाब दित्तो, “अवं त (लोकन) पैनी सेइं बपतिस्मो देताई, पन तुसन सेइं साथी रानेबालो अक एरो आए, ज़ैस तुस हकीक्ति मां न पिशानथ। 27 ई तै आए, ज़ै मेरे बाद एजनेबालो आए, तै मीं करां महान आए। अवं त तैसेरो गुलाम भोनेरे काबल भी नई कि तैसेरे बूटेरे तसमे खोल्ली।” 28 एना गल्लां, यरदन दरियारे पार बैतनिय्याह नगरे मां भोड़, ज़ैडी यूहन्ना लोकन बपतिस्मो देतो थियो। 29 एग्री दिहाड़े यूहन्ने यीशु अपने पासे एइतो लाव, त तैनी यीशुएरे बारे मां लोकन सेइं ज़ोवं, “तक्का, परमेशरे तरफां भेजोरू (बलिदानेरू) गबडू, ज़ैन सैरी दुनियारे लोकां केरे पाप नेते। 30 ई तै आए, जेसेरे बारे मां मीं ज़ोरू थियूं कि, ‘अक मैन्हु मेरे बाद एजनेबालो आए, ज़ै मीं करां बड़ो महान आए, किजोकि तै मीं करां पेड़लो थियो।’ 31 हुन्ना तगर अवं त एप्पू भी तैस पिशानतो न थियो। पन एल्लेरेलेइ अवं (इडी) एजतां लोकन पैनी सेइं बपतिस्मो देताई, ताके तै मैन्हु इसाएल्लेरे लोकन मां बांदो भोए।” 32 तैखन यूहन्ने लोकां केरे सामने गवाही दिती, “मीं पवित्र आत्मा कबूतररे शकली मां अम्बरेरां एइतो लाव, ते तै तैस पुड़ बिश्शो। 33 अवं त एप्पू पिशानतो न थियो कि यीशु हकीक्ति मां कौन थियो, पन परमेशरे ज़ैनी अवं लोकन पैनी सेइं बपतिस्मो देने भेजो, तैनी मीं सेइं ज़ोवं, ‘ज़ैस पुड़ तू पवित्र आत्मा एइतो त बिश्तो लाएलो, तेए लोकन पवित्र आत्मा सेइं बपतिस्मो देनेबालो आए।’ 34 तै मीं लाव, त अवं तुसन गवाही देताई, कि ए मैन्हु परमेशररू मट्टू आए!” 35 दुइयोवं दिहाड़े, फिरी यूहन्ना त तैसेरे चेलन मरां दूई तैडी खड़े भोरे थिये, 36 त यीशु तैलमेइं चलोरो थियो। ज़ैखन यूहन्ने यीशु लाव, त तैनी यीशुएरे बारे मां अपने चेलन सेइं ज़ोवं, “तक्का, इन परमेशरे तरफां भेजोरू (बलिदानेरू) गबडू आए!” 37 ज़ैखन यूहन्नेरे दुइये चेलेई एन शुनू, त तैना यीशु पत्ती चले। 38 यीशुए बेदलोइतां तैना एइते लाए ते तैन पुच्छू, “तुस केस लगेरेथ तोपने?” तैनेई ज़ोवं, “हे गुरू, तू कोडि रातस?” 39 तैनी तैन ज़ोवं, “चला तुस एप्पू हेरेले।” तैखन तैनेई गेइतां तैसेरे रानेरी ठार हेरी, ते तैस दिहाड़े तैना तैस साथी राए। तै कोई इलोझी चेब्रे बज़ां केरो मौको थियो। 40 तैन दूई चेलन मरां, ज़ैना यूहन्नेरी गल्लां शुन्तां यीशु पत्ती चलोरे थिये, अक अन्द्रियास थियो, ज़ै शमौन-पतरसेरो ढूला थियो।

41 तैनी पेड़लून एन कम कियूं कि अपने ढूला शमौन-पतरस तोप्तां तैस सेइं ज़ोवं, “असन मसीह मैलोरोए!” 42 तैखन अन्द्रियासे यीशु कां शमौन आनो। यीशुए तैसेरे पासे तक्कू ते ज़ोवं, “तू यूहन्नेरू मट्टू शमौन आस। पन अज़्जेरे बाद तेरू नवं कैफा भोलू।” यूनानी भाषाई मां कैफारो मतलब “पतरस” आए। (एसेरो मतलब घोड़ा।) 43 होरसां दुइयोवं दिहाड़े यीशुए गलील इलाके मां गानू चाव। तैनी फिलिप्पुस लेइतां तैस सेइं ज़ोवं, “मीं सेइं साथी च़ल (ते मेरो चेलो बन)।” (फिलिप्पुस यीशु सेइं साथी च़लो।) 44 फिलिप्पुस बैतसैदा नगरे मां रातो थियो, ज़ैडी अन्द्रियास त पतरस भी राते थिये। 45 तैल्ला पत्ती फिलिप्पुस गेइतां नतनएले सेइं मिलो त ज़ोने लगे, “असन मसीह मैलोरोए, जेसरे बारे मां (बड़े पेड़ले) मूसेरे कानूने मां लिखोरोए त कने नेबेई भी अपनि किताबी मां लिखोरोए। तै यूसुफेरू मट्टू नासरत नगरे बालो यीशु आए, ज़ै नासरत नगरेरो आए!” 46 नतनएले तैस सेइं ज़ोवं, “कुन नासरते मरां कोई रोडी चीज़ निस्सी सकतीए?” फिलिप्पुसे ज़ोवं, “एइतां एप्पू हेर।” (त नतनएल फिलिप्पुसे सेइं साथी च़लो।) 47 यीशुए नतनएल अपने पासे एइतो लाव ते तैनी तैसेरे बारे मां एन ज़ोवं, “ई असली इस्राएली मैन्हु आए, एसमां कोई पाखंड नई!” 48 नतनएले यीशु पुच्छू, “तू मीं केन्चेरे ज़ानतस?” यीशुए तैस जुवाब दितो, “फिलिप्पुस तीं कुजाने करां पेड़ले ज़ैखन तू फेगेरे बुट्टे हैठ थियो, मीं तू तैड़ी लावरो थियो।” 49 तैखन नतनएले ज़ोवं, “हे गुरु, (हुन्ना अवं ज़ानतां कि) तू परमेशेरू मट्टू आस! तू इस्राएल लोकां केरो राज़ो आस!” 50 यीशुए तैस जुवाब दितो, “कुन तू मीं पुड़ एल्हेरेलेइ विश्वास केरतस कि मीं तीं सेइं एन ज़ोवं, कि मीं तू फेगेरे बुट्टे हैठ लावरो थियो? तू इस करां भी बेड्डी-बेड्डी गल्लां लाएलो!” 51 फिरी तैल्ला पत्ती यीशुए ज़ोवं, “अवं तुसन सेइं सच-सच ज़ोताई कि, तुस स्वर्ग खुल्लू त कने परमेशेरें स्वर्गदूतन उबरे गाते त मैनेरे मट्टे पुड़, यानी मीं पुड़ उतरते लाएलो।”

2 तैल्ला पत्ती, ट्लेइयोवं दिहाड़े गलील इलाकेरे काना नगरे मां केन्चेरो इला थियो। यीशुएरी अम्मा भी तैड़ी थी। 2 यीशु ते तैसेरे चलन भी धाम कियोरी थी। 3 ज़ैखन दाछेरो रस मुक्को, त यीशुएरी अम्मा तैस सेइं लगी ज़ोने, “एन कां दाछेरो रस मुकोरोए।” 4 यीशु लगे ज़ोने, “अम्मा, मीं तीं सेइं कुन कम? हेजू मेरो वक्त नई ओरो।” 5 तैसेरे अम्मा नौकरन सेइं ज़ोवं, “ज़ैन किछ यीशु तुसन सेइं जोए, तैन्ने केरथा।” 6 तैड़ी नेड़े घोड़ां केरे शा (बट्टे) घड़े रखेरे थिये, ज़ैन मां दूई-दूई ट्लाई-ट्लाई मन (पानी) लगतू थियूं। यहूदी लोक अपने रुवाज़ेरे मुताबिक (अपने आपे त कने चीज़न) धोनेरे लेइ एन घड़े (मां पानी भरतां) इस्तेमाल केरते थिये। 7 यीशुए नौकरन सेइं ज़ोवं, “घड़न मां पानी भरा।” तैनेई पूरे घड़े भरे। 8 तैखन यीशुए तैन सेइं ज़ोवं, “हुन्ना, घड़े मरां किछ पानी केढतां धामारे प्रधाने कां (चखनेरे लेइ) देथ। तैनेई तैस कां नेव। 9 ज़ैखन

धामारे प्रधाने तैन पानी च़खवू, ज़ैन दाछेरो रस बनोरू थियूं तैन थियो ज़ानतो कि एन कोट्टां ओरूए, पन नौकर ज़ानते थिये, ज़ैनेई तैन केढतां आनेरू थियूं। एल्हेरेलेइ धामारे प्रधाने लाड़ो कुजाव, ते तैस सेइं ज़ोवं, 10 ‘हर कोई मैन्हु (आम तौर, धामी मां) पेड़लो रोड़ो दाछारो रस देते, त ज़ैखन लोक पीतां रज़्ज़तन, त बादे मां घट रोड़ो ज़ेरो दाछारो रस देते, पन तीं रोड़ो हेजू पत्रोवं रखोरो थियो!’ 11 गलील इलाकेरे काना नगरे मां यीशुए पेड़लो चमत्कार कियो। एन केरतां तैनी अपनि महिमा बांकी की, त तैसेरे चेलेई तैस पुड़ (होरो भी जादे) विश्वास कियो कि तै मसीह आए। 12 तैल्ला पत्ती यीशु त तैरी अम्मा ते तैसेरे ढूला ते कने तैसेरे चले कफरनहूम नगरे मां जे, ते किछ दिहाड़े तैड़ी राए। 13 ज़ेइस यहूदी लोकां केरू फ़सह तिहार नेड़े अव, त यीशु यरूशलेम नगरे जो च़लो जेव। 14 त तैड़ी मन्दरेरे अंगने मां तैनी (बलिदानेरे लेइ) दांत, भैट्टां त कबूतर बेचने बाले लाए त कने पेंडसे बदलनेबाले भी अपने मेज़न पुड़ बिश्शोरे लाए। 15 तैखन तैनी रेस्सरो अक कोड़ो बनेइतां, तैनन् सेबन्न त भैट्टां त दांत मन्दरे मरां बेइर कढे, त बुपारी केरे पेंडसे (इरां उरां) शारे, त तैन केरे मेज़ उलटाए। 16 त कबूतर बेचनेबालन सेइं ज़ोवं, “इना इट्टां नेड़ गाथा! मेरे बाजी केरे मन्दरे बुपारी लोकां केरू घर न बनाथा!” 17 ज़ैखन तैसेरे चेलेई एन शुन्नु, त तैनन् याद अव कि (परमेशेरी किताबी मां) लिखोरूए कि (मसीहे परमेशेरे सेइं ज़ोवं) “तेरे घरेरे लेइ मेरी भक्ति, (हे परमेशार) मेरे अन्तर अगारी ज़ेरी ज़लतीए!” 18 तैखन यहूदी लोकां केरे किछ लीडरेई तैस सेइं ज़ोने लगे, “तू असन कोई निशान (चमत्कार) हिरा कि मन्दरेरे अंगने मरां लोकन कढनेरे लेइ तीं कां परमेशेरे तरफां अधिकार आए?” 19 यीशुए तैन जुवाब दितो, “एस मन्दरे डोला, ते अवं ट्लेइ दिहैइन मां एस (दुबारो) बनेइलो।” 20 यहूदी लोकेई यीशु जुवाब दितो, “कुन इस मन्दरे बन्ने मां 46 साल लगेरेन, कुन तू एस ट्लेइ दिहैइन मां (दुबारो) बनेइ सकतस?” 21 तेनेई गलत समझू यीशुए ज़ैस मन्दरेरी गल कियोरी थी, ते तैसेरी अपनि जान थी। 22 एल्हेरेलेइ (बादे मां) ज़ैखन यीशु (कूसे पुड़ मरो त) मुड़न मरां ज़ीतो भोव, त तैखन तैसेरे चलन याद अवं कि यीशुए (अपने मौत त कने ज़ीतो भोनेरे बारे मां) असन ई गल ज़ोरी थी। त (एसेरे वजाई सेइं) तैनेई पवित्रशास्त्रे मां लिखोरी गल्लन पुड़ त कने यीशु मसीहेरी ज़ोरी गल्लन पुड़ होरो भी जादे विश्वास कियो। 23 ज़ताली यीशु फ़सह तिहारेरे मौके यरूशलेम नगरे मां थियो, त बड़े लोकेई तैसेरे चमत्कार, ज़ैना तैनी किये, लेइतां तैस पुड़ विश्वास कियो। 24 पन फिरी भी यीशुए तैन पुड़ अतबार न कियो, किजोकि तै सेबन्नी केरो इन्सानाी सोच ज़ानतो थियो। 25 तैस ए ज़रूरत न थी कि कोई मैन्हु तैस केन्वी होरि मैनेरे बारे मां जोए, किजोकि तै (पेड़ले) मैन्हु केरि सोच ज़ानतो थियो।

3 फरीसी लोकन मां अक मैन्हु थियो ज़ेसेरू नवं नीकुदेमूस थियूं। तै यहूदी लोकां केरो अक लीडर थियो। 2 एक्की

राती तै यीशु कां एइतां ज़ोने लगे, “हे गुरु, अस ज्ञानतम कि तू परमेशरेरी तरफां गुरु भोइतां ओरोस; किजोकि ज़ैना चमत्कार तू हेरातस, होरो कोई न हेरेई सके, ज्ञातगर परमेशर तैस सेइं साथी न भोए।” 3 यीशुए जुवाब दितो, “अवं तुसन सेइं सच्च-सच्च जोतां कि ज्ञातगर कोई मैन्हु दुबरो ज़र्म न घिन्ने, त तै परमेशरेरू राज़ न लेई सके।” 4 नीकुदेमुस पुच्छने लगे, “ज़ैखन मैन्हु बुद्धो भोते, त तै केन्चरे सेइं दुबरो पैदा भोइ सकते? कुन तै अम्मारे पेटे मां गेइतां दुबरो ज़ेरमी सकते?” 5 यीशुए जुवाब दितो, “अवं तुसन सेइं सच्च-सच्च जोताई कि ज्ञातगर कोई मैन्हु पैनी सेइं ते आत्माई सेइं पैदा न भोए, तै परमेशरेरे राज़े मां दाखल न भोइ सके। 6 किजोकि हाज-बव अपने बच्चन सिर्फ़ एस जानेरी ज़िन्दगी देइ सकतन, पन सिर्फ़ (पवित्र) आत्मा लोकन आत्मिक ज़िन्दगी देइ सकते। 7 हैरान न भो कि मीं तीं सेइं कुन ज़ोवं कि, ‘तीं दुबरो ज़र्म घिन्नु ज़रूरीए।’ 8 हवा ज़ेरां चलनू चातीए तैरां चलचे, त तू तैसारी आवाज त शुनतस, पन एन न ज्ञानस कि तै कोठ्ठां एइचे त कोरां गाचे। तेन्चरे कोई भी न हेरी सके त न समझी सके कि केन्चरां पवित्र आत्मा लोकन (नर्वीं) ज़िन्दगी देते।” 9 तैखन नीकुदेमुसे पुच्छू, “एना गल्लां केन्चरे सेइं भोइ सेकतिन पवित्र आत्मा केन्चरां लोकन नर्वीं आत्मिक ज़िन्दगी देते?” 10 यीशुए तैस सेइं ज़ोवं, “तू इस्राएली लोकां केरो (अक खास) गुरु भोइतां भी कुन इना गल्लां न समझस? 11 अवं तीं सेइं सच्च-सच्च जोताई, ज़ैन अस ज्ञानतम तैन्ने (लोकन) ज़ोतम, त ज़ैन असेई लावरूप तैसरे बारे मां (लोकन) गवाही देतम, पन फिर भी तुस लोक इशी गवाही न मन्नथ। 12 मीं त तुसन सेइं धेतारी गल्लां केरे बारे मां गल की, त तुसेई (मीं पुड़) विश्वास न कियूं, त अगर अवं स्वर्गेरी गल्लां ज़ोई त तुस केन्चरे विश्वास केरेले? 13 (स्वर्गेरी गल्लां ज़ानेरे लेइ कधी) कोई मैन्हु स्वर्ग मां नई ज़ोरो, सिर्फ़ तैए ज़ै स्वर्गेरां ओरो, यानी अवं मैनेरू मट्टू ज़ैन स्वर्ग मां आई। 14 ज़ेन्चरे मूसा सुनसाने मां (परमेशरेरे लोकन बच्चांनेरे लेइ पितल सेइं बनोरो) सप (खंभे पुड़) उच्चे पुड़ चढ़ाव, तेन्चरे एन ज़रूरी आए कि (अवं) मैनेरू मट्टू भी उच्चे पुड़ चढ़ाव जाए। 15 ताके ज़ै कोई तैस पुड़ विश्वास केरे, तैस हमेशारी ज़िन्दगी मैल्ले।” (aiōnios g166) 16 “किजोकि परमेशरे दुनियारे लोकन सेइं एत्रो प्यार कियो कि तैनी अपनू अक्के मट्टू दितू, ताके ज़ै कोई तैस पुड़ विश्वास केरे, तै नाश न भोए, बल्के हमेशारी ज़िन्दगी हासिल केरे। (aiōnios g166) 17 किजोकि परमेशरे अपनू मट्टू दुनियाई मां एल्हेरेलेइ नई भेजोरू कि तै दुनियारे लोकन (तैन केरे पापां केरि) सज़ा दे, बल्के एल्हेरेलेइ कि दुनियारे लोक तैसरे ज़िरिये सेइं (पापां केरि सज़ाई करां) मुक्ति हासिल केरन। 18 ज़ै तैस पुड़ विश्वास केरते, तैस सज़ा न मैल्ले। पन ज़ै मट्टू पुड़ विश्वास न केरे, तै पेइलोए दोषी भोइ ज़ोरोए, किजोकि तेनी परमेशरेरे अकैल्ले मट्टेरे नंवे पुड़ विश्वास नई कियोरो। 19 परमेशर लोकन सज़ा देनेरी वजा ई आए कि ज़ैस जो लौ ज़ोतन तै दुनियाई मां ओरिए, परमेशरे

अपनि लौ दुनियाई मां भेज़ी, पन लोक ते कने तैन केरां कम्मां बुरां थियां, एल्हेरेलेइ तैनेई तैस लोई करां जादे पापेरू आंधरू पसंद कियूं। 20 ज़ै कोई बुरू कम केरते, तै लोई सेइं नफरत केरते त लोअरे नेडे न एज्जे, एरू न भोए कि तैसरे कम्मन पुड़ दोष लाव जाए। 21 पन हर कोई ज़ै परमेशरेरी सच्चवाई पुड़ च़लते, तै लोई कां एइते, ताके लोई सेइं बांदो भोए कि तैसरे सब कम्मां परमेशरेरी शक्ति सेइं साथी किये गातन।” 22 एना गल्लां केरे बाद यीशु त तैसरे चले यहूदिया इलाके मां आए, त तैड़ी रेइतां लोकन बपतिस्मो देने लगे। 23 यूहन्ना भी शालेम नगरेरे नेडे ऐनोन नंवेरे ठेरी लोकन बपतिस्मो देतो थियो। किजोकि तैड़ी हच्छु पानी थियूं त लोक बपतिस्मो नेनेरे लेइ तैस कां एइते राते थिये। 24 किजोकि यूहन्ना हेज़ू कैदखाने मां न थियो छुड़ोरो। 25 एक्सां यूहन्नारे चेलां केरि केन्ची यहूदी मैन्हु सेइं (रुवाजरे मुताबिक) शुद्ध भोनेरे बारे मां बेंस भोइ। 26 एल्हेरेलेइ यूहन्नारे चले तैस कां एइतां ज़ोने लगे, “हे गुरु, (तीं पतो आए) तै मैन्हु ज़ै यरदन दरियारे पार तीं सेइं साथी थियो त कने तीं तैसरे बारे मां गवाही दितोरी थी, हेर, तै भी लोकन बपतिस्मो देते त सब लोक तैस कां गातन।” 27 यूहन्ना जुवाब दितो, “(तै रोड़ी गल आए, किजोकि) मैन्हु किछ न हासिल केरि सके, ज्ञातगर तैस स्वर्गेरां (यानी परमेशरे करां) न मैल्ले। 28 तुस एप्पू मेरे गवाह आथ, कि मीं तुसन सेइं ज़ोरू थियूं कि अवं मसीह नई, पन अवं तैस करां पेइले (परमेशरेरां तरफां) भेजोरोई। 29 ज़ेसेरी महरनीए त तै महरावे, पन महरावो दोस्त ज़ै खडोए महरावोरी हर गल खुशी सेइं शुनतो रहते; हुनी मेरी ई खुशी पूरी भोइ। (कि सब लोक तैस कां गातन)। 30 एन ज़रूरीए कि तै बधै ते अवं घेटी।” 31 “(मसीह) ज़ै स्वर्गेरां एइते तै होरि सेबभन करां महान भोते। त ज़ै मैन्हु धेरती पुडेरं भोते, तै धेतारीए त धेतारी गल्लां केरते। ज़ै स्वर्गेरां एइते तै सेबभना उच्चो महान भोते। 32 तैनी (परमेशरे तरफां) ज़ैन किछ लाव ते शुनेरू, तैसरे बारे मां लोकन शुनाते, पन तैसेरी गवाही कोई न शुने। 33 ज़ै कोई तैसेरी गवाही पुड़ विश्वास केरते, तै तैसेरी तसदीक केरते कि परमेशर सच्चो आए। 34 किजोकि (मसीह) ज़ै परमेशरे भेजोरोए, तै परमेशरेरी गल्लां ज़ोते, किजोकि परमेशर तैस पवित्र आत्मा नैपतां न दे। 35 (परमेशर) बाजी मट्टे सेइं प्यार रखते, त तैनी सब किछ तैसरे हावाले कियोरूए। 36 ज़ै (परमेशरेरे) मट्टे पुड़ विश्वास केरते तैस हमेशारी ज़िन्दगी मैलचे, पन ज़ै मट्टे पुड़ विश्वास न केरे तै ज़िन्दगी करां दूर रालो, ते तैस पुड़ परमेशरेरो क्रोध (हुन्ना करां लेइतां हमेशा) राते।” (aiōnios g166)

4 फिरी ज़ैखन प्रभु पतो लगे कि फरीसी लोकेई शुनोरूए, यीशु, यूहन्ना करां जादे चले बनाते ते बपतिस्मो देते। 2 (हालांकी सच्च एन थियूं यीशु एप्पू नई बल्के तैसरे चले बपतिस्मो देते थियो), 3 तैखन तेना यहूदिया इलाके शैरतां गलील इलाके जो च़ले जे। 4 ते तैसेरू सामरिया इलाके मामेई भोइतां गानू ज़रूरी थियूं। 5 एल्हेरेलेइ तै सामरिया इलाकेरे सूखार नगर मां

अव, तै ठार तैस ज़मीनरे नेड़े थी जै याकूबे अपने मट्टे यूसुफे गल्लां लगेरोईं करेने तैए मसीह आई।” 27 एत्रे मां तैसेरे चले दित्तोरी थी। 6 याकूबे ज़ैन खुह बनोरू थियूं तैन तैड़ी थियूं, ते आए ते तैनेई तै एक्की कुआन्शी सेइं गल्लां केरतो लेइतां हैरान यीशु सफर केरतां थकोरो थियो, ते तैस खुहे पुड़ बिश्शो। तैखन राए, पन केन्चे तैस एन न पुच्छू, “तू कुन चातस?” या “एस दुपहरां केरो मौको थियो। 7 एत्रे मां अक सामरी कुआन्श तैड़ी कुआन्शी सेइं किजो गल्लां लगेरोस करेने?” 28 तै कुआन्श पानी भरने आई। यीशुए तैस जो ज़ोवं, “मीं पानी पीया।” 8 पैनैरो घड़ो तैड़ी छेइतां वापस नगर मां जेई ते मैन्न सेइं ज़ोने किजोकि तैसेरे चले रोटी आन्नेरे लेइ नगर मां ज़ोरे थियो। 9 तैस लगी। 29 “एज्जा, एक्की मैन्हु सेइं मिला तैनी मीं सेइं सब सैमरी कुआन्शां तैस जो ज़ोवं, “तू यहूदिस ते अव त सामरी, तू किछ ज़ोवं ज़ैन मीं अज़ तगर कियेरू थियूं, कुन ए तै मसीह त मीं पानी पीयानेरे लेइ किजो ज़ोतस?” किजोकि यहूदी सैमरन नई?” 30 तैना मैन्हु नगर मरां निस्तां यीशु हेरनेरे लेइ तैसेरे पासे सेइं मिलनू जुलनु न थिये सुखाते। 10 यीशुए तैस ज़ुवाब दित्तो, च़लने लगे। 31 यीशुएरे चले तैस कां मिनत करेने लगगे, “हे गुरु, “अगर तू ज़ानेथी कि परमेशर तीं कुन देनू चाते, त एन भी रोटी खा।” 32 पन यीशुए तैन सेइं ज़ोवं, “मीं कां खानेरे लेइ ज़ानेथी कि, तीं करां कौन पानी मगने लोरोए, त तू तैस करां अक एरी रोटी आए, पन तुसन तैसेरे बारे मां कोई पतो नई।” 33 तैखन चले एप्पू मांमैइ ज़ोने लगे, “कुन केन्चे पेइलू एसेरे लेइ मगेथी, ते ते तीं ज़िन्दगरू पानी देथो।” 11 तैस कुआन्शां ज़ोवं, किछ खाने जो आनोरूए?” 34 यीशुए तैन सेइं ज़ोवं, “मेरी “हे प्रभु, तीं कां पानी भरनेरे लेइ कोई भांड नई, ते खुह बड़ डुधू रोटी ईए कि, परमेशेरी मज़ी पूरी केरि ज़ैनी अव भेजोरोईं ते तैन कम पूरू केरि ज़ैन तैनी दितोरूए। 35 कुन तुस न ज़ोथ तैन नगररे लेइ ज़ोताई कि, अपनि एछड़ी घाड़! ते एजनेबाले मैन्न हेरा, ज़ैना पक्कोरे ऊडारां केरि फसलारे ज़ेरे आन। 36 फसल कटने बालन कम केरतां मज़दूरी मैल्ली राओरीए, यानी तैना लोकन अकोट्टे केरि राओरेन ज़ैना लोकन हमेशारी ज़िन्दगी हासिल केरेले, ताके ज़े बेते ते कटते साथी खुशी मनान। (aiōn g165, 37 aiōnios g166) 15 तैस कुआन्शां यीशु जो ज़ोवं, “हे प्रभु, मीं भी एल्हेरेलेइ अक कहावते कि बेनेबालो कोईए ते कटने बालो होरो तैन पानी दे ताके मीं दल्लिश न लगगे ते मीं बार-बार पानी भरने कोईए, तैन सच्चे। 38 मीं तुस भेजे कि गाथ तैस फसली कट्टा इस खुहे पुड़ न एजनु पे।” 16 यीशुए तैस जो ज़ोवं, “गा, अपनो ज़े तुसेईं नई बेवरी, होरेईं मेहनती सेइं कम कियूं ते तुसन तैन मुन्श कुजा।” 17 तैसां कुआन्शां ज़ुवाब दित्तो, “मेरो कोई मुन्श केरि मेहनतरो फल मैल्लो।” 39 नगररे बड़े लोकेईं तैस सैमरी नई।” यीशुए तैस जो ज़ोवं, “तीं सज़ ज़ोवं, ‘कि मेरो कोई मुन्श कुआन्शरी गल शुन्तां यीशु पुड़ विश्वास कियो, किजोकि तैसां नई।” 18 किजोकि तीं पंच मुन्श बनोरेन ते ज़ैस सेइं साथी तू तैन लोकन सेइं ज़ोवं कि तैनी मीं सेइं सब किछ ज़ोवं, ज़ैन मीं हुन्ना आस, ते तेरो मुन्श नई, तीं ज़ैन किछ ज़ोवं तैन सच्चे कियेरू थियूं। 40 ज़ैस नगररे सामरी लोक यीशु कां ओरे थिये, ज़ोरोए।” 19 तैस कुआन्शा ज़ोवं, “हे प्रभु, मीं लगगते तू कोई मिनत केरतां ज़ोने लगे, असन कां बिश फिरी तै दूई दिहाड़े तैड़ी नबी आस। 20 इश्शे दादे-पड़दादेईं इस पहाड़े पुड़ आराधना राव। 41 होरे भी बड़े लोक थिये ज़ैनेईं तैसेरी गल्लां शुन्तां तैस की, पन तुस यहूदी लोक ज़ोतथ कि ज़ैड़ी आराधना कियोरी पुड़ विश्वास कियो। 42 तैनेईं तैस कुआन्शी जो ज़ोवं, “असेईं लोड़चे, तै ठार सिर्फ यरूशलेम आए।” 21 यीशुए तैस कुआन्शी तेरी गल्लां शुन्तां विश्वास नई कियोरो, बल्के असेईं अपने कन्नेईं जो ज़ोवं, “हे कुआन्श, मेरी गल्लरो विश्वास केर, कि तै मौको श्नेरूए ते असेईं एन हुनी बुझू कि ए मैन्हु सच्चे दुनियाईं मुक्ति भी एज्जी राहोरोए, कि तुस लोक बाजी केरि आराधना न त देनेबालोए।” 43 दूई दिहैइना बाद यीशु फिरी गलीलेरे पासे च़लो इस पहाड़े पुड़ केरेले ते न यरूशलेमे मां केरेले। 22 तुस सामरी जेव। 44 ते यीशुए एप्पू ज़ोरू थियूं, कि कोई नबी अपने मुलखे लोक ज़ेसेरी आराधना केरतथ तैस न ज़ानथ, पन अस यहूदी मां इज़्ज़तरे काबल न समझो गाए। 45 ज़ैखन तै गलीले मां अव लोक ज़ेसेरी आराधना केरतम तैस ज़ानतम, किजोकि मुक्ति त गलीली लोक तैस सेइं खुशी सेइं मिले, एल्हेरेलेइ कि तैनेईं तैन सब किछ ज़ैन तैनी फ़सहरे मौके यरूशलेम नगर मां कियेरू थियूं, तैनेईं अपनि एछछेईं सेइं लावरू थियूं तैखन तैना एप्पू भी तैड़ी थियो। 46 दुइयों बार ज़ैखन तै गलील इलाकेरे काना तैड़ी अक बड़ो बड़ो राज़ेरो अफसर थियो तैसेरू मट्टू कफरनहूम तैना नगर मां बिमार भोरू थियूं। 47 ज़ैखन तैनी अफसर श्नु कि यीशु यहूदिया इलाकेरां गलील इलाके मां ओरोए त तै यीशु कां

पुजो ते मिनत केरतां ज़ोने लमो मेरु मट्टु मरने बालूए तू चल ते थियो। 17 एस पुड़ यीशुए तैन सेइं ज़ोवं, “मेरो बाजी यानी तैस बड़्झा, किजोकि तैन मरने बालू थियूं। 48 यीशुए तैस सेइं ज़ोवं, “ज़ांतगर तुस लोक निशान ते चमत्कार न लाएले कथे विश्वास न केरेले कि, अवं मसीह आई।” 49 तैनी बड्डे अफसरे ज़ोवं, “प्रभु लूश केर एरु न भोए कि मेरु मट्टु मेरि गाए।” 50 यीशुए जुवाब दित्तो, “चल तेरु मट्टु ज़ींतू भोनूए।” तैनी तैसेरी गल्लरो विश्वास कियो ते तैट्ठां चलो जेव। 51 तै हेजू बत्तां थियो त तैसेरे नौकर तैस मैल्ले ते ज़ोने लगे, “तेरु मट्टु ज़ींतूए।” 52 तैखन तै पुच्छने लगे, “मेरु मट्टु कैखन ज़ेरे बेड़्झोने लगोरु थियूं?” ते तैनेई ज़ोवं “तैसेरो भुखार हीज दीसां एक्की बजे उतरी जोरो थियो।” 53 तैखन तैसेरे बाजी याद अवं कि, तैए मौको थियो, जैखन यीशुए ज़ोरु थियूं, “गा तेरु मट्टु ज़ींतूए” तैखन तैनी भी ते तैसेरे पूरे टब्बरे यीशु पुड़ विश्वास कियो। 54 ई दुइयोवं चमत्कारो निशान थियो जै यीशुए यहूदिया इलाकेरां वापस एजनेरां बाद गलील इलाके मां कियोरो थियो।

5 एन गल्लन पत्ती यहूदी केरु अक तिहार भोवं, ते यीशु यरूशलेम नगरे जो जेव। 2 यरूशलेम नगरे मां भेड़ों केरे दारे कां अक हावदे, ज़ैस जो इब्रानी भाषाई मां बैतहसदा ज़ोतन, तैसेरां पंच अंगना थियां। 3 एन मां बड़े बिमार, काने, टोंटे, नीपाते (पानी हीलमेरे इंतज़ारे मां) भोते थिये। 4 (किजोकि वक्ते पुड़ परमेशेरो स्वर्गदूत हावदे पुड़ एइतां पानी हिलातो थियो, ते पानी हिलनेरां पत्ती ज़े कोई पेड़लो हवदे मां गातो थियो ते ठीक भोतो थियो, चाए तैसेरी कोई भी बिमारी किना भोए)। 5 तैड़ी अक मैनु थू ज़े 38 सालां केरो बिमार थू। 6 यीशुए तै तैड़ी बिशोरो लाव ते एन ज़ेनतां कि ए बड़ो चरोकनो इस हालती मांए, ते तैस पुच्छू, “कुन तू ठीक भोनू चातस?” 7 तैने बिमारे जुवाब दित्तो, “हे प्रभु, मीं कां कोई मैनु नई, कि ज़ताली पानी हिलावं गाए त मीं कोई हावदे मां गाने लेइ मेरी मदत केरे, मेरे पुजते-पुजते तांतगर होरो कोई गाते।” 8 यीशुए तैस सेइं ज़ोवं, “उठ अपनि खट सल्ल ते चल फिर।” 9 तै मैनु तैखने ठीक भोव, ते अपनि खट छुड़तां चलने फिरने लगे। 10 तै आरामेरी दिहाड़ी थी एल्लेरेलेइ यहूदी लीडर तैस सेइं ज़े ठीक भोरो थियो, ज़ोने लग्गे, “अज़ त आरामेरी दिहाड़ी आए, तीं खट छूनी जेइज़ नई।” 11 तैने तैन जुवाब दित्तो, “ज़ैने अव ठीक कियो, तैने मीं सेइं ज़ोवं, ‘अपनि खट छू ते चल फिर।’” 12 तैनेई तैस पुच्छू, “तै कौन मैनु ज़ैने तीं सेइं ज़ोवं, ‘खट छुड़तां चल फिर?’” 13 ज़े ठीक भोरो थियो तैन थियो ज़ानतो कि तै कौन आए, किजोकि तैस ठैरी भीड़ भोनेरे वजाई सेइं यीशु तैस ठैरां होरि पासे चुपचारे चलो जोरो थियो। 14 एन गल्लन पत्ती यीशु तै मन्दरेरे अंगने मां मैल्लो, यीशुए तैस सेइं ज़ोवं, “तक, तू ठीक भोरोस, फिरी पाप न करां, एरु न भोए कि, एस करां बड्डी आफत एज्जे।” 15 तैने मैने यहूदी लीडरन सेइं ज़ोवं, कि ज़ैने अवं ठीक कियोरोई तै यीशुए। 16 एल्लेरेलेइ यहूदी लीडर यीशु सताने लाए, किजोकि तै एरां ज़ेरां कम्मां आरामेरे दिहाड़े केरतो

थियो। 17 एस पुड़ यीशुए तैन सेइं ज़ोवं, “मेरो बाजी यानी परमेशर हमेशा कम केरते, मीं भी कम कियोरु लोड़े।” 18 एस वजाई सेइं यहूदी लीडर मनां जादे तैस मारनेरी कोशिश केरने लाए, किजोकि तै न सिर्फ आरामेरे दिहाड़ेरो हुक्म न थियो दलोतो बल्के परमेशरे अपनो बाजी ज़ोतो थियो ते अपनो आप परमेशरेरे बराबर बनातो थियो। 19 यीशुए तैन सेइं ज़ोवं, “अवं तुसन सेइं सज़-सज़ ज़ोताई, मट्टु यानी अवं एप्पू किछ न केरि बेटि, सिर्फ तैन ज़ैन बाजी परमेशरे करां केरतू लाताई, किजोकि ज़ैना-ज़ैना कम्मां बाजी करां केरतो लाते तैन मट्टु भी तैरसे तरीके सेइं केरते। 20 किजोकि बाजी, मट्टु सेइं प्यार केरते, ते ज़ैना-ज़ैना कम्मां तै एप्पू केरते, तैना सब मट्टु भी हिराते, ते तैन एस करां भी बड्ठां कम्मां हिरालू, ताके तुस हैरान भोथ। 21 किजोकि ज़ेन्चरे बाजी मुड़दन ज़ीतो केरते, तेन्चरे मट्टु भी ज़ैस चाते तैस ज़ीतो केरते। 22 बाजी केन्चेरी इन्साफ न केरे, पन तैने इन्साफ केरनेरु सारु कम मट्टु दित्तेरुए। 23 कि सब लोक ज़ेन्चरे बाजेरी आदर केरतन तेन्चरे मट्टेरी भी आदर केरन, ज़ै मट्टेरी आदर न केरे, तै बाजी केरि ज़ैने तैन भेजोरुए तैसेरी आदर न केरे। 24 अवं तुसन सेइं सज़ ज़ोताई ज़ै मेरु वचन शुन्तां मेरे भेजने बाले पुड़ विश्वास केरते, हमेशारी ज़िन्दगी तैसेरीए, ते तैस पुड़ सज़ारो हुक्म न भोए, बल्के तै मौतरां पार भोइतां हमेशारे ज़िन्दगी मां दाखल भोते।” (aiōnios g166) 25 “अवं तुसन सेइं सज़-सज़ ज़ोताई, कि तै वक्त एजनेबालोए, बल्के हुन्नाए ज़ैस मां मुड़दे परमेशरेरे मट्टेरी यानी मेरी आवाज़ शुनेले, ते ज़ैना शुनेले तैना हमेशा ज़ीएले। 26 किजोकि ज़ेन्चरे बाजी अपने आपे मां ज़िन्दगी रखते तेन्चरे तैने मट्टु भी ए अधिकार दित्तोरोए, कि अपने आपे मां ज़िन्दगी रखे एल्लेरेलेइ तैन मैनेरु मट्टुए। 27 बल्के बाजी परमेशरे तैस सैरी लोकां केरि आदालत केरनेरो भी अधिकार दित्तोरोए, एल्लेरेलेइ कि तैन यानी अवं मैनेरु मट्टु आई। 28 एसमां हैरान न भोथ, किजोकि तै वक्त एइते कि ज़ेरे कब्रन मां आन तैसेरी आवाज़ शुन्तां ज़ीते भोनेन। 29 ज़ैनेई भलाई कियोरीए हमेशारे ज़िन्दगरी लेइ ज़ीते भोनेन ज़ैनेई बुरी ज़िन्दगी ज़ीयोरीए तैना सज़ारी लेइ ज़ीते भोनेन।” 30 “अवं अपने आपे सेइं किछ न केरि बेटि, ज़ेन्चरे मेरो बाजी मीं ज़ोते तेन्चरे अवं लोकां केरि आदालत केरताई, ते मेरी आदालत सच्चीए, किजोकि अवं अपने मेर्ज़ी सेइं नई पन अपने भेजने बालेरी मर्ज़ी सेइं चाताई। 31 अगर अवं अपनि गवाही एप्पू देई, त मेरी गवाही सच्ची नई। 32 अक होरो आए, यानी मेरो बाजी ज़ै मेरी गवाही देते, ते अवं ज़ानताई ज़ै गवाही तै मेरे बारे मां देते तै सच्चीए। 33 तुसेई मैनु यूहन्ना कां मेरे बारे मां पुच्छने भेजे, ते तैनी सच्चेरी गवाही दित्तोरीए। 34 पन अवं अपने लेइ मैनेरी गवाही न चैई, पन यूहन्ना ज़ै गवाही दित्ती तैसेरे बारे मां मीं एल्लेरेलेइ ज़ोवं ताके तुसन मुक्ति मैल्ले। 35 तै त बलतो ते चमकतो दीयेरो ज़ेरो थियो, पन तुसन थोड़े चिरेरे लेइ तैसेरी लोई मां खुश भोनू रोड़ लग्गू। 36 पन मीं कां ज़ै गवाहीए तै यूहन्नारी

गवाही करां भी बड्डीए। किजोकि जैन कम बाजे मीं केरनेरे लेइ दितेरु मतलब इन्ने कम्मां जैना अवं केरताई, तैना मेरी गवाही देतन कि बाजे अवं भेजोरोई। 37 ते बाजी जैने अवं भेजोरोई तैने मेरी गवाही दितोरीए, तुसेई न कथी तैसेरी आवाज शूनोरी, ते न तै आमने सामने लोरोए। 38 तुसेई तैसेरी शिक्षा अपने मने मां नई रख्खोरी, किजोकि तुसेई मीं पुड़ विश्वास न कियो, कि अवं परमेशरे भेजोरोई। 39 तुस पवित्रशास्त्रे मां एन पढ़तथ, किजोकि तुस सोचतथ कि हमेशारी ज़िन्दगी तैस मां मैलतीए, तै ईए, जै मेरे बारे मां गवाही देते। (aiōnios g166) 40 फिरी भी तुस हमेशारे ज़िन्दगी हासिल केरनेरे लेइ मीं कां न एजनु चाथा। 41 अवं मैनन् करां तारीफ़ न चैई। 42 पन अवं तुसन ज्ञानताई तुशे दिले मां परमेशरेरे लेइ प्यार नई। 43 अवं अपने बाजरे अधिकारे सेइ ओरोई, ते तुस मेरी गल न मन्नथ। अगर होरो कोई अपने अधिकारे सेइ एज्जे, त तैसेरी गल मन्नेले। 44 तुस मीं पुड़ विश्वास न केरि बटथ, किजोकि तुस एककी होरि करां तारीफ़ चातथ, ते तुस तै तारीफ़ न चाथ जै सिर्फ परमेशरे तरफां। 45 इन न समझा कि अवं बाजरे सामने तुसन पुड़ दोष लेइएलो, तुसन पुड़ दोष लानेबालोए त मूसोए, जैस पुड़ तुसेई भरोसो रख्खोरोए। 46 किजोकि अगर तुसेई मूसेरो विश्वास कियोरो भोथो, त मेरो भी विश्वास केरेथे, किजोकि तैने मेरे बारे मां लिखोरूए। 47 तुस त तैसेरे कानूनेरे गल्लन पुड़ विश्वास न केरथ, ते फिरी तुस किजो मेरी गल्लन पुड़ विश्वास केरेले?”

6 एन गल्लन पत्ती यीशु गलीलेरे समुन्दरेरे मतलब तिबिरियुसेरे समुन्दरेरे पार जेव। 2 ते अक बडी भीड़ तैस पत्ती चली, किजोकि जैना चमत्कार तै बिमारन पुड़ हीरतो थियो, ते तैना ठीक भोते थिए ते लोक एन हेरते थिए। 3 तैखना यीशु पहाड़े पुड़ चढ़तां अपने चेलन साथी तैडी बिशशो। 4 ते यहूदी केरे फ़सहेरु तिहार नेडू थियूं। 5 जैखन यीशुए अक बडी भीड़ अपने पासे एंडती लाई, त तैने फिलिप्पुसे सेइ ज़ोव, “असां एना केरे लेइ रोटी कोट्ठां घिन्म?” 6 पन तैनी ते गल तैस अज़मानेरे लेइ जोई, किजोकि तै एप्पू ज्ञानतो थियो कि तै कुन केरेलो। 7 फिलिप्पुसे तैस जुवाब दितो, “एन केरे लेइ 200 दीनारां केरि रोटी भी पूरी न भोली कि तैन थोडी-थोडी मैली गैली।” 8 तैसेरे चेलन मरां शमौन पतरसेरे दूलाए अन्द्रियासे तैस सेइ ज़ोव। 9 “इडी अक मट्ठूए जैस कां जोआं केरि पंच रोटिन, तै दूई मेछलीन, पन एत्रे लोकन जो कुन तैना पूरी भोनिन?” 10 यीशुए ज़ोव, “लोकन बिशाला।” तैडी बडो घास थियो। तैखन लोक जैना लगभग 5000 मड़द बिशशोरे थियो। 11 तैखन यीशुए रोटी दलेइ ते शुक्र केरतां बिशने बलना दित्ती, ते तेन्चरे मेछलीन मरां भी ज़ेत्री तैना चातो थियो बेन्टी। 12 जैखन तैना खेइतां रज़्जे त तैनी अपने चेलन सेइ ज़ोव, “बचोरे टुकड़े अकोट्टे केरा, ताके किछ शारू न गाए।” 13 ते तैनेई अकोट्टे केरे, ते जोआं केरे पंच रोटी केरे टुकड़न मरां जैना खाने बालन करां बंचोरे थिए 12 टोकरे थिए। 14 तैखन तै चमत्कार जै तैनी कियोरो थियो

लोक हेरतां ज़ोने लाए, “तै नबी जै दुनियाई मां एजनेबालो थियो सज़्जे ईए।” 15 यीशुए एना ज़ेनतां कि एना मीं राज़ो बनानेरे लेइ दलानो चातन, फिरी तै अकैल्लो पहाड़े पुड़ जेव। 16 जैखन इलोझ भोड़, त तैसेरे चले समुन्दरेरे बन्ने जे। 17 ते किशती मां च़ेढ़तां समुन्दरेरे पार कफरनहूम नगर जो चले, तैस वक्ते आंधरु भोरु थियूं ते यीशु हेजु तगर तैन कां न थियूं ओरो। 18 ते बडी तेज़ हवा च़लोरी थी ते समुन्दरे मां छेल्ली उठने लेइ। 19 जैखन तै लगभग दलाई च़ेरे मील नेड़े अव, त तैनेई यीशु समुन्दरे पुड़ च़लतो लाव ते किशतरे नेड़े एड़तो लाव ते डरे। 20 पन यीशुए तैन सेइ ज़ोव, “अव आई डरा ना।” 21 ते तै तैस किशती मां च़ड़नेरे लेइ तियार भोव, ते तैखने किशती तैस ठैरी पुड़ पुज़ी ज़ैडी तैना च़लोरे थियो। 22 दुइयोंव दिहाड़े तैस मैनु केरि भीड़ां जै समुन्दरेरे पार खडी थी, इन हेरतां कि एककी किशतरे अलावा होरि कोई न थी, यीशु अपने चेलन साथी तैस किशती पुड़ न च़ढ़ोरो थियो, पन सिर्फ तैसेरे चले थियो। 23 तैखन होरि किशती तिबिरियुस नगरेरां तैस ठैरी ईई, ज़ैडी तैनेई प्रभुएरु शुक्र केरतां रोटी खोरी थी। 24 एल्हेरेलेइ जैखन लोकेई हेरु कि इडी न यीशु ते न तैसेरे चले, ते तैना फिरी तैना निक्की-निक्की किशतन पुड़ च़ेढ़तां यीशु तोपते कफरनहूम नगर ए पुजे। 25 समुन्दरेरे पार जैखन तैना तैस मैल्ले त तैने ज़ोव, “हे गुरु, तू इडी कताली अव?” 26 यीशुए तैन जुवाब दितो, “अव तुसन सेइ सच-सच ज़ोताई, तुस मीं एल्हेरेलेइ न तोपथ कि तुसेई चमत्कार लाव, बल्के एल्हेरेलेइ कि रोटी खेइतां रज़्जे। 27 नाश भोनेबैली रोट्टेरे लेइ मेहनत न केरा। पन तैस रोट्टेरे लेइ मेहनत केरा जै हमेशारी ज़िन्दगी देतीए, जै मैनेरु मट्ठू यानी अवं तुसन देइलो, किजोकि बाजी परमेशरे मीं एन्चरां केरनेरो अधिकार दितोरोए।” (aiōnios g166) 28 तैनेई तैस्से सेइ ज़ोव, “परमेशरेरु कम केरनेरे लेइ अस कुन केरम?” 29 यीशुए तैन जुवाब दितो, “परमेशर तुसन करां एन कम चाते कि तुस तैस पुड़ यानी मीं पुड़ विश्वास केरा जैनी अवं भेजोरोई।” 30 तैखन तेनेई तैस सेइ ज़ोव, “फिरी तू कुन निशान हीरातस कि अस तैस हेरतां तेरो विश्वास केरम? तू कोन ज़ेरु कम हीरातस?” 31 इश्शे दादेई-पड़दादेई जंगले मां स्वर्गोरी रोटी खेइ, जैस जो मन्नो ज़ोतन। ज़ेन्चरे पवित्रशास्त्रे मां लिखोरूए, तैनी तैन खानेरे लेइ स्वर्गरां रोटी दित्ती।” 32 यीशुए तैन सेइ ज़ोव, “अव तुसन सेइ सच-सच ज़ोताई कि मूसा तुसन ते रोटी स्वर्गरां न दित्ती, पन मेरो बाजी तुसन सज़्जी रोटी स्वर्गरां देते। 33 किजोकि जै रोटी परमेशर देते, ते ते ईए जै स्वर्गरां एइतां दुनियारे लोकन ज़िन्दगी देतीए।” 34 तैखन तैनी तैस्से सेइ ज़ोव, “हे प्रभु, ए रोटी असन स्वर्गरां देतो रा।” 35 यीशुए तैन सेइ ज़ोव, “ज़िन्दगरी रोटी (जै ज़िन्दगी देनेबाली रोटी) अव्वे आई, जै मीं कां एजते तै कथी निअन्नो न भोलो, ते जै मीं पुड़ विश्वास केरेलो तै कथी दलिशोरो न भोलो। 36 पन मीं तुसन सेइ पेइलू जोरूए, कि तुसेई अवं लोरोई फिरी भी मीं पुड़ विश्वास न केरथ। 37 जैन किछ बाजी मीं देते तैन सब किछ मीं

कां एजनूए, ते जै कोई मीं कां एज्जेलो अव तैस ज़रूर कबूल केरेलो। 38 किजोकि अव अपनि मर्जी नई, बल्के परमेशेरी मर्जी पूरी केरनेरे लेइ स्वर्गें ओरोई जैनी अव भेजोरोई। 39 ईए मेरे बाजेरी मर्जी आए जैनी अव भेजोरोई कि जैन किछ तैनी मीं दितोरोए तैस मरां अव किछ न हिरेई, पन आखरी दिहैड़ी फिरी तैस ज़ीतो केरेलो। 40 किजोकि मेरे बाजेरी मर्जी ईए कि जै कोई मट्टे हेरे ते तैस पुड़ विश्वास केरे, तैस हमेशारी जिन्दगी मैल्ले, ते अव तैस आखरी दिहैड़ी फिरी ज़ीतो केरेलो।” (aiōnios g166) 41 एल्हेरेलेइ यहूदी लोक तैस पुड़ कुड़कुड़ाने लगे, किजोकि तैनी जोरू थियूं, “जै रोटी स्वर्गें ओरिए तै अव आई।” 42 ते तैनेई ज़ोव, “कुन एन यूसुफेरू मट्टू यीशु नई, जेसेरे अम्मा बाजी अस ज्ञानतम? त ते केन्चरे ज़ोते कि अव स्वर्गें ओरोई?” 43 यीशुए तैन जुवाब दितो, “एप्पू मांमेइं न कुड़कुड़ाथ। 44 कोई मीं कां न एज्जी बट्टे ज्ञातंगर बाजी, जैनी अव भेजोरोई, तैस मीं कां न आने, ते अव तैस आखरी दिहैड़ी फिरी ज़ीतो केरेलो। 45 नेबी केरे पवित्रशास्त्रे मां एन लिखोरूए, ‘तैना सब परमेशेरे तरफां शिखवोरे भोनेन।’ जैनी बाजी करां शुनोरूए त शिखवोरोए तै मीं कां एइते। 46 एसेरो मतलब ई नई कि केन्चे बाजी लोरोए, पन जै परमेशेरे तरफांए यानी मीं बाजी लोरोए। 47 अव तुसन सेइं सत्र-सत्र ज़ोताई जै कोई विश्वास केरते हमेशारी जिन्दगी तैसेरीए। (aiōnios g166) 48 जिन्दगरी रोटी (जिन्दगी देनेबाली रोटी) अव्वे आई। 49 तुश्शे दादे-पड़दादेई जंगले मां मन्नो खाऊ ते मरे। 50 ई तै स्वर्गें रोटीए कि मैन्हु खान ते न मरन। 51 जिन्दगरी रोटी जै स्वर्गें ओरिए अव्वे आई। अगर कोई इस रोटी मरां खाए, त हमेशा ज़ीतो रालो, ते ज़ैस रोटी सेइं दुनियारे लोकन हमेशारी जिन्दगी मैलचे, तैन मेरू मासे।” (aiōn g165) 52 एस पुड़ यहूदी लोक एप्पू मांमेइं बेंस केरने लाए, “ई मैन्हु असन अपनू मास केन्चरे खाने जो देइ बटते?” 53 यीशुए तैन सेइं ज़ोव, “अव तुसन सेइं सत्र-सत्र ज़ोताई, कि ज्ञातंगर तुस मैनेरे मट्टेरू यानी मेरू मास न खाले, ते मेरो खून न पीले, तुसन हमेशारी जिन्दगी न मैलेली। 54 जै मेरू मास खाते ते मेरो खून पीते हमेशारी जिन्दगी तैसेरीए ते आखरी दिहैड़ी अव फिरी तैस ज़ीतो केरेलो। (aiōnios g166) 55 किजोकि हकीकति मां मेरू मास खानेरी चीजे ते मेरो खून पीनेरी चीजे। 56 जै मेरू मास खाते ते खून पीते तै मीं मां बनोरो राते, ते अव तैस मां। 57 जेन्चरे ज़ीते बाजी अव भेजोरोई, ते अव बाजी केरे कारन ज़ोताई, तेन्चरे तै भी जै मीं खालो मेरे कारन ज़ीतो रालो। 58 जै रोटी स्वर्गें ओरिए, तैस रोटी ज़ेरि नई जै तुश्शे दादे-पड़दादेई खाइ ते बादे मां मरे, पन जै कोई ई रोटी खालो तै हमेशा ज़ीतो रालो।” (aiōn g165) 59 इना गल्लां तैनी कफरनहूम नगरेरे एककी प्रार्थना घरे मां जोई। 60 एल्हेरेलेइ तैसेरे चलन मरां बडेई एन शुन्तां ज़ोव, “ए शिक्षा सकते, एस कौन मेन्नी बटते?” 61 यीशु अपने मने मां एना बुझतां कि मेरे चले एस गल्ली पुड़ एप्पू मांमेइं कुड़कुड़ाने लोरेन, तैन पुच्छ,

“कुन इना गल्लां तुसन मीं पुड़ विश्वास केरने करां रोकतिन?” 62 अगर तुस मैनेरू मट्टू यानी अव ज़ैडी पेड़लो थियो उबरे (स्वर्गें) गातो लाएले, त कुन भोलू? 63 परमेशेरी आत्मा त जिन्दगी देने बालीए, मैन्हु केरि ताकती सेइं किछ न केरोए, जैना गल्लां मीं तुसन सेइं ज़ोई तैना परमेशेरी आत्मा तरफां आन ते तैना जिन्दगी भी आन। 64 पन तुसन मां किछ एरे आन जैना विश्वास न केरन। किजोकि यीशु पेड़लो ज्ञानतो थियो कि जैना विश्वास न थी केरते तैना कौन आन, ते तैस कौन टूलवालो। 65 ते तैनी ज़ोव, “एल्हेरेलेइ मीं तुसन सेइं जोरू थियूं, ज्ञातंगर बाजी केरे तरफां एन वरदान न मैल्ले तांतंगर कोई मीं कां न एज्जी बट्टे।” 66 एस पुड़ तैसेरे चलन मरां बडे उलटे फिरे, ते तैल्ला पत्ती तैस साथी न चले। 67 तैखन यीशुए 12 चलन सेइं ज़ोव, “कुन तुस भी चलू गानू चातथ?” 68 शमीन पतरस तैस जुवाब दितो, “हे प्रभु अस केस कां गाम? हमेशारी जिन्दगी देने बैली गल्लां त तींए कां आन। (aiōnios g166) 69 ते असेई तीं पुड़ विश्वास कियो ते ज्ञानू कि तू परमेशेरो पवित्र मैन्हु आस।” 70 यीशुए तैन जुवाब दितो, “कुन मीं तुस 12 न चुने। फिर भी तुसन मरां अक मैन्हु शेताने।” 71 तैने इन तैस शमीन इस्करियोतेरे मट्टे यहूदा इस्करियोतेरे बारे मां ज़ोव। हालांकि तै तैन 12 चलन मरां अक थियो, जै यीशु टूलवाने बालो थियो।

7 एना गल्लन पत्ती यीशु गलील इलाके मां फिरतो राव, किजोकि यहूदी लीडर तैस मारनेरी कोशिश केरि राओरे थिये, एल्हेरेलेइ तै यहूदिया इलाके मां फिरनू न चातो थियो। 2 यहूदी केरू झॉफ़डी केरू तिहार (तेम्बु) नेडू थियूं। 3 एल्हेरेलेइ तैसेरे ढूलाएई तैस ज़ोव, “इडी न रा। यहूदिया इलाके मां गा ज़ैडी तिहार मनाने लोरेन, कि जैना चमत्कार तू केरतस तैना तेरे तैना चले भी हेरन, जैना यहूदिया इलाके मां रातन। 4 किजोकि एरो कोई न भोलो कि जै मशूर भोनु चाए, ते छेपतां कम केरे। अगर तू कम केरतस, त अपनो आप हिरा।” 5 किजोकि तैसेरे ढूला भी तैसेरो विश्वास न थी केरते। 6 तैखन यीशुए तैन सेइं ज़ोव, “मेरो लेइ ठीक वक्त हेजू नई ओरो, पन तुस केन्ची वक्त मां भी गेइ सकतथ। 7 इस दुनियारे लोक तुसन सेइं बैर न केरि सकन, पन मीं सेइं बैर रखतन किजोकि अव तैन केरे खलाफ़ इन ज़ोताई कि तैना बुरां कम्मां केरतन। 8 तुस तिहारे मां गाथ, मीं हुना एस तिहारे मां नई एज्जु, किजोकि मेरो हेजू ठीक वक्त नई ओरो।” 9 ते तै तैन सेइं एना गल्लां केरतां गलीले मां राव। 10 पन ज़ैखन तैसेरे ढूला तिहारे मां चले जे ते तै बांदो न पन छेपतां जेव। 11 यहूदी लीडर तिहारे मां यीशु तोपने लाए। तैना लोकन पुछ्छी राओरे थिये, “तै मैन्हु कोडि आए?” 12 ते लोकन मां तैसेरे बारे मां बल्हे-बल्हे बेडि गल्लां भोइ, किछ ज़ोते थी, “तै रोडो मैनुए।” ते किछ ज़ोते थी, “नई तै मैन्नु गुमरा केरते।” 13 फिरी भी यहूदी लोकां केरे प्रधानां केरे डरे सेइं केन्ची भी मैन्हु तैसेरे बारे मां खुलतां तैसेरे बारे मां गल केरनेरी हिम्मत न भोइ। 14 ज़ैखन तिहारेरे अध्ये दिहाइ बीते, त

यीशु मन्दरेरे अंगने मां गेइतां शिक्षा देने लगे। 15 तैखन यहूदी लीडरेई हैरान भोइतां ज़ोवं, “एनी त पवित्रशास्त्रेरी शिक्षा केन्ची करां नई पढेरीए, फिरी एस केन्चरे एना गल्लां एई?” 16 यीशुए तैन जुवाब दित्तो, “मेरी शिक्षा मेरी अपनि नई, बल्के परमेशरेरे तरफां आए, जैन अवं भेजोरोई। 17 अगर कोई तैसेरी मेज्जी पुड़ चलनू चाए, त तै इस शिक्षारे बार मां ज़ानेलो कि ए परमेशरेरे तरफां या अवं अपने तरफां ज़ोताई। 18 जै अपने तरफां किछ ज़ोते तै अपनि बड़याई चाते, पन जै अपने भेजने बालेरी बड़याई चाते तै ईमानदार आए, ते तैस मां कोई बेइमानी नई। 19 तुसन मूसे कानून दित्तो, पन तुसन मरां कोई भी तैस पुड़ न चले। पन तुस लोक मीं मारनेरी कोशिश केरतथ। 20 लोकेई जुवाब दित्तो, “तीं पुड़ भूतेरो सैयोए! कौन तीं मारनेरी कोशिश केरते?” 21 यीशुए जुवाब दित्तो, “मीं अक चमत्कार कियो, ते तुस हैरान भोए। 22 एल्लेरेलेइ मूसा तुसन खतनेरो हुक्म दित्तो (एना नई कि मूसेरे तरफांए बल्के बाप दादां करां चलतो ओरोए) ते तुस आरामेरे दिहाड़े मैनेरो खतनो केरतथ। 23 एल्लेरेलेइ आरामेरे दिहाड़े मैनेरो खतनो कियो गाते ताके मूसेरे कानूनेरो हुक्म न टले, त तुस मीं पुड़ किजो क्रोध केरतथ, कि मीं आरामेरे दिहाड़े अक मैन्हु रोड़ेवारे ठीक केरो। 24 तुतर हेरतां इन्साफ न केरा बल्के ठीक-ठीक आदालत केरा।” 25 तैखन किछ यरूशलेम नगरेरे रानेबाले एप्पू मांमेइ एक्की हॉरि पुच्छने लगे, “कुन ए तै नई, जैस मारनेरी कोशिश चलोरेए? 26 पन तक्का, तै त खुले आम गल्लां केरते, ते कोई एस किछ न ज़ोए। कुन लीडरेई सच्चे, सच ज़ानू कि ए मसीह? 27 पन ए मैन्हु मसीह केन्चरे भोइ सकते? एस त अस ज़ानतम कि ए कोट्ठां ओरोए, पन जेइस मसीह एज्जेलो त कोई न ज़ानेलो कि तै कोट्ठां एज्जेलो।” 28 तैखन यीशुए मन्दरे अंगने मां शिक्षा देते बारे ज़ोरे सेइ ज़ोवं, “तुस मीं ज़ानतथ ते इन भी कि अवं कोट्ठां ओरोई। अवं एप्पू नई ओरो, पन मेरो भेजने बालो सच्चोए, तैस तुस न ज़ानाथ। 29 पन अवं तैस ज़ानताई, किजोकि अवं तैसेरे तरफां ओरोई, ते तैनी अवं भेजोरोई।” 30 एस पुड़ लीडरेई तै ट्लानो चाव, फिरी भी केन्चे तैस सेइ हथ न लव, किजोकि तैसेरो मरनेरो वक्त हेजू न थियो ओरो। 31 फिरी भी भीड़ी मरां बड़े लोकेई तैस पुड़ विश्वास कियो, ते ज़ोने लाए, “मसीह जैखन एज्जेलो ते एट्ठां जादे चमत्कार हिरालो ज़ैना एने हीराहे?” 32 फरीसी लोकेई, लोक तैसेरे बारे मां बल्हे-बल्हे एना गल्लां केरते शुने, ते प्रधान याजकेई ते फरीसी लोकेई तैस ट्लानेरे लेइ मन्दरेरे पहरदार भेजे। 33 एस पुड़ यीशुए ज़ोवं, “अवं थोड़े ज़िरे तगर हेजू तुसन साथी आई, फिरी अवं अपने भेजने बाले कां वापस गानोई। 34 तुस मीं तोपेले, पन अवं नई मैलनो, ते ज़ैडी अवं आई, तैडी तुस न एज्जी बटथ।” 35 एस पुड़ यहूदी लीडर एप्पू मांमेइ ज़ोने लगे, “ए कोरां चलोरे, ज़ेरां अस न गेइ बटम? कुन ए तैन कां गालो ज़ैना यूनान नगरे मां तितर-बितर भोइतां रातन, ते यूनानेरे लोकन भी शिक्षा देलो?” 36 एस गल्लरो कुन मतलबे जै एनी

जोई, कि तुस मीं तोपेले, पन अवं तुसन न मैलेलो, ते ज़ैडी अवं आई तैडी तुस न एज्जी बटतथ? 37 तिहारेरे आखरी दिहाड़े, जै खास दिहाडी भोतीए, तेइस यीशु खडो भोइतां ज़ोने लगे, “अगर कोई टलिश्शोरो भोए त मीं कां एज्जे ते पीये। 38 जै मीं पुड़ विश्वास केरे, जेन्चरे पवित्रशास्त्रे मां लिखेरूए, तैसेरे दिले मरां तै पैनेरे दरिया निस्सेले ज़ैना ज़िन्दगी देतन।” 39 यीशुए एना गल्लां पवित्र आत्मा रे मरां ज़ोई, जै विश्वास केरेने बालन पुड़ एजनेबाली थी, किजोकि पवित्र आत्मा हेजू तगर न थी दित्तोरी, किजोकि यीशु हेजू तगर अपनि महिमा मां वापस न थियो जोरोए। 40 तैखन भीड़ी मरां किछेई एना गल्लां शुन्तां ज़ोवं, “सच्चे ई तै नबी आए, जेसेरे एजनेरी अस उमीदी मां आम।” 41 किछ लोकेई ज़ोवं, “ई मसीह,” पन किछेई ज़ोवं, “कुन मसीह गलील इलाकेरां एजनेरो? 42 पवित्रशास्त्र मां लिखेरू कि मसीह दाऊदेरे खानदाने ते बैतलहम इलव्वें मरां एज्जेलो, ज़ैडी दाऊद राज़ो रातो थियो।” 43 यीशुएरे बारे मां लोकां केरो अलग-अलग खियाल थियो, एल्लेरेलेइ तैन एप्पू मांमेइ अनबन भोइ। 44 किछ तैन मरां तैस ट्लाने चाते थिये, पन केन्चे तैस सेइ हथ न लव। 45 तैखन मन्दरेरे पहरदार, प्रधान याजकन ते फरीसन कां एइतां तैन सेइ ज़ोवं, “तुसेई तै किजो न आनो?” 46 पहरदारेई जुवाब दित्तो, “केन्चे मैने कधी एत्री रोड़ो गल्लां न कियोरी, ज़ेरि गल्लां ए मैन्हु केरते।” 47 फरीसेई तैन जुवाब दित्तो, “कुन तुस भी टेपलोरेथ? 48 कुन सरदारन ते फरीसन मरां केन्चे तैस पुड़ विश्वास कियोरोए? 49 पन एन लोक ज़ैना मूसेरे कानून न ज़ाननू तैन पुड़ परमेशरेरो फिटकार भोते।” 50 नीकुदेमुसे जै पेइलो तैस कां राती ओरो थियो, ते तैना मरां अक थियो, तैनी ज़ोवं, 51 “कुन इश्शे कानून केन्ची मैन्हु सज़ा देनेरी अज़ाज़त देते, ज़ातगर तैसेरी गल शुन्तां इन न ज़ानम कि तै कुन केरते?” 52 तैनेई तैस जुवाब दित्तो, “कुन तू भी गलील इलाकेरो आस! पवित्रशास्त्रे मां तोप ते ज़ान, कि गलीलेरां कोई नबी त नई निसने बालो!” 53 (तैखन सब अपने-अपने घरे चले जे)।

8 पन यीशु अपने चेलन सेइ साथी ज़ैतून पहाड़े पुड़ जेव। 2 होरसां तै झेझां-झेझां मन्दरेरे अंगने मां जेव, बड़े लोक तैस कां आए ते तै बिश्तां तैन शिक्षा देने लगे। 3 तैखन शास्त्री ते फरीसी लोक एक्की कुआन्शी जै बदमैशी मां टलेइयोरी थी, तै मझाटे खडी केरतां यीशु सेइ ज़ोवं, 4 “हे गुरु, ई कुआन्शा बदमाशी केरते वक्त टलोरीए। 5 मूसेरे कानून मां मूसा असन हुक्म दित्तोरोए कि एरी ज़ेरि कुआन्शी घोड़ेई बैइतां मारा, ते तू एस कुआन्शरे बारे मां कुन ज़ोतस, कि अस एस कुन केरम?” 6 तैनेई यीशु परखनेरे लेइ ए गल ज़ोई, ताके तैस पुड़ दोष लाने जो गल मैल्ले। पन यीशु उन्हे लिक्तां एंगलोई सेइ ज़मीनी पुड़ लिखने लव। 7 ज़ैखन तैना तैस पुछते राए, त तैनी उबरे तेकतां तैन सेइ ज़ोवं, “तुसन मरां ज़ैनी पाप न भोए कियोरोए, तैए पेइलो घोड़े बाए।” 8 ते फिरी उन्हे लिक्तां एंगलोई सेइ ज़मीनी

पुड़ लिखने लव। 9 पन तैना एना शुन्तां बडून करां निकड़न तगर सारे एक्की पत्ती अक तेठां चले जे, ते यीशु अकैल्लो राव, ते तै कुआन्शा मझाटे खड़ी राई। 10 यीशुए उबरे तेकतां तैस पुच्छू, “हे कुआन्शा, तैना कोरां जे? कुन केन्चे तीं पुड़ सजारा हुक्म न दितो?” 11 तैसां ज़ोवं, “हे प्रभु केन्चे नई!” यीशुए ज़ोवं, “अवं भी तीं सजारा हुक्म न देई। अपने घरे जो गा ते फिरी पत्ती पापेरी न ज़िन्दगी जीयां।” 12 यीशुए फिरी लोकन सेइं ज़ोवं, “दुनियारी लौ अवं आई, ज़ै मीं पत्ती एज्जेलो त तै आंधरे मां न चलेलो, पन तै लौ हासिल केरेलो ज़ै ज़िन्दगी देवे।” 13 फरीसी लोकेईं तैस सेइं ज़ोवं, “तू अपनि गवाही एप्पू देतस, तेरी गवाही सच्चरी नई।” 14 यीशुए तैन जुवाब दितो, “भला अवं अपनि गवाही एप्पू देताईं फिरी भी मेरी गवाही सच्चरीए, किजोकि अवं ज़ानताईं कि अवं कोठां ओरोईं ते कोरां गाताईं? पन तुस न ज़ानाथ कि अवं कोठां ओरोईं ते कोरां गाताईं। 15 तुस इन्सानेरी सोचरे मुताबिक इन्साफ करतथ, अवं केन्चेरी इन्साफ न केरि। 16 ते अगर अवं इन्साफ केरि भी त मेरो इन्साफ सच्चोए, किजोकि अवं अकैल्लो नई, पन अवं ते मेरो बाजीए, ज़ैनी अवं भेजोरोईं। 17 मूसेरे कानूने मां भी लिखोरोए कि दूई जनां केरि गवाही मिलतां सच्चरी भोतीए। 18 अक त अवं अपनि गवाही देताईं, ते दुइयोवं गवाही मेरो बाजी देते ज़ैनी अवं भेजोरोईं।” 19 तैनेईं तैस पुच्छू, “तेरो बाजी कोडि आए?” यीशुए जुवाब दितो, “न तुस मीं ज़ानतथ न मेरे बाजी, अगर मीं ज़ानते त मेरे बाजी भी ज़ानते।” 20 एना गल्लां तैनी मन्दरेरे अंगने मां शिक्षा देते भण्डार घरे मां ज़ोई, ते केन्चे तै न ट्लाव, किजोकि तैसेरो वक्त हेजू न थियो ओरो। 21 यीशुए फिरी तैन सेइं ज़ोवं, “अवं ज़ानताईं कि तुस मीं तोपेले ते पाप करते-करते मरेले, ज़ैदी अवं गाताईं तैदी तुस न एज्जी बटथ।” 22 एस पुड़ यहूदी लीडेईं ज़ोवं, “कुन एने अपनो आप मारनोए, ज़ैन ज़ोते कि ज़ैदी अवं गाताईं तैदी तुस न एज्जी बटतथ?” 23 यीशुए तैन सेइं ज़ोवं, “तुस इस दुनियाईं मां ज़मरेथ, अवं स्वर्गरां ओरोईं। तुस दुनियारेथ, अवं दुनियारो नई। 24 एल्हेरेलेइ मीं तुसन सेइं ज़ोरू थियूं, कि तुस अपने पापन मां मरेले, किजोकि अगर तुस विश्वास न केरेले कि अवं तैए आई त अपने पापन मां मरेले।” 25 यहूदी लीडेईं तैस सेइं ज़ोवं, “तू कौन आस?” यीशुए तैन सेइं ज़ोवं, “ज़ैन शुरू करां ज़ोतो ओरोईं, अवं तैए आई। 26 तुशे बारे मां मीं बड़ु किछ ज़ोनूए ते फैसलो केरनोए, पन मेरो भेजने बालो सच्चोए, ते ज़ैन मीं तैस करां शुनोरूए तैन दुनियारे लोकन सेइं ज़ोताईं।” 27 तैनेईं एन न समझू कि असन सेइं बाजी केरे बारे मां कुन ज़ोने लोरोए। 28 तैखन यीशुए ज़ोवं, “ज़ैखन तुस मैनेरे मट्टे यानी मीं उच्चे पुड़ चाहेले, त ज़ानेले कि अवं तैए आई, अवं अपने आपे सेइं किछ न केरि, जेन्चरे मेरो बाजी मीं शिखालते तेन्चरे तैना गल्लां केरताईं। 29 मेरो भेजने बालो मीं साथीए, तैनी अवं अकैल्लो नई शारोरो किजोकि अवं हमेशा तैन कम केरताईं ज़ैस सेइं ते खुश भोते।” 30 बड़े लोकेईं

यीशुएरी तैना गल्लां शुन्ते वक्त ज़ैना ते ज़ोईं राओरो थियो तैस पुड़ विश्वास कियो। 31 तैखन यीशुए तैन यहूदन सेइं ज़ैनेईं तैस पुड़ विश्वास कियोरो थियो ज़ोवं, “अगर तुस मेरे वचने मां बनेरे राले, त सच्चे मेरे चले भोले। 32 तुस सच ज़ानेले ते सच तुसन आजाद केरेलू।” 33 तैनेईं तैस जुवाब दितो, “अस त अब्राहमेरे औलादी मरां आम, ते कधी केन्चेरे गुलाम नईं भोरे, फिरी तू केन्चेरे ज़ोतस कि तुस आजाद भोले?” 34 यीशुए तैन जुवाब दितो, “अवं तुसन सेइं सच-सच ज़ोताईं कि ज़ै कोई पाप केरते ते पापेरो गुलामे। 35 गुलाम हमेशा घरे न रेड सके, मट्टू हमेशा रहते। (aion g165) 36 एल्हेरेलेइ अगर मट्टू तुसन आजाद केरे त सच्चे तुस आजाद भोले। 37 अवं ज़ानताईं कि तुसा अब्राहमेरे औलादी मरां आथ, फिरी भी मेरी शिक्षा तुस मन्थ, एल्हेरेलेइ तुस मीं मारने चातथ। 38 अवं तेन्ने ज़ोताईं ज़ैन मीं लव, ज़ैखन अवं अपने बाजी सेइं साथी थियो, ते तुस तेन्ने केरतथ ज़ैन तुसेईं अपने बाजी केरां शुनोरूए।” 39 तैनेईं तैस जुवाब दितो, “इश्शो पूर्वज त अब्राहमे।” यीशुए तैन सेइं ज़ोवं, “अगर तुस अब्राहमेरे औलादी मरां भोथे त अब्राहमेरां ज़ेरां कम्मां केरथ। 40 पन हुन्ना तुस मीं मारनो चातथ, किजोकि मीं तुसन तैना सच्चरी गल्लां ज़ोईं ज़ैना मीं परमेशरे करां शुनी, एरू त अब्राहमे न थियूं कियोरू। 41 तुस अपने बाजेरां ज़ेरां कम्मां केरतथ।” तैनेईं तैस सेइं ज़ोवं, “अस बदमैशी सेइं नईं ज़मरे, इश्शो अक्के बाजीए, ते तै परमेशरे।” 42 यीशुए तैन सेइं ज़ोवं, “अगर परमेशर तुशो बाजी भोथो, त तुस मीं सेइं प्यार केरथ, किजोकि अवं परमेशरे करां ओरोईं, अवं अपने तरफां नईं ओरो, बल्के तैनी भेजोरोईं। 43 तुस मेरी गल्लां किजो न समझथ? एल्हेरेलेइ कि तुस मेरी शिक्षा मन्नी न चाथ। 44 तुस अपने बाजी शैतानेरेथ, ते तैसेरी मर्जी पूरी केरनि चातथ। तै त शुरू करां खूनी आए ते सच्चे पुड़ बनोरो न राव, किजोकि सच तैस मां अस्थी नईं। ज़ैखन ते झूठ ज़ोते त अपने सुभावरे मुताबिक ज़ोते, किजोकि ते झूठो बल्के झूठेरो बाजीए। 45 पन अवं सच ज़ोताईं तांए तुस मेरो विश्वास न केरथ। 46 तुसन मां मीं कौन पापेरो दोष लाते? अगर अवं सच ज़ोताईं त फिरी मेरो विश्वास की न केरथ? 47 ज़ै परमेशरेरे तरफां भोते ते परमेशरेरी गल्लां केरते, ते तुस एल्हेरेलेइ न शुनथ किजोकि तुस परमेशरेरे तरफां नईं।” 48 एना शुन्तां यहूदेईं तैस सेइं ज़ोवं, “कुन अस ठीक न थिये ज़ोते, कि तू सामरी मैन्हु आस, ते तीं मां भूते।” 49 यीशुए जुवाब दितो, “मीं मां भूत नईं, पन अवं अपने बाजेरी इज्जत केरताईं, ते तुस मेरी निरादर केरतथ। 50 पन अवं अपनि बड़याईं न चेईं, हाँ अक्के ज़ै चाते कि लोक मेरी बड़याईं केरन, ते तै आदालत केरनेबालो भी आए। 51 अवं तुसन सेइं सच-सच ज़ोताईं कि ज़ै कोई मैन्हु मेरे वचने पुड़ चले ते कथे न मरेलो।” (aion g165) 52 यहूदेईं तैस सेइं ज़ोवं, “हुनी त असेईं बुझू, कि तीं मां भूते, अब्राहम ते नवी भी मरे, ते तू ज़ोतस, अगर कोई मेरे वचने पुड़ चले त ते कधी न मरेलो। (aion g165) 53 इश्शो पूर्वज अब्राहम मरो,

कुन तू तैस करां भी बड़ो आस? ते नबी भी मरे, तू अपने बारे मां कुन सोचतस कि तू कौन आस?" 54 यीशुए जुवाब दितो, "अगर अवं अपनि बड़याई केरि त मेरी बड़याई किछ भी नई। पन मेरी बड़याई केरनेबालो मेरो बाजीए, जैस तुस ज़ोतथ कि तै तुशुओ परमेशरे। 55 तुसेई त तै न ज़ानो, पन अवं तैस ज़ानताई, अगर अवं ज़ोई कि तैस न ज़ैनी, त तुशुओ ज़ेरो झूठो भोड़। पन अवं तैस ज़ानताई ते तैसेरे वचने पुड़ चलताई। 56 तुशुओ पूर्वज अब्राहम मेरी दिहाड़ी हेरनेरे उमीदी पुड़ बड़ी खुश थियो, ते तैनी हेरी, ते खुश भोव।" 57 यहूदेई तैसेरे सेइं ज़ोवं, "हेजू तू 50 साला केरो भी नई भरो फिरी भी तीं अब्राहम लोरोए?" 58 यीशुए तैन सेइं ज़ोवं, "अवं तुसन सेइं सच-सच ज़ोताई कि अब्राहम पैदा भोने करां पेड़लो, अवं आई।" 59 तैखन तैनेई तैस मारनेरे लेइ घोड़ सल्ले, पन यीशु छेपतां मन्दरे मरां निस्सी जेव।

9 फिरी यीशुए अपने चेलन सेइं साथी चलोरो थियो, ते तैनेई अक मैन्हु लाव, जै ज़र्मनरो कानो थियो। 2 तैसेरे चेलेई तैस पुच्छू, "हे गुरु, केने पाप कियो कि ए कानो ज़रमो, एने मैने या एसेरे अम्मा बाजे?" 3 यीशुए जुवाब दितो, "न एने पाप कियो, न एसेरे अम्मा-बाजेई, पन ते एल्लेरेलेइ कानो ज़रमो ताके परमेशरेरे चमत्कार एसमां लेईहोन। 4 ज़ैने अवं भेजोरोई, असेई तैसेरू कम लूशी केरनू ज़रूरीए, ज़ैन कम तैनी असन दितोरूए, ते रात एजने बालीए ज़ैस मां कोई भी कम न केरि सके। 5 ज़ांतगर अवं दुनियाई मां आई, अवं दुनियारी लौ आई।" 6 एन ज़ोइतां तैनी ज़मीनी पुड़ थुकू, ते तैस थुके सेइं मिती सन्नी, ते ते मिती कानेरे एछ्छन पुड़ लाई। 7 ते तैस सेइं ज़ोवं, "गा शीलोलह नंवेरे हावदे मां अपनू तुत्तर धो" (शीलोलहेरे मतलब भेजरो) तैनी गेइतां धोवं, ते लांतो वापस अव। 8 तैखन तैस मैनेरे पड़ोसेई त ज़ैनेई तै भीख मगतो लावरो थियो, एक्की होरि सेइं ज़ोने लगगे, "कुन ई तैए मैन्हु नई जै पेड़लो बिश्तां भीख मगतो थियो?" 9 किछ मैन्हु ज़ोने लाए, "ई तैए," होरेई ज़ोवं, "नई तैसेरो ज़ेरो कोई होरो भोनीए," तैनी ज़ोवं, "अवं तैए आई।" 10 तैखन तैना तैस पुच्छने लगगे, "तेरी एछ्छन केन्चरां लौ आई?" 11 तैनी जुवाब दितो, "यीशु नंवेरे एक्की मैने मिती सन्नी, ते मेरी एछ्छन पुड़ लेइतां मां सेइं ज़ोवं, गा शीलोलह हावदे मां गेइतां अपनू तुत्तर धो, ते अवं जेव ते मां तुत्तर धोवं, ते लांने लाव।" 12 तैनेई तैस पुच्छू, "तै मैन्हु कोइ आए?" तैनी ज़ोवं, "मां नई पतो।" 13 लोकेई तै ज़ै पेड़लो कानो थियो फरीसी लोकन कां नेव। 14 ज़ैस दिहाड़े यीशुए मिती सैनतां तैसेरी एछ्छी लौ दितो थी, ते आरामेरी दिहाड़ी थी। 15 फिरी फरीसी लोकेई भी तैस पुच्छू, "तैसेरी एछ्छन लौ केन्चरे आई?" तैनी तैन सेइं ज़ोवं, "तैनी मेरी एछ्छन पुड़ मिती लाई, फिरी मां तुत्तर धोवं, ते अवं हुनी लाताई।" 16 एस पुड़ किछ फरीसी लोक ज़ोने लगगे, "ए मैन्हु परमेशरेरे तरफां नई, किजोकि ए आरामेरी दिहाड़ी न मन्ने।" होरेई ज़ोवं, "एरो ज़ेरो पापी मैन्हु एरे चमत्कार केन्चरे हिरेई बटते?" ते तैन एप्पू मांमेइं अनबन भोड़। 17 तैनेई काने

फिरी पुच्छू, "ज़ैने तेरी एछ्छी खोलोरेन, तू तैसेरे बारे मां कुन ज़ोतस?" तैनी ज़ोवं, "तै नबी आए।" 18 पन यहूदी लीडरन विश्वास न भोव, कि तै कानो थियो ते हुनी लाते, ज़ांतगर तैनेई, तैसेरे अम्मा-बाजी न कुजाए। 19 तैन पुच्छू, कुन एन तुशू मट्टूए, "ज़ैस तुस ज़ोतथ कि कानो ज़मोरू थियू? फिरी हुना केन्चरां लाते?" 20 तैसेरे अम्मा बाजीए जुवाब दितो, "असां त ज़ानतम कि एन इशू मट्टूए, ते कानो ज़मोरू थियू। 21 पन अस इन न ज़ानतम कि अज़ केन्चरे लाते, ते न इन ज़ानतम कि केने एसेरी एछ्छन लौ दित्ती, एन हुनी बट्टूए एस पुछ्छा, ए अपने बारे मां एप्पू ज़ोलो।" 22 एना गल्लां तैसेरे अम्मा बाजे एल्लेरेलेइ ज़ोई तैना यहूदी लीडरन करां डरते थिये, किजोकि यहूदी लीडर सारे अक भोरे थी, कि अगर कोई जोए, कि ए मसीहे त ते प्रार्थना घरे मरां कट्टो गाए। 23 एल्लेरेलेइ तैसेरे अम्मा बाजे ज़ोवं, "एन बट्टूए, एस्से पुछ्छा।" 24 तैखन तैस मैन्हु ज़ै कानो थियो, दुइयोवं बार कुजेइतां ज़ोवं, "सच ज़ोइतां परमेशरेरी बड़याई केर, अस ज़ानतम तै मैन्हु पापीए।" 25 तैनी जुवाब दितो, "अवं न ज़ैनी कि ए पापी कि नई, अवं अक गल ज़ानताई, कि अवं कानो थियो हुनी लाताई।" 26 तैनेई तैस पुच्छू, "तैने तीं सेइं कुन कियू? तैनी केन्चरे तेरी एछ्छन लौ दित्ती?" 27 तैनी तैन सेइं ज़ोवं, "मां त तुसन सेइं ज़ोवरूए, ते तुसेई न शुनू हुनी दुइयोवं बार किजो शुनू चातथ? कुन तुस भी तैसेरे चले बन्ने चातथ?" 28 तैखन तैना तैस बुरू भलू ज़ोने लाए, "तूए तैसेरो चेलोस, अस त मूसेरे चलेमा।" 29 अस ज़ानतम परमेशरे मूसा सेइं गल्लां की, पन एस न ज़ानम कि ए कोट्ठां ओरोए। 30 तैनी तैन जुवाब दितो, "ए त बड़ी बट्टी गल्ले कि तुस न ज़ानाथ कि ए कोट्ठां ओरोए, फिरी भी तैनी मेरी एछ्छन लौ दित्ती। 31 अस ज़ानतम की परमेशर पापी केरि न शुने, पन कोई परमेशरेरो भक्त भोए त तैसेरे मेज्जी पुड़ चलतो भोए, त परमेशर तै तैसेरी शुनते। 32 दुनिया रचनेरे वक्ते करां कथे शुन्ने मां नई ओरोए कि केन्चे ज़र्मनरे कानेरी एछ्छन लौ दितोरी, (aiōn g165) 33 अगर ए मैन्हु परमेशरेरे तरफां न भोथो त किछ न केरि सकेथो।" 34 तैनेई तैस ज़ोवं, "तू त बिलकुल पापन मां ज़मोरौस, तू असन शिखालतस?" ते तैनेई तै प्रार्थना घरे मरां बेइरोवं कट्टो। 35 यीशुए शुनू कि तै बेइरोवं कट्टोरोए, ते ज़ैखन तैसेरी तैस सेइं मुलाकात भोड़, त तैस सेइं ज़ोवं, "कुन तू मैनेरे मट्टे पुड़ विश्वास केरतस?" 36 तैनी तैस जुवाब दितो, "हे प्रभु, मां सेइं ज़ो कि ते कौने, ताके अवं तैस पुड़ विश्वास केरि?" 37 यीशुए तैस सेइं ज़ोवं, "अव्वे आई, तीं अवं पेड़लो लोरोई, ज़ै तीं सेइं गल्लां केरि राओरोए।" 38 तैनी ज़ोवं, "हे प्रभु, अवं तीं पुड़ विश्वास केरताई।" ते तैस कां मथ्यो टेको। 39 तैखन यीशुए ज़ोवं, "अवं इस दुनियाई मां ई इन्साफ केरने ओरोई, ज़ैना न लान तैना लान, ते ज़ैना लातन तैना काने भोन।" 40 ज़ैना फरीसी लोक तैस सेइं साथी थिये तैनेई ज़ोवं, "कुन तू असन जो भी काने ज़ोतस?" 41 यीशुए तैन सेइं ज़ोवं, "अगर तुस काने भोथे त

पापी न भोथे, पन हुनी ज़ोतथ कि अस लातम, एल्हेरेलेइ तुश्शे पाप माफ़ न भोले।”

10 “अवं तुसन सेइं सत्र-सत्र ज़ोताई, कि ज़ै कोई दारेरे बतां बाड़े मां न गाए, पन होरि बतां गाते, ते चोर ते डैकूए। 2 पन भैड्डां केरो पुहाल दारेरे बतां गाते। 3 तैसेरेलेइ दरबान दार खोलते, ते भैड्डां तैसेरी गल पिशैनतन, ते तै अपनि भैड्डन नंवे सेइं कुजाते ते बेइर नेते। 4 ते ज़ैखन ते अपनि सैरी भैड्डां बेइर कढते, त तैन केरे अग्री-अग्री चलते, ते भैड्डां तैस पत्ती-पत्ती गैतिन, किजोकि तैना तैसेरी आवाज़ पिशैनचन। 5 तैना बखले पत्ती न गैली, पन तैस करां नशशेली, किजोकि तैना बखलेरी आवाज़ न पिशानन्।” 6 यीशुए तैन सेइं मिसाल देइतां ज़ोवं, पन तैनेई न समझू कि एसेरी गल्लां केरो कुन मतलबे, ज़ैना ते असन सेइं ज़ोते। 7 तैखन यीशुए तैन सेइं फिरी ज़ोवं, “अवं तुसन सेइं सत्र-सत्र ज़ोताई, भैड्डां केरू दार अवं आई। 8 ज़ेत्रे मीं करां पेइले आए सब चोर ते डैकून, पन मेरी भैड्डेई तैन केरि न शुनी। 9 दार अवं आई, अगर कोई मेरे ज़िरिये अन्तर गालो, त परमेशर तैस मुक्ति देलो, ते तै अन्तर बेइर एइतो गालो ते खूराक पालो। 10 चोर होरि कोन्ची कम्मरे लेइ न एज्जे, बल्के चोरी केरने ते मारने ते नाश केरने एइते, अवं एल्हेरेलेइ ओरोई कि तैन भरपूर ज़िन्दगी जीन। 11 रोडो पुहाल अवं आई, रोडो पुहाल भैड्डां केरे लेइ अपनि जान देते। 12 ज़ैखन नौकर गिद एंडतू लाते त ते भैड्डां शैरतां नेशशी गालो। किजोकि ते तैन केरो न पुहाले न मालिके, ते गिद तैन पुड हमलो केरतां तितर-बितर केरते। 13 ते एल्हेरेलेइ नशते कि ते नौकर आए, ते तैस भैड्डां केरि फिक्क नई। 14 रोडो पुहाल अवं आई, अवं अपनि भैड्डां पिशानताई, ते मेरी भैड्डां मीं पिशैनचन। 15 ज़ेन्चरे बाजी मीं जानाते, तेन्चरे अवं भी तैस ज्ञानताई, ते अवं भैड्डां केरे लेइ अपनि जान देताई। 16 ते मेरी होरि भी भैड्डन, ज़ैना इस बाड़े मां नई, मीं तैना भी ऐनिन ज़रूरिन, तैना मेरी आवाज़ पिशैनेली, फिरी अक्के डेरो ते अक्के पुहाल भोनीए। 17 अवं अपनि जान देताई, एल्हेरेलेइ बाजी मीं सेइं प्यार केरते, कि अवं फिरी ज़ीतो भोई। 18 कोई मेरी ज़िन्दगी मीं करां न थसोड़े, बल्के अवं एप्पू देताई, मीं तैस देनेरू भी अधिकारे ते नेनेरो भी अधिकारे, ई हुक्म मीं मेरे बाजी करां मैलोरोए।” 19 एल्लां पत्ती, यहूदन मां फिरी अनबन भोइ। 20 तैन मरां बड़े ज़ोने लाए, “तैस मां भूते, ते ते पागले, तैसेरी किजो शुनातथ?” 21 होरे लोकेई ज़ोवं, “एना गल्लां एरे मैनेरी नई ज़ैस मां भूत भोए, कुन भूत कांन केरि एछछी खोल्ली बटते?” 22 यरूशलेम नगरे मां तिहार भोवं, ते हीवतड़ेरो मौसम थियो। 23 यीशु सुलैमानेरे मन्देरे अंगने मां हंठने फिरने लगगोरो थियो। 24 तैखन यहूदेई ते घेरो ते पुच्छू, “तू केइस तगर इश्शे दिले डामाडोल केरतस? असन सेइं साफ-साफ ज़ो। कुन तू मसीह आस?” 25 यीशुए तैन जुवाब दित्तो, “मीं तुसन सेइं ज़ोवं पन तुस विश्वास न केरथ। ज़ैना कम्मां अवं अपने बाजी केरे अधिकारे सेइं केरताई तैना मेरे गवाह आन। 26 पन तुस

एल्हेरेलेइ विश्वास न केरथ कि मेरी भैड्डन मरां नई। 27 मेरी भैड्डां मेरी आवाज़ पिशैनचन, अवं तेन ज्ञानताई, ते तैना मीं पत्ती-पत्ती ज़ेलचन। 28 ते अवं तेन हमेशारी ज़िन्दगी देताई, तैना कधी नाश न भोले, ते कोई तैन मेरे हथ्थे मरां न थसोड़ी सके। (aiōn g165, aiōnios g166) 29 मेरो बाजी, ज़ैनी तैना मीं दित्तोरिन, सेव्भन करां महान आए, ते कोई तैन बाजी केरे हथ्थे मरां न नेइ बटे। 30 अवं त बाजी अक्के आमा।” 31 दुबारां फिरी, यहूदेई तैस घोड़ेव देनेरे लेइ फिरी घोड़ सल्ले। 32 एस पुड़ यीशुए तैन सेइं ज़ोवं, “मीं अपने बाजी केरे तरफां बड़ां रोड़ां कम्मां हिरां, तैन मरां कोस कम्मरे लेइ घोड़ेव देतथ?” 33 यहूदेई तैस जुवाब दित्तो, “रोड़ां कम्मां केरे लेइ अस तीं पुड़ घोड़ेव नई केरने लेवरे, पन परमेशरेरी तुहीन केरनेरे लेइ, एल्हेरेलेइ कि मैन्हु भोइतां अपनो आप परमेशर बनातस।” 34 यीशुए तैन जुवाब दित्तो, “मूसेरे कानूने मां एन लिखोरू कि परमेशरे अपने लोकां केरे लीडरन सेइं ज़ोवं कि तैना ईश्वरन। 35 (तुसन पतोए पवित्रशास्त्रेरी गल कोई भी बेदली न बटे) अगर परमेशरे तैन लोकन जो ईश्वर ज़ोवं ज़ैन कां परमेशरेरू वचन पुज्जू, 36 फिरी तुस किजो ज़ोतथ कि तू तुहीन केरतस, ज़ैखन अवं ज़ोताई कि अवं परमेशरेरू मट्टू आई? बाजी परमेशरे अवं पवित्र ठहरेइतां दुनियाई मां भेजो। 37 अगर अवं अपने बाजेरू कम न केरि, त मेरो विश्वास न केरा। 38 पन अगर अवं अपने बाजेरू कम केरताई, त चाए तुस मेरो विश्वास न भी केरा, पन तैन कम्मन पुड़ विश्वास केरा। तैखन तुस बुज्जले ते समझले कि बाजी मीं मां आए, ते अवं बाजी मां आई। 39 तैनेई फिरी तैस ट्लानेरी कोशिश की, पन ते तैन करां चलो जेव।” 40 फिरी यीशु यरदन दरियारे पार तैस ठैरी जेव, ज़ैडी यहून्ना पेइले बपतिस्मो देतो थियो, ते तैडी राव। 41 बड़े लोक तैस कां एइतां ज़ोते थिये, “यहून्ना त कोई चमत्कारी निशान न हिराव, पन ज़ैन किछ यहून्ना एसेरे बारे मां ज़ोवं, तैन सब सत्र थियू।” 42 ते तैडी बड़ेई यीशु पुड़ विश्वास कियो।

11 मरियम ते तैसेरी बेइन माथरि इल्वं बैतनिय्याह मां लाज़र नच्वेरो अक मैन्हु थियो 2 ई तैए मरियम थी ज़ैसां बादे मां प्रभु पुड़ इत्र छेडतां अपने बालन सेइं तैसेरे पाव पूंछेरे थी, एसेरो ढ़ला लाज़र बिमार थियो। 3 तैखन तैसेरी बेइने यीशु कां अक बिस्तार भेजो, “हे प्रभु, ज़ैस सेइं तू प्यार केरतस तै बिमारे।” 4 ज़ैखन यीशुए एन शुनू त ज़ोवं, “ए बिमारी मरनेरे लेइ नई बल्के परमेशरेरी महिमारे लेइ आए, ताके तैसेरे ज़िरिये परमेशरेरे मट्टेरी महिमा भोए।” 5 यीशु मार्था ते तैसेरी बेइन मरियम ते लाज़रे सेइं प्यार केरतो थियू। 6 ज़ैखन यीशुए शुनू कि, लाज़र बिमारे, पन फिर भी दूई दिहाड़े तैडी बिश्शो ज़ैडी ते थियो। 7 दूई दिहाड़ना बाद यीशुए अपने चेलन सेइं ज़ोवं, “एज्जा, अस फिरी यहूदिया इलाके मां गाम।” 8 चले ज़ोने लगे, “हे गुरू, थोड़े चिर पेइले यहूदी लीडर तीं घोड़ेई बाते थिये, ते तू फिरी तैडी गानू चातस?” 9 यीशुए जुवाब दित्तो, “कुन दिहैडी मां 12 घंटे न भोन? ज़ै दीसां चलते तैस ठोकर न लगे,

एल्हेरेलेइ कि तै दुनियायारी लोई मां चेलि सकते। 10 पन अगर जोने लगे, “हेरा, ए लाज़रे सेइ केत्रो प्यार केरतो थियो।” 11 पन तैन मरां किछ जोने लगे, “कुन जैनी कानेरी एछछन लौ दित्ती, इन भी न केरि बटू, कि ए मैन्हु न मरेथो?” 38 यीशु दुखी दिले सेइं कब्री कां अव, तै अक कुठ थी, जैस पुड़ अक घोड़ छडोरो थियो। 39 यीशु जोने लगे, “घोड़ खडो केरा।” मार्था जै लाज़री बेइन थी तै जोने लगी, “हे प्रभु एस मरां न मुशक लोरीए एजने, किजोकि एस चेत्रे दिहाड़े मरं भोरिन।” 40 यीशुए तैस सेइं जोवं, किजोकि, “मीं तुसन न थियूं जोरू कि अगर तेरे विश्वास भोलो, त तू परमेशेरी महिमा हेरेली।” 41 तैखन तेनेई तै घोड़ घिसाव, ते यीशुए उबरे तेकतां जोने लगे, “हे बाजी, अव तेरू शुक्र केरतां कि तीं मेरी शुनी। 42 अव ज्ञानतो थियो, कि तू मेरी प्रार्थना शुन्तस पन अव एन लोकां केरे लेइ जैना चेत्रे पासन खेडोरेन एन जोरू थियूं कि एना भी विश्वास केरन, कि तीं अव भेजोरोई।” 43 एन जोनेरां पत्ती यीशुए ज़ोरे सेइं ज़ोवं, “लाज़र बेइर निसा!” 44 ते तै मुओरो लाज़र बेइर निस्सो ज़ेसेरे हथ पाव कफने सेइं बंधोरे थिये ते दोगे अक कपड़ो बंधोरो थियो। यीशुए तैन सेइं ज़ोवं, “एस खोल्ला ते एस गाने देथ।” 45 बड़े यहुदी लोक जैना मरियम सेइं मिलने ओरे थिये। ते तैसेरां इन्ना कम्मां हेरतां तैस पुड़ विश्वास कियो। 46 पन तैन मरां किछेई फरीसन कां गेइतां सब शुनावं जैना यीशुए कियेरू थियूं। 47 एस पुड़ प्रधान याजकन ते फरीसी लोक महासभारे लोक अकोट्टे किये ते जोने लगे, “अस कुन केरम? ए मैन्हु त इडी बड़े चमत्कार लोरोए केरने। 48 अगर अस एस हुन्ना न रोकमेले त सारे लोक तैस पुड़ विश्वास केरेले, कि ए मसीह आए, ते फिरी रोमेई इडी एइतां इश्शे मन्दरे ते इश्शी कौमी दुइने नाश केरेली।” 49 तैखन तैन केरे टोली मरां अक ज़ेसेरू नवं कैफा थियूं, जै तैस साल मन्दरेरो महायाजक थियो जोने लगे, “तुस लोक किछ न ज्ञानाथ, 50 तुसन इन न समझथ कि, तुश्शे लेइ रोडूए, इश्शे लोकां केरे लेइ अक मैन्हु मरे, न कि इश्शे सारे लोकां।” 51 ए गल तैनी अपने आपे सेइं न थी ज़ोरी, पन तैस साल महायाजक भोइतां भविष्यद्वाणी, कि यीशु इसएलेरे सारे लोकां केरे लेइ अपनि जान देलो। 52 तै सिर्फ इसएलेरे लोकां केरे लेइ नई, पन एल्हेरेलेइ भी कि जैना परमेशेरे बच्चे तितर-बितर भोरिन तैन अकोट्टे केरतां अक बनाए। 53 बरसा, यहुदी लीडरई तैस दिहाड़े बाद यीशु मारोरो इरादो कियो। 54 एल्हेरेलेइ यीशुए तैस वक्ते करां यहूदन मां बादे मां न फिरो, पन जंगलेरे नेड़े एप्रैम नगरे मां जेव, ते अपने चलन सेइं साथी तैडी राने लगे। 55 तेइस यहूदी केरू फ़सह तिहार नेड़े अव, ते बड़े लोक आसेपासेरे इलाकन मरां यरूशलेम नगरे मांजो च़ले जे, ताके अपनो आप शुद्ध केरन। 56 तैना यीशु तोपते थिये तेइस तैना मन्दरे मां अकोट्टे भोए, ते एक्की होरि सेइं जोने लगे, “तुस कुन समझतथ? कोई पत्तोए कुन तै इडी फ़सह तिहारे मां एज्जेलो कि नई?” 57 ते प्रधान याजकेई ते फरीसी लोकेई हुक्म दितोरो

थियो कि अगर केन्ची पतो लगे कि यीशु कोडि आए त ज़ोथ दे ताके असां तैस गिरफ्तार केरम।

12 फ़सह तिहारे करां शा दिहाड़े पेड़ले यीशु बैतनिय्याह ड़लव्वं मांजो च़लो अव, ज़ैडी लाज़र रातो थियो, ज़ै यीशुए मुडदन मरां ज़ीतो कियोरो थियो। 2 तैडी तैनेई यीशुएरी खातरदारी केरनेरे लेइ धाम बनाई। ते मारथा सेवा लोरी थी केरने, लाज़र भी तैन मरां अक थियो ज़ैना यीशु सेइ साथी रोटी खाने बिश्शोरे थियो। 3 तैखन मरियमा जटामासी सेइ बनोरो अथ्थो लीटर खुशबूदार इत्र ज़ै बड़ो कीमती थियो, यीशुएरे पावन मल्लो, ते अपने दोग्गेरे बालन सेइ पोंछने लगी, ते सारू घर रोड़ी मुशकी सेइ भेरोई जेव। 4 पन तैसेरे चेलन मरां अक यहूदा इस्करियोती नव्वेरो अक चेलो, ज़ैनी यीशु ट़लवेवरो थियो ज़ोने लगो, 5 “ई इत्र 300 दीनारन मां बेचतां गरीबन किजो न दितो?” 6 तैनी एना गल्लां एल्लेरेलेइ न थी ज़ोरी, कि तैस गरीबां केरो खियाल थियो, पन एल्लेरेलेइ ज़ोवं कि ते चोर थियो, तैस कां पेइसां केरि ड़ोलो भोती थी, ते ज़ैन किछ तैस मां रखते थी ते कढतो थियो। 7 यीशुए ज़ोवं, “एस तंग न केरा, एसां वक्तेरे पेड़ले मेरी जान दबबनेरी तियारी कियोरीए। 8 किजोकि गरीब लोक त तुसन सेइ साथी सदा रातन, पन अवं तुसन सेइ साथी सदा नई रानो।” 9 मैन्हु केरि बड़ी भीड़ी तैडी आई ज़ैखन तैनेई शुनू कि यीशु तैडी अव। तैना सिर्फ यीशु नई बल्के लाज़रे भी हेरने ओरे थिये, ज़ै तैनी मुडदन मरां ज़ीतो कियोरो थियो। 10 तैखन प्रधान याजके लाज़र भी मारनेरी सलाह की। 11 किजोकि बड़े लोक यहूदी लीडरन करां च़ले जे, ते तैनेई यीशु पुड़ विश्वास कियो। 12 होरसां मैन्हु केरि बड़ी भीड़ तिहारे मां आई। ज़ैखन तैनेई शुनू कि यीशु भी यरूशलेम नगरे मां एजनेबालोए, 13 त तैनेई खजूरां केरि ड़ेलडी हथ्थन मां रेखतां नहरे देते तैस सेइ मिलनेरे लेइ निस्से ते ज़ोने लगे, “होशाना (तारीफ़) धने इसाएलेरो राज़ो, ज़ै प्रभुएरे नव्वे सेइ एइते।” 14 ज़ैखन यीशु अक गधरो बच्चो मैल्लो, ते ते तैस पुड़ बिश्तां यरूशलेम नगरे मांजो अव, ज़ेन्चरे पवित्रशास्त्रे मां लिखोरूए तेन्चरे एन भोवं, 15 “हे सिय्योनेरी कुई (यरूशलेमेरे लोक), तू न डर, हेर, तेरो राज़ो एज्जी राओरोए, ते ते गधरे बच्चे पुड़ च़ेदतां एज्जी राओरोए।” 16 पेड़लू त यीशुएरे च़ेलेई किछ न समझू, पन ज़ैखन यीशुएरी महिमा बांदी भोड़, तैनेई तैना सैरी गल्लां याद की, एन सब गल्लां तैसेरे बारे मां लिखोरी थी, ते लोकेई एरो ज़ेरो सलूख कियोरो थियो। 17 तैखन भीड़रे लोकेई ज़ैना तैस सेइ थी, ई गवाही दिती, कि तैनी लाज़र कब्री मरां कुजाव, ते मुडन मरां ज़ीतो कियो। 18 एल्लेरेलेइ लोक तैस सेइ मिलनेरे लेइ आए, किजोकि तैनेई शुनोख थियू, तैनी ई चमत्कार कियोरे। 19 फरीसी लोक एन हेरतां एक्की होरि सेइ ज़ोने लगे, “सोचा, तुस लोक किछ नई केरि लोरे बटने, हेरा सारी दुनिया एस पत्ती च़ली।” 20 ज़ैना लोक फ़सह तिहारे मां यरूशलेम नगरे मां आराधना केरने ओरे थिये, तैन मां किछ यूनानी थियो। 21

तैना फिलिप्पुसे कां जे ज़ै गलीलेरे नगर बैतसैदा मां रातो थियो, ते ज़ोवले हथ केरतां ज़ोने लगे, “जनाब अस यीशु सेइ मिलनू चातमा।” 22 फिलिप्पुसे अन्द्रियासे सेइ ज़ोवं, ते अन्द्रियास फिलिप्पुसे सेइ साथी जेव ते यीशु सेइ ज़ोवं। 23 यीशुए तैन जुवाब दित्तो, “कि मैनेरे मट्टेरी यानी मेरी महिमा बांदी भोनेरो वक्त ओरोए। 24 अवं तुसन सेइ सच-सच ज़ोताई, कि ज़ांतगर गेहुं केरो गलेव मित्ती मां न मरें, ते अक्के रहते, पन ज़ैखन मरते त बड़ो फल आनते, (तेन्चरे मीं सेइ साथी भोनूए)। 25 ज़ै अपनि जान ट़लारी रखते ते अपनि जान गुवाते, पन ज़ै अपनि जानी सेइ बैर रखते ते अक हमेशारी जिन्दगी बचालो। (aiōnios g166) 26 ज़ै कोई मेरी सेवा केरनि चाते त तैसेरेलेइ ज़रूरीए ते मेरो चेलो बने, ताके ज़ैडी अवं आई तैडी मेरो सेवक भी भोए, ज़ै मेरी सेवा केरते मेरो परमेशर तैस इज़्ज़त देलो।” 27 “हुना मेरो दिल बड़ो उदास भोरोए। एल्लेरेलेइ अवं कुन जोई? ‘हे बाजी इस दुखेरी घेडी करां मीं बचा,’ पन अवं इस दुनियाई मां एल्लेरेलेइ ओरोई कि दुःख झेल्ली। 28 हे बाजी तू केत्रो महिमा बालोस इन बांदू केरा।” तैखन स्वर्गारां अक आवाज़ अई, “मीं तेरी केत्री महिमा बांदी कियोरीए ते फिरी भी केरेलो। 29 तैखन तैडी ज़ैना मैन्हु खड़े भोइतां शुनी रावरे थिये, तैनेई ज़ोवं, गुड़ने लोरूए,” ते होई ज़ोवं, “केन्चे स्वर्गदूते तैस सेइ गल की।” 30 यीशुए ज़ोवं, “ई आवाज़ मेरे फेइदेरे लेइ नई बल्के तुशे लेइ आए। 31 इस वक्त परमेशर दुनियारे लोकां केरो इन्साफ केरेलो, ते अवं इस शैतानेरी शक्ति नाश केरेलो ज़ै इस दुनियाई पुड़ राज़ केरते। 32 ते ज़ैखन अवं ज़मीनी पुड़ा उच्चे च़ाढ़ो गालो, तैखन अवं सैरी लोकन एप्पू कांजो आनेलो।” 33 एन जोइतां तैनी साफ च़ारे बांदू कियू, ते ते केन्चरां मरने बालो। 34 एस पुड़ लोकेई ज़ोवं, “असेई मूसेरे कानूने मां ई गल शुनोरीए, कि मसीह हमेशा रानोए, फिरी तू केन्चरे ज़ोतस कि मैनेरू मट्टू उच्चे पुड़ च़दनू ज़रूरीए? एन मैनेरे मट्टू कौने?” (aiōn g165) 35 यीशुए तैन सेइ ज़ोवं, “लौ तुसन कां थोड़े च़िरे तगरे आए, ज़ां तगर लौ तुसन साथीए, तांतगर च़लते राथ, एरू न भोए आंधरू तुसन घेरे, ज़ै आंधरे मां च़लते ते न ज़ाने ते कोरां च़लरोए। 36 ज़ांतगर लौ तुसन सेइ साथीए, त लोई पुड़ विश्वास केरा ताके तुस लोअरे बच्चे बनथ।” इना गल्लां जोइतां यीशु छेप्पी जेव। 37 तैनी तैन केरे सामने बड़े चमत्कार हिराए, फिरी भी तैनेई विश्वास न कियो। 38 ताके यशायाह नेबेरू ज़ोरू वचन पूरू भोए, “हे प्रभु, केन्चे इश्शे खुशखेबरी पुड़ विश्वास न कियो, ते बड़े लोकेई परमेशरिरी शक्ति हेरतां भी कबूल न की।” 39 एल्लेरेलेइ तैना विश्वास न केरि सके यशायाह एक्की होरि ठैरी ज़ोते: 40 “तैनी तैन केरि एछछी केनि की, ते मन सखत कियोरोए, एरू न भोए कि तैना एछछन सेइ लान ते मने सेइ बुझन, ते माफ़ी मगन ते अवं तैन बड़्झेई।” 41 यशायाह नबी एल्लेरेलेइ ज़ोतो थियो, कि तैनी यीशुएरी एजनेबाली महिमा लवरी थी, ते तैसेरे बारे मां गल भी की। 42 फिरी भी लीडरन मरां बड़ेई यीशु पुड़ विश्वास

कियो, पन फरीसी लोकां केरे वजाई सेइ बांदे मां न थिये मन्ते, एरु न भोए कि असन प्रार्थना घरे मरां कढन। 43 किजोकि मैनु केरि बड्याई तैन परमेशेरी बड्याई करां जादे रोडी लगती थी। 44 तैखन यीशुए ज़ोरे सेइ ज़ोवं, “जै कोई मीं पुड़ विश्वास केरते तै मीं पुड़ नई पन मेरे भेजने बाले परमेशेरे पुड़ विश्वास केरते। 45 ते ज़ै मीं हेरते ते मेरे भेजने बाले हेरते। 46 अवं दुनियाई मां अक लौ बेनतां ओरोई, ताके ज़ै मीं पुड़ विश्वास केरे तै आंधरे मां न रालो। 47 अगर कोई मेरी गल्लां शुन्तां तैन पुड़ अमल केरे, त अवं तैस दोष न लेइलो, अवं दुनियारे लोकन पुड़ दोष लाने नई पन मुक्ति देने ओरोई। 48 ज़ै मेरो इन्कार केरते ते मेरी गल्लां कबूल न केरे, तैस पुड़ दोष लानेबालो अक्के, मतलब जैन वचन मीं ज़ोरूए, तैन आखरी दिहाड़े तैस दोषी ठेरालू। 49 किजोकि मीं अपने अधिकारे सेइ किछ नई ज़ोरू, पन बाजी ज़ैने अवं भेजोरोई तैनी मीं हुक्म दित्तोरोए, कि कुन-कुन ज़ोई ते कुन-कुन शुनेई? 50 ते अवं ज्ञानताई कि तैसेरो हुक्म मन्ने सेइ हमेशारी जिन्दगीए मैलतीए, एल्हेरेलेइ अवं तुसन सेइ तैन्ने ज़ोताई जैन ज़ोनेरो हुक्म मेरे बाजे मीं दित्तोरोए।” (aiōnios g166)

13 फ़सह तिहारेरे पेइले दिहाड़े यीशुए ज़ैनीं छूटू, कि मेरो दुनियाई मरां बाजी कां वापस गानेरो वक्त ओरोए। तै अपने लोकन सेइ ज़ैना दुनियाई मां थिये ज़ेरो प्यार केरतो थियो, तेरहो प्यार आखरी तगर केरतो राव। 2 शैताने शमौनेरे मठे यहुदा इस्करियोतेरे दिले मां पेइले यीशु दलुवानेरो खियाल छुडोरो थियो। यीशु त कने तैसेरे चेले इलाई खानेरो लोरे थियो। 3 यीशु पतो थियो कि बाजे सैरी चीजां तैसेरे हथ्ये मां दित्तोरिन, ते कने तै परमेशेरी तरफां ओरोए ते परमेशेरे कांजो वापस चलरोए। 4 एल्हेरेलेइ तै रोटी छेड़तां खड़ो उठो ते अपनू कोट खोल्लू, ते अक तोलियो अपने लखे सेइ पलैटो। 5 तैखन तैनी अक भांड दलावं ते तैस मां पानी छाड़ु ते अपने चेलां केरे पाव धोइतां लखे बन्धोरे तोलिये सेइ पोंछे। 6 ज़ैखन तै शमौन पतरस कां अव त पतरसे ज़ोवं, “हे प्रभु, कुन तू मेरे पाव धोने लोरस?” 7 यीशुए जुवाब दित्तो, “जैन अवं केरने लोरोई तू हुन्ना न बुझस, पन पत्ती तू बुझेलो।” 8 पतरसे तैस सेइ ज़ोवं, “तू मेरे पाव कधे न धोई सकस!” यीशुए तैस सेइ ज़ोवं, “अगर अवं तेरे पव न धोई, त तू मेरो चेलो नई।” (aiōn g165) 9 शमौन पतरस यीशु सेइ ज़ोने लगे, “हे प्रभु, तू मेरे पाव नई बल्के हथ ते दोग भी थो।” 10 यीशुए तैस सेइ ज़ोवं, “जैनी निहावरूप, तैस पावां केरे अलावा होरू धोनेरू किछ ज़रूरत नई। तै बिलकुल शुद्धे, ते तुस शुद्धथ, पन सारे नई।” 11 तै त दलुवाने बाले ज्ञानतो थियो एल्हेरेलेइ तैनी ज़ोवं, “तुस सब शुद्ध नई।” 12 ज़ैखन यीशुए सेबभी केरे पाव धोए त अपनू कोट लेइतां अपनि ठैरी बिश्शो तैखन तैनी तैन पुच्छू, “कुन तुस समझतथ कि मीं तुसन सेइ कुन कियूं? 13 तुस मींजो गुरु, ते प्रभु ज़ोतथ, तुशु ज़ोनू ठीके, किजोकि अवं आई। 14 अगर मीं तुशु गुरु त कने प्रभु भोइतां तुशु पाव धोए, त तुशु भी फज़ कि एककी होरेरे पाव धोथ।

15 किजोकि मीं तुसन अक नमूने हिराव, कि ज़ेन्चरे मीं पाव धोए तुस भी एरू केरथ। 16 अवं तुसन सेइ सच-सच ज़ोताई, कि नौकर अपने मालिके करां बड़ो न भोए, ते न भेजोरो भेजने बाले करां। 17 तुस त एना गल्लां ज्ञानतथ, ते अगर तैन पुड़ अमल केरतथ त तुस धन आथ। 18 अवं तुसन सेबभी केरे बारे मां न ज़ोई, ज़ैना मीं चुनोरेन अवं तैन ज्ञानताई, पन इन एल्हेरेलेइ आए, कि पवित्रशास्त्रेरू एन वचन पूरू भोए, ज़ैने मेरी रोटी खाइ, तैए मेरे खलाफ भोव। 19 अवं तैन भोने करां पेइले तुसन ज़ोताई कि ज़ैखन भोए त विश्वास केरथ कि अवं तैए आई। 20 अवं तुसन सेइ सच-सच ज़ोताई कि, ज़ै मेरे भेजोरे कबूल केरते तै मीं कबूल केरते, ते ज़ै मीं कबूल केरते तै मेरे भेजनेबाले बाले कबूल केरते।” 21 एना गल्लां ज़ोइतां यीशु आत्माई मां उदास भोइतां बड़ो दुःखी भोव, ते अपने चेलन सेइ ज़ोने लगे, “अवं तुसन सेइ सच-सच ज़ोतां, कि तुसन मरां एक्के अवं दलुवानोई।” 22 चेले एककी होरेरे पासे तकने लगे, किजोकि तैन पतो न थियो कि ए केसेरे बारे मां ज़ोने लोरोए। 23 तैसेरे चेलन मरां अक चेलो ज़ैस सेइ यीशु प्यार केरतो थियो, यीशुएरे नेड़े बिशोरो थियो। 24 तैखन शमौन पतरसे तैसेरे पासे इशारे सेइ पुच्छू, “जो कसेरे बारे मां ज़ोने लोरोए?” 25 तैखन तेन्चरे यीशुएरे छैतरे पासे लिक्तां पुच्छू, “हे प्रभु, तै कौने?” 26 यीशुए जुवाब दित्तो, “जैस अवं ई रोट्टो टुकड़ो डोबतां देइलो तैए।” ते यीशुए टुकड़ो डोबतां शमौनेरे मठे यहुदा इस्करियोती दित्तो। 27 ते टुकड़ो नेनेरे पत्ती तै शैतानेरे बस्से मां भोइ जेव, तैखन यीशुए तैस ज़ोवं, “तीं जैन किछ केरनूए, लूशी केरा।” 28 पन होरि केन्ची ए पतो न लगे कि ए गल यीशुए केसेरे बारे मां की। 29 यहुदा कां पेइसां केरी थेलडी भोती थी, ते किछेई समझू, कि यीशु तैस सेइ ज़ोते, कि जैन किछ असन तिहारेरे लेइ लोइते तैन घिन्ने, या गरीबन किछ दे। 30 तैखन यहुदा टुकड़ो खेइतां बेइर चलो जेव, तै रातरो वक्त थियो। 31 ज़ैखन तै बेइर जेव त यीशु ज़ोने लगे, “हुनी मैनेरे मठे यानी मेरी महिमा भोइ, ते मेरे ज़िरिये परमेशेरी महिमा भोइ, 32 ते परमेशर भी मीं एप्पू महिमा बालो केरेलो, बल्के जल्दी केरेलो। 33 हे मेरे दोस्तव, अवं किछ चिरेरे लेइ हेजु तुसन सेइ साथी आई, फिरी तुस मीं तोप्पेले, ते जेन्चरे मीं यहुदन भी ज़ोवं, ज़ैडी अवं गाताई तैडी तुस न एज्जी बटथ, तेन्चरे अवं तुसन सेइ भी ज़ोताई। 34 अवं तुसन अक नव्वो हुक्म देताई कि, एककी होरि सेइ प्यार केरा, जेन्चरे मीं तुसन सेइ प्यार कियो तुस भी एक्के होरि सेइ प्यार केरा। 35 अगर तुस एक्के होरि सेइ प्यार केरेले त सेबभी लोकन पतो लगेलो, कि तुस मेरे चेलेथ।” 36 शमौन पतरसे तैस पुच्छू, “हे प्रभु तू कोरां चलोरोस?” यीशुए जुवाब दित्तो, “जेरां अवं चलोरोई तू हुना मीं सेइ साथी न एज्जी सकस, पन बादे मां एज्जी सकतस।” 37 पतरसे ज़ोवं, “हे प्रभु अवं हुना तीं सेइ साथी किना एज्जी सेखी? अवं त तेरे लेइ अपनि जान भी देनेरे लेइ तियार आई।” 38 यीशुए जुवाब दित्तो, “कुन तू मेरे

लेइ अपनि जान देलो, अवं तीं सेइं सत्र-सत्र जोताई कि कुकड़ बांग देने करां पेइले तू मेरो टूलेइ बार इन्कार करेलो।”

14 “तुश्शो दिल उदास न भोए, तुस परमेशरे पुड़ विश्वास करतथ, मीं पुड़ भी विश्वास केरा। 2 मेरे बाजरे घरे मां बड़े कमरेन, अगर न भोथी त अवं तुसन सेइं जोथो, किजोकि अवं तुश्शो लेइ ठार तियार केरने चलोरोई। 3 अगर गेइतां तुश्शो लेइ ठार तियार केरि त वापस एइतां तुसन एप्पू सेइं साथी नेलो, ताके जैड़ी अवं भोलो तुस भी तैड़ी भोथ। 4 ते जेरां अवं चलोरोई तुस तैठरी बत ज्ञानतथ।” 5 थोमा तैस ज़ोवं, “हे प्रभु, असन नई पतो तू कोरां चलोरोस, ते फिरी बत केन्चरे ज्ञानम?” 6 यीशुए तैस सेइं ज़ोवं, “बत, सच्चरी ते हमेशारी ज़िन्दगी अक्खें आई, कोई मेरे जिरियेरे बगैर बाजी कां न एज्जी सके। 7 अगर तुसेईं अवं पिशानोरो भोथो त मेरे बाजी भी पिशानेथे, पन हुनी तुस तैस ज्ञानतथ ते कने लाव भी।” 8 फिलिप्पुसे तैस सेइं ज़ोवं, “हे प्रभु असन बाजी हिरा, तैन्ने इश्शे लेइ बड़ आए।” 9 यीशुए तैस सेइं ज़ोवं, “फिलिप्पुस, एत्रे चिरे अवं तुसन सेइं साथी राव कुन तू मीं न ज्ञानस ज़ैनी अवं लाव तैनी बाजी भी लाव तू किजो ज़ोतस असन बाजी हिरा? 10 कुन तू विश्वास न केरस, कि अवं बाजी मां आई ते बाजी मीं मां आए? अवं ज़ैना गल्लां तुसन सेइं ज़ोताई तैना गल्लां अवं अधिकारे सेइं न जोई, बल्के बाजी मीं मां रेइतां अपनू कम करते। 11 मेरो विश्वास केरा, कि अवं बाजी मां आई ते बाजी मीं मां आए, नई त ज़ैना कम्मां केरताई तैन हेरतां मीं पुड़ विश्वास केरा।” 12 अवं तुसन सेइं सत्र-सत्र जोताई, “कि जै मीं पुड़ विश्वास केरते, एना कम्मां ज़ैना अवं केरताई तै भी केरेलो, बल्के मीं करां भी बडां कम्मां केरेलो, किजोकि अवं बाजी कां चलोरोई। 13 ज़ैन किछ तुस मेरे नंवे सेइं मगले अवं तुसन देलो कि बाजी केरि महिमा मट्टेरे वजाई सेइं बांदी भोए। 14 अगर तुस मेरू नंवे सेइं किछ भी मगले त अवं तैन केरेलो।” 15 “अगर तुस मीं सेइं प्यार केरतथ त मेरे हुकमन मन्नेले। 16 ते अवं बाजी कां प्रार्थना केरेलो ते तै तुसन अक मद्दतगार देलो कि हमेशा तुसन सेइं साथी रालो। (aiōn g165) 17 मतलब तै आत्मा ज़ै परमेशरेरे बारे मां सत्र बांदू केरेली, ज़ै दुनिया कबूल न केरि सके, किजोकि न तैस लेइहोए न ज्ञाने, तुस तैस ज्ञातथ किजोकि तै तुसन साथी रहती, ते तै तुसन मां भोली। 18 अवं तुसन अकैल्लो न शेरलो बल्के अवं तुसन कां एज्जेलो। 19 ई दुनिया किछ चिरेरां बाद मीं न लाएली, पन तुस मीं लांते राले, किजोकि अवं ज़ीतोई ते तुस भी ज़ींते राले। 20 ज़ैखन अवं ज़ीतो भोलो तेइस तुसन पतो लग्गेलो, कि अवं अपने बाजी मां आई ते तुस मीं मां आथ ते अवं तुसन मां आई। 21 ज़ैस कां मेरे हुकम आन ते तैन मन्ते, त तैए मीं सेइं प्यार केरते ते मेरो बाजी तैस सेइं प्यार केरेलो, ते अवं तैस सेइं प्यार केरेलो, ते अपनो आप तैस पुड़ बांदो केरेलो।” 22 तैखन यहूदा (तै यहूदा इस्करियोती न थियो बल्के होरो चेलो थियो) तैस सेइं ज़ोवं, “हे प्रभु कुन भोव कि तू अपनो आप

असन पुड़ बांदो केरनो चातस ते दुनियारे लोकन पुड़ नई?” 23 यीशुए जुवाब दित्तो, अगर कोई मीं सेइं प्यार केरते त तै मेरी शिक्षाई मन्ते, ते मेरो बाजी भी तैस सेइं प्यार केरेलो, ते असन तैस कां एजमेले ते तैस सेइं साथी रामेले। 24 ज़ै मीं सेइं प्यार न केरे, तै मेरे शिक्षाई न मन्ते, ज़ै शिक्षा तुस शुन्ने लोरेथ, मेरी नई पन मेरे बाजी केरि ज़ैने अवं भेजोरोई। 25 “एना सैरी गल्लां मीं तुसन साथी रेइतां जोई। 26 पन तै मद्दतगार यानी पवित्र आत्मा ज़ैस बाजी मेरे ठैरी भेजेलो, तुसन सैरी गल्लां शिखालेलो, ते हर गल ज़ै मीं तुसन सेइं ज़ोरी याद करालो।” 27 अवं तुसन शान्ति देइतां ज़ै मीं कां आए, जेन्चरे दुनिया देचे तेन्चरे नई, तुश्शो दिल उदास न भोए ते न डेरथ। 28 तुसेईं शुन्नु, मीं तुसन सेइं ज़ोवं, अवं गाताई तुसन कां फिरी एज्जेलो अगर तुस मीं सेइं प्यार केरते भोते त खुशी भोने थिये, कि अवं बाजी कां चलोरोई किजोकि बाजी मीं करां बड़ोए। 29 मीं सैरी गल्लां पेइले तुसन ज़ोरिन कि ज़ैखन तैना पूरी भोन त तुस विश्वास केरेले। 30 हुनी अवं तुसन सेइं जादे गल्लां न केरेलो, किजोकि शैतान एइते, ज़ै इस दुनियाई पुड़ राज़ केरनेबालोए। मीं पुड़ तैसेरो किछ अधिकार नई। 31 जेन्चरे बाजीए मीं हुकम दित्तो, अवं तेन्चरे केरताई। पन एन एल्लेरेलेइ भोते कि दुनिया ज़ाने, कि अवं बाजी सेइं प्यार केरताई। ते उठा इट्ठां चलम।

15 यीशुए ज़ोवं “अवं दाछारू सच्चू बड़ह अक्खें आई, ते मेरो बाजी बागबाने। 2 ज़ै डालड़ी मीं मां आए, ते तैस फल न लगे, तै कट्टी गानीए, ते ज़ैस फल लगते तैस छांटते कि जादे फल लगे। 3 तुस तैस शिक्षाई सेइं ज़ै मीं तुसन दित्तोरीए शुद्ध आथ। 4 तुस मीं मां बनोरे राथ, ते अवं तुसन मां, जेन्चरे डालड़ी अगर बड़हे सेइं बनोरी न राए, त अपने आप सेइं तैस फल न लगे। तेन्चरे तुसन भी अगर मीं मां बनोरे न राले त तुस फलदार न भोइ सकेले। 5 अवं दाछारू बड़ह आई, तुस डेलड़ी आथ, ज़ै मीं मां बनोरो रहते तैस खूब फल लगते, किजोकि मीं करां अलग भोइतां तुस किछ न केरि सखत। 6 अगर कोई मीं मां बनोरो न राए, त तैस डेलड़ोरो ज़ेरोए ज़ैस केटतां शारतन, ते शुक्की गाचे, ते लोक घेरतां अग्गी मां फुकी छड़तन। 7 अगर तुस मीं मां बनोरे रातथ ते मेरी गल्लां तुसन मां बेनोरी रैतिन त ज़ैन चाहेले ते मगले तुसन दित्तू गालू। 8 मेरे बाजरी महिमा एसमां आए कि तुस हछो फल आनां, फिरी तुस मेरे चले भोले। 9 जेन्चरे बाजे मीं सेइं प्यार कियो, तेन्चरे मीं भी तुसन सेइं प्यार कियो। मेरे प्यारे मां बनोरे राथ। 10 अगर तुस मेरे हुकमन मन्नेले, त मेरे प्यारे मां बनोरे राले, जेन्चरे मीं अपने बाजरे हुकम मन्ने, ते तैसेरे प्यारे मां बनोरो राव। 11 मीं एना गल्लां एल्लेरेलेइ तुसन ज़ोरिन, कि मेरी खुशी तुसन मां बनोरी राए।” 12 “मेरो हुकमे ई आए जेन्चरे मीं तुसन सेइं प्यार कियो, तुस भी एककी होरि सेइं प्यार केरा 13 एस करां जादे प्यार केन्चे नई कियोरो, कि कोई अपने दोस्तां केरे लेइ अपनि जान दे। 14 ज़ै हुकम अवं देताई, अगर तुस तैस मन्नथ, त मेरे दोस्त आथ। 15 अज्जेरे बाद अवं तुसन

जो नौकर न ज़ोड़लो, किजोकि नौकर न ज़ाने कि तैसेरो मालिक कुन केरते। मीं तुसन जो दोस्त ज़ोरुए, किजोकि ज़ैन किछ मीं बाजी करां शुनोरुए तुसन भी शुनावरु आए। 16 तुसेई अवं नई चुनोरो पन मीं तुस चुनोरथ ते ठहरावरे भी आथ, ताके तुस गेइतां फल आनथ, ते तुशो फल बनोरो राए, कि तुस मेरे नंव्वे सेइं बाजी करां ज़ैन किछ मगथ, तै तुसन देलो किजो तुस मेरे चलेथ। 17 अवं इन गल्लां केरो हुक्म एल्हेरेलेइ देताई, कि तुस एककी होरि सेइं प्यार केरा।” 18 “अगर दुनियारे लोक तुसन सेइं दुश्मनी रखतन, त याद रखा कि तैनेई पेइले मीं सेइं दुश्मनी रखेरी। 19 अगर तुस दुनियारे भोथे, त दुनिया अपने लोकन सेइं प्यार केरती, पन हुनी तुस दुनियारे लोक नई किजोकि मीं तुस दुनियाई मरां चुनोरथ तांए दुनियारे लोक तुसन सेइं दुश्मनी रखतन। 20 तै गल ज़ै मीं तुसन सेइं ज़ोरी थी याद रख्खा, नौकर अपने मालिके करां बड्डो न भोए, अगर दुनियां अवं सतेवरोइं त तैना तुसन भी सताले, अगर तैनेई मेरी गल्ली पुड़ अमल कियुं त तुशु गल्ली पुड़ भी अमल केरेले। 21 पन तैना लोक तुसन सेइं एरो ज़ेरो बर्ताव केरेले, किजोकि तुस मेरे चलेथ। तैना मेरे भेजने बाले परमेशरे न ज़ानन्। 22 अगर मीं एइतां तैन सेइं गल्लां न भोथी कियोरी त तैना पापी न थिये भोने, पन हुनी तैन केरे पापेरो तैन कां कोई बहानो नई। 23 ज़ै मीं सेइं दुश्मनी रखते, ते तै मेरे बाजी सेइं भी दुश्मनी रखते। 24 अगर मीं तैन केरे सामने तैना चमत्कार न भोथे कियोरे, ज़ैना कधी होरे केन्चे नई कियोरे त तैना पापी न थिये भोने, पन हुनी तैनेई सब किछ लाव, ते मीं भी ते बाजी सेइं दुश्मनी रख्खी। 25 पन एन एल्हेरेलेइ भोवं कि तैन केरे कानूने मां लिखोरी तै गल पूरी भोए, तैनेई मीं सेइं खामखा दुश्मनी रख्खी। 26 पन ज़ैखन तै मदतगार एज्जेलो ज़ैस अवं अपने बाजरे तरफां भेजेरो, मतलब सच्चेरी आत्मा, ज़ै बाजी केरि तरफां एइतीए, तै मेरी गवाही देली। 27 ते तुस भी गवाह आथ किजोकि तुस भी शुरू करां मीं सेइं साथी थिये।”

16 “मीं तुसन एना सैरी गल्लां एल्हेरेलेइ ज़ोई कि तुशु विश्वास न टलुटे। 2 तैनेई तुस प्रार्थना घरन मरां कढनेथ, खास केरतां एरो ज़ेरो वक्त एज्जी राहोरोए, ज़ै तुसन मारेलो तै इन समझेलो कि तै परमेशेरी सेवा करने लोरोए। 3 तैन एन सब एल्हेरेलेइ केरेले कि न तैनेई कधी मेरो बाजी ज़ांनो ते न कधी अवं। 4 पन मीं एना सैरी गल्लां एल्हेरेलेइ तुसन सेइं ज़ोई, कि ज़ैखन तैना पूरी भोनेरो वक्त एज्जेलो, त तुसन याद एज्जे, कि मीं तुसन एन पेइलू ज़ोरु थियूं, ज़ेइस तुस मेरे चले बनोरे थिये। मीं एना गल्लां केरे बारे मां पेइलू एल्हेरेलेइ न ज़ोवं, कि अवं एप्पू तुसन सेइं साथी थियो।” 5 “पन हुन्ना अवं अपने भेजने बाले कां चलोरोई, पन तुसेई केन्चे भी न पुछ्छू कि तू कोरां चलोरोस? 6 पन मीं तुसन सेइं ज़ोई छड़ेरुए एल्हेरेलेइ तुशु मन उदास आए। 7 फिरी भी अवं तुसन सेइं सच ज़ोताई कि मेरु इट्ठां गानु तुशु लेइ फैइदीए, अगर अवं न गेइलो त तै मदतगार तुसन कां नई एज्जो, पन अवं चलो जेव त तैस अवं

तुसन कां भेज्जी देलो। 8 ते ज़ैखन तै एज्जेलो त दुनियाई पाप ते धार्मिकता ते इन्साफेरे बारे मां सब किछ बांदू केरेलो। 9 पापेरे बारे मां एल्हेरेलेइ कि दुनियां मीं पुड़ विश्वास न कियो, 10 धार्मिकतारे बारे मां एल्हेरेलेइ कि अवं वापस बाजी कां चलोरोई ते तुसेई अवं फिरी नई लहनों, 11 इन्साफेरे बारे मां एल्हेरेलेइ कि, शैतान ज़ै दुनियाई पुड़ राज़ केरनेबालो मुर्जम बनोरोए।” 12 “अवं तुसन सेइं होरु भी बडू किछ ज़ोनू चाताई, पन हुन्ना तुसेई तैन झैली नई बटनू। 13 पन ज़ैखन तै मतलब सच्चेरी आत्मा एज्जेली त तै सच्चेरी बत हिराली, किजोकि तै अपने तरफां न ज़ोली, पन ज़ैखन किछ परमेशरे करां शुनेली तैने ज़ोली, ते एज्जेली त तै सच्चेरी बत हिराली, किजोकि तै अपने तरफां न ज़ोली। 14 ते मेरी महिमा केरेली किजोकि तै मेरी गल्लां ज़ोली, किजोकि तै मेरी गल्लन मरां तुसन सेइं ज़ोली। 15 ज़ैन किछ बाजी केरुए, तैन सब मेरुए, एल्हेरेलेइ मीं ज़ोवं, कि तै मेरी गल्लन मरां शुनालो।” 16 “थोड़े चिरेरां पत्ती तुसेई अवं फिरी नई लहनों, ते तैसेरे थोड़े चिरेरां पत्ती तुसेई अवं फिरी लांनोई।” 17 तैखन तैसेरे किछ चलेई एप्पू मांमेइं ज़ोवं, इन कुने, “ए कुन ज़ोते, थोड़े चिरेरां पत्ती तुस मीं न लाएले, ते फिरी थोड़े चिरेरां पत्ती तुस मीं लाएले? कि अवं बाजी कां गाताई?” 18 तैखन तैनेई ज़ोवं, “थोड़े ज़ेरे चिरेरां बाद, एन ज़ै ए ज़ोते, कुन आए? अस न ज़ानम कि कुन?” 19 यीशुए एन ज़ैनतां, कि एना मीं पुछ्छू चातन, “कुन तुस मेरी इस गल्लरे बारे मां एप्पू मांमेइं गलबात केरने लोरेथ, कि एस गल्लारो कुन मतलबे, थोड़े चिरेरां पत्ती मीं न लाएले, ते फिरी थोड़े चिरेरां पत्ती लाएले? 20 अवं तुसन सेइं सच-सच ज़ोताई, कि तुस लेरां देले ते शोग बनाले, पन दुनियारे लोक खुशी भोले, पन ज़ैखन तुस मीं दुबारां लाएले त तुशु दुःख, खुशी मां बेदलोई गानोए। 21 ज़ैखन कुआन्श ज़ातीए त तैस बडी तकलीफ भोतीए, किजोकि तैसेरे दुःखेरी घडी नेडे पुजोरीए, पन ज़ैखन बच्चो ज़मते त एस खुशी मां कि दुनियाई मां अक मैन्हु पैदा भोरोए अपनि तकलीफ बिस्सरी गाचे। 22 ते तुसन भी हुन्ना तेरही तकलीफे, पन अवं तुसन सेइं फिरी मिलेलो, ते फिरी तुशु मने मां खुशी भोली, ते खुशी तुसन करां कोई न नेही सकेलो। 23 तैस वक्ते तुस मीं कोई किछ न पुछेलो, अवं तुसन सेइं सच-सच ज़ोताई, तुस मेरे नंव्वे सेइं बाजी करां ज़ैन किछ मगथ, तै तुसन देलो किजो तुस मेरे चलेथ। 24 तुसेई मेरु नवं घिन्तां हुना तगर बाजी करां किछ नई मगेरु, मगेले त तुसन मैल्ली गालू ते तुशु खुशी पूरी भोली।” 25 “अवं तुसन एना गल्लां मिसाल देइतां ज़ोताई, पन तै वक्त ओरोए कि अवं कहैन मां फिरी न ज़ोइलो, पन रोड़े चारे बाजरे बारे मां तुसन सेइं गल्लां केरेलो। 26 तैस वक्ते तुस मेरु नवं घिन्तां प्रार्थना केरेले, अवं इन न ज़ोई, कि तुशु लेइ बाजी सेइं बिनती केरि। 27 किजोकि बाजी परमेशर तुसन सेइं एप्पू प्यार केरते, एल्हेरेलेइ कि तुसेई मीं सेइं प्यार कियो, ते तुसेई विश्वास कियोरोए कि अवं परमेशेरी तरफां ओरोई। 28 अवं बाजी करां दुनियाई मां ओरोई, हुनी दुनियाई मरां भोइतां वापस

बाजी कां चलोरोई।” 29 तैसेरे चलेई ज़ोवं, “हुन्ना तू साफ-साफ गल लोरस करेने, ते कोई मिसाल देइतां न ज़ोस। 30 हुन्ना असेई बुझू कि तीं सब किछ पत्तोए, ते ज़रूरत नई कि कोई तीं पुछे, असां विश्वास केरतम कि तू परमेशरे करां ओरोस।” 31 यीशुए तैन सेइं ज़ोवं, “हुनी तुस विश्वास केरतथ! 32 हेरा, तै वक्त एज्जी राओरोए बल्के पुजोरोए, कि तुस सब नेशतां अपने-अपने बत्तां गानेथ, ते अवं अकैल्लो शारनोई पन फिरी भी अवं अकैल्लो नई, किजोकि मेरो बाजी मीं सेइं साथीए। 33 मीं तुसन एना गल्लां एल्हेरेलेइ ज़ोई, ताके तुसन शान्ति मैल्ले, किजो तुस मेरे चलेथ, तुस दुनियाई मां मुसीबत त उठाताथ, पन हिम्मत रखा, मीं शैताने पुड़ ज़ीत हासिल कियोरीए, जै इस दुनियाई पुड़ राज़ केरते।”

17 ज़ैखन यीशुए अपने चेलन सेइं एना सब गल्लां ज़ोई, त तैनी उबरू स्वर्गोरां तेकतां ज़ोवं, “हे बाजी हुन्ना तै वक्त ओरोए कि तू अपने मट्टेरी महिमा केर, कि मट्टू भी तेरी महिमा केरे। 2 किजोकि तीं तैस सेबभी मैन्नु पुड़ अधिकार दित्तोरोए, ज़ैना तीं तैस दित्तोरेन हमेशारी ज़िन्दगी दे। (aiōnios g166) 3 ते हमेशारी ज़िन्दगी ते आए, कि तैना सिर्फ तीं एक्की सच्चरे परमेशरे ज़ानन् ते यीशु मसीहे भी ज़ानन् जै तीं भेजोरोए। (aiōnios g166) 4 मीं तैन कम ज़ैन तीं मीं दित्तेरू थियूं मुकेइतां धेरतली पुड़ तेरी महिमा की। 5 ते हुनी हे बाजी मीं एप्पू सेइं साथी मेरी तै महिमा केर जै दुनियारे पेड़ली मेरी तीं साथी थी।”

6 “मीं तेरू नवं तैन कां बांदू कियूं, ज़ैना तीं दुनियाई मरां चुनतां मीं दित्तोरेन तैना तेरे थिये, पन तीं मींजो दित्तोरेन ते तेनेई तेरे बचने पुड़ अमल भी कियोरूए। 7 हुनी तैना ज़ानतन, कि ज़ैन किछ तीं मीं दित्तेरू तैन सब तेरी तरफां। 8 एल्हेरेलेइ मीं तैना गल्लां ज़ैना तीं मीं दित्तोरी थी, मीं तैन पुजेई ते तेनेई तैन पुड़ विश्वास कियो, ते सच्च पिशानू, कि अवं तेरी तरफां ओरोई, ते ई भी विश्वास कियो कि तीं अवं भेजोरोई। 9 अवं तैन केरे लेइ प्रार्थना केरताई, दुनियारे लोकां केरे लेइ न केरि, पन तैन केरे लेइ ज़ैना तीं मीं दित्तोरेन, किजोकि तैना सब तेरे आन। 10 ते ज़ैन किछ मेरू आए, तैन सब किछ तेरूए, ते ज़ैन तेरू तैन मेरूए, ते इन सेइं मेरी महिमा बांदी भोई। 11 मीं हुनी इस दुनियाई मां नई रानू, पन तैना हेजू इस दुनियाई मां आन, ते अवं तीं कां एजताई, हे पवित्र बाजी, अपने तैस नंवे सेइं ज़ैन तीं मीं दित्तोरूए, तैन केरि हफाज़त केर, कि तैना असन बराबर भोन। 12 ज़ैखन अवं तैन सेइं साथी थियो, मीं तेरे तैस नंवे सेइं, ज़ैन तीं मीं दित्तोरूए, तैन केरि हफाज़त की, मीं तैन केरि देख भाल की, नाश भोनेबाले मैनेरे अलावा कोई नाश न भोव, एल्हेरेलेइ पवित्रशास्त्रेरी गल पूरी भोइ। 13 पन हुन्ना अवं तीं कां एजताई, ते इना गल्लां अवं दुनिया मां ज़ोताई, कि तैना मेरी खुशी एप्पू मां पूरी केरन। 14 मीं तैन तेरू वचन तैन कां पुजेवरुए, ते दुनियारे लोकेई तैन सेइं दुश्मनी रख्खी, किजोकि ज़ेन्चरे अवं दुनियारो नई, तैना भी नई। 15 मेरी प्रार्थना ई नई कि

तू तैन दुनियाई मरां ने, पन तू तैन शैताने करां बचेइतां रख। 16 ज़ेन्चरे अवं दुनियारो नई तैन भी इस दुनियारे नई। 17 तेरू वचन सच्चरे। सच्चरे ज़िरिये सेइं तैन पवित्र केर। 18 ज़ेन्चरे तीं अवं दुनियाई मां भेजोरोई तेन्चरे मीं भी तैना दुनियाई मां भेजोरेन। 19 अवं अपनो आप तैन केरे लेइ पवित्र केरताई, ताके तैना भी सच्चरे ज़िरिये सेइं पवित्र भोन।” 20 “मेरी प्रार्थना सिर्फ चले केरे लेइ नई, पन तैन केरे लेइ भी ज़ैना तैन वचनेरे ज़िरिये मीं पुड़ विश्वास केरेले। 21 कि तैना सब अक भोन, ज़ेन्चरे तू बाजी मीं मां आस, ते अवं तीं मां आई तेन्चरे तैना असन मां भोन, एल्हेरेलेइ दुनियारे लोक विश्वास केरन, कि तींए अवं भेजोरोई। 22 ते तै महिमा जै तीं मीं दित्तोरीए, कि ज़ेन्चरे अस अक आम तैन भी अक भोन। 23 अवं तैन मां भोइलो, ते तू मीं मां भोलो, ताके तैन पूरो अकीजो भोए, ते दुनिया ज़ाने कि तीं अवं भेजोरोई। ज़ेन्चरे तीं मीं सेइं प्यार कियो, तेन्चरे तीं तैन सेइं भी प्यार कियो। 24 हे बाजी अवं चाताई कि ज़ैना तीं मीं दित्तोरेन, ज़ैदी अवं आई तैदी तैना भी मीं सेइं साथी भोन, कि तैना भी मेरी महिमा हेरन, जै तीं मीं दित्तोरीए। दुनियारे रचने करां भी पेड़ले तीं, मीं सेइं प्यार कियोरोए। 25 हे धर्मी बाजी, दुनियां तू न पिशानो, पन मीं तू पिशानो, ते तैन चलेई भी अवं पिशानो कि तीं अवं भेजोरोई। 26 मीं तैन पुड़ बांदू कियूं, कि तू कौन आस, ते बांदू केरतो रालो, ज़ैस प्यारे सेइं तीं मीं प्यार कियो, तै तैन मां भोए, ते अवं तैन मां बनोरो रेई।”

18 यीशुए ए प्रार्थना केरतां झाड़ी, त अपने चेलन सेइं साथी किट्रोने वैदरे पार जेव। तैड़ी अक बाग थी ते ते तैसेरे चले तैड़ी जे। 2 तैस दलुवाने बालो यहूदा तैस ठारारो बाकम थियो, किजोकि यीशु अपने चेलन सेइं साथी तैड़ी केही फेरेई जोरो थियो। 3 तैखन यहूदे, रोमी सिपाही ते किछ प्रधान याजक ते फरीसी केरे तरफां भेजोरे लोकन सेइं साथी एन्तां दीये ते मिसालां ते हथियार घिन्तां तैड़ी पुजाए। 4 तैखन यीशु सब गल्लां ज़ैना तैस सेइं भोनेबैली थी, बुझतां तैन सेइं ज़ोने लगो, “तुस केस लोरेथ तोपने?” 5 तेनेई तैस जुवाब दित्तो, “यीशु नासरी।” यीशुए तैन सेइं ज़ोवं, “अवं तैए आई।” तैस दलुवाने बालो यहूदा भी तैन सेइं साथी खड़खड़ो थियो। 6 ज़ैखन यीशुए ज़ोवं, “अवं तैए आई,” तैना पत्रोवं ज़मीनी पुड़ झाड़े। 7 एल्हेरेलेइ तैनी फिरी पुच्छू, “तुस केस लोरेथ तोपने?” तेनेई जुवाब दित्तो, “यीशु नासरी।” 8 यीशुए जुवाब दित्तो, “मीं त ज़ोवं कि अवं तैए आई, अगर तुस मीं तोप्पतथ, त एन लोकन गाने देथ।” 9 एन एल्हेरेलेइ भोवं, कि तैन वचन पूरू भोए, “ज़ैना तीं मीं दित्ते, तैन मरां मीं अक भी न हिरव।” 10 शमौन पतरसे कां अक तलवार थी, तैनी तलवार केढतां महायाजकेरे नौकरे बाई ते तैसेरो देइने कन्न केटव। तैस नौकरे नवं मलखुस थियूं। 11 तैखन यीशुए पतरसे ज़ोवं, “अपनि तलवार मियांने मां रख, कुन अवं ते दुखेरो कटोरो न पीं जै मेरे बाजे मीं पीनेरे लेइ दित्तोए?” 12 तैखन रोमी फौवजी ते तैन

केरे सूबेदार ते यहूदी केरे लीडरेई यीशु टलाव तै बंधे। 13 ते पेड़लो हन्ना कां नीयो किजोकि तै कैफारो शेरहो थियो जै तैस सालेरो महायाजक थियो। 14 ई तैए कैफाए जैनी यहूदन सलाह दित्तोरी थी, कि इश्शे लोकां केरे लेइ एक्की मैनेरु मरनु रोडू आए। 15 शमौन पतरस ते अक होरो चेलो यीशु पत्ती जे। ते चेलो महायाजकेरो बाकम थियो, तै यीशु सेइं साथी महायाजकेरे अंगने मां जेव। 16 पन पतरस बेइर दारे पुड़ खडो थियो, तै होरो चेलो जै महायाजकेरो बाकम थियो वापस अव, ते तैस नौकरैनी सेइं जै दारे पुड़ थी गल केरतां पतरस अन्तर नीयो। 17 तैस नौकरेनां जै दारे पुड़ थी पतरसे पुच्छू, “कुन तू भी तैसेरे चेलन मरां आस?” पतरस ज़ोव, “नईं अव नईं।” 18 ठंडारे वजाई सेइं नौकरेई ते मन्दरेरे पहरदारेई अग बालोरी थी, ते पतरस भी तैन सेइं साथी अग लोरो थियो तपने। 19 तैखन महायाजक यीशुएरे चेलां त कने तैसेरी शिक्षारे बारे मां पुच्छने लगे। 20 यीशुए जुवाब दित्तो, “मीं त सेबभी केरे सामने सैरी गल्लां कियोरिन, मीं त रोज़ तुशे प्रार्थना घरन ते मन्दरे मां, ते जैड़ी यहूदी अकोठे भोतन तैड़ी शिक्षा दित्ती, ते छेपतां किछ भी न ज़ोव। 21 तू मीं ए सवाल किजो पुछतस? शुन्नेबालन पुच्छू, कि मीं तैन सेइं कुन ज़ोवरूए? हेर तैन पतोए, कि मीं कुन ज़ोवरूए।” 22 ज़ैखन तैनी ज़ोव, त मन्दरेरे पहरदारन मरां अक ज़ै तैड़ी खडो थियो, तैनी यीशुए थप्पड़ बैइतां ज़ोव, “कुन तू महायाजक एन्चरे जुवाब देतस?” 23 यीशुए तैस जुवाब दित्तो, “अगर मीं किछ बुरु ज़ोरूए त साबत केर, पन अगर रोडू ज़ोरूए त थप्पड़ किजो बातस?” 24 तैसेरां बाद हन्ना यीशुएरे हेज बन्धोरो थियो तेन्चरे महायाजक कैफा कां भेजो। 25 शमौन पतरस खड़खडो अग लोरो थियो तपने। तैखन केन्चे तैस पुच्छू, “कुन तू भी तैसेरे चेलन मरां आस?” पतरस इन्कार केरतां ज़ोव, “नईं अव नईं।” 26 महायाजकेरे नौकरन मरां अक ज़ै तैसेरो रिशतेदार थियो, जेसेरो कन्न पतरसे तलवारी सेइं कटोरो थियो, ज़ोने लगे, “कुन मीं तू बागी मां यीशु साथी नईं लाहोरो?” 27 पतरसे फिरी इन्कार कियो, ते तैखन कुकड़े भी बांग दित्ती। 28 तैनेई यीशु झेड़ां कैफा करां रोमी गवर्नर पिलातुसेरे महले मां नीयो, पन तैना एप्पू अन्तर न जे, ताके भिटे न भोन, ते फ़सह तिहारेरी रोटी खेइ बटन। 29 तैखन पिलातुस तैन कां बेइर अव ते ज़ोने लगे, “तुस इस मैन्हु पुड़ कुन इलज़ाम लातथ?” 30 तैनेई तैस जुवाब दित्तो, “ए मैन्हु मुज़म न भोथो त असेई ए तीं कां न थियो आन्नो।” 31 पिलातुसे तैन सेइं ज़ोने लगे, “तुस एस नेथ ते अपने कानूनेरे हिसाबे सेइं फैसलो केरा।” यहूदी लीडर ज़ोने लगे, “असन त केन्ची भी मारनेरी अज़ाज़त नईं।” 32 एन एल्हेरेलेइ भोव कि जैन गल्लां यीशुए ज़ोरी थी, कि तै केरही मौतां मरेलो पूरी भोन। 33 तैखन पिलातुस फिरी महले मां जेव ते तैनी यीशु कुजेइतां तैस पुच्छू, “कुन तू यहूदी केरो राज़ोस?” 34 यीशुए जुवाब दित्तो, “तू ए गल अपनि भोती ज़ोने लोरोस कि होरेई मेरे बारे मां तीं सेइं जेवरीए?” 35 पिलातुसे जुवाब

दित्तो, “कुन अव यहूदी आई? तेरी कौमरे ते प्रधान याजकेई तू मेरे हवाले कियोरोस, तू ज़ो तीं कुन कियोरूए?” 36 यीशुए जुवाब दित्तो, “मेरू राज़ इस दुनियारू नईं, अगर दुनियारू भोथू त मेरे चले जंग केरेथे, ते मीं यहूदी लोकां केरे प्रधानां केरे हथ्थे टलेयोने न देथे, पन हुन्ना मेरू राज़ इट्टेरू नईं।” 37 पिलातुसे ज़ोव, “त कुन तू राज़ोस?” यीशुए जुवाब दित्तो, “तू ज़ोतस कि, अव राज़ोई, अव एल्हेरेलेइ ज़रमोरोई, ते एल्हेरेलेइ दुनियाई मां ओरोई कि सच्छेरे बारे मां शिक्षा देई। ज़ैना सच्छे मन्तन तैना मेरी गल शुन्तन।” 38 पिलातुसे पुच्छू, “सच कुने?” एन ज़ोइतां तै यहूदी लीडरन कां जेव ते ज़ोने लगे, “अव त एस मैन्हु मुज़म न सेमझी।” 39 पन तुशे रीतेरे मुताबिक अव फ़सह तिहारेरे मौके पुड़ अक कैदी हथरां छडताई। कुन तुस चातथ कि अव तुशे लेइ यहूदी केरे राज़े हथरां छेई? 40 तैना फिरी ज़ोरे-ज़ोरे सेइं ज़ोने लगे, ए नन्ना इश्शे लेइ बरअब्बा हथरां छड। बरअब्बा अक डैकु थियो।

19 पिलातुसे सिपेहिन हुक्म दित्तो, कि यीशु नेइतां कोड़े बान। 2 ते सिपाहीयेइ कंटां केरू ताज बनेइतां यीशुएरे दोग्गे पुड़ रखवू, ते तैस बैजनी रंगेरां लिगड़ां लुवां। 3 ते तैन केरे सामने तैन कां एइतां ज़ोने लगे, “हे यहूदी केरे राज़ा, नमस्कार!” ते तैस थप्पड़ बाहे। 4 तैखन पिलातुसे फिरी बेइर गेइतां लोकन सेइं ज़ोव, हेरा, “अव तैस तुसन कां फिरी बेइर आनताई, तुसन पतो लगे कि मीं एसमां कोई ज़ुरम न लेइहोव।” 5 ज़ैखन यीशु कंटां केरू ताज दोग्गे पुड़ रेखतां ते बैजनी लिगड़ां लेइतां बेइर आनो त पिलातुसे तैन सेइं ज़ोव, “हेरा ई मैन्हु।” 6 ज़ैखन प्रधान याजक ते मन्दरेरे पहरदारेई यीशु लाव त ज़ोरे-ज़ोरे चिन्डां मेरतां ज़ोने लगे, “एस क्रूसे पुड़ च़ाढ़ा, एस क्रूसे पुड़ च़ाढ़ा!” पिलातुसे तैन सेइं ज़ोव, “तुसे एस नेथ ते क्रूसे पुड़ च़ाढ़ा, किजोकि अव एसमां कोई दोष न लेही।” 7 यहूदी लीडर ज़ोने लगे, “इश्शो भी कानूने, ते तैसेरे कानूनेरे मुताबिक ए मौतरे सज़ारे काबले। किजोकि ए अपने आपे जो परमेशेरू मट्टू ज़ोते।” 8 ज़ैखन पिलातुसे एन शुनू त तै मन्ना डरो। 9 ते फिरी अपने महले मां जेव ते यीशु सेइं फिरी ज़ोव, “तू कोट्टां ओरोस?” पन यीशुए तैस किछ जुवाब न दित्तो। 10 पिलातुसे तैस सेइं ज़ोव, “तू मीं सेइं गल कि न केरस? कुन तीं पतो नईं कि मीं अधिकार कि अव तीं हथरां छेई या क्रूसे पुड़ च़ेढ़ेई।” 11 यीशुए जुवाब दित्तो, “अगर ए अधिकार तीं परमेशेरे करां न भोथो मैलोरो त तेरो कोई अधिकार मीं पुड़ न थियो भोनो, पन ज़ैनी अव तेरे हवाले कियोरोई ते हछे पापेरो हकदार भोरोए।” 12 तैसेरां बाद पिलातुसे यीशु हथरां छडनो चाव, पन यहूदी लोक चिन्डां मेरतां ज़ोने लगे, “अगर तू एस मैन्हु हथरां छ़ाड़लो त तू महाराज़ेरे पासे नईं, ज़ै कोई अपनो आप राज़ो बनाते ते महाराज़ेरे खलाफ भोते।” 13 ज़ैखन पिलातुसे एन शुनू त तैनी यीशु बेइर कुजेइतां अपने आदालतेरे तखते पुड़ बिश्शो ज़ैस जो इब्रानी भाषाई मां, गब्बता, ज़ोतन। 14 तै फ़सह तिहारेरी

तियेरारी दिहाड़ी थी ते दुपाहरां केरे करीब थियो, तैखन पिलातुसे यहूदी लोकन जो ज़ोवं, “हेरा, ई तुश्शो राज़ो!” 15 पन तैना ज़ोरे-ज़ोरे सेइं ज़ोने लगे, “एस इहं दूर ने! इहं दूर ने! ते एस क्रूसे पुड़ चाढ़ा!” पिलातुसे ज़ोवं, “कुन अवं तैस ज़ै तुश्शो राज़ो क्रूसे पुड़ चैढ़ी?” प्रधान याजकेई ज़ोवं, “महाराजरे अलावा इश्शो कोई राज़ो नई।” 16 एसेरां बाद पिलातुसे यीशु तैन केरे हवाले कियो, ताके तैना तैस क्रूसे पुड़ चाढ़न। 17 यीशु अपन क्रूस छुड़तां खोपड़ी जो चलो जैस जो इब्रानी मां गुलगुता ज़ोतन। 18 तैड़ी तैनेई यीशु ते तैस सेइं साथी दूई डैकू भी क्रूसे पुड़ चाढ़ो, अक तैसरे देइने पासे होरो बाएं पासे ते यीशु मझाटे। 19 पिलातुसे एककी पेखड़ी पुड़ तैसरो दोष लिखतां क्रूसे पुड़ लाई तैस पुड़ लिखोरू थियूं, “यीशु नासरी यहूदी केरो राज़ो।” 20 काई यहूदेई तैन पढ़, किजोकि जैस जगाई यीशु क्रूसे पुड़ चढ़ोरो थियो ते जगा यरूशलेम नगररे नेड़े थी, ते पेखड़ी पुड़ इब्रानी, लातीनी ते यूनानी भाषाई मां लिखोरू थियूं। 21 यहूदी केरे प्रधान याजकेई पिलातुसे कां दरखुवास की, “यहूदी केरो राज़ो न लिखा पन एन लिखा कि ए ज़ोते, ‘अवं यहूदी केरो राज़ोई।’” 22 पिलातुसे जुवाब दितो, “मीं जैन लिखी छाड़, तैन लिखू।” 23 ज़ैखन स्पेहियेई यीशु क्रूसे पुड़ चाढ़ो ते तैनेई यीशुएरे लिगड़ा बंटां ते तैन केरे चेरे हिस्से किये, ताके सेबन अक-अक हिस्सो मैल्ले सिर्फ तैसरे कोट बाकी राऊं, जैन बा ते बुना तगर अक्के थियूं। 24 तैना एप्पू मांमेइं ज़ोने लगे, “एसेरे टोटे केरनेरे बजाए शर्त रखम जेसेरे नंवे पुड़ परची निसेली लिगड़ां तैस भोलां।” एन एल्लेरेलेइ भोवं कि जैन पवित्रशास्त्रे मां लिखोरू थियूं तैन पूरू भोए कि, “तैनेई मेरां लिगड़ां बंटा ते मेरे कोटरे लेइ शर्त रखवू ते सिपैहीयेइं एन कियूं।” 25 यीशुएरे क्रूसे कां तैसेरी अम्मा ते तैसेरी अम्मारी बेइन मरियम ज़ै क्लोपासरी कुआन्श थी, मरियम मगदलीनी खड़खड़ी थी। 26 यीशुए अपनि अम्मा ते अक अपनो चेलो जैस सेइं तै प्यार केरतो थियो, तैस कां नेड़े खड़खड़ो लाव त तैनी अपने अम्मा सेइं ज़ोवं, “हे कुआन्श, हेर, तेरू मट्टए।” 27 ते चेले जो ज़ोवं, “अज़ेरां बाद, ई तेरी अम्मा आए, तैनी चले तैखने तै अपने घरे नेइ।” 28 ज़ैखन यीशुए ज़ांनू कि हुनी सैरी गल्लां पूरी भोजेइ, एल्लेरेलेइ जेन्चरे पवित्रशास्त्रे मां लिखोरू थियूं तैन पूरू भोवं त तैनी ज़ोवं, “मीं टलिश लग्गोरीए।” 29 तैड़ी अक भांड सिरके सेइं भरतां रखोरू थियूं, केन्चे जूफेरी डालड़ी तैस मां डोबतां यीशुएरे ऐशी सेइं हराई। 30 ज़ैखन यीशुए च़ख़ू त तैनी ज़ोवं, “पूरू भोवं” ते क्रोड़ी टलोइतां अपने प्राण दिते। 31 ते एल्लेरेलेइ कि तै तियेरारी दिहाड़ी थी, होरसां आरामेरी दिहाड़ी ते कने फ़सह तिहार थियूं। ई यहूदी केरे लेइ खास दिहाड़ी थी, यहूदी न थिये चाते कि आरामेरे दिहाड़े लाशां क्रूसन पुड़ टंगोरी रान, एल्लेरेलेइ तैनेई पिलातुसे कां गइतां ज़ोवं, कि मुज़मां केरि ज़न्धां टलोइतां तैन केरि लाशां उन्डी उसालम। 32 सिपाही आए तैनेई पेइले मैनेरी ज़न्धां टलोड़ी, फिरी होरेरी भी, जैना यीशु सेइं साथी

क्रूसे पुड़ चाढ़ोरे थिये। 33 पन ज़ैखन यीशुएरी बारी अई त तैनेई हेरू कि ते पेइले मेरि जेवरोए, ते तैनेई तैसेरी ज़न्धां न टलोड़ी। 34 पन सिपेहिन मरां एक्के अपनि बलम एन्तां यीशुएरे देल्लोड़ी मां बाई ते तैखने खून त पानी बगने लगू। 35 जैनी मैने एन हेरू, तैनी गवाही दित्ती, ते तैसेरी गवाही सच्चिए, ते तै ज़ानते, कि सच ज़ोते कि तुस भी विश्वास केरा। 36 एना सैरी गल्लां एल्लेरेलेइ भोज कि पवित्रशास्त्रे मां लिखोरू पूरू भोए, “तैसेरी कोई हड़ी न टलोड़ी गाए।” 37 पवित्रशास्त्रेरे एककी होरि वचने मां लिखोरू, “तैस ज़ैनेई बलमी सेइं बाई तैना तैस हेरेले।” 38 एना गल्लां केरे पत्ती अक मैन्हु यूसुफ नंवेरो ज़ै अरिमतियाह इल्लोव्वेरो रानेबालो थियो, पिलातुसे कां बिनती केरने लगे, कि यीशुएरी लाश दे, ए मैन्हु यहूदी लोकां केरे प्रधानां केरे डरे सेइं छेपतां यीशुएरो चेलो थियूं, तै पिलातुसे तैस अज़ाज़त दित्ती, ते तैनी यीशुएरी लाश नेही। 39 नीकुदेमुस भी अव, जैनी एककी बार राती यीशु सेइं मुलाकात कियोरी थी, तैनी गन्धरस ते एलवा आनोरे थिये, एन तेत्ती किल्लो थियूं। 40 तैखन तैनेई यीशुएरी लाश नेइतां यहूदी केरे दबनेरे रसमेरे मुताबिक तैस खुशबूदार

20 हफतेरी पेइली दिहैड़ी झेझां हेजू आंधरू थियूं मगदलीन इल्लोव्वेरी मरियम कब्री पुड़ आई, तैसां हेरू कि कब्री करां घोड़ भी खड़ो कियोरोए। 2 ते दौवड़ती शमौन पतरस ते होरि चेले कां पुज़ी ज़ै यीशु सेइं प्यार केरतो थियो, ज़ोने लगी, “तैनेई प्रभुएरी लाश कब्री मरां केढतां नीयोरो, ते असन नई पतो तै कोड़ि रखखोरोए।” 3 एना शुन्तां पतरस त अक होरो चेलो कब्रारे पासे चले। 4 ते दुइये साथी-साथी दौवड़तां चलोरे थिये, पन तै होरो दुइयोवं चेलो पतरस करां अग्रोवं निस्सी जेव, ते तैस करां पेइलो कब्री पुड़ पुज़ो। 5 तैनी लिकतां तकू ते कफन लाव ते अन्तर न जेव। 6 तैखन शमौन पतरस भी पत्ती-पत्ती तैड़ी पुज़ो ते सिधो कब्री मां जेव तैनी हेरू कि तैड़ी लिगड़ां थियां। 7 ते कफनेरो तै रुमाल भी ज़ै यीशुएरे दोगे सेइं पलेटोरो थियो, लिगड़न मां नई पन अलग ठैरी थियो। 8 तैखन तै होरो चेलो भी ज़ै कब्री पुड़ पेइलो पुज़ोरो थियूं अन्तर जेव तैस भी लेइतां याकीन भोवं। 9 किजोकि तैनेई पवित्रशास्त्रेरी ए गल न थी समझोरी जेसेरे बारे मां यीशुएरू मुइदन मरां ज़िंती भोनू ज़रूरी थियूं। 10 तैखन एना चले वापस घरजो चले जे। 11 पन मरियम कब्री करां बेइर लेरां देंती थी। लेरां देंती तैसां लिकतां कब्री मांजो तकू। 12 त तैड़ी तैसां दूई स्वर्गदूत आए ज़ैन छित्तां लिगड़ां लग्गोरां थियां, ज़ैड़ी यीशुएरी लाश रखोरि थी तैड़ी अक शरेइंते ते होरो परेइंते बिश्शोरे आए। 13 तैनेई तैस पुच्छू, “हे कुआन्शो तू किजो लोरिस लेरां देने?” मरियमा ज़ोवं, “तैनेई मेरे प्रभुएरी लाश नेवरीए ते पतो नई कोड़ि रखखोरोए।” 14 एना

जोते ते पत्रोंव बेदलोई त तैडी यीशु खड़खड़ो लाव, पन तैस गाताई।” तैनेई ज़ोवं, “अस भी तीं साथी चलतम।” तैना तैट्ठां पिशान न आई कि ए यीशुए। 15 यीशुए ज़ोवं, “हे कुआन्शे तू निस्से ते किशती मां च़ेढ़तां जे, पन तैस राती तैन किछ न मैल्लू। किजो लेरां देने लोरिस? तू केस तोपने लोरिस?” तैसां समझू 4 झोझां सुबेलो यीशु बन्ने पुड़ एइतां खड़ो भोव, पन चेलेई न कि कोई बागबाने, तैसां ज़ोवं, “हे जनाब अगर तीं ते नीयोरोए प पिशानो कि ए यीशुए। 5 तैखन यीशुए तैन ज़ोवं, “हे बच्चव, जो कि तीं कोड़ि रखवोरोए ते अवं तैस नेइ।” 16 यीशुए तैस सेइं ज़ोवं, “मरियम!” तैसां तैसेरे पासे फिरतां इब्रानी मां ज़ोवं, “नई।” 6 यीशुए ज़ोवं, “ज़ाल किशतरे देइने पासे छड़थ त तुसन “रब्बूनी!” ज़ेसेरो मतलबे हे गुरू। 17 यीशुए ज़ोवं, “मीं सेइं न हुरा किजोकि अवं बाजी कां बाह हेजू नई जोरो, पन मेरे दलान गेइतां जो कि अवं अपने बाजी ते तुशे बाजी ते अपने परमेशर ते तुशे परमेशरे कां बा च़लोरोई।” 18 मरियम मगदलीनी तैट्ठां च़ली जेई ते च़ेलन कां गेइतां तैन पतो दित्तो, “मीं प्रभु लाहोरोए ते तैनी मीं सेइं एना गल्लां की।” 19 तैस्से दिहैडी ज़े हफ़तेरी पेइली दिहाडी थी ड़लोइरे मौके सारे च़ेले एककी ठैरी थिये, ते यीशुए ज़ोवं, “तुसन शान्ति मैलती राए।” 20 एन ज़ोइतां तैनी अपने हथ ते अपनि देल्लोड़ी तैन हिराई, च़ेले तैस हेरतां खुशी भोए। 21 यीशुए फिरी ज़ोवं, “तुसन शान्ति मैलती राए, ज़ेन्च़रे बाजी अवं भेजोरोई, तेन्च़रे अवं भी तुसन भी इस दुनियाई मां भेजताई।” 22 एन ज़ोइतां तैनी तैन जो फुक दित्ती ते ज़ोवं, “पवित्र आत्मा नेथ। 23 ज़ैन केरे पाप तुस माफ़ केरेले त तैन केरे पाप माफ़ भोले, ज़ैन केरे तुस रखेले तैना राले।” 24 पन बादे मां 12 च़ेलन मरां अक मैन्हु मतलब थोमा ज़ैस दिदुमुस ज़ोतन, ज़ैखन यीशु अव त तै तैन साथी न थियो। 25 ज़ैखन होरि च़ेले तैस सेइं ज़ोवं, “कि असेईं प्रभु लाव,” तैखन तेनेई ज़ोवं, “ज़ां तगर अवं तैसेरे हथ्यन मां कीलां करां गतन मां एंगलोई न छेडी, तांतगर विश्वास न केरि।” 26 अठ दिहैइना बाद यीशुएरे च़ेले एककी बार फिरी तैस्से ठैरी बिशोरे थिये, ते थोमा भी तैडी थियो ते दार भी बंद थियू, ते यीशु एइतां तैन मझाटे खड़ो भोव, ते तैन जो ज़ोने लगे, “तुसन शान्ति मैल्ले।” 27 फिरी तैनी थोमा जो ज़ोवं, “अपनि अंगलोई आन ते मेरो हथ हेर ते अपने हथ्ये सेइं मेरी दल्लोड़ी हेर, शक न केर बल्के मीं पुड़ विश्वास केर।” 28 थोमा तैस जो ज़ोवं, “हे मेरे प्रभु हे मेरे परमेशर!” 29 यीशुए तैस जो ज़ोवं, “तीं लेइतां तीं मीं पुड़ विश्वास कियो, धन तैना ज़ैना बगैर लाहने मीं पुड़ विश्वास केन।” 30 यीशुए अपने च़ेलां केरे सामने होरे भी बड़े चमत्कार कियोरे थिये, ज़ैना इस किताबी मां नई लिखोरे। 31 पन ज़ैना लिखोरन, एल्हेरेलेइ लिखोरन, कि तुस विश्वास केरथ, कि यीशु परमेशरेरू मट्ठू, मसीहे आए, ते विश्वास केरतां तैसेरे नंवे सेइं हमेशारी ज़िन्दगी हासिल केरथ।

21 बादे मां यीशुए एप्पू एककी फेरे फिरी अपने च़ेलन पुड़ तिविरियुस समुन्दरे बन्ने एन्च़रे बांदो भोव। 2 शमीन पतरस, थोमा ज़ैस जो दिदुमुस ज़ोतन, नतनएल ज़े गलीलेरे काना नगर मां रातो थियू, ते जेब्देरू मट्ठू ते होरे च़ेले भी तैडी थिये। 3 शमीन पतरसे तैन सेइं ज़ोवं, “अवं मेछली दलाने

गाताई।” तैनेई ज़ोवं, “अस भी तीं साथी चलतम।” तैना तैट्ठां निस्से ते किशती मां च़ेढ़तां जे, पन तैस राती तैन किछ न मैल्लू। 4 झोझां सुबेलो यीशु बन्ने पुड़ एइतां खड़ो भोव, पन चेलेई न पिशानो कि ए यीशुए। 5 तैखन यीशुए तैन ज़ोवं, “हे बच्चव, कुन तुसन कां किछ खाने जो आए?” तैनेई जुवाब दित्तो, “नई।” 6 यीशुए ज़ोवं, “ज़ाल किशतरे देइने पासे छड़थ त तुसन किछ मेछली मैलनिन।” तैनेई ज़ाल छ़ाडु ते मेछली एनी ज़ाले मां लेगि कि ज़ाल खिचोने न लगू। 7 तैखन यीशु ज़ैस च़ेले सेइं प्यार केरतो थियो तैनी पतरस सेइं ज़ोवं, “ए त प्रभुए।” ज़ेरू शमीन पतरसे शुन्नु कि प्रभुए, तैनी अपनो चोगो, ज़ै कम केरनेरे लेइ खोल्लोरो थियो लाव ते पैनी मांजो छाल मारी। 8 होरे च़ेले ज़ैना किशती मां थिये ज़ाल ज़ैना मेछलेई सेइं भेरतां थियू तैनेई खिचतां आनू, किजोकि तैना 100 मीटर दूर थिये। 9 ज़ैखन तैना बन्ने पुड़ ओस्से, त तैनेई मूरन पुड़ मेछली रेखोरिन ते ड़लेखी रोटी भी लेई। 10 यीशुए तैन सेइं ज़ोवं, “ज़ैना मेछली तुसेईं दलेतोरीन तैन मरां किछ इरां आनां।” 11 शमीन पतरस किशती मां च़ढ़ो ते ज़ाल ड़लेखी पुड़ खिचतां आनू ज़ैस मां 153 मेछली लेगोरी थी, ते फिरी भी ज़ाल नई छींदोरे। 12 यीशुए तैन सेइं ज़ोवं, “एज्जा केलोव खाथा।” पन च़ेलन मरां केन्ची हिम्मत न अई कि पुछन, “कि तू कौन आस?” तैना ज़ानते थिये कि ए प्रभुए। 13 यीशुए रोटी दलाती ते तैना भी दित्ती ते मेछली भी दित्ती। 14 यीशु मुड़न मरां ज़ीतो भोनेरां पत्ती दलेइयोवं फेरे अपने च़ेलन पुड़ बांदो भोइ जेव। 15 ज़ैखन तैनेई केलोव खाव, त यीशुए शमीन पतरसे सेइं ज़ोवं, “शमीन,” यूहन्नेरे मट्ठा, “कुन तू होरि च़ेलन करां जादे मीं सेइं प्यार केरतस?” तैनी ज़ोवं, “हाँ प्रभु तू त मीं ज़ानतस कि अवं तीं सेइं प्यार केरताई।” यीशुए ज़ोवं, “मेरां गबड़ां च़ार।” 16 यीशुए फिरी तैन सेइं ज़ोवं, “शमीन, यूहन्नेरे मट्ठा, कुन तू मीं सेइं प्यार केरतस?” तैनी ज़ोवं, “हाँ प्रभु, अवं तीं सेइं प्यार केरताई।” यीशुए तैस सेइं ज़ोवं, “मेरी भैट्ठां सम्भाल।” 17 तैनी दलेइयोवं फेरे फिरी पुच्छू, “शमीन यूहन्नेरे मट्ठा, कुन तू मीं सेइं प्यार केरतस?” पतरस दुःखी भोइतां ज़ोवं, “प्रभु तू एप्पू सैरी गल्लां ज़ानतस, तू ज़ानतस, कि अवं तीं सेइं प्यार केरताई,” यीशुए ज़ोवं, “मेरी भैट्ठां च़ार।” 18 अवं तीं सेइं सत्र ज़ोताई, ज़ैखन तू नौजवान थियो त अपनू मज़ एप्पू बंधतो थियो, ते ज़ैडी चातो थियो, एप्पू गातो थियो, पन ज़ैखन तू बुढो भोलो, त अपने हथ अग्रोवं केरेलो, ते होरो तेरू मज़ बंधेलो ज़ैडी तू न चालो तैडी तीं नेले। 19 यीशुए ए गल ज़ोइतां इशारो कियो कि पतरस कोस मौतां मेरतां परमेशेरी महिमा बांटी केरेलो। तैखन यीशुए ज़ोवं, “मीं पत्ती च़ल!” 20 पतरसे फिरतां तक्कू, कि यीशु सेइं प्यार केरनेबालो च़ेलो तैस पत्ती च़ललोरो थियो, ए तै च़ेलो थियो ज़ैनी रोटी खाते यीशुएरे पासे लिक्तां पुछेरू थियू, “हे प्रभु ते कोने, ज़ै तीं दलुवालो?” 21 पतरसे तैसेरे पासे तेक्तां यीशुए पुच्छू, “हे प्रभु एस च़ेले सेइं कुन भोलू।” 22 यीशुए जुवाब दित्तो,

अगर अवं चैई कि, “अगर मेरे वापस एजने तगर ज़ींतो राव त एसमां तीं कुन? तू मीं पत्ती ज़ल।” 23 एन्त्रे ढलान मां ए गल सेभीए फैली जेई, कि ए चेलो न मरेलो, पन यीशुए एन न थियूं ज़ोरू, कि तै न मरेलो अगर अवं चैई कि, “अगर मेरे वापस एजने तगर ज़ींतो राव, त एसमां तीं कुन?” 24 ई तै चेलोए, जै इना गल्लां केरि गवाही देते, ते ज़ैनी एना गल्लां लिखोरिन, असां ज़ानतम कि तैसेरी गवाही सऱ्चीए। 25 यीशुए होरां भी बड़ां कम्मां कियोरां थियां, अगर सेब्भी केरे बारे मां लिखनू भोए त अवं समझताई, कि तैना किताबां अज़ भोथी त तैन केरे लेइ इस दुनियाई मां ठार न थी भोनी।

प्रेरितों के काम

1 जनाब थियुफिलस, मीं अपने पेड़ली किताब मां तैना सैरी गल्लां लिखोरिन, जैना यीशु शुरु मां करतो ते शिखालतो राव, 2 तैस दिहेड़ी तगर जेइस ते स्वर्ग मांजी नीयो जेव। तैस करां पेड़ले तैनी अपने चुनोरे प्रेरितन पवित्र आत्मा रे शेक्ते जिरिये सेइं किछ हुक्म भी दितोरे थी। 3 यीशुए दुःख झूलनेरां ते मोतरे बाद तैनी अपने जीते भोनेरां काई पक्कां सबूतां तैन हिरां, ते 40 दिहाइन तगर तैन लेइहोतो राव, ते परमेशरे राजेरे गल्लां शुनातो राव। 4 एक्की फेरे जैखन यीशुए अपने चेलन सेइं साथी थियो तैनी तैन ठाकू, “कि तुस यरूशलेम नगरे मरां बेइर न गोइयथ ते मेरे बाजी परमेशरे ते वादो पूरो भोनेरो इंतज़ार करथ, जेसेरे बारे मां तुसेईं मीं करां शुनो भी आए। 5 किजोकि यूहन्ना त लोकन पैनी सेइं बपतिस्मो दितो, पन तुसन थोड़े दिहेइना पत्ती पवित्र आत्मा सेइं बपतिस्मो दितो गालो (यानी परमेशर पवित्र आत्मा भेजेलो जै तुसन सेइं साथी रालो)” 6 जताली प्रेरित दुबारा यीशु सेइं मिले, त तैनेई तैस पुच्छू, “हे प्रभु, कुन तू इस वक्ते फिरी इस्राएले तैसेरू राज देने बालोस?” 7 तैनी तैन सेइं ज़ोवं, “तैस वक्तेरो या जेइस तैना गल्लां भोली, तैन केरे बारे मां तुसन ज़ान्नेरी कोई ज़रूरत नई, जैना बाजी परमेशरे अपने अधिकार मां रेखोरिन। 8 पन पवित्र आत्मा जैखन तुसन पुड़ उतरेली त तुसन शक्ति मैलेली, ते तुस यरूशलेम नगर ते सारे यहूदिया ते सामरिया इलाकन मां बल्के धेरतारे हर पासे मेरे गवाह भोले।” 9 एना गल्लां जोनेरां पत्ती यीशु तैन केरे सामने हेरते-हेरते परमेशरे ते स्वर्ग जो नीयो, ते बिदलारां तै तैन केरे एछलन करां छुपाव। 10 जैखन तैना यीशुए अम्बरे मांजी गांतो तकने लोरे थिये, त अचानक, दूई मड़द जैन छित्तां लिगड़ां लगोरां थियां तैन कां एइतां खड़े भोए। 11 ते जोने लगे, “हे गलीली मड़दाव तुस खड़खड़े अम्बरे पासे कुन तकने लोरेथ? एहे यीशु जेन्चरे तुशे सामने परमेशरे, स्वर्ग मांजी नीयो, जेन्चरे तुसेईं स्वर्ग मांजी गांतो लाहोरोए तेन्चरे फिरी एइतो लाएले।” 12 जैखन चले जैतून पहाड़े पुडेरं जैन यरूशलेम नगरेरे नेड़े एक्की किलोमीटर दूरे, यरूशलेम नगरे मांजी वापस आए। 13 नगरे मां एइतां तैना तैस कमरे मां जे जैड़ी तैना रहते थिये, ते कमरो दुइयोवं छते थियो। तैना प्रेरित इना थिये, पतरस, यूहन्ना, याकूब, अन्द्रियास, फिलिप्पुस थोमा, बरतुलमै, मत्ती ते हलफईरू मडू याकूब ते शमौन जेलोतेस ते याकूबरू मडू यहूदा रहते थिये। 14 एना सब मड़द ते किछ होरि कुआन्शां जैनेई यीशुएरी मद्दत कियोरी थी, ते यीशुएरी अम्मा मरियम ते यीशुएरे दलान सेइं साथी अक मन भोइतां लगातार प्रार्थनाई मां लगोरे थिये। 15 ते तैने दिहाइन मां पतरस तैन दूलां केरि टोली मां जैन केरि तैधात कोई 120 थिये, पतरस खड़ो भोइतां जोने लगे। 16 “हे मेरे दूलाव, पवित्रशास्त्रेरी तै गल जै पवित्र आत्मा दाऊद राजेरी जिरिये पेड़ले जोरी थी, पूरी

भोनी ज़रूरी थी, तै गल यहूदारे बारे मां जोरी थी, जैनी यीशुएरे दलवाने बालां केरि मद्दत कियोरी थी। 17 ते असन सेइं साथी सेवा करनेबालो थियो, ते असन साथी तै गनो गांतो थियो। 18 तैनी नीच कमयेरे लेइ यीशु दलुवाव, ते फिरी तैनी तैना पेइंसे यहूदी लीडरन वापस दिते, ते तैनेई तैन पेइंसां केरू अक ऊडार धिन्नु, जैड़ी ते दोगरे भारे खिरकोरो थियो, ते तैसेरू पेट फेटतां तैसेरी एंटलोड़ी बेइर निस्सी।” 19 यरूशलेम नगरेरे सारे लोकन ए पतो लगोरो थियो, तैनेई अपने भाषाई मां तैस उडारेरू नवं हकलदमा रख्खू, जेसेरो मतलबे, “खूनेरू ऊडार।” 20 किजोकि दाऊदे भजना केरि किताबी मां लिखोरूए कि, “तैसेरू घर उजड़े, ते तैस मां कोई बसने बालो न भोए, ते इन भी लिखोरूए, तैसेरी पदवी कोई होरो ने।” 21 एन्हेरेलेइ एन ज़रूरीए कि अक एरो मैन्हु चुनो गाए, जै प्रभु यीशुएरे सारे कम्मां केरे गवाह भोए, यानी यीशुएरो यूहन्ना करां बपतिस्मो नेने करां लेइतां असन करां यीशुएरे स्वर्ग गाने तगर 22 तैन मरां अक मैन्हु चुनो गाए, जै असन सेइं साथी यीशुएरे जीते भोनेरो गवाह भोए। 23 तैखन तैनेई दुइये जने नामजद किये, अक यूसुफ जैस जो बरसब्बास जोते थिये, जेसेरो खताब यूस्तुस थियो, ते दुइयोवं मत्तियाह थियो। 24 ते एन ज़ोइतां प्रार्थना की, “हे प्रभु, तू सेबभी केरे दिले ज़ानतस ते असन पुड़ बांदू केर, कि इन दुईन मां तीं कौन जेरो चुनोरोए। 25 कि तै इस सेवकाई ते प्रेरिताइयोरो पद ने, जै यहूदा शैरतां अपने ठैरी जेवरोए।” 26 तैनेई तैसेरे बारे मां शर्त रखेरू थियू, जैन मत्तियाह नंवे पुड़ निस्सू, एन्हेरेलेइ तै 12 प्रेरितन सेइं साथी गनो जेव।

2 जेइस यहूदी केरे पिन्तेकुस्त तिहारेरी दिहाड़ी अई, त तैना सब एक्की ठैरी अकोट्टे थिये। 2 अचानक अम्बरेरां आवाज़ आई, जेन्चरे बड़ो बात चलने लोगोरो थियो, ते तैस सेइं सारू घर घुमने लगू जैड़ी तैना बिशोरे थिये। 3 ते तैनेई अगारी लप्परी जेरि जिभां लेई, जैना अलग-अलग भोइतां तैन सेबभन पुड़ एइतां टिकी। 4 ते तैना सब पवित्र आत्माई सेइं भरपूर भोए, ते आत्मा रे वरदाने सेइं तैना अलग-अलग भाषा केरने लगे। 5 तैस वक्ते मां, बड़े यहूदी भक्त जैना तिहारे मां दुनियारी सैरी मुलखन मरां ओरे थिये, तैना यरूशलेम नगरे मां राने लोरे थिये। 6 जैखन तैनेई ए बातेरी जेरि आवाज़ शुनी त बड़े लोक जम्हां भोए, ते सब लोक बड़े हैरान रेइजे, किजोकि हर कोई चेलन अपने-अपने भाषाई मां गल्लां केरते शुन्ने लोरे थियो। 7 ते सब बड़े हैरान भोइतां जोने लगे, हेरा, “कुन एना जोनेबाले सारे गलील इलाकेरे रानेबाले नई? 8 फिरी एन कुन भोइ रावरूए कि, असन मरां हर कोई अपनि-अपनि भाषा शुन्ने लोरोए। 9 असन मरां किछ इन इलाकन मरां आन, पारथी, मेदी, एलामी ते मेसोपोटामिया, यहूदिया, कप्पूदकिया, पुन्तुस ते आसिया, 10 फ्रूगिया, पंफूलिया, मिस्र मुलख, ते लीबिया मुलखे जै कुरेन नगरेरे नेड़े, इन सब मुलखां केरे रानेबाले ते रोमी मुसाफर, 11 कुन यहूदी, ते कुन यहूदी पंथ धारण केरनेबाले, क्रेती ते अरब

मुलखरे लोक भी आन, पन अस अपनि-अपनि भाषाई मां तैन करां परमेशरेरां बड्डां-बड्डां कम्मां केरि चर्चा शुन्ने लोरेमा।” 12 तैना सब बडे हैरान भोइ जे ते घबरेइतां एक्की होरि पुच्छने लगे, “कि एन कुन भोइ रावरुए?” 13 पन किछ तैन केरि हासी बनेइतां जोने लगे, “कि एनेई सजरी शराप पियोरीए।” 14 तैखन पतरस 11 प्रेरितन सेई साथी खडो भोव, ते बडे ज़ोरे सेई जोने लगे, “हे लोकव हे यहूदियारे रानेबालव ते हे यरूशलेम नगररे राने बालाव, मेरी गल ध्याने सेई शुना, अव तुसन जोताई इडी एन कुन भोने लोरुए। 15 जैन तुस बुझने लोरेथ तैन नई, एना मैन्हु नशे मां नई, किजोकि हुन्ना त झेझरे नौ बजोरेन, 16 बल्के ए तै गल्ले, जै परमेशरे योएल नेबेरे ज़िरिये ज़ोरी थी, 17 परमेशर जोते कि, आखरी दिहैइन मां एरू भोलू, अव अपनि आत्मा सेबभी लोकन देइलो, ते तुशशां मट्टां कुइयां भविष्यवाणी केरेलां, ते तुशशे नौजवान दर्शन हेरेले, ते बुढे सुपना हेरेले। 18 बल्के अव तैन दिहैइन मां अपने सेवादार मड्डन ते सेवादार कुआन्शन पुड अपनि आत्मा उतरेलो, ते तैना भविष्यवाणी केरेले। 19 अव अम्बरे मां आजीब-आजीब कम्मां ते ज़मीनी पुड निशान, यानी अग, खून ते कालो तूएरी बिदलार हिरेयेलो। 20 प्रभुएरी दिहाड़ी एजने करां पेइले, दिहाड़ी आंधरो भोइ गानोए, ते चाँदनी खूनेरी ज़ेरि भोनीए, तै अक महान ते खास दिहाड़ी भोनीए। 21 ते ज़ै कोई परमेशरेरू नवं घिन्नेलो तैस मुक्ति मैलेली।” 22 “हे इसाएल्लेरे लोकव, इना गल्लां शुना, यीशु नासरत नगरेरो अक मैन्हु थियो, जै परमेशर तुशशे लेइ भेजोरो थियो, ते एस गल्लारी तसदीक तैसेरे खास चमत्कारां केरे सबूतेई सेई भोचे, जैना परमेशरे तैसेरे ज़िरिये सेई इशशे सामने हिरां, जेन्चरे कि तुस एप्पू भी ज्ञानतथ। 23 जैखन तै परमेशरेरे इंतज़ामेरे पूरे मौके पुड ज्ञानेरे हिसाबे सेई टलुवाव, ते तुसेई तै अधर्मी लोकां केरे हथ्ये कूसे पुड टंगेइतां माराव। 24 पन परमेशरे तै मौतरे सकंजे मरां छुटेइतां जीतो कियो, किजोकि एन भोइ न थियू सकतु, कि तै मौतरे कब्जे मां राए। 25 किजोकि दाऊद मसीहरे बारे मां एन जोते, हेरा, प्रभु हर वक्त मेरे सामने, अव तैन लोकन करां न डरेलो जैना मेरो नुकसान चातन। 26 तांए मेरो दिल बडो खुश भोव, ते अव खुशी सेई जोइलो, बल्के मेरी जान उमीदी सेई जीएली। 27 किजोकि तू मेरे प्राणन पाताले मां राने न देलो, ते न अपने पवित्र मैन्हु शङ्गे देलो! (Hades g86) 28 तैं मीं ज़िन्दगरी बत हेरेवरिए, तू अपने हज़ूरी सेई मीं भरपूर केरेलो।” 29 “हे मेरे ढूलाव, अव कोमारे बुजुर्ग दाऊदरे बारे मां तुसन सेई साफ-साफ जोई सकताई, कि तै मेरी भी जेव, ते दब्बो भी ते तैसेरी कन्न अज़ तगर इशशे सामने मौजूद। 30 तै नबी थियो, ते तै ज्ञानतो थियो, कि परमेशरे तैस सेई वादो कियोरो थियो, ‘अवं तेरी खानदानी मरां अक मैन्हु तैसेरे तखते पुड बिशेलेलो।’ 31 तैनी पेइले भोनेबेली गल्लां ते मसीहरे मुड्डन मरां जीतिं भोनेरे बारे मां बियांन कियेरू थियू, कि न ते पाताले मां राने देलो, ते न अपने पवित्र मैन्हु शङ्गे

देलो! (Hades g86) 32 “एहे यीशु परमेशरे जीतो कियो जेसेरे अस सब गवाह आम। 33 ते हुना तै स्वर्ग मां खास ठेरी यानी परमेशरेरे देइने पासे आए। ते तैने बाजी परमेशरे करां पवित्र आत्मा हासिल की, जेसेरो तैने वादो कियोरो थियो, यीशुए असन पवित्र आत्मा भरपूरी सेई दित्तोरीए, जैन तुस लातथ ते शुन्तथ। 34 किजोकि दाऊद त एप्पू स्वर्ग मां नई जोरो, पन फिर भी तै एप्पू जोते, प्रभु परमेशरे मेरे प्रभु सेई ज़ोवं, मीं सेई साथी राज़ केर। 35 ज़ांतगर अव तेरे दुश्मन तेरे अधीन न केरि। 36 एल्लेरेलेइ, इसाएल्लेरे सारे लोकन पतो लग्गे, कि परमेशरे, यीशु जै तुसेई कूसे पुड चाढो तै प्रभु भी कियो ते मसीह भी कियो।” 37 एना गल्लां शुन्तां तैन बडो एसास भोव कि तैना पापिन, तैखन तैनेई पतरसे ते होरि प्रेरितन सेई ज़ोवं, “हे ढूलाव अस कुन केरम?” 38 पतरसे तैन सेई ज़ोवं, “पापन करां मनफिराथ ते तुसन मरां सारे यीशु मसीहरे नव्वे सेई बपतिस्मो घिन्ना, त परमेशर तुसन माफ़ केरेलो ते पवित्र आत्मा तुसन इनामे मां मैलेली। 39 एल्लेरेलेइ कि ए वादो तुसन त तुशशी औलादी सेई आए ते तैन सेबन्धन सेई जैना दूर-दूर रातन, ते जैन इशशो प्रभु परमेशरे एप्पू कां कुजाते।” 40 पतरसे होरि भी बेडि गल्लां केरि गवाही दित्ती, ते तैन बार-बार ज़ोवं, कि अपनो आप एस टैरी कौमी करां बचाथ। 41 ते तैनेई तैसेरी गल्लां कबूल की, तैनी तैन बपतिस्मो दित्तो, तैस दिहैड़ी लगभग कोई 3000 मैन्हु तैन मां शामिल भोए। 42 एना लोक प्रेरितन करां शिक्षा हासिल केरते थिये, ते संगती रखते थिये, ते साथी रोटी खाते थिये, ते प्रभु भोज मनाते थिये ते प्रार्थना केरने मां मघन रहते थिये। 43 प्रेरितां केरे ज़िरिये सेई बडे चमत्कार ते निशान भोते थिये, ते यरूशलेमेरे सारे लोक डेरि जे। 44 यीशु मसीह पुड विश्वास केरनेबाले सारे अकोट्टे रहते थिये, ते सैरी चीज़न मां एक्की होरि बराबर हिस्सेदार रखते थिये। 45 ते तैना अपनि जेइदात ते माल सबाब बेचतां एक्की होररी ज़रूरतरे मुताबिक रकम बेंटां सेबभी केरि ज़रूरत पूरी केरते थिये। 46 तैना रोज़ अक मन भोइतां मन्दरे मां अकोट्टे भोते थिये, ते घरन मां साथी रोटी खाते थिये ते प्रभु भोज मनाते थिये, ते अकोट्टे भोइतां खुशी सेई खाते थिये। 47 तैना परमेशरेरी तारीफ़ केरते थिये, तैना सैरी केरि नज़री मां रोइ थिये। जैन पापन करां मुक्ति मैलती थी, परमेशर तैन लोकन तैन केरि टोली मां शामिल केरतो थियो।

3 एक्की दिहाड़े पतरस ते यूहन्ना प्रार्थना केरने दीसेरे टूलेइ बजेंइ मन्दरे मांजो च़ल्लोरे थिये। 2 ते मैनेई अक ज़र्मनेरो टोंटो छुइतां आनोरोए थियो, ते तैस मन्दरेरे दारे पुड छडते थिये, जैस दारेरू नवं “रोडू” थियू, ताके अन्तर गाने बालन करां भीख मग्गे। 3 ज़ैखन तैनी पतरस ते यूहन्ना मन्दरे मांजो गांते लाए त तैन करां भीख मग्ने लगे। 4 पतरस ते यूहन्ना तैसेरे पासे खेडोइतां जोने लगे, “इशशे पासे तक।” 5 ते तैस उमीद भोइजेइ कि एन करां किछ मैलेलू, तै तैन केरे पासे तकने लगे। 6 पतरस ज़ोवं, “सोन्नु चाँदी त असन कां अथ्थी नई, पन जैन मीं

कां आए तैन अव तीं देताई, तू यीशु मसीह नैसरेरे नव्वे सेइं खड़ो उठ ते च़ल फिर।” 7 पतरसे ज़ेरो तैसेरो देइनो हथ दलेइतां खड़ो कियो, त तैसेरे पावन मां ते गुडन मां ताकत आई। 8 ते तै तैखने खड़ो भोव, ते च़लने फिरने लगे, ते फिरी छालां मारतो ते परमेशरेरी तारीफ़ केरतो तैन सेइं साथी मन्दरेरे अंगने मां च़लो जेव। 9 ते सेब्बी लोकेई तै च़लतो फिरतो ते परमेशरेरी तारीफ़ केरतो लाव। 10 ते पिशानो ई त तैए, जै मन्दरेरे रोड़े दारे पुड़ बिश्तां भीख मगतो थियो, ते जै चमत्कार एन लोकां केरे सामने भोव, त तैना लोक बड़े हैरान राए। 11 जैखन तै मैन्हु पतरस ते यूहन्ना दलेइतां खड़खड़ो थियो, त सब लोक जैना तैड़ी खड़खड़े थिये, बड़े हैरान भोइतां सुलैमानी अंगने मां देवइतां तैन कां आए। 12 पतरसे एन हेरू त तै लोकन कां एन्चरे खड़ो भोव, ते ज़ोने लगे, “हे इस्राएली लोकव तुस एस गल्ली पुड़ किजो हैरान भोरेथ, ते असन एन्चरे किजो तकने लोरेथ, असेई अपने शक्ति या भक्ति सेइं ए टोटो मैन्हु च़लने फिरनेरे काबल नई बनेवरोए। 13 अब्राहम ते इसहाक ते याकूबेरे परमेशरे ते इश्शे पूर्वजां केरे परमेशर अपने दासे यीशु महिमा दिती, पन तुसेई तै यहूदी लीडरन कां दिती कि तैना तैस मारन। पिलातुसे तै हथरां छडनेरो इरादो कियो, पन तुसेई यीशुएरे इन्कार कियो। 14 तुसेई यीशु अक एरो पवित्र ते धर्मी मैन्हु रद कियो, ते पिलातुसे कां दरखुवास की, कि तै तुश्शे लेइ अक कातली हथरां छडे। 15 तुसेई त ज़िन्दगी देनेबालो मारो, पन अस गवाह आम, कि परमेशरे तै मुड़दन मरां ज़ींतो कियो। 16 तैसेरे नव्वेरी शक्ति एस टोंटे, जै तुश्शे सामने ते जैस तुस ज्ञानतथ शिफा दितोरिये ते ए मैन्हु यीशुएरे नव्वे सेइं ते यीशु पुड़ विश्वास केरने सेइं बिलकुल ठीक भोव, ते ए एण्णु तुश्शे सामने। 17 “हे मेरे दूलाव अव ज्ञानताई कि जैन किछ तुसेई ते तुश्शे लीडरेई यीशु सेइं कियू, तैन तुसेई अनज्ञान भोइतां कियू। किजोकि तुसन न थियो पतो कि तै मसीह आए। 18 पन परमेशरे एना सेरी गल्लां जैना तैनी अपने नेबी केरे ज़िरिये जोरी थी, कि मसीह दुःख उठालो ते मरेलो ते तैनी तैना एन्चरे पूरी की। 19 बस्सा पापन करां मनफिराथ ते परमेशरेरे पासे फिरा ते तै तुश्शे पाप माफ़ केरेलो, ते परमेशरेरी तरफां तुश्शे लेइ परमेशरे तरफां रोड़े दिहाड़े एज्जेले। 20 ते तै मसीह यानी यीशु जै तैनी ठहरावरो आए, तुश्शे लेइ भेजे। 21 पन ज़ांतगर तैना सेरी चीज़ां बहाल न केरे, जैन केरे बारे मां परमेशरे बड़े पेड़ले अपने पवित्र नेबी केरि ज़बानी जोरूए, तांतगर यीशुएरू स्वर्गे मां रानू ज़रूरीए। (aiōn g165) 22 जेन्चरे मूसा एस बारे मां जोरू थियू, प्रभु परमेशर तुश्शे दूलान मरां तुश्शे लेइ मेरो ज़ेरो अक नबी भेजेलो, जैन किछ तै तुसन सेइं जोए, तुस तैसेरी गल शुनथ। 23 पन जै तैस नेबेरी गल न शुनेलो, तै लोकन मरां नाश कियो गालो। 24 ते शमूएल परमेशरेरी गल्लां ज़ोनेबाले करां देइतां पेड़ले तमाम नेबेई इन दिहाड़ां केरे बारे मां शुनावरू। 25 तुस नेबी केरि खानदेनी ते जै करार परमेशरे इश्शे पूर्वजन सेइं

कियोरो थियो, तैस मां तुस सब शामिलथ, परमेशरे अब्राहमे सेइं जोरू थियू, कि तेरे मट्टेरे ज़िरिये सेइं दुनियारी तमाम कौमन बरकत मैलेली। 26 परमेशरे अपनो सेवक मुड़दन मरां ज़ींतो कियो ते पेड़लो तुसन कां भेजे, ताके तुसन तै बरकत दे, कि तुसन मरां हर कोई पापेरी ज़िन्दगी शैरतां परमेशरेरे पासे फिरे।”

4 हेजू पतरस ते यूहन्ना लोकन सेइं गल्लां केरते थिये, त किछ याजक ते मन्दरेरे पेरेहेदार ते किछ सदूकी लोक तैड़ी पुजे। 2 तैना बड़े सेरकोए, कि पतरस ते यूहन्ना लोकन एरी शिक्षा देते कि परमेशरे मरें लोकन ज़ींतो केरेलो, जेन्चरे तैनी यीशु मुड़दन मरां ज़ींतो कियोरोए। 3 तैनेई तैना दुइयोवं दिहेड़ी तगर गिरफ्तार रखवे, किजोकि ते इलोइज़ारो मौको थियो। 4 पन केही लोकेई वचन शुन्तां यीशु पुड़ विश्वास कियो, ते तैन केरि तैधात 5000 मड़द भोइ। 5 होरसां एरू भोवं कि तैन केरे लीडर ते बुजुर्ग ते शास्त्री यरूशलेम नगरे मां जम्हां भोए। 6 हन्ना महायाजक तैड़ी थियो, ते कैफा ते यूहन्ना महायाजक ते सिकन्दर ते खानदेनरे होरे लोक भी तैड़ी थियो। 7 तैनेई पतरस ते यूहन्ना मज़ाटे खड़े किये ते तैन पुच्छू, “तुसेई केसेरे शक्ति या केसेरे अधिकारे सेइं एन कम कियोरूए?” 8 तैखन पतरस पवित्र आत्माई सेइं भरपूर भोइतां तैन एन्चरे सेइं ज़ोने लगे, “हे कौमरे लीडराव ते बुजुर्गव। 9 अगर अज़ असन एल्हेरेलेइ पूछ ताछ की गातीए, कि असां एककी रोड़े कम्मरो जुवाब देम, जैन असेई एककी टोंटे मैनेरे लेइ कमाव ते तैस शिफा दिती। 10 ते तुसन ते सारे इस्राएलिन ए पतो लग्गे, कि ए मैन्हु यीशु मसीह नैसरेरे नव्वेरी शक्ति सेइं बेज़्जोइतां तुश्शे सामने खड़ोए, जै यीशु तुसेई कूसे पुड़ चाढ़ोरो थियो, पन परमेशरे तै मुड़दन मरां ज़ींतो कियोरोए। 11 ए तैए घोड़े, जै तुसेई मिस्त्रैई रद्दी कियोरो थियो, पन तैए घोड़ कूनेरो खास घोड़ भोइ जेव। 12 ते पापां केरि माफ़ी केन्ची होरेरे ज़िरिये सेइं नई, किजोकि अम्बरेरां बुन मैनन् मां कोई होरू दुइयोवं नवं नई दितेरू, जेसेरे ज़िरिये सेइं मुक्ति मैल्ले, सिर्फ़ यीशुएरे नव्वे सेइं मुक्ति आए।” 13 जैखन तैनेई पतरस ते यूहन्नारी दिलेरी हेरी, त तैखन तैन पतो लगे, कि एना त अनपड़ ते मामुली मैन्हु आन ते तैना बड़े हैरान भोए, तैखन तैनेई बुझू कि एना लोक यीशु सेइं साथी राहोरेन। 14 तैनेई पतरस ते यूहन्नारे खलाफ किछ न ज़ोई बटु, एल्हेरेलेइ कि जै मैन्हु बेज़्जोरो थियो, तै मैन्हु तैन सेइं साथी खड़खड़ो थियो। 15 तैखन तैनेई पतरस ते यूहन्ना महासभा करां बेइर नेनेरे लेइ ज़ोवं, ते एण्णु मांमेइं मुशोरो केरने लगे। 16 “असां एन लोकन सेइं कुन केरम? यरूशलेम नगरेरे सब लोक ज्ञानतन कि एन लोकेई अक बड़ो चमत्कार कियोरोए, जेसेरो अस इन्कार न केरि बटम। 17 पन एल्हेरेलेइ अस एन न चाम कि ए गल लोकन मां जादे मुशूर न भोए, रोड़ू त एन्ने कि अस एन धमकेइतां ज़ोम कि अज़ेरे बाद एन नवं घिन्तां केन्ची सेइं गल न केरन।” 18 तैखन तैनेई पतरस ते यूहन्ना अन्तर कुजेइतां हदैयत दिती, “यीशुएरू नवं घिन्तां केन्ची सेइं गल न केरथ, ते न शिक्षा देइयथ।” 19 पन

पतरस ते यूहन्ना तैन जुवाब दितो, “तुस एप्पू ए फैसलो केरा, कुआन्शी भी पतो थियो, ते बाकी होरे पेंडसे एन्तां प्रेरितन दिते। कि कुन ए गल परमेशेरी नज़री मां ठीके, फिरी अस तुश्शी 3 पन पतरसे तैस सेइं ज़ोवं, “हे हनन्याह! शैताने तेरे मने मां गल मन्म कि परमेशेरी? 20 किजोकि एन नई कि जैन किछ ए गल केन्चरे छडी, कि तू पवित्र आत्माई सेइं झूठ ज़ोस, ते असेईं शुनू ते लाहू, ते तैसेरे बारे मां ज़ोतमा।” 21 तैखन तैनेई ज़मीनारे पेंडसन मरां किछ रेख्खी छडस? 4 कुन बेचने करां पतरस ते यूहन्ना धमकेइतां हथरां छडे, द्रासले मां तैना फैसलो पेड़ले ज़मीन तेरी न थी, पन बेचनेरां बाद कुन पेंडसो तेरो न न केरि सके, कि एन सज़ा त देम पन केन्चरे देम, किजोकि भोव? तीं अपने मने मां किजो सोचू? तीं मैन्हु सेइं नई बल्के तमाम लोक ए चमत्कार हेरतां परमेशेरी महिमा केरते थिये। परमेशेरे सेइं झूठ ज़ोरुए।” 5 हनन्याह एन शुनते खिरकी जेव, 22 किजोकि ज़ैस मैन्हु पुड़ शिफ़ा देनेरो चमत्कार हिरावरो थियो, ते तैसेरे प्राण निस्से, ते ज़ैन लोकेई एन शुनू त तैना बड़े डेरि तै 40 सालन करां जादे उमरारो थियो। 23 पतरस ते यूहन्ना जे। 6 तैखन किछ नौजवान आए ते तैनेई तैसेरी लाश कफने तैट्ठां छुटनेरां बाद अपने लोकन कां चले जे, ते ज़ैन किछ प्रधान मां पलेटतां ते बेडरोवं नेइतां देवतां छडी। 7 ट्लेइ चैन्टना पत्ती याजक ते बुजुर्गेई तैन ज़ोरु थियूं, तैन सेइं शुनावं। 24 ज़ैखन तैसेरी कुआन्श आई, ते तैस एस बारे मां कोई पतो न थियो। 8 तैनेई एना गल्लां शुनी त अक भोइतां बड़े ज़ोरे सेइं परमेशेरे कां पतरस तैस पुच्छू, “मीं ज़ो, कुन तुसेईं दुइयेई ज़मीन एत्रे मां प्रार्थना केरने लगे, तीं धरती त कने अम्बर ते समुन्द्रे ते ज़ैन बेचोरी थी?” तैसां ज़ोवं, “हाँ कुल कीमत एत्री मैल्लोरी थी।” किछ एसमां आए बनोरुए। 25 तीं पवित्र आत्मा रे ज़िरिये सेइं 9 पतरसे तैस सेइं ज़ोवं, “प्रभुएरी आत्मा अज़मानेरे लेइ तुस अपने सेवक इश्शे पूर्वज दाऊदेरी ज़िरिये ज़ोरु थियूं, “कि केन्चरे सेइं राज़ी भोए, ते ज़ैन लोकेई तेरो मुन्श दबोरोए, तैन केरे पाव हेर दारे पुड़ आन, ते तैना तीं भी बेडरोवं धिनी गाले।” 10 तै कुआन्श तैखने तल्ले बिछड़ी, ते तैसारे भी प्राण निस्से, ते ज़ैखन नौजवान अन्तर आए त ते कुआन्श मरीं लेइतां ते भी छुइतां तैसारे मुन्शे इलाखोरां देवतां छडी। 11 सैरी यरूशलेमेरी कलीसिया ते एन गल्लां केरे शुन्ने बाले बड़े डेरि जे। 12 प्रेरितां केरे ज़िरिये बड़े चमत्कार ते निशान बांटे भोए, ते सारे विश्वासी अक भोइतां सुलैमानी अंगने मां जम्हां भोते थिये। 13 हालांकी अकोट्टे भोरे थिये कि ज़ैन किछ तू अपनि कुदरतारो इरादे मुताबिक पेड़ले तैनी ठहरावरु थियूं, तैस पुड़ अमल केरमा। 29 होरे लोक तैन केरि बड़ी इज़्ज़त केरते थिये, पन केन्ची हिम्मत न हुनी हे प्रभु, तैन केरि धेमकी शुन, ते अपने दासन इन वरदान दे, आई कि तैन मां शामिल भोन। 14 बड़े मड़देई ते कुआन्शोई कि तेरु बच्चन बेड़ि दिलेरी सेइं लोकन शुनेई बटमा। 30 अपनो विश्वास कियो ते तेन लोकां केरि मेनडली मां शामिल भोए, ते हथ अग्रोवं रख, ते अपने पवित्र सेवक यीशुएरे नव्वे सेइं शिफ़ा परमेशर मन्ने बालां केरि तैधात बद्धती चली। 15 ज़ैन प्रेरितेई दे, ते चमत्कार ते निशान हिरा।” 31 ते ज़ैखन तैनेई प्रार्थना किंयूं तैसेरो नीतीजो ई भोव, कि लोक बिमारन खट्टन पुड़ ते की, त ज़ैस ठैरी तैना अकोट्टे जम्हां थिये, त तै ठार हिल्ली, ते पिठ्ठी पुड़ छुइतां सड़की मां रखते थिये, कि पतरस ज़ैखन तैस तैना सब पवित्र आत्माई सेइं भरोए, ते परमेशेरे बच्चन बेड़ि बत्तां एज्जे त तैसेरी छाव त तैन पुड़ पे। 16 यरूशलेम नगरेरे चेब्रे दिलेरी सेइं शुनाने लगे। 32 विश्वास केरनेबालां केरि मण्डली पासना इल्लोवां केरे बड़े लोक बिमारन ते ज़ैन पुड़ भूतां केरो अक मन ते अक जान थी, कोई भी एरो न थियो ज़ै अपनो माल सैयो, एप्पू सेइं साथी आनते थिये, ते तैना सब बेज़्ज़ोते थिये। अपनो समझतो भोए, बल्के होरन भी सैरी चीज़न मां शामल 17 तैखन महायाजक ते तैसेरे साथी ज़ैना सदूकी केरे फिरके मरां रखते थिये। 18 ते प्रेरित बेड़ि शक्ति सेइं प्रभु यीशुएरे मुड़दन मरां थिये, तैन बड़ी जलन भोने लगी ते तैना प्रेरितां केरे खलाफ खडे जीते भोनेरी गवाही देते थिये, ते तैन पुड़ परमेशेरो बड़ो अनुग्रह थियो। 19 पन 34 तैन मरां कोई भी गरीब न थियो, किजोकि ज़मीनी केर तैना दार खोलतां प्रेरितन कां जेव, केरे त घरां केरे मालिक तैन बेचतां तैन केरि कीमत प्रेरितन कां आनते थिये। 35 ते तैना तै रकम प्रेरितन देते थिये, ते हर केन्ची ते तैना तै रकम प्रेरितन देते थिये, ते हर केन्ची तैसेरी ज़रुरतारे मुताबिक बेटतां देते थिये। 36 यूसुफ नव्वेरो अक लेवी थियो, ज़ै साइप्रसरो रानेबालो थियो, ते प्रेरितेई तैसरु अंगने मां खडे भोइतां हमेशारे ज़िन्दगरे बारे मां लोकन बिस्तार नव बरनबास रखेरु थियूं, (जेसेरो मतलबे शैनतरु मट्टू)। 37 ते तैनेई महासभा ते सब यहूदी केरे सारे बुजुर्ग कुजाए, ते तैनेई तैनी अपनू ऊडार बेचू, ते कीमत एन्तां प्रेरितन दित्ती।

5 हनन्याह नव्वेरो अक मैन्हु थियो, ते तैसेरी कुआन्शरु नव सफीरा थियूं ते तैनेई अपनि जेईदातरो किछ हिस्सो बेत्री छुड्डो। 2 ते कीमती मरां किछ पेंडसे एप्पू कां रखे, जेसेरो तैसेरी

पेरहेदार भी असन दारे मां खड़खड़े मैल्ले, पन ज़ैखन असेई न की, बल्के रोज़ मन्दरे मां गेइतां ते घर-घर गेइतां लगातार कैदखानो खोल्लो त अन्तर कोई न मैल्लो।” 24 एना गल्लां शुन्तां मन्दरे पहेरेदारां केरो प्रधान, प्रधान याजक ते सारे लोक हैरान रेइजे, ते तैन केरि फिक्री मां पे कि हुनी कुन भोनूए! 25 तैखन केन्वे एइतां ज़ोवं, “तैना मैन्हु जैना तुसेई कैदे मां छडोरे थिये, तैना मन्दरे मां खड़े भोइतां शिक्षा देने लगोरिना।” 26 तैखन मन्दरे पहेरेदारां केरे प्रधान अपने सिपाही साथी घिन्तां जे, ते प्रेरित कुजेइतां आने पन ज़बरदस्ती नई, किजोकि तैना लोकन करां डरते थिये, कि एरू न भोए एना असन घोड़ेई बान। 27 तैनेई प्रेरित एन्तां महासभा मां पैश किये, ते महायाजके तैन पुच्छू। 28 “असेई तुसन ठाकेरू थियूं, कि यीशुएरू नवं घिन्तां शिक्षा न देइयथ? फिरी भी हेरा, तुसेई सारे यरूशलेम नगरे मां अपनि शिक्षा फैलाई, ते तैस मैनेरो खूनेरो दोष असन पुड़ लानो चातथा।” 29 पतरस ते होरि प्रेरितेई जुवाब दितो, “असन मैन्हु केरो हुकम मन्नेरे बजाहे परमेशेरो हुकम मनो जादे ज़रूरीए। 30 इश्शे दादे-पड़दादां केरे परमेशेरे ए यीशु मुड़न मरां जीतो कियो, जै तुसेई क्रूसे पुड़ चढ़तां मारो। 31 तैए परमेशेरे, प्रभु ते मुक्ति देनेबालो बनेइतां अपने देइने पासे बिशालो, ताके ते इस्राएलिन मन फिराने ते पापां केरि मैफारो मौको दे। 32 असां एन गल्लां केरे गवाह आम, ते पवित्र आत्मा भी, जै परमेशेरे तैनी अपनो हुकम मन्ने बालन दितोरीए।” 33 ज़ैखन तैनेई एन शुनू त फुकोई जे, ते तैन केरि मर्जी लगी ज़ोने कि एन मैरी छडम। 34 पन अक फरीसी मैन्हु जेसेरू नवं गमलीएल थियूं, ते जै शास्त्री भी थियो, ते जै सेब्भी लोकन मां इज़्जतदार थियो, तैनी महासभा मां खड़े भोइतां हुकम दितो कि एना मैन्हु थोड़े चिरे बेइर भेजा। 35 तै एन ज़ोने लगे, “हे इस्राएली लोकव तुस ज़ैन किछ एन मैन्न सेइं केरनू चातथ तैन रोइचारे सोचा। 36 किजोकि थोड़े चिरे पेइले थियूदास इन जोइतां खड़ो भोरो थियो, ते ज़ोतो थियो, अवं भी किछ आई, ते लगभग 400 मैन्हु तैस सेइं मिले, पन तै मारो जेव, ते तैसेरे मन्नेबाले सारे तितर-बितर भोइ जे, ते तैन केरो नामो निशान मिटी जेव। 37 तैसेरां पत्नी मैन्हु केरे गिनतरे वक्ते गलील इलाकेरो यहूदा निसोरो थियो, ते तैनी काई लोक अपने पासे खिचोरे थिये, तै भी मारो जेव, ते तैसेरे जेजे साथी थिये, सब तितर-बितर भोइ जे। 38 हुनी अवं तुसन एन्ने ज़ोताई कि एन मैन्न करां दूर भोथ, ते एन गाने देथ, किजोकि अगर एना चमत्कार, मैन्हु केरि तरफां भोले त एप्पू खतम भोइ गानेन। 39 पन अगर एना कम्मां परमेशेरी तरफां भोलां, त तुस एन मैन्हु केरू किछ न बिगैडी सकत, ते तुस परमेशेरे खलाफ लइनेबाले भोले, तैनेई तैसेरी सल्लाह मन्नी।” 40 ते प्रेरित अन्तर कुजेइतां तैन डंडेई बावैहीतां तैन ज़ोवं, कि अजेरां बाद यीशुएरे नंवे सेइं कोई गल न केरथ, ते तैना हथरां छडे। 41 प्रेरित महासभा मरां चले जे, तैना एस गल्ली पुड़ खुशी थिये, कि असां यीशुएरे नंवे सेइं बेइजत भोनेरे काबल त भोए। 42 तैनेई शिक्षा देनी बंद

न की, बल्के रोज़ मन्दरे मां गेइतां ते घर-घर गेइतां लगातार खुशखबरी शुनाते राए कि यीशु ही मसीह आए।

6 ई गल तेइसेरीए ज़ेइस चले केरि गिनती बधने लगोरी थी, यूनानी भाषा ज़ोनेबालो यहूदी चेलेई इब्रानी भाषा ज़ोनेबाले यहूदी चेलां केरि शकैइत केरने लगे, कि हर दिहैदरे सेवाई मां विधवां केरि खबर न की गाए। 2 एन शुन्तां 12 प्रेरितेई सारे यरूशलेमेरे सारे विश्वासी लोक (चेले) अकोट्टे किये, ते ज़ोवं, “इश्शे लेइ एन मुनासब नई कि अस परमेशेरी वचनेरू प्रचार केरनो छेडतां खाने पीनेरी सेवाई मां लगम 3 एल्हेरेलेइ हे मेरे ढूलाव, अपने लोकन मरां सत भलमानस मैन्हु चुना, ज़ैना पवित्र आत्माई सेइं भरपूर ते अक्लमन्द भोन, ताके आस तैन एस कम्मरी ज़िमेबारी सोंफम।” 4 पन अस त प्रार्थना केरने ते बच्चन शुनानेरी ते शिक्षा देनेरी सेवाई मां लग्गोरो रानेम। 5 ए गल सारे लोकन पसंद आई, ते तैनेई अक स्तिफनुस जै विश्वास ते पवित्र आत्माई सेइं भरपूर थियो चुनो, ते होरे ज़ैना चुने तैन केरां नव्वां इना आन, फिलिप्पुस प्रुखरुस, नीकानोर, तीमोन, परमिनास ते नीकुलाउस जै अन्ताकिया नगरेरो रानेबालो थियो, ते यहूदी फिरके मां ओरो थियो। 6 ते तैना प्रेरितन कां हाज़र किये, ते तैन केरे लेइ तैनेई प्रार्थना की, ते तैन पुड़ हथ रखे। 7 एन्चरे सेइं परमेशेरेरू बच्चन फैलतु जेवं, ते यरूशलेम नगरे मां चेलां केरि गिनती बढ़ती जेई, ते याजकां केरि अक टोली विश्वासे मां आई ते मसीही भोइजेइ। 8 स्तिफनुस अनुग्रह ते शेक्ति सेइं भरपूर भोइतां लोकन चमत्कार ते निशान हिरातो थियो। 9 आज़ाद भोरे यहूदी लोकां केरू अक प्रार्थना घर थियूं, कुरेनी ते सिकन्दरिया ते किलिकियारे ते आसियारे किछ लोकन मरां किछ स्तिफनुसे सेइं बेंस केरने लगे। 10 तैना तैन गल्लां केरो जुवाब न देइ बटे, ज़ैना पवित्र आत्मा तैस ज़ोनेरी समझ दित्ती। 11 तैखन तैनेई किछ लोक शिखाले, कि तुस झूठ जोइयथ कि, “असेई स्तिफनुस मूसेरे त कने परमेशेरे खलाफ तुहीन केरते शुनोरोए।” 12 तैखन तैनेई किछ लोक, बुजुर्ग ते शास्त्री स्तिफनुसेरां खलाफ बमकाए ते तै टूलेइतां महासभा मां पैश कियो। 13 तैनेई बड़े झूठे गवाह पैश किये, “ते तैनेई गवाही दित्ती कि ए मैन्हु पवित्र ठारारे ते मूसेरे कानूनेरे खलाफ तुहीन केरने करां बाज़ न एज्जे। 14 ते असेई एस मैन्हु करां एन भी ज़ोतू शुनू, कि यीशु नासरी इस मन्दरे डोलेलो, ते तैना रसमां ज़ैना मूसा नेबे दितोरिन बदलेलो।” 15 तैखन लोक ज़ैना महासभा मां बिश्शोरे थी, तैसेरे पासे तक्कू कि तैसेरू तुतर स्वर्गदूतरे ज़ेरू लेइहोतू थियूं।

7 तैखन महायाजके स्तिफनुसे सवाल पुछो, “कुन एना इलज़ाम सच्चे आन?” 2 तैनी ज़ोवं, “हे ढूलाव ते मेरे बुजुर्गाव, मेरी गल शुना, इश्शो पूर्वज अब्राहमे हारान नगरे मां बसने करां पेइलो मेसोपोटामिया इलाके मां थियो, ते महिमा बाले परमेशेरे तैस दर्शन दितू 3 ते परमेशेरे तैस सेइं ज़ोवं, अपनो देश त अपने रिशतेदारन शैरतां तैस मुलखे मां गा, जै

अवं तीं हरेइलो। 4 तांए तै कसिदी केरे मुलखे शैरतां हाराने मां घरे मां छेपतां पलतो राव। 21 पन जैखन जादे ज़िरे तगर छुपेई बसोरो थियो, तैसेरे बाजरे मरनेरां पत्ती परमेशरे तै तैस मुलखे न बटे, तै दरियाए मां शारो त फ़िरौनेरे कुइयां तै नेव ते अपने मां आनो ज़ैस मां अज़ तुस बसोरेथ। 5 पन परमेशरे तैस इड़ी मट्टेरो ज़ेरो पालो। 22 मूसा नबी मिस्री केरि सैरी शिखारो ते किछ भी जेइदात न दिती, बल्के पाव रखने जो भी ज़मीन तैन केरि सैरी गल्लां केरि वाकफित भोइजेइ, ते गलबाती ते न दिती, पन वादो ज़रूर कियो कि ई ज़मीन अवं तीं ते तेरी कम्मे मां मज़बूत थियो।” 23 “जैखन मूसा नबी 40 सालां केरो औलादी कब्जे मां देलो हालांकी तेइस अब्राहमे कोई औलाद न भोव, त तैसेरे मने मां ए गल आई, कि अवं अपने इस्राएली दूलां थी। 6 परमेशरे इन भी ज़ोवं, तेरी औलाद एककी बखले देशे मां केरो हाल पतो केरि। 24 मूसा एककी इस्राएली मैन्हु पुड़ जुलम परदेशी भोली, तैना तैन गुलाम बनाले, ते 400 सालन तगर तैन भोंतो लाहू त तैनी ते बचाव, ते तै ज़ालम मिस्री मैरतां ज़ैस पुड़ दुख देले। 25 तैनी सोचू, कि तैसेरे दूलां समझेले, कि परमेशरे तैसेरे ज़िरिये सेइं तैन मिस्री केरि गुलामी करां तैन मुक्ति देलो, पन तैनेई न समझू। 26 मूसा होरसां दूई इस्त्राएली एप्पू मांमेइ लइते लाए, ते तैन समझानेरी कोशिश की, ते मूसा तैन ज़ोवं, हे जवानव तुस त एप्पू मांमेइ दूला भोतथ, ते तुस किजो एककी होरि पुड़ जुलम केरतथ? 27 पन ज़ै मैन्हु अपने पड़ोसी पुड़ जुलम केरने लोरो थियो, त तैनी मैने मूसा जो धमकेइतां ज़ोवं, तू केनि असन पुड़ हुकूमत केरनेबालो या हाकिम बनेवरोस? 28 जेन्चरे तीं तै मिसेरो रानेबालो हीज मारोरो थियो, तेन्चरे तू अज़ मीं मारने चातस? 29 ए गल शुनते मूसा तैदां नशो, ते मिद्यान मुलखे मां परदेशी भोइतां राने लगे, ते तैड़ी तैसेरां दूई मट्टां पैदा भुआं। 30 40 साल मिद्यान मुलखे मां रानेरे बाद तैस सीनै पहाड़ेरे सुनसान ठारी मां एककी झल्लेरी अगगी स्वर्गदूत लाव, ते परमेशरे स्वर्गदूतेरे ज़िरिये तैस सेइं गल की। 31 मूसा झल्लेरी अगगी लेइतां कि झल फुकोने नई लोरू त तै हारन रेइ जेव, ते ज़ैखन ते हेरनेरे लेइ नेइ जेव त तैनी प्रभुएरी आवाज़ शुनी। 32 “अवं तेरे दादे-पड़दादां केरो यानी अब्राहम, इसहाक ते याकूबेरो परमेशर आई,” तैखन मूसा डेरतां कम्बने लगे, इन तगर कि तैस हेरनेरी हिम्मत न भोइ। 33 तैखन प्रभुए तैस जो ज़ोवं, अपने पांवां केरी जुटी खोल्ल, किजोकि ज़ैस ठैरी तू खड़ोस तै पवित्र ठारे। 34 मीं मिस्र मुलखे मां अपने लोकां केरि बुरी हालत हेरी, मीं तैन केरू कर लानू ते लेरां शुनोरिन, एल्हेरेलेइ अवं तैन छुटानेरे लेइ उन्डो ओरोई, हुनी एई अवं तीं फिरी वापस मिस्र मुलखे जो भेजताई। 35 “एहे तै मूसो आए जेसेरो इस्राएली लोकेई पेइलो इन्कार कियोरो थियो, कि तू केनि असन पुड़ हुकूमत केरनेबालो या हाकिम बनेवरोस, ते एहे तै मूसा परमेशरे अपने स्वर्गदूतेरे ज़िरिये सेइं ज़ै तैनी बलते ड़ैल्लोए मां लाहोरो थियो, ते छुटानेबालो बनेइतां भेजो। 36 एनी मैने मिस्र मुलखे ते लाल समुन्द्रे मां 40 सालन तगर सुनसान ठैरी मां चमत्कार ते निशान हिराए। 37 एनी मूसा इस्राएली लोकन सेइं ज़ोरू थियूं, परमेशर तुशे दूलान मरां तुशे लेइ अक मेरो ज़ेरो नबी खडो केरेलो। 38 एहे मूसा, इश्शे दादा पड़दादां केरो नबी राव ज़ैखन तैन सुनसान ठारी मां अकोठे भोरोए, परमेशरे एककी स्वर्गदूत सीनै पहाड़े पुड़ मूसे कानून दित्तो ते तैनी इश्शे दादे पड़दादन तैन कानून दित्तो, मूसे ज़िन्दगी देनेबाले वचन मैल्ले, तैनी तैना असन तगर पुजाए। 39 पन इश्शे दादे-

पड़दादेई तैसेरो हुक्म न मन्नो चाव, बल्के इकारार कियो, ते तैना मिस्र मुलखेरे जो वापस गानू चाते थिये। 40 तैनेई मूसेरे द्वालाए हारूने सेइं ज़ोवं, तू इश्शे लेइ अक देबतो बना, ज़ै असन अग्री-अग्री मिस्र मुलखे जो चले, किजोकि अस न ज़ानम कि मूसा ज़ैनी असां मिस्र मुलखे मरां केढतां आनोरेम, तैस कुन भोवं? 41 तैस वक्ते तैनेई बछड़ेरी अक मूरत बनाई, ते तैस कां बलिदान च़ाढू, ते अपने हथ्थां केरे बनेवरी मूरती कां बड़ी खुशी मनाने लाए। 42 एल्हेरेलेइ परमेशेरे तैन करां अपनू तुतर फिराव, ते तैना दिहाड़ेरी ते ज़ैदनरे ते अम्बरेरे तारां केरि ईश्वरेरे रूपे मां तैन केरि आराधना केरनेरे लेइ शारे, ज़ेन्चरे नेबी केरि किताबी मां लिखोरूपे, हे इस्राएली लोकव, कुन तुस 40 सालन तगर सुनसान ठेरी मां जानवरां केरू बलिदान ते होरू बलिदान मेरे लेइ केरते राए? 43 बल्के तुसेई एप्पू सेइं साथी मोलेक देबतेरी मूरती ते रिफान देबतेरे तारे छुइतां च़लते थिये, एना तैना मूरतिन ज़ैन कां तुस मथ्यो टेकते थिये, एल्हेरेलेइ अवं तुसन बाबेले करां भी दूर बसेइलो।” 44 “सुनसान ठारी मां इश्शे दादन पड़दादन कां गवाहेरो तेम्बु थियो, परमेशेरे तै ठहराव ते तैनी मूसा सेइं ज़ोवं, ज़ेन्चरे तीं लोरूपे तैसेरे मुताबिक बना। 45 बड़े सालना बाद तैए तेम्बु इश्शे दादे-पड़दादेई यहोशू सेइं साथी इड़ी आनो, ज़ैस वक्ते तैनेई गैर कौमन पुड़ अधिकार हासिल कियो, ज़ैना परमेशेरे इश्शे दादे-पड़दादां केरे सामने कढे, ते तै तेम्बु दाऊद राज़ेरे वक्ते तगर राव। 46 दाऊदे पुड़ परमेशेरे अनुग्रह कियो, ते तैनी मिनत की, कि अवं याकूबेरे परमेशेरे लेइ अक घर बनेइं। 47 पन तैसेरे मठे सुलेमाने तैसेरेलेइ मन्दर बनाव। 48 पन परमप्रधान परमेशर हथ्थां केरे बनेवरे मन्दरन मां न राए, ज़ेन्चरे यशायाह नेबेरे किताबी मां लिखोरूपे, 49 प्रभु ज़ोते, स्वर्ग मेरो तखते, ते ज़मीन मेरे पांवां केरि चौकीए, तुस फिरी मेरे लेइ केरू ज़ेरू मन्दर बनाले? ते मेरे आराम केरनेरी ठार केरही ज़ेरि भोली? 50 कुन मीं एप्पू सैरी चीज़ां नई बनेवरी? 51 “हे ढीठ लोकव, तुस तैसेरी शुन्नी ते मन्नी न चाथ, तुस पवित्र आत्माही हमेशा खलाफत केरतथा। ज़ेन्चरे तुश्शे दादे-पड़दादे केरते थिये, तुस भी तेन्चरे केरतथा। 52 नेबन मरां को तुश्शे दादे-पड़दादेई नई स्तेवरो? ज़ैनेई तैस एजनेबाले मसीहरे बारे मां ज़ोवं ज़ै धर्मी आए, ते ज़ैखन मसीह अव ते तुसेईं धोखे सेइं तै दलुवेइतां मारो। 53 तुसन स्वर्गदूतन करां मूसेरे कानून त मैल्लो, पन तैस पुड़ अमल न कियूं।” 54 ज़ैखन तैनेई एना गल्लां शुनी त यहूदी लीडर फुकोई जे, ते स्तिफनुसे जो दंत लगे च़ापने। 55 पन तैनी पवित्र आत्माई सेइं भेरोइतां अम्बरेरे पासे तक्कू, ते तैनी परमेशेरी महिमा ते यीशु परमेशेरे देइने पासे खड़खड़ो लाव। 56 तैनी ज़ोवं, “हेरा, अवं स्वर्ग खुल्लू लाताई, ते मैनेरे मठे परमेशेरे देइने पासे खड़खड़ो लाताई।” 57 एन शुन्तां तैना ज़ोरे सेइं चिन्डां मारने लगे, ते अक भोइतां सेब्भेई तैस पुड़ हमलो कियो। 58 ते तै दीलतां यरूशलेम नगर करां बेइर नीयो ते तैस जो घोड़ेई बाने लगे ते तै मारो, तैखन तैस पुड़ दोष लाने बालेई

अपने चोगे खोलतां शाऊल नव्वेरे एककी मैन्हु कां रेखतां छुट्टे। 59 ते ज़ैखन तैना स्तिफनुसे जो घोड़ेई बाने लगगोरो थिये, ते तै स्तिफनुस इन ज़ोइतां प्रार्थना केरने लगे, “हे प्रभु यीशु, मेरी आत्मा कबूल केर। 60 फिरी तैनी ज़ैधू केरे बारे बिश्तां ज़ोरे सेइं ज़ोवं, ‘हे प्रभु एन इस पापेरो दोषी न बनेइयां।’” एन ज़ोनेरां पत्ती तैनी प्राण दित्ते।

8 शाऊल तैसेरी मौती सेइं राज़ी थियो। तैस्से दिहाड़े यरूशलेम नगरेरे कलीसियाई पुड़ जुलम भोने लाव ते प्रेरितां केरे अलावा सारे लोक यहूदिया ते सामरियारे इलाकन मांजो तितर-बितर भोए। 2 किछ परमेशेरे भक्त मैनेई स्तिफनुस नेइतां देबतां छुट्टो, ते तैसेरे मरने पुड़ बड़ो शोग कियो। 3 पन शाऊल कलीसियाई सताने लोरो थियो, ते तै घर-घर गातो थियो, ते विश्वासी मड़दन ते कुआन्शन बेइरोवं घसीटतो थियो, ते कैद केरतां छुडतो थियो। 4 पन ज़ैना विश्वासी तितर-बितर भोते थिये तैना खुशखबरी शुनाते च़ले। 5 ते फिलिप्पुस सामरियारे एककी नगर मां गेइतां मसीहेरो प्रचार केरने लगे। 6 ज़ैना गल्लां तैन लोकेई फिलिप्पुसेरी करां शुनी, ते ज़ैना निशान ते हिरातो थियो, तैन हेरी-हेरी, तैनेई अक भोइतां मन लाव। 7 ज़ैखन फिलिप्पुसे हुक्म दितो, त बड़े लोकन मरां भूतां चिन्डां मैरतां निस्सी जेआं, ते बड़े लोक अधरंगी ते टोंटे बेइज़ोइ जे। 8 ते तैन केरे वजाई सेइं नगरेरे बड़े लोक खुश भोइजेइ। 9 शमौन नव्वेरे एककी मैने सामरियारे नगर मां सारे लोक अपने जैदेई सेइं हैरान कियोरे थिये, ते अपने आपे बड़ो खास मैन्हु बनातो थियो। 10 निक्के बड़े सब तैसेरे पासे भोइतां ज़ोने लगे, “ए मैन्हु परमेशेरी तै शक्ति ज़ैस ज़ो महान ज़ोतन।” 11 तैनी अपने जैदू सेइं बड़े च़िरेरां देंते सब हैरान कियोरे थिये, एल्हेरेलेइ तैना लोक तैसेरी बड़ी इज़्ज़त केरते थिये। 12 पन ज़ैखन फिलिप्पुसे परमेशेरे राज़ेरे ते यीशु मसीहेरी खुशखबरी प्रचार की त लोकेई विश्वास कियो, ते मड़देईं कुआन्शेईं बपतिस्मो नेव। 13 तैखन शमौने भी फिलिप्पुसेरे प्रचारे पुड़ विश्वास कियो, ते बपतिस्मो नेइतां फिलिप्पुसे सेइं साथी राने लगे ते तै बड़े चमत्कार ते निशान हेरतां हैरान रेइ जेव। 14 ज़ैखन यरूशलेम नगरे मां प्रेरितेईं शुनू कि सामरियारे लोकेई परमेशेरू बचचन कबूल कियोरूपे ते तैनेई पतरस त यूहन्ना तैन कां भेजे। 15 ज़ैखन तैना तैड़ी पुजे त तैनेई तैन लोकां केरे लेइ प्रार्थना की, कि एन पुड़ पवित्र आत्मा उतरे। 16 एल्हेरेलेइ कि तैन पुड़ पवित्र आत्मा हेजून न थी उतरोरी, तैनेई सिर्फ प्रभु यीशु मसीहेरे नव्वे सेइं बपतिस्मो निहीयोरो थियो। 17 तैखन यूहन्ना ते पतरसे तैन पुड़ हथ रेखतां प्रार्थना की, ते तैन भी पवित्र आत्मा उतरी। 18 ज़ैखन शमौने हेरू कि प्रेरितां केरे हथ रखने सेइं पवित्र आत्मा उतरते, त शमौने पेंइसे एन्तां प्रेरितन कां पैश कियो। 19 ते शमौन ज़ोने लगे, “मीं भी शक्ति देथ, कि अवं भी ज़ैस पुड़ हथ रेख्खी त तैस पुड़ पवित्र आत्मा उतरे।” 20 पतरसे तैस सेइं ज़ोवं, “तेरे पेइंसे तीं सेइं साथी गर्क भोन, किजोकि तू पेंइसन सेइं परमेशेरू दान घिन्नु

चातस। 21 एस सेवाई मां तेरो कोई भी हिस्सो नई किजोकि तेरो मन परमेशरे कां साफ नई। 22 तू अपनि इस बुरेई करां मनफिरा, ते प्रभु कां प्रार्थना केर, शैइद प्रभु तेरी इस बुरे खियाले माफ केरे। 23 मनफिरा अवं हेरताई कि तू बडे जलनी ते पापेरी गुलैमी मां आस।” 24 तैखन शमौने जुवाब दित्तो, “मेरे लेइ प्रभु कां प्रार्थना केरा, कि जैन किछ तुसेई ज़ोरूप, तैन मीं पुड़ न एज्जे।” 25 ते पतरस ते यूहन्ना गवाही देइतां ते प्रभु यीशुएरू वचन शुनेइतां यरूशलेम नगरे मां वापस आए, ते एइते बारे सामरी लोकां केरे बडे इलॉवन मां खुशखबरी शुनाई। 26 फिरी एरू भोवं कि परमेशरे एक्की स्वर्गदूते फिलिप्पुसे सेइं ज़ोवं, “उठ ते दक्षिणरे बत्तां गा, जै यरूशलेम नगरेरां गाज़ा नगरे जो गातीए। ई रेगिस्तानी बत आए।” 27 तै उठो ते चलो जेव, ते बत्ती मां तैस अक कूश मुलखेरो खोजो मैल्लो, जै कूशी केरि रानी कन्दाकारो खज़ानची थियो, तै आराधना केरने यरूशलेम नगरे मां ओरो थियो। 28 तै अपने रथे पुड़ चेढ़तां अपने मुलखे जो वापस ओरो थियो, ते यशायाह नेबेरी किताब ज़ोरे-ज़ोरे सेइं पढ़ने लगगोरो थियो। 29 पवित्र आत्मा फिलिप्पुसे सेइं ज़ोवं, “नेड़े गेइतां रथे सेइं साथी च़ल।” 30 फिलिप्पुस देवइतां रथे कां नेड़े पुजो, त तैस करां यशायाह नेबेरी किताब पढ़ती शुनी, ते तैस पुच्छू, “तू जैन पढ़ने लोरोस कुन तैन समझतस?” 31 तैनी ज़ोवं, “ज़ां तगर कोई मीं न समझाए त अवं केन्चरे सेमझी?” ते तैनी फिलिप्पुसे कां मिनत की, कि एई रथे पुड़ बिश। 32 पवित्रशास्त्रे मरां जैन तै पढ़ने लगगोरो थियो, त तैन इन थियू, “तैनेई तै भैडारो ज़ेरो मारने जो नीयो, ज़ेन्चरे गबडू अपनि उन्ना बरधाने बालां केरे सामने चुप राते, तेन्चरे तैनी भी अपनू आशी न खोल्लू।” 33 तै घटया समझो जेव ते तैस कोई इन्साफ न मैल्लो, ते कोई भी तैसेरे वंशेरे बारे मां न ज़ोई सके, किजोकि धेरती पुड़ तैसेरे वंश भोने करां तैस मारतन। 34 खोजे फिलिप्पुसे पुच्छू, “अवं तीं कां मिनत केरतां, मीं सेइं ज़ो कि ए नबी कसेरे बारे मां ज़ोते, अपने या होरि केन्चरे बारे मां ज़ोते?” 35 तैखन फिलिप्पुसे ज़ोनू शुरू कियू, तैनी पवित्रशास्त्रे करां शुरू केरतां यीशुएरो खुशखबरी शुनाई। खोजे तैना गल्लां शुनी ते विश्वास कियो। 36 बत्तां च़लते-च़लते तैना एक्की तालाबे कां पुजे, तैखन खोजे ज़ोवं, “इड़ी तालाब आए, हुनी मीं बपतिस्मो नेने करां कौन रोकी सकते?” 37 फिलिप्पुसे ज़ोवं, “अगर तू पूरे दिले सेइं विश्वास केरतस त बपतिस्मो नेही सकतस,” तैनी जुवाब दित्तो, “अवं विश्वास केरताई कि यीशु ही परमेशरेरू मट्टूए।” 38 फिरी तैनी रथ रोकनेरे लेइ हुक्म दित्तो, ते खोजो ते फिलिप्पुस दुइये तालाबे मां जे, ते फिलिप्पुसे तैस बपतिस्मो दित्तो। 39 जैखन तैना पैनी मरां बेइर निस्से त प्रभुएरी पवित्र आत्मा फिलिप्पुस तैट्ठां नेव, ते खोजे तै फिरी न लाव, परमेशरे तै बज़ाव ते तै बड़ी खुशी सेइं वापस अपने मुलखे जो जेव। 40 ते फिलिप्पुस अशदोदे मांमेइं निसतो च़लतो सारे इलॉवन मां खुशखबरी शुनातो कैसरिया मां पुजो।

9 शाऊल प्रभुएरे चेलन धमकाने ते मारने मां मघन थियो, ते तै महायाजके कां जेव। 2 ते तैस करां दमिश्क नगरेरे प्रार्थना घरां केरे लेइ चिट्ठी मेग्गी, कि चाए कोई मडद भोए या कुआन्श जै यीशु पत्ती च़लने बालो भोए, तैस टलेइतां यरूशलेम नगरे मां आने। 3 जैखन ते च़लतो-च़लतो दमिश्क नगरेरे नेड़े पुजो, त अचानक अम्बरेरां लौ आई ते तैसेरे चेव्रे पासन चमकने लगी। 4 ते शाऊल ज़मीनी पुड़ खिरको, ते तैस प्रभुएरी आवाज़ आई, “हे शाऊल, हे शाऊल तू मीं किजो स्तातस?” 5 शाऊले एन पुच्छू, “हे प्रभु, तू कौन आस?” तैनी ज़ोवं, “अवं यीशु आई, जैस तू सतातस। 6 हुनी उठ ते नगरे मां गा, तैड़ी तीं सेइं ज़ोवं गालू, कि तीं कुन केरनूए।” 7 जैना लोक तैस सेइं साथी थिये, तैना चुपचारे रेइजे, तैन आवाज़ त शुनोती थी, पन लेइहोतू किछ भी न थियू। 8 तैखन शाऊल ज़मीनी पुड़ां खडे उठो, त तैनी अपनि एछ्छी घैड़ी त तैस किछ भी न लगू लेइहोने, ते तै तैसेरे सैथेई हथेरां टलेइतां दमिश्क नगरे मां पुजाव। 9 ते तैनी टलाई दिहाइन तगर न लेई बटू, ते न तैनी किछ खाव ते पिव। 10 दमिश्क नगरे मां यीशुएरो अक चेलो रातो थियो, प्रभु यीशुए तैस दर्शन देइतां ज़ोवं, “हे हनन्याह!” तैनी ज़ोवं, “हाँ प्रभु ज़ो।” 11 तैखन प्रभुए तैस जो ज़ोवं, “उस गेली मां गा जैस जो ‘सिद्धी’ ज़ोतन, ते यहूदारे घरे गा तैड़ी शाऊल नव्वेरो अक मैनुए, जै तरसुस नगरेरो रानेबालोए, तू तैसेरे बारे मां पुछां, किजोकि हेरा तै प्रार्थना केरने लोरोए। 12 तैनी हनन्याह नव्वेरो अक मैनुए अन्तर एइतो लाव, ते एप्पू पुड़ हथ रखतो लाहोरोए कि तै अपनि एछ्छेई सेइं फिरी लाए।” 13 हनन्याह जुवाब दित्तो, “हे प्रभु, मीं एस मैनेरे बारे मां लोकन करां बेड़ि गल्लां केरती शुनोरिन, ते एन भी कि एनी तेरे लोकन सेइं यरूशलेम नगरे मां कुन-कुन बुरू कियोरूए। 14 एस प्रधान याजकन करां अधिकार मैलोरोए, कि इड़ी भी जैना लोक तीं पुड़ विश्वास केरतन, तैन गिरफ्तार केरतां यरूशलेम नगरे जो ने।” 15 पन प्रभुए तैस सेइं ज़ोवं, “तू गा किजोकि मीं तै मैनु चुनोरोए, कि तै गैर कौमन, राज़न, ते इस्राएलरे लोकन मेरे बारे मां प्रचार केरे, ते तै मीं चुनोरोए कि तै मेरी सेवा केरे। 16 ते अवं तैस ज़ोइलो, लोकन मेरे बारे मां ज़ोनेरे वजाई तैस केत्रे-केत्रे दुःख झैलनो पेनोए।” 17 तैखन हनन्याह तैस घरे मां जेव, जैड़ी शाऊल थियो, ते तैस पुड़ हथ रेखतां ज़ोवं, “हे टूला शाऊल, प्रभु, मतलब यीशु, जैस बत्तां तू ओरोस ते तीं लेइहोरो थियो, तैनी अवं भेजोरोई, कि तू फिरी लास ते पवित्र आत्माई सेइं भेरोस।” 18 ते तैखन तैसेरे एछ्छन मरां ज़ेरां शेकड़ां झाड़ां ते तै लहने लगो, ते खडे उठतां बपतिस्मो नीयो। 19 ते किछ रोटी खेइतां तैस हिम्मत आई, ते किछ दिहाड़े तै चेलन सेइं साथी दमिश्क नगरे मां राव। 20 तैसेरां बाद अकदम तै दमिश्क नगरेरे प्रार्थना घरन मां प्रचार केरने लगो, कि यीशु परमेशरेरू मट्टूए। 21 सब शुन्ने बाले हैरान भोइतां ज़ोने लगो, “कुन ई तैए मैनु नई, जै यरूशलेम नगरे मां जैना यीशु मसीह पुड़ विश्वास केरते थिये मारतो थियो? ते इड़ी भी एल्लेरेलेइ ओरो थियो, कि

एन लोकन टलेइतां प्रधान याजकां केरे हवाले केरे?” 22 पन एसेरां बाद शाऊल होरो भी शक्ति सेइं प्रचार केरतो राव, ते एस गल्लरु सबूत देइ-देइ कि यीशु ही मसीहे, दमिश्क नगरे रानेबालां यहूदी केरु आशी बंद केरतो राव। 23 जैखन शाऊले दमिश्क में बड़ो वक्त बीतो त यहूदेई मिलतां तैस मारनेरो मुशरो कियो। 24 पन शाऊले एस गल्लरो पतो लगे, तैना त तैस मारनेरे लेइ रात दिहैडी दारन पुड़ रहते थिये। 25 पन राती तैसेरे चलेई तै टोकरे मां रखबो, ते नगरेरे दुवारी पुड़ा रस्से सेइं टोकरी मां ओसैलतां बुन पुजाव। 26 जैखन शाऊल यरूशलेम नगरे मां पुजो त तैनी चेलन सेइं मिलनेरो इंतजाम कियो, पन सब तैस करां डरते थी कि तै भी चेलोए। 27 पन बरनबासे शाऊल एप्पू सेइं साथी प्रेरितन कां आनो ते तैन ज़ोवं, कि केन्चरे दमिश्क नगरेरे बत्तां चलते-चलते एस प्रभु यीशु लेइहोरोए, ते प्रभुए एस सेइं गल्लां कियोरिन, ते एनी केत्रे दिलेरी सेइं दमिश्क नगरे मां यीशुएरे नव्वेरो प्रचार कियोरोए। 28 प्रेरितेई बरनबासेरी गल्लां केरो विश्वास कियो, ते शाऊल तैन सेइं साथी राव, ते यरूशलेम नगरे मां गातो राव। 29 ते यूनानी भाषा केरनेबाले यहूदन सेइं भी गलबात केरतो थियो, दिलेर भोइतां प्रभुएरो प्रचार केरतो थियो, पन तैना तैस मारनेरी कोशिश मां रहते थी। 30 एल्हेरेलेइ विश्वासी ढूलाएई तै कैसरिया नगरे मांजो नीयो, ते तैट्ठां तरसुसे नगरे जो भेजो। 31 त सारे यहूदिया इलाके मां ते गलील इलाके ते सामरिया इलाकेरी कलीसियान मां चैन भोव, ते तरक्की भोती जेई, ते तै प्रभुएरे डरे मां ते पवित्र आत्मा रे शैन्ति मां चलती ते बड़े लोकेई यीशु मसीहे पुड़ विश्वास कियो। 32 फिरी एरू भोवं कि पतरस सारे इलाके मां हंठतो फिरो, ते तैन पवित्र लोकन साथी भी पुजो, जैना लुद्दा नगरे मां रहते थिये। 33 त तैस तैडी ऐनियास नव्वेरो अक मैन्हु मैल्लो, तैस अधरंग थियो, ते अठे सालां केरो देंतो खड़ी पुड़ राहोरो थियो। 34 पतरसे तैस जो ज़ोवं, “हे ऐनियास! यीशु मसीहे तीं बझाते, उठ अपनू बछान खडू केर,” तैखने ते बेइइतां खडो भोव। 35 तैखन लुद्दा नगरेरे ते शारोनेरे राने बालेई एन हेरतां प्रभु यीशु पुड़ विश्वास कियो। 36 याफा नगरे मां अक कुआन्श थी, जेसारू नवं तबीता थियू (यूनानी भाषाई तैसेरु दोरकास थियू, जेसेरो मतलब हिरनी) तै विश्वासी थी, ते रोड़ां-रोड़ां कम्मां केरती ते गरीबां केरि मदत केरती थी। 37 तैन दिहाइन मां जेइस पतरस लुद्दा मां थियो, तै बिमार भोइतां मेरि जेई, ते तैसारी लाश नेइतां दोपरेरे कमेरे मां रखोरि थी। 38 लुद्दा याफारे नेइ थियू, ते जैखन चलेई शुनू कि पतरस लुद्दा मां आए, त दूई मैन्हु भेजतां मिनत की, “कि असन कां एजने मां ठढ न ला।” 39 तैखन पतरस तैन सेइं साथी चलो जेव, ते जैखन तैडी पुजो त तै बा तैस कमेरे मां नीयो, सैरी विधवां कुआन्शां लेरां देती थी, ते तैस इलखमेई खेड़ि थी, ते तैना लिगड़ां जैना दोरकास सियोरां थियां हिराने लेगि। 40 पतरसे तैना सब बेइरोवं कढे, ते एप्पू जैधू केरे भारे प्रार्थना केरने लगे, फिरी तैनी लाशारे पासे तुत्तर फरेइतां

ज़ोवं, “हे तबीता, उठ।” तैखन तैसां अपनि एछछी खोल्ली, ते पतरसे तेकतां खड़ी भोइ। 41 पतरसे हथेरां टलेइतां खड़ी की, ते विश्वासी ते विधवां कुआन्शां कुजेइतां ज़िंती ते होशी मां तैन केरे सुपुर्द की। 42 एस गल्लरी खबर सारे याफा नगरे मां फैली जेई, ते बड़े लोकेई प्रभु यीशु पुड़ विश्वास कियो। 43 पतरस किछ च़िरे तगर याफा नगरे मां शमौन नव्वेरो एक्की मैनेरे कां राव, ज़ै चमड़ेरु कम केरतो थियो।

10 कैसरिया नगरे मां अक मैन्हु थियो, तैसेरु नवं कुरनेलियुस थियू, ते तै अक इतालियानी फौवजरो सूबेदार थियो। 2 कुरनेलियुस त तैसेरे घरे सारे लोक परमेशरे करां डरने बाले थिये, कुरनेलियुस यहूदी लोकन बडू दान देतो थियो, ते परमेशरे कां लगातार प्रार्थना केरतो रातो थियो। 3 एक्की दिहाइ कुरनेलियुस दीसां अक रोड़े च़ारे दर्शन हेरू, परमेशरेरो अक स्वर्गदूत तैस कां अव, ते ज़ोने लगे, “हे कुरनेलियुस।” 4 तैनी ते रोड़े-च़ारे लाव ते डेरतां ज़ोवं, “हे मालिक कुने?” तैनी तैस सेइं ज़ोवं, “तेरी प्रार्थना ते तेरु दान यादगैरयर लेइ परमेशरे कां पुज़ेरु आए। 5 हुनी तू मैन्हु याफा नगरे मां भेजतां तैस मैन्हु जेसेरु नवं शमौन पतरसे अपने घरे कुजा। 6 तै शमौनेरे घरे बिशोरो थियो, ज़ै चमड़ेरु कम केरनेबालो थियो, जेसेरु घर समुद्रे बन्ने।” 7 जैखन स्वर्गदूत एना गल्लां केरतां च़लो जेव, त कुरनेलियुस अपने दूई सेवकन ते अपने सिपेहिन मरां अक भक्त सिपाही कुजाव। 8 ते तैन सारो बिस्तार ज़ोइतां याफा नगरे जो भेजे, कि पतरसे कुजान। 9 होरसां जैखन तैना भेजोरे लोक चलते-च़लते नगर नेइ पुजे। तै दुपारहरां केरो वक्त थियो, तैस वक्ते पतरस बा छती पुड़ प्रार्थना केरने लावरो थियो। 10 तैस ढलुख लग्गी ते तै किछ खानू चातो थियो, पन जैखन मैन्हु रोटी बनाने लगे त तैस बेहोशी ज़ेरी भोइजेइ। 11 ते तैनी हेरू कि अम्बर खुल्लूए, ते अक चादर लाई ज़ै च़ेरे कूना गेंगोरी अम्बरेरे पासेरां उन्डी ज़मीनेरे पासे ओरी। 12 जैस मां ज़मीनेरे सारे जानवर ते पेटेरे भारे च़लने बाले जन्तू ते अम्बरेरां चुड़ोले तैस चादरी मां थियां। 13 तैखन अक आवाज़ आई, “हे पतरस, उठ ते मार ते खा।” 14 पन पतरसे जुवाब दित्तो, “नई प्रभु, कधे नई, किजोकि मीं अज़ तगर कोई अपवित्र ते भिटी चीज़ नई खोरी।” 15 फिरी दुइयोवं बार तैनी आवाज़ शुनी, “जैन किछ परमेशरे शुद्ध कियोरुए, तू तैस जो भिटू न ज़ो।” 16 टलेइ बार ए आवाज़ आई, ते फिरी तै चादर अम्बरेरे पासे च़ली जेई। 17 पतरस दिले मां सोचने लग्गोरो थियो, कि एस दर्शिनो कुन मतलब भोइ सकते, ज़ैन अज़ मीं लाव, एत्रे मां कुरनेलियुसेरे भेजोरे मैन्हु शमौनेरु घर तोपते-तोपते दारे मां पुजे। 18 तैनेई हक देइतां पुच्छू, “शमौन ज़ैस जो पतरस ज़ोतन इडी तुश्शे कां आए?” 19 हेजू पतरस दर्शनेरे बारे मां सोचने लग्गोरो थियो, त पवित्र आत्मा तैस जो ज़ोवं, “शमौन, हेर टलाई मैन्हु तीं पुच्छने लगोरेन। 20 खडो उठ ते बुन गा, तैन सेइं साथी गाने करां न डेरां, किजोकि तैना मीं भेजोरेन।” 21 पतरस बुन अव, ते तैन

मैनन् सेइं ज़ोने लगे, “जैस मैन्हु तुस तोपने लगोरैथ तै अवं आई, ते तुस किजो ओरैथ?” 22 तेनेईं जुवाब दितो, “असां कुरनेलियुस सुबेदारे ज़ै धर्मी ते परमेशरे करां डरने बालोए, ते सारे यहूदी तैसरी तारीफ़ केरतन, एक्के पवित्र स्वर्गदूत तैस जो ज़ोरूप, तू शमौन पतरसे अपने घरे कुजेइतां तैसरी गल्लां शुन।” 23 तैखन पतरसे तैना अन्तर कुजाए, ते तैन केरि खातरदारी की। होरसां पतरस तैन सेइं साथी च़लो जेव, ते याफा नगरैरे काई ढ़लान मरां किछ तैस सेइं साथी च़ले जे। 24 एग्री दिहाड़े तैना कैसरिया नगरे मां पुजे, कुरनेलियुस अपने रिशतेदारन ते अपने दोस्तन अकोट्टे केरतां तैन बलगाने लाव। 25 पतरस ज़ैखन कुरनेलियुसेरे घरे पुजो, त कुरनेलियुसे तैसरी बड़ी आदर खातरी सेइं इज़्ज़त की, ते क्रोड़ी पव्वन कां रेखतां तैस कां मथथो टेको। 26 पन पतरसे तै खड़ो कियो ते ज़ोवं, “खड़ो भी किजोकि अवं भी त अक मैन्हु आई।” 27 फिरी तै कुरनेलियुसे सेइं गल्लां केरतो अन्तर जेव, तैड़ी बड़े लोक अकोट्टे बिश्शारे लेइतां, 28 तैस सेइं ज़ोवं, “तुसन पत्तोए इश्शे यहूदी केरे लेइ गैर कौमी सेइं मिलनू जुलनू कानूनेरे खलाफे, पन परमेशरे मीं सेइं ज़ोरूप कि अवं केन्वी मैन्हु जो अपवित्र या भिट्टी ज़ोई। 29 एल्हेरेलेइ तुसेईं अवं कुजाव त अवं चुपचारे च़लो अव। हुनी अवं तुसन पुछताई कि तुसेईं अवं किजो कुजेवरोई?” 30 कुरनेलियुसे ज़ोवं, “अवं चेरे दिहाड़ना पेइले अपने घरे मां इस मौके कोई टलेइ बजेइं प्रार्थना लोरो थियो केरने, त अचानक अक मैन्हु चमकतां लिगड़ां लगगोरे मेरे तुत्तरे अगर खड़ो भोव। 31 ते ज़ोने लगे, हे कुरनेलियुस, तेरी प्रार्थना परमेशरे शुनोरीए ते तेरु दान भी कबूल कियोरूप। 32 एल्हेरेलेइ कोन्वी याफा नगरे मां भेज़तां शमौन ज़ैस जो पतरस ज़ोतन, कुजा। तै शमौनेरे कांए ज़ै चमड़ेरु कम केरनेबालो, ते समुद्रे बन्ने रहते। (ज़ैखन तै एज्जेलो त तै परमेशरे बारे मां ज़ोलो) 33 तैखन मीं मैन्हु भेजे, ते तीं बड़ रोड़ कियू कि तू अव। हुनी अस परमेशरेरे सामनेम, ताके ज़ैन किछ परमेशरे ज़ोरु तैन शुनमा।” 34 तैखन पतरस ज़ोने लगे, हुनी मीं याकीन भोव, कि परमेशर केन्वेरो तरफदार नई। 35 बल्के हर कौमी मरां ज़ै परमेशरे करां डरते ते रोड़ां कम्मां केरते परमेशर तैस कबूल केरते। 36 इसाएली लोकां केरे लेइ परमेशरेरे भेज़ोरे सन्देशेरे बारे मां तुसन पतो आए। परमेशरे यीशु मसीहरे ज़िरिये सेइं जै सेबभी केरो प्रभुए शैनतरी खुशखबरी शुनाई। 37 यूहन्नारे बपतिस्मोरो प्रचार केरने करां लेइतां गलील इलाके करां शुरु भोइतां सारे यहूदिया इलाके मां कुन-कुन भोवं, तुस भी ज़ानतथ। 38 केन्वेरे प्रभु यीशु नासरी पवित्र आत्माई सेइं ते शक्ति सेइं अभिषेक कियूं, ते तै लोकां केरु भलू केरतो राव, तैनी सब ज़ैना शैतानेरे ज़ाले मां फासोरे थियो, तैना छुटाए, किजोकि परमेशर तैस सेइं साथी थियो। 39 तैनी ज़ैन किछ यहूदी केरे मुखे मां ते यरूशलेम नगरे मां कमाव, असां तैसेरे गवाह आम, ते तैए यहूदी लीडरेई यरूशलेमे मां क्रूसे पुड़ टेंगेइतां माराव। 40 परमेशरे तैए टलेइयोवं दिहाड़े फिरी ज़ीतो केरतां

हिराव। 41 तै सैरी लोकेई नई बल्के गवाहई लाव, ज़ैना परमेशरे पेइले चुनतां रखोरे थियो, यानी असां ज़ैनेई तैसेरे मुड़दन मरां ज़ीते भोनेरां बाद तैस सेइं साथी रोटी खोरीए। 42 ते तैनी असन हुक्म दितो कि लोकन मां प्रचार केरम ते गवाही देम, कि ई तैए ज़ै परमेशरे ज़ीते ते फट्रां केरो हाकिम भोए। 43 सारे नबी तैसेरे बारे मां गवाही देतन, कि ज़ै कोई तैस पुड़ विश्वास केरेलो त तैस तैसेरे नंवे सेइं पापां केरि माफ़ी मैले। 44 पतरस हेजू एन ज़ोतो थियो, त पवित्र आत्मा तैन पुड़ उतरी, ज़ैना बच्चन शुन्ने लोरे थियो। 45 ते जेजे यहूदी विश्वासी पतरसे सेइं साथी ओरे थी, तैना सब हेरान भोए कि गैर कौमन पुड़ भी पवित्र आत्मा उतरोरीए। 46 किजोकि तैनेई तैना किसमे-किसमेरी भाषां केरते, ते परमेशरेरी तारीफ़ केरते शुनोरी थियो, तैखन पतरसे ज़ोवं। 47 “ज़ेन्वेरे परमेशरे असन पवित्र आत्मा दितोरीए तेन्वेरे तैन भी दितोरीए, कुन कोई एन मैन्नु पैनोरो बपतिस्मो नेने करां रोकी सकते?” 48 एल्हेरेलेइ पतरसे हुक्म दितो, कि एन लोकन यीशु मसीहरे नंवे सेइं बपतिस्मो देथ, तैखन तैनेई पतरसे कां मिनत की, कि किछ दिहाड़े असन कां हेजू बिश।

11 यहूदिया मां रानेबाले प्रेरितेई ते विश्वासी ढ़लाएई ए खबर शुनी, कि गैर यहूदेई भी परमेशरेरु बच्चन कबूल कियूं। 2 ते ज़ैखन पतरस वापस यरूशलेम नगरे मां अव, त यहूदी विश्वासी लोक तैस सेइं बेंस केरने लगे। 3 “तू गैर कौमां केरे घरे जेव, ते तैन सेइं साथी बिश्तां रोटी भी खाइ।” 4 पतरसे तैन सेइं सारो बिस्तार पत्रां देंतो ते आखरी तगर एन्वेरे शुनाव, कि कुरनियुसेरे घरे कुन भोवं। 5 “अवं याफा नगर मां प्रार्थना केरने मां मघन थियो, त मीं किछ बेहोशी ज़ेरि भोइजेइ, ते मीं अक दर्शन लाव, ते अक च़ादर ज़ेरि चेरे कूना टेंगेइतां अम्बरेरे पासेरां उन्डी एइतां मीं तगर पुज़ी। 6 अवं तैस मां तकने लगो त कुन हेरताई कि, तैस मां ज़मीनेरे सारे चेरे ज़ंघेइं च़लने बाले जानवर ते पेटेरे भारे च़लने बाले जीप ते अम्बरे मां उडरने बालां चुड़ोलू थियां। 7 तैखन मींजेइ अक आवाज़ आई, ज़ै ज़ोने लगी, ‘हे पतरस खड़ो उठ ते इन मार ते खा।’ 8 मीं जुवाब दितो, प्रभु नई, किजोकि मीं अज़ तगर कोई भी अपवित्र या भिट्टी चीज़ नई खोरी। 9 एसेरे जुवाबे मां अम्बरेरां होरि आवाज़ आई, ‘ज़ैन किछ परमेशरे पवित्र बनेवरीए, तू तैस जो भिट्टू न ज़ो।’ 10 ए आवाज़ टलेइ बार आई, ते फिरी तै च़ादर अम्बरेरे पासे खिचोइतां च़ली जेई। 11 ठीक तैस्से मौके टलाई मैन्हु ज़ैना कैसरिया नगरे मरां कुरनियुसे मीं कां भेज़ोरे थियो, तैस घरे कां सामने खड़े भोए, ज़ैड़ी अवं थियो। 12 तैखन पवित्र आत्मा मीं सेइं ज़ोवं, बेधड़क च़ारे एन सेइं साथी गा, एना 6 ढ़ला भी मीं सेइं साथी आए, ते असां तैस मैनेरे घरे जे। 13 तैनी असन सेइं ज़ोवं, कि केन्वेरे सेइं तैनी अक स्वर्गदूत घरे लाव ते ज़ोने लगे, याफा मां केन्वी मैन्हु भेज़तां शमौन ज़ैस जो पतरस ज़ोतन, तैस अपने घरे कुजा। 14 तै एइतां तीं अक एरो बिस्तार देलो, जेसेरे ज़ोने सेइं तेरी खानदानेरे सारे मैन्नु परमेशर मुक्ति देलो। 15 ज़ैखन मीं तैड़ी

गेइतां तैन सेइं गल्लां शुरू की, त पवित्र आत्मा तैन पुड़ उतरी, जेन्ने पेड़ले असन पुड़ उतरोरी थी। 16 तैखन मीं प्रभुएरु तैन वचन याद आऊं, जैन तैने ज़ोवरो थियूं, कि यूहन्ना त पैनी सेइं बपतिस्मो दित्तो, पन तुसन पवित्र आत्माई सेइं बपतिस्मो मैलेलो। 17 बस्सा अगर परमेशरे तैन भी तैए तोफो दित्तो, जै असन प्रभु यीशु मसीह पुड़ विश्वास करने सेइं मैल्लो, त अव कौन भोताई कि परमेशरे रोकी?” 18 जैखन यहूदी विश्वासी लोकेई एन शुनू त चुप रेड़जे, “ते परमेशरेरी तारीफ़ करने लगे, तां त सच्चे कि परमेशरे गैर कौमन भी पापन करां मन फिरेइतां यीशु पुड़ विश्वास केरातां हमेशारी जिन्दगी हासिल केनेरो तोफो दित्तोए।” 19 त तैना लोक जैना तैस दुखेरे मारे जै स्तिफनूसे मोतरे वक्ते शुरू भोरो थियो, तितर-बितर भोजेइ, ते च़लते-च़लते फीनीके इलाके ते साइप्रस ते अन्ताकिया नगरे तगर पुजे, पन तैना यहूदी केरे अलावा होरन परमेशरेरु वचन न थिये शुनाते। 20 पन तैन मरां किछ साइप्रसेरै रानेबाले ते किछ कुरेनेरे रानेबाले थिये, जैना अन्ताकिया नगरे मां एइतां यूनानी लोकन भी प्रभु यीशु मसीहेरी खुशखबरी शुनाने लगे। 21 ते प्रभुएरी शक्ति तैन पुड़ थी, ते बड़े गैर कौमरे लोकेई तैन केरे सनदेशे पुड़ विश्वास कियो, ते प्रभु यीशु पुड़ भरोसो केरनो शुरू कियो। 22 तैखन तैन केरि खबर यरूशलेम नगरेरे कलीसियारे लोकन तगर पुजी, ते तैनेई बरनबास अन्ताकिया नगरे जो भेजो। 23 तै तैड़ी पुजतां, ते परमेशरेरो अनुग्रह हेरतां बड़ो खुशी भोव, ते तैन ए गल जोई कि अपने तने मने सेइं प्रभु सेइं लिपटोरे रान। 24 बरनबास अक रोड़ो मैनु थियो, तै पवित्र आत्माई ते विश्वासे सेइं भरपूर थियो, ते बड़े लोक प्रभु मां आए। 25 तैखन बरनबास अन्ताकिया नगर शैरतां शाऊले तोपने तरसुस नगरे जो च़ल्लो जेव। 26 तैनी शाऊल तोपतां अन्ताकिया नगरे मां आनो, तैड़ी तैना एक्की साले तगर दुइये ज़न्हे कलीसियाई मां लोकन प्रभु यीशुएरी शिक्षा देते राए, ते लोक चलन जो सेबन करां पेड़ले अन्ताकिया नगरे मां मसीही ज़ोने लगे। 27 तैन्ने दिहाइन मां किछ विश्वासी जैना नबी थिये, यरूशलेम नगरेरां अन्ताकिया नगरे मां आए। 28 तैन मरां अक नबी ज़ेसेरु नवं अगबुस थियूं खड़े भोइतां ते पवित्र आत्मारे ज़ोने सेइं एन ज़ोने लगे, कि सैरी दुनियाई मां अक बड़ो काल पेनोए। ए काल क्लौदियुस हाकिमेरे वक्ते पेव। 29 तैल्हेरेलेइ च़ेलेई फैसलो कियो कि, असन मरां हर कोई अपनि-अपनि हैसयतरे मुताबिक किछ दान देथ, ताके यहूदिया इलाके मां रानेबाले मसीही दूलां केरि मदत भोइसखे। 30 बस्सा तैनेई किछ रकम अकोट्टी की ते बरनबास ते शाऊलेरे हथ्थे यरूशलेम नगरेरे बुजुर्गन कांजो भेजी।

12 तैस्से वक्ते मां हेरोदेस राजो कलीसियारे किछ मैन्न दुःख देनेरे लेइ तैना दलाने शुरू कीए। 2 ते यूहन्ना प्रेरितेरो दूला याकूब तलवारी सेइं मराव। 3 जैखन तैनी हेरू कि यहूदन ए गल बड़ी खुशी आई, त तैन दिहाइन मां पतरस भी दूलाव। तैना दिहैड़ी अखमीरी रोट्टरी तिहारेरी थी। 4 ते तैस दलानेरां बाद

हेरोदेस तै कैदखाने मां छुड़ो, ते तैसेरी निगरेनारे लेइ च़ेरे टोली बनाई, हर टोली च़ेन्न-च़ेन्न सिपाही केरि थी, हेरोदेसेरो खियाल थियो कि फ़सह तिहारेरे बाद तै कैदे मरां केढतां लोकां केरे सामने पैश केरे। 5 कैदखाने मां पतरस बड़े दिहाइन तगर परेहे मां थियो, पन सारी कलीसिया तैसेरेलेइ परमेशरे कां प्रार्थना करने लगोरी थी। 6 हेरोदेसे, पतरस लोकां केरे सामने आने करां पेड़ले अक रात जैखन पतरस दूई पहरेंदारां केरे मझाटे बंधोरो झूलोरो थियो, ते सिपाही कैदखानेरे डेवढी पुड़ पैरहो देंते थिये। 7 त अचानक परमेशरेरो स्वर्गदूत कैदखाने मां अव, ते सारो कैदखानो टलकड़ो भोइ जेव, स्वर्गदूते पतरसे खित्ती देइतां बीझाव ते ज़ोवं, “उठ, ते लूश केर।” ते शंगलां पतरसेरे हथ्थन सेहीयेंरां खुल्ली जेई। 8 स्वर्गदूते पतरसे सेइं ज़ोवं, “अपनू मज़ बन्ध ते बूट ला।” पतरसे तैन्ने कियूं ते फिरी ज़ोवं, “अपनो चोगो ला ते मीं पत्पती एई।” 9 पतरस स्वर्गदूत पत्पती कैदखाने मरां बेइर अव, पन तैस ए पतो न थियो, कि स्वर्गदूते जैन करने लगोरोए एन सच्चे या कोई दर्शन हेरने लगोरोइ। 10 ते दुइयोवं पेरहेदारे करां बेइर निस्तां अव, ते लोहरे फाटके कां पुजो, जै नगरेरे पासे खुलतो थियो, तै फाटक तैन केरे लेइ अपने आप खुल्लो, ते तैना तैटां निस्तां दूर पुजे, स्वर्गदूत पतरसे तैड़ी पुजेइतां गैडब भोइ जेव। 11 तैखन पतरस होशी मां अव, ते ज़ोने लगे, “हुनी मीं पूरू याकीन भोवं, कि परमेशरे अपनो स्वर्गदूत भेजतां अव हेरोदेसेरे हथ्थे मरां छुटाव, ते यहूदी लीडेई जैन सोचेरू थियूं, तैन बन्ने न दित्ता।” 12 जैखन तै एस बारे मां सोचने लगोरो थियो, त मरियमेरे घरे पुजो, जै यूहन्ना ज़ैस जो मरकुस ज़ोते थिये तैसेरी अम्मा थी। तैड़ी बड़े विश्वासी लोक अकोट्टे भोइतां प्रार्थना केरने लगोरो थिये। 13 पतरसे बेइरू दार गुडकावं त अक नौकरानी ज़ेसारु नवं रूदे थियूं, तै दार खोलने आई। 14 तैसां पतरसेरी गल शुनी ते तैसां गल पिशानी ते बगैर दार खोलनेरां दौवड़ती खुशी भोइतां आई, ते ज़ोने लगी, पतरस बेइर दारे मां ओरोए। 15 तैना मैनु ज़ोने लगे, “तू कुन पागल भोरिस।” पन जैखन तैसां रोड़ेच़ारे ज़ोवं, कि ते पतरसे, त तैना ज़ोने लगे “पतरस त नई पन पतरसेरो स्वर्गदूत भोलो।” 16 ते पतरस बेइर दार गुडकातो राव, ते जैखन तैनेई दार खोल्लू त पतरस लेइतां हैरान रेड़जे। 17 पतरसे तैन जो हथ्थे सेइं इशारो कियो, कि चुप राथ, ते फिरी अन्तर एइतां सारो बिस्तार शुनाव, कि अव केन्नेरे परमेशरे कैदखाने मरां बेइर कढो, ते फिरी ज़ोवं, “याकूबे त तैसेरे होरि मसीह दूलान भी पतो देइयथ।” ते एप्पू केन्नी होरि जगाई जो च़ल्लो जेव। 18 जैखन झेझ भोइ त सिपेहिन एप्पू मांमेइं खलबली मेचि जेई, कि पतरस कोरां जेव। 19 जैखन हेरोदेसे तैस तोप्पनेरो हुक्म दित्तो त तैनी सिपेही केरू बियांन घिन्नेरां पत्ती तैन जो कतलेरो हुक्म दित्तो, ते पतरस यहूदिया इलाके मरां कैसरिया नगरे जो च़ल्लो जेव, ते किछ च़िरे तगर तैड़ी राने लाव। 20 हेरोदेस सूर ते सैदारे नगरेरे लोकन पुड़ बड़ो नाराज़ थियो, तैखन तैना लोक मिलतां

तैस कां आए, ते बलास्तुसे जै राजेरो खास मैन्हु थियो, मनेइतां मेल केरनो चाव, किजोकि राजो एरे मुलखेरां तैन केरे मुलखे खर्चों मैलतो थियो। 21 तैखन तैनी अक दिहाड़ी ठुवहलाई ते हेरोदेस राजो अपना राजेरां लिगड़ां लेइतां आदालतरे तखते पुड़ बिश्तां लोकन सेइं ज़ोने लगे। 22 तैनेई ज़ैखन शुनू त ज़ोने लगे, “ए मैन्हु केरि आवाज़ नई बल्के परमेशेरी आवाजे।” 23 किजोकि हेरोदेसे परमेशेरी तारीफ़ न की, तैल्हेरेलेइ तैस परमेशेरे स्वर्गदूतेरी एरी मार पेई कि तैसेरी सैरी जानी कीड़े लगे, ते तै मेरि जेव। 24 पन परमेशेरे बचन अग्रोवं बद्धतू जेवं, ते विश्वासी लोकां केरि गिनती बद्धती जैई। 25 ज़ैखन बरनबास ते शाऊल अपनि सेवा जै तैन केरे सुपुर्द कियोरी थी, तैनेई पूरी की त अन्ताकिया नगरेरां यरूशलेम नगरे जो वापस आए, ते यूहन्ना ज़ैस जो मरकुस ज़ोते थिये, एप्पू सेइं साथी आनो।

13 अन्ताकिया नगरेरे कलीसियाई मां काई नबी ते गुरू थिये, मतलब बरनबास, शमौन ज़ैस जो नीगर भी ज़ोतन, लूकियुस कुरेनी, ते मनाहेम ज़ै मुलखेरे च़ेवरोंवं हिसे पुड़ हाकिम थियो ज़ै हेरोदेसेरो दुद्रु ढ़ला थियो, ते शाऊल थियो। 2 ज़ैखन तैना बरत रेखतां प्रभुएरी आराधना केरने लगगोरे थिये, त पवित्र आत्मा तैन सेइं ज़ोवं, “ज़ैस सेवारे लेइ बरनबास ते शाऊल मीं कुजोरेन, तैसेरेलेइ तैन अलग केरा।” 3 तैखन तैनेई बरत रेखतां प्रार्थना की, ते तैन पुड़ हथ रेखतां तैना परमेशेरे कम्मेरे लेइ भेजे। 4 शाऊल ते बरनबास पवित्र आत्माारी तरफां भेजोरे सिलूकिया नगरे जो जे, ते तैट्ठां तैना ज़िहाजे पुड़ च़ेढ़तां साइप्रस टैपू जो च़ले। 5 ज़ैखन तैना सलमीसे मां पुजे, त तैड़ी तैना यहूदी केरे प्रार्थना घरे मां परमेशेरे वचन शुनाव, ते यूहन्ना मरकुस भी तैन केरि मद्दत केरनेरे लेइ तैड़ी थियो। 6 ज़ैखन तैनेई सारे जज़ीरे ते नगरन-नगरन मां हंठु फिरू, त तैना पाफ़ुसे नगरे मां पुजे, त तैन केरि मुलाकात एक्की डैइंनोडे यहूदी ते झूठे नेबी सेइं भोड़, ज़ेसेरू नवं बार-यीशु थियूं। 7 ते तैट्टेरे हाकिम सिरिगियुस, पौलुस सेइं साथी थियो, ज़ै अक अक्लमन्द मैन्हु थियो, ते तैनी बरनबास ते शाऊल कुजाए ते परमेशेरे वचन शुन्नू चाऊ। 8 पन एलीमास डैइंनोड़ी (किजोकि तैसेरे नंवेरो मतलब डैइंनोड़ी ए) तैन केरि खलाफत केरने लगे, तैने हाकिम यीशु पुड़ विश्वास केरने करां रोकनो चाव। 9 तैखन शाऊल ज़ेसेरू नवं पौलुस भी आए, पवित्र आत्माई सेइं भेरोइतां ध्याने सेइं एलीमास डैइंनोडेर पासे तकने लगे, ते तैस सेइं ज़ोवं, 10 “हे शैतानेरे कोआ, तू हर किसमेरी पाखंडे सेइं ते च़लैकी सेइं भरतस, ते नेकारो दुश्मन, कुन तू परमेशेरी बत बगाइने करां बाज़ न एजस? 11 हुनी प्रभु तेरे खलाफे, तू कानो भोड़गानोस, ते किछ च़िरे तगर तू दिहाड़ो न लाएलो।” तैखने तैस आंधरू लेइयोने लगू, ते तै इरां-उरां तोपने लगे, ताके कोई तैस हथेरां टलेइतां च़लाए। 12 तैखन हाकिमे एन हेरतां, ते प्रभुएरी शिक्षा शुन्तां हेरान राव, ते प्रभु यीशु पुड़ विश्वास कमाव। 13 पौलुस ते तैसेरो साथी पाफ़ुस नगरेरां ज़िहाजे मां पंफ़ुलिया इलाकेरे पिरगा नगरे मां आए, ते

यूहन्ना तैन शैरतां वापस यरूशलेम नगरे जो च़लो जेव। 14 ते तैना पिरगा नगरेरां निस्तां पिसिदिया इलाकेरे अन्ताकिया नगरे मां पुजे ज़ै गलतिया इलाके मां आए। ते आरामेरे दिहाड़े प्रार्थना घरे मां गेइतां बिश्शी जे। 15 मुसेरो कानून ते नेबी केरि किताबी मां पढनेरे बाद तैट्टेरे प्रार्थना घरेरे प्रधाने तैन ज़ोवं, “अगर मैन्हु केरि भलेइयरे लेइ तुस भी किछ ज़ोन्नू चातथ त ज़ोथा।” 16 तैखन पौलुस खड़ी उठो ते हथ्थे सेइं इशारो केरो कि चुप रान ते ज़ोने लगे, “हे इस्राएली लोकव ते परमेशेरो डर मन्नेबाले गैर कौमां केरे लोकव मेरी गल शुना। 17 इन इस्राएली लोकां केरे परमेशेरे इश्शे दादे-पड़दादे चुने, ज़ैखन तैना मिस मुलखे मां परदेशी भोइतां रहते थिये, तैन परमेशेरे तरक्की दिती, ते बड़े शक्ति सेइं तैट्ठां कढे। 18 ते तै सुनसान ठैरी मां लगभग 40 सालन तगर तैन केरि झैल्लतो राव, तैना बार-बार हुक्म टलोइते राए। 19 कनान मुलखे मां परमेशेरे सत कौमां नाश केरतां तैन केरि ज़मीन अपने इस्राएली लोकन विरासती मां दिती। 20 एना गल्लां पूरी भोने लगभग 450 साल लगे, तैसेरां बाद परमेशेरे तैन केरे लेइ शमूएल नेबेरे वक्ते तगर हाकिम रखे। 21 ज़ैखन हेजू शमूएल तैन केरो हाकिम थियो त तैन लोकेई राजो बनानेरे लेइ दरखुवास की, ते परमेशेरे बिन्यामीनेरे गोत्रे मरां कीशेरू मट्टू शाऊल राजो बनाव ते तैनी 40 साल यरूशलेम नगरे मां राज़ कियूं। 22 फिरि तैनी शाऊल हटेइतां दाऊद तैसेरी ठैरी तैन केरो राजो बनाव, ज़ेसेरे बारे मां तैनी गवाही दिती, मीं यिशेरू मट्टू दाऊद मेरे मनरे मुताबिक मैलोरूप, तैस पुड़ अवं खुश आई, ते तैए मेरी मर्ज़ी पूरी केरेलो। 23 परमेशेरे अपने वादेरे मुताबिक तैसेरे वंशेरे मरां पापन करां मुक्ति देनेरे लेइ इस्राएले कां यीशु मसीह भेजो। 24 ज़ेसेरे एजने करां पेइले यूहन्ना इस्राएलेरे सारे लोकन प्रचार कियो, कि पापन करां मनफिराथ ते बपतिस्मो नेथ।” 25 ज़ैखन यूहन्नारू कम पूरू भोनेबालू थियूं, त तैनी ज़ोवं, “तुस मीं कुन समझतथ? ‘अवं मसीह नई!’ बल्के हेरा, ते मेरे बाद एजनेबालोए, किजोकि अवं त एस काबल नई कि तैसेरे बूटां केरे तसमे भी खोल्ली सेखी।” 26 “हे मेरे ढ़लाव, तुस ज़ैना अब्राहमेरे औलादारे लोकव, ते परमेशेरो डर मन्नेबाले गैर कौमां केरे लोकव, इस मुक्तरो बिस्तार तुसन कां भेजोरोए। 27 यरूशलेम नगरेरे रानेबाले लोकेई ते तैन केरे प्रधानेई यीशु मसीह न पिशानो, ते न नेबी केरि गल्लां सेमझी, ज़ैना हर आरामेरे दिहाड़े पेढ़तां शुनेई गैती थी। 28 हालांकी तैन मौतरी सज़ारे काबल सबूत न मैल्लू, पन फिरि भी तैनेई पिलातुस गवर्नरे कां दरखुवास की, कि ए मारो गाए। 29 ते तैनेई सब किछ ज़ैन तैसेरे बारे मां पवित्रशास्त्रे मां लिखोरू थियूं, पूरू कियूं, त तै क्रूसे पुड़ कील देइतां मारो, ते ओसेलतां एक्की कब्री मां छुड़ो। 30 पन परमेशेरे तै मुडदन मरां भी ज़ींतो कियो। 31 ते ज़ैना लोक गलील इलाके मरां तैस सेइं साथी यरूशलेम नगरे मां ओरे थिये, तैन चेलन काई दिहाड़न तगर यीशु लेइयोतो राव, ते हुनी तैना लोक ज़ैनेई ते लाहोरोए गवाही देतन। 32 असां तुसन

खुशखबरी शुनातम, कि जै वादो परमेशरे इश्शे दादे-पड़दादन सेइं कियोरो थियो। 33 कि परमेशरे यीशु मसीह मुड़न मरां जीतो केरतां तै वादो पूरू कियो, ते भजना केरि किताबी मां परमेशर मसीहरे बारे मां जोते, तू मेरू मटूस ते अवं तेरो बाजी भोव। 34 एन सच्चे, कि परमेशरे ते मुड़न मरां भी जीतो कियो, ताके तै न शड़े, परमेशरे बचने मां एन्ने बियांन कियोरूए, कि अवं तीं पवित्र ते सच्ची बरकत देलो, जैन केरो वादो परमेशरे दाऊदे सेइं कियोरो थियो। 35 ते होरि भजने मां दाऊद जोते, तू अपने पवित्र मैन्हु शङने न देलो। 36 किजोकि दाऊद त अपने वक्ते मां परमेशररी मर्जी पूरी केरनेरां पत्ती मेरि जेव, ते अपने दादन-पड़दादन सेइं साथी दफन भोव, ते तैसेरी जान शैदी जेई। 37 पन जै (यीशु मसीह) परमेशरे मुड़न मरां जीतो कियो, त तेसेरे शङनेरी नौबत न आई। 38 “एल्हेरेलेइ, हे ढूलाव, बुझा कि यीशुएरे जिरिये सेइं तुसन पापां केरि मैफारी खबर शुनाई गावे। 39 तुस मूसा नेबेरे कानूने मुताबिक धर्मी न थी भोने, पन जै कोई यीशु पुड़ विश्वास केरे तै धर्मी भोए। 40 “एल्हेरेलेइ खबरदार राथ, कोस्कोई एरू न भोए कि नेबी केरि ए गल तुसन पुड़ सच्चे बीते, 41 तुस जैना होरि केरि तुहीन केरतथ, हेरा, ते हेरान भोथ, ते बरबाद भोथ, किजोकि अवं तुश्शे जीति ज़ागते एरू कम केरनेबालोई, कि अगर कोई तुसन सेइं तैसेरे बारे मां गलबात भी केरे, त तुस कथे विश्वास न केरेले।” 42 जैखन पौलुस ते बरनबास प्रार्थना घरे मरां चले, त लोक तैन कां मिनत केरतां जोने लगे, कि होरि आरामेरी दिहाड़ी भी एन्ने गल्लां केरे बारे मां जोवं गाए। 43 जैखन लोक आराधनारे बाद बेइर निस्से, त बड़े लोक पौलुस ते बरनबासे पत्ती चले, ते तैन मां किछ यहुदी थिये, ते किछ नव्वे यहुदी पंथ धारण कियोरे थिये, ते तैनेई तैन सेइं गलबात केरतां तैन समझाव, कि परमेशरे अनुग्रहे मां बनोरे राथ। 44 होरि आरामेरे दिहाड़े लगभग सारू नगर परमेशररू वचन शुन्नेरे लेइ अकोटू भोवं। 45 जैखन यहुदी लीडरेई एत्रे हछे लोक लाए त तैन जलन भोइ, ते पौलुसेरे खलाफ गल्लां लग्गे केरने। 46 तैखन पौलुस ते बरनबासे दिलेर भोइतां तैन जोवं, “ज़रूरी एन थियूं, कि असां पेइले तुसन परमेशररू बच्चन शुनाम, पन तुस त इन्कार केरने लोरेथ, ते अपनो आप हमेशारी जिन्दगरे काबल न समझाव, त हेरा हुनी असां गैर कौमां केरे पासे गातम। (aiōnios g166) 47 किजोकि प्रभुए असन ई हुकम दितोरोए, मीं तू मीं तू गैर कौमां केरे लेइ लौ बनोरस, ताके तुश्शे जिरिये सारे ज़मीनी पुड़ मुक्ति आनी गाए, ते तू ज़मीनेर हर पासे मुक्कू दार भोसा।” 48 इन शुन्तां गैर कौमां केरे लोक बड़े खुशी भोए, ते परमेशररी तारीफ़ केरने लगे, ते जैना परमेशरे हमेशारी जिन्दगरे लेइ ठहरावे थिये, तैनेई विश्वास कियो। (aiōnios g166) 49 ते प्रभुएरू बच्चन सारे मुखे मां फैली जेवं। 50 पन यहुदी लीडरेई बड़े भक्त ते इज़्ज़तदार कुआन्शां ते नगररे काई खास मैन्हु भड़काए, तैनेई पौलुस ते बरनबासे सिंतेइतां तैना तैस इलाके मरां भी केदी छड़े। 51 तैखन पौलुस ते बरनबासे तैन केरे

सामने अपने पावां केरि धूड़ ठुड़कतां तैना इकुनियुम नगरे जो चले जे। 52 ते चले इकुनियुम नगरे मां खुशी ते पवित्र आत्माई सेइं भरपूर भोते राए।

14 इकुनियुम नगरे मां पौलुस ते बरनबास दुइये ज़ने प्रार्थना घरे मां जे, ते एरू भाषण केरने लगे ते बड़े यहुदी लोकेई ते यूनानी लोकेई विश्वास कियो। 2 पन विश्वास न केरनेबाले यहुदेई, गैर यहुदी लोक भड़काए ते तैनेई विश्वासी मैन्हु विश्वासे करां दूर किये, ते तैन केरे खलाफ क्रोध पैदा कियो। 3 ते पौलुस ते बरनबास काई दिहाड़े तैदी राए, ते प्रभुएरी भरोसे पुड़ दिलेरी सेइं गल्लां केरते थिये, ते प्रभु तैन केरे जिरिये चमत्कार ते निशान करेइतां अपने अनुग्रहे वचने सच्ची साबत केरतो राव। 4 पन नगररे लोकन एप्पू मांमेइं फूट भोइजेइ, किछ लोक यहुदी केरे पासे भोए, ते किछ प्रेरितां केरे पासे भोए। 5 यहुदी ते गैर यहुदी अपने प्रधान सेइं मिलतां तैन बेइज़त केरने ते तै घोड़ेई बाने लगे। 6 त तैन एस गल्लरो पतो लगे, तैना तैट्ठां नेशशी जे, ते लुकाउनिया इलाकेरे नगरन लुस्त्रा ते दिरबे मां ते तैसेरे आसे-पासेरे इलाके मां चले जे। 7 ते तैदी तैना खुशखबरी शुनाने लगे। 8 लुस्त्रा नगरे मां अक मैन्हु बिशोरो थियो, जै पावां केरो कमज़ोर थियो, तै ज़मनेरो टोन्टो थियो, ते तै कधी न थियो चलोरो। 9 तै पौलुसेरी गल्लां ध्याने सेइं शुन्ने लग्गोरो थियो, पौलुसे तैसेरे पासे ध्याने सेइं तक्कू त ज़ांनु, कि एसमां एत्रो विश्वासे कि ए बेज़्ज़ोइ सकते। 10 ते पौलुसे तैस मैन्हु जोरे सेइं जोवं, “अपने पावन पुड़ खड़ो भो।” ते तै तैखने खड़ो भोव, ते चलने लगे। 11 जैखन लोकेई पौलुसेरू एन कम हेरू त लुकाउनिया भाषाई मां जोरे सेइं जोने लगे, “कि देबतो असन कां मैनेरो शकली मां ओरोए।” 12 ते तैन लोकेई बरनबासेरू नव ज्यूस रख्खू, (जैन यूनानी देबतेरू नव थियूं), ते पौलुसेरू हिमेंस नव रख्खू, (जै होरि देबतां केरो बिस्तार देने बालन मरां प्रधान थियो) किजोकि तै गल्लां केरने मां जादे माहिर थियो। 13 ते ज्यूस देबतेरू मन्दर नगररे सामने थियूं, तैसेरो पुजारी दांत ते फूड़ केरे हार एन्तां नगररे फाटके पुड़ पुजो, किजोकि तैना लोक चाते थिये कि असां प्रेरितां केरे लेइ बलिदान केरन। 14 जैखन बरनबास ते पौलुस प्रेरितेई एन शुन्नु, त तैना दुखी भोए, ते तैनेई अपना लिगड़ां छिन्दां ते मैनन् मां जे ते ज़ोरे-जोरे जोने लगे। 15 “लोकव तुस एन कुन केरने लगोरेथ? असां भी तुश्शे ज़ेरे दुःख सुख झैल्लने बाले मैन्हु आम, ते तुसन खुशखबरी शुनातम, ताके तुस एना फुजूल चीज़ां शैरतां जीति परमेशररे पासे एज्जथ, जैनी धरती त कने अम्बर ते समुन्द्रे ते जैन किछ भी एसमां आप तैनी बनोरूए। 16 तैनी बीतोरे वक्ते मां सैरी कौमन अपनि-अपनि बत्तां चलने दितू। 17 फिरी भी तैनी अपनो आप बेगवाह न बनाव, पन अपनि भलाई हेरानेरे लेइ तैनी अम्बरेरां झड़ी दिती, ते फसलां केरे लेइ मौसम बनाव, ताके तुसन हछु अन भोए ते तुश्शे दिल खुशी सेइं भरे।” 18 एना गल्लां जोइतां तैनेई लोक बेइ मुशकली सेइं रोके, कि एना इश्शे लेइ बलिदान न देन।

19 तैखन किछ यहूदी अन्ताकिया नगरे ते इकुनियुम नगरे मरां आए, ते तैनेई लोक अपने पासे केरतां पौलुस पुड़ पथराव करेन लगे, ते ते मुओरो बुझतां नगर करां बेइरोवं घसीटतां नीयो। 20 जैखन चले तैड़ी पुजे त तैनेई पौलुस घरे मां आनो ते ते खड़ो उठो ते वापस नगर मां अव, ते होरसां बरनबासे सेइं साथी दिरबे नगरे जो ज़लो जेव। 21 पौलुस ते बरनबासे तैस नगर मां खुशखबरी शुनाई ते बड़े चले बनाए, ते तैसेरां बाद तैना लुस्त्रा ते इकुनियुम नगरे ते अन्ताकिया नगरे मां वापस आए। 22 तैना हर एककी नगरे चलां केरे मन मज़बूत केरते ते ई शिक्षा देते थिये कि विश्वासे मां बनोरे राथ, ते इन जोते थी, “ते असेई बड़ो दुःख झैल्लतां परमेशरेरे राज़े मां दाखल भोनुए।” 23 ते तैनेई हर कलीसियाई मां तैन केरे बुजुर्ग ठहराए, ते बरतां रेखतां प्रार्थना की, ते तैना प्रभुएरे सुपुर्द किये, ज़ैस पुड़ तैनेई विश्वास कियोरो थियो। 24 फिरी तैना पिसिदिया इलाके मरां निस्तां पंफूलिया इलाके मां पुजे। 25 ते पिरगा नगरे मां वचन शुनेइतां त अत्तलिया नगरे मां आए। 26 तैट्ठां जिहाजे मां चेढ़तां वापस अन्ताकिया नगरे मां आए, ते तैड़ी तैनेई तैस सेवारे लेइ जै तैनेई पूरी कियोरी थी, परमेशरेरे अनुग्रहेरे सुपुर्द कियोरी थी। 27 अन्ताकिया नगरे मां पुजतां तैनेई कलीसियारे लोक अकोट्टे किये, कि परमेशरे असन सेइं साथी भोइतां केरहां-केरहां बडां कम्मां कियां! ते गैर कौमां केरे लेइ बत खोल्ली, कि तैना भी यीशु पुड़ विश्वास केरन। 28 ते तैना चलन सेइं साथी बड़े दिहाइन तगर राए।

15 फिरी किछ लोक यहूदिया इलाके मरां आए, ते विश्वासी ढलान ए शिक्षा देने लगे, “अगर मूसेरे रसमरे मुताबिक तुश्शो खतनो नई भोरो त तुसन मुक्ति न मैल्ली बटे।” 2 एस गल्ली पुड़ पौलुस ते बरनबासेरो तैन लोकन सेइं बड़ो मतभेद ते बड़ी बेंस भोइ, ते कलीसियारे लोकेई पौलुस ते बरनबास ते किछ होरे मैन्हु चुने कि तैना यरूशलेम नगरे मां गेइतां तैड़ी एस मसले पुड़ प्रेरितन ते बुजुर्गन सेइं गलबात केरतां हल कढन। 3 तैखन कलीसियारे लोकेई तैना खर्छां देइतां भेजे, ते जैखन तैना फीनीके ते सामरियारे इलाकन मांमेइं ज़लोरे थिये, तैनेई ज़ोवं, कि केन्चरे गैर कौमां केरे लोक खुशखबरी शुन्तां मसीह पुड़ विश्वास कियो, ते कलीसियाई मां शामिल भोए, एन शुन्तां सारे मसीह ढला बड़े खुश किये। 4 जैखन तैना यरूशलेम नगरे मां पुजे, त तैठेरी कलीसियारे लोक ते प्रेरित ते बुजुर्ग तैन सेइं बेड़ि खुशी सेइं मिले, ते तैखन पौलुस ते बरनबासे सब किछ बिस्तार दित्तो, कि परमेशरे तैन केरे ज़िरिये सेइं केत्रा-केत्रा कम्मां कियां। 5 पन फरीसी पंथेरे किछ लोकेई ज़ैनेई विश्वास कियोरो थियो, तैन मरां किछ ज़ोने लगे, “गैर कौमन मरां विश्वास केरनेवालां केरो खतनो कियोरो लोइ, ते एन मूसा नेबेरे कानूने पुड़ अमल केरनेरो हुक्म दित्तोरो लोइते।” 6 तैखन प्रेरित ते बुजुर्ग ए गलबात केरनेरे लेइ अकोट्टे भोए। 7 बड़ी बेंस भोनेरे बाद पतरसे तैन खड़े भोइतां ज़ोवं, “हे मेरे ढलाव, तुस ज़ानतथ कि बड़े चिरे पेइले परमेशरे अवं तुसन लोकन मरां

चुनो, ताके गैर कौमन मेरे ज़िरिये खुशखबरी शुनाई गाए ते तैना विश्वास केरन। 8 परमेशर ज़ै दिलेरो हाल ज़ानते, तैनी तैन भी इश्शी ज़ेरि पवित्र आत्मा देइतां इन हिराव, कि परमेशरे तैना अपने लोकां केरे ज़ेरे कबूल किये। 9 ते विश्वास केरनेरे ज़िरिये सेइं तैन केरे मन पवित्र केरतां असन मां ते तैन मां कोई फर्क न रख्यो। 10 त हुनी तुस परमेशरेरी अज़मैइश किजो केरतथ? कि गैर कौमन मरां ओरे चलन (यानी विश्वासी लोकन) पुड़ एत्रो बोझ किजो रखतथ, ज़ैन न असेई छुइयोए ते न इश्शे दादे-पड़दादे छुइयोए। 11 एरू केरनू ठीक नई, किजोकि इश्शू याकीन त इने कि प्रभु यीशु मसीहेरे अनुग्रह सेइं तैन केरे पापां केरि मुक्ति भोली, तेन्चरे इश्शी मुक्ति भोली, न कि मूसेरे कानूने सेइं।” 12 तैखन सारे लोक चुपचाप बरनबास ते पौलुसेरी गल्लां शुन्ने लगे, कि परमेशरे केन्चरे गैर कौमन मां तैन केरे ज़िरिये केरहे-केरहे निशान ते चमत्कार किये। 13 जैखन तैना चुप भोए त याकूब ज़ोने लगे, “मेरे ढलाव मेरी गल शुना।” 14 शमौन पतरसे रोड़ेचारे ज़ोवं, कि परमेशरे पेइले केन्चरे गैर कौमन पुड़ सिद्धी नज़र की, ताके तैन मरां मैन्हु चुनतां अपने लोक बनाए। 15 नेबी केरू बच्चन भी एसेरू ज़ेरूए ज़ेन्चरे लिखोरूए कि। 16 एसेरां बाद अवं फिरी एइतां दाऊदेरू राज़ बनेइलो, ज़ैन तैसेरे दुश्मनेई नाश कियोरू थियू। 17 ताके बाकी सारे लोक ते गैर कौमन समेत ज़ैना मीं कुजोरेन मेरे लोक भोन, ते मीं तोप्पन। 18 ए तैए प्रभु जोते ज़ै दुनियारे शुरुआती करां इन गल्लां केरि खबर देतो अव। (aiōn g165) 19 “एल्हेरेलेइ मेरो खियाल ईए, गैर कौमन मरां ज़ैना लोक परमेशरे कां एइतन, तैन अस यहूदी केरो कानून मननेरे लेइ मजबूर न केरम। 20 बल्के तैन चिट्ठी लिखतां एन ज़ोम कि मूरतन कां त्रैदोरी चीज़ां करां दूर रान, ते बदमैशी ते गलचैटी देइतां मारोरे जानवरां केरू मास न खान ते खून न खान। 21 किजोकि बड़े पेइले नगर-नगरे मां मूसेरे कानूनेरो प्रचार केरनेवाले भोते आए, ते तैना हर आरामेरे दिहाड़े प्रार्थना घरे मां पेड़ी गाती थी।” 22 तैखन प्रेरित ते बुजुर्ग ते सारी यरूशलेमेरे सारे कलीसिया मिलतां एन रोडू समझू, कि असन मरां किछ मैन्हु चुने गान, मतलब यहूदा, ज़ैस जो बरसब्बास ज़ोतन ते सीलास ज़ैना ढलान मां खास आन, ते तैन पौलुस ते बरनबासे सेइं साथी अन्ताकिया नगरेरे कलीसियाई मां भेज़म। 23 ते तैनेई तैन केरे हथ्ये इन लिखतां भेज़ू, “अन्ताकिया नगरे ते सीरिया ते किलिकिया इलाकां केरे रानेवाले विश्वासी ढलान ज़ैना गैर कौमन मरां आन, प्रेरितां ते बुजुर्ग ढलां केरू नमस्कार! 24 असेई शुनेरूए, कि किछ मैन्हु बगैर अजाज़तां तुश्शे इड़ी आए, ते तैनेई अपनि गल्लेई सेइं तुश्शो दिल परेशान कियो। 25 एल्हेरेलेइ असेई एन ठीक समझू, कि इट्ठां दूई मैन्हु अपने ढलारे बरनबास ते पौलुस सेइं साथी तुसन कां भेज़म। 26 एना एरे मैन्हु आन कि ज़ेन इश्शे प्रभु यीशु मसीहेरे लेइ अपनि जानरी भी परवाह नई। 27 एल्हेरेलेइ असेई यहूदा ते सीलास भेज़ोरेन, ते तैना एप्पू भी एना गल्लां शुनाले। 28 पवित्र आत्मा, ते असेई

एन ठीक समझू, कि इना ज़रूरी गल्लां केरे अलावा तुसन पुड़ होरो बोझ न देम। 29 बस्सा तुस मूरतन कां चाढ़ेरे बलिदाने ते खून करां ते गल दुबेइतां मारोरे जानवरे करां ते बदमाशी केरने करां दूर राथ एन तुशे लेइ रोडू भोलू। अग्रवं जो शुभकामना” 30 बस्सा तैना मैनु च़लते-च़लते अन्ताकिया नगरे मां पुजे, तैड़ी तेनेई कलीसियारे लोक अकोठे केरतां ए चिट्ठी तैन केरे हवालै की। 31 तैना चिट्ठी मां लिखोरी गल्लां पेढ़तां बड़े खुशी भोए। 32 यहूदा ते सीलास एप्पू भी नबी थिये, तैनेई तैठेरे विश्वासी ढ़लान शिक्षा दित्ती ते तैना विश्वासे मां पक्के बनाए। 33 किछ दिहाइना बाद तैठेरे विश्वासी ढ़लाएई आनन्दे सेइं ते प्रार्थना केरतां वापस भेजे, ताके अपने भेजने बालन कां वापस गान। 34 सीलासे अन्ताकिया नगरे मां रानेरो फैसलो कियो ते यहूदा अकैल्लो वापस यरूशलेमे जो अव। 35 ते पौलुस ते बरनबास अन्ताकिया नगरे मां रुकी जे, तैड़ी तैना काई होरि लोकन सेइं मिलतां लोकन प्रभु यीशुए वचनेरी शिक्षा देंते राए ते खुशखबरी शुनाते राए। 36 किछ च़िरेरां बाद पौलुसे बरनबास सेइं ज़ोवं, “च़ल असां तैन सारे नगरन मां गाम, जैड़ी असेई खुशखबरी शुनावरी थी, ते तैन विश्वासी ढ़लान सेइं मुलाकात केरम, ते हेरम कि तैन केरो कुन हाले।” 37 तैखन बरनबासे यूहन्ना ज़ैस जो मरकुस ज़ोतन, साथी नेनो चाव। 38 पन पौलुसे ठीक न समझू, कि यूहन्ना तैन सेइं साथी गाए, किजोकि तै पंफूलिया इलाके मां कम शैरतां अलग भोरो थियो। 39 पौलुस त बरनबासे एप्पू मांमेइं बड़ी अनबन भोइ, ते तैना अलग भोए, बरनबास ते मरकुस ज़िहाजे मां साइप्रस जो च़लो जे। 40 पन पौलुसे सीलास एप्पू साथी नीयो, ते विश्वासी ढ़लाएई तैन केरे लेइ प्रार्थना की, ते तैना परमेशेरे अनुग्रहेरे सुपुई किये ते तैना तैट्ठां च़ले जे। 41 पौलुस सीरिया ते किलिकिया इलाकन मांमेइं निस्सो च़लतो ते कलीसियां केरे विश्वासी लोकन मज़बूत केरतो जेव।

16 तैना फिरी दिखे नगरे ते लुस्त्रा नगरे मां आए, तैड़ी अक चेलो तीमथियुस नव्वेरो रातो थियो, तैसेरी अम्मा यहूदी थी, ते तै मसीह पुड़ विश्वास केरती थी, पन तेसेरो बाजी यूनान मुलखेरो रानेबालो थियो। 2 तीमथियुस लुस्त्रा नगरे मां ते इकुनियुम नगरेरे विश्वासी ढ़लान मां बड़ो रोड़ो मैनु थियो। 3 पौलुसेरी इच्छा ई थी, कि तै तैस साथी ने, तैन यहूदी केरि वजाई ज़ैना तैड़ी रहते तैसेरो खतनो कियो, किजोकि तैना सब ज़ानते थी कि तैसेरो बाजी यूनान मुलखेरो रानेबालो थियो। 4 पौलुस ते तैसेरे साथी नगर-नगरे मांमेइं च़लते जे, तैठेरे विश्वासी लोकन तेना हुक्मां केरे बारे मां ज़ोंते जे, ज़ैना यरूशलेम नगरे मां प्रेरितेई ते बुजुर्गेई मिलतां ठहरावरे थिये, ताके लोक तैन पुड़ अमल केरन। 5 बस्सा कलीसियां विश्वासे मां पेक्की भोती जेई, ते तैन केरि कलीसियां केरि तैधात बढ़ती जेई। 6 पौलुस ते तैसेरे साथी फ़्रुगिया ते गलातिया इलाकन मांमेइं निस्तां जे, किजोकि पवित्र आत्मा तैना आसिया इलाके मां बचन शुनाने करां रोकोरे थियो। 7 ते तैना मूसिया इलाकेरे नेडे पुज़तां, बितूनिया इलाके मां गानू

चाते थिये, पन यीशुए आत्मा गाने न दिते। 8 एल्हेरेलेइ तैना मूसिया इलाकेरे नेडेरां त्रोआस नगरे मांजो च़ले जे। 9 राती पौलुसे अक मैनु दर्शन मां लाव, “तै मकिदुनी इलाकेरो थियो, तै खड़ो भोइतां पौलुसे कां मिनत केरने लोरो थियो, कि पार समुन्दरेरे मकिदुनिया इलाके मां एइते इश्शी मदत केर।” 10 तैसेरे इस दर्शन हेरनेरां पत्ती लूशी अस पार मकिदुनिया इलाके मां गानेरे लेइ तियार भोइ जे, किजोकि असेई बुझू कि परमेशेरी असां तैड़ी खुशखबरी शुनानेरे लेइ कुजवरेम। 11 असां त्रोआस नगरेरां ज़िहाजे मां जे, ते पैनैरु सफर केरतां सुमात्राके टैप पुड़ आए, ते तैट्ठां होरसां नियापुलिस नगरे मां आए। 12 तैट्ठां असां फिलिप्पी नगरे मां पुजे, जैन मकिदुनिया इलाके मां खास नगरे, ते रोमी केरि बेसती मांए, ते अस तैस नगरे मां किछ दिहाड़े राए। 13 आरामेरे दिहाड़े असां नगरेरे फाटके मरां निस्तां दरियाए पुड़ पुजे, किजोकि असन उमीद थी कि तैड़ी यहूदी केरि प्रार्थना केरनेरी कोई ठार भोनीए, असां तैड़ी गेइतां बिश्शी जे, तैड़ी किछ कुआन्शां थी, असां तैन सेइं गल्लां केरने लगे। 14 इश्शी गल्लां शुन्ने बैली कुआन्शन मां अक परमेशेरी भक्त लुदिया नव्वेरी थी, ते थुआतीरा नगरेरी राने बाली थी, ते बैंगनी लिगड़ां बेचने बाली थी, ते प्रभुए तैसेरो मन खोल्लो, कि तै पौलुसेरे गल्लन पुड़ ध्यान केरे। 15 ज़ैखन तैसां ते तैसारे पूरे टब्बरे बपतिस्मो नीयो त तै बिनती केरतां ज़ोने लगी, “अगर तुस लोक मीं प्रभुएरी ईमानदार दासी समझतथ, त मेरे घरे च़ला ते बिश्शी राथ,” ते तैसारी मिनत शुन्तां असां खुशी भोए। 16 एक्की फेरे असां प्रार्थना केरनेरी ठारी जो च़लोरे थिये त असन अक दासी मैल्ली ज़ै भूतां केरे मदती सेइं एजनेबाले वक्तेरे बारे मां ज़ोती थी। ते अपने मालिकां केरे लेइ बड़े पेंडसे कमती थी। 17 तै पौलुसे पत्ती ते असन पत्ती च़ली ते ज़ोने लगी, “ए मैनु परमप्रधान परमेशेरो दासे, ते एना असन पापां केरि मुक्करी बत हिरातन।” 18 तै काई दिहाड़े एन्ने केरती राई, पन पौलुसे जिच भोव, ते मुड़तां तैस भूते जो ज़ोवं, “अवं तीं यीशु मसीहेरे नव्वे सेइं हुक्म देताई निस्सी गा, ते तै तैखने तैस मरां निस्सी जेई।” 19 ज़ैखन तैसेरे मालिकेइं हेरू कि इश्शी कमैइयरी उमीद टलुटी जेई, त तैनेई पौलुस ते सीलास टलेइतां चौके मां प्रधानां केरे हवाले किये। 20 तैनेई पौलुस ते सीलास हाकिमन कां पैश किये, ते ज़ोने लगे, “एना यहूदीन ते इश्शे नगर मां बड़ी खलबली मच़ाने लगोरेंन। 21 ते एरे रुवाज़ेरी शिक्षा देतन, जैन केरू केरनू ते मन्नू असन रोमे मां रानेबालान केरे इश्शे लेइ बिलकुल भी ठीक नई।” 22 एन शुन्तां सारे लोक पौलुस ते सीलासेरे खलाफ अकोठे भोए, ते हाकिमेई तैन केरां लिगड़ां खोलतां छिन्दां ते सोटेई बानेरो हुक्म दित्तो। 23 सिपैहीयेइं तैन खूब बेंतेइं बैही ते कैदखाने मां छड़े, ते कैदखानेरे प्रधाने हुक्म दित्तो, कि रोड़ेचारे पेरहो दित्तो गाए। 24 तै हुक्म शुन्तां तैना आँधरी कोठी मां छड़े, ते तैन केरे पावन लेकड़री बेड़ि लेइ। 25 एध्दी राती पौलुस ते सीलास प्रार्थना केरने मां मघन थिये, ते परमेशेरां भजना लोरे

थी ज़ोने, ते होरे कैदी भी शुन्ने लोरे थियो। 26 अचानक अक भुंजल अव, ते कैदखानेरे बुनीयाद हिल्ली ते सारां दारां खुल्ली जेआं, ते सैरी कैदी केरि बेड़ि भी खुल्ली जेई। 27 कैदखानेरो प्रधान बींझो ते खडो उठो, ते तकने लगे, ते हेरते कि कैदखानेरां दारां खुल्ली जोरेन, त तैनी समझू कि सारे कैदी नश्वोरिन, ते तैनी अपनि तलवार खिच्यो कि अव अपनो आप मैरी छेड़ी। 28 पन पौलुसे जोरे सेइं जोवं, “अपनो आप न मार किजोकि असां सब इडी आम।” 29 तैखन तै दीयो बैलतां अन्तर जेव, ते पौलुसे ते सीलासेरे पावन पुड़ पेव, 30 फिरी तैनी तैना बेइर आने ते ज़ोने लगे, “जनाब अव कुन केरि, कि मेरी मुक्ति भोए?” 31 तैनेई ज़ोवं, “प्रभु यीशु मसीह पुड़ विश्वास केर, त तीं ते तेरे टब्बरे पावन करां मुक्ति मैल्लनीए।” 32 ते तैनेई तैस त तैसेरे टब्बरे प्रभुएरु वचन शुनाव। 33 तैखने तैने राती पौलुस ते सीलास नेइतां तैन केरे ज़खम धोए, ते तैनी तैसेरे सारे टब्बरे बपतिस्मो नीयो। 34 फिरी तैनी तैना अपने घरे ने, ते तैन खाने जो रोटी दिती, ते सारे टब्बरे परमेशरे पुड़ विश्वास केरतां बड़े खुश थियो। 35 होरसां झेइं हाकिमेई सिपाही भेजतां बिस्तार भेजो, कि तैन मैन् हथरां छेड़ी देथ। 36 दरोगा पौलुसे जो ज़ोवं, “हाकिमे हुक्म दित्तोरोए कि पौलुस ते सीलास कैदखाने मरां हथरां छडा, एल्हेरेलेइ तुस खुशी सेइं चले गाथ।” 37 पन पौलुसे तैन सेइं ज़ोवं, “तैनेई अस ज़ैना रोम मुलखेरे राने बालेम, बगैर कसूरे सेबभी केरे सामने मारे कुटे ते कैदखाने मां छडे, ते हुनी चुपचारे हथरां छडने चाते? पन एन न भोइसखे, तै एप्पू एज्जे ते असन बेइर कडे।” 38 सिपेहीयेइं गेइतां हाकिमन बिस्तार दित्तो, कि पौलुस ते सीलास रोम मुलखेरे राने बालेन, ते तैना डेरि जे। 39 तैनेई तैडी एइतां तैन करां माफ़ी मग्गी, ते फिरी तैना कैदखाने मरां बेइर आने ते मिनत की, कि नगर मरां चले गाथ। 40 बस्सा पौलुस ते सीलास कैदखाने मरां बेइर निस्से ते लुदियारे घरे जे, ते तैडी विश्वासी ढ़लान सेइं मिले ते तैन शान्ति देइतां चले जे।

17 पौलुस ते सीलास तैसेरां बाद अम्पिपुलिस ते अपुल्लोनिया नगरन मामेइं गेइतां थिस्सलुनीके नगरे मां आए, तैडी यहूदी केरू अक प्रार्थना घर थियूं। 2 पौलुस अपने रीतरे मुताबिक प्रार्थना घरे मां ट़लाई आरामेरे दिहाइन तगर पवित्रशास्त्रेरी किताबी मरां तैन सेइं बेंस केरतो राव। 3 पौलुस तैन केरो मतलब खोल्ली-खोल्ली समझातो थियो, “कि यीशु मसीहेरो दुःख झैल्लनो ते मुइदन मरां जीतू भोनू ज़रूरी थियूं, कि ज़ैस यीशुएरे बारे मां अव प्रचार केरतम, तैए मसीह आए।” 4 तैन मरां किछ यहूदी ते गैर कौमां केरे लोक ज़ैनेई विश्वास कियोरो थियो, ते होरि भी बेड़ि भक्त कुआन्शां ज़ैनेई विश्वास कियोरो थियो पौलुसे ते सीलासे सेइं मिली जेई। 5 पन यहूदेईं जलनी सेइं काई नगरन मां बुरे लोक अकोट्टे केरतां हंगामो केरनो शुरू कियो। तैनेई यासोनेरे घरे पुड़ हमलो कियो ताके पौलुसे ते सीलासे लोकां केरे सामने आनन। 6 पन ज़ैखन तैना न मैल्ले त यासोन त काई होरे विश्वासी ढ़ला घसीटतां

नगरेरे हाकिमन कां आने, ते ज़ोरे-ज़ोरे सेइं ज़ोने लगे, “एन मैनेई हर ठैरी परेशानी फैलावरी, ते अज़ इडी भी पुजोरेन। 7 ते एना यासोने अपने घरे मां रखोरेन, ते एना लोक महाराजोरे हुक्मेरी खलाफत केरतन, ते ज़ोतन कि राजो त यीशु आए।” 8 ए गल शुन्तां नगरेरे हाकिम ते सारे लोक परेशान भोए। 9 ते तैनेई यासोन ते बाकी लोक ज़मानती पुड़ हथरां छडे। 10 इलोझां विश्वासी ढ़लाएईं पौलुस ते सीलास तैटां बिरीया नगरे जो भेजे, ज़ैखन तैना तैडी पुजे त तैना यहूदी केरे प्रार्थना घरे मां जे। 11 बिरीया नगरेरे लोक थिस्सलुनीके नगरेरे यहूदन करां भले थियो, तांए तैनेई खुशखबरी बेड़ि खुशी सेइं कबूल की, तैना रोज़ एना गल्लां केरे बारे मां गलबात केरते थियो, कि पौलुसेरी गल्लां सेच्छी आन कि नई। 12 एल्हेरेलेइ काई यहूदेईं ते काई होरि यूनानी इज़्जतदार कुआन्शेईं भी यीशु पुड़ विश्वास कियो। 13 ज़ैखन थिस्सलुनीके नगरेरे यहूदन पतो लगे कि पौलुस बिरीया नगरे मां परमेशरेरु वचन शुनाते, ते तैना लोकन भटकाने ते हलचल मचाने लगे। 14 तैखन विश्वासी ढ़लाएईं पौलुस समुन्दरेरे बन्ने भेजो, पन सीलास त तीमुथियुस तैडी राए। 15 ते पौलुसेरी मदत केरनेबाले एथेंस नगरे तगर जे, ते सीलास ते तीमुथियुसेरे लेइ बिस्तार नेइतां चले जे, कि मीं कां जल्दी एज्जे। 16 ज़ैखन पौलुस एथेंस नगरे मां तैन बलगने लगगोरो थियो, त एन तकते कि सारू नगर मूरती सेइं भेरतांए त तैसेरो दिल बड़ो उदास भोव। 17 एल्हेरेलेइ तै प्रार्थना घरे मां यहूदन ते तैन सेइं ज़ैना परमेशरेरो डर मन्नेबाले (भक्त) गैर कौमन मरां यहूदन मां ओरे थियो चौके मां गेइतां मिलतो थियो, ते तैन सेइं रोज़ बेंस केरतो थियो। 18 किछ इपिकूरी ते किछ स्तोईकी उस्ताद तैस सेइं बेंस केरने लगे, ते तैन मरां किछ ज़ोने लगे, “बकवादी कुन ज़ोनू चाते?” ते किछ ज़ोने लगे, “ए त होरि देबतां केरो पतो देनेबालो भोइ सकते, किजोकि पौलुस यीशुएरो ते कने जीते भोनेरी खुशखबरी शुनातो थियो।” 19 तैखन तैनेई तै एप्पू सेइं साथी अरियुपगुस नव्वेरे मन्दरे मां नेव, ते तैस पुच्छू, “कुन अस ज़ैनी सकतम कि ज़ैस नव्वे पंथेरी तू शिक्षा देतस, तै कुने? 20 असां तेरे ऐशेरां बेड़ि आजीब गल्लां शुन्ने लोरेम, ते असां एन ज़ानून चातम कि एन केरो कुन मतलबे?” 21 (द्रासले मां एथेंसेरे लोक कुन देशी कुन परदेशी अपनि फुरस्तरो सारो मौको होरि कम्मां केरे बजाहे सिर्फ नव्वीं-नव्वीं गल्लां ज़ोने ते शुन्ने मां गुज़ारते थियो।) 22 तैखन पौलुस अरियुपगुसे नव्वेरे मन्दरे मझाटे खडो भोइतां ज़ोने लगे, “हे एथेंसेरे लोकव, अव हेरताई कि तुस हर गल्ली मां देबतन बड़ो उच्चो द्रजो देतथ। 23 ज़ैखन अव तुश्शे नगर मां हंठतो फिरतो थियो, त मेरी नज़र तुश्शे पूजनेरी चीज़न पुड़ ते बलिदानेरी ठारी पुड़ पेई, ज़ैस पुड़ लिखोरू थियूं, अनज़ान परमेशरेरे लेइ, बस्सा तुस ज़ैस ज़ानाथ नन्ना ते तैसेरी पूजा केरतथ, अव तुसन तैसेरे बारे मां ज़ोताई। 24 ज़ैनी परमेशरे दुनिया ते सैरी चीज़ां बनेवरिन, तै धेरतरो ते अम्बरेरो मालिके, तै हथ्यां केरे बनेवरे मन्दरन मां न राए। 25 तैस मैनेरे मदतरी

ज़रूरत नई, किजोकि तै केन्ची चीज़री ज़रूरत नई, तै सैरन ज़िन्दगी ते सांस ते सब किछ देते। 26 तैनी एककी मैन्हु सेइं हर कौमारे लोक पैदा किये, ताके सारे ज़मीनी पुड़ आबाद भोन, तैनी तैन केरि ज़िन्दगरे दिहाड़े बनाए ते रानेरे लेइ ठार बनाई। 27 परमेशरे एन कियूं ताके लोक तैस तोप्पन ते शैइद तोपते-तोपते तैन मैल्ली गाए, हालांकी तै असन केन्ची करां दूर नई। 28 किजोकि तै असन सेइं साथी आए ते ज़ींते रातम ते च़लतम फिरतम, ज़ेन्चरे कि तुशे लिखने बालेई भी ज़ोरू, ‘असां त तैसेरे बच्चेम।’ 29 ते परमेशरेरे बच्चे भोइतां सोचेरू लोड़े, कि ईश्वरत्व सोने, चैदरी, या घोड़ेरी मूरतरीए ते ज़ै केन्ची मैनेरे हाथां केरि कारीगिरीए ते खियाले सेइं आए। 30 एल्हरेलेइ परमेशरे लोकां अज्ञानतारे वक्ते पुड़ ध्यान न दित्तू, ते हुनी ते मैन्नू सेब्भी ठैरन हुक्म देते कि मन फिरान। 31 किजोकि तैनी अक दिहाड़ी ठुवालैवरीए ज़ैखन तै सच्चे सेइं दुनियारो इन्साफ एककी एरे मैनेरे ज़िरिये सेइं केरेलो, ज़ै तैनी रखबोरुए, ते तै तैनी मुड़न मरां ज़ींतो केरतां ए गल सैरी मैन्नू साबत कियोरीए।’ 32 ज़ैखन ज़ैखन तैनेई मुड़न केरि आदालतरे बारे मां शुनू त तैन मरां किछ एस गल्लरी मज़ाक बनाने लगे, ते किछेई ज़ोवं, ‘अस एस बारे मां फिरी कोस्कोई शुन्मेलो।’ 33 एन हेरतां पौलुस तैट्ठां निस्तां च़लो जेव। 34 पन किछ लोक तैस सेइं मिली जे, ते तैनेई प्रभु पुड़ विश्वास कियो, तैन मरां अक दियुनुसियुस ज़ै अरियुपगुसेरो प्रधान थियो, ते अक कुआन्श थी, तैसारू नवं दमरिस थियूं, ते तैन केरे अलावा हारे भी बड़े मैन्हु थिये।

18 तैसेरां बाद पौलुस एथेंस नगरे मरां निस्तां कुरिन्थुस नगरे मां अव। 2 तैड़ी तैस अक यहूदी मैल्लो, तैसेरू नवं अक्विला थियूं, ते तै पुन्तुस इलाकेरो रानेबालो थियो, ते तैसेरी कुआन्शरू नवं प्रिस्किल्ला थियूं, ते दुइये साथी इतालिया इलाकेरां ओरां थियां, किजोकि क्लौदियुस हाकिमे हुक्म दित्तोरो थियो, कि सारे यहूदी रोमे मरां च़ले गान ते पौलुस तैन कां जेव। 3 किजोकि पौलुसेरो ते अक्विलारो तेम्बु बनानेरो बुपार थियो, तांए पौलुस तैस सेइं साथी राव, तैना कम केरने लगे। 4 ते पौलुस हर आरामेरे दिहाड़े तैन केरे प्रार्थना घरे मां गातो थियो, ते यहूदी लोकन ते यूनानी लोकन समझाने लगे कि, यीशु पुड़ विश्वास केरा। 5 ज़ैखन सीलास ते तीमुथियुस मकिदुनिया इलाके मां आए, त पौलुस वचन शुनाने मां मघन थियो, ते लगातार यहूदन सेइं एन ज़ोतो थियो कि यीशु ही मसीह आए। 6 पन ज़ैखन यहूदी खलाफत त कने तुहीन केरने लगे, त पौलुस अपना लिगड़ां ठुड़कां ते ज़ोने लगे, ‘‘तुशो खून तुशे दोगे पुड़ भोए! अवं बेइलज़ाम आई, अज़ेरे बाद अवं गैर कौमन कां गेइलो।’’ 7 तैखन प्रार्थना घरे मरां निस्तां तीतुस यूस्तुस नंवेरे एककी परमेशरेरे भक्त मैनेरे घरे जेव, ज़ै गैर कौमी मरां थियो, जेसेरू घर प्रार्थना घरे सेइं साथी थियूं। 8 एस प्रार्थना घरेरो प्रधान क्रिस्पुसे ते तैसेरे सारे टब्बरे प्रभु पुड़ विश्वास कियो, ते बड़े कुरिन्थिसेरे लोकेई शुन्तां विश्वास कियो ते बपतिस्मो नीयो।

9 एककी राती प्रभुए पौलुसे सेइं दशनि मां गल की, ते ज़ोवं, ‘‘डर नन्ना ते तू ज़ो ते चुप न रा, 10 किजोकि अवं तीं सेइं साथी आई, ते कोई तीं पुड़ हमलो केरतां नुकसान न पुजेई सकेलो, किजोकि इस नगर मां बड़े लोकन ज़ैना मीं पुड़ भरोसो रखेले।’’ 11 पौलुस तैड़ी डैड साल राव, ते तैन परमेशरेरी खुशखबरी शिखालतो राव। 12 ज़ैखन गल्लियो, अखाया इलाकेरो हाकिम थियो, त यहूदेई मिलतां पौलुसे पुड़ हमलो कमाव, ते पौलुस टलेइतां आदालतरे तखते कां नीयो, ते ज़ोने लगगे। 13 ‘‘एन लोकन समझाते, कि परमेशरेरी आराधना एन्चरे केरा, ज़ै मुसेरे कानूनेरे बिलकुल बरखलाफे।’’ 14 पौलुस ज़ैखन किछ ज़ोने बालो थियो, त गल्लियोए यहूदन सेइं ज़ोवं, ‘‘हे यहूदी लोकव, अगर केन्ची जुमेंरी या कोई बड़ी बुरी गल भोथी त अवं तुशशी शुनेथो। 15 पन तुशशो इलज़ाम त सिर्फ खाली गल्लां केरो ते नंवां केरो ते तुशशे कानूनेरे बारे मां आए, ते अवं न ज़ैनी, किजोकि अवं एन गल्लां केरो हाकिम बननो न चैई।’’ 16 ते गल्लियो हुक्म दित्तो कि एन तखते करां बेइरोवं कडे। 17 तैखन तैनेई सेब्भीई प्रार्थना घरेरो प्रधान सोस्थिनेस इन्साफेरे तखतेरे सामने कुटो, पन गल्लियोए एन गल्लां केरि किछ भी परवाह न कमाई। 18 पौलुस काई दिहाड़े कुरिन्थुस नगरे मां राव, ते फिरी तै विश्वासी ढ़लान करां च़लो जेव ते किंखिया मां अपनि मिनत पूरी केरनेरे लेइ अपने दोगेरी टिंड बनाई। ते बादे मां समुन्दरी ज़िहाज़े मां सीरिया इलाके जो च़लो जेव, ते प्रिस्किल्ला ते अक्विला भी तैस सेइं साथी थियां। 19 ज़ैखन तैना इफिसुस नगरे मां पुजे त पौलुसे प्रिस्किल्ला ते अक्विला तैड़ी छड़ां, ते पौलुस एककी प्रार्थना घरे मां जेव ते यहूदन सेइं बेंस केरने लगगे। 20 ज़ैखन तैन लोकेई तैस कां मिनत की, ‘‘कि तू हेजू किछ दिहाड़े असन कां बिशा।’’ त पौलुसे तैन सेइं मन्नु, 21 पन ज़ैखन पौलुस तैट्ठां च़लो त तैनी तैन सेइं वादो कियो, ‘‘अगर परमेशरेरी मर्ज़ी भोइ त अवं फिरी तुसन कां एज्जेलो।’’ ते फिरी पौलुस ज़िहाज़े मां च़ेढ़तां इफिसुसे जो च़लो जेव। 22 ते कैसरिया नगरे मां ज़िहाज़े मरां ओस्सो त तैनी यरूशलेम नगरे मां गेइतां तैन केरि कलीसियारे लोकन सेइं मिलने जेव, ते फिरी तै अन्ताकिया नगरे मां अव। 23 अन्ताकिया नगरे मां किछ च़िर बितनेरे बाद तै तैट्ठां च़लो जेव, ते गलातिया ते फ़ूगिया इलाकां केरे सब चलन मज़बूत केरतो जेव। 24 अपुल्लोस नंवेरे अक यहूदी थियो, तैसेरू ज़र्म सिकन्दरिया नगरे मां भोरू थियूं, तै बड़ो ज़ाना मैन्हु थियो, ते पवित्रशास्त्रेरे बारे मां बड़ो ज़ानकार थियो, तै इफिसुस मां अव। 25 तैनी प्रभुएरे बत्तरी शिक्षा शिखोरी थी, ते लगातार यीशुएरे बारे मां ठीक-ठीक शुनातो ते शिखालतो थियो, पन तै सिर्फ यूहन्नारे बपतिस्मे तगर ज़ानतो थियो। 26 तै प्रार्थना घरे मां बेधड़क च़ारे ज़ोने लगगे, पन प्रिस्किल्ला ते अक्विला तैसेरी गल्लां शुन्तां, तैनेई तै अपने घरे नीयो, ते परमेशरेरी बत्तारे बारे तैस होरू भी रोड़े च़ारे ज़ोवं। 27 ज़ैखन तैनी थापू कि पार ओस्तां अखाया इलाके जो गाए ते विश्वासी ढ़लाएई तैस हिम्मत दित्ती,

ते तैट्टेरे चेलन जो चिट्ठी लिखी, कि एस सेइं रोड़ेचारे मिलाथ, ते तैनी तैड़ी पुजतां तैन केरि बड़ी मद्दत की, ज़ैनेई अनुग्रहरे वजाई सेइं विश्वास कियोरो थियो। 28 किजोकि तै बड़े ज़ोरे शोरे सेइं यहूदन सेइं बेंस केरतां खुल्ले आम पवित्रशास्त्रे सेइं साबत केरतो थियो, कि यीशु ही मसीहे।

19 ज़ैखन अपुल्लोस कुरिन्थुस नगरे मां थियो, त पौलुस बेइए सारे इलाकन मेइं इफिसुस नगरे मां अव, तैसेरी तैड़ी होरे भी काई चेलन सेइं मुलाकत भोइ। 2 तैनी तैन पुच्छू, “कुन विश्वास केरते बार तुसन पुड़ पवित्र आत्मा उतरोरी थी?” तैनेई जुवाब दित्तो, “असेई त पवित्र आत्मा रे बारे मां शुनेरू भी नई।” 3 तैखन पौलुसे ज़ोवं, “फिरी तुसेई कोस किसमेरो बपतिस्मो नीयो?” तैनेई जुवाब दित्तो, “यूहन्नारो।” 4 पौलुसे ज़ोवं, “यूहन्ना त तैन लोकन बपतिस्मो दित्तो ज़ैनेई पापन करां मनफिराथ, ते यूहन्ना इसाएली लोकन ज़ोवं, जै मेरे बाद एजनेबालोए, तैस पुड़ विश्वास केरा, जै मसीह आए।” 5 एन शुन्तां तैनेई प्रभु यीशु मसीहेरे नंवे सेइं बपतिस्मो नीयो। 6 ते ज़ैखन पौलुसे तैन पुड़ हथ रखे त पवित्र आत्मा तैन पुड़ उतरी, त तैना अलग-अलग भाषा केरने लगे, ते भविष्यवाणी केरने लगे। 7 एना सब लगभग 12 मैन्हु थियो। 8 फिरी पौलुसे प्रार्थना घरे मां गेइतां टलेइ महीन्न तगर बड़े निडर भोइतां परमेशरेरे राज़ेरे बारे मां लोकन सेइं बेंस केरने समझाने लाव। 9 पन तैन मरां किछ सकत दिलेरे भोइ जे, ते तैनेई विश्वास केरनेरे बजाहे इन्कार कमाव, ते एस पंथेरे बारे मां बुरू ज़ोने लगे, एल्हेरेलेइ पौलुस तैन करां कनारे भोइ जेव, ते चले भी कनारे किये ते तुरन्नुसेरे सुकुले मां बेंस केरतो ते तैन शिखालतो राव। 10 दूई सालन तगर एरू भोतू राव, एड़ी तगर कि आसिया इलाकेरे रानेबाले कुन यहूदी ते कुन यूनानी सेबभेई प्रभुएरू बच्चन शुनू। 11 ते परमेशर पौलुसेरे ज़िरिये सेइं बडां-बडां कम्मां ते चमत्कार हिरातो थियो। 12 एड़ी तगर कि पौलुस ज़ैस रूमाले सेइं या फटके सेइं हथ लातो थियो, त तैना बिमारन पुड़ छडते थिये, त तैना बिमार बेज्जोते थिये, ते अगर तैन पुड़ भूतां केरो सैयो भोतो थियो, त तैना लोक ठीक भोते थिये। 13 पन किछ यहूदी मड़द ज़ैना फुक-फक केरते थी, ते एन केरने लगे कि, ज़ैन पुड़ भूतां केरो सैयो भी भोए तैन पुड़ यीशुएरे नंवे इन ज़ोइतां फुक फक देने लाए, “ज़ैस यीशुएरो प्रचार पौलुस केरते, अव तैसेरी कसम देताई।” 14 यहूदी प्रधान याजक ज़ेसेरू नवं स्क्कवा थियूं, तैसरां सत मट्ठां थियां, तैना एन्ने कम्मां केरतां थियां। 15 ते भूते जुवाब दित्तो ते ज़ोवं, “अवं यीशु मसीह भी ज़ानताई ते पौलुसे भी ज़ानताई, पन तुस कौन आथ?” 16 तैखन तै मैन्हु ज़ैस पुड़ भूतेरो सैयो थियो, तैन यीशुएरे नंवे सेइं फुक-फक देने बालन जो पेव, ते तैना अपने कब्जे मां केरतां एत्रे कुट्टे कि तैना ज़ख्मी भोइतां नगनगे तैठां नशे। 17 ज़ैखन इफिसुस नगरेरे रानेबाले यहूदन ते यूनानी लोकन एस गल्लरो पतो लगे, त तैना डेरि जे, ते प्रभु यीशु मसीहेरी बड़याई की। 18 ते ज़ैनेई

विश्वास कियोरो थियो, तैनेई एइतां अपने-अपने बुरे कम्मां केरो इकरार सेबभी केरे सामने कियो। 19 ते केही लोकेई ज़ैना जैदू केरते थिये, तैना किताबां सैरेई एन्तां सेबभी केरे सामने फुकी, ते ज़ैखन तैन किताबां केरि कीमतारो हिसाब लाव त कोई 50000 चँदरे सिकन करां जादे थी। 20 एन्चरे प्रभुएरो वचन बड़े तकड़े चारे फैलतो जेव ते भारी राव। 21 एन गल्लां केरे बाद पौलुसे फैसलो कियो, कि अव मकिदुनिया ते अखाया इलाकां केरे विश्वासी लोकन सेइं मिलतां यरूशलेम नगरे जो गेइ, ते तै ज़ोवं, “यरूशलेम नगर मां गेइतां रोम नगर भी मां गानू भी ज़रूरीए।” 22 एल्हेरेलेइ अपने सैथन मरां तीमुथियुस ते इरास्तुस दूई मैन्हु मकिदुनिया इलाके जो एप्पू करां पेइले भेजे, ते एप्पू भी किछ चिरे आसिया इलाके मां राव। 23 तैस वक्ते तैस पंथेरे बारे मां हंगामो भोव। 24 किजोकि अक चँदरो करीगिर थियो, तैसेरू नवं दिमेत्रियुस थियूं, ते अरतिमिस देबारे मन्दरेरी मूरती बनेइतां, कारीगिरन बडू कम दुवेरु थियूं, ज़ैस सेइं तैन केरो बडो बुपार च़ल्लोरो थियो। 25 तैनी एन कम ज़ान्ने बाले सारे कारीगिर अकोट्टे कमाए ते ज़ोने लगे, “हे मेरे इलाव असां इन कम केरतां बड़े पेंइसे कमातम। 26 पन तुस हेरतथ ते शुन्तन कि एना दूई मैन्हु पौलुसेरे ज़ेरे केन्चरे इफिसुस नगरे ते लगभग सारे आसिया इलाकेरे नगरन मां लोकन टपलाने लोरेन ते ज़ोतन कि ज़ै हथेरां केरि कारीगिरीए, तै ईश्वर नई। 27 डर एस गल्लरो नई, सिर्फ कि इश्शे पैशेरी बदनामी भोली, बल्के पुरानी देबी अरतिमिस, जै आए तैसारू मन्दर भी घटया समझू गालू, जेसेरी पूजा सारे आसिया इलाके मां ते सारे दुनियाई मां केरतन, तैसेरी इज्जत भी खतम भोइगानिये।” 28 ज़ैखन तैन लोकेई शुनू त तैना सरकी सेइं भेरोई जे, ते ज़ोरे-ज़ोरे नहरे देने लगे, “इफिसी केरि देबी अरतिमिस, महान आए!” 29 हेरते-हेरते सारे नगर मां हलचल मेचि जेई, लोकेई गयुस ते अरिस्तार्खुस, मकिदुनी इलाके ज़ैना पौलुसे सेइं साथी ओरे थिये, तैना टलेइतां घसीटते तमाशो हेरनेरी ठेरी जो दौवड़ते ने। 30 पौलुस भी सभाई मां गानू चातो थियो पन चेलेई तै रोको। 31 ते आसिया इलाकेरे हाकिमन मरां भी तैसेरे काई दोस्तेई तैस जो बिस्तार भेजतां ते मिनत केरतां ज़ोवं, कि तमाशो हेरने न गेइयां किजोकि तैड़ी बडो खतरोए। 32 तैड़ी पैन्चयती मां खलबली मचौरी थी, किजोकि किछ लोक नहरे देते थिये, ते बड़े लोकन पतो न थियो कि तैना तैड़ी किजो अकोट्टे भोरेन। 33 तैखन तैनेई सिकन्दर, जै यहूदी लोकेई खडो कियोरो थियो, भीड़ी मरां किछ लोकेई तै अग्रोवं कियो, ते सिकन्दर हथ्ये सेइं इशारो केरतां लोकां केरे सामने जुवाब देनो चातो थियो। 34 पन ज़ेरो लोकन पतो लगे कि ए यहूदी आए, त सब ज़ोरे-ज़ोरे लगभग दूई घंटन तगर चिन्डां मारने लगे, “इफिसुस नगरेरे देबी अरतिमिस, महान आए।” 35 तैखन एककी मंत्री नगरेरे लोकन चुप करेइतां ज़ोने लगे, “कि इफिसुस नगरेरे रानेबालो कौन न ज़ाने कि इफिसुस नगर लोक अरतिमिस देबारू मन्दरे, ते एसेरे मूरतरो

बड्डी रखवालेन, जैन अम्बरेरां बिछड़ोरो थी। 36 जैखन एना गल्लां केरे खलाफ केन्चे किछ न जोंवं त ठीक थियूं कि तुस चुप राथ ते बगैर सोच सेमझातां किछ न केरेथ। 37 तुसेई जैना मैन्हु इडी आनोरेन तैनेई न मन्दरे लुटेरुए न इश्शी देबारे खलाफ तुहीन कियोरीए। 38 अगर दिमेत्रियुस ते एसेरे कारीगिरन केन्ची पुड़ दाओ केरनोए त आदालतरु दार खुल्लूए, ते हाकिम भी आन, जैडी तुस एककी होरि पुड़ दाओ केरि सकतथ। 39 पन अगर तुस होरि कोन्ची चीज़े बारे मां पुछ्नु चातथ त तैसेरो फैसलो भी पंचैदती मां कियो गालो।” 40 मीं इस गल्लरो डरे कि अगर हाकिम इस हंगामेरे बारे मां शुनेलो त ज़ोलो कि अस रोमी सराकारारी खलाफरज़ी केनेरी कोशिश केरने लोरेम, ते अस एत्रे लोकां केरे अकोट्टे भोनेरो कुन जुवाब देमेले। 41 एन ज़ोनेरां बाद तैनी पैन्चैयत खतम कमाई।

20 जैखन हंगामो मुकको त पौलुसे चले कुजाए ते तैन केरो होसलो बधव, ते तैन बिश्शा ज़ोइतां मकिदुनिया इलाके जो च़लो जेव। 2 तैस सारे मुलखे मांमेइं चेलन होसलो देइता यूनान इलाके मां (जैस जो अखाया इलाको भी ज़ोतन) अव। 3 तैडी तै ट्लाई महीने राव, ते जैखन तै समुन्दरी ज़िहाज़े मां सीरिया इलाकेरे पासे गानेबालो थियो, त यहूदी केरे लीडरेई तैस बत्तां मारनेरी साज़िश बनाई, तैस पतो लगे त एल्हेरेलेइ तैनी एन रोडू समझू कि मकिदुनिया इलाके मांमेइं जो सीरिया इलाके जो गाए। 4 बिरीया नगरेरे रानेबाले पुरुसैरू मटू सोपत्रुस, ते थिस्सलुनीकि मांमेइं अरिस्तार्खुस ते सिक्नुन्दुस ते दिरबे नगरेरो गयुस, ते तीमुथियुस ते आसियारो तुखिकुस ते त्रुफिमस आसिया इलाके तगर असन सेइं साथी च़ले जे (लूका भी तैन सेइं साथी थियो)। 5 पन तैना अग्रोंव गेइतां त्रोआस नगरे मां असन बलगते राए। 6 ते अस अखमीरी रोटी केरे तिहारे बाद फिलिप्पी नगरे मरां सफर केरतां पंच दिहैडी मां त्रोआस नगरे मां तैन कां पुज़े, ते रात दिहैडी तैडी राए। 7 हफतेरे पेइले दिहाड़े असां प्रभु भोजेरे लेइ अकोट्टे भोए, ते पौलुसे होरसां तैठां अग्रोंव गानू थियूं, त एल्हेरेलेइ तै तैन सेइं गल्लां केरने लाव ते एध्दी राती तगर तैन शिक्षा देने लाव। 8 दोपरे जैडी असां सब अकोट्टे बिश्शोरे थिये, त तैडी काई दीये बलते थिये। 9 त अक नौजवान देरी मां बिशोरो थियो, ते तैसेरू नवं यूतुखुस थियूं, तै पौलुसेरो प्रचार ठड्डी तगर शुन्तां तैस निड्ल आई, ते ट्लेइयोवं छतरां उन्डो खिरको, ते तै मेरि जेव। 10 पौलुस बुन अव ते तै नौजवान ट्लेइतां तैस सेइं लिपटो ते ज़ोने लगे, “कि डरा नन्ना ए ज़ीतोए।” 11 फिरी तैनेई बा गेइतां सेभ्भेई मिलतां रोटी खाइ, ते फिरी ट्लेकडोने तगर बच्चन शुनाने लगे, तैखन ते तैठां च़लो जेव। 12 लोकेई तै नौजवान ज़ीतो घरजो नीयो, ते तैन बडी खुशी भोइ। 13 असां अगगर गेइतां ज़िहाज़े मां सुवार भोइ जे, ते अस्सुस नगरे जो च़ले जे, ताके तैडी पौलुसे भी ज़िहाज़े मां च़ाढ़म, किजोकि पौलुसे पेइले पैदल गानेरो बिस्तार कियोरो थियो। 14 जैखन तै असन अस्सुस नगरे मां मैल्लो त तै

असेई ज़िहाज़े मां च़ाढ़ो ते असां मितुलेन नगरे मां आए। 15 तैठां असां ज़िहाज़े मां सुवार भोइ जे ते अस खियुस जज़ीरेरे सामने पुजे, ते अग्री दिहाड़े असां सामुसे मां पुजे, ते होरसां अस मीलेतुस नगरे मां आए। 16 पौलुसे थापेरू थियूं, कि अवं इफिसुस नगरे मां उतरेलो, किजोकि तै आसिया इलाके मां जादे वक्त बीतानो न थियो चातो, किजोकि तै जल्दी मां थियो, कि अगर भोइसखे, त तै पिन्तेकुस्त तिहारेरे दिहाड़े यरूशलेम नगरे मां राए। 17 जैखन अस मीलेतुस नगरे मां ओस्से, त पौलुसे इफिसुस नगरेरे कलीसियारे बुजुर्गन जो बिस्तार भेज़ो कि तैना एज्जन। 18 जैखन तैना तैस कां आए, त तैनी तैन सेइं ज़ोंवं, तुस ज़ानतथ कि पेइले दिहाड़रां जैखन अवं आसिया इलाके मां पुज़ो, अवं तेइसेरो देंतो अज़ तगर हर वक्त तुसन सेइं साथी केन्चरां राव। 19 मतलब बड़े नेरमी सेइं, ते ऐंखरू बछोडी-बछोडी, ते तैन अज़मैश मां जैना यहूदी केरि च़लैकी सेइं मीं पुड़ एई, अवं प्रभुएरी सेवा केरतो राव। 20 ते जैना-जैना गल्लां तुशे लेइ फैइदेरी थी, तैना मीं तुसन सेइं बगैर केन्चेरे डरे तुसन सेइं ज़ोई छेड्डी, ते बल्के जैन किछ भी शिखालू दिले सेइं ते घर-घर गेइतां शिखालू। 21 बल्के अवं यहूदी लोकां ते यूनानी लोकां केरे दुइयां केरे सामने गवाही देताई कि तैना परमेशेरेरे सामने पापन करां मन फिरान, ते इश्शे प्रभु यीशु मसीह पुड़ विश्वास केरन। 22 हेरा हुनी अवं पवित्र आत्मा गल मेन्तां यरूशलेम नगरे जो गाताई, ते मीं पतो नई कि तैडी मीं पुड़ केरि-केरि गुजरेली। 23 अवं सिर्फ एत्रू ज़ानताई कि पवित्र आत्मा मीं हर नगर मां एन ज़ोती राई, कि बन्धना ते मुसीबत मेरे लेइ तियारन। 24 पन मेरी जान, मेरे लेइ कोई कदर कीमत न रखवे, त बस्सा अवं एन चाताई कि मेरी दौड़ पूरी भोए ते तैस सेवाई पूरी केरि, जै मीं परमेशेरेरे अनुग्रहेरे खुशखबरी पुड़ गवाही देनेरे लेइ प्रभु यीशु करां मैल्ली। 25 ते हुनी अवं ज़ानताई, कि तुसेई अवं जैन मां परमेशेरेरे अनुग्रहेरी खुशखबरी हर पासे शुनातो राव, त मीं फिरी न लाएले। 26 एल्हेरेलेइ अवं तुसन साफ-साफ ज़ोई छडताई, कि जैना लोक यीशु पुड़ विश्वास केरने बगैर मरेले, त अवं तैन केरे ज़िमेवार नई। 27 किजोकि अवं बगैर केन्ची डेररां तुसन शिखालतो राव, कि परमेशेरी मज़ीं तुशे लेइ कुने। 28 बस्सा अपनो ते सारे विश्वासी लोकां केरो खियाल रखा, जेसेरे लेइ तुस पवित्र आत्माे तरफां चुनोरेथ, कि परमेशेरी कलीसियारी रखवाली केरा, जै लोक तैनी अपने खूने सेइं धिन्नोरेन। 29 अवं ज़ानताई कि मेरे गानेरां बाद झूठे उस्ताद मारने बालां गिदां केरे ज़ेरे तुसन मां एज्जले, ते जेन्चरे तैना भैडून मारतन तेन्चरे तैना झूठे उस्ताद तुसन नुकसान पुज़ाले। 30 बल्के तुसन मरां भी एरे लोक खड़े भोले जैना सत्र ट्लोइ मरोड़ केरतां छेडले, ताके चेलन अपने पासे केरन। 31 एल्हेरेलेइ बींझे राथ ते याद रखा, कि अवं ट्लाइ साल लेरां देंतो रात दिहैडी हर एककी तैन खबरदार केरतो राव। 32 हुनी अवं तुसन परमेशेरे, ते तैसेरे अनुग्रहेरे वचनेरे सुपुर्द केरताई, कि जै तुसन विश्वासे मां मज़बूत

केरि सकते, ते तुसन तैस जागिराओ हकदार बनेइ सकते, ज़ेसरो वादो तैनी कियोरोए ज़ैनी तुस पवित्र कियोरेथ। 33 मीं केन्चेरे सोनो चेंदरू या लिगड़ां केरू लालच नई कियेरू। 34 तुस एप्पू ज्ञानतथ कि मीं अपने हथेइ सेइं अपने ते अपने सैथी केरि हर अक ज़रूरत पूरी कियोरीए। 35 मीं तुसन सब किछ केरतां हिराव, कि एन्चेरे सेइं कमज़ोरन समैली सकतम, कि प्रभु यीशु मसीहरी गल्लां याद रखम, “कि देनू नेने करां जादे धने।” 36 एन गल्लां केरे बाद पौलुसे ज़ैथू केरे भारे बिश्तां तैन सेबभन सेइं साथी प्रार्थना की। 37 तैना सब गले मिलतां लेरां देने लगे, ते पौलुसे फुम्मड़ी देने लगे। 38 खास केरतां तैना इस गल्ली सेइं दुखी थी, ज़ैना तैनी ज़ोरी थी, कि तुस मीं फिरी कधी न लाएले, ते तैनेई ते ज़िहाजे तगर पज़ाव।

21 ज़ैखन असां तैन करां चले जे त समुन्दरे सफर शुरू कियूं, त सिधे बतां कोस जज़ीरे मां आए, ते होरसां अस रूदुस मां पुजे, ते फिरी तैड़ां पतरा जज़ीरे मां चले जे। 2 ते अक ज़िहाज़ फीनीके इलाके जो गांतू मैल्लू, त असां तैस पुड़ च़ेढ़तां सफर शुरू कियूं। 3 ज़ैखन इश्शी नज़र साइप्रस जज़ीरे पुड़ पेई, त अस तैस बांए हथ्ये ओसैलतां सीरिया इलाके जो चले जे, सूर नगरे मां ओस्से, किजोकि इश्शे ज़िहाजे तैड़ी किछ बोझ उसालनो थियो। 4 तैड़ी असन चले मैल्ले ते तैन कां असां सत दिहाड़े राए। तैनेई पवित्र आत्मा रे ज़ोने मुताबिक पौलुसे यरूशलेम नगरे मां गानेरे लेइ ठाको। 5 सत दिहैइना बाद कुआन्थां मठन समेत नगरेरे बेइर तगर साथी आए, ते समुन्दरेरे बन्ने पुज़तां असेई ज़ैथू केरे भारे बिश्तां प्रार्थना की। 6 फिरी असां तैन करां अलग भोए त ज़िहाजे मां च़ेढ़तां चले जे, ते तैना भी अपने-अपने घरजो चले जे। 7 ज़ैखन असां सूर नगरे मरां सफर पूरू केरतां पतुलिमयिस मां पुजे, ते विश्वासी ढ़लान जो नमस्कार केरतां तैन सेइं साथी अक दिहाड़ी राए। 8 ते होरसां असां तैड़ां ज़ेलतां कैसरिया नगरे मां आए, ते फिलिप्पुस खुशखबरी प्रचार करनेबालेरे घरे जे ते तैड़ी राए, ज़ै सत्तन मरां अक थियो। 9 तैसेरी च़ेरे कुवेरी कुइयां थी, ते तैना भविष्यवाणी केरती थी। 10 ज़ैखन अस तैड़ी काई दिहाड़े राए, त तैड़ी अक नबी थियो, ज़ेसेरू नव अगबुस थियूं, तै यहूदिया इलाकेरां ओरो थियो। 11 तैनी असन कां एइतां पौलुसेरे मजे सेइं अपने हथ पाव बंधे ते ज़ोने लगे, “पवित्र आत्मा इन ज़ोतीए कि ज़ैस मैनेरू इन मज़ आए, तैस यरूशलेम नगरेरे यहूदी इसेरे ज़ेरे बंधेले, ते गैर कौमां केरे लोकां केरे हवाले केरेले।” 12 ज़ैखन असेई एना गल्लां शुनी, त असेई ते होरि लोकेई पौलुसे कां मिनत की, कि यरूशलेम नगरे मां न गेइयां। 13 पन पौलुसे जुवाब दितो, “तुस एन कुन केरने लोरेथ? तुस किजो लेरां देइ-देइ मेरो दिल टूलोइने लोरेथ? अव यरूशलेम नगरे मां प्रभु यीशु मसीहरे नव्वे सेइं सिर्फ बंधोनेरे लेइ नई बल्के मरनेरे लेइ भी तियार आई।” 14 ज़ैखन तैनी न मन्यू त असां चुप राए, “कि प्रभुएरी मर्ज़ी पूरी भोए।” 15 किछ दिहाइना बाद असां सफरेरी

तियारी केरने लगे, ते फिरी असां यरूशलेम नगरे जो चले जे। 16 कैसरिया नगरेरे किछ चले असन सेइं साथी चले, ते असेई मनासोन नव्वेरो साइप्रसरो अक पुरानो चेलो साथी आनो कि अस तैसेरे घरे रहम। 17 ते ज़ैखन असां यरूशलेम नगरे मां पुजे, त इश्शे विश्वासी ढ़ला बड़े खुशी सेइं असन सेइं मिलने आए। 18 होरसां असां पौलुसे साथी नेइतां याकूब सेइं मिलने जे, तैड़ी सब बुजुर्ग अकोट्टे भोरे थिये। 19 तेखन तैनी नमस्कार केरतां, ज़ैना- ज़ैना कम्मां परमेशरे तैसेरी सेवारे ज़िरिये सेइं गैर कौमन मां कियोरां थी, अक-अक केरतां सब ज़ोआं। 20 तैनेई इन शुन्तां परमेशेरी तारीफ की, ते फिरी पौलुसे सेइं ज़ोने लगे, “हे ढ़ला तू ज्ञानतस, कि यहूदन मरां हज़ारेई लोकेई विश्वास कियोरोए, ते तैना सब मूसेरे कानूने पुड़ अमल केरने मां मघनन्। 21 ते तैन तेरे बारे शिखालेरू कि तू गैर कौमन मां रानेबाले सारे यहूदन ए शिक्षा देंतो ओरोस, कि मूसा नेबेरे कानूनेरे शारने, ते अपने मट्ठां केरो खतनो न केरा, ते न यहूदी केरे रीतन पुड़ न च़ला। 22 त फिरी कुन कियूं गाए? लोकेई ज़रूर शुनेले कि इड़ी ओरोस। 23 एल्हेरेलेइ ज़ैन अस तीं सेइं ज़ोतम, तैन केर। इश्शे इड़ी च़ेरे मैन्हु आन ज़ैनेई मिनत मगोरीए। 24 तू तैन एप्पू सेइं साथी ने ते तैन सेइं मिलतां अपनो आप शुद्ध केर, ते तैन केरो खचों भी दे, ताके तैना अपनो दोगेरी टिंड बनान। तैखन सेबभन पतो लगनोए कि ज़ैना गल्लां तेरे खलाफ फैलेवरिन, तैन केरि कोई बुनीयाद नई, ते तू एप्पू भी सच्चे दिले सेइं मूसेरे कानूने पुड़ अमल केरतस। 25 ते ज़ैड़ी तगर तैन गैर कौमां केरो सवाले, कि ज़ैनेई विश्वास कियोरोए, तैन केरे बारे मां असेई पेइले फैसलो केरतां लिखतां भेजू, कि तैना मूरतन कां बलिदान कियेरू मास ते खूने करां ते गलचैटी देइतां मारोरे जानवरां केरे मासे करां परहेज केरन, ते बदमाशी न केरन। 26 होरसां पौलुसे तैना मैन्हु साथी ने, ते तैन सेइं साथी अपने आपे शुद्ध केरतां मन्दरे मां जेव, ते खबर दित्ती कि तैन केरे शुद्ध भोनेरे बाद च़ढतल च़ाढ़नेरे दिहाड़े केइस पूरे भोनेन।” 27 ज़ैखन शुद्ध भोनेरे सत दिहाड़े पूरे भोनेबाले थिये, त आसिया इलाकेरे यहूदेई पौलुस मन्दरे मां लाव त लोक भड़काए, ते तैस टलेइतां चिन्दां मारने लगे। 28 “हे इसाएली लोकव इश्शी मदत केरा, ईए तै मैनुए, ज़ै हर ठैरी लोकन इश्शे कानूनेरे खलाफ ते मन्दरेरे खलाफ शिक्षा देंतो रहते, ते एनी एसां अलावा गैर कौमां केरे लोक इश्शे मन्दरे मां एन्तां ते पवित्र ठार अपवित्र कराते।” 29 तैनेई एन एल्हेरेलेइ ज़ोवं कि तैनेई पौलुस इफिसुस नगरेरे रानेबाले त्रुफिमस सेइं साथी लाहोरो थियो, ते समझते थिये कि पौलुसे ते ज़रूरी मन्दरे मां नीयोरो भोनेए। 30 तैखन सारे नगर मां हलचल मेचि जेई, ते मैन्हु देवइतां जम्हां भोए, ते पौलुस टलेइतां मन्दरे मरां घसीटतां बेइर आनो, ते लूशी दारां बंद कियां। 31 ज़ैखन तैना तैस मारनेरी कोशिश केरने लवरे थिये, त फौजी टोलरे सरदारे कां खबर पुजी, कि बड़े लोकेई यरूशलेम नगरे मां खलबली मचोरीए। 32 तैखन तैना सिपेहिन ते सूबेदारन एन्तां तैन कांजो दौड़ो, ते तैनेई

फौजी टोलरे सरदारे ते सिपाही लेइतां पौलुस मारनो कुटनो बंद कियो। 33 फौजी टोलरे सरदारे नेडे गेइतां पौलुस अपने कब्जे मां कियो, ते तैस दुई शांगलेइ सेइ बंधनेरो हुक्म दितो, ते फिरी तैनी पुच्छू, “ए मैन्हु कौने ते एनी कुन कियेरु आए?” 34 तैस भीड़ी मां किछ लोक चिन्दां मारते थिये, ते एत्री शौर मचौरी थी, कि तैस पूरो पतो न लगो ते तैनी हुक्म दितो, कि पौलुसे किल्लै मां पुजाथ। 35 जैखन पौलुस सिपाहीयेइ पेवड़न उबरो बल्लेवरो थियो, त लोकां केरे वजाई सेइ सिपाहीयेइ पौलुस उबरो छुइतां नेव। 36 सारे लोक जैना पौलुसे पत्ती पेवरे थिये, तैना चिन्दां मारते थिये, “एस मारा!” 37 पौलुसे सिपाही किल्लै मां पुजाने बाले थिये, त तैनी फौजी टोलरे सरदारे सेइ ज़ोवं, “कुन मीं अज़ाज़ते कि अवं तीं सेइ किछ ज़ोई?” ते तैनी पुच्छू, “तू यूनानी भाषा ज्ञानतस?” 38 कुन तू तै मिस्र मुलखेरो रानेबालो नई, जैनी किछ ज़िरे पेइले सरकारारी खलाफत कियोरी थी, ते 4000 मैन्न जैन कां हथियार थिये तैना जंगले मां नीयोरे थिये? 39 पौलुसे ज़ोवं, “अवं त यहुदी आई, ते तरसुस नगरेरो राने बालोई, जैन किलिकिया इलाकेरु मुशूर नगर, अवं तीं कां मिनत केरताई मीं लोकन सेइ गल केरने दे।” 40 जैखन तैनी अज़ाज़त दित्ती, त पौलुस पेवड़न पुड़ खड़ी भोइतां लोकन जो हथ्ये सेइ इशारो कमाव कि चुप रान। ते जैखन तैनेई चुप कमाई त पौलुसे इब्रानी भाषाई मां ज़ोनू शुरू कमाव:

22 “मेरे ढूलाव ते बुजुर्गाव, मेरी गल शुना, जै अवं अपनि सफैई मां पैश लोरोई केरने।” 2 जैखन लोकेई तैस करा इब्रानी भाषा ज़ोती शुनी त तैना चुप रेइजे, तैखन पौलुसे ज़ोवं: 3 “अवं त यहुदी आई, ते अवं किलिकिया इलाकेरे तरसुस नगरे मां ज़रमो, पन इस नगर मां गमलीएल करां शिक्षा हासिल की, ते अपने दादां-पड़दादां केरे कानूने ठीक तरीके सेइ शिखोरीए, ते अवं भी परमेशररे लेइ एरो मघन थियो, ज़ेरे अज़ तुस आथ। 4 मीं मड़दन ते कुआन्थन बंधतां, ते कैद केरतां, ई पंथ इड़ी तगर स्ताए, ते तैना माराए भी। 5 एपू महायाजक ते सब बुजुर्ग एस गल्लरे गवाह आन, कि मीं दमिश्क नगरे मां रानेबाले यहुदी ढूलां केरे लेइ चिट्टी एन्होरी थी, ते अवं तैड़ी एस नीती सेइ जोरो थियो, ते जैना तैड़ी भोन तैन सज़ा देनरे लेइ बेन्धतां यरूशलेम नगरे जो नेही।” 6 “अवं जैखन सफर केरते-केरते दमिश्क नगरेरे नेडे पुज़ो, त तै दुपाहरां केरो मौको थियो। ते अम्बरेरां अक बड़ी लौ आई ते मेरे चेब्रे पासन बलने लगी। 7 ते अवं तल्ले बिछड़ी जेव, ते मीं अक आवाज़ शुनी, जै मींजो ज़ोने लोरी थी, हे शाऊल, हे शाऊल तू मीं किजो स्तातस? 8 त मीं पुच्छू, हे प्रभु तू कौन आस? त तैनी मींजो जुवाव दितो, अवं यीशु नासरी आई, जैस तू स्तातस। 9 मेरे सैथेई लौ त लाई पन तैन कोई गल न समझी, कि ते आवाज़ मीं सेइ कुन लोरीए ज़ोने? 10 त मीं पुच्छू, हे प्रभु अवं कुन कम्मेई, प्रभुए ज़ोवं, उठ दमिश्क नगरे मां गा तैड़ी तीं जैन तेरे केरनेरे लेइ रखेरुए तैड़ी तीं सेइ ज़ोवं गालू। 11 मेरे सैथेई अवं हथ्येरां टलेइतां दमिश्क

नगर मां पुज़ाव। किजोकि तैस बड़े महिमारे वजाई सेइ मीं किछ न लेइयोवं।” 12 “तैड़ी अक मैन्हु हनन्याह नव्वेरो कानूनेरे मुताबिक भक्त मैन्हु अव, ते तैट्टेरे यहुदन मां बड़ो इज़्जतदार थियो। 13 तै मीं कां खड़ो भोइतां ज़ोने लगो, हे ढूला, शाऊल, अपनि एछछी खोल्ल, ते मेरी एछछी तैखने खुल्ली जेई, ते अवं तैस लहने लगो। 14 तैखन तैनी ज़ोवं, इश्शे बुजुर्गां केरे परमेशरे तू चुनोरोस, ताके तू तैसेरी मज़ीं पूरी केरस ते मसीह लास ते तैसेरी गल्लां शुनस। 15 किजोकि तू सैरी लोकन मां तैसेरो गवाह भोलो, ते तैन ज़ोलो कि तीं कुन लाहेरुए ते कुन शुनेरुए। 16 हुनी चिर किजो लातस? उठ, ते बपतिस्मो ने ते तेरे पाप माफ़ भोन।” 17 “ते जैखन अवं यरूशलेम नगरे मां वापस अव, ते अवं मन्दरे मां प्रार्थना केरने लोरो थियो, त मीं दर्शन लावं। 18 ते तै लाव ते एन ज़ोतू शुनू कि लूश केर, ते यरूशलेम नगरे मरां लूशी निस, किजोकि एना लोक मेरे बारे मां तेरी गवाही कबूल न केरेले। 19 मीं ज़ोवं, हे प्रभु एना लोक ज्ञानतन कि अवं हर प्रार्थना घरे मां गातो थियो, ते केन्चरे अवं तेरे मन्ने बालन कैद केरतो ते कुटतो थियो। 20 ते जैखन तेरे गवाह स्तिफनुस मारने लोरे थिये, त अवं भी तैड़ी थियो, ते तैसेरे मारने मां खुशी थियो। ते अवं मारने बालां केरां लिगड़ां पहरतो थियो। 21 ते प्रभुए मीं सेइ ज़ोवं, ‘गा अवं तीं गैर कौमन कां दूर-दूर भेजेलो।’” 22 सारे लोक तैसेरी गल्लां शुन्ने लोरे थिये, पन जैखन ते इड़ी तगर पुज़ो त सारे लोक ज़ोरे-ज़ोरे चिन्दां मारने लगो, “ए ज़ीतो रखनेरे काबल नई!” एस मार। 23 जैखन लोकां केरि शौर ते चिन्दां चेलती रेइ, त तैना चोगे शैरतां धूड़ आसमाने उडारने लगो। 24 त फौजी पलटनरे सरदारे पौलुस किल्लै मां नेनेरो हुक्म दितो, “एस कोड़ेइ सेइ बाथ ते एसेरू बियांन घिन्ना ताके पतो लगो, कि लोक किजो चिन्दां मारने लोरेन।” 25 जैखन तैना कोड़ेइ सेइ बानेरे लेइ पौलुस रेसी सेइ बंधो, त तैनी एक्की सूबेदारे सेइ ज़ोवं जै तैड़ी नेडे थियो। “कुन अक रोमी नगरेरे मैन्हु बगैर कसूरे झुसनां जेइजे?” 26 जैखन तैनी सूबेदारे एन शुनू त तै फौजी पलटनरे सरदारे कां जेव, “तू कुन ज़ोतस? ए त अक रोमी मैनुए।” 27 फौजी पलटनरे सरदारे पौलुसे कां एइतां पुच्छू, “कुन तू रोमीस?” तैनी ज़ोवं, “हाँ।” 28 इन शुन्तां फौजी पलटनरे सरदारे ज़ोवं, “कि मीं रोमी भोनेरी पदवी बड़े पेंडसे देइतां हासिल कियोरीए।” ते पौलुसे ज़ोवं, “पन अवं त ज़मनेरो रोमी।” 29 जैना लोक पौलुसेरू बियांन घिन्ने बाले थिये, तैना नेश्शी जे, फौजी पलटनरे सरदारे भी इन बुझतां कि ई रोमीए, ते तैनी तै बंधो, ते डेरि जेव। 30 होरसां ते ठीक-ठीक ज्ञानेरी इच्छा सेइ कि यहुदी तैस पुड़ किजो दोष लातन, एल्हेरेलेइ तैनी तै खोल्लो, ते प्रधान याजक ते सारी महासभा अकोड़ी केरनेरो हुक्म दितो, ते पौलुस बुन गेइतां तैन केरे सामने खड़ी कियो।

23 पौलुसे महासभारे लोकां केरे पासे रोड़ेचारे तेकतां ज़ोवं, “हे ढूलाव अवं बेडि नेक नीती सेइ परमेशरेरे हुक्मां केरे मुताबिक जिन्दगी गुज़ारतो ओरोई।” 2 महायाजक हनन्याह

पौलुसेरी एना गल्लां शुन्तां पौलुसे कां खड़े भोरे लोकन हुक्म दितो, कि एसेरे तुत्तरे पुड़ थप्पड़ बाथ। 3 पौलुसे तैस सेइं ज़ोवं, “हे पाखंडी, परमेश्वर तीं बाए। तू इड़ी बिशोरोस कि मूसेरे कानूनेरे मुताबिक मेरो इन्साफ केरस, ते कुन तू मूसेरे कानूनेरे खलाफ बानेरो हुक्म देतस?” 4 जैना तैड़ी खड़खड़े थिये, त तैना ज़ोने लगे, “कुन तू परमेश्वरे महायाजकेरी तुहीन केरतस?” 5 पौलुसे तैन सेइं ज़ोवं, “ढूलाव मीं पतो न थियो, कि ए महायाजक, किजोकि लिखोरूप, तू अपने लोकां केरे प्रधाने जो बुरू न जो।” 6 पौलुस ज्ञानतो थियो, कि तैन मां किछ सद्की भी आन, ते किछ फरीसी लोक भी आन ते तै महासभाई मां ज़ोरे सेइं ज़ोने लगे, “हे ढूलाव अवं त फरीसी लोकां केरे खान्दनी मरां आई, ते मीं पुड़ एनेई एल्हेरेलेइ मुकदमो ज़लेवरोए, कि अवं उमीद रखताई कि मुडदे फिरी ज़ींते भोले।” 7 पौलुसेरुन एन ज़ोते फरीसी ते सद्की लोकन एप्पू मांमेइं लड़ाई शुरू भोइजेइ, ते सेव्भन एप्पू मांमेइं खल बनो। 8 किजोकि सद्की ज़ोतन कि मुडदे ज़ींते नई भोने, ते न स्वर्गदूतन ते न कोई आत्मा आए, पन फरीसी लोक एन दुइये गल्लन पुड़ विश्वास केरतन। 9 तैखन तैना बेंस केरने लग्गे, शास्त्री लोकन मरां जैना फरीसी लोकन मां थिये, तैना खड़े भोइतां लड़ाई केरतां ज़ोने लगे, “असां इस मैन्हु मां कोई कसूर न लहम, अगर केन्वी आत्मा या स्वर्गदूते एस सेइं कोई गल कियोरीए त फिरी कुन भोवं?” 10 गल एत्री बेद्वी जेई, कि फौजी पलटनरे सरदारो बुड्डू, कि एरु न भोए कि पौलुसेरे टोटे-टोटे बनान, त तैनी हुक्म दितो कि बुन गाथ ते पौलुसे ज़बरदस्ती तैट्ठां कढा ते किल्लै मांजो आनां। 11 तैस्से राती प्रभु यीशुए पौलुसे कां एइतां ज़ोवं, “हे पौलुस हिम्मत रख जेन्वरे तीं यरूशलेम नगरे मां मेरी गवाही दितोरीए, तेन्वरे तीं रोमे मां भी गवाही देनी भोली।” 12 होरसां झेझां किछ यहूदी मैनेई मिलतां फैसलो कियो, ते कसम कमाई कि ज्ञातगर असां पौलुसे कल्ल न केरम, तांतगर किछ न खाम ते न पीम। 13 एस साज़िशो मां 40 मैन् करां जादे थियो। 14 तैना प्रधान याजकन ते बुजुर्गन कां जे, ते ज़ोने लगे, “असन पुड़ लानत भोए, अगर असां पौलुसे मारनेरे बगैर किछ खाम या पीम, असेई त तैस खतम केरनेरी कसम कमेवरीए। 15 एल्हेरेलेइ तुस सब महासभा मां मिलतां फौजी पलटनारे सरदारो कां दरखुवास देथ, कि तै पौलुसे लोकां केरे सामने आने, ताके एस मुकदमेरी सारी हकिकत फिरी पतो ज़ले, एस करां पेइले पौलुस इड़ी पैश कियो गाए, असां तियार आम, कि तैस मारमा।” 16 पन ज़ैखन पौलुसेरे बेइनारे मट्टे एस साजशरो पतो लगे, त तैनी किल्लै मां गेइतां पौलुसे पतो दितो, कि तैना लोक तैस मारनो चातन। 17 तैखन पौलुसे सुबेदारन मरां अक कुजाव, ते तैस सेइं ज़ोवं, “कि इस जवाने फौजी पलटनरे सरदारो कां नेथ, किजोकि ए किछ ज़ोनेरे लेइ ओरोए।” 18 बरसा, तैनी तै फौजी पलटनरे सरदारो कां साथी नीयो, ते ज़ोने लगे, “अवं पौलुसे ज़ै कैदी आए, तैनी अवं कुजाव, ते तैनी मीं कां दरखुवास

कियोरीए, कि इस जवाने अवं तीं कां एन्ही, किजोकि ए किछ तीं सेइं ज़ोनु चातो।” 19 फौजी पलटनरे सरदारो तैस जवानेरो हथ टलेइतां तै कनारे ज़ेरे नीयो ते तैस पुच्छने लगे, “तू मीं सेइं कुन ज़ोनु चातस?” 20 तैनी जवाने ज़ोवं, “यहूदी लीडरेई अकोट्टे भोइतां तीं कां दरखुवास देनेरो फैसलो कियोरोए। कि तू पौलुसेरी पुछ गन केरनेरे बहाने तैस महासभा मां आनस। 21 तू तैन केरि गल न मेन्ना, किजोकि कोई 40 मैन् करां जादे यहूदी तैस पुड़ हमलो केरनेरी कोशिशो मां आन, तैनेई कसम कमेवरी कि ज्ञातगर असां पौलुसे न मारम तांतगर असां किछ खाम या पीम, त असन लानत भोए, हुनी तैना तियारन, सिर्फ तेरे वादोरे इंतज़ारे।” 22 फौजी पलटनरे सरदारो तै जवान वापस भेजो, ते तैस ज़ोवं कि गा, “एना गल्लां केरो जैना तीं मीं सेइं ज़ोई, होरि केन्वी पतो न लोड़ी लग्गोरो।” 23 तैखन तैनी दूई सुबेदार कुजाए, ते तैन सेइं ज़ोवं, “तुस 200 सिपाही ते 70 सुवार ते 200 भाले ज़लानेबाले तियार रख्खा, तैनेई राती 9 बजेई कैसरिया नगरे मां गानूए। 24 ते पौलुसेरे लेइ घोड़े तियार रखा, ताके तै गवर्नर फेलिक्स कां हफाजती सेइं पुजाव गाए।” 25 ते फौजरे प्रधाने अक चिट्ठी एस तरिकेरी लिखी। 26 “श्रीमान फेलिक्स गवर्नर क्लौदियुस लूसियासे जो नमस्कार। 27 ए तै मैनुए, ज़ै यहूदेई टलातोरो थियो, ते एस तैना मारनेबाले थिये, त अवं सिपाही नेइतां साथी जेव, ते तै छुटाव, किजोकि मीं पतो थियो, कि तै अक रोमेरो रानेबालोए, त फौजी पलटन नेइतां छुटाव। 28 लिहाज़ा एन ज्ञानेरी केरनेरे लेइ कि तैना तैस पुड़ कुन इलज़ाम लातन, मीं ते तैन केरि महासभा मां पैश कियो। 29 ते पतो लगे, कि तैन केरो इलज़ाम तैन केरे कानूनेरे मुताबिक एसेरे खलाफ कोई एरो इलज़ाम नई, कि जेसेरे ज़िरिये सेइं असां तैस कैद केरम या मौतरी सज़ा देइ सखम। 30 मीं पतो लग्गोरोए कि एसेरे खलाफ कोई साज़िश भोइ राहोरीए, ते मीं ए जल्दी तीं कांजो भेजोरोए, ते मीं तैस पुड़ दाओ केरनेबालन भी ज़ोरूप, कि तैना भी तीं कां अपनो मुकदमो पैश केरन।” 31 सिपाही, फौजी पलटनरे सरदारोरे हुक्मेरे मुताबिक पौलुसे एप्पू सेइं साथी नेइतां रातो रात अन्तिपत्रिस नगरे मां पुजाव। 32 होरसां दीसां घोड़ सुवारन तैस सेइं साथी अग्री-अग्री गानेरो हुक्म दितो, ते तै एप्पू किल्लै मांजो वापस ज़लो जेव। 33 ज़ैखन घोड़ सुवार कैसरिया नगरे मां पुजे त तैनेई गवर्नर कां चिट्ठी देइतां पौलुस तैस कां पैश कियो। 34 गवर्नर चिट्ठी पेढ़तां पुच्छू, “ए कौस इलाकेरो रानेबालोए?” ज़ैखन तैस पतो लगे कि ए किलिकिया इलाकेरो रानेबालोए। 35 त तैनी ज़ोवं, कि अवं तेरो मुकदमो तैखन शुनेलो, “ज़ैखन तीं पुड़ दोष लाने बाले भी इड़ी हाज़र भोले।” तैखन तैनी हुक्म दितो कि पौलुसे हेरोदेसेरे पहेरे मां रख्खा।

24 पंजे दिहैइना बाद हनन्याह महायाजके किछ बुजुर्ग ते तिरतुल्लुस नंवेरो वकील साथी कैसरिया नगरे मां पुजे, ते गवर्नर कां पैश भोइतां पौलुसेरां खलाफ फरयाद कमाई। 2

जैखन पौलुस पैश कियो त तिरतुल्लुस इलज़ाम लेइतां ज़ोने लाव, “हे महान फेलिक्स, तेरे वजाई सेइं अस बड़े खुशी सेइं रातम, ते तेरे ज़िरिये सेइं इस कौमरी केत्री बुरैई सुधैरी गैतिन। 3 एन अस हर ठैरी हर किसमे सेइं मन्तम। 4 पन हुनी अवं तेरो जादे वक्त नेनो न चैई, अवं तेरी मिनत केरताई कि इश्शी अक दूई गल शुन। 5 असेई लाहेरूए कि ई मैन्हु बड़ो फसाद केरनेबालोए, ई दुनियारे सारे यहूदन मां फितनाबाज़े, ते नासरी कुपंथेरो प्रधान आए। 6 एनी त मन्दरे भी अशुद्ध केरनेरी कोशिश की, ते एल्हेरेलेइ असेई ए टलेइतां एस पुड़ एस अपने कानूनेरे मुताबिक मुकदमो च़लानो चाते थियो। 7 पन फौजी पलटनरो सरदार लूसियास असन करां ज़बरदस्ती नेही जेव। 8 ते इस पुड़ दोष लाने बाले तीं कां हाज़र भोनेरो हुकम दे। इन सेबभी गल्लां केरे बारे मां अस एस पुड़ दोष लातम, तू एप्पू सत्र ज़ान।” 9 यहूदी लोकेई भी तैस सेइं साथी भोइतां ज़ोवं, कि एना गल्लां केन्चां भोइ सेकतिन। 10 जैखन गवनर पौलुस बियांन देनेरे लेइ इशारे कियो, त पौलुसे जुवाब दितो, “अवं ज़ानताई कि तू केही सालां केरो देंतो इस कौमरो इन्साफ केरनेबालो आस, एल्हेरेलेइ अवं अपनि सफाई तीं कां पैश केरताई। 11 तू एप्पू पतो केरि सखत्स कि अवं 12 दिहाड़े पेइले यरूशलेम नगरेरे मन्दरे मां आराधना केरनेरे लेइ जोरो थियो। 12 मेरे मुदेइयेइं अवं मन्दरे मां केन्ची सेइं भी बेंस केरतो नई लाहोरो, ते प्रार्थना घरे मां ते नगर मां इरां उरां लड़ाई केरतो भी नई लाहोरो। 13 हुनी एना इलज़ाम ज़ैना मीं पुड़ लाने लोरेन, ते तेरे सामने साबत न केरि सखे। 14 हाँ अवं इकरार ज़रूर केरताई कि ज़ैस पंथे एना कुपंथ ज़ोतन, अवं तैसेरे मुताबिक अपने दादे-पड़दादां केरे परमेशेरी आराधना केरताई, ते ज़ैन किछ मूसेरे कानूने ते नेबी केरि किताबी मां लिखोरूए, तैन सेबभन पुड़ मेरो विश्वास आए। 15 अवं परमेशेरे पुड़ तैए भरोसो रखताई, ज़ै तैना रखतन कि धर्मी लोकन ते पापी लोकन परमेशर मुड़न मरां ज़ीतो केरेलो। 16 ते एल्हेरेलेइ मेरो ज़मीर परमेशेरे कां भी ते इन्साने कां भी बेइलज़ाम राए। 17 केही सालां केरे बाद अवं अपने गरीब लोकन दान पुजाने, ते च़ढ़तल च़ाढ़ने ओरो थियो। 18 तैखन एनेई अवं मन्दरे मां लाव, त अवं शुद्ध भोनेरी रीत पूरी केरने लोरो थियो, बगैर लोक अकोट्टे केरतां ते बगैर कोन्ची हंगामे इन कम केरतो लाव। पन तैना आसिया इलाकेरे किछ यहूदी थी, ते तैन जाईज थियूं। 19 अगर मीं किछ गलत कियोरू भोथू त तैनेई इडी तेरे सामने मीं पुड़ दोष लोरो लोइतो थियो, किजोकि तैनेई एप्पू लावरूए कि मीं मन्दरे मां कुन कियूं। 20 इना लोक ज़ैना इडी ओरेन, एना ज़ोन कि ज़ैखन अवं महासभा मां पैश भोरो थियो, त एनेई मीं मां कुन कसूर लाहोरो थियो? 21 सुवाए इस गल्लेरे कि ज़ै मीं बड़े ज़ोरे सेइं आवाज़ देइतां ज़ोरी थी, कि अवं ई विश्वास केरताई परमेशेरे मुड़न ज़ीते केरते, एल्हेरेलेइ मीं पुड़ मुकदमो च़लाने लागेरें।” 22 फेलिक्स ज़ै इस पंथेरे बारे मां ठीक-ठीक ज़ानतो थियो, एन ज़ोइतां मुकदमो बंद कियो, “जैखन फौजी

पलटनरो सरदारे लूसियास इडी एज्जेलो त अवं तुश्शे सामने इस मुकदमेरो फैसलो केरेलो।” 23 तैनी सुबेदारे हुकम दितो, कि पौलुसे पेरहे मां रख्खा, ते तैसेरे दोस्तन मरां केन्ची भी तैसेरी सेवा केरनेरे लेइ न रोकथ। 24 केही दिहैइना बाद गवनर फेलिक्स अपनि कुआन्थ दूसिल्ला ज़ै यहूदी थी, तै तैस सेइं साथी कैसरिया मां अव, तैनी पौलुसे जो समाद भेजो ते यीशु मसीह पुड़ विश्वास केरनेरे बारे मां गल्लां शुनाए। 25 जैखन पौलुस एन ज़ोवं, कि परमेशेरी नज़री मां कुन रोडूए ते अपने इच्छा कैबू केरनेरे बारे मां ते एजनेबाले परमेशेरे इन्साफेरे बारे मां भी ज़ोवं, त फेलिक्स डेरि जेव, ते ज़ोने लागो, “हुनी तू गा, अगर फुर्सत मैलेली त अवं तीं फिरी तीं कुजेइलो।” 26 तैस पौलुसे करां किछ मैलेनेरी उमीद थी, एल्हेरेलेइ तै तैस बार-बार कुजातो थियो, ते तैस सेइं गल्लां केरतो थियो। 27 पूरे दूई सालना बाद पुरकियुस फेस्तुस, फेलिक्सरे ठैरी गवनर बनो, ते फेलिक्स यहूदी खुश केरनेरे लेइ पौलुस कैदखाने मां रख्खो।

25 फेस्तुस तैस इलाके मां पुज़तां टलेइ दिहैइना बाद कैसरिया नगरेरां यरूशलेम नगरे मांजो जेव। 2 ज़ैडी प्रधान याजकेई ते यहूदी लीडर तैस कां एइतां पौलुसेरे खलाफ दोष लाने लागे। 3 तैना तैस कां मिनत केरने लागे, कि लूशी पौलुसे यरूशलेम नगरे मां हाज़र भोनेरो हुकम दे, द्रासले मां तैनेई तैस बत्तां मारनेरी साज़िश कियोरी थी। 4 फेस्तुसे जुवाब दितो, “पौलुस कैसरिया नगरे मां कैदे, ते अवं भी तैडी लूशी गाने बालोई।” 5 फिरी ज़ोवं कि तुसन मरां किछ खास अधिकार रखनेबाले मीं सेइं साथी च़लन, “अगर सच्चे तैनी कोई गलत कम कियेरू भोए त तैस पुड़ दोष लान।” 6 ते फेस्तुस अठ दश दिहाड़े यरूशलेम नगरे मां राव, ते फिरी कैसरिया नगरे जो च़लो जेव, तैडी तै दुइयोवं दिहाड़े आदालतरी तखते पुड़ बिश्शो, ते हुकम दितो कि पौलुसे हाज़र केरा। 7 जैखन पौलुस हाज़र भोव, त यरूशलेम नगरेरे यहूदी लीडरेई तैस चुफुरतां घेरो देइतां बड़े झूठे इलज़ाम लाने शुरू कियो। पन कोई पक्कू सबूत न मैल्लू। 8 पौलुसे अपनि सफाई देंते बार यहूदी केरे झूठे इलज़ामा केरे लेइ इन्कार कियो, ते ज़ोवं, “मीं त यहूदी केरे कानूनेरे खलाफ कोई कसूर नई कियोरो, ते न मन्दरेरे खलाफ ते न महाराजोरे खलाफ कोई कसूर कियोरोए।” 9 पन फेस्तुस एप्पू यहूदी लीडरन खुश केरनेरे लेइ पौलुसे पुच्छू, “तीं यरूशलेम नगरे जो गानू मन्जुरे, ताके अवं एस मुकदमेरो फैसलो तैडी केरि?” 10 पौलुसे ज़ोवं, “अवं इडी महाराजोरे इन्साफेरे तखतेरे सामने खड़ो आई, ते मेरे मुकदमेरो फैसलो इस्से ठैरी भोरो लोइते, ज़ैडी रोमी मैनेरो इन्साफ भोरो लोइ, तू एप्पू भी रोइछारे ज़ानतस कि मीं यहूदी केरो कोई कसूर नई कियोरो। 11 अगर अवं कुसुरवार आई त मौतरी सज़ारे काबल आई त मेरो मरनेरो इन्कार नई, पन अगर ज़ैना झूठे इलज़ाम यहूदी मीं पुड़ लाने लगोरें ते अगर तैना झूठेन त केन्ची हक नई कि मीं तैन केरे हवाले केरे। ते अवं इडी महाराजो कां बिनती केरताई, कि मेरो इन्साफ इडी कियो गाए।”

12 तैखन फेस्तुस सल्लाकारन करां मुशोरो केरतां जुवाब दित्तो, आप खुश किस्मत समझताई, कि तेरे सामने खड़े भोड़तां यहूदी “तीं महाराजे कां बिनती कियोरीए त तू महाराजे कां गालो।”

13 किछ दिहैइना बाद अग्रिप्पा राज़ो ते तैसेरी निकड़ी बेइन बिरनीके कैसरिया नगरे मां एड़तां फेस्तुसे सेइं मुलाकात की।

14 तैन केरे बड़े दिहाड़े तैड़ी रानेरे बाद फेस्तुसे पौलुसेरे बारे मां राज़े ज़ोवं, “अक मैन्हु आए, ज़ै फेलिक्स कैद कियोरोए।

15 ज़ैखन अवं यरूशलेम नगरे मां थियो, त प्रधान याजक ते यहूदी बुजुर्ग तैस पुड़ दोष लगे लाने, कि एस सज़ा दित्ती गाए।

16 पन मीं तैन ज़ोरु थियूं, कि रोमी केरे दस्तूरेरे मुताबिक कोई मुताबिक फरीसी भोड़तां अपने धर्मेरे सच्चे पंथे सेइं ज़िन्दगी मैन्हु सज़ा देनेरे लेइ हवाले न कियो गाए, ज़ांतगर तैस अपने गुज़रतो ओरोई।

6 परमेशरे इश्शे दादे-पड़दादन सेइं अक वादो कियोरो थियो, मीं उमीदे कि तै पूरो भोलो, तैस उमीदारी वजाई सेइं मीं पुड़ मुकदमा चलेवरोए।

7 एस वादेरे पूरे भोनेरी उमीद इश्शे 12 केरे 12 गोत्रने, एल्हेरेलेइ तैना दिले सेइं रात दिहाड़ी परमेशरेरी सेवा केरते रातन। हे अग्रिप्पा राज़ा मेरी इस उमीदेरे लेइ यहूदी मीं पुड़ दोष लातन।

8 ज़ां कि परमेशर मुड़दन फिरी ज़ीते केरते, तुस इस गल्ली पुड़ विश्वास कि न केरथ? 9 “पेड़ले अवं भी समझतो थियो, कि यीशु नैसरेरे नव्वेरी हर तरीके मुखालफत केरनि मेरो फरज़े।

10 एल्हेरेलेइ अवं यरूशलेम नगरे मां एन्ने केरतो राव, मीं प्रधान याजकन करां अज़ाज़त एन्तां बड़े परमेशरेरे सेवक कैद केरतां छुडे, ते ज़ैखन तैना मारे गाते थिये, त अवं भी तैड़ी खलाफत केरतो थियो।

11 अवं प्रार्थना घरन मां गातो थियो, ते तैन केरि तुहीन केरतो थियो। ते लोकन यीशुएरे खलाफ तुहीन केरनेरे लेइ मजबूर केरतो थियो। ते मसीही लोकां केरि मुखालफत केरने सेइं मीं एत्री खुशी भोती थी, कि अवं दूर-दूर नगरन मां गेइतां तैन सतातो थियो।”

12 “एक्की बार प्रधान याजकन करां अधिकार एन्तां एस्से कम्मेरे लेइ दमिशक नगरेरे सफर केरने लगगोरो थियो।

13 त हे राज़ा अवं हेजू बत्तां थियो, त मीं दुपहरां केरे मौके अम्बेरां अक लौ एंडती लाई, ज़ै दिहाड़ेरी लौई करां भी जादे थी, ते तै इश्शे चेत्रे पासन चमकने लगी।

14 असां सब ज़मीनी पुड़ बिछड़ी जे, ते मीं अक आवाज़ शुनी, ज़ै मीं सेइं इब्रानी भाषाई मां एन जोने लगोरी थी। कि हे शाऊल हे शाऊल तू मीं किजो स्तातस? मीं सेइं लड़ाई केरनि तेरे लेइ बेकारे।

15 “त मीं जुवाब दित्तो, हे प्रभु तू कौन आस, त प्रभुए मीं जुवाब दित्तो अवं यीशु आई ज़ैस तू सतातस? 16 पन उठ ते अपने पवन पुड़ खड़ो भो, किजोकि मीं तीं एल्हेरेलेइ दर्शन दित्तिरूप, कि तीं अवं अपनो सेवक बनेइं, ते ज़ैन किछ तीं लाहेरूप तू तैसेरो गवाह बनस।

17 अवं तीं तेरे लोकन करां ते गैर कौमन करां बत्रांतो रेइलो अवं तीं तैन मां भेज़ताई।

18 ताके तू तैन केरि एछछी खोल्लस ते तैन आंधरे मरां लौई मां आनस ते कने शैताने करां छुटेइतां परमेशरेरे पासे आनस, ताके तैना मीं पुड़ विश्वास केरन ते परमेशर तैन केरे पाप माफ़ केरे, ते तैन लोकन मां शामिल भोन ज़ैना पवित्र कियोरेन, तैना विरासत हासिल केरनि।”

19 ते एल्हेरेलेइ, “हे अग्रिप्पा राज़ा मीं एस स्वर्गेर दर्शनरो इन्कार नई कमेवरो।

20 ते पेड़ले मीं दमिशक

26 अग्रिप्पा राज़े पौलुसे जो ज़ोवं, “तीं अपने बारे मां जोनेरी अज़ाज़ते।” तैखन पौलुस अपनो हथ्थे सेइं इशारो केरतां अपनि सफाई पैश केरने लगे। 2 “हे अग्रिप्पा राज़ा, अवं अपनो

नगरेरे लोकन मां ते फिरी यरूशलेम नगरेरे ते सारे यहूदिया इलाकेर रानेबालो ते गैर कौमन भी प्रचार केरतो कियो। कि पापन करां मनफिराथ, ते परमेशरेरे पासे फिरा ते अपने रूभावे सेइं साबत केरा कि तुसेईं पापन करां मन फिरावरोए। 21 एन्ने गल्लां केरे लेइ यहूदेईं अवं मन्दरे मां टलातो ते मारनेरी कोशिश की। 22 “पन अवं परमेशरेरी किर्पाईं सेइं अज तगर ज़ातोई, ते सेब्भी निक्के बड्डन कां अवं गवाही देताई, कि ज़ैना गल्लां अवं ज़ोताई कि ज़ैना नेबेईं ज़ोरी थी, ते मूसा नेबे भी ज़ोरी थी। 23 कि मसीह बड़ो दुख भोगेलो, ते सेब्भन करां पेड़लो मुड़न मरां ज़ातो भोइतां यहूदी कौमी त गैर कौमां केरे लोकन बचालो ज़ै लौअरो ज़ेरो आए।” 24 ज़ैखन पौलुस एन ज़ोने लगगोरो थियो, त फेस्तुस ज़ोरे सेइं ज़ोवं, “तू पागल भोइ जेव। जादे ज़ाने सेइं तू पागल भोइजेवरोस।” 25 पौलुसे जुवाब दित्तो, “जनाब फेस्तुस साहब अवं पागल नईं भोरो, अवं ज़ैन किछ ज़ोने लगगोरोइं तेन सच्चे ते ज़ाने सेइं आए। 26 राज़ो भी ज़ेसेरे सामने अवं निडर भोइतां एन गल्लां ज़ानते, ते मीं याकीने कि एन मरां कोई भी गल तैस करां छपोरी नईं, किजोकि ए चमत्कार कोई एरो नईं भोरो। 27 हे अग्रिप्पा राज़ा कुन तू नेबी केरो, अवं ज़ानताई कि तू मनतस?” 28 अग्रिप्पा राज़े पौलुसे सेइं ज़ोवं, “कुन तू थोड़ी ज़ेरि गल्लेईं सेइं मीं तू मसीही बनानो चातस?” 29 पौलुसे जुवाब दित्तो, चाए थोड़ी ज़ेरि या जादे गल्लेईं सेइं, “पन अवं त परमेशरे कां प्रार्थना केरताई कि, न सिर्फ तू बल्के ज़ेत्रे भी अज मेरी गल्लां शुनी रावरेन सब मेरे ज़ेरे मसीही भोन, पन इन शंगलां केरे बगैर।” 30 तैखन अग्रिप्पा राज़ो ते गवर्नर ते बिरनीके ते तैस सेइं साथी होरे भी खड़े भोए ते चले जे। 31 ते बेइर निस्तां एककी होरि सेइं ज़ोने लगे, “कि ए मैन्डु कोई एरू कम त नईं लोरो केरने, कि एस मौतरी सज़ा दिती गाए, या कैदखाने मां रख्यो गाए। 32 अग्रिप्पा राज़े फेस्तुस सेइं ज़ोवं, अगर एनी मैने महाराज़े कां फरयाद न भोथी कियोरी त ए छुटी सकतो थियो।”

27 ज़ैखन फिस्तुस हाकिमेरे ज़िरिये ए बिस्तार बनो कि असां लोक ज़िहाज़े मां इतालिया जो गाम, त पौलुस त होरे कैदी यूलियुस नंवे औगुस्तुस फौजी पलटनरे सरदाररे एककी सूबेदाररे सुपुर्द कियो। 2 असां अद्रमुत्तियुम नगरेरां एककी समुन्दरी ज़िहाज़े मां च़ेढ़तां आसिया इलाकेरे नेडेरै ठैरी गानेबाले थिये, त अरिस्तर्खुस नंवे थिस्सलुनीके नगरेरो अक मकिदुनी असन सेइं साथी थियो। 3 होरसां ज़ैखन ज़िहाज़े सैदा मां रुकी जेवं, त यूलियुसे पौलुसे पुड़ महरबानी केरतां तैस अपने दोस्तन सेइं मुलाकात केरनेरी अज़ाज़त दिती, ताके तैसेरे ज़िरिये सेइं पतो लग्ये। 4 तैट्ठां फिरी असां ज़िहाज़े मां च़ेढ़तां चले जे, ते साइप्रसेरे आड़ी मांमेइं निस्से, किजोकि हवा बड़ी ज़बरदस्त थी। 5 फिरी किलिकिया नगरे ते पंफ़लिया नगरेरे नेडे समुन्दरी बत्तां निस्तां अग्रोवं चले जे, त लूसिया इलाकेरे मूरा नगर मां ओस्से। 6 तैड़ी सूबेदाररे सिकन्दरिया नगरेरू अक ज़िहाज़ इतालिया

इलाके जो च़लेरू मैल्लू, तैनी असां तैस मां च़ाढ़े। 7 असां बड़े दिहाड़न तगर बल्हे-बल्हे अग्रोवं च़लते राए, ते कनिदुस नगरेरे सामने पुज़े। पन तेज़ हवा च़लने सेइं असन अग्रोवं गानेरी मुशकिल भोइजेइ, ते एल्हेरेलेइ असां सलमोनेरे सामने निस्तां क्रेतेरी आड़ी मां निस्से। 8 ते बेड़ि मुशकली सेइं समुन्द्रे बन्ने-बन्ने अग्रोवं च़लते शुभलंगरबारी नंवेरी एककी ठैरी पुजे, ज़ैट्ठां लसया नगर नेडू थियू। 9 तैड़ी असन केही दिहाड़े बीते, पैनेरे सफरे मां मुशकिल एल्हेरेलेइ भोती थी, कि छुटकारेरी दिहाड़ी तिहाररे बरतेरे दिहाड़ो बीतोरे थी, ते पौलुसे तैन एन ज़ोइतां खबरदारी दिती, 10 “जनाब मीं एरू लगगते कि इश्शू सफर बडू खतरनाक भोलू, कि न सिर्फ इश्शे माल सबाब ते ज़िहाज़े बल्के इश्शी जानी भी खतराए।” 11 पन सूबेदाररे कपताने ते ज़िहाज़ेरे मालिकेरी गल पौलुसेरी गल करां जादे मन्नी। 12 किजोकि तै बंदरगह ठंढारो मौसम कटनेरे लेइ रोड़ी न थी, एल्हेरेलेइ इश्शो फैसलो ए थियो, कि असां केन्वी तरीके अग्रोवं निस्सम ते असन उमीद थी, कि फीनिक्स मां पुज़तां हीवतडेरौ मौसम तैड़ी गुज़ैरी गामेले। ए क्रेते अक बंदरगह थी, ज़ैसेरां दारां क्षिण-पश्चिम ते उत्तर-पश्चिम पासे खुलतां थियां। 13 ज़ैखन दक्षिणी पासेरां हवा च़लने लगी, त तैनेईं सोचू कि तैन केरि मर्ज़ी पूरी केरनेरे लेइ रोड़ो वक्ते, ते तैनेईं ज़िहाज़ेरू लँगर तैट्ठां खडू कियू, ते समुन्दरेरे बन्ने अग्रोवं च़लते जे। 14 पन लूशी अक बड़ी तूफानी हवा च़ली ज़ैस जो यूरकुलीन ज़ोतन। 15 ज़ैखन तैने ज़िहाज़े अपने पलैट्रे मां कियू, ते ज़िहाज़े ड़लैक्कां खाने लगू, ते असेईं ज़िहाज़े हावारे बहावे पुड़ छडू। 16 तैखन कौदा नंवेरो अक निकडो टैपू अव, त असेईं भी रुड़ते-रुड़ते ते डुंगी ज़ै ज़िहाज़ेरे पत्तारां बंधोरी थी, त बेड़ि मुशकली सेइं कैबू मां की। 17 ते ज़िहाज़ेरे टोलरे मैनेईं तै उब्री च़ेढ़तां ज़िहाज़े टलुटेन करां बचानेरे लेइ रेस्सेइं सेइं बंधतां छडू। किजोकि तैन डर थियो, कि एरू न भोए, कि ज़िहाज़े सुरतिसेरे रेती मां डुबी गाए, एल्हेरेलेइ तैनेईं भारी सामान ओसालू ते ज़िहाज़े मां रुड़ते-रुड़ते च़ले जे। 18 ज़ैखन तूफानी हवाई सेइं ज़िहाज़े जादे ड़लैक्कां खाने लगू, त होरसां असेईं ज़िहाज़ेरौ माल समुन्द्रे मांजो शारनो शुरू कियो, 19 ट़लेइयोवं दिहाड़े तैनेईं ज़िहाज़ेरू सामान भी समुन्द्रे मांजो शैरी छडू। 20 त काई दिहाड़े न असेईं दिहाड़ो लाव ते न तारे ते तूफान भी मन्ना जादे ज़ोर केरने लगगोरो थियो, ते असन बचनेरी हुनी कोई उमीद न राई। 21 रोटी खाने काई दिहाड़े भोरे थिये, एल्हेरेलेइ पौलुसे तैन मां खड़े भोइतां ज़ोवं, “ढ़लाव अगर तुसेईं मेरू ज़ोनू मन्नोरू भोथू, ते क्रेते मरां अग्रोवं न ओरे भोथे, त ई नुकसान ते ई तकलीफ किजो भोनी थी? 22 “पन अवं तुसन कां मिनत केरताई कि, हिम्मत न हारा तुसन मरां कोई भी न मरेलो, चाए ज़िहाज़े डुबी किना गाए। 23 किजोकि ज़ैस परमेशरेरी अवं आराधना केरताई, तैसेरो स्वर्गदूत हीज राती मीं कां ओरो थियो। 24 ते तै ज़ोने लगो, हे पौलुस डर नन्ना तू महाराज़े कां ज़रूर पैश भोलो ते परमेशर तेरी वजाई सेइं एन

सेबभी केरि जान बचालो, जैना जिहाजे मां तीं सेइं साथी आन। 25 एल्हेरेलेइ हे जनाब तुस हिम्मत रखा कि मेरे परमेशेरे जैन किछ मीं सेइं जोरूप तैन्ने भोलू। 26 असां जरूर केन्ची टेपू पुड़ पुजी गामेले।” 27 च़ेवधोवं राती ज़ैखन असां अद्रिया समुन्द्रे मां इरां उरां फिरते थिये, त जिहाजे बाले मैनेई अंदाजो लाव कि असां बन्नेरे नेड़े पुजी जोरेम। 28 तैनेई पानी रेसी सेइं नापू त 37 मीटर निससू ते थोड़े अगगर गेइतां नापू त 27 मीटर निससू। 29 एस डरे सेइं कि कोस्कोई शफ़ड़ी सेइं न बज़म, ते तैनेई जिहाजेरे पैतरां पासे च़ेरे लैग्रां समुन्द्रे मां छड़ां ते झेझेरे लौअरे लेइ प्रार्थना करेने लगे। 30 जिहाज चलानेबाले मुझाटेरां एग्री पासेरां लैंग्र पेनी मां छड़नू चाते थिये। 31 तैखन पौलुसे सूबेदारे ते सिपेहिन सेइं ज़ोवं, “अगर इना लोक जिहाजे मां न भोले त तुश्शू लोकां केरू बचनू मुशकले।” 32 एल्हेरेलेइ सिपेहीयेइं डंगारी रेस्सी केटतां समुन्द्रे मांजो शैरी दित्ती। 33 झेझ भोने करां पेड़ले पौलुसे सेबभन कां मिनत कमाई, कि तुस किछ रोटी खाथ। तैनी ज़ोवं, “तुस च़ेवधे दिहैडी केरे देंते बंचनेरे खियाले मां पेवरेथ, ते तुस रोटी सेइं हुरोरे भी नई। 34 अवं तुसन कां मिनत केरताई कि तुस रोटी खाथ, किजोकि तुश्शे लेइ रोड़ एन्ने कि याकीन केरा कि तुश्शो बाल बिंगो न भोलो।” 35 ज़ैखन तैनी एन ज़ोवं, त तैनी रोटी दलाई ते सेबभी केरे सामने परमेशेरेरू शुक्र केरतां दलोड़ी ते खाने लगे। 36 तैस करां लेइतां होरन भी हिम्मत आई, ते तैना भी रोटी खाने लगे। 37 असां सब मिलतां कोई 276 मैन्हु थिये, जैना इस जिहाजे मां सुवार थिये। 38 ज़ैखन तैनेई रेज़तां रोटी खाइ त तैनेई सारे गेहुं समुन्द्रे मांजो शारने शुरू किये, ताके जिहाज पोल्लु भोए। 39 ज़ैखन दिहाड़ो निस्सो त तैनेई तै ठार न पिशानी, पन अक ठार लाई ते तै पासो साफ थियो, तैनेई बिस्तार कमाव कि अगर भोइसखे त असां जिहाज एस पुड़ च़ाढ़म। 40 बस्सा लैंगर खोलतां समुन्द्रे मां छैडी दित्तू, ते पत्रवारां केरि रेसी भी ढिल्ली छैडी, एग्रीयां बादबांन भी बा ज़ेढ़ी छड़ो, ते एप्पू बन्नेरे पासे जो च़ले। 41 पन जिहाज खुशकी पुड़ गेइतां रेती पुड़ टिकी जेवं, ते जिहाजेरो एग्रीयां पासो रेती मां डुबी जेवं ते पैत्रीयां पासो छेल्लेई सेइं बज़कने लगे। 42 सिपेही केरि सल्लाह थी कि कैदन मारम ताके तैन मरां कोई तारी देइतां नेशी न गान। 43 पन सूबेदारे पौलुसेरी जान बचानेरे लेइ एन न दित्तू केरने, ते हुक्म दित्तो कि ज़ै तारी ज़ानते त तै पेड़लो छाल मारे, ते खुशकी पुड़ पुज़तां अपनि जान बचाए। 44 ते बाकी होरे लेकड़ारे तखतन पुड़ ते जिहाजेरी होरि चीज़ां केरि मदती सेइं अपनि जान बचाथ, ते बस्सा सब एस तरीके सेइं खुशकी पुड़ ठीक ठाक पुजी जे।

28 ज़ैखन असां ठीक ठाक बन्ने पुड़ पुजे, त असन पतो च़लो कि इस टैपू जो माल्टा ज़ोतन। 2 तैद्वेरे राने बालेई असन सेइं बड़ो रोड़ो बताव कियो, झ़ाड़ी लगोरी थी, ते ठंड भी बड़ी थी, तैनेई अग बाली ते इश्शी बड़ी आदर कमाई। 3 पौलुसे

कैडू केरो अक लेग्गु बनावं, ते ज़ैखन ते तैना कैडू अग्गी मां छड़ने लगे त अगारे सेके सेइं तैन कैडन मरां अक सप निस्सो, ते पौलुसेरे हथ्थे सेइं पलेटोव। 4 ज़ैखन तैन लोकेई सप पौलुसेरे हथ्थे सेइं पलेटोरो लव, त एप्पू मांमेइं ज़ोने लगे, “ए मैन्हु जरूर कोई खूनी आए, ए समुन्द्रे मां गरक भोने करां त बचोरोए, पन इन्साफे ए जीतो न राने न दित्तो।” 5 पन तैनी तैस सप्पे अग्गी मांजो घिल देइतां दलट्टी, ते तैस किछ नुकसान न भोव। 6 तैना लोक बलगने लगोरो थिये, कि एसेरी सारी जान एफरी गानीए ते ए मेरि गानोए, ते बड़े च़िरे तगर बलगनेरे बाद पौलुसे किछ न भोवं, त तैना लोक सोचने लगे, “ए जरूर कोई देबतोए।” 7 तैस असां अपने घरे ने ते दलाई दिहाड़े इश्शी आदर खातर की। 8 पबलियुसेरे बाजी भुखार ते पैचसी सेइं बड़ी बिमार भोरो थियो, ते पौलुसे तैस कां गेइतां तैसेरेलेइ प्रार्थना की, ते तैस पुड़ हथ रेखतां तै बड़ाव। 9 फिरी तैस टेपेरे बाकी बिमार लोक आए ते तैना ठीक भोइ जे। 10 तैन लोकेई इश्शी बड़ी इज़्ज़त की, ते असां तैट्ठां अग्रोवं गानेरे लेइ तियार भोए, त तैनेई इश्शी ज़ुरुरतरी सैरी चीज़ां जिहाजे मां छैडी दित्ती। 11 इश्शू जिहाज बिगड़नेरे दलेइ महिना बाद असां सिकन्दरियारे एककी जिहाजे मां च़ले जे, ज़ैन ठंड मुकने तगर तैस टैपू मां रुकेर थियू, तैस मां यूनेनी केरि दई अकोट्टी देबतेरी मूरतां बनोरी थी। 12 पेड़ले असां सुरकूसा नगरे मां पुजे, ते दलाई दिहाड़े तैडी राए। 13 तैट्ठां असां च़लते-च़लते रेगियुम नगरे मां पुजे, ते होरसां दक्षिणी हवा च़लने लगी ते असां होरसां पुतियुली नगरे मां पुजे। 14 तैडी असन किछ ढला भी मैल्ले, तैनेई असां कुजाए ते असां तैडी सत दिहाड़े राए, ते तैसेरां बाद असां रोमे मां पुजे। 15 तैद्वेरे मसीही ढलान पतो लगे, कि असां ओरेम त तैना असन अगराने अप्पियुसेरे चौके ते दलेइ धर्मशालन तगर आए, पौलुसे तैना लेइतां परमेशेरेरू शुक्र कियू ते तैस बड़ी हिम्मत भोइ। 16 ज़ैखन अस रोम नगरे मां पुजे ते पौलुसे अज़ाज़त मैल्ली, कि तै एककी पैरहेदारी निगरेनी मां ज़ेड़ी चाए गेइ सकते। 17 ज़ैखन दलाई दिहाड़े बीते त पौलुसे यहूदी केरे प्रधान कुजाए, ते ज़ैखन तैना अकोट्टे भोए त पौलुसे तैन सेइं ज़ोवं, “ढलाव मीं अपनि कौमरे ते अपने दादे-पड़दादां केरि रसमरे खलाफ कोई कम नई कियेरू त फिर भी अवं पाबंद केरतां यरूशलेम नगरे मां रोमी सरकारारे हवाले कियो। 18 तैनेई पुछ गन केरनेरे बाद अवं हथरां छड़नो थियो। किजोकि मीं कोई एरू कम न थियू कियेरू कि ज़ैस सेइं मीं मौतरी सज़ा देथे। 19 पन ज़ैखन यहूदेई मुखालफत की, त मीं महाराजे कां बिनती की। पन एल्हेरेलेइ नई कि अवं अपनि कौमी पुड़ कोई इलज़ाम लांनो चातो थियो। 20 एल्हेरेलेइ मीं एन रोड़ू समझू, कि तुसन सेइं मिलतां गल केरि, अवं इस्राएलेरी एककी उमीदी ज़ै मसीह आए शांगलन सेइं बंधोरोइ।” 21 तैनेई तैस सेइं ज़ोवं, “असन यहूदन करां न कोई चिट्ठी मैल्ली ते न तैट्ठां एजनेबाले इश्शे लोकेई तैरे बारे मां कोई खबर दित्ती, ते न तैरे खलाफ

किछ ज़ोवं। 22 पन असां तेरे बारे मां ज्ञाननू चातम, ए त असन पत्तोए, कि लोक सेबभी ठैरन एस पंथेरे खलाफ गल्लां केरतन।” 23 तैखन यहूदी लोकेई पौलुसेरी गल्लां शुन्नेरे लेइ अक दिहाड़ी ठुवहलाई, जैखन तै दिहाड़ी आई, त लोक पेइले लोकन करां भी जादे अकोठे भोए। पौलुसे तैन परमेशेरे राज़ेरे बारे मां समझाव, ते साथी यीशुएरे बारे मां मूसेरे कानूने ते नेबी केरे किताबन मरां तैन रोड़ेघरे समझेइतां झेझां करां ड़लोड़ी तगर गल्लां शुनातो राव। 24 किछ तैसेरी गल्लां शुन्तां मघन भोइ जे ते मन्नू ते किछेई विश्वास भी कियो। 25 जैखन तैना एप्पू मांमेइं अक न भोए, त पौलुसे तैन गाने करां पेइले अक गल ज़ोई, “पवित्र आत्मारे ज़िरिये यशायाह नबी तुशे दादे-पड़दादां केरे बारे मां ठीके ज़ोरू थियूं।” 26 एन लोकन कां गा, ते एन ज़ो कि, “तुस शुन्ते त राले, पन समझेले न, ते तकते त राले पन पिशानेले न। 27 किजोकि एन लोकां केरे दिले मोट्टे भोरोरेन, ते एना टोव्ने भोरोरेन, ते एनेई अपनि एछछी निकोल कियोरिन। किजोकि एरू न भोए, कि एना लहन ते कन्न सेइं शुन्न ते दिले सेइं समझन, ते एना मेरे पासे फिरन ते अवं एन शिफ़ा देई। 28 “एल्हेरेलेइ अवं चाताई कि तुस ज्ञानथ कि परमेशेरी मुक्ति गैर कौमन कां भी भेजोरोए ते तैना तैस शुनेले।” 29 जैखन पौलुसे एन ज़ोवं, त यहूदी एप्पू मांमेइं बेस केरते तैह्वां चले जे। 30 पौलुस पूरे दूई सालन तगर क्रैइयेरे मुकाने मां राव, 31 ते ज़ै भी तैस सेइं मिलने एइतो थियो, पौलुस तैस सेइं मिलतो थियो, ते बेधड़क भोइतां परमेशेरे राज़ेरी खुशखबरी शुनातो थियो, ते प्रभु यीशु मसीहेरे बारे मां शिक्षा देंतो राव।

रोमियों

1 अवं पौलुस यीशु मसीहेरो दास आई, ते प्रेरित भोनेरे लेइ परमेशरे चुनोरोई, ते परमेशरेरी खुशखबरी प्रचार केरनेरे लेइ ठहरावरो आई। **2** जेसेरी तैने पेइले अपने नेबी केरे जिरिये पवित्रशास्त्रे मां, **3** अपने मट्टे इश्शे प्रभु यीशुपरे बारे मां वादो कियोरो थियो, जै जिसमेरे मुताबिक त दाऊदेरे खानदाने मरां पैदा भोव। **4** ते पवित्र आत्मावे जिरिये सेइं मुइदन मरां ज़ीतो भोनेरे वजाई सेइं तै शेक्ति सेइं परमेशरेरू मट्टु भोव। **5** जेसेरे जिरिये असन अनुग्रह ते प्रेरिताई मैल्ली; कि तैसेरे नंवे सेइं सब कौमां केरे लोक विश्वास केरतां तैसेरी मन्न। **6** जैन मरां तुस भी यीशु मसीहेरे भोनेरे लेइ कुजोरेथ। **7** अवं ई चिट्ठी तुश्शे सेबभी केरे नंवे लिखताई, जैना तुस रोम नगरे मां रातथ, ते परमेशरेरे ट्लारेथ, ते पवित्र भोनेरे लेइ चुनोरेथ। इश्शे बाजी परमेशर ते प्रभु यीशु मसीहेरे तरफां तुसन शान्ति ते अनुग्रह मैलतो राए। **8** पेइलो अवं तुश्शे सेबभी केरे लेइ यीशु मसीहेरे जिरिये परमेशरेरू शुक्र केरताई, किजोकि तुश्शो विश्वास जै यीशु मसीह पुइ आए, तैसेरी चर्चा हर पासे भोने लोरी। **9** परमेशर जेसेरी सेवा अवं अपने पूरे दिले सेइं तैसेरे मट्टेरी खुशखबरी प्रचार केरतां केरताई, तै मेरो गवाहे; कि अवं तुसन कोस तरीके सेइं लगातर प्रार्थनाई मां याद केरताई। **10** ते लगातर अपने प्रार्थनान मां बिनती केरतो राताई, कि केन्चरे हेजू भी तुसन कां एजनेरे लेइ मेरू सफर परमेशरेरे तरफां कामयाब भोए। **11** किजोकि अवं तुसन सेइं मिलनेरे लेइ कोशिश केरताई, कि अवं तुसन कोई आत्मिक वरदान देई, जैस सेइं तुस विश्वासे मां मजबूत भोथ। **12** मतलब इन, कि अवं तुसन कां एइतां तुसन सेइं साथी तैस विश्वासेरे जिरिये, जै मीं मां ते तुसन मांए, तैसेरे जिरिये अस हिम्मत हासिल केरमा। **13** ते इलाव ते बेइनव, अवं चाताई तुस ज्ञानथ, कि मीं तुसन कां बार-बार एजनू चाव। जेन्चरे मीं गैर कौमरे लोकन विश्वास केरनेरे लेइ बढ्नेरी मद्दत की, तेन्चरे तुश्शी भी मद्दत केरि, पन हुना तगर रुकोरो राव। **14** अवं संस्कारी लोकन ते असंस्कारी लोकन, पढोरे लोकन या अनपड़ लोकन सेबभन खुशखबरी शुनेइलो। **15** ते अवं तुसन भी जैना रोम नगरे मां रातथ, खुशखबरी शुनानेरे लेइ हर वक्त तियार आई। **16** किजोकि अवं यीशु मसीहेरी खुशखबरी प्रचार केरने करां न शरमेई, एल्हेरेलेइ परमेशर अपने शक्ति सेइं तैन लोकन मुक्ति देते, जैना खुशखबरी पुइ विश्वास केरतन, पेइले यहूदन फिरी गैर यहूदन। **17** किजोकि खुशखबरे जिरिये परमेशर असन अपने नज़री मां धर्मी बनाते, जैन शुरु करां आखरी तगर विश्वासे सेइं भोते। जेन्चरे पवित्रशास्त्रे मां लिखोरूए, “जै मैन्हु विश्वासेरे जिरिये सेइं परमेशरेरे सामने धर्मी बनाव गाते तैए ज़ीतो रालो।” **18** परमेशरेरो क्रोध तैन लोकन पुइ स्वर्गेंरां एइते, जैना बुरां ते दुष्टरां कम्मां केरतन, ते जैना सज़े अधर्मे सेइं दबेइतां रखतन। **19** किजोकि परमेशरेरे बारे मां ज्ञान तैन मैन्हु केरे

मन्न मां बांदूए, एल्हेरेलेइ कि परमेशरे तैन पुइ बांदू कियोरूए। **20** किजोकि तैसेरे आहरे गुण, मतलब तैसेरी सदारी शक्ति, ते परमेशरेरो सुभाव दुनियाई बनानेरे वक्तेरे देंतो तैसेरे कम्मन सेइं हेरने मां एइते, इड़ी तगर कि तैन लोकन कां कोई बहानो नई। (aídos g126) **21** हांलाकि तैनेई परमेशर त पिशानो, पन परमेशरेरी तैस काबल बड़याई न की, ते न शुक्र कियू, पन बेकार सोचने लाए, इड़ी तगर कि तैन केरो बेअक्ल मन आंधरो भोव (मतलब तैना गलत सोचने लगे)। **22** तैना अपने आपे अक्लमन्द सेमझतां बेवकूफ बने। **23** ते न मरने बाले परमेशरेरी महिमा मरने बाले मैन्हु, ते चुडोलू ते जानवरां, ते पेटेरे भारे चलने बाले जीपां केरे मूरतन मां बदली। **24** एल्हेरेलेइ परमेशरे तैना तैन केरे मनरे खुबेइशां केरे मुताबिक अशुद्ध भोनेरे लेइ शारे कि, एप्पू मांमेइं अपने जानां केरी अनादर केरन। **25** किजोकि तैनेई परमेशरेरी सज़्याई बेदलतां झूठ बनाई, ते सृष्टारी पूजा ते आराधना केरि, न कि तैस बनाने बालेरी, जै हर वक्त धन ते रोड़ोए। आमीन। (aiōn g165) **26** एल्हेरेलेइ परमेशरे तैना नीच खुवाइशन मां शारे, इड़ी तगर कि तैन केरि कुआन्शेई भी स्भाविक कम्मां बेदलतां तैन केरे जैना स्भाविक आन तैन केरे खलाफ बदला। **27** तेन्चरे तैन केरे मड़द भी कुआन्शन सेइं सुभाविक कम्मां शैरतां एप्पू मांमेइं गंदे कम्मन मां मसत भोए, मतलब कि मड़देइं, मड़दन सेइं रिश्तो रेखतां प्रभु करां ठीक बदलो नेव। **28** ते तैनेई इन जेइज़ न समझू कि परमेशरे कबूल केरन, एल्हेरेलेइ परमेशरे भी तैना तैन केरे मनरे हालती पुइ शारे; कि बुरां कम्मां केरन। **29** ते तैना हर किसमेरे अधर्मे, दुष्टे, लालचे, बैरे सेइं भेरोई जे; ते कपट, ते खून केरनी, ते लड़ाई केरनि, ते धोखो देनो, ते जलनी सेइं भेरोए, ते चोगलखोर, **30** बदनाम केरनेबाले, परमेशरे सेइं नफरत केरनेबाले, जैन केरि इज़्ज़त केरी लोइ तैन केरि इज़्ज़त न केरनेबाले, घमण्डी, बड़कां मारनेबाले, बुरी-बुरी गल्लां बनाने बाले, अम्मा बैपू केरो हुक्म न मन्नेबाले। **31** बेवकूफ, धोखो देनेबाले, सज़े प्यारे करां खाली, दया न केरनेबाले भोइजेइ। **32** हालांकी तैना परमेशरेरो ई हुक्म जातन, कि एरां जेरां कम्मां केरनेबाले मौतरे सज़ारे लाइकन, फिरी भी न सिर्फ एप्पू एरां कम्मां केरतन बल्के एरां कम्मां केरनेबालन सेइं भी खुश भोतन।

2 एल्हेरेलेइ हे दोष लाने बाला, तू कोई की न भोस; तीं कां कोई बहानो नई, किजोकि जैस गल्लरो तू होरन पुइ दोष लातस, तैसेरे गल्ली पुइ तू अपनो आप भी दोषी बनातस, एल्हेरेलेइ तू एप्पू भी तैन्ने कम केरतस। **2** ते अस ज्ञानतम कि, जैना एरां कम्मां केरतन परमेशर तैन केरो इन्साफे केरतां तैन सज़ा देते। **3** ते हे मैन्हु, तू जै बुरां-बुरां कम्मां केरनेबालन पुइ दोष लातस, ते एप्पू भी तैन्ने कम केरतस; कुन तू समझतस, कि तू परमेशरेरे सज़ाई करां बचेलो? **4** कुन तू परमेशरेरी कृपा, ते बरदाश केरनू, ते सबरारू धन घटया समझतस, ते कुन इन न समझस, कि परमेशरेरी कृपा तीं पापन करां मन

फिरानो शिखालतीए? 5 पन तू ज़िद्दी आस ते अपने पापन करां मन फिरानेरो इन्कार केरतस, जैस दिहाड़े परमेशर अपनो क्रोध हिरालो, तैस मां परमेशरेरो सच्चो इन्साफ बांदो भोलो, त परमेशर तेरो रोड़ेचारे इन्साफ केरेलो। 6 परमेशर हर एककी तैसेरे कम्मां केरे मुताबिक बदलो देलो। 7 जैना लोक रोड़ां कम्मां केरतां परमेशरेरी तरफां मैलने बैली महिमा, ते आदर, ते कधे न खतम भोने बाली ज़िन्दगरे तोपी मां रातन, परमेशरे तैन हमेशारी ज़िन्दगी देलो। (aiōnios g166) 8 पन जैना खुदगरज़न, ते सच्चे न मन्नेबालेन, बल्के बुराई केरनि चातन, तैन पुड़ परमेशरेरो क्रोध, ते कोप एज्जेलो। 9 ते मुसीबत ते दुःख हर एककी मैन्हु पुड़ एज्जेलो जै बुराई केरते। परमेशर पेड़लो यहूदी लोकां केरो इन्साफ केरेलो फिरी गैर यहूदी लोकां केरो इन्साफ केरेलो। 10 हर अक मैन्हु जै रोड़ां कम्मां केरते तैस महिमा, आदर, ते शान्ति मैलेली, पन परमेशर इना सैरी चीजां पेड़ले यहूदी लोकन देलो फिरी गैर यहूदी लोकन। 11 किजोकि परमेशर केन्चेरी तरफदारी न केरे। 12 एल्हेरेलेइ कि जैन गैर कौमारे लोकेई बगैर मूसेरो कानून मेलतां पाप कियो, परमेशर तैन बगैर मूसेरो कानूने सज़ा देलो, ते जैनेई मूसेरो कानून मेलतां पाप कियो, परमेशर तैन सज़ा भी मूसेरे कानूनेरे मुताबिक देलो। 13 किजोकि परमेशरेरे नज़री मां मूसेरो कानून शुनेने बाले धर्मी नई, बल्के मूसेरे कानूने पुड़ चलने बाले धर्मी ठहराए गानेन। 14 फिरी जैखन होरि कौमां केरे लोक जैन कां मूसेरो कानून नई, सुभावे सेइं किछ मूसेरे कानूनेरे गल्लन पुड़ चलतन, ते मूसेरो कानून तैन कां न भोनेरे बावजूद भी अपने लेइ एप्पू कानून आन। 15 तैना इन हिरातन कि परमेशरेरो कानून तैन केरे दिलन मां लिखोरोए, ते तैन केरे ज़मीर भी इस गल्ली पुड़ गवाही देतन, किजोकि तैन केरे अपने खियाल भी तैन पुड़ दोष लातन या बेइलज़ाम ठहरातन। 16 एरू तेइस भोलू ज़ेइस परमेशर जै खुशखबरी मीं शुनावरीए तैसेरे मुताबिक यीशु मसीहेरे ज़िरिये मैन्हु केरि छेपारी गल्लां केरो इन्साफ केरेलो। 17 तू एप्पू जो यहूदी ज़ोतस, ते मूसेरे कानूने पुड़ तेरो विश्वास, ते तू अपने आपे पुड़ घमण्ड केरतथ, कि तू परमेशरेरो खास मैन्हु आस। 18 ते तू परमेशरेरी मर्ज़ी ज़ानतस, ते तू इन भी ज़ानतस कि कोनां गल्लां रोड़ी आन, किजोकि तीं इना गल्लां केरू ज़ान मूसेरे कानूने करां मैलोरीन। 19 ते तू भरोसो रखतस, कि तू कान्न परमेशरेरी बत हिरानेबालोस, ते जैना आंधरे मां आन तैन केरे लेइ लोअरो ज़ेरे आस। 20 ते बेअक्लन शिखालने बालोस, ते बच्चां केरो उस्तादातस, ते तीं पक्को पतो कि परमेशरेरो कानून तीं पूरू ज़ान ते सच्चवाई शिखालते। 21 ते जैन तू होरन शिखालतस, अपने आपे की न शिखालस? तू होरन शिक्षा देतस कि चोरी नई केरनि, कुन तू चोरी केरतस? 22 तू जै ज़ोतस, “बदमाशी नई केरनि,” कुन तू बदमाशी केरतस? तू जै मूरतन सेइं नफरत केरतस, कुन तू मन्दरन लुटतस? 23 तू जै घमण्ड केरतस कि तू परमेशरेरे कानूने ज़ानतस, एप्पू किजो कानून न मेन्तां,

परमेशरेरी तुहीन केरतस? 24 “किजोकि तुश्शे यहूदी लोकां केरे वजाई सेइं गैर कौमन मां परमेशरेरे नन्चेरी तुहीन भोतीए,” एल्हेरेलेइ पवित्रशास्त्रे मां एरू लिखोरूए। 25 अगर तू मूसेरे कानूने पुड़ चलस, त खतनो कराने सेइं तीं फैइदो त आए, पन अगर तू मूसेरो कानून न मन्न्स त तीं मां ते तैस मां, जेसेरो खतनो नई भोरो कोई फर्क नई। 26 ते अगर कोई मैन्हु जेसेरो खतनो न भोए भोरो, त तै मूसेरे कानूने पुड़ चले, त परमेशरेरे लेइ तै मैन्हु ते जेसेरो खतनो भोरोए दुइये बराबर आन। 27 ते जैस मैनेरो खतनो नई भोरो, अगर तै मूसेरे कानूने पूरू केरे, त तै तीं दोषी ठहरालो। किजोकि तीं कां मूसेरो कानूने ते तेरो खतनो भी भोरोए, पन फिरी भी तू कानूने पुड़ न चलस। 28 किजोकि सच्चो यहूदी तै नई जेसेरू ज़म यहूदन मां भोरू या जेसेरो खतनो भोरोए। 29 बलके सच्चो यहूदी तैए, जेसेरो मन परमेशरे कां सच्चोए, ते सच्चो खतनो तैए जै पवित्र आत्माके कम्मां केरे ज़िरिये दिलेरो भोरोए, न की मूसेरो कानून मन्ने सेइं भोरोए। एरे लोकां केरि बड़याई लोक नई बल्के परमेशर एप्पू केरते।

3 (किछ लोक पुछतन) यहूदी केरि कुन बड़याई, या खतनेरो कुन फैइदो? 2 हर किसमे सेइं बड़ू किछ। पेड़लू त इन कि सारू परमेशरेरू वचन तैन सोंफू। 3 अगर किछ यहूदी परमेशरे कां ईमानदार न निरसे त कुन भोवं? कुन तैन केरे ईमानदार न राने सेइं परमेशर तैन केरे लेइ अपने वादे पूरे करेने मां झूठो भोव? 4 नई, कधे नई! बल्के परमेशर हमेशा सच्च ज़ोते, ते हर अक मैन्हु झूठो भोव, जेन्चरे पवित्रशास्त्रे मां परमेशरेरे बारे मां लिखोरूए, “जैस सेइं तू एपनी गल्लन मां धर्मी भोस, ते इन्साफेरे वक्ते तीं जीत मैल्ले।” 5 अगर इश्शां बुरां कम्मां परमेशरेरी धार्मिकता ठहराते, त अस कुन ज़ोम? कुन इन कि परमेशर क्रोध केरते ते असन सज़ा देते। (इन अवं इन्सानेरी रीति पुड़ ज़ोताई)। 6 नई, कधे नई! अगर परमेशर इश्शो यहूदी केरो इन्साफ रोड़े चारे न केरेलो, त तै किजो दुनियारो इन्साफ केरेलो? 7 किछ ज़ोतन, अगर मेरे झूठेरे वजाई सेइं परमेशरेरी सच्चवाई बांदी भोतीए ते तैसेरी महिमा भोतीए, त फिरी किजो पैपी केरो ज़ेरो मीं पुड़ हुक्म दितो गाते? 8 “एज्जा, अस बुराई केरम, कि इस सेइं भलाई पैदा भोए?” पन असन पुड़ दोष भी लव गाते, ते केत्रे ज़ोतन, कि एन केरू भी एने ज़ोनु आए। पन एरे ज़ेरेन पुड़ दोष लानो ठीक आए। 9 त फिरी अस कुन ज़ोम? कुन अस यहूदी होरन करां रोडेम? नई, कधी नई; किजोकि असेई यहूदी लोकन पुड़ ते गैर यहूदी लोकन पुड़ ई दोष लोरोए, कि तैना सारे पापेरे कब्जे मां आन। 10 जेन्चरे पवित्रशास्त्रे मां लिखोरूए, “कोई परमेशरेरे सामने धर्मी नई, अक भी नई। 11 कोई सच्चे समझदार नई, कोई परमेशरे तोपने बालो नई। 12 सारे परमेशरे करां दूर भोरेन, सारे निकम्मे बनोरेन, कोई भलाई केरनेबालो नई, अक भी नई। 13 तैन केरू गल खुल्ली कब्रे, तैनेई अपने ऐशी सेइं धोखो दितो, तैन केरे ओठन पुड़ सप्पां केरू ज़ेरे। 14 ते तैन केरू भाषण लानती, ते दूलिठे सेइं भेरातां।

15 तैन केरे पव खून केरने लेइ तेज़न। 16 तैना ज़ेरां भी गातन तुबाही ते कलेश तैन पत्ती गाते। 17 तैन न ज्ञानन् शैन्ति सेइं केन्चरां ज़ीतन। 18 तैन मां परमेशरेरो डर बिलकुल भी नई।” 19 अस ज्ञानतम, कि मूसेरो कानून जैन किछ ज़ोते, तैन्ने सेइं ज़ोते, जैना तैस मन्तन, एल्हेरेलेइ कि केन्ची कां कोई बहानो न भोए, ते सारी दुनिया परमेशरेरे सज़ारे लायिक भोए। 20 किजोकि मूसेरे कानूनेरे मुताबिक कम्मां केरने सेइं कोई मैन्हु परमेशरेरे सामने धर्मी नई भोनो, एल्हेरेलेइ कि मूसेरे कानूने सेइं पिशान भोतीए कि अस पापी आम। 21 पन हुनी बगैर मूसेरो कानून मन्ने सेइं तै धार्मिकता बांदी भोरीए ज़ै परमेशरेरे तरफां एइतीए, जेसेरे बारे मां मूसेरे कानूने ते नेबी केरि किबातन मां लिखोरूए। 22 मतलब परमेशरेरी तै धार्मिकता ज़ै यीशु मसीह पुड़ विश्वास केरनेबालां केरे लेइए; किजोकि तैन मां किछ भेद भाव नई। 23 एल्हेरेलेइ कि सेबभेई पाप कियो, ते तैस महिमा करां दूर आन ज़ै परमेशर देते। 24 पन परमेशरे अपने अनुग्रहे सेइं अस पापां केरि सज़ाई करां यीशु मसीहरे ज़िरिये छुटाए ते मुप्ते मां धर्मी ठहराए। 25 परमेशरे मसीहरे खूनेरे वजाई सेइं अक एरो छुटकारो ठहराव, ज़ै विश्वास केरने सेइं फेइदामंद भोते, कि ज़ैना पाप पेइले केरे, ते ज़ैना परमेशरे अपने बर्दाशती सेइं टाले; तैन केरे बारे मां तै अपनि धार्मिकता बांदी केरते। 26 बल्के इस्से वक्ते तैसेरी धार्मिकता बांदी भोए; कि ज़ैस सेइं तै एप्पु धर्मी ठहरे, ते ज़ै यीशु पुड़ विश्वास केरे, तैसेरो धर्मी ठहराने बालो भोए। 27 ते घमण्ड केरन् कोडि राव? तैसेरी त ठारे नई। कोस कानूनेरे वजाई सेइं? कुन मूसेरो कानून मन्ने सेइं? नई, बल्के विश्वासेरे वजाई सेइं। 28 एल्हेरेलेइ अस ज्ञानतम, कि मैन्हु मूसेरो कानूनेरे मुताबिक कम्मां केरनेरे बगैर यीशु मसीह पुड़ विश्वास केरने सेइं धर्मी भोते। 29 कुन परमेशर सिर्फ यहुदी केरोए? कुन गैर कौमां केरो नई? हॉ गैर कौमां केरो भी आए। 30 किजोकि अक्के परमेशरे, ज़ै खतने बालन भी विश्वासे सेइं, ते ज़ैन केरो खतनो नई भोरो तैन भी विश्वासे सेइं धर्मी ठहरालो। 31 ते कुन अस विश्वासे सेइं मूसेरे कानूने रद केरतम? नई, कथे नई; बल्के मूसेरे कानूने बनोरू रखतम।

4 त अस कुन ज़ोम, कि इश्शे पूर्वज अब्राहमे कुन मैल्लू? 2 किजोकि अगर अब्राहम रोडे कम्पन सेइं धर्मी ठहरावरो भोथो, त तैस घमण्ड केरनेरी ठार भोथी, पन रोड़ां कम्मां केरू घमण्ड परमेशरेरे सामने नई। 3 पवित्रशास्त्र कुन ज़ोते, इन कि “अब्राहमे परमेशरेरे वादन पुड़ विश्वास कियो, ते तै तैसेरेलेइ धार्मिकता गनो जेव।” 4 कम केरनेबालेरी मज़दूरी देनी दान नई, पन हक समझू गाते। 5 पन ज़ै (पुन्नेरू) कम न केरे बल्के पापी मैन्हु धर्मी ठहराने बाले पुड़ विश्वास केरते, तैसेरो विश्वास तैसेरेलेइ धार्मिकता गनो गाते। 6 ज़ैस परमेशर बगैर (पुन्नेरे) कम्मां केरे धर्मी ठहराते, तैस दाऊद भी धन ज़ोते। 7 “धने तै ज़ेसेरे अधर्म माफ़ भोए, ते ज़ैन केरे पाप ढके जे। 8 धने तै मैन्हु ज़ैस परमेशर पापी न ठहराए।” 9 ते इन धन ज़ोनू, कुन खतने

बालां केरे लेइ आए, या ज़ैन केरो खतनो नई भोरो तैन केरे लेइ भी आए? अस पवित्रशास्त्रे मरां ज़ोतम, “अब्राहमे परमेशरेरे वादन पुड़ विश्वास कियो ते तै तैसेरेलेइ धार्मिकता गनो जेव।” 10 इन तैसेरो खतनो भोने करां पेइलू भोव न कि खतनो भोनेरे बाद। 11 परमेशरे तै पेइलो कबूल कियो ते धर्मी ठहराव, ज़ेइस हेजू तैसेरो खतनो न थियो भोरो, ते तैस खतनेरो निशान मैलो, कि तैस धार्मिकता पुड़ छाप भोए, किजोकि तै तैन सेबभी केरो (आत्मिक) बाजी ठहरे ज़ैना विश्वास त केरतन पन तैन केरो खतनो नई भोरो। तैना भी तैन केरे विश्वासेरे वजाई सेइं धर्मी भोन। 12 ते ज़ैन केरो खतनो भोरोए तैन केरो पूर्वज भोए, ज़ैन केरो न सिर्फ खतनो कियोरोए, पन ज़ैन इश्शे पूर्वज अब्राहमेरो ज़ेरो विश्वास आए, ज़ै तैनी बगैर खतनेरी हालती मां कियोरी थियो। 13 परमेशरे अब्राहमे ते तैसेरे वंश सेइं वादो कियोरो थियो कि तैना दुनियारे बारस भोले। ई वादे एल्हेरेलेइ नई दित्तो कि अब्राहमे मूसेरो कानून मन्नो, बल्के तैसेरो विश्वास ज़ै परमेशरे पुड़ थियो तैसेरे वजाई सेइं तै धर्मी ठहराव जेव। 14 ज़ै वादो परमेशरे दित्तो थियो कि तैना दुनियारे बारस भोले अगर मूसेरो कानून मन्ने सेइं आए, त फिरी विश्वास बेमतलब, ते वादो बेकार भोव। 15 परमेशर तैस पुड़ क्रोध केरते ज़ै कानूने रोडे चारे न मन्ने, ते ज़ैड़ी कानून नई, तैड़ी तैसेरू ट्लोइन् भी नई। 16 एल्हेरेलेइ परमेशरेरे वादे विश्वासेरे ज़िरिये हासिल भोतन, ताके तैना वादे अनुग्रहेरे ज़िरिये पक्के भोन, ते सारे वादे अब्राहमेरे वंशरे लेइ आन, न सिर्फ यहुदी केरे लेइ, ज़ैना मूसेरू कानून मन्तन बल्के तैन सेबभी केरे लेइ भी आन, ज़ैना अब्राहमेरो ज़ेरो विश्वास केरनेबालन, तैए इश्शो सेबभी केरो पूर्वजे। 17 ज़ेन्चरे पवित्रशास्त्रे मां लिखोरूए, “मीं तू बेडि कौमां केरो पूर्वज बनेवरोस” परमेशरे पुड़ तैन विश्वास कियो, ते ज़ै मुइदन ज़ींते केरते ते ज़ैना चीज़ां वाजुद नई, तैन भी हाज़र केरते। 18 परमेशरेरे वचनेरे मुताबिक कि “तेरू खानदान एरू भोलू” तैना बेडि कौमां केरे पूर्वज भोन। तैनी न उमीदी मां भी उमीदी रेखतां विश्वास कियो, 19 ते अब्राहम ज़ै लगभग 100 सालेरो थियो, अपने मरे जानी, ते सारारे मरे पेटेरे हालीती पुड़ भी विश्वासे मां कमज़ोर न भोव। 20 ते गैर विश्वासी भोइतां परमेशरेरे वादे पुड़ शक न की, पन विश्वासे मां मज़बूत भोइतां परमेशरेरी बड़याई की। 21 ते तैस पूरो भरोसो भोव, कि ज़ैस गल्लरो वादो परमेशरे कियोरोए, ते तैस पूरो केरनेरी शक्ति भी रखते। 22 अब्राहमेरो विश्वास तैसेरेलेइ धार्मिकता गनो जेव। 23 ते ई वचन, “विश्वास तैसेरेलेइ धार्मिकता गनो जेव,” न सिर्फ तैसेरेलेइ लिखो जेव। 24 बल्के इश्शे लेइ भी ज़ैन केरे लेइ विश्वास धार्मिकता गनो जेव, मतलब इश्शे लेइ ज़ैना अस परमेशरे पुड़ विश्वास केरतम, ज़ैन इश्शो प्रभु यीशु मसीह मुइदन मरां ज़ींते कियो। 25 यीशु इश्शे पापां केरे लेइ मारनेरे लेइ ट्लुवाव जेव, ते असन धर्मी ठहरानेरे लेइ परमेशरे ज़ींते भी कियो।

5 एल्हेरेलेइ असां विश्वासे सेइं धर्मी भोए, ते जैन किछ इश्शे प्रभु यीशु मसीहे इश्शे लेइ कियोरू तैसेरे जिरिये इश्शो मेल मलाप परमेशरे सेइं भरोए। 2 ते इश्शे विश्वासेरे वजाई सेइं मसीहे अस इस अनुग्रहे तगर पुजाए, जैड़ी अज अस खडे भी आम, ते असां पूरे याकीने ते आनन्दे सेइं परमेशरेरी महिमा बंटनेरे लेइ उमीदी मां रातमा। 3 सिर्फ एन्ने नई, बल्के मुसीबतन मां भी अस आनन्द केरम, किजोकि अस ज्ञानतम कि मुसीबतन सेइं सबर बद्धती। 4 परमेशर असन रोड़े समझते किजोकि केन्चरे सबर केरनि असेईं शिखोरीए, ते तै असन रोड़े समझते तांए असन उमीदे। 5 ई उमीदी असन शरमिन्दा न केरे, किजोकि पवित्र आत्मा जै परमेशरे असन दित्तोरोए तैसेरे जिरिये सेइं तैसेरो प्यार इश्शे दिलन मां भरोए। 6 किजोकि जैखन अस अपनो आप बचानेरे लेइ कमजोर थिये, त मसीह परमेशरेरे ठहरावे वक्ते पुड़ इश्शे पैपी केरे लेइ मरो। 7 केन्ची धर्मी मैनेरे लेइ भी कोई मरे, इन बडू मुशकले, पन शैदड़ केन्ची धर्मी मैनेरे लेइ कोई अपनि जान देनेरी जुरत केरे। 8 पन परमेशरे अपनो महान प्यार एन्चरे बांदो कियो, कि जैखन असां पापी थिये तैखन मसीह इश्शे लेइ मरो। 9 ते अस तैसेरे खूने सेइं धर्मी ठहरे, त मसीहेरे जिरिये सेइं परमेशरेरे हमेशारी सजाई करां ज़रूर बचमेले 10 किजोकि जैखन अस परमेशरेरे दुश्मन थिये त तैसेरे मट्टेरे मौती सेइं इश्शो मेल तैस सेइं भोव, ते फिरी मेल मलाप भरोए त तैसेरे ज़िन्दगी सेइं असन पक्की मुक्ति मैलेली। 11 ते सिर्फ इन्ने नई, पन हुनी प्रभु यीशु मसीहेरे जिरिये सेइं इश्शो मेल परमेशरे सेइं भरोए, एल्हेरेलेइ अस परमेशरे मां आनन्द केरतमा। 12 एल्हेरेलेइ जेन्चरे एककी मैनेरे जिरिये यानी आदमेरे जिरिये पाप दुनियाई मां अव, ते पापे सेइं मौत आई, ते एन्चरे मौत सेबभी मैनु मां फैली। किजोकि सेबभेई पाप केरो। 13 मूसेरो कानून देने करां पेड़ले पाप दुनियाई मां त थियो, पन जैड़ी कानून नई, तैड़ी पाप गनो न गाए। 14 फिरी भी आदमे करां मूसा तगर सेबभी लोकेई पाप कियो ते सब लोक मरे, जैन लोकेई तैस आदमेरो जेरो पाप न कियो तैना भी मरे, आदम मसीहेरो जेरो थियो, जै मसीह एजनेबालो थियो। 15 पन परमेशेरू वरदान आदमेरे पापेरू जेरू नई, इन सच्चे कि एककी मैनु यानी आदमेरे पापेरे वजाई सेइं बडे लोक मरे। पन परमेशरेरे अनुग्रह त कने तैसेरू वरदान बडे लोकां केरे लेइ महान आए जैन एककी मैनु यानी यीशु मसीहेरे अनुग्रहे सेइं एडते। 16 जैन वरदान परमेशरे असन दित्तू तैन आदमेरे पापेरू जेरू नई, किजोकि एककी मैनेरो पाप सज़ा घिन्तां अव। पन हालांकी असेईं भी बडे पाप कियोरेन फिरी भी परमेशरे असन एरू वरदान दित्तोरू जैन असन परमेशरेरी नजरी मां धर्मी ठहराते। 17 किजोकि एककी मैनेरे पापेरे वजाई सेइं सब लोक मरे, त जैन लोकन अनुग्रहेरू ते धार्मिकतारू बडू वरदान एककी मैनेरे जिरिये मैलते, तैना लोक ज़ीते राले ते एककी मैनु यानी यीशु मसीहेरे जिरिये राज़ केरेले। 18 एल्हेरेलेइ जेन्चरे एककी

मैनेरो पाप सेबभी मैनेरू केरे लेइ सज़ा आनते, तेन्चरे मसीहेरे धार्मिकतारू कम सेबभी मैनेरू केरे लेइ धर्मी ठहराने लेइ वजा बनू, जैस सेइं ज़िन्दगी मैलतीए। 19 किजोकि जेन्चरे एककी मैनेरे हुक्म न मन्ने सेइं बडे लोक पापी भोए, तेन्चरे एककी मैनेरे हुक्म मन्ने सेइं बडे लोक धर्मी भोले। 20 मूसेरो कानून एल्हेरेलेइ दित्तोरो थियो कि सारे लोकन पतो लग्गे कि तैना केत्रे पापिन। पन जेन्चरे लोकेई जेत्रे जादे पाप किये तेन्चरे परमेशरेरो अनुग्रह तैस करां भी बडो जादे भोवं, 21 कि जेन्चरे सेबभी लोकेई पाप किये ते मरे, तेन्चरे परमेशरेरो अनुग्रह राज़ केरते ते परमेशरे अस इश्शे प्रभु यीशु मसीहेरे वजाई सेइं धर्मी ठहरावेरमा। मतलब असन हमेशारी ज़िन्दगी मैलेली। (aiōnios g166)

6 त अस कुन ज़ोम? कुन अस पाप केरते रहम, कि परमेशरेरो अनुग्रह बद्धतो गाए? 2 नई, कधी नई! अस जैखन पापेरे लेइ मरे ते फिरी किजो अग्रोवं जो पापे मां ज़िन्दगी बीताम? 3 तुस ज्ञानतम कि जैखन असेईं सेबभी लोकेई यीशु मसीहे सेइं साथी अक भोनेरे लेइ बपतिस्मो नीयोरो थियो, तैखन अस तैस सेइं साथी मरं थियो। 4 जैखन असेईं बपतिस्मो नीयोरो थियो तैखन अस मसीह सेइं साथी मरे ते दबे जे, ताके अस भी नर्वीं ज़िन्दगी ज़ीम, जेन्चरे मसीह बाजी परमेशरेरी महिमा सेइं मुड़दन मरां ज़ीतो कियो। 5 किजोकि अगर अस बपतिस्मेरे जिरिये मसीहेरी मौती मां शामिल भोरेम, त अस भी पक्के तैसेरे जेरे ज़ीते भोमेले। 6 अस ज्ञानतम कि इश्शी पुरानी इन्सानयत यीशु मसीह सेइं साथी क्रूसे पुड़ च़ाढ़ोरीए, ताके पापेरो जिसम बेफाइदो भोए, ते अस अग्रोवं जो पापेरे गुलैमी मां न रहम। 7 जैखन मैनु मरते त तैखन तै पापेरी शक्ति करां आज़ाद भोते। 8 एल्हेरेलेइ अगर अस मसीह सेइं साथी मरे, ते इश्शो विश्वास ईए कि तैस सेइं साथी ज़ीते भी भोमेले। 9 किजोकि अस एन ज्ञानतम, कि मसीह मुड़दन मरां ज़ीतो भरोए ते तै फिरी न मरेलो, ते तैस पुड़ फिरी मौतरू राज़ नई भोनू। 10 जैखन मसीह मरो त तै एककी बार सेबभी केरे पापेरे लेइ मरो; पन हुनी तै ज़ीतोए, ते सिर्फ परमेशरेरे लेइ ज़ीतोए। 11 एन्चरे तुस अपने बारे मां भी सोचा कि तुस पापेरे लेइ त मरोरेथ, पन यीशु मसीहे तुसन ज़िन्दगी दित्तोरीए ते तुस परमेशरेरे लेइ ज़ीते आथ। 12 एल्हेरेलेइ तुस अपने जानी मां पापेरी इच्छान राज़ केरने न देथ, ते तुस तैन केरे मुताबिक न चला। 13 ते अपने जिसमेरे अंगन बुरे कम्मां केरे लेइ पापे न सोंफा, पन अपने आपे मुड़दन मरां ज़ीते सेमझतां परमेशरे सोंफा। ते अपने जिसमेरे अंगन धार्मिकतारे कम्मां केरे लेइ परमेशरे सोंफा। 14 ते तुसन पुड़ पापेरू राज़ न भोलू, किजोकि तुस मूसेरे कानूनेरे अधीन नई बल्के अनुग्रहेरे अधीन आथ। 15 त कुन भोव कि अस एल्हेरेलेइ पाप केरम, कि असां मूसेरे कानूनेरे अधीन नई बल्के अनुग्रहेरे? नई, कथे नई। 16 तुस ज्ञानथ, कि जैखन तुस जेसेरो हुक्म मन्नेरे लेइ अपनो आप गुलामां केरे जेरे सोफतथ त तुस तैसेरे गुलाम आथ। चाए पापेरी जेसेरो अन्त मौते, चाए हुक्म

मन्नेरे ज़ेसेरो अन्त धार्मिकताए। 17 तुस त पेइले पापेरे गुलाम थियो पन हुनी तुसन ज़ै शिक्षा मैलोरी थी तैस पूरे दिले सेइं मन्नेबाले भोए, एल्हेरेलेइ अव परमेशरेरु शुक्र केरताई। 18 ते हुनी परमेशरेरु तुस पापेरी शेक्ति करां छुटेइतां आज़ाद किये, ते तुस परमेशरेरु गुलाम बने ताके तुस ज़ैन रोडू तैन केरि बटथ। 19 अव ई मिसाल एल्हेरेलेइ इस्तेमाल केरने लोरोई, किजोकि तुशे लेइ इन समझनू मुश्किले। ज़ेन्नेरे तुसेईं पेइले अपनो आप गुलामेरे ज़ेरो बुरां कम्मां केरे लेइ अधमें ते बुरेइरे लेइ सोंफोरे थियो, तेन्नेरे हुनी तुस अपने आपे परमेशरेरी सेवारे लेइ सोंफा ताके तुस पूरे तरीके सेइं तैसेरे भोथ। 20 जेइस तुस पापेरे गुलाम थियो, त तुसन परमेशर खुश केरनेरी कोई ज़रूरत न थी। 21 तुसन पुरेनी ज़िन्दगी सेइं कुन फेइदो मैलो? सिर्फ तुस शरमातथ, किजोकि ज़ैन तुसेईं कियूं तैसेरो नितीजो सिर्फ मौते। 22 पन हुनी तुस पापे करां आज़ाद भोरेथ ते तुस परमेशरेरे दास बनोरेथ। किजोकि इना गल्लां तुसन पवित्र बनैली ते तुसन हमेशारी ज़िन्दगी मैलेली। (aiōnios g166) 23 किजोकि पापेरी मज़दूरी त मौते, पन परमेशरेरु वरदान इश्शे प्रभु यीशु मसीह मां हमेशारी ज़िन्दगी आए। (aiōnios g166)

7 हे ढ़लाव ते बेइनव, कुन तुस न ज़ानथ अव मूसेरो कानून ज़ान्ने बालन सेइं ज़ोताई, कि ज़ांतगर मैन्हु ज़ीतो रहते, तांतगर तैस पुइ मूसेरे कानूनेरो अधिकार भोते? 2 मिसालेरे तोरे पुइ, इलावरी कुआन्श कानूनेरे मुताबिक ज़ांतगर तैसेरो मुन्श ज़ीतोए तांतगर तैसेरी पाबंदे। पन अगर मुन्श मेरि गाए, त ते मुन्शेरे कानूने करां छुटी जेई। 3 ते अगर मुन्श हेजू ज़ीतो ते होरि मइदेरी भोए त ते बदमाश भोतीए, पन मुन्श मेरि गाए, त तैसेरे कानूने करां छुटी, इडी तगर कि होरि मइदेरी भोए, फिरी भी बदमाश न ठहरेली। 4 हे ढ़लाव ते बेइनव, ज़ैखन तुस मसीह सेइं साथी मरे, त तुस कानूनेरे लेइ मरें। हुनी तुस मसीहेरे आथ ज़ै मुइदन मरां ज़ीतो कियोरोए, ताके तुस परमेशरेरे लेइ फलदार ज़िन्दगी ज़ीथ। 5 किजोकि जेइस अस अपने सुभावरे मुताबिक च़लते थियो, त पापी सुभाव असन मां कम केरतो थियो, ते कानूने तैना पापी इच्छां उकसेइं, ते ज़ैन किछ असेईं कियूं तैसेरो फल मौत थियो। 6 पन ज़ेसेरे बंधने मां अस थियो, तैसेरेलेइ मेरतां, हुनी कानूने करां एरे छुटोरेम, पन आत्माेरे नव्वे तरीके पुइ सेवा केरतम, न कि लफसन सेइं। 7 त अस कुन ज़ोम? कुन मूसेरो कानून पापे? नई, कथी नई! बल्के बगैर मूसेरे कानूने अव पापे न पिशैनी, अगर मूसेरो कानून न ज़ोथो कि “लालच न केर” त अव लालच न ज़ैनेथो। 8 पन पापे मौको लेइतां हुक्मे सेइं मीं मां हर किसमेरु लालच पैदा कियूं, किजोकि बगैर मूसेरे कानूने पाप मरें आए। 9 अव त मूसेरे कानूने बगैर पेइलो ज़ीतो थियो, पन ज़ैखन हुक्म अव, त पाप ज़ीतो भोव ते अव मरो। 10 11 किजोकि पापे मौको मेलतां हुक्मे सेइं मीं धोखो दित्तो, ते तैस सेइं अव आत्मिक तोरे पुइ मरो। 12 एल्हेरेलेइ मूसेरो कानून

पवित्र आए, ते हुक्म भी पवित्र, ठीक ते रोड़ीए। 13 ते कुन ज़ै चीज़ रोड़ी थी मेरे लेइ मौत बनी? नई, कथे नई! पन पापे तैस रोड़ी चीज़ी सेइं मेरे लेइ मौत पैदा केरतां अव मारो, कि तैसेरो पाप भोरो बांदो भोए, ते हुक्मे सेइं पाप बड़ो जादे बुझोए। 14 किजोकि अस ज़ानतम कि मूसेरो कानून त आत्मिक, पन अव जिसमानी ते पापेरो गुलाम भोनेरे लेइ बिकोरोई। 15 ते ज़ैन अव केरताई, तैस न ज़ैनी, किजोकि ज़ैन अव चाताई, तैन न केरि, पन ज़ैस सेइं मीं नफरते, तैन्ने केरताई। 16 ते अगर, ज़ैन अव न चैई तैने केरताई, त अव मनताई, कि मूसेरो कानून रोड़ो आए। 17 ते एस हालती मां बुरी चीज़ां केरनेबालो अव नई, बल्के पापे, ज़ै मीं मां। 18 किजोकि अव ज़ानताई, कि मीं मां मतलब मेरे जिसमे मां कोई रोड़ी चीज़ नई, रोडू केरनेरी इच्छा त मीं मां आए, पन मीं करां न केरोए। 19 किजोकि ज़ैस रोड़े कम्मरी इच्छा अव केरताई, तैन मीं करां न बने, पन ज़ैस बुरेइयरी इच्छा भी न केरि तैस केरताई। 20 पन अगर अव तैन्ने केरताई, ज़ेसेरी इच्छा न केरि, ते तैन केरनेबालो अव नई, बल्के पापे ज़ै मीं मां। 21 ते मीं ई कानून मैलते, कि ज़ैखन रोड़े कम्मरी इच्छा केरताई, त अव बुराई केरताई। 22 किजोकि अव ज़मीरे सेइं त परमेशरेरे कानूने सेइं बड़ो खुश भोताई। 23 पन मीं अपने जिसमेरे अंगन मां होरि ज़ेरो कानून लेइहोते, ज़ै मेरी अक्लोरे कानूने सेइं लइते, ते मीं पापेरे गुलामेरे कानूने मां छुडते ज़ै मेरे जिसमेरे अंगन मां। 24 अव केरो नुभाव मैन्हु आई, मीं इस जिसमे करां ज़ै मौतेरे पासे नेते कौन छुटालो? 25 अव परमेशरेरु शुक्र केरताई ज़ैने यीशु मसीहेरे ज़िरिये अव बचाव, ते अव अपनि अक्ली सेइं त परमेशरेरे कानूनेरो इस्तेमाल केरताई, पन अपने जिसमे सेइं पापेरी कानूनेरो इस्तेमाल केरताई।

8 एल्हेरेलेइ हुनी ज़ैना मसीह यीशु मां आन, तैन पुइ सज़ारो हुक्म नई। 2 किजोकि पवित्र आत्मा तुसन ज़िन्दगी देलो, ज़ै यीशु मसीह करां एडती ते ते तुसन पाप ते मौती करां आज़ाद केरेलो। 3 किजोकि ज़ैन कम कानूने इश्शे पापी सुभावरे वजाई सेइं कमज़ोर भोइतां न केरि बटु, तैन परमेशरे कियूं, मतलब अपने मट्टे इश्शे पेपी केरो ज़ेरो भोनेरे लेइ, ते पापेरे बलिदानेरे लेइ भेजू, परमेशरे मसीहेरे जिसमे मां पापेरी सज़ा दित्ती। 4 परमेशरे एन एल्हेरेलेइ कियूं ताके अस अपने पापी सुभावरे मुताबिक नई, पन पवित्र आत्माेरे मुताबिक च़लतां ज़ै हुक्म कानून देते तैस केरि बटम। 5 किजोकि ज़ैना लोक पापी सुभावरे मुताबिक ज़िन्दगी बीतातन, तैना पापेरे बारे मां सोचतन, पन ज़ैना लोक पवित्र आत्माेरे मुताबिक ज़िन्दगी बीतातन, तैना आत्मिक गल्लां केरे बारे मां सोचतन। 6 अगर इश्शो मन इश्शे पापी सुभावरे मुताबिक च़लते त अस मरमेले, पन अगर इश्शो मन आत्माेरे मुताबिक च़लते त असन कां ज़िन्दगी ते शान्ति मैलेली। 7 किजोकि पापी सुभावरे मुताबिक च़लनू परमेशरे सेइं बैर रखनोए, किजोकि न त पापी सुभाव परमेशरेरे कानूनेरे अधीने, ते न कानूनेरे मुताबिक च़ेलि बटते। 8 ते ज़ैना पापी

सुभावेरे मुताबिक चलतन तैना परमेशरे खुश न केरि बटन। 9 हेरने लोरोए तैसेरी उमीद कुन केरे? 25 पन ज़ैस चीज़ी अस न पन ज़ैखन परमेशरेरो आत्मा तुसन मां बस्सते, ते तुस पापी सुभावेरे मुताबिक न चलत बल्के पवित्र आत्मा मुताबिक चलतथ, अगर कोन्वी मां पवित्र आत्मा नई त तै मसीहेरो मैन्हु नई। 10 ते अगर मसीह तुसन मांए, त जिसम पापेरे वजाई सेइं मरेलो, पन आत्मा धार्मिकतारे वजाई सेइं जीतीए। 11 ते अगर तैसेरी आत्मा ज़ैने यीशु मुड़दन मरां जीतो कियो तुसन मांए। ते ज़ै मसीह तैने मुड़दन मरां जीतो कियो, तैए तुशे भी नाश भोनेबाले जिसमे अपनि आत्मा सेइं जीतो केरेलो, ज़ै तुसन मांए। 12 हे ढ़लाव ते बेडनव, असेई एन्चरे न लोड़े ज़ीयेरु जेन्चरे अस अपने पापी सुभावेरे मुताबिक ज़ीनू चातम, पन असेई एन्चरे ज़ीयोर् लोड़े जेन्चरे परमेशरेरो आत्मा चाते। 13 किजोकि अगर तुस अपने पापी सुभावेरे मुताबिक ज़ीले त तुस मरेले, पन अगर तुस पवित्र आत्मा मुताबिक चलेले त तुस अपने पापी सुभावरां कम्मां केरां बंद केरेले ते फिरी तुस जीते राले। 14 किजोकि जेत्ते परमेशरेरे आत्मा चलेले सेइं चलतन तैना परमेशरेरे बच्चेन। 15 किजोकि ज़ै आत्मा तुसन मैलोरोए तुसन फिरी गुलाम बेनतां रानेरे लेइ नई, बल्के ते तुसन परमेशरेरे बच्चे बनाते। तैसेरे ज़िरिये अस परमेशरे जो हे अब्बा, हे बाजी जोतम। 16 पवित्र आत्मा एप्पू इशशी आत्मा सेइं मिलतां गवाही देते, कि अस परमेशरेरे बच्चेम। 17 किजोकि अस परमेशरेरे बच्चेम ते असां तैना बरकतां हासिल केरमेले ज़ैना परमेशर अपने लोकां केरे लेइ रेखोरिन, ते मसीहेरे लेइ भी ज़ैन परमेशरे रेखोरुए, तेन भी अस मसीह सेइं साथी हासिल केरमेले; किजोकि अगर अस मसीहेरे जेरे दुःख झैलमेले त अस भी मसीहे साथी महिमा हासिल केरमेले। 18 मीं पूरू याकीने, कि ज़ैना दुःख अस झैल्लेने लोरेम, तैस महिमारे सामने, ज़ै परमेशर असन देनेबालोए, किछ भी नई। 19 किजोकि सैरी रत्ननारी चीज़ां बड़े बे सबरी सेइं तैस वक्तेरो इंतज़ार केरने लोरिन, कि जेइस परमेशरे इन बांदो केरनू तैसेरे सच्चे बच्चे कौन आन। 20 किजोकि ज़ैन किछ परमेशरे बनाव, तैन सैरी चीज़ेइं अपनि कीमत गवाइ, एल्हेरेलेइ नई कि तैना अपने आप चैती थी, पन परमेशरे एन भोने दित्तू। पन फिरी भी उमीदे। 21 कि सृष्टि एप्पू भी खुश आए कि विनाशे करां छुटकारो हासिल केरतां, परमेशरेरे बच्चां केरे महिमारी अज़ैदी मां खुशी मनाली। 22 किजोकि अस ज़ानतम कि सारी सृष्टि मिलतां हुना तगर कर लातीए ते तकलीफी मां तड़फतीए, जेन्चरे दोज़ीती गल्हे बिशनेरी तकलीफ भोतीए। 23 सिर्फ तैना नई पन अस भी ज़ैन एजने बैली महिमारे पेइले फलेरो स्वाद चखनेरे लेइ पवित्र आत्मा दित्तो, पन अस हेजू भी परमेशरेरे वक्ते बलगने लोरेम ज़ैखन परमेशर अपने बच्चे केरे रूपे मां कबूल केरेलो, ते असन जिसमेरे बुरैई करां छुटकारो देलो। 24 हुनी परमेशरे असन मुक्ति दित्तोरीए, असन ई उमीदे। पन अगर तुस कोन्वी चीज़ी हासिल केरनेरे लेइ उमीद केरथ ज़ै तुसन कां पेइली आए, त फिरी तै उमीद नई। किजोकि ज़ैस चीज़ी कोई

हेरने लोरोए तैसेरी उमीद कुन केरे? 25 पन ज़ैस चीज़ी अस न लहम, अगर तैसेरी उमीद रखतम, त सबरी सेइं तैस बलगते भी रातम। 26 एन्चरे पवित्र आत्मा इशशी मद्दत केरते ज़ैखन अस परमेशरे पुड़ भरोसो रखने मां कमज़ोर भोतम, किजोकि अस न ज़ानम, कि प्रार्थना केन्चरे केरतन; पन पवित्र आत्मा एप्पू कर लेइतां ज़ै बयानेरे बेइरे, इशशे लेइ बिनती केरतीए। 27 ते परमेशर ज़ै मनां केरो ज़ानने बालोए ज़ानते, कि पवित्र आत्मा कुन लोरो ज़ोने। किजोकि तै पवित्र लोकां केरे लेइ परमेशरेरे मेज़ी सेइं बिनती केरते। 28 ते अस ज़ानतम, कि ज़ैना लोक परमेशरे सेइं प्यार केरतन, परमेशर तैन केरे लेइ सब गल्लां केरे ज़िरिये भलाई पैदा केरते; मतलब तैन केरे लेइ ज़ैना तैनी अपने मेरज़ारे मुताबिक चुनोरेन। 29 किजोकि तैने ज़ैना पेइले चुने, ते पेइले ठहराए भी कि तैसेरे मट्टेरे रूपे मां भोन, ताके तै बड़े ढ़लान मां ज़ेठो भोए। 30 फिरी ज़ैना तैने पेइले ठहराए, तैना चुने भी, ते ज़ैना चुने, तैना धर्मी भी ठहराए, ते ज़ैना धर्मी ठहराए तैन महिमा भी दित्तोरीए। 31 ते अस एन गल्लां केरे बारे मां कुन ज़ोम? अगर परमेशर इशशे पासे, ते इशशो खलाफ कौन भोइ बटते? 32 परमेशरे अपनू मट्टू भी अपने लेइ न रखबू, बल्के तैन इशशे सेबभी केरे लेइ तैसेरे दुश्मना केरे हवाले दित्तू, ते तै मसीह सेइं असन तैन सब किछ देलो ज़ेसेरो वादो तैने असन सेइं कियोरोए। 33 अस परमेशरेरे चुनोरेम, कोई असन पुड़ परमेशरेरे सामने दोष न लेइ बटे, किजोकि तैए ज़ैने अस धर्मी ठहरावरेम। 34 फिरी कौने ज़ै सज़ारो हुक्म देलो? कोई नई, यीशु मसीह तैए ज़ै मरो, बल्के मुड़दन मरां जीतो भोव, ते परमेशरेरे देइने पासे, ते इशशे लेइ बिनती भी केरते। 35 कौन असन मसीहेरे प्यारे करां अलग केरि बटते? मुसीबत या तंगी, या जुलम, या काल, या नगूपन, या खतरो, या तलवार? इन मरां कोई भी चीज़ असन मसीहेरे प्यारे करां अलग न केरि बटे। 36 जेन्चरे पवित्रशास्त्रे मां लिखोरुए, “तेरे लेइ अस हर वक्त मौतरे खतरे मां रातम; अस मैरोने बैली भेइं केरे ज़ेरे गने जोरेम।” 37 पन ज़ैने असन सेइं प्यार कियोरोए, तैसेरे ज़िरिये असन पूरे तरीके सेइं एन सैरी बुरी गल्लां पुड़ जीत हासिल आए। 38 किजोकि मीं पूरू याकीने, कि न मौत, न ज़िन्दगी, न स्वर्गदूत, न हकोमतां, न ज़ै वक्त चलोरोए, न एजनेबालो वक्त, न शक्ति, न उचार, 39 न दुघार ते न कोई होरि सृष्टि, असन परमेशरेरे प्यारे करां ज़ै इशशे प्रभु यीशु मसीह मांए अलग केरि सकेली।

9 अव मसीह मां सच जोताई, झूठ न जोई, ते मेरो ज़मीर भी पवित्र आत्माई मां गवाही देते। 2 कि मीं बड़ो दुःखे, ते मेरो दिल लगातार मेरे लोकां केरे लेइ उदास भोते। 3 किजोकि मेरे यहूदी ढ़ला ते बेइनां केरे लेइ, अव हमेशारे लेइ श्रापित भोथो ते मसीह करां अलग भोथो अगर तैन इस वजाई सेइं तैन मुक्ति मैलती। 4 तैना इस्राएलिन; ते तैना परमेशरेरे लेपलक बच्चे भोनेरे लेइ चुनोरेन, ते परमेशरेरे अपनि महिमा तैन पुड़ बांदी की। ते तैनी तैस सेइं करार कियो, ते तैन मूसेरो कानून दित्तो। ते

तैनी तैन अपनि आराधना ते अपने खूबसूत वादे पूरे केरनेरे लेइ हासिल केरनेरो मौको दितो। 5 अब्राहम, इसहाक ते याकूब तैन केरे दादे पड़दादे थिये, ते मसीह भी जिसमेरे लिहाजे सेइं तैन मरां अव, तै परमेशरे ते सेबन करां बाए जै सेबन पुड़ राज़ केरते, तैसेरी महिमा हमेशा भोती राए। आमीन। (aiōn g165) 6 पन इन नई, कि परमेशरे वचन टलू कि, सारे जैना इसाएलेरे वंशन, तैना सब सच्चे इसाएली नई। 7 ते न अब्राहमेरे वंश मां जर्म भोने सेइं सब परमेशरे बच्चे भोन। पन पवित्रशास्त्रे मां परमेशर अब्राहमे सेइं ज़ोते, “जैना इसहाकेरे वंशे मरां पैदा भोले तैन्ने तेरू वंश मन्गू गालू।” 8 मतलब जैना कुदुरती तरीके सेइं जर्म धिन्तन तैना परमेशरे बच्चे नई, पन सिर्फ वादेरे बच्चे अब्राहमेरे बच्चे गने गातन। 9 किजोकि वादेरू वचन इने, “अवं एग्री साल इस वक्ते फिरी एज्जेलो, ते सारारू अक मटू भोनूए।” 10 ते सिर्फ एन नई, पन जेइस रिबका भी एक्की सेइं मतलब इसहाके सेइं दोर्जीती थी ते तैसेरे पेटे मां दूई बच्चे थिये। 11 ते हेजू तगर तैना बच्चे न थिये ज़मोरो, ते न तैनेई रोडू या बुरू कियेरू थियू, कि परमेशरे रिबका सेइं ज़ोवं, तेरू बडू मटू निकड़ेरी सेवा केरेलू। परमेशरे एन एल्हेरेलेइ ज़ोवं कि एन हिराए, कि तै अपनि मेर्जी सेइं फैसले केरते ते इन तैन मट्टां केरे रोड़ां या बुरे कम्मां केरे वजाई सेइं न थियू। 13 जेन्चरे पवित्रशास्त्रे मां लिखोरूए, “मीं याकूबे सेइं प्यार कियो, पन एसावेरो इन्कार कियो।” 14 ते अस कुन ज़ोम, कि परमेशर बेइन्साफे कि तै जैस चाते चुनते? नई, कथे नई! 15 किजोकि परमेशर मूसे सेइं ज़ोते, “अवं जैस केन्ची पुड़ दया केरनि चैई, तैस पुड़ दया केरेलो ते जैस पुड़ तरस केरनो चैई तैस पुड़ तरस केरेलो।” 16 एल्हेरेलेइ परमेशर तैस चुनेलो जैस पुड़ तै दया हिरानी चाते; तैसेरी इच्छा लोक जैन चातन या केरनेरी कोशिश केरतन तैस पुड़ निर्भर नई। 17 किजोकि पवित्रशास्त्रे मां परमेशरे मिसेरे राज़े फ़िरौन सेइं ज़ोवं, “मीं तू एल्हेरेलेइ राज़ो बनोरोस, कि तीं मां अपनि शक्ति हिरैई, ते मेरे नंवेरो प्रचार सैरी ज़मीनी पुड़ भोए।” 18 ते जैस पुड़ तै चाते, तैस पुड़ दया केरते; ते जैस चाते ढीठ केरते। 19 ते किछ लोक मीं सेइं ज़ोले, “अगर एन्चरे, त फिरी परमेशर केन्चरे फैसलो केरि बटते कि अस गलत आम? एल्हेरेलेइ कोई भी तैस जैन ते चाते केरने करां न रोकी बटे।” 20 हे मैन्हु, तू कौन आस, जै तू परमेशरे सेइं बँस केरतस? कुन बानोरी चीज़ बनाने बाले सेइं जोई बटतीए, “तीं अवं एरी किजो बनाई?” 21 कुन कुम्हारे मिती पुड़ अधिकार नई, कि एक्की लुनदे मरां, अक भांड आदशरे लेइ बनाए, ते होरू नरादराए लेइ बनाए? 22 (परमेशरे अपने बनावरो लोकन सेइं जैन तै चाए तैन केरनेरो अधिकारे) जैना नाश भोनेरे काबल थिये, तैन केरे खलाफ परमेशर अपनो क्रोध हिरानो ते अपनि सामर्थ बांदी केरनेरी चातो थियो, पन तैसेरे बदले मां तैनी सबर की। 23 (तैनी एन कियू) किजोकि तै हिरानू चातो थियो (मसीहरे मौतरे बलिदानेरे ज़िरिये) तै केत्रो महान आए, ज़ैखन तै तैन लोकन

पुड़ दया केरते जैना तैनी अपनि महिमा मां शामिल भोने लेइ चुनोरेन। 24 मतलब असन पुड़ जैना तैने न सिर्फ यहूदन मरां बल्के गैर कौमन मरां भी चुने। 25 जेन्चरे तै होशे नेबेरे किताबी मां ज़ोते, “जैना मेरे लोक न थी, तैन अवं अपने लोक ज़ोलो। ते जैना लोक मेरे टलारे न थिये, तैन जो टलारे ज़ोइलो। 26 ते तैस्से ठेरी जैड़ी परमेशरे ज़ोरू थियू, तुस मेरे लोक नई, तैस्से ठेरी ज़ीतो परमेशर तैन ज़ोलो तुस मेरे बच्चे।” 27 ते यशायाह नबी इसाएली लोकां केरे बारे मां ज़ोते, “चाए इसाएलेरी कुटमेरी गिनती समुद्रे किनारे रेतरी ज़ेरि बड़ी जादे भोली फिर भी तैन मरां थोड़े बचेलो। 28 किजोकि प्रभु जल्दी दुनियारे सेबभी लोकां केरो सेखती सेइं इन्साफ केरेलो।” 29 जेन्चरे यशायाह नेबे पेइलू भी ज़ोरू थियू, “कि सर्वशक्तिमान परमेशरे इश्शे लेइ इश्शू वंश न बाचाथो, त अस सदोम ते अमोरा नगरां केरे ज़ेरे भोने थिये, जैना परमेशरे पूरे तरीके सेइं बरबाद कियां।” 30 ते अस कुन ज़ोम? इन कि जैना गैर कौमां केरे लोक जैना धार्मिकता न थी तोपते, तैनेई धार्मिकता हासिल की, मतलब तै धार्मिकता जै विश्वासे सेइं आए। 31 पन इसाएली लोक मूसेरो कानून मेन्तां परमेशरे करां धर्मी जुवानू चाते थिये, पन तैन न भोइ बटु। 32 किजो नई? एल्हेरेलेइ कि तैना विश्वासे सेइं नई, पन मूसेरो कानून मेन्तां धर्मी भोनेरी कोशिश केरते थिये, तैनेई तैस ठोकर कानून मेन्तां धर्मी भोनेरी कोशिश केरते थिये, तैनेई तैस ठोकर खानेबाले घोड़े सेइं ठोकर खाइ। 33 जेन्चरे पवित्रशास्त्रे मां लिखोरूए; “तका अवं सिय्योने मां अक ठेस लानेबालो घोड़, ते ठोकर खाने बाली चट्टान रखताई; ते जै तैस पुड़ विश्वास केरेलो, तै शरमिन्दा न भोलो।”

10 हे ढूलाव ते बेइनव मेरे मनेरी इच्छा ते इसाएली लोकां केरे लेइ परमेशरे कां मेरी ई प्रार्थनाए, कि तैन मुक्ति मैल्ले। 2 अवं ज्ञानताई कि तैना परमेशरे लेइ जोशे मां रहतन, पन सच्चे ज्ञाने सेइं नई। 3 किजोकि तैना तैस धार्मिकताई करां अनज़ान राए जै परमेशरे तरफां मैलतीए, ते तैनेई अपनि धार्मिकता बनानेरी कोशिश की, एल्हेरेलेइ तैनेई अपनो आप परमेशरेरी धार्मिकतारे अधीन न कियो। 4 किजोकि मसीहे तै मकसद पूरो कियोरोए जेसेरे लेइ मूसेरो कानून दितोरो थियो, ताके जै कोई मसीह पुड़ विश्वास केरे तै परमेशरेरी नज़री मां धर्मी भोए। 5 किजोकि मूसे इन लिखोरूए, “जै मैन्हु तैस धार्मिकता मुताबिक च़लते जै कानूनेरे ज़िरिये आए, तै तैसेरे ज़िरिये सेइं ज़ीतो रालो।” 6 पन जै धार्मिकता विश्वासे सेइं आए, तैसेरे बारे मां पवित्रशास्त्र इन ज़ोते, “तू अपने मने मां इन न ज़ोइयां कि स्वर्ग पुड़ कौन चढ़ेलो?” (मतलब मसीह आन्ने) 7 या इन न ज़ोइयां “पाताले मां कौन गालो?” (मतलब मसीह मुड़दन मरां ज़ीतो केरतां बा आने) (Abyssos g12) 8 पन पवित्रशास्त्र इन ज़ोते “परमेशरेरू वचन तेरे नेड़े, ते तेरे ऐशी मां ते मने मां आए,” इन तैन वचने जैन असन परमेशरे पुड़ विश्वास केरनेरे बारे मां ज़ोते, जेसेरो अस प्रचार केरतम। 9 अगर तू अपने ज़बाना यीशुए, प्रभु जेनतां मन्नस ते अपने दिल सेइं विश्वास केरस, कि

परमेश्वरे ते मुडदन मरां ज़ांतो कियो, त तीं परमेश्वर पक्की मुक्ति देलो। 10 किजोकि इश्शे विश्वासरे ज़िरिये सेइं अस परमेश्वरी नज़री मां धर्मी भोतम, ते इश्शे इकरार करने सेइं मुक्ति मैलोरीए। 11 किजोकि पवित्रशास्त्र इन ज़ोते, “ज़ै कोई तैस पुड़ विश्वास केरे, ते शरमिन्दो न भोलो।” 12 इन एल्हेरेलेइ आए कि यहूदन ते गैर कौमन मां कोई फर्क नई, किजोकि परमेश्वर सेबभी केरो प्रभुए; ते ज़ैना तैसेरु नवं घिन्तन तै तैन बरकत देते। 13 ज़ेन्चरे पवित्रशास्त्र ज़ोते, “ज़ै कोई प्रभुएरु नवं घिन्नेलो, तैस मुक्ति मैलेली।” 14 पन प्रभु पुड़ लोकेई विश्वास न कियो त तैना तैसेरु नवं किजो घिन्? ते ज़ेसेरे बारे मां तैनेई शुनोरु नई तैस पुड़ केन्चरां विश्वास केरेले? ते अगर तैसेरे बारे मां कोई प्रचार न केरे त तैना केन्चरां शुनी बटतन? 15 ते अगर कोई प्रचार केरनेरे भेजो न गाए त तैना केन्चरे शुनेई बटतन? ज़ेन्चरे पवित्रशास्त्र ज़ोते, “तैन केरे पव केत्रे रोडेन, ज़ैना खुशखबरी शुनातन!” 16 पन सेबभेई तै खुशखबरी कबूल न की। यशायाह नबी ज़ोते, “हे प्रभु कोई इश्शे सन्देशे पुड़ विश्वास न केरे।” 17 एल्हेरेलेइ मसीहरे बारे मां सन्देश शुन्नेरे बगैर कोई भी तैस पुड़ विश्वास न केरि बटे। 18 पन अवं पुछतई, “कुन इस्राएली लोकेई न शुनू?” हॉ तैनेई ज़रूर शुनू, पन पवित्रशास्त्रे मां लिखोरुए “तैन केरु वचन सैरी ज़मीनी पुड़, ते तैन केरि गल्लां दुनियारे हर पासे पुजोरिन।” 19 अवं फिरी पुछतई, कुन इस्राएली लोकेई तैन वचन न समझू? पेड़लो त प्रभुए मूसेरे ज़िरिये इ जुवाब देते, “अवं तैन केरे ज़िरिये ज़ै कौम नई, इस्राएली लोकन जलन करालो, अवं बेवकूफ गैर कौमां केरे लोकां केरे ज़िरिये तुसन सरकालो।” 20 फिरी यशायाह बड़े दिलेरी सेइं परमेश्वरे लेइ ज़ोते, “ज़ैना मीं न थी तोपते, तैन अवं मैलो, ते ज़ैना मीं पुछते भी न थी, तैन पुड़ अवं बांदो भोव।” 21 पन इस्राएलेरे बारे मां परमेश्वर इन ज़ोते, “अवं हुक्म न मन्नेबाले ते बेंस केरनेबाले लोकन सैरी दिहैड़ी कुजातो राव।”

11 एल्हेरेलेइ अवं पुछतई, कुन परमेश्वरे अपने लोक शारे? नई, कथे नई! अवं भी त इस्राएली आई, अब्राहमेरे खानदाने ते बिन्यामीनेरे गोत्रे मरां आई। 2 परमेश्वरे अपने तैना लोक न शारेरे, ज़ैना तैने पेड़ले चुने, कुन तुस न ज़ानथ, कि पवित्रशास्त्र एलिय्याहेरे बारे मां कुन ज़ोते, कि एलिय्याह नेबे इस्राएली लोकां केरे खलाफ परमेश्वरे कां बिनती केरते? 3 तैने ज़ोवं “हे प्रभु, तैनेई तेरे नबी मारे, ते तेरी बलिदान केरनेरी ठारा बरबाद की, ते सिर्फ अवं ए एकैलो बज़ोरोई ज़ै तीं मन्ने बालोई, हुनी तैना मीं भी मारने चातन।” 4 पन परमेश्वरे एलिय्याहे जुवाब दितो, “मीं अपने लेइ 7000 मड़द रखोरें, ज़ैनेई बाल देबतेरे मूरती कां मथ्यो नई टेकोरो।” 5 एन्चरे इस वक्ते भी थोड़े ज़ेरे लोक बज़ोरें, ज़ैना परमेश्वरे अपने अनुग्रह वजाई सेइं चुनोरें। 6 अगर इन परमेश्वरेरे अनुग्रहे सेइं भोरुए, ते फिरी मूसेरे कानूनेरे मुताबिक कम्मन केरने सेइं नई, नई त फिरी अनुग्रह, अनुग्रह न राव। 7 ते फिरी नितीजो कुन भोव? कि इस्राएली ज़ेसेरी तोपी

मां आन, तै तैन न मैलो; पन चुनोरें मैलो, ते होरे बाकी लोक सखत कियोरें। 8 ज़ेन्चरे पवित्रशास्त्रे मां लिखोरुए, “परमेश्वरे अज़्जेरे दिहाड़ी तगर तैन केरो मन ते दिल सुस्त कियो, ते एरी एछछे दित्ती कि ताके तैना लेई न बटन, ते एरे कन ताके तैना शुनी न बटन।” 9 ते राज़ो दाऊद ज़ोते, “अवं परमेश्वरे कां प्रार्थना केरताई कि तै तैन केरे तिहारन मां ट्लेइ बटे ते फसाए, ते परमेश्वर तैन झुकाए ते तैन सज़ा देइ बटे। 10 ते तैन केरि एछछन पुड़ आंधरु भोए, ताके तैना लेई न बटन, ते परमेश्वर तैन, तैन केरि परेशैनी केरे वजाई सेइं दुखी केरि बटे।” 11 त अवं पुछतई, कुन यहूदी लोक ठोकर लगनेरे वजाई सेइं हमेश्वरे लेइ बिछड़े? नई, कथे नई! पन तैन केरे विश्वास न केरनेरे वजाई सेइं गैर कौमन मुक्ति मैल्ली ताके तैन जलन भोए। 12 ते अगर तैन केरे विश्वास न केरनेरे वजाई सेइं गैर कौमरे लोकां केरु भलू भोवं, हकीकति मां गैर कौमां केरे लेइ बड़ रोड़ भोलू ज़ेइस यहूदी लोक परमेश्वरे कां वापस एज्जेले। 13 अवं तुसन गैर कौमरे लोकन सेइं एन ज़ोताई। कि अवं गैर कौमरे लोकां केरो प्रेरित आई, ते अपने सेवारे बारे मां घमण्ड केरि। 14 ताके अवं कोन्ची तरीके सेइं अपने लोकन जलन करेइतां तैन मरां किछन मुक्ति दूवेई। 15 किजोकि इस्राएली लोकां केरु शारु गानू दुनियारे लोकां केरे लेइ मेल मिलापेरी वजा बनी, ते तैन केरु यीशु कबूल केरनू कि तै मसीह आए, एन एरु भोलू ज़ेन्चरे मुड़रे ज़ांतू भोनू! 16 ते किजोकि पूर्वज अब्राहम ते दादे पड़दादे पवित्र थिये ते तैन केरि खानदानी भी पवित्र भोली, ज़ैखन चड़तलरो पेड़लो पेड़ड़ी परमेश्वरे लेइ झाढ़नेरे वजाई सेइं पवित्र भोरुए, त पूरु सन्नोरु अट्ट भी पवित्र भोरुए, ते ज़ैखन ज़ील पवित्र भोवं, त डाल भी पवित्रन। 17 इस्राएली लोक ज़ैतूनेरे बुटेरे डेलड़ी केरे ज़ेरे आन ते इश्शे दादे पड़दादे अब्राहम, इसहाक ते याकूब एस बुटेरे ज़ीलां केरे ज़ेरे आन, ते अगर किछ डेलड़ी ट्लोड़ी जेई, त तुस गैर कौमरे लोक जंगली ज़ैतूनेरे ज़ेरे आथ, ते तुस तैस असली ज़ैतूने मां कलम कियोरथ ते ज़ीलां केरे खुराकारे हकदार भोरथ। 18 त तीं तैन डेलइन पुड़ ज़ैना ट्लोड़ी जेई ते शैरी जेई तैन पुड़ घमण्ड न लोड़े कियेरु, ते अगर तू घमण्ड केरस त याद रख कि तू ज़ीलन नई, पन ज़ील तीं सुमभालते। 19 फिरी तू ज़ोलो, “डेलड़ी एल्हेरेलेइ ट्लोड़ी, कि अवं कलम भोई।” 20 इन सच्चे, तैना त विश्वास न केरनेरे वजाई सेइं ट्लोड़ी जेई, पन तू विश्वासे सेइं बनोरो रातस, एल्हेरेलेइ घमण्ड न केर, पन डर केर। 21 किजोकि परमेश्वरे असली डेलइन पुड़ दया न की, त तुसन पुड़ भी दया न केरेलो ज़ैना कलम कियोरथ। 22 एल्हेरेलेइ परमेश्वरी दया ते सखती हेर! ज़ैना पाप केरनेरे वजाई सेइं झड़े तैन पुड़ सखती, पन तेरे लेइ दया, ते तू अपने आपे पुड़ तैसेरी दया बनोरी राने दे, नई त तू भी कटो गालो। 23 ते अगर यहूदी लोक फिरी विश्वास केरन, त कलम केरे गानेन किजोकि परमेश्वर एन केरनेरे लेइ शक्ति बालो आए। 24 किजोकि अगर तू तैस ज़ैतून, ज़ै सुभावे सेइं जंगलीए कटो जेव, ते ज़ै असलीए

तैसेरे खलाफ रोडे जैतूने मां लव जेव, ते इना असली डैलडी अनुग्रहेरे मुताबिक जै परमेशरे असन दित्तोरूप, असन अलग-आन अपने जैतून मां किजो न लेई गैली। 25 हे ढुलाव ते बेइनव, अलग वरदाना मैलोरन। ते जैस भविष्यवैनरु वरदान मैलोरूप, अवं न चैई कि तुस गैर कौमरे लोक अपने बारे मां घमण्ड केरेथ। तै विश्वासेरे मुताबिक भविष्यवाणी केरे। 7 अगर सेवा केरनेरु वरदान मैलोरूप, त होरि केरि सेवाई मां लगगोरो राए, अगर कोई शिखालने बालो भोए, त शिखालने मां लगगोरो राए। 8 अगर तुशू वरदान हिम्मत देने बालू भोए त तुसेई हिम्मत देती लोडे रावरी, अगर कोन्वी दान देनेरु वरदान मैलोरूप भोए तैने खुल्ले पवित्रशास्त्रे मां लिखोरूप, “छुटानेबालो सिय्योनेरां (यरूशलम) दिले सेई लोडे दितोरु, अगर केन्वी अगवाई केरनेबालोए, तै एज्जेलो, ते अभक्ति इसाएली लोकन करां दूर केरेलो। 27 ते तैन सेई मेरो ई करार भोलो, कि अवं तैन केरे पाप माफ़ केरेलो।” 28 खुशखेबारां वजाई त तैना तुशुशे लेइ परमेशरे बैरिन, पन परमेशरे चुनेरे वजाई सेई ते तैन केरे बुजुर्गन दित्तोरे वचनेरे वजाई सेई परमेशर तैन सेई हेजू भी प्यार केरते। 29 किजोकि परमेशरे अपने वरदान करां ते अपने कुजाने करां कथे अपनो मन न बदले। 30 किजोकि जेन्चरे पेडले तुसेई परमेशरेरो हुकम न थियो मनोरो, पन हुना इसाएली लोकां केरे हुकमन मन्ने सेई तुसन पुड़ दया भोइ। 31 तैना हेजू भी हुकम न मन्नेबालेन कि जै दया तुसन पुड़ भोरीए तैन पुड़ भोली। 32 किजोकि सेब्भी लोकेई हुकम नई मन्नोरो एल्हेरेलेइ तैना कैदी केरे जेरे बनोरेन। पन परमेशरे एन एल्हेरेलेइ कियूं ताके तैन सेब्भन पुड़ दया केरि बटे। (e1e5e g1653) 33 वाह! परमेशर सेब्भी केरे लेइ भलो आए ते ज्ञानी ते अक्लमन्दे, कोई भी तैसेरे खियालन बियांन न केरि बटे ते कोई तैसेरी बत्तां न सेमझी बटे। 34 जेन्चरे पवित्रशास्त्रे मां लिखोरूप “कोई न ज्ञाने प्रभुएरे मने मां कुने या तैस सलाह देनेबालो कौने? 35 या केने पेडले तैस किछ दित्तु जेसेरो बदलो तैस दित्तो गाए?” 36 किजोकि सब किछ परमेशरेरी तरफां आए। तैन्नी सब किछ बनाव, ते तैसेरे जिरिये, ते तैसेरेलेइ सब किछे। तैसेरी आदर सदा भोती राए। आमीन। (aiōn g165)

12 एल्हेरेलेइ हे ढुलाव ते बेइनव, अवं तुसन कां परमेशरेरी दया याद केरताई बिनती केरतां जोताई, कि अपनि जिन्दगी पवित्र, ते जेरु परमेशरे पसंद एइते, बलिदान केरतां च़ाढ़ा; ईए परमेशरेरी आराधना केरनेरो सही तरीको आए। 2 ते इस दुनियारे तरीके पुड़ न च़ला, पन परमेशर तुशुशी सोच बदलेरे जिरिये सेई तुशुशो चालचलन भी बदलोए, ताके तुस ज्ञानथ कि परमेशर तुसन करां कुन चाते, या जै रोड़ी ते जैन तैस पसंद एइते, ते सिद्ध आए। (aiōn g165) 3 किजोकि अवं तैस परमेशरेरे अनुग्रहेरे वजाई सेई जै मीं मैलो, तुसन मरां हर एक्की सेई जोताई, कि जेन्चरे समझोरु लोडे, तैस करां कोई भी अपनो आप जादे न समझे, यानी कि जेत्रो विश्वास परमेशरे तुसन दित्तोरोए तैसेरे मुताबिक अपने आपे समझा। 4 किजोकि जेन्चरे इशे एक्की जिसमे मां बडे अंगन, ते सेब्भी अंगां केरु अक्कां जेरु कम नई। 5 तेन्चरे अस जैना मसीह पुड़ विश्वास केरतम, अस भी तैसेरे जिसमेरे जेरे बने, ते अस तैसेरे अंग आम ते अस एक्की होरि सेई जुडोरेम। 6 ते जैखन कि तैस

13 हर कोई मैन्हु प्रधान अधिकारी केरे अधीन राए; किजोकि कोई अधिकार एरो नई, जै परमेशरेरे तरफां न भोए; ते जैना अधिकारी आन, तैना परमेशरे ठहरावरेन। 2 एल्हेरेलेइ जै कोई अधिकारी केरि खलाफत केरते, तै परमेशरेरे कानूनेरी खलाफत केरते, ते जैना लोक परमेशरेरे कानूनेरी खलाफत केरतन तैन सज़ा मैल्लनीए। 3 किजोकि हेरा हाकिम तैस मैन्हु जै भलाई केरते तैस न डराए, पन तैस मैन्हु डराते जै बुरु कम केरते। अगर तुस हाकिमे करां डरनू न चाथ त भलाई केरते राथ ते तुसन हाकिमे करां शाबाश मैलेली 4 हाकिम परमेशरेरो सेवके ते तेरु भलू केरनेरे लेइ आए, पन अगर तू बुराई केरस, त तू डर, किजोकि तैस कां तलवार बैफेइदी नई, ते तै परमेशरेरो सेवके; जै बुरु कम केरनेबाले पुड़ कोप आनते। 5 एल्हेरेलेइ हाकिमेरे लेइ तुशुशु समर्पण ज़रूरी आए न सिर्फ परमेशरेरे सज़ारे वजाई सेई बल्के तुशुशे अपने ज़मीरेरे वजाई सेई। 6 एल्हेरेलेइ धड़त

भी देतथ, किजोकि हकोमत करनेबाले परमेशरे सेवकन, ते सदा एस्से कम्मे मां लगगोरो रातन। 7 एल्हेरेलेइ हर केन्चेरु हक देथ, जेसेरी धड़त बनतीए तैस धड़त देथ; जेसेरी चुंगी बनतीए तैस चुंगी देथ; जेसेरी इज्जत ते आदर केरी लोडे तैसेरी इज्जत ते आदर केरा। 8 एप्पू मांमेइ प्यारे अलावा ते केन्ची गल्ली मां कोन्ची चीजरे कर्जदार न राथ; किजोकि जै होरन सेइं प्यार केरते, तेने परमेशरे दित्तोरे कानूने हुक्म पूरे किये। 9 किजोकि मूसरे कानूने मां बडे हुक्म दित्तोरेन जेन्चरे कि “बदमाशी न केर, कल्ल न केर, चोरी न केरा, लालच न केर,” ते एन केरे अलावा होरो कोई भी हुक्म भोए त तैन सैरी केरि बुनीयाद इस्से गल्ली मां, “अपने पड़ोसी सेइं अपने बराबर प्यार केरा।” 10 प्यार पड़ोसेरी किछ भी बुराई न केरे, एल्हेरेलेइ जै प्यार केरते ते परमेशरे दित्तोरो कानून पूरे केरते। 11 एल्हेरेलेइ वक्त पिशेनतां ते इन केरा। तुशे लेइ निडली मरां बीझनेरो वक्त ओरोए, किजोकि जैस वक्ते असेई विश्वास कियोरो थियो, तैस वक्तेर खियाले सेइं हुनी इश्शी मुक्ति नेडीए। 12 इस बुरे दुनियाई मां रानेरो इश्शो वक्त लगभग खतम भोरोए, जेन्चरे रात टलेकड़ोने बालीए, ते लौ भोने बाली आए ते मसीहेरो वापस एजनेरो वक्त नेडे ओरोए, एल्हेरेलेइ असां तैना कम्मां शारम जैना लोक आंधरे मां केरतन ते तैना हथियार बंधम जैना लोई मां इस्तेमाल भोतन। 13 एल्हेरेलेइ अस भी तैन लोकां केरो जेरो बर्ताव केरम, जैना लोई मां जिन्दगी जीतन न कि आंधरे मां, न कि नचने, नशो केरने, न बदमाशी केरने मां, ते लुचपने, लडैई, ते जलनी मां मसत भोम 14 बल्के जेन्चरे प्रभु यीशु मसीहे जीवं तेन्चरे तुस भी जीथ, ते जिसमेरी खुबेइशां पूरी केरनेरी कोशिश न केरा।

14 जै विश्वासे मां कमजोरे, तैस तुस कबूल केरा, पन तैस कुन कियेरु लोडे ते कुन न लोडे कियेरु तैस पुड़ बेंस केरनेरे लेइ नई। 2 किजोकि एक्की विश्वासे, कि सब किछ खानू जेइजे, पन जै विश्वासे मां कमजोरे, तै सिर्फ शागां खाते। 3 सब किछ खाने बालो तैस पुड़ दोष न लाए जै सब किछ न खाए, किजोकि परमेशरे तैना दुइये कबूल कियोरेन। 4 तू कौन आस जै होरेरे नौकरे पुड़ दोष लातस? तैनी खरू कियू या बुरू इसेरो फैसलो तैसेरो मालिके केरेलो, बल्के तै कामयाब भोलो; किजोकि प्रभु ते इस काबल बनोरोए। 5 एन्चरे किछ लोक एक्की दिहाड़ी होरि करां बेधतां मन्तन, ते किछ सब दिहाड़े बराबर मन्तन, हर केन्ची इन याकीन कियेरु लोडे कि जैन तैना सोचतन तैन ठीके। 6 जै कोन्ची दिहाड़े मन्ते, तै प्रभुए इज्जत देनेरे लेइ मन्ते। जै सब किछ खाते, तै भी प्रभुए इज्जत देनेरे लेइ खाते, किजोकि तै परमेशरेरु शुक्र केरते, ते जै सब किछ न खाए, प्रभुएरे लेइ न खाए ते परमेशरेरु शुक्र केरते। 7 किजोकि असन मरां कोई न अपने लेइ जींते, ते न कोई अपने लेइ मरते। 8 किजोकि अगर अस जींतेम त, प्रभुएरे लेइ जींतेम; ते अगर अस जींम या मरम, अस प्रभुएरेम। 9 किजोकि मसीह एल्हेरेलेइ मरो ते जींते भी भोव, ताके मररे ते जींतां दुइयां केरो प्रभु

भोए। 10 तू अपने विश्वासी ढूलाए पुड़ किजो दोष लातस? या तू फिरी किजो अपने विश्वासी ढूलाए घटिया समझतस? अस सब परमेशरेरे आदालतेर तखतेरे सामने खडे भोनेम। 11 जेन्चरे पवित्रशास्त्रे मां लिखोरूए, कि प्रभु जोते, “अवं एप्पू तुसन सेइं वादो केरताई, हर कोई मीं कां जैधू टिकेलो, ते हर अक जिभ परमेशरेरी इकारा केरेली।” 12 ते असन मरां हर केन्ची अपने-अपने कम्मां केरो लेखो परमेशरे देलो पेनोए। 13 एल्हेरेलेइ अग्रोवं जो अस एक्की होरि पुड़ दोष न लाम, पन तुस एने थापा, कि कोई भी तुशे वजाई सेइं तुशो विश्वासी ढूला या बेइन पाप न केरे। 14 अवं ज्ञानताई, ते प्रभु यीशुएरे तरफां मीं पक्कू याकीन भोवं, कि कोई खानेरी चीज अपने आपे सेइं अशुद्ध नई, पन जै तैस अशुद्ध समझते, तैसेरेलेइ अशुद्ध आए। 15 अगर तेरो विश्वासी ढूलाए या बेइन तेरे खाने सेइं दुःख पुजे ते तै अग्रोवं जो परमेशरे पुड़ विश्वास केरनो शारे, त फिरी तू प्यारेरी रीति पुड़ न चलस, एरी चीजां न खा। जेसेरे लेइ मसीह मरो ते तू अपने खाने सेइं तैस नाश न केर। 16 एल्हेरेलेइ जैन कम तुशे लेइ रोडू आए ते जेइजे, तैसेरे बारे मां होरन तुहीन केरनेरो मौको न दे। 17 किजोकि परमेशरेरे राज्जे मां खानू पीनू माईने न रख्खे; माईने रखते धार्मिकतारी जिन्दगी जींनी ते मेल मलाप, ते आनन्द तै आए जै पवित्र आत्मा देते। 18 जै कोई इस रीति सेइं मसीहेरी सेवा केरते, तैस सेइं परमेशरेरु खुश भोते, ते मैन्हु भी तैसेरे बारे मां रोडू जोतन। 19 एल्हेरेलेइ असेई तैना कम्मां कियोरां लोइन जैन सेइं लोक मेल मिलापे सेइं रेइ बटन, ते एक्की होरि विश्वासे मां मजबूत केरम। 20 तुस जेरु खानू चातथ तैसेरे वजाई सेइं परमेशरेरु कम न बगाड़ा। सब किछ शुद्ध त आए, पन तुशे खाने सेइं अगर होरो कोई मैन्हु परमेशरे पुड़ विश्वास केरनो शारे ते तैसेरेलेइ बुरू आए। 21 रोडू त इन्ने, कि तू न मास खास, ते न शराब पीस, जेसेरे वजाई सेइं तेरे ढूला या बेइन पाप केरे। 22 तेरो इन चीजां केरे बारे मां जै विश्वासे, तै तेरे ते परमेशरेरे दरमियाने मां आए, धने तेए, जै तैस गल्ली मां, जै तै ठीक समझे, अपने आपे दोषी न ठहराए। 23 पन जै शक केरतां खाते, तै सजारे काबल भोइ जेव, किजोकि तै विश्वासे सेइं न खाए, ते जैन किछ केरस ते विश्वास केरस कि एन ठीक नई त तू पाप केरतस।

15 एन्चरे अस जैना विश्वासे मां मजबूत आम, असेई एन कियेरु लोडे कि जैना विश्वासे मां कमजोरे आन तैन केरि मद्दत केरम; न कि अपनो आप खुश केरम। 2 असन मरां हर कोई अपने विश्वासी ढूलान ते बेइन्नु खुश केरनेरे लेइ मद्दत केरे जैस सेइं तैन केरो विश्वास मजबूत भोए। 3 किजोकि मसीहे भी अपनो आप खुश न कियो, पन जेन्चरे पवित्रशास्त्रे मां लिखोरूए, “तेरे तुहीन केरनेबालोई मेरी भी तुहीन की।” 4 जेत्री गल्लां पेडली पवित्रशास्त्रे मां लिखोरिन, तेना इश्शे शिक्षारे लेइ लिखोरिन, कि अस सबरी ते पवित्रशास्त्रे करां हिम्मत हासिल केरम ताके असन उमीद भोए (परमेशर तैन्ने केरेलो

जेसेरे बारे मां तैनी वादो कियोरोए। 5 अवं प्रार्थना केरताई कि परमेशर तुसन सबर ते हिम्मत दे, ताके तुस यीशु मसीह पत्ती चलते-चलते अक भोइतां जीथ। 6 ते तुस सारे अकोट्टे भोइतां अक भोइतां एककी आवाजी मां परमेशर, इश्शे प्रभु यीशु मसीहरे बाजेरी बड़याई केरा। 7 एल्हेरेलेइ, एककी होरि कबूल केरा, जेन्चरे मसीहे तुस कबूल कियोरेथ; एल्हेरेलेइ एन केरा ताके लोक परमेशरेरी बड़याई केरन। 8 अवं जोताई, कि जैना वादे दादन पड़दादन दित्तोरे थिये, तैना वादे पूरे केरनेरे लेइ ते इन बांदू केरनेरे लेइ कि परमेशर सज़्जो, मसीह खतनो कियोरे लोकां केरो (यानी यहूदी केरो) सेवक बनो। 9 ते गैर कौमां भी परमेशरेरे दयारे वजाई सेइ परमेशरेरी बड़याई केरन, जेन्चरे पवित्रशास्त्रे मां लिखोरूप, “गैर कौमन मां अवं तेरु शुक्र केरेलो, ते तेरे नव्वेरु भजन केरेलो।” 10 फिरी होरि ठैरी लिखोरूप, “हे गैर कौमां केरे लोकव, परमेशरेरे लोकन सेइ साथी आनन्द केरा।” 11 ते फिरी पवित्रशास्त्रे जोते, “हे गैर कौमां केरे लोकव, प्रभुएरी बड़याई केरा; ते हे मुलखां-मुलखां केरे सब लोकव; तैसेरी बड़याई केरा।” 12 ते फिरी यशायाह नबी पवित्रशास्त्रे मां लिखोरूप, “यिशैरु अक वंश निसेलू, ते तै गैर कौमन पुड़ हकोमत केरेलो। तैस पुड़ गैर कौमां उमीद रेखेली।” 13 अवं प्रार्थना केरताई परमेशर जै उमीदरो देनेबालोए तुसन तैस पुड़ विश्वास केरनेरे वजाई सेइ सब किसमेरे आनन्द ते शैनति सेइ भरे, कि पवित्र आत्मा री शक्ति सेइ तुश्शी उमीद बढ़ती गाए। 14 हे मेरे ढ्वाव ते बेइनव, अवं एण्णू भी तुश्शे बारे मां ज्ञानताई, कि तुस भी भलेई सेइ भरतथ, ते तुसेई कुन कियेरु लोडे तुस रोडे चारे ज्ञानतथ ते एककी होरि शिखेली बटतथ। 15 फिरी भी मीं जैखन कैखन याद करानेरे लेइ तुसन बडे दिलेरी सेइ लिखू, इन तैस अनुग्रहेरे वजाई सेइ भोवं, जै परमेशरे मीं दित्तोरोए। 16 कि अवं गैर कौमां केरे लेइ यीशु मसीहरो सेवक भोइतां परमेशरेरे खुशखबारी सेवा याजकेरी जेरि केरि; जैस सेइ गैर कौमां केरे लोक परमेशरे दानेरे रूपे मां दित्ते गाले, जैस सेइ तै खुश भोलो, जैना पवित्र आत्मा पवित्र बनोरेन। 17 अवं यीशु मसीहरे वजाई सेइ परमेशरेरी सेवाई पुड़ घमण्ड केरि बटताई। 18 किजोकि तैन गल्लां केरे अलावा मीं होरि कोन्वी गल्लां केरे बारे मां जोनेरी दिलेरी नई, जैना मसीहे गैर कौमन केरे लेइ वचन, ते कर्म, 19 ते निशान ते बडे-बडे कम्मां केरे शक्ति सेइ, ते पवित्र आत्मा रे शेक्तेरि जिरिये कियां, इडी तगर कि मीं यरूशलेम नगरे मरां देइतां चेन्ने पासन इल्लुरिकुम इलाके तगर मसीहरो खुशखबारी पुरो-पुरो प्रचार कियो। 20 पन मेरे मनेरी उमंगे, कि जैडी-जैडी यीशु मसीहरी खुशखबारी प्रचार नई भोरो, तैडी खुशखबारी शुनेई; एरु न भोए होरेरे मुनीयादी पुड़ घर बनेइ। 21 पन जेन्चरे पवित्रशास्त्रे मां लिखोरूप, तेन्चरे भोए, “जैन तैसेरे बारे मां कधी नई ज़ोरू, तैना लालहे, ते जैनेई तैसेरे बारे मां नई शुनोरू तैना समझोले।” 22 एल्हेरेलेइ अवं तुसन कां एजनेरे लेइ बार-बार रुकोरो राव। 23 पन हुनी मीं इन इलाकन मां तैन

लोकन खुशखबारी शुनेइतां अपनू कम पूरू कियूं, जैनेई मसीहरे बारे मां न थियूं शुनोरू, ते मीं बडे सालां केरि तुसन कां एजनेरी इच्छाए। 24 एल्हेरेलेइ जैखन अवं इसपानिया मुलखे मां गेइ त तुसन मेइ एइते गेइलो, किजोकि मीं उमीदे, कि तैस सफरे मां तुसन सेइ मिली, ते जैखन तुसन सेइ मिली त अवं खुश भोई, ते अवं चाताई तुस मेरे इसपानिया गानेरे सफरेरे लेइ मेरी मदत केरा। 25 पन हुनी त परमेशरेरे लोकां केरि सेवा केरनेरे लेइ यरूशलेम नगरे गाताई। 26 किजोकि मकिदुनिया ते अखाया इलाकेरे केरे विश्वासी लोकन इन रोड़ लगू, कि यरूशलेम नगरेरे परमेशरेरे लोकां केरे लेइ जैना गरीब आन, किछ चन्दो केरन। 27 तैनेई एन खुशी सेइ कियूं, तैना यरूशलेम नगरेरे लोकां केरे कर्जदारन, यहूदी लोकेई गैर कौमरे लोकन परमेशरेरे तरफां रोड़ी चीजां दित्ती, ते इन रोड़ी कि गैर कौमां केरे लोक इस दुनियारी रोड़ी चीजां यहूदन देन। 28 अवं पेइलो यरूशलेम नगरे जो च़ललोरेई ताके जै चन्दो अकोट्टो कियोरोए तैन देई, तैङ्ग पत्ती अवं तुसन कां रोम नगरे मां एइतां इसपानिया मुलखे जो गेइलो। 29 ते अवं ज्ञानताई, कि जैखन तुसन कां एज्जेलो, त मेरे एजनेरे वजाई सेइ मसीह तुसन पूरे तरीके सेइ बरकत देलो। 30 ते हे ढ्वाव ते बेइनव, प्रभु यीशु मसीह पुड़ इश्शे विश्वासेरे वजाई सेइ ते पवित्र आत्मा रे दित्तोरे प्यारेरे वजाई सेइ अवं तुसन कां बिनती केरताई, कि मीं सेइ साथी मेरे लेइ परमेशरे कां लगातार प्रार्थना केरा। 31 कि अवं यहूदिया इलाकेरे गैर विश्वासी लोकन करां बचोरो रेई, परमेशरेरे तैना लोक जैना यरूशलेम नगरे मां आन खुशी सेइ ते मदत कबूल केरन जै अवं तैन कां नेइलो। 32 ते अवं परमेशरेरी मेर्जी सेइ आनन्दे कां एज्जी ते मीं तुसन साथी आराम मैल्ले। 33 अवं प्रार्थना केरताई, कि शान्ति देनेबालो परमेशर तुसन सेव्भन सेइ साथी भोए। आमीन।

16 अवं तुसन सेइ फीबेरे बारे मां, जै इश्शी विश्वासी बेइने ते किंखिया नगरेरे कलीसियारी सेवकाए, अवं चाताई तुस तैसेरी इज्जत केरा। 2 कि तुस जेन्चरे पवित्र लोकन सेइ कियेरु लोडे, तैस प्रभु मां कबूल केरा; ते जैस गल्ली मां तैस तुसन करां केन्चेरी मदतरी ज़रूरत भोए, तैसेरी मदत केरा; किजोकि ते भी बड़ां केरि मदत केरनेबाली बल्के मेरी भी मदत केरनेबाली भोरीए। 3 प्रिस्क्लिला ते अक्विला जैना प्रभु यीशु मसीह मां मेरे मदगारन, नमस्कार। 4 तैनेई मेरे जान बचानेरे लेइ अपनि जान खतरे मां रखोरि थी। सिर्फ अवं ए नई, बल्के गैर कौमां केरि सैरी कलीसियां भी तैन केरु शुक्र केरतिन। 5 ते तैस कलीसिया भी नमस्कार जैना तैन केरे घरे मां अकोट्टी भोतीए। मेरे द्वाले इपैनितुसे भी जै आसिया इलाकेरो मसीह पुड़ विश्वास केरनेबालो पेइलो विश्वासी ए, नमस्कार। 6 मरियम जैसां तुश्शे लेइ बड़ी मेहनत केरि, नमस्कार। 7 अन्टूनीकुस ते यूनियासे जै मेरो कुटमरोए, ते मीं सेइ साथी कैद भोरो थियो, ते प्रेरितन मां मुशूर, ते मीं करां पेइले मसीह मां थी, नमस्कार। 8 अम्पलियातुसे, जै प्रभु मां मेरो द्वालोए, नमस्कार। 9 उरबानुसे, जै मसीह मां इश्शो

मद्वतगार, ते मेरे टलारो इस्तखुसे नमस्कार। 10 अपिल्लेसे ज़ै मसीह मां ईमानदार निस्सो, नमस्कार। अरिस्तुबुलुस ते तैसेरे टब्बरे जो नमस्कार। 11 मेरे कुटमेरे हेरोदियोने नमस्कार। नरकिस्सुसेरे टब्बरे ज़ैना लोक प्रभु मां आन, तैन नमस्कार। 12 त्रूफैना ते त्रूफोसा ज़ैन कुआन्शेई प्रभु मां बड़ी मेहनत की, नमस्कार। टलारी मसीही बेइन पिरसिस ज़ैसां प्रभु मां बड़ी मेहनत की नमस्कार। 13 रूफुसे ज़ै प्रभु मां चुनोरोए, ते तैसेरी अम्मा ज़ै मेरी अम्मारी ज़ेरि ए, दुइयन नमस्कार। 14 असुंक्रितुस ते फिलगोन ते हिर्मास ते पत्रुबास ते हर्मास ते तैन केरे सैथी विश्वासी लोकन नमस्कार। 15 फिलुलुगुस ते यूलिया ते नेर्युस ते तैसेरी बेइन, ते उलुम्पास ते तैन केरे साथी सब परमेशेरे लोकन नमस्कार। 16 मसीहेरे प्यारे सेइं एक्की होरि जो नमस्कार केरा। तुसन भी मसीहेरे सैरी कलीसियारे तरफां नमस्कार। 17 हुनी हे द्दलाव ते बेइनव, अवं तुसन कां बिनती केरताई, कि ज़ैना लोक तैस शिक्षारे खलाफ ज़ै तुसन मांए, खलबली बनातन, ते ठोकर खानेरी वजा भोतन, तैन करां खबरदार राथ; ते तैन करां दूर राथ। 18 किजोकि एरे लोक इश्शे प्रभु यीशु मसीहेरी नई, पन अपने फेइदेरे लेइ सेवा केरतन; ते तैना रोड़ी-रोड़ी गल्लां केरतन ते चापलूसी सेइं सिधे सादे लोकन थोखो देतन। 19 तुश्शे हुक्म मन्नेरे बारे मां सेब्भी लोकन पतो त्रलोरोए; एल्हेरेलेइ अवं तुश्शे बारे मां आनन्द केरताई; पन अवं इन चाताई, कि तुस भलाई केरनेरे लेइ अक्लमन्द बना, पन बुराई केरनेरे लेइ सादे बना। 20 शान्ति देनेबालो परमेशर शैताने जल्दी तुश्शे पवन सेइं इलेन्नालो। इश्शे प्रभु यीशु मसीहेरो अनुग्रह तुसन पुड़ भोतो राए। 21 तीमुथियुस ज़ै मीं सेइं साथी कम केरते, ते लूकियुस ते यासोन ते सोसिपत्रुस मेरे कुटुम्बी केरे तरफां तुसन नमस्कार। 22 मेरे चिट्ठी लिखने बाले तिरितियुसेरू प्रभु मां तुसन नमस्कार। 23 गयुस भी तुसन नमस्कार ज़ोते ज़ेसेरे घरे मां अवं राताई, तैड़ी कलीसियारे लोक अकोट्टे भोतन। इरास्तुस ज़ै नगरेरो भण्डारीए, ते द्दला क्वारतुसेरू तुसन नमस्कार। 24 अवं प्रार्थना केरताई, इश्शे प्रभु यीशु मसीहेरो अनुग्रह तुसन पुड़ भोतो राए। आमीन। 25 हुनी तुसन ज़ै खुशखबरी मीं प्रचार की, मतलब यीशु मसीहेरे प्रचारिरे मुताबिक विश्वासे मां मज़बूत केरि बटते, तैस भेदेरे प्रकाशेरे मुताबिक ज़ै बड़े पेइलो देंतो छप्पोरो राव। (aiōnios g166) 26 पन हुनी बांदो भोइतां सनातन परमेशेरे हुक्मे सेइं नेबी केरे किताबां केरे ज़िरिये सेब्भी कौमन ज़ोवरोए, कि तैना विश्वासेरे ज़िरिये सेइं हुक्म मन्नेबाले भोइ गान। (aiōnios g166) 27 तैस्से एक्की बड़े अक्लमन्द परमेशेरी यीशु मसीहेरे ज़िरिये सदा महिमा भोती राए। आमीन। (aiōn g165)

1 कुरिन्थियों

1 अवं पौलुस ई चिट्ठी लिखने लोरोई। अवं, यीशु मसीहो प्रेरित भोनेरे लेइ परमेशरे मेर्जी सेइं कुजावरोई। मेरो विश्वासी साथी सोस्थिनेस भी मीं सेइं साथी आए (जै मेरी मदत करेने लोरोए)। 2 तुस जैना कुरिन्थुस नगरे कलीसियारे विश्वासी आथ, परमेशरे तुस यीशु मसीह मां अपने लोकां केरे रूपे मां अलग कियोरेथ, ते कने पवित्र भोनेरे लेइ कुजोरेथ। तैन सेब्भी केरां नंवे जैना हर ठैरी इश्शे त कने अपने प्रभु यीशुए नंवे सेइं प्रार्थना केरतन। 3 इश्शे बाजी परमेशर, ते प्रभु यीशु मसीहरे तरफां तुसन अनुग्रह ते शान्ति मैलती राए। 4 अवं तुश्शे बारे मां अपने परमेशरे हर वक्त शुक्र केरताई, एल्हेरेलेइ कि परमेशरेरो ई अनुग्रह तुसन पुड़ यीशु मसीह मां भोव। 5 किजोकि तुसेईं हर लिहाजे सेइं बेड़ि बरकतां हासिल कियोरिन, किजोकि तुस मसीह सेइं साथी अक आथ। एल्हेरेलेइ तैने तुसन अपनू वचन ज़ोनेरी ते समझनेरी खास काबलीत दितोरीए। 6 एन्चरे परमेशरे तुश्शे लेइ पक्कू कियू, कि मसीहरे बारे मां सन्देश सच्चे। 7 हुनी तुसन कां सारां आत्मिक वरदानां आन, किजोकि तुस इश्शो प्रभु यीशु मसीह बांदो भोनेरे बड़े इंतज़ारे मां आथ। 8 परमेशर तुसन आखरी तगर विश्वासे मां मज़बूत भी केरेलो, कि तुस इश्शे प्रभु यीशु मसीहरे वापस एजनेरे दिहाड़े बेइलज़ाम भोथ। 9 परमेशर एन्चरे केरेलो, किजोकि जैन किछ तै ज़ोते, तैस केरनेरे मां तै वफादारे। ते तैन्ने तुस अपने मट्टे इश्शे प्रभु यीशु मसीहरे संगती मां कुजावरेथ। 10 हे ढूलाव ते बेइनव, अवं इश्शो प्रभु यीशु मसीहरे अधिकारे सेइं इन केरनेरी बिनती केरताई, कि सब एक्की होरि सेइं राज़ामंद भोथ; ते तुसन मां फिरके न भोन, पन अक मन भोथ, ते अक्के खियाल रख्खा। 11 किजोकि हे मेरे ढूलाव ते बेइनव, खलोएरे टब्बरे लोकेईं मीं तुश्शे बारे मां ज़ोवरूप, कि तुसन मां लड़ाई लोरिन भोने। 12 मेरू ज़ोनेरो मतलब ई आए, कि तुसन मरां कोई त अपनो आप, “पौलुसेरे ज़ोते,” कोई “अपुल्लोसेरो,” कोई “कैफारो,” कोई “मसीहोरो ज़ोते।” 13 जैन तुस केरतथ तैन ठीक नई, कुन मसीह बेनटोव? कुन पौलुस कूसे पुड़ चाढ़ो जेव? या तुसन पौलुसेरे नंवे पुड़ बपतिस्मो मैलो? 14 अवं परमेशरेरू शुक्र केरताई, कि क्रिस्पुस ते गयुसेरू अलावा, मीं तुसन मरां केन्ची बपतिस्मो नई दित्तो। 15 कि एरू न भोए, कोई ज़ोए, कि तुसन मेरे चले बन्नेरे लेइ बपतिस्मो मैलो। 16 हाँ मीं याद आऊं, मीं स्तिफनासेरे टब्बरे भी बपतिस्मो दित्तो; एन केरे अलावा, अवं न जैनी कि मीं होरि केन्ची बपतिस्मो दित्तो। 17 किजोकि मसीहे अवं बपतिस्मो देनेरे लेइ नई, बल्के खुशखबरी शुनानेरे लेइ भेज़ोरोई, जैखन अवं लोकन परमेशरेरो सन्देश शुनाताई त अवं मैन्हु केरे चलाक खियालां केरो इस्तेमाल न केरि, एरू न भोए कि मसीहेरू कूस बेफैडू भोए। 18 किजोकि कूसेरी कथा नाश भोने भालां केरे लेइ बेवकूफीए, पन असन मुक्ति मैलने बालां केरे लेइ परमेशेरी

शक्ति आए। 19 किजोकि पवित्रशास्त्रे मां परमेशर ज़ोते, “अवं इन हिरेइलो दुनियारे लोकां केरे खियालन कि तैना सोचतन कि तैना ज्ञानी आन, हकीकति मां तैना बेकार खियाल आन। अवं साबत केरेलो कि तैना अक्लमन्द नई।” 20 त फिरी, अक्लमन्द मैन्हु केरे बारे मां अस कुन ज़ोम? यहूदी केरे कानूनेरे महिर मैन्हु केरे बारे मां अस कुन ज़ोम? इस दुनियारो लोकां केरे बारे मां कुन ज़ोम जैना ज़ोने मां चलाकन? परमेशरे तैना सारे बेवकूफ बनाए ते तैन केरि अक्ल बेफैडूदी बकवास साबत की (aiōn g165) 21 किजोकि जैखन परमेशरेरे ज़ानेरे मुताबिक दुनियां ज्ञान सेइं परमेशर न ज़ानो, त परमेशरे इन रोडू लग्गू, इस प्रचारेरे बेवकूफरे मुताबिक विश्वास केरनेबालन मुक्ति दे। 22 यहूदी त निशान चातन, ते गैर कौमां ज़ानेरे तोपी मां आन। 23 पन अस त तैस कूसे पुड़ चाढ़ोरे मसीहो प्रचार केरतम जै यहूदी केरे लेइ ठोकरारी वजाए, ते गैर कौमां केरे लेइ बेवकूफीए। 24 पन जैना परमेशरे (अपने लोक भोनेरे लेइ) कुजोरेन, कुन यहूदी, कुन गैर कौमां, तैन केरे लेइ मसीह परमेशेरी शक्ति, ते परमेशेरू ज़ाने। 25 किजोकि परमेशेरी बेवकूफी मैन्हु केरे ज़ाने करां जादे ज्ञान बालीए; ते परमेशेरी कमज़ोरी मैन्हु केरे शक्ति करां जादे ज़ोरे बालीए। 26 हे ढूलाव ते बेइनव, इस बारे मां सोचा ज़ेइस परमेशरे तुस कुजाए तुस केरे थिये, कि न जिसमेरे मुताबिक बड़े ज्ञानी, ते न बेड़ि शक्तिबाले, ते न इज़्जतदार घरेरे कुजाए। 27 ज़ाने बालन शरमिन्दा केरनेरे लेइ परमेशरे तैना चुने जैना दुनियारे नज़री मां बेवकूफन। ते ताकतबरन शरमिन्दा केरनेरे लेइ परमेशरे तैना चुने जैना दुनियारे नज़री मां कमज़ोरन। 28 परमेशरे तैना चुने जैना दुनियारी नज़री मां नीच ते घटिया आन, बल्के जैना अथ्थी भी नई तैना भी चुने, कि तैन जैना आन, बेकार केरन। 29 परमेशरे एन केरू ताके कोई प्राणी परमेशेरे सामने घमण्ड न केरि सके। 30 पन परमेशरे तुस यीशु मसीह सेइं अक कियोरेथ, ते मसीहरे ज़िरिये तैने अपनू ज्ञान दित्तोरूप। परमेशर अपने नज़री मां असन धर्मी भी बनाते। मसीहरे ज़िरिये अस पवित्र किये जे, ते तै असन इश्शे पापन करां आज़ाद केरते। 31 ताके ज़ेन्चरे पवित्रशास्त्रे मां लिखोरए, तेन्चरे भोए, “कि जै घमण्ड केरे तै तैस पुड़ घमण्ड केरे जैन प्रभुए कियोरूप।”

2 हे ढूलाव ते बेइनव, जैखन मीं तुसन परमेशेरे बारे मां सन्देश शुनव, त मीं बेड़ि गल्लां इस्तेमाल न की, कि अवं अपने आपे ज्ञानी हिरेई। 2 किजोकि मीं इन थापेरू थियू, कि तुसन मां यीशु मसीह, बल्के कूसे पुड़ चाढ़ोरे मसीहरे अलावा होरि कोई गल न केरि। 3 ते कमज़ोरी ते डरे सेइं तुसन सेइं साथी, ते बड़ो थरकतो तुसन सेइं साथी राव। 4 ते मेरे शिक्षाई, ते मेरे प्रचारे मां ज़ानेरी लालचानेरी बैली गल्लां न थी; पन पवित्र आत्मा शक्ति सेइं इन हिरावं कि जै सन्देश मीं शुनव तै सच थियो। 5 एल्हेरेलेइ की तुश्शो विश्वास मैन्हु केरे ज़ाने सेइं नई, पन परमेशेरे शक्ति पुड़ निर्भर भोए। 6 फिरी भी अवं आत्मिक सिद्ध लोकन ज़ानेरो सन्देश शुनाताई, पन इस दुनियारे लोकां

केरो नई, ते इस दुनियारे हाकिमां केरु नई जैना नाश भोनेन। (aiōn g165) 7 पन अस परमेशेरू तैन छुपेरू ज्ञान भेदेरे रीति पुड़ जोतम, जैन परमेशेरे दुनिया बनाने करां पेड़लू इशे महिमारे लेइ ठहराव। (aiōn g165) 8 परमेशेरो ई मकसद इस दुनियारे हाकिमन मरां केन्चे भी न समझो, किजोकि अगर समझते भोथे, त महिमा बालो प्रभु कूसे पुड़ न चाढ़ेथे। (aiōn g165) 9 पन जेन्चरे पवित्रशास्त्रे मां लिखोरू, “कि जैन न एछछेई लाव, न कन्नेई शुनू, ते जैना गल्लां मैन्हु केरे दिले मां न आई, तैना सब परमेशेरे तैन केरे लेइ तियार की, जैना तैस सेइं प्यार केरतन।” 10 पन परमेशेरे पवित्र आत्मा जेरिये सेइं असन पुड़ बांदू कियू; किजोकि पवित्र आत्मा सब गल्लां, बल्के परमेशेरी डुगी गल्लां ज्ञानते। 11 मैनन् मरां कौन केसेरी गल्लां ज्ञानते, सिर्फ मैनेरी आत्मा जै तैस मांए, तेन्चरे परमेशेरी गल्लां भी कोई न ज्ञाने, सिर्फ परमेशेरो आत्मा। 12 पन असन दुनियारी आत्मा नई, पन तै आत्मा मैलोरोए, जै परमेशेरे तरफांए, कि आस तैन गल्लन समझम, जैना परमेशेरे असन दितोरिन। 13 एल्हेरेलेइ अस मैन्हु केरे ज्ञानेरी शिखैलरी गल्लन मरां नई, पन पवित्र आत्मा रे शिखैलरी गल्लन मरां आत्मिक गल्लां आत्मिक ज्ञाने सेइं समझातम। 14 पन जिसमानी मैन्हु परमेशेरे आत्मा सच्चरई कबूल न केरे, किजोकि तैसेरेलेइ तै बेवकूफीए, ते न तै तैन सेमझी सके, किजोकि तैना सिर्फ पवित्र आत्मा जेरिये सेमझी गैतिन। 15 पन जैन लोकन पवित्र आत्मा मैलोरो तैना, तैन सैरी गल्लन परखतन जैना पवित्र आत्मा शिखालते। पन जैन लोकन पवित्र आत्मा नई मैलोरो तैना, तैन न सेझी बटन जैन पवित्र आत्मा मैलोरोए। 16 इन सच्र आए, किजोकि पवित्रशास्त्र जोते, “कोई न ज्ञाने प्रभुएरे मने मां कुने।” पन पवित्र आत्मा असन विश्वासी लोकन मसीहेरो मने दितोरोए।

3 हे ढुलाव ते बेइनव, जैखन अवं तुसन कां थियो त तुसन सेइं एन्चरे सब गल्लां न केरि बटो, जेन्चरे आत्मिक लोकन सेइं; पन जेन्चरे तैन सेइं जैना मसीह मां बच्चेन। 2 मीं तुसन परमेशेरे वचने मरां सिर्फ बुनियादी गल्लां केरि शिक्षा दित्ती ते डुग्धी सच्चरई नई। किजोकि तैस वक्ते तुस तै शिक्षा हासिल केरनेरे ते समझनेरे काबल न थिये, बल्के हेजू भी हासिल केरनेरे काबल नई। 3 किजोकि हेजू तगर भी गैर विश्वासी केरे जेरे आथ। एल्हेरेलेइ कि जैखन तुसन मां बैर, ते लड़ाइयन, त कुन तुस गैर विश्वासी केरे जेरे न भोए? तुस एरे लोकां केरि जेरि जिन्दगी ज़िने लोरेथ, जैन केरो रिश्तो प्रभु सेइं न भोए। 4 एल्हेरेलेइ अक जोते, “अवं पौलुसेरोई,” ते होरो जोते, “अवं अपुल्लोसेरो आई,” त कुन तुस एरे लोकां केरि जेरि जिन्दगी ज़िने बाले न भोए, जैन केरो रिश्तो प्रभु सेइं न भोए! 5 अपुल्लोस कौने? ते पौलुस कौने? सिर्फ सेवक, जैन केरे जेरिये तुसेईं प्रभु पुड़ विश्वास कियो, असन मरां हर केन्चे कम कियू जेन्चरे परमेशेरे केरनेरे लेइ दित्त्। 6 अगर अवं तुशुशी तुलना ऊडारे सेइं केरि त मीं बीज़ बेवं, अपुल्लोसे सगू, पन परमेशेरे बडावं। 7 एल्हेरेलेइ

न त लानेबालो किछे, ते न सगुने बालो किछे, पन परमेशर जै बडाने बालोए। 8 लानेबालो ते सगुने बालो दुइये अवकन; पन हर मैन्हु अपने-अपने मज़दूरो फल मैलनोए। 9 किजोकि अस परमेशेरे सेइं साथी कम केरनेबाले आम, तुस एरे ऊडारां केरे जेरे आथ जैन केरो तलक परमेशेरे सेइं आए, ते इसेरे आलाव तुशुशी तुलना एरे घरे सेइं केरताई जैन परमेशेरे बनावरूए। 10 परमेशेरे जैन कम मीं केरनेरे लेइ दितोरू थियू, मीं तैन अक्लमन्द सेइं कियू; अवं माहिर मिसेरो जेरो आई, मीं तुशुशे नगरे मां खुशखबरी प्रचार की ते शुरु मां तुसन यीशु पुड़ विश्वास केरनेरे लेइ मदत की, तैट्ठां बाद जैस कम्मेरी शुरुआत मीं कियोरी थी, होरे मसीही सेवा केरनेबाले तैस बुनियादी पुड़ लगातार कम केरते राए। पन असन मरां हर एक्की कम केरनेबाले ध्याने सेइं सोचोरू लोड़े, कि असेई परमेशेरू कम केन्चरे लोड़े कियोरू। 11 किजोकि यीशु मसीह सच्चरी बुनीयाद आए, ते होरो कोई होरि बुनीयाद न बनेइ सके, तैन इन आए, कोई तुसन मुक्ति हासिल केरनेरे लेइ नव्वीं शिक्षा न शिखैली बटे, मीं तुसन सेइं पेड़लू ज़ोवरू कि परमेशर असन यीशु मसीहेरे जेरिये मुक्ति देते। 12 ते अगर कोई इस मुनीयादी पुड़ सोन्नु चाँदी या कीमती घोड़ या कैडु या घास फूसेरो रदो रखते। 13 जैखन मसीह फिरी वापस एज्जेलो, त अग हर एक्केरे कम्मे परखेली, ते अग हर मैनेरे कम्मेरी कीमत हिराली। 14 जेसेरू कम तैस अगगी सेइं न फुकोलू, तैस मज़दूरी मैलनीए। 15 ते अगर केन्चेरू कम फुकोलू, त तैस नुकसान भोलो; पन तै एप्पू बचनोए पन फुकोते-फुकोते। 16 कुन तुस न ज्ञानथ, कि तुस परमेशेरू मन्दरथ, ते परमेशेरो आत्मा तुसन मां रहते? 17 अगर कोई तुसन नुकसान पुजाए, त परमेशर तैस नाश केरेलो; किजोकि परमेशेरू मन्दर पवित्रे, ते तैन तुस आथ। 18 कोई अपने आपे धोखो न दे, अगर तुसन मरां कोई इस दुनियारे लोकन मां अपनो आप अक्लमन्द समझी, त तैस दुनियारी नज़री मां बेवकूफ बनोरू लोड़े; ताके परमेशेरे नज़री मां सच्चरे ज्ञानी बने। (aiōn g165) 19 किजोकि इस दुनियारी अक्ल परमेशेरे कां बेवकूफीए, जेन्चरे पवित्रशास्त्रे मां लिखोरूए; “परमेशर जैन तैन केरे च़लैकी मां फसाते।” 20 ते फिरी पवित्रशास्त्र इन भी जोते, “प्रभु जैनी केरे खियालन ज्ञानते कि बेफैइदेन।” 21 एल्हेरेलेइ कोई मैनन् पुड़ घमण्ड न केरे, किजोकि किछ परमेशेरे तुशुशू भलेरे लेइ दितोरूए। 22 तैन इन आए कुन अवं पौलुस, कुन अपुल्लोस, कुन कैफा, कुन दुनिया, कुन ज़ीनू, कुन मरनू, कुन ई वक्त, कुन एजनेबालो वक्त, सब किछ तुशुशूए। 23 ते तुस मसीहेरेथ, ते मसीह परमेशेरोए।

4 मैन्हु असन मसीहेरे सेवक, ते परमेशेरे भेदां केरे भण्डारी समझन। 2 जेन्चरे कि जैस मैन्हु तैसेरे मालिके जैन कम दितोरे भोए, तैन तैन कम केरने मां वफादार लोड़े रावरू, जेसेरो तैस हुक्म दितो जेवरोए। 3 पन मेरे खियाले मां ई गल निकड़ीए, कि तुस या मैनन् मरां कोई फैसलो केरनेबालो मीं परखे, बल्के अवं अपने आपे न पेरखी। 4 किजोकि मेरो ज़मीर मीं कोन्ची

गल्ली मां दोषी न ठहराए, पन इस सेई अवं बेइलजाम न ठहरी, कजोकि मेरो परखने बालो प्रभुए। 5 ते ज्ञातगर प्रभु वापस न एज्जे, पेइली केन्वेरो इन्साफ न केरा, तैए लोकां केरे सारे खियाल साफ तरीके ज़ोलो, ज़ैन केरे बारे मां होरो कोई तैन न ज़ाने, ते तैन केरे दिलां केरे इरादे बांदे केरेलो। तैखन परमेशरेरी तरफां हर केन्वेरी तारीफ़ भोनीए। 6 हे ढ़लाव ते बेइनव, मीं इन गल्लन मां तुशशे लेइ अपनि ते अपुल्लोसेरी बेंस, मिसालारे रीति पुइ कियोरीए, एल्लेरेलेइ कि तुस इशशे ज़िरिये सेई शिखा, कि ज़ैन पवित्रशास्त्रे मां लिखेरे करां अग्रोवं न बधा, ते एक्केरे पासे ते होरेरे खलाफ़ घमण्ड न केरथ। 7 केन्वे तू होरन करां रोड़ो नई बनोरो। सब किछ तीं परमेशरेरे तरफां दित्तू जोरूए, अगर तीं सब किछ परमेशरेरे दितोरू त तुसन घमण्ड केरनेरो अधिकार नई। 8 तुस त रज़ोरेथ; तुस दौलतमन्द भोइजेइ, तुसेई इशशे बगैर राज़ कियूं; पन रोड़ू भोथू कि तुस राज़ केरेथे ते अस भी तुसन सेई साथी भोथे! 9 मेरी समझी मां परमेशरे अस प्रेरित लोक सेबभना पत्ती तैन लोकां केरे ज़ेरे ठहरावरेम, ज़ैन केरे मौतरो हुकम भोइ जेवरोए; किजोकि अस दुनियारे ते स्वर्गदूतां, ते मैन्हु केरे लेइ अक तमाशो बनोरेम! 10 लोक असन बेवकूफ़ समझतन किजोकि अस मसीहेरे बारे मां प्रचार केरतम, पन तुस गेतली सेई सोचतथ कि तुस अक्लमन्द मसीही आथ! बड़े लोक समझतन कि असन कां कोई अधिकार नई। पन तुस घमण्डे सेई ज़ोतथ कि तुसन कां परमेशरेरे तरफां शक्ति आए, तैना इशशी आदर न केरन पन तुशशी आदर केरतन। 11 अस इस वक्ते तगर नियन्ने-ट्लिशोरे, ते छिनदोरे लिगड़न मां आम, ते धक्के खातम, ते असन कां घर नई; 12 ते अपने हथेइ सेई कम केरतां मेहनत केरतम। लोक बुरू ज़ोतन, अस तैन बरकत देतम; तैना सतातन, अस झैल्लतम। 13 तैना बदनाम केरतन, अस नेरमी सेई गल केरतम, इड़ी तगर कि, अज़ तगर लोक हेजू भी इशशी इज़्ज़त न केरन, तैना ज़ोतन कि इशशी कोई कीमत नई। 14 मेरी इना गल्लां लिखनेरो मकसद ई नई कि तुसन छिथेई, पन अवं तुसन सुधारने चाताई, किजोकि तुस मेरे बच्चां केरे ज़ेरे आथ ज़ैन सेई अवं प्यार केरताई। 15 किजोकि अगर मसीह मां तुशशे शिखालनेबाले दश हज़ार भी भोथे, फिरी भी तुशशे बड़े बाजी नई, एल्लेरेलेइ कि मसीह यीशु मां खुशखेबरी सेई अवं तुशशो बाजी केरो ज़ेरो भोव। 16 एल्लेरेलेइ अवं तुसन कां मिनत केरताई, कि मेरी ज़ेरी चाल च़ला। 17 एल्लेरेलेइ मीं तीमुथियुसे ज़ैन प्रभु मां मेरू ट़लारू, ते वफ़ादार मटूए, तुसन कां भेजोरूए, ते तै तुसन यीशु मसीह मां मेरू चालचलन याद करालो, जेन्चरे कि अवं हर एक्की ठैरी हर कलीसिया मां शिक्षा देताई। 18 तुसन मरां बड़े लोक सोचतन कि अवं तुसन कां नई एजनो, एल्लेरेलेइ तैना घमण्ड केरतन। 19 पन प्रभु चाए त मीं तुसन कां जल्दी एजनूए, ते न सिर्फ़ तैन घमण्ड केरनेबालां केरि गल्लां नई, पन तैन केरि शक्ति भी ज़ैनेलो। 20 किजोकि परमेशरेरू राज़ गल्लां केरू नई, पन शक्ति मांए। 21 अगर हेजू भी तुसेई

बुरी बत नई शारोरी, अवं तुस सेखती सेई झिड़क देइलो। पन अगर तुसेई बुरी बत शारी त अवं तुसन सेई नेरमी त कने प्यारे सेई बर्ताव केरेलो।

5 इड़ी तगर शुन्ने मां ओरूए, कि तुसन मां बदमाशी भोचे, मतलब एरी बदमाशी ज़ेरी गैर विश्वासी लोकन मां भी न भोए, कि अक मैन्हु अपने बेबानी-अम्मा रखते। 2 तुसेई त दुःख कियोरो लोड़तो थियो ते उदास भोरू लोड़तू थियूं, ते ज़ैनी मैने एरू कियूं तै कढोरो लोड़तो थियो, पन इसेरे बदले तुस घमण्ड केरतथ। 3 चाए अवं तुस सेई साथी नई, पन मेरे विचार तुसन सेई साथी आन, चाए अवं तैड़ी नई, फिरी भी मने मां इन आए, कि एरू कम केरनेबालेरे बारे मां फैसलो केरने लोरोई। 4 इन तैन आए ज़ैन केरनेरी ज़रूरत आए। हकीकति मां इशशे प्रभु यीशु मसीहेरो अधिकार तुसन कां आए, इन पिशेनतां विश्वासी केरे रूपां अकोट्टे भोथ। इन एरू आए कि अवं भी अपने मने मां तैड़ी आई। ते फिरी प्रभु यीशु मसीहेरे ज़िरिये। 5 तैस मैन्हु ज़ैने पापी बर्ताव कियोरो, तैस अपने टोली मरां कढा ते तैस मैन्हु शैतानेरे अधिकारे मां वापस देथ, इस उमीदी सेई कि तै अपने पापन करां मन फिरालो। किजोकि अगर तै पापन करां मन फिरालो त तैस प्रभु यीशु मसीहेरे इन्साफेरे दिहाड़े मुक्ति मैलेली। 6 घमण्ड केरनू बंद केरा, कि तुस न ज़ानथ, कि थोड़ू ज़ेरू खमीर पूरे सन्नोरे अट्टे खमीर केरते। 7 परानू खमीर केढतां, अपनो आप साफ़ केरा, कि नंवू सनोरू अट्टू बना; ताके तुस अखमीरे राथ, किजोकि इशशो भी फ़सह ज़ै मसीहे, तै बलिदान भोरोए। 8 ते एज्जा अस तिहारे मां आनन्द मनाम, न पुराने खमीरे सेई न बुरेई, ते दुष्टरे खमीरे सेई, पन सिधीयैई, ते सलैइयरे बगैर खमीरेरे रोटी सेई। 9 मीं अपने पेइले चिट्ठी मां लिखोरूए, कि बदमाशी केरनेबालां केरि संगती न केरथ। 10 इन नई, कि तुस बिलकुल इस दुनियारे बदमाशी केरनेबाले, या लालच केरनेबाले, या धोखो केरनेबालन, या मूरती पुजने बालां केरि संगती न केरा; किजोकि एन्चरे तुसेई इस दुनियाई मरां निसनू पेथू। 11 मेरू ज़ोनू त इन्ने, कि अगर कोई अपने आपे विश्वासी ज़ोते, ते बदमाशी केरनेबालो, या लालची, या मूरती पुजने बालो, या गैई देनेबालो, या पीने बालो, या धोखो केरनेबालो भोए, त तैस सेई साथ न रेखतथ, बल्के एरे मैन्हु सेई साथी रोटी भी न खेइयथ। 12 ई मेरी ज़िमेबारी नई, कि ज़ैना लोक विश्वासी नई तैन केरि निन्दा केरि। पन हकीकति मां तुसेई तैन लोकन सज़ा दित्तोरी लोड़े ज़ैना तुशशे कलीसियारे हिस्सो आन। 13 पन ज़ैना विश्वासी नई तैन केरो इन्साफ़ परमेशर केरते पन पवित्रशास्त्र ज़ोते, बुरू कम केरनेबाले मैन्हु अपने टोली मां एजने न देथ।

6 अगर तुसन मरां केन्चरी होरि विश्वासी सेई लड़ाई भोए, त तुसेई फैसलेरे लेइ अधर्मी हाकिमन कां न लोड़े ज़ोवरू; तुसेई अपने कलीसियारे विश्वासी लोकन ज़ोवरू लोड़े कि तैना तुशशे मुकदमेरो फैसलो केरन कि कौन सही ते कौन गलते। 2 कुन तुस न ज़ानथ, कि परमेशरेरे लोकेई दुनियारे लोकां केरो इन्साफ़

केरनोए? ते अगर तुसेई दुनियारे लोकां केरो इन्साफ केरनोए, ते कुन तुस निकड़े करां निकड़े लड़ेइयरो फैसलो केरनेरी काबल नई? 3 तुस ज्ञानतथ कि एजनेबाले वक्ते मां असेई तैन स्वर्गदूतां अपने कुआन्शरु हक पूरू केरे; ते तेन्चरे कुआन्शरु भी अपने केरो इन्साफ केरनोए जैना स्वर्ग मरां शारोरे थिये, त पक्को तुस रोजेरी आम गल्लां केरो फैसलो केरि बटतथ। 4 अगर एरी गल्लां भोन, त तुसेई तैन केरो फैसलो केरनेरे लेइ तैन कां न लोड़े जेवरी जैन केरि आदर कलीसियारे लोकन मां न की गाए। 5 अवं तुसन छिथानेरे लेइ इन ज़ोताई, कि सच्चे तुसन मां अक भी अक्लमन्द न मैल्लो, जै विश्वासी लोकां केरो फैसलो केरे। 6 बल्के विश्वासी लोकन एप्पू मांमेइ मुकदमे भोतन, ते तैना भी गैर विश्वासी लोकां केरे सामने। 7 पन सच्चे तुसन मां बड़ो दोष त ईए, एप्पू मांमेइ मुकदमे केरतथ, बल्के बेइन्साफ किजो न झैल्लथ? अपनो नुकसान किजो न झैल्लथ? 8 बल्के बेइन्साफ केरतथ, ते नुकसान पुजातथ, ते तै भी विश्वासी लोकन। 9 कुन तुस न ज्ञानथ, कि बेइन्साफ लोक, परमेशरेरे राज़ेरे बारिस नई भोने? धोखो न खाथ, न वेश्यागामी, न मूरती केरि पूजा केरनेबाले, न आयाश, न लुच्चे, न तैना जैना मड़द मड़दन सेइ जिसमानी रिश्तो रखतन। 10 न चोर, न लालची, न पीने बाले, न गेई देनेबाले, न अंधेर केरनेबाले परमेशरेरे राज़ेरे बारिस भोनेन। 11 तुसन मरां पेइले किछ एरे थिये, पन प्रभु यीशु मसीहरे नंचे ते इश्शे परमेशेरी आत्माई सेइं तुश्शे पाप धोए जे, ते तुस पवित्र भोए ते धर्मा ठहराए। 12 तुसन मरां किछ जोई बटतन, कि सब चीज़ां मेरे लेइ जेइज त आन, पन सब चीज़ां फैइदेरी नई, सब चीज़ां मेरे लेइ जेइज त आन, पन अवं कोन्ची भी चीज़ोरो गुलाम बेनेलो। 13 तुसन मरां किछ जोई बटतन, खानू पेटेरे लेइए, ते पेट खानेरे लेइ, एन सच्चे, पन परमेशर रोटी भी ते पेटे भी नाश केरेलो, पन जिसम बदमाशी केरनेरे लेइ नई, बल्के प्रभुएरे लेइए; ते प्रभु जिसमेरे लेइए। 14 ते परमेशरे, प्रभु यीशु अपने शक्ति सेइं ज़ांते केरो, ते तै असन भी ज़ांते केरेलो। 15 कुन तुस न ज्ञानथ, कि तुश्शी जाना मसीहरे अंगन? ते कुन अवं मसीहरे अंगन वेश्यारे अंगन सेइं शामिल केरि? नई, कधी नई। 16 कुन तुस न ज्ञानथ, कि जै कोई वेश्याए सेइं न जेइज रिश्तो रखते, तै तैस सेइं अक जान भोते? किजोकि पवित्रशास्त्र ज़ोते, “कि तैना दुइये अक जान भोलां।” 17 ते जै प्रभुएरी संगती मां रहते, तै तैस सेइं साथी अक आत्मा भोते। 18 बदमाशी केरने करां दूर राथ, जेरे हारे पाप मैन्हु केरते, तैना जानरे बेइरन, पन बदमाशी केरनेबालो अपने जानरे खलाफ पाप केरते। 19 कुन तुस न ज्ञानथ, कि तुश्शी जान पवित्र आत्मारु मन्दरे; जै तुसन मां आए, ते तुसन परमेशेरी तरफां मैलोरोए? ते तुस अपने नई पन तुस परमेशेरे आथ; 20 किजोकि प्रभुए अपन जानरी कीमत देइतां तुस घिनोरेथ, एल्हेरेलेइ अपने जानरे ज़िरिये सेइं परमेशेरी आदर केरा।

7 हुनी अवं तुश्शे तैन सवालां केरो जुवाब देताई, जैना तुसेई अपने चिट्ठी मां पुच्छे, तुसेई पुच्छू, इन रोडू आए कि लोक

इला न बनान? 2 हाँ इन ज़रूरी आए कि बदमाशी केरनेरे डरे सेइं हर मड़देरी कुआन्श, ते हर कुआन्शरो मुन्श भोए। 3 मुन्श अपने कुआन्शरु हक पूरू केरे; ते तेन्चरे कुआन्शरु भी अपने मुन्शेरु। 4 कुआन्शी अपने जिसमे पुड़ अधिकार नई, पन तैसेरे मनशेरो अधिकारे; तेन्चरे मुन्शे भी अपने जिसमे पुड़ अधिकार नई, पन कुआन्शी। 5 तुस एक्की होरि करां अलग न भोथ; पन सिर्फ थोड़े चिरेरे लेइ बिस्तारे सेइं कि प्रार्थनारे लेइ फुर्सत मैल्ले, ते फिरी अकोट्टे भोथ, कि एरु न भोए, शैतान तुसन परखे। 6 पन जैन अवं इन जोने लोरोई ई सुझावे, न कि हुक्म। 7 अवं इन चाताई, कि जेरो अवं अइलाव आई, तेरे सब मैन्हु भोन; पन परमेशरे किछन इला केरनु वरदान दितोरुए, ते किछन अकैल्लू रानेरु वरदान दितोरु। 8 मेरी सल्लाह अइलां ते विधवां केरे ई आए, कि तैना अइलाए रान, जेन्चरे अवं आई। 9 पन अगर तैना अपनो आप कैबू न केरि बटन, त इला बनान, किजोकि इला बनानो इच्छान मां मसत राने करां रोड़ोए। 10 जैन केरो इला भोरोए, तैन केरे लेइ अवं नई, बल्के प्रभु हुक्म देते, कि कुआन्श अपने मुन्शे करां अलग न भोए। 11 (अगर अलग भोइ गाए, त होरो इला न बनाए; या अपने मुन्शे सेइं फिरी मेल मिलाप केरे) ते मुन्श अपने कुआन्शी न शारे। 12 होरन सेइं प्रभु नई, पन अवं ज़ोताई, अगर केन्ची विश्वासी इलाएरी कुआन्श विश्वासी न भोए, ते तै कुआन्श तैस साथी राने सेइं खुश भोए, त तै तैस न शारे। 13 ते जैस कुआन्शरो मुन्श विश्वासी न भोए, ते तै मैन्हु तैस साथी राने सेइं खुश भोए; ते मुन्शे न शारे। 14 किजोकि एरो मुन्श जै विश्वासी न भोए, परमेशर तैस सेइं एरो बताव केरते जेन्चरे अपने लोकन सेइं, किजोकि तैसेरी कुआन्श मसीही आए, ते एरी कुआन्श जै विश्वासी न भोए, परमेशर तैस सेइं एरो बताव केरते जेन्चरे अपने लोकन सेइं, किजोकि तैसेरो मुन्श मसीही आए। अगर एरु न भोथू कि विश्वास न केरनेबालो मुन्श या कुआन्श परमेशेरे लोक न भोथे, तैखन तुश्शे बच्चे भी परमेशेरे न भोथे। पन हुनी तुश्शे बच्चे भी परमेशेरे भोइ जे। 15 पन जै मड़द ते कुआन्श विश्वासी न भोए, अगर तैना अलग भोन, त अलग भोने देथ, एस हालती मां कोई विश्वासी इलाए या बेइन बन्धने मां नई। पन परमेशरे अस कुजोरेम कि सुखे सेइं ज़ीम। 16 हे कुआन्शव तुस इस गल्ली याद रखा कि तुश्शे मुन्श तुश्शे वजाई सेइं मुक्ति हासिल केरि बटतन, ते हे मुन्शव तुस याद रखा कि तुश्शे वजाई सेइं तुश्शी कुआन्शां मुक्ति हासिल केरि बेटतिन। 17 जैन किछ अवं जोने लोरोई तैसेरो नचोड़ ई आए: हर मैन्हु तैस हालती मां रावरो लोड़े जै प्रभुए तैस दितोरीए जेइस तैनी परमेशेरु कुजानू शुनू। अवं इन सेबभी कलीसियान मां एन्चरे ठहराताई। 18 अगर कोई मैन्हु जै खतनो कियोरे कुजोरो; त तै प्रभु यीशु पुड़ विश्वास केरते, तैस अपनो आप बगैर खतने बालो हिरानेरी ज़रूरत नई; ते अगर कोई मैन्हु जेसेरो खतनो नई भोरो, ते तै प्रभु यीशु पुड़ विश्वास केरते, तैस खतनो कराने ज़रूरत नई। 19 न खतनो किछ चीज़े, ते न

खतनो न करानो, बल्के परमेश्वरे हुक्म मन्ने बड़े ज़रूरि। 20 हर अक ज़ैस हालती मां कुजावरोए, तेन्चरे राए। 21 तू गुलाम थियो ज़ेइस परमेश्वरे कुजावरो थियो, फिरी भी परेशान न भोथ; पन अगर तू आज़ाद भोइ सकतस, त भो। 22 किजोकि ज़ैना गुलामेरे हालती मां कुजोरेन, तैना प्रभु मां आज़ादन, तेन्चरे ज़ैना प्रभु मां आज़ाद कुजोरेन, तैना मसीहरे गुलामन। 23 परमेश्वरे तुस बड़ी कीमत देइतां घिनोरेथ, मैन्हु केरे गुलाम न बना, पन परमेश्वरे गुलाम बना। 24 हे ढूलाव ते बेइनव, ज़ै ज़ैस हालती मां परमेश्वरे कुजवरोए, तै तैस्से हालती मां परमेश्वरे सेइं साथी राए। 25 कुवैरी केरे लेइ मां प्रभु करां कोई हुक्म नईं मैल्लेरो, पन प्रभुए दयाई सेइं मां अक्ल दितोरीए, ज़ैस पुइ भरोसो कियो गाते, ते अव ई सलाह देताई। 26 किजोकि इन दिहाइन मां विश्वासी लोकां केरे लेइ बुर गल्लां भोने लोरिन, एल्हेरेलेइ मीं लगते कि इन तुश्शे लेइ रोइए, अव ई सलाह देताई कि ज़ैना ज़ेरे आन तैना एन्चरे रान। 27 अगर तेरी कुआन्शे, त तू तैस करां अलग भोनेरी कोशिश न केर, ते अगर तेरी कुआन्शे नईं त तू कुआन्शी न तोप। 28 पन अगर तू इला भी केरस, त पाप नईं; ते अगर कुवारी इलाई गाए त कोई पाप नईं; पन एरे लोकन इस दुनियाई मां बड़ी परेशानी भोली, ते अव बचाने चाताई। 29 हे ढूलाव ते बेइनव, अव इन ज़ोताई, इश्शो इस दुनियाई मां जादे वक्त नईं रावरो, एल्हेरेलेइ जादे फिक्र न केरा कि तुश्शी कुआन्शां आन या नईं, पन प्रभुएरी सेवारे बारे मां सोचते राथ। 30 ते तैना ज़ैना लेरां देतन या ज़ैना खुश आन, या ज़ैना अपन बनानेरे लेइ चीज़न घिन्तन, इन सेबभी गल्लां केरे बारे मां जादे लेइ सोचोऋ (किजोकि इना सब गल्लां प्रभुएरी सेवा केरनि बिसरैली)। 31 तैना ज़ैना दुनियारी चीज़ां इस्तेमाल केरतन, तैनेई तैन सेइं लगाव न लेइ रखोरो, किजोकि ज़ेन्चरे अस ज़ानतम ई दुनिया जल्दी खतम भोनेवालीए। 32 मेरी इच्छा ई आए कि तुस दुनियारे जिन्दगरी खुवाइशन करां आज़ाद राथ, अइलाव मैन्हु प्रभुएरी सेवा केन्चरे केरनि ई फिक्र केरते कि प्रभुए खुश केरे। 33 पन इलावरो मैन्हु दुनियारी गल्लां केरि फिक्री मां रहते, कि केन्चरे अपने कुआन्शी खुश रखे। 34 तैने दूई चीज़ां केरे बारे मां सोचोऋ लेइ, अपनि कुआन्शे खुश केरनेरे बारे मां ते प्रभु खुश केरनेरे बारे मां। इलावरी ते अइलाई मां भी फर्के, अइलाई प्रभुएरी फिक्री मां रहतीए, कि केन्चरे अपनि आत्मा, ते जिसम दुइये पवित्र रखे, पन इलावरी दुनियारे फिक्री मां रहतीए, कि अपने मुन्शे खुश रखे। 35 ई गल तुश्शे फैइदेरे लेइ ज़ोताई, न कि तुसन फसानेरे लेइ, बल्के एल्हेरेलेइ ज़ेन्चरे लेइ तेन्चरे कियूं गाए, ताके तुस अक मन भोइतां प्रभुएरी सेवाई मां लोगोरे राथ। 36 ते अगर कोई इन समझे कि, अव एपनी तैस कुवैराऋ हक लोरोई मारने ज़ेसेरी जवानी लोरी ढलने, त ज़ेन्चरे चाए तै केरे, इस मां पाप नईं, तै तैसेरो इला भोने दे। 37 पन अगर ज़ैने बाजी अपने मने मां पक्को फैसलो कियोरोए, कोन्ची होरेरे दबावेरे अलावा तै केरते, त तैस कां ते अधिकारे ज़ैन तै केरनू चाते। ते

अगर तै फैसलो केरते कि तैसेरी कुई ज़ेरे आए तेरही रखे, तै परमेश्वरी नज़री मां रोइ कम केरेलो। 38 ज़ै अपनि कुवैराऋ इला कराते, तै रोइ केरते, ते ज़ै न कराए तै भी रोइ केरते। 39 ज़ांतगर कोन्ची कुआन्शो मुन्शे जीतो रहते, तांतगर तैस सेइं साथी रावरू लेइ, पन ज़ेइस तैसेरो मुन्शे मेरि गाए, ज़ैस सेइं चाए इला केरि बटतीए, सिर्फ विश्वासी लोकन मां। 40 पन अगर तै फिरी दुबारां इला न केरे, त मेरे खियाले मां बड़ी धने ते अव समझताई, कि परमेश्वरे आत्मा मीं चलाने लोरीए।

8 तुसेई अपने चिट्ठी मां मूरतन कां च़ाढ़ोरी चीज़ां केरे बारे मां पुछोऋ थियूं, इस बारे मां अस ज़ानतम, पन ज़ान असन अपने बारे मां घमण्डी बनाते, पन प्यार सेइं होरि केरि तरक्की भोतीए। 2 अगर कोई समझे, कि अव किछ ज़ानताई, ते ज़ेरू ज़ानेरू लेइ तेरू हेजू तगर न ज़ाने। 3 पन अगर कोई परमेश्वरे सेइं प्यार केरते, ते तैस परमेश्वर पिशानते। 4 एल्हेरेलेइ अव खानेरे बारे मां जुवाब देनो चाताई, अस मूरती केरे सामने बलिदान कियोरी चीज़ां केरे खानेरे बारे मां ज़ानतम, कि अस ज़ानतम कि मूरती सच्चो परमेश्वर नईं, सिर्फ एक्के सच्चो परमेश्वरे। 5 पन फिरी भी अम्बरे ते धेरतली पुइ लोक बड़े देबते ते प्रभु ज़ोतन, पन इश्शे लेइ अक्के परमेश्वर, तै इश्शो बाजी आए। तैने सेरी चीज़ां बनेइ, अस तैसेरे ज़िरिये जीते रातम। एन्चरे असन कां अक्के प्रभुए ते तै प्रभु यीशु मसीहे। तैसेरे ज़िरिये सब किछ बनव जेवं, अस तैसेरेलेइ जीतेम। 7 पन सेबभी विश्वासी लोकन इस्से ज़ान नईं; पन किछ लोक हेजू तगर मूरतन असली भोनेरी सोचनेरी आदते, एल्हेरेलेइ ज़ैखन लोक मूरतन कां च़ाढ़तन, त तैना असली देबतन पूजा केरे रूपे मां सोचतन ते तैन केरो ज़मीर कमज़ोर भोइतां अशुद्ध भोइ गाते। 8 पन खानू असन परमेश्वरे कां न पुजाए, अगर अस न खाम, त असन किछ नुकसान नईं, ते अगर खाम त कोई फैइदो भी नईं। 9 पन हुशार राथ, एरू न भोए, कि तुश्शी ई आज़ादी कमज़ोर विश्वासे बालां केरे लेइ पाप केरनेरे लेइ वजा बने। 10 किजोकि अगर तीं ज़ैनी मन्दरे मां मूरतन कां च़ाढ़ोऋ खातो लाए, ते तै विश्वासे मां कमज़ोर मैन्हु भोए, ते कुन तैसेरे ज़मीरे मां मूरती केरे सामने च़ाढ़ोरी चीज़ां केरे खानेरी दिलेरी न भोली। 11 एस रीति सेइं तेरे ज़ानेरे वजाई सेइं तै विश्वासे मां कमज़ोर ढूला ज़ेसेरे लेइ मसीह मरो तै मसीह पुइ विश्वास केरनो न शारे। 12 एन्चरे तुस अपने विश्वासी लोकन ठोकर पुजेइतां न सिर्फ तैन केरे पापी भोए, बल्के मसीहरे भी पापी भोले। 13 इस वजाई सेइं अगर खानू कोन्ची विश्वास केरनेबालेरे लेइ ठोकर भोए, ते अव कोन्ची तरीके सेइं कधी मास न खेइलो, एरू न भोए कि मेरू खानू कोन्ची विश्वास केरनेबालेरे लेइ ठोकरारी वजा बने। (aiōn g165)

9 अव ज़ैन केरनू चाताई तैन केरनेरे लेइ आज़ाद आई। अव अक प्रेरित आई, मीं प्रभु यीशु लावरोए ज़ै इश्शो प्रभुए, ज़ैन कम मीं प्रभुएरे लेइ कियूं तुस तैसेरो नतीजोथ। 2 अगर होरे लोक इस गल्ली न मनन् कि अव प्रभु यीशुएरो प्रेरित आई,

त ढूलाव तुसेई त लोड़े मन्नोरु। किजोकि मीं ए तुसन कां खुशखबरी आनोरी थी। तुशशो प्रभु विश्वास इस गल्ली साफ करेते कि अवं हकीकति मां तैसेरो प्रेरित आई। 3 जैना लोक मेरे प्रेरित भोनेरे अधिकारे पुड़ सवाल पुच्छतन, तैन केरे लेड़ मेरो ईए फैसलो आए। 4 कुन असन खाने पीनेरु हक नई? 5 कुन असन अधिकार नई, कि कोन्ची मसीही कुआन्शी सेइ इला बनाम, जेन्चरे होरे प्रेरित, ते प्रभुएरे ढूला ते कैफा (यानी पतरस) केरतन? 6 या सिर्फ मीं ते बरनबासे ज़िन्दगी जीनेरे लेड़ कम कियोरु लोड़े? 7 को जेरो फौजी अपनू खेड़तां जंग केरेते? या कौन बाग लेड़तां तैसेरो फल न खाए? कौन भैड्डां रेखतां तैन केरु दुद्ध न पीए? 8 अवं इना गल्लां मैनु केरि रीति पुड़ नई लोरो ज़ोने, मूसोरो कानून भी इन्ने ज़ोते। 9 एल्हेरेलेइ मूसोरो कानून ज़ोते, तैस मां इन लिखोरुए, “तुस खल्ले मां च़लते बार दांतेरु आशी न बेंदथ।” कुन परमेशर दांतां केरि फिक्र केरेते? नई। 10 या खास केरतां इश्शे बारे मां लिखोरु, हाँ इश्शे लेड़ लिखोरुए, किजोकि ठीके कि जोट्लने बालो उमीदी सेइ जोट्ले, उपाने बालो उमीदी सेइ उपाए। 11 असेई तुसन परमेशरो सन्देश शुनोवोए। जेन्चरे लोक बीज बेतन तेन्चरे असेई तुसन मां परमेशरेरे वचनेरु बीज बेव। एल्हेरेलेइ तुशशो फरज़े कि इश्शे रोज़ेरो खर्चो असन देथ। 12 ज़ां कि तुसेई होरि लोकां केरि मदत की, ज़ैनेई तुसन प्रचार कियो, त मेरु त कने बरनबासेरु जादे हके। किजोकि अस तुशशे पेड़ले प्रेरित आम, फिर भी असेई अपने ज़रूरते चीज़ां केरे लेड़ ज़बरदस्ती न की, तैसेरे बदले अपने मेज़ीं सेइ सब किछ झैल्लू कि मसीहरे खुशखबरी पुड़ विश्वास केरनेरे लेड़ केन्चरे लेड़ रुकावट बनम। 13 कुन तुस न ज़ानथ कि ज़ै पवित्र चीज़ां केरि सेवा केरेते; तै मन्दे मरां खाते; ते ज़ै बलिदान केरनेरे ठारारी सेवा केरेते; तै बलिदान केरनेरे ठारी सेइ शामिल भोते। 14 एन्चरे प्रभुए ठहराव, कि जैना लोक खुशखबरी शुनान, तैन केरि ज़िन्दगारो गुज़ारो भी तैन लोकन करां लोड़े भरो ज़ैना लोक खुशखबरी शुन्तन। 15 पन मीं इन अधिकारन मरां कोई भी इस्तेमाल न कियो। ते मीं एना गल्लां एल्हेरेलेइ नई लिखोरी, कि मेरे लेड़ एरु कियूं गाए। बिलकुल नई! किजोकि इस करां त मेरु मरनू रोडूए; कि कोई मेरु घमण्ड बैफ़ेइदू ठहराए। 16 ते अगर अवं खुशखबरी शुनेई, त मेरु किछ घमण्ड नई, किजोकि इन त मेरे लेड़ ज़रूरीए, ते अगर अवं खुशखबरी न शुनेई, त मीं पुड़ अफ़सोस। 17 किजोकि अगर अवं इन कम अपने मेज़ीं सेइ केरताई, त मीं इनाम मैलेलू। पन अगर इन मेरी मेज़ीं सेइ नई, पन अगर परमेशरे ई ज़िमेदारी दितोरीए, त अवं कोन्ची इनामेरी उमीद न रेख्खी बेति। 18 ते फिरि मेरु कुन इनामे? कि खुशखबरी शुनाने मां मसीहरी खुशखबरी मुफ़्त बेंटी; इड़ी तगर कि ज़ैन खुशखबरी मां मेरु हक्के, तैसेरो पूरो इस्तेमाल केरि। 19 किजोकि सेब्भन करां आज़ाद भोने पुड़ भी मीं अपनो आप सेब्भी केरो गुलाम बनाव; कि जादे करां जादे लोकन खिचतां ऐनीं। 20 अवं यहूदी केरे लेड़

यहूदी बनो ताके यहूदन खिचतां मसीह मां ऐनीं, ज़ैना लोक यहूदी केरे कानूनेरे अधीन तैन केरे लेड़ कानूनेरे अधीन न भोने पुड़ भी अधीन भोव, कि तैन ज़ैना कानूनेरे अधीन तैन खिचतां मसीह मां ऐनीं। 21 ज़ैना कानूनेरे अधीन नई तैन केरे लेड़ अवं (पन अवं ज़ानताई कि अवं परमेशरेरे कानूने करां हीन नई, किजोकि अवं मसीहरे कानूनेरे अधीन आई) तेरो बनो, कि तैन खिचतां मसीह कां ऐनीं। 22 अवं विश्वासे मां कमज़ोरां केरे लेड़ कमज़ोर बनो, ताके कमज़ोरन खिचतां मसीह मां ऐनीं, अवं सेब्भी मैनु केरे लेड़ सब किछ बनो, कि कोन्ची न कोन्ची तरीके सेइ लोकन मुक्ति मैल्ली। 23 ते अवं सब किछ मसीहरे खुशखबरेरे लेड़ केरताई, कि अवं होरन सेइ साथी तैन बरकतां केरो हिसेदार भोई। 24 कुन तुस न ज़ानथ, कि दौड़ी मां त सब दौड़तन, पन इनाम अक्के नेते, तुस तेरहु दौड़ा, कि ज़ींतथ। 25 ते हर अक पलवान हर किसमेरो परेज़ रखते, तै त अक शुक्ने बाले ताजेरे लेड़ इन सब किछ केरेते, पन अस त तैस ताजेरे लेड़ केरतम ज़ैन कधी नई शुक्नू। 26 एल्हेरेलेइ अवं एन्चरे दौड़ताई, पन बगैर मकसदे नई, अवं भी एन्चरे मुकन सेइ लड़ताई, पन तैसेरो ज़ेरो नई ज़ै हवाई मां लड़ते। 27 पन अवं अपने जानरी खुवैइशन मारताई, ते कैबू मां केरताई; एरु न भोए कि होरन प्रचार केरि, ते मीं इनाम न मैलेले।

10 हे ढूलाव ते बेइनव, अवं तुसन याद करानू चाताई, इश्शे दादे-पड़दादन सेइ बड़े पेड़ले सुनसान ठैरी मां कुन भोवं, परमेशरे तैन केरे अग्री-अग्री बिदलार भेजतां तैन सेब्भन बत हिराई, ते तैना सब लाल समुन्दरेरे पैनी मांमेइ एन्चरे पार किये जेन्चरे शुक्कोरी ज़मीनी मांमेइ। 2 ते तैन सेब्भेई बिदलारी मां, ते समुन्द्रे मां मूसोरो बपतिस्मो नेव। 3 ते तैन सेब्भेई तै रोटी खाइ, ज़ै परमेशरे तैन स्वर्गारां दित्ती। 4 तैन सेब्भेई अक्के पानी पिव ज़ैन परमेशर तैन दित्तू, किजोकि तैना आत्मिक चट्टानी मरां पीते थिये, ज़ै तैन सेइ साथी-साथी च़लती थी; ते तै चट्टान मसीह थियो। 5 पन परमेशर तैन मरां बड़न सेइ खुश न भोव, एल्हेरेलेइ तैना रेगिस्ताने मां मेरि जे। 6 इना गल्लां इश्शे लेड़ खबरदारी भोइ, कि जेन्चरे तैनेई लालच कियूं, तेन्चरे अस बुरी चीज़ां केरु लालच न केरम। 7 ते न मूर्ती केरि पूजा करेनेबाले बनम; जेन्चरे तैना किछ बनोरे थिये, जेन्चरे पवित्रशास्त्रे मां लिखोरुए, “लोक तिहारे मां खाने पीने बिश्शे, ते फिरि बुरु केरनेरे लेड़ उठे।” 8 ते न असां बदमाशी केरम; जेन्चरे तैन मरां किछेई की, कि एककी दिहाड़ी मां 23000 मेरे। 9 ते न अस प्रभु यीशु मसीह अज़माम; जेन्चरे तैन मरां किछेई अज़माव, ते तैना सपन सेइ मेरि जे। 10 ते न तुस कुड़कड़थ, जेन्चरे तैन मरां किछेई कुड़कड़व, ते परमेशरेरे तरफां भेजोरे स्वर्गदूते तैना मारे। 11 पन इना सब गल्लां, ज़ैना तैन पुड़ बीती, तैना खबरदारी ज़ेरि थी, ते तैना इश्शी लेड़ हदैइयत भी आन, ज़ैना अस दुनियारे आखरी वक्ते मां रातम लिखी जेई। (aiōn g165) 12 एल्हेरेलेइ ज़ै विश्वासी समझते, “कि अवं विश्वासे मां मज़बूताई,” तै खबरदार राए; कि

तैस्से पापे मां फिरी न बिछड़े। 13 तुसन पुड़ एरी अजमैइश नई ओरी, जै मैन्हु केरे झल्लनेरे बेइरे, परमेशर वाफदार, तै तुसन शक्ति करां जादे अजमैइशी मां गाने न देलो, बल्के अजमैइशी सेइं साथी तैस मरां कढेलो भी; कि तुस झेल्ली भी बटथ। 14 एल्हेरेलेइ, हे मेरे ट्लाराव, मूरती पूजने करां बेंचते राथ। 15 अवं समझदार बुझतां, तुसन सेइं ज़ोताई, जैन अवं ज़ोताई, तुस तैसेरे बारे मां सोचा कि सही आए या नई। 16 जैखन अस यीशु मसीहेरें मौती याद केरनेरे लेइ अकोठे भोतम, त अस दाछारो रस कटोरे सेइं पीतम, जेसेरे बारे मां असेई परमेशेरू शुक्र कियोरू, ते अस ट्लोड़ोरी रोटी भी खातम, ई तैन बरकतन मां शामिल भोनेरो निशाने, जैना मसीहेरें जानी ते खूने करां एइतिन? 17 एल्हेरेलेइ, कि अक्के रोटीए जै मसीहे, चाए अस बडेम, अस अक जान भोतम किजोकि अस तैए अक्के रोटी खातम। 18 इसाएलेरे लोकां केरे बारे मां सोचा, जैखन सारे लोक परमेशेरें लेइ चाढोरी रोटी खातन, तैना परमेशेरें आराधनारे हिस्सेदार भोतन, तेन्चरे जैना लोक मूरतन कां बलिदान कियोरी चीजन खातन तैना मूरती केरी पूजाई मां हिस्सेदार भोतन। 19 फिरी अवं कुन ज़ोताई? कि मूरतरी बलिदान किछे, या मूरती किछे? 20 नई, बल्के इन, कि तैना जैन बलिदान केरतन, तैना परमेशेरें लेइ नई, पन भूतां केरे लेइ केरतन, ते अवं न वैई कि तुस भूतन सेइं साथी शामिल भोथ। 21 तुस प्रभुएरे कटोरे, ते भूतां केरे कटोरे दुइयन मरां न पी बटथ। तुस प्रभुएरे मेजे ते भूतां केरे मेजे मां शामिल न भोइ बटथ। 22 कुन अस प्रभु सरकातम? कुन अस तैस करां जादे शक्ति बालेम? 23 तुस ज़ोतथ, अस किछ भी केरनेरे लेइ आजाद आम, हाँ, पन सब किछ इश्शे लेइ रोडू नई। अस किछ भी केरनेरे लेइ आजाद आम, पन सब किछ इश्शे विश्वासे जै परमेशेरें पुड़े मज़बूत न केरे। 24 कोई अपने भलेरे बारे मां न सोचे बल्के होरि केरे भलेरे लेइ सोचे। 25 जैन किछ किसैई केरे दुकान पुड़ बिकते, तैन खाथ, ते इन न पुच्छा कि मास कोठां आनोरू ते अपनो ज़मीरे शुद्ध रखा। 26 तुस तैन खाथ किजोकि पवित्रशास्त्र ज़ोते, “धरती ते सैरी चीज़ां प्रभुएरी आन।” 27 ते अगर गैर विश्वासी लोकन मरां तुसन कोई धाम ज़ोए, त तुस गानू चातथ, त जैन किछ तुश्शे सामने रखबू गाए तैन खाथ, ते किछ न पुछा, कि कोठां आनोरू। 28 पन अगर कोई तुसन सेइं ज़ोए, “इना त मूरतन कां बलिदान कियोरू,” त तुस तैस न खाथ, तुश्शे ज़मीरेरे वजाई सेइं नई बल्के जैन तुसन सेइं ज़ोवं तैसेरे ज़मीरेरे वजाई सेइं। 29 मेरो मतलब, तेरो ज़मीर नई, बल्के तैस होरेरो। भला, मेरी आज़ादी होरि मैनेरे ज़िरिये किजो परखी गाए? 30 अगर अवं शुक्र केरतां खाताई, त ज़ैस पुड़ अवं शुक्र केरताई, तैसेरे वजाई सेइं मेरी बदनामी किजो भोतीए? 31 आखरी मां अवं इन ज़ोताई, तुस चाए खाथ, चाए पीथ, या चाए जैन किछ केरा परमेशेरें महिमारे लेइ केरा। 32 अवं जैन किछ केरताई, हर केन्ची खुश केरनेरी कोशिश केरताई, अपने भलेरे बारे मां न सोची बल्के होरि केरे भलेरे

बारे मां सोचताई, ताके सेबहन मुक्ति मैल्ले। एन्चरे तुस भी जीथ ताके तुश्शे वजाई सेइं न यहूदन, न गैर यहूदन न परमेशेरें कलीसियाई परेशानी भोए।

11 जेन्चरे अवं मसीहेरी ज़ेरि चाल चलताई तुस भी मेरी ज़ेरि चाल चला। 2 हे ढ्वाव ते बेइनव, अवं तुश्शी तारीफ़ केरताई, किजोकि तुस मां हर वक्त याद केरते रातथ; ते जै शिक्षां मां तुसन दिती तैन केरे मुताबिक चलतथ। 3 ते अवं चाताई, कि तुस इन ज्ञानथ, हर एक्के मड़देरी क्रोड़ी मसीहे, ते कुआन्शरी क्रोड़ी मड़दे, ते मसीहेरी क्रोड़ी परमेशेरें। 4 जै मड़द क्रोड़ी ढेकतां प्रार्थना या भविष्यवाणी केरते, तै अपने क्रोड़ारी अनादर केरते, किजोकि तैन घमण्डेरे बराबरे। 5 पन जै कुआन्श बगैर दोग ढेकतां प्रार्थना या भविष्यवाणी केरतीए, तै अपने क्रोड़ारी अनादर केरती, किजोकि तैन टिनडी भोनेरे बराबरे। 6 अगर कुआन्श ओड़नी न ओड़े, त दोग भी कटे; अगर कुआन्शरे लेइ दोग कटानो शरमरी गल्ले, त ओड़नी ओड़े। 7 हाँ मड़दे अपनो दोग ढक्के जेइज नई, किजोकि तै परमेशेरू रूप ते शोभाए; पन कुआन्श मड़देरी शोभाए! 8 किजोकि मड़द कुआन्शी मरां नई, बल्के कुआन्श मड़दे मरां निसोरिए। 9 ते मड़द कुआन्शरे लेइ नई पन कुआन्श मड़देरे लेइ बनेवरीए। 10 एल्हेरेलेइ स्वर्गदूतां केरे वजाई सेइं कुआन्शरे लेइ इन ठीके कि अपने दोग ढक्के, ताके इस सेइं बांदू भोए कि तै मड़देरे अधीने। 11 फिरी भी प्रभु पुड़ विश्वास केरनेबालन मां कुआन्श मड़दे करां अलग नई, ते न मड़द कुआन्शरी करां अलगे। 12 किजोकि जेन्चरे पेइली कुआन्श मड़दे मरां, पन हुनी मड़दन कुआन्श जर्म देतीए। सब चीज़ां परमेशेरें करां आन। 13 तुस एप्पू फैसलो केरा, कुन कुआन्शी खुले आम आराधनाई मां बगैर दोग ढेकतां परमेशेरें कां प्रार्थना केरनि शोभतीए? 14 कुन तुस भी न ज्ञानथ, कि अगर मड़द लमो दोग रखे त तैसेरेलेइ शरमे। 15 पन अगर कुआन्श लमो दोग रखे; ते तैसेरेलेइ शोभाए किजोकि बाल तैसेरे ढक्केरे लेइ दित्तोरेन। 16 पन अगर कोई मां सेइं राज़ी न भोए, त इन समझे न इश्शी न इश्शे परमेशेरें कलीसियां केरि एरी रीतए। 17 इस बारे मां अवं तुसन इन ज़ोताई, अवं तुश्शी तारीफ़ न केरि, एल्हेरेलेइ कि तुश्शे अकोठे भोने सेइं भलाई नई, बल्के नुकसान भोते। 18 किजोकि पेइलू त अवं इन शुनताई, कि जैखन तुस कलीसिया मां आराधनारे लेइ अकोठे भोतथ, त तुसन मां अन-बन भोतीए ते अवं किछ हदी तगर याकीन केरताई। 19 पन, बिलकुल तुसन मां बटवारो भोरो लोड़े, ताके तुसन जैन कां परमेशेरें मन्जूरीए पिशाने गाथ। 20 ते जैखन तुस इश्शे प्रभु यीशुएरी मौती याद केरनेरे लेइ एक्की ठैरी अकोठे भोतथ, त तुश्शे बतवि सेइं इन न लग्गे कि प्रभु भोज खानेरे लेइ अकोठे भोरेथ। 21 किजोकि खानेरे वक्ते हर कोई अपनो इलाछड़ो होरन करां पेइलो खाते, ते किछ त नियन्त्रो रहतन, ते किछ मतवालो भोइ गाते। 22 कुन खाने पीनेरे लेइ तुसन घर नई या परमेशेरें कलीसियाई घटिया समझतथ, कि

जैन कां नई तैन छितातथ अवं तुसन कुन ज़ोई? कुन इस गल्ली काबलीत दित्तोरीए। 9 तैए आत्मा एक्की मैन्हु मसीह पुड़ मां तुशशी तारीफ़ केरि? अवं तारीफ़ न केरि। 23 जै शिक्षा मीं मज़बूती सेइं विश्वास केरनेरी काबलीत देते, ते तैए होरि मैन्हु, प्रभु करां पुज्जी तै शिक्षा मीं तुसन दित्ती, कि प्रभु यीशुए ज़ैस राती तै टुलुवाव जेव तैने रोटी नी। 24 ते शुक्र केरतां टुलोडी, ते ज़ोवं; “कि ई रोटी मेरे जानी हिराती, जै तुशशे मुक्तेरे लेइ बलिदान की गातीए, मेरी यादी मां इन्ने केरा।” 25 ते एन्चरे ज़ैखन तैनेई रोटी खाइ, यीशुए दाछारो कटोरो भी नेव, ते ज़ोवं; “ई कटोरो मेरे खूने मां नव्वो करारे, ज़ैखन भी पीथ, मेरे यादी मां इन्ने केरा।” 26 किजोकि ज़ैखन ई रोटी खाथ, ते इस कटोरे मरां पीथ, त प्रभुएरे मौती जांतरग तै न एज्जे, इस बारे मां ज़ोते राथ। 27 एल्हेरेलेइ ज़ै कोई प्रभुएरे रोटी नाजाइज तरीके सेइं खाए, या प्रभुएरे कटोरे मरां पीथे, तै प्रभुएरे जानरो ते खूनेरे खलाफ पापी भोलो। 28 एल्हेरेलेइ मैन्हु अपने बतवि परखे ते एन्चरे इस रोटी मरां खाए, ते इस कटोरे मरां पीये। 29 किजोकि ज़ै इस रोटी खाते ते कटोरे मरां पीते बार इन न पिशाने कि तैसेरो रिशतो प्रभुएरी जानी सेइं केरोए, तै इस खाने पीने सेइं एप्पू पुड़ आफत आनते। 30 एल्हेरेलेइ तुसन मरां बड़े कमज़ोर ते रोगी आन, ते बड़े मेरि भी जे। 31 एल्हेरेलेइ अगर अस पेड़ले अपनो आप परखम त परमेशर असन सज़ा न देलो। 32 पन प्रभु असन सज़ा देइतां शिखालते एल्हेरेलेइ कि अस दुनियाई सेइं साथी दोषी न भोम। 33 ते हे मेरे ढूलाव ते बेइनव, ज़ैखन तुस प्रभुएरी रोटी खानेरे लेइ अकोट्टे भोतथ, एक्की होरि बलगा। 34 अगर कोई नियन्नो भोए त अपने घरे मां खाए, ज़ैस सेइं तुस अकोट्टे भोथ, रोड़े चारे बर्ताव केरा, ज़ैस सेइं प्रभु तुसन सज़ा न दे, ते होरि गल्लां अवं एइतां ठीक केरेलो।

12 हे मेरे ढूलाव ते बेइनव, हुनी तुशशे तैस सवालारे बारे मां जै तुसेईं पवित्र आत्माए वरदानां केरे बारे मां पुच्छो, अवं चाताई तुस रोड़े चारे समझा। 2 तुस ज्ञानतथ, कि तुस विश्वास केरने करां पेड़ले तुसन ज़ेन्चरे जीते थिये तुसन पुड़ भूतां केरो अस्सर भोतो थियो, कि तुस मूरती केरि पूजा केरथ, ज़ैना जीती न भोन। 3 एल्हेरेलेइ अवं चाताई तुस ज्ञानतथ, कि ज़ै कोई परमेशरेरे आत्माए जुवाने सेइं ज़ोते, तै न ज़ोए, कि यीशु लानतीए, सिर्फ़ एककैलो पवित्र आत्मा आए, ज़ै इस काबल बनाते, कि कोई भी इन ज़ोई सकते कि “यीशु प्रभुए।” 4 वरदाना त बड़े किसमां केरन, पन इना सब परमेशरेरो आत्मा देते। 5 अस बड़े किसमां केरु कम परमेशरेरे लेइ केरतम, पन अस तैस्से एक्की प्रभुएरी सेवा केरतम। 6 परमेशर इशशे ज़िन्दगी मां अलग-अलग किसमे सेइं कम केरते, पन तैए परमेशर ज़ै असन सेबभन तैसेरेलेइ कम केरनेरी काबलीत देते। 7 असन सेबभन अक एरी काबलीत दित्तोरीए, ज़ैस सेइं पवित्र आत्माही हज़ूरी साबत भोती, ताके अस अपने सैथी विश्वासी लोकां केरि मदत केरम। 8 किजोकि परमेशरेरे आत्माए ज़िरिये एक्की मैन्हु समझदाराओ सन्देश शुनानेरी काबलीत दित्तोरीए, ते होरि मैन्हु तैस्से आत्माए ज़िरिये सेइं जानेरो सन्देश शुनानेरी

काबलीत दित्तोरीए। 9 तैए आत्मा एक्की मैन्हु मसीह पुड़ मज़बूती सेइं विश्वास केरनेरी काबलीत देते, ते तैए होरि मैन्हु, बिमार लोकन बझानेरी काबलीत देते। 10 आत्मा एक्की मैन्हु चमत्कारां कम्मां केरनेरी शक्ति देते, ते होरि परमेशरेरो सन्देश शुनानेरु वरदान, ते कोन्ची आत्मां केरि परख, ते कोन्ची मैन्हु बड़े किसमां केरि भाषां ज़ोनेरी काबलीत दित्ती, ज़ैना तैने नई पेढोरी, ते होरि मैन्हु तैन भाषां केरो मतलब समझानेरी काबलीत दित्ती, ज़ैना तैनेई नई पेढोरी। 11 सब वरदानां तैस्से एक्की पवित्र आत्मारु कम्मे। तैए ज़ेन्चरे चाते सेबभी विश्वासी लोकन वरदान देते। 12 किजोकि ज़ेन्चरे इशशे जिसम त अक्के ते तैसेरे अंग बड़न, ते तैस एक्की जिसमेरे अंग हछछे भोने सेइं भी सब मिलतां अक्के जिसमे, तेन्चरे मसीह भी आए, ते तैना भी ज़ैना तैस पुड़ विश्वास केरतन। 13 किजोकि असेईं सेबभेईं कुन यहूदी, कुन गैर कौमां, कुन गुलाम, कुन आज़ाद अक्के आत्माए ज़िरिये अक जिसम भोनेरे लेइ बपतिस्मो नेवरोए, ते असन सेबभन अक्के आत्मा मैल्ली। 14 इशशे जिसमे मां अक्के अंग नई, बल्के बड़न। 15 अगर पव ज़ोए अवं हथ नई, एल्हेरेलेइ अवं जिसमेरो अंग नई। त कुन तैसेरे ज़ोने सेइं ते जिसमेरो अंग न राए? 16 ते अगर कन्न ज़ोए; “अवं अछ नई, एल्हेरेलेइ अवं जिसमेरो अंग नई,” त कुन तैसेरु एरु ज़ोने सेइं ते जिसमेरो न राए? 17 अगर सारो जिसम अछछे भोथी त शुन्नू कोट्ठां भोथू? ते अगर सारो जिसम कन्न भोथो त शीघन्नू कोट्ठां भोथू? 18 पन सच्छे परमेशरे इशशे जिसमे मां अंग अपने मेर्जी सेइं अक-अक केरतां इशशे जिसमे मां अपने-अपने ठैरी रखोरेन। 19 अगर तैना सभे अक्के अंग भोथे, त फिरी जिसम न भोथो। 20 एल्हेरेलेइ, जिसमेरे बड़े अंग भोने सेइं अक जिसम बनते। 21 अछ हथ्ये सेइं न ज़ोई सके, “मीं तेरी ज़रूरत नई,” ते न क्रोडी पवन सेइं ज़ोई बटतीए, “मीं तेरी ज़रूरत नई।” 22 पन जिसमेरे अंग ज़ैना होरन करां कमज़ोर लेइहोतन, बड़े ज़रूरिन। 23 ते जिसमेरे ज़ैन अंगन अस आदरारे काबल न समझम तैन केरि अस जादे आदर देतम; ते इशशे अशोबते अंग होरे भी रोड़े भोतन। 24 फिरी इशशे शोबते अंगन एसेरी ज़रूरत नई, पन परमेशरे जिसम बनोवरोए, कि ज़ैस अंगे घटी थी तैस होरि भी जादे आदर भोए। 25 परमेशरे एन कियूं ताके जिसमेरे अंगन मां अन-बन न भोए, पन तैना एक्की होरेरी देख-भाल केरन। 26 एल्हेरेलेइ अगर जिसमेरे एक्की अंगे दुःख मैलते, त सारी जान ते सब अंग तैस सेइं साथी दुखी भोतन; ते अगर एक्की अंगेरी बड़याई भोतीए; त तैस साथी सब अंग आनन्द केरतन। 27 एन्चरे तुस सब मिलतां मसीहेरो जिसमथ, ते तैसेरे जिसमेरे अंगथ। 28 मसीहेरी जानी मां यानी कलीसियाई मां, परमेशरे असन अलग-अलग कम केरने जो दित्तोरुए, पेड़ले प्रेरित, दुइयोवं नबी, टुलुइयोवं शिक्षा देनेबाले, फिरी तैना, ज़ैन चमत्कार केरनेरो अधिकार दित्तोरोए। फिरी तैनी तैना ज़ैन बझानेरो अधिकार दित्तोरोए, ते तैना ज़ैन होरि केरि मदत केरनेरी काबलीत दित्तोरोए, ज़ैना

प्रधान, तैना जैन पवित्र आत्मा रे तरफां अलग-अलग किसमां केरि भाषां जोनेरी काबलीत मैली। 29 हर कोई प्रेरित नई। हर कोई नवी नई। हर कोई शिक्षा देनेबालो नई। हर कोई चमत्कार करनेबालो नई। 30 कुन सेबन बड़ानेरु वरदान मैलेरु। हर कोई अलग-अलग भाषां करनेबालो नई। हर कोई भाषां केरो मतलब समझानेबालो नई। 31 सेबन कां तरजमो केरनेरी काबलीत नई, रोडू त इन आए पवित्र आत्मां करां वरदानां हासिल केरनेरी बेड़ि इच्छाई मां राथ। पन सच्चे रोडू कुने, तैन अवं हुनी जोताई।

13 अगर अवं मैन्हु, ते स्वर्गदूतां केरि भाषां केरि, ते प्यार न रेख्खी, त अवं ठन-ठन केरनेबाली पितल, ते झन-झन केरनेबाली झाझाई। 2 ते अगर अवं भविष्यवाणी केरि सेखी, ते सब भेद जैनी ते, मीं इड़ी तगर पूरो विश्वास भोए, कि पहाड़न घासेई, पन प्यार न रेख्खी, त अवं किछ भी नई। 3 ते अगर अवं अपनि सारी जेइदाद कंगालन देई, या अपनो जिसम फुकनेरे लेइ देई, ते प्यार न रेख्खी, त इन मेरे कोन्ची कम्मेरु नई। 4 जैना लोक होरन सेइं प्यार केरतन तैना सबर ते दयाई सेइं कम केरतन, तैना जलन न केरन, तैना अपनि बडीयाई न केरन, ते न घमण्ड केरन। 5 तैना होरन बेइज्जत न केरन, तैना खुदगरज न भोन, जल्दी क्रोध न केरन ते जैना बुरी गल्लां तैन केरे खलाफ भोइ, तैन तैना याद न केरन। ते तैन केरे खलाफ जैना पाप केरतन तैना, तैन बड़े आसान तरीके सेइं माफ केरतन। 6 तैना खुश न भोन जैखन लोक बुरु केरतन, पन तैना तैखन खुश भोन जैखन लोक तैन केरतन जैन ठीक ते सच्छ। 7 तैना सब गल्लां झैल्लतन, प्यार विश्वास कधी न गुवाए, ते असन परमेशरे पुड़ भरोसो केरनेरे काबल बनाते, मुशकलन ते तकलीफन मां सबर रखते। 8 भविष्यवेनी ते गैर भाषां ते खास ज्ञान बेकार भोलू, पन प्यार हमेशारे लेइ रालो! 9 किजोकि इश्शू ज्ञान ते इश्शी भविष्यवाणी केरनेरी काबलीत अधीए, पन जैखन सिद्ध एज्जेलो, त जैन अधूरूए तैसेरी ज़रूरत नई। 11 इन मैनेरे बेडोनेरु ज़ेरु आए। जैखन अवं बच्चो थियो, त बच्चां केरो ज़ेरो जोतो ते सोचतो ते समझतो थियो। पन जैखन अस बड़ु भोतम, त बच्चां केरि गल्लां शारतम। 12 एन्चरे असन सेइं भी आए जैना अस विश्वास केरतम, किजोकि अस तैस मैनेरे ज़ेरे आम जै खराब शीशे मां शकल हेरते, (किजोकि अस सब किछ रोड़े चारे न ज्ञानम) सिर्फ एजनेबाले वक्ते मां, अस सब किछ समझामेले, एल्हेरेलेइ असेई परमेशर आमने सामने हेरनोए। हुना मेरु ज्ञान पूरु नई। पन तैस एजनेबाले वक्ते मां (जैखन ते दिहाड़ी एज्जेली) रोड़ेचारे जैनेलो, परमेशर भी मीं ज्ञानेलो। 13 लिहाजा, हुनी, ट्लाई किसमां केरि चीजन जैना असेई ज़रूरी केरनिन, परमेशरे पुड़ विश्वास, परमेशरे वदन पुड़ उमीद, ते परमेशरे ते होरन सेइं प्यार। पन इन ट्लाई गल्लन मां जै महाने, ते ई आए: परमेशरे ते होरन सेइं प्यार केरन।

14 एककी होरि सेइं प्यार केरनेरी कोशिश केरा। ते आत्मिक वरदानां केरि बड़ी इच्छा रखा, खास केरतां इन, कि

भविष्यवाणी केरा। 2 किजोकि, जै गैर भाषाई मां गल्लां केरते; ते मैन्हु सेइं नई, बल्के परमेशरे सेइं गल्लां केरते; एल्हेरेलेइ कि तैसेरी कोई न समझे; किजोकि ते भेदेरी गल्लां पवित्र आत्मा रे शक्ति सेइं जोते। 3 पन जै परमेशरे तरफां सन्देश शुनाते, ते विश्वासी लोकन, विश्वासे मां मजबूत भोनेरे लेइ मदत केरते, ते होरि विश्वासी लोकां केरि हिम्मत बढाते ते तस्सली देते। 4 जै गैर भाषाई मां जोते, ते अपने विश्वासे मजबूत केरते। पन जै भविष्यवाणी केरते, ते कलीसियारे विश्वासी लोकां केरे विश्वासे मजबूत केरते। 5 अवं चाताई, कि तुस गैर भाषाई मां गल्लां केरा, पन जादे इन चाताई कि भविष्यवाणी केरा: किजोकि अगर गैर भाषा जोनेबालो कलीसियारे विश्वासी लोकां केरे विश्वासे मां मजबूत भोनेरे लेइ तरजमो न केरे त भविष्यवाणी केरनेबालो तैस करां जादे खास कम केरि रावरोए। 6 एल्हेरेलेइ हे द्वाव ते बेइनव, अगर अवं तुसन कां एइतां गैर भाषाई मां गल्लां केरि त तुसन मीं करां कुन फैइदो भोलो। पन अगर अवं प्रकाश या खास ज्ञान, या परमेशरे सन्देश शुनेई या शिक्षा देई त इस सेइं तुश्शी मदत भोली। 7 एन्चरे, अगर तुस बाजो बजाथ जेन्चरे बेइशोई या सारंगी, अगर तैन रोड़े चारे न बजाव गाए त जैन बजाव लावरु गाने त तैन केन्चरे पिशानेले बेइशोई या सारंगी मां कुन लावरु बजने। 8 जंगी मां अगर नइशिन्नेरी आवाज साफ न भोए, त फौजी जंगरे लेइ तियार न भोइ सकन। 9 एन्चरे, जैखन तुस तैना गल्लां केरथ जैना होरि लोकन समझ न एजन, त जैन किछ ज़ोवं गाते तैसेरी कोई कीमत नई। 10 दुनियाई मां बेड़ि भाषा आन, त हर भाषारो मतलबे। 11 पन अगर अस तैस भाषाई न समझम जै होरे जोने लोरेन, त एन एरु भोलू, कि जेन्चरे तैना इश्शे लेइ परदेशी भोले ते अस तैन केरे लेइ परदेशी भोले। 12 एन्चरे तुस भी जैखन पवित्र आत्मा रे वरदानां केरे लेइ बड़ी इच्छा रखतथ, त तैन वरदानां केरि इच्छा रखा जैन सेइं कलीसियारे विश्वासी लोक विश्वासे मां मजबूत भोन। 13 एल्हेरेलेइ जै गैर भाषा केरते, ते प्रार्थना केरे, कि जैन किछ तैने ज़ोवं, तैसेरो मतलब समझेनेरे काबल भी भोइ सके। 14 किजोकि अगर अवं गैर भाषाई मां प्रार्थना केरने लोरोई, त मेरी आत्मा प्रार्थना केरतीए, पन मेरी सोचरे लेइ फैइदो नई, किजोकि इन मीं समझ न एज्जे। 15 त फिरी मीं कुन कियोरु लोड़े? एरो भी वक्त भोते जैखन मीं अपने आत्माई सेइं प्रार्थना कियोरी लोड़े, एरो वक्त भी भोते जैखन मीं अपने अक्ली सेइं भी प्रार्थना कियोरी लोड़े। किछ वक्ते मीं अपने आत्माई सेइं गीतां ज़ोवरां लोड़े, ते होरि वक्ते मीं अक्ली सेइं भी गीत ज़ोवरां लोड़न। 16 मन्ना कि जैखन किछ आम मैन्हु तुश्शे आराधनाई मां एजन, जैखन तुस अपने आत्माई सेइं परमेशरे बडयाई केरथ। अगर तैना तुश्शी न समझे, त तुश्शे परमेशरेरु शुक्र केरनेरे बाद तैना केन्चरे बुझले कि किताली, “आमीन” ज़ोनू, किजोकि तैना न समझे तुस कुन लोरेथ जोने। 17 तुश्शू परमेशरेरु शुक्र केरनू रोडूए, पन इन होरि केरे विश्वासे मजबूत केरनेरे लेइ मदत न

केरलू। 18 अवं अपने परमेशरेरु शुक्र केरताई, कि अवं तुसन आए। 19 पन कलीसियाई मां गैर भाषा करेने मां दश हजार गल्लां केरे जोनेरे केरतां इन मीं होरु भी रोडू लगते, कि होरन शिखालनेरे लेइ अक्ली सेइं पंचे गल्लां जोई। 20 हे द्वालाव ते बेइनव, तुस इना गल्लां समझने मां बच्चे न बना, पन बुरैई केरनेरे लेइ बच्चां केरे बना, पन इस किसमेरी गल्लां समझनेरे लेइ समझदार बना। 21 कानूने मां प्रभु जोते; “अवं बखलां केरे जिरिये जोइलो, जैना गैर भाषां केरेले, पन फिरी भी तैना मेरी न शुनेले।” 22 एल्हेरेलेइ असन मरां किछ गैर भाषा केरन जै पवित्र आत्मा रे तरफां आए, इश्शे शब्द तैन लोकां केरे लेइ प्रभुपरे शक्तिरो निशाने, जैना प्रभु पुड़ विश्वास न केरन। 23 ते अगर कलीसिया एक्की ठेरी अकोटी भोए, ते सब गैर भाषा केरन, त आम लोक जैना ई भाषा न समझन या गैर विश्वासी लोक अन्तर एजन त कुन तैना इन न सोचेले कि तुस पागल आथ। 24 ते अगर सब भविष्यवाणी केरन, ते आम लोक या गैर विश्वासी लोक अन्तर एजन, त तैन एसास भोलो कि तैना पापिन, ते जैन तैनेई ज़ोवं तैसेरे वजाई सेइं अपनि बत बदलेले। 25 ते परमेशरेरे सन्देशे सेइं तैन एसास भोलो कि तैनेई बुरु कियोरु तैन केरे मनेरे भेद बांदो भोइ गाले, ते तैन एसास भोलो कि तैना पापी आन त कने पापन करां मन फिराले। ते तैना मथ्यो टेकतां परमेशरेरी आराधना केरेले, ते मनेले कि परमेशर तुसन मां आए। 26 हे द्वालाव ते बेइनव कुन कियोरु लोडूए? ज़ैखन तुस आराधना केरने लेइ अकोटे भोतथ, त किछ भजन ज़ोन, किछ उपदेश देन, ते किछ ज़ैन प्रकाशन परमेशरेरे तरफां आए तैस देन, ते किछ गैर भाषाई मां गल्लां केरन ते किछ तैसेरो तरजमो केरन, तुस इन सब एल्हेरेलेइ केरा कि कलीसियारे लोकन विश्वासे मां मज़बूत भोनेरे लेइ मद्दत भोए। 27 अगर कोई गैर भाषाई मां ज़ोने लोरोए, त दूई या ट्लाई ज़ने बैरी-बैरी सेइं ज़ोन, ते इन ज़रूरी कि अक मैनुहु तैस भाषारो मतलब ज़ोए। 28 पन अगर तरजमो केरनेबालो न भोए, ते गैर भाषा ज़ोने बालो कलीसियाई मां चुप राए, ते चुपचारे अपने मने सेइं परमेशरे सेइं गल्लां केरे। 29 नेबन मरां दूई या ट्लाई ज़ोन, इन ज़रूरी आए कि हर कोई शुने, ते सोचन ते परखन कि ज़ैन किछ ज़ोवं लोरु गाने सही आए या नई। 30 पन अगर कोई ज़ै तैडी सभाई मां बिशोरोए, तैस परमेशरेरे तरफां सन्देश मैल्ले, त ज़ै ज़ोने लोरोए तै चुप भोए, ते तैस ज़ोने दे। 31 किजोकि तुस सब अक-अक भविष्यवाणी केरि बटतथ, पन अक-अक भोइतां ताके सब शिखन, ते हिम्मत बद्धे। 32 ज़ै नबी परमेशरेरो सन्देश शुनाते, तै अपने आपे वशे मां रखते। तै इस काबले कि अपने मेज़ी सेइं जोई बटते ते चुप रेइ बटते। 33 किजोकि परमेशर गड़बड़ केरनेबालो नई, पन शान्ति देनेबालोए; ई तै कानूने ज़ैस परमेशरेरे सैरी कलीसियारे लोक मन्तन। 34 कुआन्शां कलीसियारे सभाई मां चुप रान, किजोकि तैन गल्लां केरनेरो हुक्म नई, ज़ेन्वरे कानूने मां लिखोरु भी

आए। 35 ते अगर तैना किछ सवाल पुच्छने चान, त सभाई मां न पुच्छन पन घरे अपने-अपने मुशान पुच्छन, किजोकि कलीसिया मां कुआन्शां केरि जादे गल्लां केरनि ठीक नई। 36 एरु किजो आए तुसन मरां किछ लोक पेइले ज़ोरे नियमन किजो न मन्नु चान? कुन तुस सोचतथ कि तुस पेइले लोक आथ ज़ैनेई परमेशरेरु वचन दित्तू? या सिर्फ तुसन दित्तू? 37 अगर कोई मैनुहु अपनो आप नबी समझे, या इन समझे कि मीं पवित्र आत्मा रे तरफां वरदान मैलोरुए, त इन समझे, कि जैना गल्लां अवं तुसन लिखताई, तैना प्रभुपरे हुक्मन। 38 पन अगर कोई इन गल्लन न मन्ने, ते तैन पुड़ विश्वास न केर। 39 एल्हेरेलेइ हे द्वालाव ते बेइनव, भविष्यवाणी केरनेरी बड़ी इच्छा रखा, ते गैर भाषाई केरनेरे लेइ न ठाका। 40 पन तैन सब किछ ज़ैन तुस कलीसियाई मां केरतथ तरीके सेइं कियूं गाए।

15 हे द्वालाव ते बेइनव, अवं तुसन तैए खुशखबरी याद कराताई ज़ै मीं तुसन शुनावरी थी, ते ज़ैस सन्देशे पुड़ तुसेई विश्वास कियोरो थियो, ते ज़ैस पुड़ तुस तुसेई लगातार भरोसो रख्खोरोए। 2 अगर तुस तैस खुशखबरी पुड़ लगातार विश्वास केरते राले, ज़ै मीं प्रचार की, त परमेशर तुसन बज़ालो। नई त तुश्शो विश्वास केरनो बेफ़ैदो भोव। 3 एल्हेरेलेइ मीं तुसन खास सन्देश दित्तो, ज़ै मीं प्रभु यीशु मसीह करां मैल्लो। तै सन्देश ई आए, कि पवित्रशास्त्रेरे मुताबिक यीशु मसीह इश्शे पापां केरे लेइ मरो 4 ते दबो जेव, ते पवित्रशास्त्रेरे मुताबिक टलेइयोवं दिहाइ मुड़दन मरां ज़ीतो भोव। 5 ते कैफा (यानी पतरस) ते 12 चेलन लेइहोव। 6 फिरी 500 करां जादे चेलन एक्की साथी लेइहोव, ज़ैन मरां हेजू बड़े ज़ीतन ते किछ मेरि ज़ोरेन। 7 फिरी याकूबे लेइहोव फिरी सेब्भी प्रेरितन लेइहोव। 8 ते आखरी मां तैनी अपनो आप मीं पुड़ भी पुड़ बांदो कियो, अवं ज़ै तैस बच्चेरे ज़ेरो आई ज़ै ठीक वक्ते पुड़ नई ज़मोरु। 9 किजोकि अवं प्रेरितन मरां सेब्भना निकोडोई, बल्के प्रेरित जूवानेरे काबल भी नई, किजोकि अवं परमेशरेरे कलीसियारे विश्वासी लोकन सतातो थियो। 10 पन परमेशरेरे अनुग्रहे सेइं अवं प्रेरित आई। ते तैसेरो अनुग्रहोरे अस्सर ई भोव कि, मीं तैन होरि प्रेरितन करां बेद्धतां मेहनत भी की, ते ई मेहनत मीं अपने तरफां न की, बल्के परमेशरे मेरी मद्दत की, कि अवं इन केरि। 11 ते चाए अवं भोइ, चाए होरे प्रेरित भोन, अस तैस मसीहेरे बारे मां सन्देश प्रचार केरतम, ते इस्से पुड़ तुसेई भी विश्वास कियो। 12 एल्हेरेलेइ हुनी अवं पुछताई, ज़ैखन मसीहेरो ई प्रचार कियो गाते, कि तै मुड़दन मरां ज़ीतो भोव, ते तुसन मरां किछ किजो ज़ीतन, कि मुड़दां केरु ज़ीतू भोनू अथ्थी नई? 13 अगर मुड़दां केरु ज़ीतू भोनू अथ्थी नई, ते फिरी मसीह भी नई ज़ीतो भोरो। 14 ते अगर मसीह भी मुड़दन मरां ज़ीतो नई भोरो, त फिरी इश्शो सन्देश प्रचार केरनो भी बे फ़ैदोए; ते तुश्शो मसीह पुड़ विश्वास केरनो भी बे फ़ैदोए। 15 अगर मुड़दे ज़ीते न भोन, त असेई इन ज़ोइतां परमेशरेरे बारे मां झूठ ज़ोवं, कि परमेशरे

मसीह जीतो कियो जैन तैनी हकीकति मां नई कियोरु। 16 अव दुबारां जीते न किये गान, त इन रोडूए जैन लोक जोने लोरेन, दुबारां फिरी जोताई, अगर कोई मुड़न मरां जीतो न भोए, ते “एज्जा, खाम पीम, किजोकि असेई कालां मरनु आए ते इन सब फिरी मसीह भी मुड़न मरां जीतो नई भोरो। 17 ते अगर मसीह खतम भोनु।” 33 जैना एरी गल्लां जोतन तैन केरे वजाई सेइं मुड़न मरां जीतो नई भोरो, त तुशो मसीह पुड़ विश्वास भी बे बेवकूफ न बना, “बुरी संगती रोड़े चाल-चलने बगाडतीए।” 34 फैडोए, ते तुस हेजू तगर अपने पापन मां जीने लोरेथ। 18 तुस अपने सोचरे रोड़ी बत्तां वापस एज्जा ते पाप केरनो शारा। बल्के जैना मसीह पुड़ विश्वास केरनेबाले मरैन, तैना भी नाश किजोकि तुसन मां किछ एरे आन जैन केरो रिश्तो परमेशरे सेइं भोए। 19 अगर अस सिर्फ इस ज़िन्दगी मां मसीह करां उमीद साथी नई। अव तुसन छिथानेरे लेइ इन जोताई। 35 पन किछ रखतम ते फिरी अस सेबभी मैनु करां नुभागम। 20 पन सत्र त पुछतन, “कि मुड़दे केन्चरे जीते भोतन, ते केरहे जिसमे मां इन आए कि परमेशरे मसीह मुड़न मरां इन साबत केरनेरे लेइ एइतन?” 36 हे बे समझाव, बीजे पुड़ ध्यान देथ, जैखन बीज जीतो कियोरो, ते जैना मरैन, तैन मां पेड़लो फल भोए। 21 तू बेतस, चाए इन गेहुं भोन या होरु किछ। इन जै भोनेबालो सब मैन्हु मरे, एन्चरे जैना विश्वासी लोक एजनेबाले वक्ते मां पोदोए एन तैसेरु जेरु नई। 38 तैस बेनेरे पत्ती परमेशर तैस एपनी मेरजरे मुताबिक बडाते ज़ांतगर गेहुं केरि या होरि आन्नेरे सेइं आए, ते तै मैन्हु मसीह आए। 22 एल्हेरेलेइ एक्की मैनेरे डाल बांदे न भोन। 39 इस दुनियाई मां हर जीती चीजां अलग-पापेरे यानी आदमेरे वजाई सेइं सब मैन्हु मरतन, तेन्चरे एक्की मैनेरे केरनेरे सेइं यानी यीशु मसीहे वजाई सेइं सारे फिरी मुड़दे जीते किये गाले। 23 पन हर कोई ठीक तरीके सेइं ज़िन्दगरे लेइ वापस एज्जेलो, पन मसीह मुड़न मरां जीतो भोनेबालो पेड़लोए, फिरी जैन लोकां केरो रिश्तो तैस सेइं साथी आए, तैना भी जीते भोले। 24 एसेरां पत्ती, मसीह सैरी दुष्ट शक्ति नाश ते धेरतरे चीजां केरि शोभा होरि जेरि आए। 41 ते दिहाड़ेरी केरेलो जैना परमेशरेरी खलाफत केरतिन। ते दुनियारो खातमां शोभा होरीए, चंदनरी शोभा होरीए, ते तारां केरि शोभा होरीए, भोलो। तैखन मसीह, अपने बाजी परमेशर अपनू राज़, राज़ केरनेरे लेइ पूरे तरीके सेइं देलो। 25 मसीहे तेइस तगर राजेरु भी एरु आए। जै जिसम नाश भोनेरे हालती मां दबो गाते, पन जेरु राज़ केरनु ज़रूरीए, ज़ांतगर परमेशर तैसेरे सारे दुश्मन जैखन जीतो कियो गालो त कधी नाश न भोलो। 43 जैखन अस तैसेरे अधीन न केरे। 26 सेबभना आखरी जै दुश्मन खतम कियो गालो तै मौते। 27 जैखन पवित्रशास्त्र जोते परमेशरे सब किछ तैसेरे अधीन मां केरेलो त इस मां परमेशर नई, किजोकि सब किछ मसीहेरे अधीन केरनेबालो परमेशरे। 28 ते सब किछ परमेशरेरे मड़ेरे अधिकारे मां केरनेरे बाद, तैखन तै अपनो आप रोड़े चारे परमेशरेरे अधिकारे मां केरेलो, जैने तैस अधिकार दितो। सिर्फ परमेशर अकैल्लो प्रभुए तैए हर एक्की मां, ते हर गल्ली मां कम केरते। 29 हुनी तुस इस बारे मां सोचा, तुसन मां किछ एरे आन जैना मरै लोकां केरे लेइ बपतिस्मो नेतन, ते कोई तैन बपतिस्मो देते, अगर जेन्चरे किछ लोक जोतन, विश्वासी लोक मुड़न मरां जीते नई भोने, त फिरी एन केरनेरी कोई कीमत नई ते फिरी एन केरनेरी वजा नई। 30 ते इश्शे लेइ, अगर मुड़दे जीते किये गान त अपनो आप खतरे मां रखनो बेवकूफी आए। 31 हे ढूलाव ते बेइनव, इन पक्कू आए कि तुशे बारे मां घमण्ड केरताई, किजोकि तुस इश्शे प्रभु यीशु मसीह मां आथ, इन भी पक्कू आए कि अवं रोज़ मौतरे खतरे मां राताई। 32 मीं इफिसुस नगरे मां बेडि तैन केरे वजाई सेइं मुशकलां झैल्ली जैना मेरी खलाफत केरते थिये, तैना जंगली जानवरां केरे जेरे थिये। लोकां केरे खियाले सेइं मीं तैन मुशकलन सेइं कुन हासिल कियूं? किछ भी नई। एल्हेरेलेइ इन साफे कि मुड़दे किजोकि तैड़ी कोई मौत नई। 51 शुना, अवं तुसन सेइं भेदेरी

गल जोताई, अस सब नई मरने, पन जैखन आखरी नड़शिगेरी
आवाज़ भोली, त अस सब एक्की पले मां बेदलोनेम, 52 ते इन
एक्की पले मां, जेन्चरे कोई चिप केरते, जैखन आखरी नड़शिगे
बजाव गालो त जैना मरे थिये तैना जीति भोनेन ताके हमेशारे
लेइ जीति रान, ते अस जैना जीतिम, इश्शे जिसम बेदलोनेन। 53
किजोकि इश्शो जिसम ऐसीनी सेइ मरते ते शड़ते, ते ई तैस
जिसमे मां बेदलोई गालो जै कथे न मरे ते न शड़े। 54 जैखन इन
भोलू, तैखन पवित्रशास्त्रे मां लिखोरू परमेशेरू तैन वचन पूरू
भोलू, जैन जोते, “भौत रोड़े चारे हाराई गाली ते तैसेरू कोई
वजूद न रालू।” 55 एन्चरे जैन पवित्रशास्त्रे मां लिखोरू तैन पूरू
भोलू, “हे भौत तेरी जीति कोडि राई? हे भौत तेरो डस कोडि
राव?” (Hades 986) 56 भौती तकलीफ देनेरी शक्ति पापे करां
मैलतीए, ते पापे कानूने करां शक्ति मैलतीए। 57 पन परमेशेरू
शुक्र भोए, जै इश्शे प्रभु यीशु मसीहरे जिरिये पापे ते भौत पुड़
जीत देते। 58 हे मेरे दलारे दूलाव ते बेइनव, विश्वासे मां मजबूत
राथ ते गलत शिक्षाई सेइ न टेपलोथ, ते हमेशा प्रभुएरू कम
जोशे सेइ केरा, किजोकि तुस इन ज्ञानत्तथ, कि जैन किछ तुसेई
प्रभुएरे लेइ कियूं तैन बेफेइदू नई।

16 हुनी तुश्शे तैस चन्दरे सवालारे बारे मां जै यरूशलेम नगरे
परमेशेरू लोकां केरे लेइ कियो गाते, तुसेई भी तेन्चरे
कियोरू लोड़े जेन्चरे मीं गलातियारे कलीसियान हुकम दित्तो।
2 हफतेरे पेइले दिहाड़े तुसन मरां हर कोई अपने आमदनेरे
मुताबिक किछ एप्पू कां रखा, कि मेरे एजने पुड़ चन्दो अकोट्टो
न केरनो पे। 3 जैखन अवं तैडी भोई, अवं किछ लोकन भेजेलो
जैन तुस चुनेले कि एना भरोसेरे काबलन, चन्दो धिन्तां यरूशलेम
नगरे जो गान। अवं तैन कां चिट्ठी भी भेजेलो ताके विश्वासी
लोक तैन केरे बारे मां ज्ञानन्। 4 ते अगर मेरू भी गानू ज़रूरीए,
त तैना मीं सेइ साथी गाले। 5 ते मकिदुनिया गानेरे बाद अवं
तुसन कां एज्जी रावरोई, किजोकि मीं मकिदुनिया मेइ गानेरो
बिस्तार बनोरोए। 6 भोड़ सकते, अवं तुसन सेइ साथी किछ
चिरे रुकेलो, शैइद पूरे हिवतड़ो, फिरी तुस जेरां मीं गानू भोलू,
तेरहां मीं भेज्जां। 7 अगर ई परमेशेरू मज्जीं भोली, ते मीं उमीदे
अवं बादे मां जादे चिरेरे लेइ तुसन कां एज्जेलो, न कि इस वक्ते
थोड़े चिरेरे लेइ। 8 पन अवं पेन्तिकुस्त तिहारे तगर इफिसुस
नगरे मां रानोई। 9 किजोकि मीं बड़ो रोड़ो मौको मैलारे जैस सेइ
अवं तैन कम केरि सकताई जेसेरो अस्सर बड़ोए, चाए बड़े लोक
मेरी खलाफत केरनेबाले आन। 10 अगर तीमुथियुस एज्जे,
त तैस कबूल केरा, तैसेरी रोड़े चारे आदर केरा, किजोकि तै
मेरो जेरो प्रभुएरू कम केरते। 11 एल्हेरेलेइ कोई तैस घटिया
न समझे, पन तैन केरे सफरेरे लेइ जै ज़रूरते तैन खुशी सेइ
देथ। ताके मीं कां एज्जन, किजोकि अवं तैस लोरोई बलगने,
कि तै विश्वासी दूलान सेइ साथी एज्जे। 12 ते विश्वासी साथी
अपुल्लोसे सेइ मीं बड़ी बिनती की, कि तुसन कां होरि विश्वासी
मैनन् सेइ साथी गाए जैना तुसन सेइ मिलने ओरेन। पन तैनी

इस वक्ते गानू न चाव, पन जैखन ठीक वक्त भोलो, तैखन
एज्जेलो। 13 खबरदार राथ, विश्वासे मां मजबूत भोथ, हिम्मत
रखा, मजबूत भोथ। 14 जैन किछ केरतथ तैन प्यारे सेइ केरा।
15 हे दूलाव ते बेइनव, तुस स्तिफनासेरे टब्बरे ज्ञानतथ, कि
तैना अखाया इलाकेरे, पेइले मसीह पुड़ विश्वासे केरनेबालेन, ते
परमेशेरू लोकां केरि मदत केरनेरे लेइ जैन किछ केरि बटते
थिये तैनेई तैन कियूं। 16 अवं तुसन कां बिनती केरताई कि एरे
लोकां केरे अधीन राथ, बल्के तैन केरे भी जैना इस कम्मे मां
मेहनत केरतन ते मदत केरनेबालन। 17 ते अस स्तिफनास
ते फूरतूनातुस ते अखइकुसेरे एजने सेइ खुश आई, किजोकि
जेइस तुस इड़ी न थिये, तैनेई मेरी ज़रूरतां पूरी केरनेरे लेइ मेरी
मदत की। 18 जेन्चरे तुसेई अवं खुश कियो, तेन्चरे तैनेई भी अवं
खुश कियो, एल्हेरेलेइ एरे लोकां केरि तारीफ़ केरा। 19 आसिया
इलाकेरे कलीसियां केरे सारे विश्वासी लोकां केरे तरफां तुसन
नमस्कार; अक्विला ते तैसेरी कुआन्श प्रिस्कारे तरफां ते तैन
केरे घरे कलीसियाई भी तुसन प्रभु मां हलु-हलु नमस्कार। 20
इट्टेरे विश्वासी लोक तुसन नमस्कार ज़ोतन, मसीहरे प्यारे सेइ
एक्की होरि जो नमस्कार केरा। 21 अवं पौलुस अपने हथ्ये सेइ
नमस्कार लिखताई। 22 अगर कोई प्रभु सेइ प्यार न रखे तै
लानती भोए, हे इश्शे प्रभु एई! 23 प्रभु यीशुएरो अनुग्रह तुसन
पुड़ भोतो राए। 24 अवं तुसन सेबन्धन सेइ प्यार केरताई जैन
केरो रिश्तो यीशु मसीह सेइ साथीए। आमीन।

2 कुरिन्थियों

1 अवं पौलुस परमेशररे मेर्जी सेइं यीशु मसीहेरो प्रेरिताई, मेरे त कने द्वाला तीमुथियुसेरे तरफां ई चिट्ठी परमेशररी तैस कलीसियारे नंवे, जे कुरिन्थुस मांए, ते सारे अखाया इलाकेरे सब पवित्र लोकां केरे नंवे, 2 इश्शे बाजी परमेशर ते प्रभु यीशु मसीहेरे तरफां तुसन अनुग्रह ते शान्ति मैलती राए। 3 इश्शे जिरिये मतलब मेरे ते सिलवानुस ते तीमुथियुसेरे जिरिये दया केरनेबालो बाजीए, ते जै असन हमेशा तसल्ली देनेबालो परमेशरे। 4 ते इश्शे सेब्बी मुसीबतन मां असन तसल्ली देते; ताके अस तैस तसेल्लरे वजाई सेइं जै परमेशर असन देते, तैन भी तसल्ली देइ बटम, जैना कोन्ची वजाई सेइं मुसीबतन मां आन। 5 किजोकि जेन्चरे मसीहे दुःख झैल्लोरेन तेन्चरे अस भी दुःख झैल्लतम, एल्हेरेलेइ असन तसल्ली भी मसीहेरे जिरिये जादे भोतीए। 6 अगर अस दुःख झैल्लतम, ते ई तुश्शे तसल्लरे ते तुश्शे मुक्करे लेइए ते अगर असन तसल्ली मैलतीए, ते ई तुश्शे तसल्लरे लेइ आए; जेसेरे अस्सरे सेइं तुस सबरी सेइं तैना दुखन झल्लतथ, जैना अस भी झल्लतम। 7 ते इश्शी उमीद तुश्शे बारे मां पक्कीए; किजोकि अस ज्ञानतम, कि जेरे दुःखन तुसेईं असन सेइं साथी झैल्ले, तेरी तसल्ली तुसन भी असन सेइं साथी मैलेली, जै असन परमेशर देलो। 8 हे द्वाला ते बेइनव, अस न चाम कि तुस इश्शे तैस दुखे करां अनजान राथ, जै आसिया इलाके मां असन पुइ अव, कि एरो भारी बोझ असन पुइ ओरोए थियो, जै इश्शे लेइ छूनों मुशकिल थियो, इडी तगर कि असन अग्रोवं जो ज़िनीरी कोई उमीद न थी। 9 बल्के असेईं अपने मने मां समझोरू थियूं, कि अस मारे गानेम ते अस अपनो भरोसो न रखम, बल्के परमेशरे पुइ भरोसो रखम जै मुइदन ज़िंते केरते। 10 तैने अस एत्रे बडे मौतरे खतरे करां बचाए, ते बचालो; ते तैस करां इश्शी ई उमीदे, कि ते अग्रोवं भी बचातो रालो। 11 तुस भी मिलतां प्रार्थनाई सेइं इश्शी मदत केरेले, कि जैना बरकतां असन बड़ां लोकां केरे जिरिये मैली, किजोकि परमेशरे अनुग्रहे सेइं इश्शी हाफ़जतरे लेइ बेडि प्रार्थनां शुन्नी, तैल्हेरेलेइ बडे लोक इश्शु भोत परमेशररू शुक्र केरन। 12 किजोकि अस अपने इस ज़मीररे गुवैही पुइ घमण्ड करतम, कि दुनियाई मां, खास केरतां तुसन मां इश्शो चालचलन परमेशरे लायिक ते पवित्रतैई ते सव्रैई सेइं थियो। जै दुनियारे ज्ञाने सेइं नई, बल्के परमेशररे अनुग्रह सेइं साथी थियो। 13 अस हमेशा तुसन इन लिखतम ताके तुस पढथ ते समझत, ते मीं उमीदे, कि आखरी तगर समझते भी राले। 14 जेन्चरे तुसन मरां केत्रेई मन्नोरू भी आए, कि अस तुश्शे धुमण्डरी वजाम; तेन्चरे तुस भी प्रभु यीशुपरे वापस एजनेरे दिहाडे इश्शे लेइ घमण्डरी वजा भोले। 15 ते इस भरोसे सेइं, अवं चातो थियो कि पेइलो तुसन कां एज्जी; कि तुसन दुगनी बरकत मैल्ले। 16 ते तुसन मेइं निस्तां मकिदुनिया इलाके जो गेईं ते फिरी मकिदुनयारां तुसन

कां एज्जी, ते तुस मेरी सफ़रेरी ज़रूरतेर मुताबिक मदत केरतां यहूदिया इलाकेरे पासे किछ दूर पुजाथ। 17 एल्हेरेलेइ मीं ज़ेने ई इच्छा कियोरी थी कुन मीं चंचलता हिराई? या ज़ैन केरनू चाताई कुन दुनियारे लोकां केरे ज़ेरू केरनू चाताई, कि अवं गल्ली मां तेन्चरे कि इश्शे तैस वचने मां जै तुसन सेइं ज़ोवं, “हाँ” ते “नई” दुइये न मैल्ले। 19 किजोकि परमेशररू मदद यीशु मसीह जेसेरो तुसन मां प्रचार भोव; तैस मां “हाँ” ते “नई” दुइये न थी; पन तैस मां “हाँ” ए “हाँ” भोइ। 20 किजोकि परमेशररे जेत्रे वादेन, मसीह मां हांए सेइं आन, एल्हेरेलेइ मसीहेरे जिरिये आमीन भी भोइ, कि इश्शे जिरिये परमेशररी महिमा भोए। 21 ते जै असन तुसन सेइं साथी मसीह मां मज़बूत केरते, ते ज़ेने इश्शू अभिषेक कियोरूए, तैए परमेशरे। 22 ज़ेने असन पुइ छाप भी की, ते जेन्चरे कोन्ची चीज़रे लेइ साईं देतन तेन्चरे तैनी पेइली आत्मा इश्शे मने मां दिती। 23 परमेशर मेरे इस सत्तेइयरो गवाहे कि अवं कुरिन्थुस नगरे मां दुबारां एल्हेरेलेइ नई ओरोए कि अवं तुसन दुःख देनो चातो थियो। 24 इन नई, कि अस विश्वासेरे बारे मां तुसन पुइ राज़ केरनू चातम; पन तुश्शे आनन्दे मां तुश्शी मदत केरनेबाले आम, किजोकि तुस विश्वासे सेइं मज़बूत रातथ।

2 मीं अपने मने मां इन थापेरू थियूं, कि फिरी तुसन कां एइतां तुसन दुख न देई। 2 किजोकि अगर अवं तुसन दुखी केरि, त मीं आनन्द देनेबालो कौन भोली, सिर्फ तैए जै मीं दुखी कियोरोए? 3 ते मीं ई गल तुसन एल्हेरेलेइ लिखी, कि एरू न भोए, कि मेरे एजने पुइ ज़ैन सेइं आनन्द मैल्लेरो लोइतो थियो, अवं तैन करां दुखी भोई; किजोकि मीं तुसन सेब्भन पुइ इस गल्लरो भरोसोए, कि जै मेरो आनन्दे, तैए तुश्शो सैरी केरो भी आए। 4 मीं बडे दुःख, ते मनेरे कठे सेइं, बडे ऐंखन सेइं तुसन चिट्ठी लिखोरी थी, एल्हेरेलेइ नई, कि तुस दुखी भोथ, पन एल्हेरेलेइ कि तुस तैस बडे प्यारे ज्ञानथ, जै मीं तुसन सेइं आए। 5 ते अगर केन्चे दुखी कियोरोई, त अवं नई बल्के (तैस सेइं बडी सखती न केरि) किछ-किछ तुस सब दुखी कियोरेथ। 6 एरे मैनेरे लेइ ई सज़ा जै विश्वासी द्वाला मरां बडेई दिती, सुद्धी आए। 7 एल्हेरेलेइ इस करां इन रोडूए कि तैसेरो पाप माफ़ केरा; ते तैस तसल्ली देथ, एरू न भोए कि एरो मैन्हु उदैसी मां डुबे। 8 एल्हेरेलेइ अवं तुसन कां बिनती केरताई, कि तैस अपने प्यारेरू सबूत देथ। 9 किजोकि मीं एल्हेरेलेइ भी लिखोरू थियूं, कि तुसन पेरखी, कि तुस मेरे सब गल्लां मन्नेरे लेइ तियार आथ या नई। 10 ज़ैस तुस माफ़ केरतथ तैस अवं भी माफ़ केरताई, किजोकि मीं भी ज़ैन किछ माफ़ कियोरूए, अगर कियेरू भोए, त तुश्शे वजाई सेइं मसीहेरे ठैरी भोइतां कियोरूए। 11 कि शैतानेरो असन पुइ दावो न चले, किजोकि अस तैसेरी चालन करां अनजान नई। 12 ते ज़ैखन अवं मसीहेरी खुशखबरी शुनाने त्रोआस नगरे मां अव, ते प्रभुए मेरे लेइ अक बत खोल्ली। 13 त

मेरे मने मां चैन न भोइ, एल्हेरेलेइ कि मेरे विश्वासी ढूला तीतुसे तुशे एठां कोई खबर घिन्तां न अव; ते अवं त्रोआसेरे विश्वासी लोकन करां अलग भोइतां अवं वापस मकिदुनियां इलाके मां अव। 14 परमेशरेरु शुक्र भोए, जै मसीह मां सदा असन ज़ीतारे जशने मां चलाते, ते अपने ज्ञानेरे खुशबू इश्शे ज़िरिये हर ठैरी फैलाते। 15 किजोकि अस परमेशरे कां मुक्ति मैलने बालां, ते नाश भोने बालन कां, दुइयां केरे लेइ मसीहेरी खुशबू आम। 16 केत्रा केरे लेइ त मरनेरे मुशक, ते केत्रन जो ज़िन्दगरे लेइ ज़िन्दगरी खुशबू, ते इन गल्लां केरे काबल कौने? 17 किजोकि अस तैन केरे ज़ेरे नई, ज़ैना परमेशेरु वचन पेइसां केरे लेइ प्रचार केरतन, पन अस मनेरी सचई सेइ, ते परमेशेररे तरफां परमेशर हाज़र सेमझतां मसीह मां ज़ोतम।

3 कुन अस दुबारा फिरी अपनि बड़याई केरने लगम? या असेई केत्रा केरि ज़ेरी सुपारशारी चिट्ठी तुसन कां ऐनिन या तुसन करां नेनिन? 2 तुस एप्पू इश्शी लेइ चिट्ठी केरे ज़ेरेथ, ज़ैना इश्शे लेइ सुपारश केरतिन, ज़ैना इश्शे दिले पुड़ लिखोरिथ, तैन हर कोई पेढ़ी सकते ते ज़ैना रोड़ां कम्मां असेई कियोरन, तैन लोक पिशेनी सकतन। 3 इन बांदूए, कि तुस मसीहेरे चिट्ठी केरे ज़ेरेथ, ज़ैना असेई सेवकां केरि ज़ेरी लिखी; ते ज़ैना शैही सेइ नई, पन ज़ीते परमेशेररी आत्माई सेइ घोड़ां केरे तेख्ती पुड़ नई, बल्के दिलेरे मासेरे तेख्ती पुड़ लिखोरिन। 4 अस मसीहेरे ज़िरिये परमेशरे पुड़ एरु याकीन रखतम। 5 इन नई, कि अस अपने आपे सेइ इस काबलम, कि एप्पू कोन्ची गल्लरे बारे मां सोची बटम; पन इश्शी काबलीत परमेशरे तरफां आए। 6 ज़ैनी अस नंवे करारेरे सेवक भोनेरे काबल भी किये, मूसेरे कानूनेरे सेवक नई बल्के पवित्र आत्मा सेइ; किजोकि मूसेरो कानून न मन्नेरो नितीजो मौत भोते, पन पवित्र आत्मा हमेशारी ज़िन्दगी देते। 7 ज़ैखन मूसेरो कानून ज़ेसेरे ज़िरिये मौत एइती ज़ेसेरे लफस घोड़ां केरे तेखतिन पुड़ घेइतां लिखोरे थिये, इड़ी तगर महिमा बाले भोए, कि इस्राएली लोक मूसेरे तुतरेरां तेकि न थी बटते, पन ते जादे वक्ते तगर न राव, 8 ते आत्मारो करार होरो भी महिमा बालो किना भोलो? 9 किजोकि दोषी ठहराने बालो करार महिमा बालो थियो, ते धर्मी बाने बालो करार होरो भी महिमा बालो किना भोए! 10 ते ज़ै पुरानो महिमा बालो करार थियो, तैन नव्वे करारे करां महिमा बालो न भोव। 11 किजोकि मूसेरु कानूने ज़ेसेरी महिमा थोड़े वक्तेरे लेइ थी, महिमा बालो थियो, त ते नव्वीं करार ज़ै कायम रालो, होरु भी महिमा बालू किजो न भोलो! 12 एल्हेरेलेइ एरी उमीद रेखतां अस दिलेरी सेइ ज़ोतम। 13 अस मूसेरे ज़ेरे नई, ज़ैने अपने तुतरे पुड़ पड़ो रेखोरे थियो ताके इस्राएली लोक तैस घटने बैली महिमारे अन्त न लहन। 14 पन तैन केरे मन सखत भोए, किजोकि अज़ तगर पुरानो नियम पढ़ते बार तैन केरे मन्न पुड़ तैए पड़ो रहते, पन पड़ो सिर्फ तै मसीह पुड़ विश्वास केरने सेइ उठते। 15 ते अज़ तगर ज़ैखन भी मूसेरो कानून पढ़ो गाते, ते तैन केरे मन्न पुड़

सदा पड़ो रहते ते तैन रोड़े चारे समझ न एज्जे। 16 पन ज़ैखन भी तैना प्रभु यीशु पुड़ विश्वास केरेले, तैखन तै पड़ो दूर भोलो। 17 प्रभु त आत्मा आए, ते ज़ैड़ी भी प्रभुएरो आत्माए तैड़ी कानूने करां आज़ादी आए। 18 पन ज़ैखन इश्शे सेखी केरे बगैर पड़ो तुतरन सेइ प्रभुएरु प्रकाश बांदू भोते, जेन्नेरे शीशे मां, ते प्रभुएरे ज़िरिये ज़ै आत्माए, अस प्रभुएरे महिमा बाले रूपे मां थोड़े-थोड़े बदलते रातम।

4 एल्हेरेलेइ अगर असन पुड़ एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम। 2 पन असेई शरमरां छपोरां कम्मां शारोरन, ते न च़लैकी सेइ च़लते, ते न परमेशेररे वचन मां मलावट केरम। पन परमेशर इश्शो गवाहे कि अस सज़ ज़ोतम, ते हर कोई गवाही देते कि इन सज़्जे। 3 पन अगर इश्शे खुशखबरी पुड़ पड़ोए, त ई नाश भोने बालां केरे लेइए। 4 ते तैन विश्वास न केरनेबालां केरे लेइ, ज़ैन केरे अक्ल इस दुनियारे ईश्वर शैताने कानी कियोरीए, ताके मसीह ज़ै परमेशेरु रूपे, तैसेरी महिमा खुशखबेबारी लौ तैन पुड़ न चमके। (aiōn g165) 5 किजोकि अस अपनो नई, बल्के यीशु मसीहेरो प्रचार केरतम, कि तै प्रभुए; अस यीशु मसीहेरे वजाई सेइ तुशे सेवकम। 6 एल्हेरेलेइ कि परमेशर तै आए ज़ैनी ज़ोव, “कि आंधरे मरां लौ चमके,” ते परमेशरे इश्शे दिलन मां लोअरी ज़ेरी समझ दिती, कि अस परमेशेररी महिमा पिशानम ज़ै यीशु मसीह मां लेइहोई। 7 पन अस मितारे भांड़ां केरे ज़ेरेम ज़ैन मां धन रखेरुए, कि ई हछछी शक्ति इश्शे तरफां नई, बल्के परमेशेररे तरफां भोए। 8 अस च़ेरे पासना दुःख त झल्लतम, पन मुशकली मां न पेम; घबरातम, पन न उमीद न भोम। 9 सताए त गातम, पन शारे न गाम, बछोड़े त गातम पन नाश न भोम। 10 अस यीशु मसीहेरी मौत अपनि जानी मां हर वक्त च़लातम; कि ज़ैन किछ अस केरतम तैसेरे ज़िरिये लोक यीशुएरी ज़िन्दगी हेरेले। 11 किजोकि इश्शे ज़ीते सांसेइ, सदा यीशुएरे वजाई सेइ असन मौतरे खतरो भोतो थियो, कि यीशुएरी ज़िन्दगी भी इश्शे नाश भोनेबाले जानी मां बांदी भोए। 12 अस त मौतरे खतरे मां ज़ीतम पन इसरो नितीजो तुशे लेइ हमेशारी ज़िन्दगीए। 13 ते एल्हेरेलेइ कि असन मां तैए विश्वासेरी आत्माए, “ज़ेसेरे बारे मां पवित्रशास्त्रे मां लिखोरुए, कि मीं विश्वास कियो, एल्हेरेलेइ मीं ज़ोव” एल्हेरेलेइ अस भी विश्वास केरतम ते ज़ोतम। 14 किजोकि अस ज़ानतम, ज़ैने प्रभु यीशु मुड़न मरां ज़ीते कियो, तैए असन भी यीशु मसीह मां हिसेदार सेमझतां ज़ीते केरेलो, ते तुसन सेइ साथी अपने सामने हाज़र केरेलो। 15 किजोकि सारे दुःख ज़ैना असन पुड़ आन, तुशे लेइ आन, ताके परमेशेररो अनुग्रह जादे करां जादे लोकन मसीह कां आने, ते बड़े लोक परमेशेरु शुक्र केरेले। 16 एल्हेरेलेइ अस दिलेरी न शारम; अगर इश्शी बेइर्रीं इन्सानयत नाश भी भोए, त फिरी भी इश्शी एनर्रीं इन्सानयत रोज़ नव्वीं भोती रहतीए। 17 किजोकि इश्शो एक्की पलेरो थोड़ो ज़ेरो दुःख बड़ी ते हमेशारी

महिमा पैदा केरते, जेसेरी तुलना केन्ची सेई न केरोए। (aiōnios g166) 18 ते अस त लेवरी चीज़न नई पन अलैई चीज़न लाते रातम, किजोकि लेवरी चीज़ां थोड़े दिहाड़ां केरे लेइ आन, पन अलैई चीज़ां हमेशारे लेई आन। (aiōnios g166)

5 किजोकि अस ज्ञानतम, कि जैखन इशो जिसम जै धेरतली पुड़े ते तेम्बेरो जेरो आए मेरतां नाश भोलो, त असन परमेशेरी तरफां स्वर्गें मां अक भवन मैलनोए, जै हथ्यां केरो बनावरो नई बल्के हमेशारोए। (aiōnios g166) 2 इस मां अस बडू कर लातम, ते बडी इच्छा केरतम; कि असन एरो जिसम मैले जै स्वर्गेर घरेरो जेरो भोए। 3 कि जैखन असन स्वर्गेरी जिसम मैल्ले त अस नगगे न लेइहोम। 4 ते अस इस तेम्बेरे जेरे घरे मां रेइतां बोझे सेइं देबोइतां कर लाते रातम; किजोकि अस दुनियारो जिसम शारनो न चाम, बल्के इन चातम कि परमेशर असन स्वर्गेरो जिसम दे, ताके जै मरने बालो जिसमे तै न मरे बल्के हमेशारे जिन्दगी मां बेदलोए। 5 ते जैनी अस इस नव्वें जिसमेरे लेइ तियार कियोरेम जै असन मैलनोए, तै परमेशरे, जैने असन जेन्चरे साईं देतन तेन्चरे पवित्र आत्मा भी दित्तोए। 6 असन सदा पूरू याकीने ते इन ज्ञानतम; कि ज्ञांतगर अस जिसमे मां रातम, तांतगर अस प्रभु करां अलग आम जै स्वर्गें मां आए। 7 किजोकि अस शकल हेरतां नई, पन विश्वासे सेइं ज़ीतम। 8 एल्हेरेलेइ अस हिम्मत केरते रातम, ते जिसमे करां अलग भोइतां जैखन अस मरमेले त प्रभु सेइं साथी रानू जादे रोडू समझतम। 9 एल्हेरेलेइ इशो मनेरी उमंग ईए, कि चाए अस स्वर्गें मां तैस सेइं साथी रहम, चाए अलग इडी धेरती पुड़ रहम पन अस तैस पसंद एइते रहम। 10 किजोकि जरूरीए, कि इशो सेबभी केरो हाल मसीहेरे आदालतेर तखतेरे सामने खुल्ले, कि हर कोन्ची मैन्हु अपने रोड़ां बुरां कम्मां केरो बदलो मैल्ले जैना तैने जिसमे सेइं कियोरन। 11 अस प्रभुएरो डर मेन्तां लोकन कां बिनती केरतम कि सच्चे पुड़ विश्वास केरन, ते परमेशर रोड़े चारे ज्ञानते; ते मेरी उमीद ईए, कि तुस भी अपने दिले मां असन रोड़े चारे ज्ञानथ। 12 अस फिरी भी अपनि बड़याई तुशे सामने न केरम, बल्के अस अपने बारे मां तुसन घमण्ड केरनेरो मौको देतम, कि तुस तैन जुवाब देइ बटतथ, जैना मने पुड़ नई, बल्के दिखवटी गल्लन पुड़ घमण्ड केरतन। 13 अगर कोई ज़ोते कि अस पागलम, त परमेशेरे लेइ अहम; ते अगर कोई ज़ोते कि अस रोड़े अहम त तुशे लेइ आम। 14 किजोकि मसीहेरो प्यार असन मजबूर केरते; एल्हेरेलेइ कि असन याकीने कि जैखन अक मैन्हु सेबभी केरे लेइ मरो जेव त सब मेरि जे। 15 ते मसीह एन्चरे सेबभी केरे लेइ मरो, कि जैना ज़ीते आन, तैना अग्रोवं जो अपने लेइ न ज़ीन पन तैसेरेलेइ जै तैने केरे लेइ मरो ते फिरी ज़ीतो भोव। 16 एल्हेरेलेइ अजेरां पत्ती अस कोन्ची दुनियारे मुताबिक न समझाम, ते अगर असेई भी मसीह दुनियारे मुताबिक ज्ञानोरो थियो त फिरी भी अज़ेरे पत्ती फिरी एरू न ज्ञानम। 17 ते अगर कोई मसीह मां आए त तै नव्वीं स्रष्टि आए,

पुरैनी गल्लां बीती जेई; हेरा, तैना सब नेव्वीं भोइजेइ। 18 ते सब गल्लां परमेशेरी तरफन, जैने मसीह भेजतां फिरी इशो मेल मलाप एप्पू सेइं कराव, ते लोक तैस सेइं मेल मिलाप केरन ई सेवा परमेशरे असन सौफोरीए। 19 मतलब परमेशरे मसीह मां भोइतां एप्पू सेइं साथी दुनियारो मेल मिलाप कियोरोए, ते लोकां केरे पापां केरो दोष तैन पुड़ नई लोरो, ते परमेशरे मेल मलापेरो बिस्तार असन सौफोरोए। 20 अस मसीहेरे राजदूत अहम; मन्ना कि परमेशर इशो ज़िरिये बिनती केरते कि तुस तैसेरो सन्देश कबूल केरथ, अस मसीहेरे तरफां बिनती केरतम, कि परमेशरे सेइं साथी मेल मिलाप केरा। 21 मसीह पापे करां अनजान थियो, तैए परमेशरे इशो लेइ पापी ठहराव, कि अस परमेशेरी नज़री मां धर्मी बनम किजोकि मसीहे इशो पापां केरि सज़ा भुगतोरीए।

6 अस जैना परमेशरे सेइं साथी कम केरनेबाले आम ई भी बिनती केरतम, कि परमेशेरो अनुग्रह जै तुसन पुड़ भोरोए, जैया न भोने देथ। 2 किजोकि परमेशर पवित्रशास्त्रे मां ज़ोते, “कबूल केरनेरे वक्ते मीं तेरी शुनी, ते मुक्करे दिहाड़े मीं तेरी मदत की,” हेरा, हुना तै कबूल केरनेरो वक्ते, हरा, हुना तै मुक्करी दिहाड़ीए। 3 अस परमेशरे सेइं साथी कम केरनेबाले केन्ची भी गल्ली मां कोई भी मौको न देम, कि इशो सेवाई पुड़ कोई दोष लाए। 4 पन हर गल्ली सेइं परमेशेरे सेवकां केरे जेरे अपने रोड़े गुन्न बांटे केरतम, बड़े सबरी सेइं, दुःख सेइं, शारे गाने मां, मुशकलन सेइं। 5 कोड़े खाने सेइं, कैद भोने सेइं, हैल्लन सेइं मेहनती सेइं, बींझे बिशने सेइं, बरत रखने सेइं। 6 पवित्रतैई सेइं, ज्ञाने सेइं, सबरी सेइं, दयाई सेइं, पवित्र आत्मा सेइं। 7 सच्चे प्यारे सेइं, सच्चे वचने सेइं, परमेशेरे शक्ति सेइं; अस धार्मिकतारे हथियारन इस्तेमाल केरतम, देइने हथ्ये सेइं हमलो केरनेरे लेइ ते खिशड़े हथ्ये सेइं अपनो आप बचानेरे लेइ। 8 ते जैखन लोक इशो इज़्ज़त केरतन या असन बेइज़्ज़त केरतन, जैखन लोक ज़ोतन अस रोड़ेम या बुरे मैनुम, अस ईमानदारम फिरी भी लोक झूठ ज़ोतम। 9 अनजाना केरे ज़ेरेम; फिरी भी मुशूरम, मरने बालां केरे ज़ेरेम पन हेरा ज़ीतेम, मार खाने बालां केरे ज़ेरेम, पन जानी सेइं न मैरोम। 10 दुःख केरनेबालां केरे ज़ेरेम, पन सदा आनन्द केरतम, कंगालम, पन बड़े लोकन आत्मिक धनी केरतम; एरेम कि असन कां किछ भी नई फिरी भी सब किछ रखतम। 11 हे कुरिन्थिस नगरेरे विश्वास लोकव, असेई तुसन सेइं खुल्लां गल्लां कमेई, अस तुसन सेइं पूरे दिले सेइं प्यार केरतम। 12 इशो मने मां तुशे लेइ बडी ठारे, पन तुशे मन्न मां नई। 13 पन अव बच्चे सेमझतां तुसन सेइं ज़ोताई, कि तुस भी तैसेरे बदले असन सेइं प्यार केरा। 14 गैर विश्वासी लोकां केरे सेंगती मां न गाथ, किजोकि धार्मिकता ते अधर्मोरो कुन मेल जोल? या लौ ते आंधरेरो कुन साथ? 15 ते मसीहे शैताने सेइं कुन लगाव? या विश्वास केरनेबालेरो विश्वास न केरनेबाले सेइं कुन तालमेल? 16 ते परमेशरे मन्दरेरे मां

मूरती केरे लेइ कोई ठार नई, किजोकि अस त ज़ींते परमेशरेरां लेइए, तै परमेशरेरे सामने तुसन पुड़ बांदी भोए। 13 एल्हेरेलेइ मन्दर अहम; जेन्चरे परमेशरे पवित्रशास्त्रे ज़ोवं, “अवं तैन लोकन साथी रेइलो ते तैन मां च़लेलो फ़िरेलो; ते अवं तैन केरो परमेशर भोनोई, ते तैना मेरे लोक भोले।” 17 एल्हेरेलेइ प्रभु पवित्रशास्त्रे ज़िरिये ज़ोते, “विश्वास न केरनेबालन मरां निस्सा ते अलग राथ; ते अशुद्ध चीज़न करां दूर राथ; ते अवं तुसन कबूल केरेलो। 18 ते तुशो बाजी भोइलो, ते तुस मेरां मट्ठां ते कुइयां भोलां, इन सर्वशक्तिमान प्रभु परमेशरेरु वचने।”

7 किजोकि हे टलाराव परमेशरे वादो कियोरो कि तै असन अपने बच्चां केरे रूपे मां कबूल केरेलो, त एज्जा, अस अपने आपे ते जिसमेरी ते आत्मायी सब गंदगी शुद्ध केरम, ते परमेशरेरो डर मेन्तां ते इज़्ज़त केरतां, ते परमेशरेरी बत्तां च़लनेरे लेइ पूरे तरीके सेइं पवित्र ज़िन्दगी ज़ींम। 2 असन अपने दिल मां ठार देथ, असेई केन्ची सेइं बेइन्साफी नई कियोरीए, न केन्चेरु किछ बिगाड़ेरुए, ते न कोई ठगोरोए। 3 अवं तुसन दोषी बनामेरे लेइ इन नई लगोरो ज़ोने, किजोकि मीं इन पेइलू ज़ोरुए, कि तुस इश्शे मने मां बसोरेथ कि अस तुसन साथी मरने ज़ींमेरे लेइ तियारम। 4 अवं तुसन सेइं बड़े दिलेरी सेइं ज़ोने लोरोई, मीं तुसन पुड़ बड्ड घमण्डे, अवं तसल्ली सेइं भेरोई जोरोई; अपने सारे दुखन मां अवं आनन्दे सेइं भरपूर राताई। 5 किजोकि ज़ैखन अस त्रअस शैरतां मकिदुनिया इलाके मां आए, तैखन भी इश्शे जानी चैन न भोइ, पन अस चेरे पासना दुःख झल्लते राए, बेइर लड़ेई थी, अन्तर बेड़ि-बेड़ि गल्लां थी। 6 फिरी भी उदासन तसल्ली देनेबाले परमेशरे तीतुसरे एजने सेइं असन तसल्ली दिती। 7 ते न सिर्फ तैसेरे एजने सेइं पन तैसेरी तैस तसल्ली सेइं, ज़ै तैस तुसन करां मेलती थी; ते तैनी तुशशी इच्छा ते तुशे दुःख ते मीं सेइं मिलनेरे जोशेरी खबर असन शुनाई, ज़ैस सेइं होरो भी आनन्द भोव। 8 किजोकि अगर मीं एपनी चिट्ठी सेइं तुस दुखी किये, पन तैस करां पसतेई न, जेन्चरे पेइलो पसतातो थियो, किजोकि अवं हेरताई तैस चिट्ठी सेइं तुसन दुःख त भोव पन तै थोड़े चिरेरे लेइ थियो। 9 हुनी अवं खुशी आई पन एल्हेरेलेइ नई कि तुसन दुःख पुजो, बल्के एल्हेरेलेइ कि तैस्से दुखेरे वजाई तुसेई पापन करां मन फिराव। किजोकि तुशो दुःख परमेशरेरे मेज्जी सेइं थियो, कि इश्शे पासेरां तुसन कोई नुकसान न पुजे। 10 किजोकि परमेशरेरे भेक्करो दुःख एरी पसतावो पैदा केरते ज़ैस सेइं मुक्ति मैलतीए, फिरी तैस सेइं पसतानू न पे, पन दुनियारो दुःख हमेशारी मौत पैदा केरते। 11 ते हेरा, इस्से गल्ली सेइं तुसन परमेशरेरे भेक्करो दुःख भोव, कि तुसन केत्रो जोश, उज़र, सरक, डर, इच्छा, मघन भोनू, ते सज़ा देनेरो खियाल पैदा भोव? तुसेई सेब्भी तरीके सेइं इन सिद्ध कियूं, कि तुस इस गल्ली मां बेकसूर आथ। 12 फिरी मीं ज़ैन तुसन जो सेखती सेइं लिखोरु थियूं, तैन न तैसेरे वजाई सेइं लिखू, ज़ैने बेइन्साफी की, ते न तैसेरे वजाई सेइं ज़ैस सेइं बेइन्साफी भोइ, पन एल्हेरेलेइ कि तुशशी सगरमरी ज़ै इश्शे

लेइए, तै परमेशरेरे सामने तुसन पुड़ बांदी भोए। 13 एल्हेरेलेइ असन हिम्मत मेल्ली; ते इश्शी इस हिम्मती सेइं साथी तीतुसरे आनन्द सेइं होरो भी आनन्द भोव किजोकि तैसेरो मन तुशे वजाई सेइं हरो भरोए। 14 किजोकि अगर मीं तैसेरे सामने तुशे बारे मां किछ घमण्ड हिराव, त छिथोव न, पन जेन्चरे असेई तुसन सेइं सब गल्लां सज़-सज़ जोरी थी, तेन्चरे इश्शू घमण्ड हिरानू तीतुसरे सामने भी सज़ निस्सू। 15 ते ज़ैखन तैस तुशो सेब्भी केरु हुक्मन मन्नेबाले भोनू याद एइते; किजोकि तुसेई थरकते-थरकते तैस सेइं मुलाकात की; तैसेरो प्यार तुशे पासेरां होरो भी बढ़तो गाते। 16 अवं खुश भोताई, किजोकि तुसन करां मीं हर गल्ली मां भरोसो भोते।

8 हुनी मेरे ढूलाव बेइनव, अस तुसन परमेशरेरे अनुग्रहेरी खबर देतम, ज़ैन मकिदुनिया इलाकेरे कलीसियारे लोकन पुड़ भोरोए। 2 कि ज़ैखन बेड़ि मुसीबतां केरे ज़िरिये परखे जे, त तैना बड़े खुशी भोए, चाए तैना बड़े गरीब थिये फिरी भी होरि विश्वासी लोकां केरि मदत केरनेरे लेइ खुल्ले दिले सेइं पेइंसो दित्तो। 3 ते तैन केरे बारे मां मेरी ई गवाहीए, कि तैनेई अपने काबलीतरे मुताबिक बल्के अपने काबलीती करां भी जादे मने सेइं दित्तू। 4 ते इस दाने मां ते पवित्र लोकां ज़ैना यहूदिया इलाके मां आन तैन केरे सेवाई मां मदत केरनेरे बारे मां असन सेइं बार-बार बड़ी बिनती की। 5 ते जेन्चरे असेई उमीद न थी कियोरी, कि तैनेई पेइलो अपनो आप प्रभुएरी सेवा केरनेरे लेइ समर्पण कियो, फिरी परमेशरेरी मेज्जी सेइं असन पत्ती च़लनेरे लेइ अपनो आप समर्पण कियो। 6 एल्हेरेलेइ असेई तीतुस समझव, कि जेन्चरे तैने पेइलू शुरू कियोरु थियूं, तेन्चरे इस दानेरे कम्मे पूरू भी केरे। 7 जेन्चरे हर गल्ली मां मतलब विश्वासे, वचन प्रचार केरनेरे काबलीत, ज़ाने ते सेब्भी किसमेरे कोशिश मां, ते तैस प्यारे मां, ज़ै तुस असन सेइं केरतथ, बढ्ते गातथ, तेन्चरे विश्वासी लोकन दान देनेरे कम्मे मां बढ्ते राथ। 8 अवं हुक्मेरे तरीके पुड़ नई, पन होरि केरे हिम्मतरे लेइ ते तुशे प्यार ते सचैई परखनेरे लेइ ज़ोताई। 9 तुस इश्शे प्रभु यीशु मसीहेरे अनुग्रह ज़ानतथ, कि तै धनी भोइतां भी तुशे लेइ गरीब बनो ताके तैसेरे गरीब भोने सेइं तुस धनी भोथ। 10 ते इस गल्ली मां मेरो खियाल ईए, किजोकि तुशे लेइ रोइए; ज़ै एककी साले करां न सिर्फ इस कम्मे केरने मां, बल्के इस गल्लेरे चाने मां भी पेइले भोरे थी। 11 एल्हेरेलेइ हुनी इन कम पूरू केरा; जेन्चरे तुस इच्छा केरने तियार थिये, तेन्चरे अपने-अपने हैसियतरे मुताबिक पूरू भी केरा। 12 किजोकि अगर मनेरी तियारी भोए त दान तैसेरे मुताबिक कबूल भी भोते ज़ैन तैस कां आए न कि तैसेरे मुताबिक ज़ैन तैस कां अथ्थी नई। 13 अवं इन न चैई होरि केरि ज़िन्दगी आसान बनानेरे लेइ तुस अपने ज़िन्दगी मुशकिल बनाथ। 14 पन बराबर भोनेरे खियालन सेइं इस वक्ते तुशू जादे तैन केरि घाटे मां कम्मे एज्जे, ताके तैन केरु जादे तुशे घाटे मां कम्मे एज्जे, कि बराबरी भोए। 15 जेन्चरे पवित्रशास्त्रे मां लिखोरुए, “ज़ैनी बड्ड अकोट्टू कियूं

तैसेरू जादे न निससू, ते ज़ैने थोडू अकोट्टू कियूँ तैसेरू घट न निस्सू।” 16 परमेशेरू शुक्र भोए, ज़ैने तुशे लेइ ज़ै सोच मेरे मने मां आए तैए जोश तीतुसेरे मने मां छड़ोरोए। 17 कि ज़ैखन असेई तैस तुसन कां एजनेरे लेइ मिनत की त तैनी इशशी गल मन्नी बल्के अपने मेर्री सेइं ते बड़े जोशे सेइं तुसन कां अव। 18 ते अस तैस सेइं साथी अक होरो विश्वासी ढ़ला भेजने लोरेम, ज़ेसेरू नवं खुशखबरी शुनानेरे बारे मां कलीसियारे लोकन मां फैलोरूए। 19 ते एनू नई, पन तै कलीसियां केरे लोकेई ठहरावरो भी आए, कि इस दानेरे कम्मरे लेइ असन सेइं साथी गाए ते अस ई सेवा एल्हेरेलेइ केरतम, कि प्रभुएरी महिमा भोए, ते इन हिरानेरे लेइ कि अस यरूशलेमेरे विश्वासी लोकां केरि मदत चातम। 20 अस इस गल्ली मां हुशार रातम, ते तीतुसे सेइं साथी विश्वासी लोक भेजने सेइं इस दान देनेबाले कम्मरे बारे मां ज़ै सेवा अस केरतम, ताके कोई असन पुड़ दोष न लेइ सखे। 21 न सिर्फ परमेशेरू ज़ैना गल्लां सिर्फ प्रभुएरे नज़र मां रोड़ी नई बल्के मैन्हु केरे नज़री मां रोड़ी आन, अस तैन केरि फ़िक्र केरतम। 22 ते अस तैन सेइं साथी अक होरो विश्वासी ढ़ला भी भेजी राओरेम, ज़ै असेई बार-बार परखो ते बेड़ि गल्लन मां जोशे बालो निस्सो; पन हुनी तुसन पुड़ तैस बड़ो भरोसोए एल्हेरेलेइ तै दिले सेइं जोशे बालोए। 23 अगर कोई तीतुसेरे बारे मां पुछे, त तै मेरो साथीए, ते तुशे लेइ मेरो मदतगार, ते अगर इशशे विश्वासी ढ़लां केरे बारे मां कोई पुछे, त तैना कलीसियां केरो भेजोरोए ते तैन केरि जिन्दगी सेइं मसीहेरी महिमा भोतीए। 24 एल्हेरेलेइ अपनो प्यार तैन हिराथ, सारे कलीसियां केरे विश्वासी लोकन सबूत देथ कि इशशू तैन घमण्ड ज़ैन तुशे बारे मांए सच्चे।

9 हुनी तैस सेवारे बारे मां ज़ै यरूशलेमेरे विश्वासी लोकन जो दान देनेरे बारे मां की गातीए, मीं तुसन जो लिखनू ज़रूरीए नई। 2 किजोकि अवं तुशे मनरे तियारे बारे मां ज़ानताई, ज़ेसेरे वजाई सेइं अवं तुशे बारे मां मकिदुनिया इलाकेरे विश्वासी लोकां केरे सामने घमण्ड हिराताई, कि तुस अखाया इलाकेरे लोक एककी साले करां तियार भोरेथ, ते तुशे जोशे होरन भी जोश बनेवरोए। 3 पन मीं तीतुस ते दूई होरे ढ़ला तुसन कां एल्हेरेलेइ भेजे, कि असेई ज़ैन घमण्ड तुशे बारे मां हिराव, तैन इस गल्ली मां बैफ़इदे न भोए; पन ज़ेन्चरे मीं ज़ोवं; तेन्चरे तुस यरूशलेम नगरिरे विश्वासी लोकां केरे लेइ दान देने जो तियार राथ। 4 एरू न भोए, कि अगर किछ मकिदुनिया इलाकेरे विश्वासी लोक मीं सेइं साथी एज्जन, ते तुशू दान तियार न भोए, त अस तुसन पुड़ भरोसेरे केरनेरे वजाई छिथोम, पन तुस असन करां भी जादे छिथोले। 5 एल्हेरेलेइ मीं विश्वासी ढ़लान सेइं ई बिनती केरनि ज़रूरी समझी, कि तैना पेड़ले तुसन कां गान, ते तुशे खुल्ले दिले सेइं दान देनेरे बारे मां, ज़ेसेरे बारे मां पेड़लो वादो कियोरो थियो, तियार केरतां रखा, कि इन दबावे सेइं नई बल्के इच्छाई सेइं भोए। 6 पन गल त ईए, कि ज़ै थोडू बेते तै कटेलो भी थोडू; ते ज़ै हछु बेते तै हछु कटेलो। 7 हर अक मैन्हु ज़ेन्चरे

मने मां थापेरू भोते तेन्चरे दान दे, न कुड़-कुड़ केरतां, ते न दबावे सेइं, किजोकि परमेशर खुशी सेइं देने बालन पुड़ खुश भोते। 8 परमेशर ज़ैन किछ तुसन ज़रूरते तैसेरो अनुग्रह देइ बटते, ज़ैस सेइं हर गल्ली मां ते हर वक्त, सब किछ, ज़ेसेरी तुसन ज़रूरत भोए, तुसन कां राए, ते हर एककी रोड़े कम्मरे लेइ तुसन कां बड़ किछ भोए। 9 ज़ेन्चरे पवित्रशास्त्रे मां लिखोरूए, “परमेशर ज़ैन ज़रूरते तैन हछु देते, ज़ैन तै केरते तैन ठीके ते तैन हमेशा रालू।” (aiōn g165) 10 आखरी, ज़ै बेनेबालो बीज, ते खानेरे लेइ रोटी देते, तै तुसन बीज देलो, ते तैस सेइं फलवन्त केरेलो, ते तुशे धार्मिकतारो फल बढालो। 11 तुसन हर गल्ली मां बरकत मैलेली ज़ैस सेइं तुस जादे दान देनेरे काबल बनेले, ते ज़ैखन अस तुशे हछछे दान तैन कां नेमले ज़ैन ज़रूरते त तैना लोक परमेशेरू शुक्र केरेले। 12 किजोकि सेवारे पूरे केरने सेइं, न सिर्फ परमेशेरू लोकां केरो घाटो पूरो भोते, पन लोकां केरे तरफां परमेशेरू बड़ शुक्र भोते। 13 किजोकि होरि लोकन दान देनेरी मदतरी सेवारू सबूत कबूल केरतां तैना परमेशेरू महिमा बांदी केरतन, कि तुस मसीहेरी खुशखबरी मेन्तां तैसेरे अधीन रातथ, ते गरीब विश्वासी लोकां केरि, ते सेब्वी केरि मदत केरने मां हछु देनू बांदू केरतथ। 14 ते तैना तुशे लेइ परमेशेरू कां प्रार्थना केरेले; तैना तुसन सेइं प्यार केरतन, किजोकि परमेशेरू तुसन पुड़ अनुग्रह कियोरोए। 15 परमेशेरू तैसेरे तैस दानेरे लेइ ज़ैन समझी करां बेइर शुक्र भोए।

10 अवं तैए पौलुस ज़ै तुशे सामने दीन आई, पन तुसन करां दूर भोताई सेखती सेइं ज़ोताई। अवं तुसन मसीहेरी नम्रता ते नरमी याद करेइतां तुसन कां मिनत केरताई। 2 अवं ई बिनती केरताई, कि तुशे सामने नझक भोइतां दिलेर न भोनू पे; ज़ेन्चरे अवं केत्रन पुड़ ज़ैना असन दुनियारे लोकां केरे ज़ेरे चलने बाले समझतन, बहदरी हिरानेरी खियाल केरताई। 3 किजोकि अगर अस दुनियाई मां ज़ीतम, पन फिरी भी अपने दुश्मन् सेइं दुनियारे मुताबिक न लड़म। 4 किजोकि इशशी लड़ईरे हथियार मैन्हु केरे नई, पन गड़ बछोइनेरे लेइ परमेशेरू शक्ति। 5 ते अस खियालन, ते हर एककी उच्ची गल्ली, ज़ैना परमेशेरू पिशानेरे खलाफ उट्टतन, खतम केरतम; ते हर एककी खियाले कब्जे मां केरतम, ते मसीहेरो हुक्म मन्ने बालो बनातम। 6 ते तियार रातम कि ज़ैखन तुस पूरे तरीके सेइं अपनो आप मसीहेरो हुक्म मन्नेबाले बनातथ, त अस मसीहेरे हुक्म न मन्ने बालन सज़ा देनेरे लेइ तियार रामेले। 7 तुस बेइरयू रूप हेरतथ, अगर केन्ची एप्पू पुड़ ई भरोसे, कि अवं मसीहेरोई, तै इन भी ज़ाने, कि ज़ेरो तै मसीहेरोए, तेन्चरे अस भी मसीहेरेम आम। 8 किजोकि अगर अवं तैस अधिकारिरे बारे मां होरू भी घमण्ड हिरैई, ज़ै प्रभुए तुशे विश्वास नाश केरनेरे लेइ नई बल्के विश्वासे बढानेरे लेइ असन दित्तोरोए, त शरमिन्दे न भोलो। 9 इन अवं एल्हेरेलेइ ज़ोताई, कि चिट्ठी केरे ज़िरिये तुसन डराने बालो न भोई। 10 किजोकि किछ लोक ज़ोतन, “कि तैसेरी चिट्ठी त ज़रूरिन ते

अस्सर केरने बैलिन; पन ज़ैखन हेरतन, त तै कमजोर मैन्हु आए, ते तैसेरां भाषाना बेकारना।” 11 ते ज़ै एरू ज़ोते, तै ई समझ रखते, ज़ेन्चरे ठीक इश्शे चिट्ठन मां इश्शो वचन आए, तेन्चरे तुश्शे सामने इश्शां कम्मां भी भोलां। 12 किजोकि असन ई दिलेरी नई कि अपनो आप तैन सेइं साथी गनम, या तैन सेइं अपनो आप मिलां, ज़ैना अपनि तारीफ़ केरतन, ते अपनो आप एक्की होरि सेइं तुलोइतां बेवकूफ बन्तन। 13 अस परमेशरेर दितारे कम्मे करां बेइर घमण्ड कथी न केरमेले, पन तैस्से हदी तगर ज़ै परमेशरे इश्शे लेइ बनोरीए, ते तैस मां तुस भी ओरिथ ते तैसरे मुताबिक घमण्ड भी केरेले। 14 किजोकि अस एपनी हदी करां बेइर अपनो आप बधानो न चाम, ज़ेन्चरे कि तुसन तगर न पुजनेरी हालती मां भोते, बल्के अस पेइले थिये ज़ैना कुरिन्थुस नगरे मां मसीहेरी खुशखबरी शुनाते तुसन तगर पुजी ज़ोरेमा। 15 ते अस हदी करां जादे होरि केरे मेहनती पुइ घमण्ड न केरम; बल्के असन उमीदे, ज़ेन्चरे-जेन्चरे तुश्शो विश्वास बधेलो तेन्चरे तेन्चरे अस एपनी हदारे मुताबिक तुश्शे वजाई सेइं होरां भी बड़ां जादे कम्मां केरनेरे काबल भोले। 16 कि अस तुश्शे हदन करां सारे दूर-दूर इलाकन मां भी खुशखबरी शुनाम, इन नई कि अस होरि केरे हदां केरे अन्तर बनोरे कम्पन पुइ घमण्ड केरम। 17 पन ज़ेन्चरे पवित्रशास्त्र ज़ोते, ज़ै घमण्ड केरे तै प्रभु पुइ केरे। 18 किजोकि ज़ै अपनि बडयाई केरते, तै नई, पन ज़ेसरी बडयाई प्रभु केरते, तैए परमेशरेरी नज़री मां रोइोए।

11 तुस होरन कबूल केरतथ ज़ैना अपनि बडयाई केरतन, ते एल्हेरेलेइ अवं उमीद केरतां, अगर अवं थोड़ी ज़ेरी बेवकूफी केरि त तुस झैल्ले। 2 किजोकि अवं तुसन सेइं प्यार केरताई ते तुश्शो खियाल रखताई ठीक तेन्चरे, ज़ेन्चरे परमेशर केरते, मां वादो कियोरोए तुसन मसीह जो देनरे लेइ, ज़ेन्चरे लोक पूरे तरीके सेइं समर्पितन। 3 पन अवं डरताई कि ज़ेन्चरे शैताने सप्पेरे रूपे मां एइतां अपनि च़लैकी सेइं पेइली कुआन्श, हवा भटकवरी थी, तेन्चरे तुश्शो मन तैसरे सिधवैई ते पवित्रतेई सेइं ज़ै मसीहे कबूल केरते भोरी लोइे भ्रष्ट न की गाए। 4 ज़ैखन भी कोई तुसन कां एइते ते तुसन तैस यीशुएरी ज़ैस यीशुएरो असेई नई कियोरो एइतां, कोन्ची होरि यीशुएरो प्रचार केरते, ज़ेसरो प्रचार असेई नई कियोरो: या ज़ै आत्मा तुसन मैल्लोरी तैस करां अलग किसमेरी आत्मा तुसन मैल्ले; या ज़ैस खुशखबरी पुइ तुसेई विश्वास कियूं तैस करां अलग किसमेरे खुशखबरी तुसन शुनाए, त तुस तैन शिक्षान कबूल केरने मां गलतथ। 5 अवं समझताई, कि अवं कोन्ची गल्ली मां, ज़ैना इस तरीके सेइं बताव केरतन, कि तैना होरि सब प्रेरितन करां महान आन अवं भी तैन केरो ज़ेरो रोइो प्रेरित आई। 6 अगर अवं भाषण देने मां माहिर नई, पन मसीह ते खुशखबरोरे बारे मां मां कां ज़ाने; बल्के मां हर गल शिखालने मां अपनू ज़ान हिरावरूप। 7 कि मां तुसन परमेशरेरी खुशखबरी मुखत शुनाई; ते अपनो आप निकडो कियो, कि तुस उच्चे भोथ, कुन इस

मां मां किछ पाप कियो? 8 मां होरि कलीसियान करां दान कबूल कियूं, ताके तुश्शी सेवा मुफते मां केरि बेटि, तैस जो लूट न ज़ोथ। 9 ते ज़ैखन तुसन सेइं साथी थियो, ते मां पेइंसेरो घाटो भोव, ते मां केन्ची पुइ भार न छुड़ो, किजोकि विश्वासी ढ़लाएई, मकिदुनिया इलाकेरां एइतां मेरो घाटो पूरो कियो: ते मां हर गल्ली मां अपनो आप तुसन पुइ भार भोने करां रोको, ते अग्रोवं जो भी रोकेलो। 10 मसीहेरी सज़्ज़ाई मां मां आए, मां अखाया इलाके मां कोन्ची करां दान नई नेवरू, एल्हेरेलेइ अखाया इलाके मां इस घमण्डे केरने करां कोई मां न रोकी बटे। 11 किजो मां तुश्शो पेइंसो नई नेवरो? कुन मां एन कियूं, कि अवं तुसन सेइं प्यार न केरि? परमेशर ज़ानते कि अवं तुसन सेइं प्यार केरताई। 12 पन ज़ैन अवं केरताई, तैने अग्रोवं भी केरतो रेइलो; अवं तुसन करां मदत न नेइलो ज़ैस सेइं अवं तैन ज़ैना घमण्ड केरनेरो मौको चातन, कि ज़ेरू कम अस परमेशरेरे लेइ केरतम तेरहु कम तैना भी केरतन। 13 किजोकि एरे लोक झूठे प्रेरित आन, ते दगो केरतां कम केरनेबालन, ते मसीहेरे प्रेरितां केरू ज़ेरू रूप बनाने बालेन। 14 ते ई हैरान राने बाली गल नई किजोकि शैतान एप्पू भी महिमा बाले स्वर्गदूतां केरू रूप बनाते। 15 ते अगर तैसरे सेवक भी धर्मी सेवकां केरू ज़ेरू रूप बनान, त कोई बड़ी गल नई पन तैन केरो अन्त तैन केरे कम्मां केरे मुताबिक भोनोए। 16 अवं फिरी ज़ोताई, कोई मां बेवकूफ न समझे; नई बेवकूफ समझतां मां कबूल केरे, ताके अवं थोडू ज़ेरू घमण्ड केरि। 17 ज़ैन किछ अवं ज़ोताई ज़ेरू यीशु चाते तेरहु नई बल्के बेवकूफी सेइं ज़ोताई। 18 ज़ैखन कि बड़े लोक इस दुनियारे लोकां केरू ज़ेरू घमण्ड केरतन, त अवं भी घमण्ड केरेलो। 19 तुस त समझदारा भोइतां आनन्दे सेइं बेकूफां केरि झैलतथ। 20 किजोकि ज़ैखन तुसन कोई गुलाम बनातन, या ज़ैन किछ तुसन कां आए नेते, या तुसन सेइं धोखो केरते, या सोचतन कि तैना तुसन करां बड्डेन, या तुश्शे तुतरे पुइ थपण्ड बातन, त तुस झल्लतथ। 21 एल्हेरेलेइ कुन तुस सोचतथ कि मां छिथोरू लोइते किजोकि मां तैन नई कियोरू; पन ज़ै कोई कोन्ची गल्ली मां घमण्ड केरते, अवं बेवकूफी सेइं ज़ोताई, फिरी भी घमण्ड केरताई। 22 कुन तैन्ना इब्रानी आन? अवं भी आई, कुन तैन्ना अब्राहमेरे खानदाने मरां आन? अवं भी आई? 23 कुन तैना मसीहेरे सेवक आन? (अवं पागलेरो ज़ेरो ज़ोताई) अवं तैन करां बड्डतां आई! मां तैन करां जादे मेहनत कियोरीए, तैन करां जादे बार अवं कैद कियोरीई, बडे बार मां मार बजोरीए, हमेशा मेरी जान मुश्किली मां पेवरीए। 24 मां यहूदन लीडरेई करां पंच बार 39 कोइे खाए। 25 दलेइ बार मां बेंतेइ खेइ; एक्की बार मां पुइ घोडेव कियो जेव; दलेइ बार ज़िहाजे मां ज़ैन पुइ अवं चढ़ोरो थियो, दलुटी जेआं, अक रात ते दिहाड़ी मां समुन्द्रे मां कट्टी। 26 अवं बार-बार सफरे मां; दरियारे खतरन मां; डैकू केरे खतरन मां; अपने ज़ातरे खतरन मां; गैर कौमां केरे खतरन मां; नगरां केरे खतरन

मां; जंगल्लेरे खतरन मां; झूठे विश्वासी लोकां केरे खतरन मां; 27 बड़े मेहनती मां ते तकलीफी मां; बार-बार बींझे बिशने मां; बार-बार बरत रखने मां; दलुख दलिशी मां; हिवतड़े मां; ते नगरे रानेरी हालती मां राहोरोई। 28 ते होरि इना गल्लां केरे अलावा जैन गल्लां केरे बारे मां अवं न जोई सेव्भी कलीसिया केरे फिक्र मीं रोज़ दुबातीए। 29 जैखन कोई कमज़ोर भोते अवं भी कमज़ोर भोताई। जैखन कोई पापेरे पासे गाते त मेरो दिल बड़ो दुखी भोते? 30 अगर घमण्ड केरनु ज़रूरीए, त अवं एपनी कमज़ोरी गल्लन पुड़ केरेलो। 31 परमेशर इश्शे प्रभु यीशुएरो बाजी जै सदा धने, तै ज्ञानते, कि अवं झूठ नई लोरो जोने। (aion g165) 32 जैखन अवं दमिश्क नगरे मां थियो त अरितास राज़ेरे हाकिमे अवं कैद केरनेरे मकसदे सेई सारे नगरे मां पेरहो रखोरो थियो। 33 ते अवं टोकरे मां शहरपनाहेरे दैरारे बत्तां दुवारी उन्दो औसालोरो थियो, ते अवं हाकिमेरे हथ्ये करां बजो।

12 अगर घमण्ड केरनु मेरे लेइ ठीक नई, फिरी भी केरनु पेटे; अवं प्रभुएरे दित्तोरे दर्शन ते प्रकाशेरे बारे मां जोइएलो। 2 अवं मसीह मां च़ेवथे साल पेइले दलेइयोवं स्वर्गें पुड़ नीयो जेव, चाए अवं जिसमे मां थियो या जिसमे मरां बेइर, अवं न जैनी सिर्फ परमेशर ज्ञानते। 3 अवं फिरी जोताई, कि ई मैन्हु स्वर्गें तगर अकदम नेव जेव (फिरी, अवं न जैनी कि इन जिसमे मां भोवं या अक दर्शन थियूं, सिर्फ परमेशरे ज्ञानते), तैड़ी तैनी तैना गल्लां शुनी जैना लफसन मां न जोइयोन, एरी गल्लां जैना मैन्हु ओठन सेई न जोई बटन। 5 एरे मैन्हु पुड़ त अवं घमण्ड केरेलो, पन अपने कमज़ोरी केरे अलावा, अपने बारे मां घमण्ड न केरि। 6 किजोकि अगर अवं घमण्ड केरनु चैई भी त बेवकूफ न बेई, किजोकि अवं सच़ जोइलो; पन अपने आपे एस किसमेरे घमण्डे करां रोकताई, एरु न भोए, कि जेन्चरे कोई मीं लाते, या मीं शुन्ते, मीं तैस करां भी बेद्वतां न समझो। 7 पन जैना अद्वबूद गल्लां परमेशरे मीं हेरेवरिन तैन केरे वजाई सेई अवं बड़ो जादे घमण्डी न भोइ गेइ। एल्हेरेलेइ तैनी मीं अक बड़ो मुशकिल मसलो तुसन सेई बताव केरनेरे लेइ दित्तोरोए (मेरी जानी मां अक कंटो)। शैतानेरे एक्की दूते मीं मडुनेरो इरादो कियोरोए ते अवं घमण्ड केरने करां रोकरोई। 8 इसेरे बारे मां मीं प्रभु कां दलाई बार बिनती की, कि मीं करां दूर भोइ गाए। 9 ते तैने मीं सेई ज़ोवं, “मेरो अनुग्रह तेरे लेइ सुधोए; किजोकि मेरी शक्ति कमज़ोरी मां सिद्ध भोतीए।” एल्हेरेलेइ अवं एपनी कमज़ोरी पुड़ घमण्ड केरेलो, कि मसीहेरी सामर्थ मीं पुड़ एंडीती राए। 10 इस वजाई सेई अवं मसीहेरे लेइ कमज़ोरन मां, ते बेइज़तन मां, गरीबी मां, सताए गाने मां, ते मुशकलन मां खुश आई; किजोकि जैखन अवं कमज़ोर भोताई, तैखन अवं मसीहेरी शक्ति सेई ज़ोरे बालो भोताई। 11 अवं बेवकूफ त बनो, पन अवं एरु केरनेरे लेइ तुसेई अवं मजबूर कियो, तुसेई त मेरी बड़याई कियोरी लोड़ती थी, किजोकि अगर अवं किछ भी नई, फिरी भी होरे प्रेरित जैना महान आन अवं तैन केरो ज़ेरो रोड़ो आई। 12 मीं रोड़े प्रेरितेरी

पिशन भी तुश्शे दरमयान हर किसमेरे सबर साथी ते निशान ते बडां-बडां कम्मां, ते सामर्थएरां कम्मां हिरां। 13 अक गल थी जै मीं तुसन सेई न की, जै मीं होरि कलीसियान सेई की, यानी अवं पेईसां केरे बारे मां तुश्शे लेइ बोझ न बनो। कुन इन तुसन घटिया बनाते, एरु केरने सेई मीं तुश्शे खलाफ गलत कियोरु ई तुश्शी सोच गलते। 14 हेरा, अवं दलेइयोवं बार एजनेरे लेइ तियाराई, ते अवं तुसन करां कोई पेईसां केरि मांग न रेखेलो। किजोकि अवं तुश्शी जेइदाद नई, बल्के तुसन चाताई, किजोकि बच्चेइ अम्मा बाजी केरे लेइ धन अकोट्टु न लोड़े कियोरु, पन अम्मा बाजेई बच्चां केरे लेइ कियोरु लोई। 15 अवं तुश्शी लेइ बड़ी खुशी सेई खर्च केरेलो, बल्के अवं अपनु सब किछ तुसन देइलो, अवं तुसन सेई बड़ो प्यार केरताई पन एरु लगेते कि तुस मीं सेई घट प्यार केरतथ। 16 तुसन मरां किछ मन्तन कि मीं तुसन पुड़ भार नई छुडोरो, पन किछ होरे सोचतन कि अवं च़लाक आई ते मीं तुसन पूरे तरीके सेई धोखो दित्तोरोए, जैन कि झूठ आए। 17 मीं अपने लेइ तुसन करां पेईसे नेनेरे लेइ तीतुस या होरो कोई इस्तेमाल नई कियोरो। 18 मीं तीतुस समझेइतां तैस साथी ते दूला भेजो, त कुन तीतुसे धोखे सेई किछ नेव? कुन अस एक्की मकसदे सेई न च़ले? कुन इश्शां कम्मां अक्कां ज़ोरां नई। 19 हे दलाराव, तुस हेजु तगर इन समझतथ कि अस तुश्शे सामने अपनो बचाव लोरिम केरने, अस त परमेशरे हाज़र सेमझतां मसीह मां ज़ोतम, ते सब गल्लां एल्हेरेलेइ ज़ोतम कि तुसन विश्वासे मां मजबूत केरने लोरिम। 20 किजोकि मीं डरे, कि एरु न भोए, कि अवं एज्जी ते जेन्चरे अवं चाताई, तेन्चरे तुस न भोथ; ते मीं भी जेन्चरे तुस मीं चातथ तेरे लाथ, कि तुसन मां लड़ेई, गर्म सुभाव, सरक, खलाफत, जलन, चोगली, अभिमान ते फसाद भोन। 21 कि एरु न भोए कि जैखन अवं तुसन कां दुबारां एज्जी, त मेरो परमेशर मीं छिथाए। ते मीं दुःख केरनो पे, किजोकि तुसन मरां बड़ेई अपने पुराने पाप नई शारोरे। ते तैस गंदे कम्मे, ते बदमाशी, ते लुचपने सेई, जै तैनेई कियो, मन न फिराव।

13 पवित्रशास्त्रे मां इन लिखोरूए कि, “हर अक गल दूई या दलेइ गवाहां केरे गवाही केरे ज़िरिये सेई पक्की की गाली।” मीं तैन लोकन हदैइयत दित्तोरीए जैना पाप केरते थिये, जैखन अवं दुइयोवं बार ओरो थियो। हुनी अवं फिरी तैन ते होरि सेव्भी लोकन हदैइयत देताई कि ठीक तेन्चरे जेन्चरे मीं पेइलू भी कियोरूए इस चिट्ठी मां खबरदार केरताई। हुनी अवं दलेइयोवं बार एजनेबालो आई, ते अगर तेना हेजु भी पाप केरनो बंद नई कियोरो, तैन मरां कोई भी सज़ाई करां न बचेलो। 3 अवं जोताई कि तुस इना गल्लां केरु सबूत चातथ, कि मसीह मेरे ज़िरिये गल्लां केरते, पन जैखन मसीह तुसन सेई बताव केरते त तै कमज़ोर नई; पन तुसन मां सामर्थ आए। 4 तै कमज़ोराे वजाई सेई कूसे पुड़ चाढ़ो त जेव, फिरी भी परमेशरे शक्ति सेई ज़ीतोए। अस भी कमज़ोरम, ठीक तेन्चरां, जेन्चरे मसीह थियो; पन जैखन अस तुसन सेई बताव केरमेले अस भी तैस सेई

साथी ज़ीते भोमेले ते असन सेइं साथी परमेशरेरी शक्ति भोली। 5 अपनो आप परखा, कि तुश्शो विश्वास सच्चो आए कि नई; एप्पू परखा, कुन तुसन अपने बारे मां ई पतो नई, कि यीशु मसीह तुसन मां आए, नई त तुस निकम्मे भोए। 6 पन मेरी उमीदे, कि तुस बुझेले, कि अस निकम्मे नई निसोरे। 7 चाए अगर तुसन इन लेइहोते कि अस सच्चे प्रेरित नई, अस तुश्शे लेइ परमेशरे कां प्रार्थना केरने लोरेम, कि गलती केरनेरे बगैर सिर्फ रोडू केरा। 8 किजोकि अस सच्चेरे खलाफ किछ न केरि बटम, पन सच्चेरे लेइ केरि बटतम। 9 ज़ैखन अस कमज़ोरम, ते तुस ताकतबरथ, अस खुशी रातम, ते ई प्रार्थना भी केरतम, कि तुस विश्वास मां सिद्ध भोते राथ। 10 एल्हेरेलेइ अवं तुश्शे पिठी पतर इना गल्लां लिखताई, कि मौजूद भोइतां मीं तैस अधिकारेरे मुताबिक ज़ै प्रभुए बिगाड़नेरे लेइ नई पन बनानेरी लेइ मीं दित्तोरोए, सेखती सेइं किछ न केरनू पे। 11 हे ढूलाव ते बेइनव, खुश राथ, सिद्ध बनते राथ; एक्की होरि हिम्मत देथ; ते मेल मिलापे सेइं राथ, ते प्यार केरनेबालो ते शान्ति देनेबालो परमेशर तुसन साथी भोलो। 12 मसीहेरे प्यारे सेइं एक्की होरि जो नमस्कार केरा। 13 सब पवित्र लोक तुसन जो नमस्कार ज़ोतन। 14 प्रभु यीशु मसीहेरो अनुग्रह ते परमेशरेरो प्यार ते पवित्र आत्मासी सन्गती तुसन सेबन साथी भोए।

गलातियों

1 अवं पौलुस ई चिट्ठी तुसन लिखताई, अवं अक प्रेरिताई, अवं न मैन्हु केरे तरफां, ते न केन्वी मैनेरे जिरिये प्रेरित भोनेरे लेइ चुनोरोई, बल्के यीशु मसीह ते बाजी परमेशरेरे जिरिये, जैनी यीशु मुइदन मरां जीतो कियो। 2 ते सारे ढूलां केरे तरफां, जैना मीं सेइं साथिन; गलातिया इलाकेरे कलीसियां केरे लेइ ई चिट्ठी लिखताई। 3 बाजी परमेशर, ते इश्शे प्रभु यीशु मसीहेरे तरफां तुसन अनुग्रह ते शान्ति मैलती राए। 4 इश्शे परमेशर ते बाजी केरि मेर्जी सेइं यीशु मसीहे अपनो आप इश्शे पापां केरे लेइ बलिदान कियो, ताके असन इस मौजूद बुरे दुनियाई करां छुटकारो दे। (aiōn g165) 5 तैसेरी महिमा हमेशा भोती राए। आमीन। (aiōn g165) 6 अवं हैरान भोताई, कि परमेशरे तुस मसीहेरे अनुग्रहे मां जीनेरे लेइ कुजाए; ते तुस तैस करां एत्रे जल्दी फिरतां होरि किसमेरी खुशखबरी मन्ने लाए। 7 पन सिर्फ एक्के सच्ची खुशखबरी आए, गल ईए, कि किछ लोक एरेन, जैना तुसन धोखो देतन, ते मसीहेरी खुशखबरी बगाड़ने चातन। 8 पन अगर असन मरां कोई या कोई स्वर्गदूत भी तुसन कोई तैस खुशखबरेरे अलावा जै असेईं तुसन शुनोरी, शुनाए त लानती भोए। 9 जेन्चरे असेईं पेड़लू ज़ोवरूए, तेन्चरे अवं हुना फिरी ज़ोताई, कि तैस खुशखबरेरे अलावा जै तुसेईं कबूल कियोरोए, अगर कोई होरो खुशखबरी शुनाए, त लानती भोए। 10 हुनी कुन अवं मैन्हु केरि मन्जूरी हासिल केरनेरी कोशिश केरताई या परमेशरेरी? कुन अवं लोकन खुश केरनेरी कोशिश केरने लोरोई? बिलकुल भी नई, अगर हेजू तगर लोकन खुश केरतो राताई, त मसीहेरो दास न भोथो। 11 हे ढूलाव ते बेइनव, अवं तुसन ज़ोताई, कि जै खुशखबरी मीं तुसन शुनाई, ई मैन्हु केरि बनोरी नई। 12 किजोकि तै मीं न केन्वी मैन्हु करां मैलोरी, ते न मीं कोन्वी उस्तादे करां शिखोरी, बल्के यीशु मसीहे मीं पुड़ बांदी की। 13 तुसेईं शुनोरूए यहूदी धर्म मां पेड़लो जै मेरो चालचलन थियो तै केरो थियो, कि अवं परमेशरेरी कलीसियाई बड़ी सतातो थियो, ते नाश केरनेरी कोशिश केरतो थियो। 14 ते अवं अपने धर्म मां तैस वक्ते बड़े मेरे उमरारे यहूदन करां अग्रोवं थियो। ते अपने बुजुर्गा केरे रीतन मां जोशे मां थियो। 15 पन परमेशरेरी ज़ैखन इच्छा भोइ, तैनी अवं मेरे ज़रमने करां पेड़लो चुनो ते अपने अनुग्रह सेइं कुजाव, 16 कि मीं मां अपने मट्ट बांदू केरे कि अवं गैर कौमन मां तैसेरी खुशखबरी शुनेई; ते मीं समझनेरे लेइ होरि कोन्वी करां सलाह नी। 17 ते न यरूशलेम नगरे मां तैन कां जेव जैना मीं करां पेड़ले प्रेरितन, पन अरब मुल्खे जो च़लो जेव, ते फिरी किछ च़िरेरां बाद तैङ्गां दमिश्क नगरे जो वापस अव। 18 फिरी ट्लाई सालना पत्ती अवं कैफा (यानी पतरस प्रेरिते) सेइं मिलने यरूशलेम नगरे जो जेव, ते 15 दिहाड़े तैड़ी राव। 19 पन प्रेरितन मरां प्रभुएरे ढूला याकूबेरे अलावा होरि कोन्वी सेइं न मिलो। 20 जैना गल्लां अवं तुसन लिखताई,

हेरा परमेशरे हाज़र सेमझतां ज़ोताई, कि तैना झूठी नई। 21 यरूशलेम नगर शारनेरां पत्ती, अवं सीरिया ते किलिकियारे मुल्खे मां जेव। 22 पन यहूदिया इलाकेरे कलीसियां केरे लोक जैना मसीह मां थिये, जैना मीं सेइं कथे न थिये मिलोरे। 23 पन इन्ने शुन्ते रहते थिये, कि जै असन पेड़लो सतातो थियो, तैए तैस्से विश्वासेरी खुशखबरी शुनाते, जैस पेड़लो नाश केरतो थियो। 24 ते जैन परमेशरे मेरे ज़िन्दगी मां कियू तैल्हेरेलेइ तैना परमेशरेरी बडीयाई केरते रहते थिये।

2 च़ेवधे सालना पत्ती अवं बरनबासे सेइं साथी यरूशलेम नगरे जो जेव, ते तीतुस भी मीं एप्पू सेइं साथी नीयो। 2 अवं एल्हेरेलेइ तैड़ी जेव किजोकि परमेशरे मीं गानेरे लेइ ज़ोरू थियू, ज़ैखन अवं तैड़ी थियो, अवं अकैल्ले मां कलीसियारे खास बुजुर्गन सेइं मिलो ते तैन खुशखबरी समझाई, जै अवं गैर कौमन मां प्रचार केरतो ओरो थियो, ताके एरू न भोए, कि जैन किछ अवं केरतो ओरोई ते जैन केरने लोरोई बेफैइदू भोए। 3 मेरो साथी तीतुस, जै यूनानीए, जेसेरो खतनो कधी न भोरो। पन जैना यरूशलेम नगर कलीसियारे खास बुजुर्ग थिये तैनेई तै खतनो करानेरे लेइ मजबूर न कियो, बल्के तैनेई तै कबूल कियो। 4 ते ई गल तैन केरे लेइ परेशानी बनी, ई इन तैन झूठे ढूलां केरे वजाई सेइं भोवं, जैना छेपतां इश्शे टोली मां ओरे थी, कि तैस एजैदरी जै मसीह यीशु मां असन मैलोरीए, भेद नेइतां फिरी असन यहूदी केरे कानूनेरे गुलाम बनान। 5 पन असेईं एक्की पलेरे भी तैन केरि शुने करां इन्कार कियो, ताके जै सन्देश असेईं तुश्शे लेइ आनो तै सच्ची खुशखबरी बनोरी राए। 6 तैन यरूशलेम नगरेरे कलीसियारे खास लीडरेई मेरी शिक्षाई मां किछ न ज़ोडू, इस सेइं मीं किछ फर्क न पे, कि तैना केरहे बुजुर्ग आन, किजोकि परमेशर बेइरोवं रूप हेरतां फैसलो न केरे। 7 पन इसेरे उलट ज़ैखन तैन बुजुर्गेई हेरू, कि जेन्चरे परमेशरे यहूदी लोकां केरे लेइ खुशखबरारू कम पतरसे सोंफू, तेन्चरे परमेशरे गैर कौमां केरे लोकन खुशखबरी शुनानेरू कम मीं सोंफू। 8 जैने परमेशरे पतरस यहूदी केरो प्रेरित भोनेरे लेइ चुनो, तैन्ने अवं भी गैर कौमां केरो प्रेरित भोनेरे लेइ चुनो। 9 जैना मैन्हु कलीसियारे खम्मबे समझे गाते थिये (यानी खास लीडर) मतलब याकूब, कैफा (यानी पतरस) ते यहून्ना तैनेई अनुग्रहेरू तैन वरदान पिशानू जैन मीं मैलोरी थियू। तैनेई अवं ते बरनबास साथी सेमझतां ते असन सेइं हथ मिलेइतां राज़ी भोए। कि अस गैर कौमन मां खुशखबरी प्रचार केरम, ते तैना यहूदीन मां। 10 तैनेई असन कां बिनती की, कि अस यरूशलेमेरे गरीब विश्वासी लोकां केरि मदत केरम, जैन केरनेरी अवं बड़ी इच्छा केरतो थियो। 11 पन ज़ैखन कैफा (पतरस) अन्ताकिया नगरे मां अव, त मीं सेबभी विश्वासी लोकां केरे सामने तैसेरी खलाफ की ते झाड़ दिती, किजोकि जैन तैनी कियोरू थियू तैन गलत थियू। 12 एल्हेरेलेइ कि याकूबेरे पासेरां किछ मैन्हु केरे एजनेरे पेड़ले ते गैर कौमां केरे लोकन साथी खातो थियो, पन

जैखन तैना आए, त खतनो कियोरे लोकां केरे डरे सेइं तैन करां हटो ते अलग भोने लव। 13 ते तैस साथी बाकी यहूदी विश्वासी लोकेई भी पाखंड कियूं, इडी तगर कि बरनबास भी तैन केरे संगती मां शामिल भोव। 14 पन जैखन मीं तैन केरो बर्ताव हेरु, कि तैना खुशखबरोरे सच्चेरे खलाफ चलतन, त मीं सेबभी केरे सामने कैफा (पतरस) सेइं ज़ोवं, “कि जैखन तू यहूदी भोइतां गैर कौमन केरि जेरि चाल चलतस, न कि यहूदी केरि जेरि, त तू गैर कौमन यहूदी केरे रसमन पुड़ चलनेरे लेइ किजो ज़ोतस?” 15 अस जैना ज़मनेरे यहूदिम, ते पैपी गैर कौमां केरे ज़ेरे नई। 16 फिरी भी इन सेमझतां कि मैन्हु मूसेरे कानूनेरे कम्मन सेइं नई, पन सिर्फ यीशु मसीह पुड़ विश्वास केरने सेइं धर्मी भोते, असेई एप्पू भी मसीह यीशु पुड़ विश्वास कियो, कि अस मूसेरे कानूनेरे कम्मन सेइं नई पन यीशु मसीह पुड़ विश्वास केरने सेइं धर्मी भोए, किजोकि मूसेरे कानूनेरे कम्मन सेइं कोई धर्मी न भोलो। 17 किछ यहूदी सोचतन कि असेई पाप कियो, किजोकि असेई धर्मी भोनेरे लेइ कानून मन्नेरे बदले सिर्फ मसीह पुड़ विश्वास कियोरो, त कुन मसीहे अस पापी बनाए, नई, कधी नई। 18 किजोकि जैन किछ मीं बछोडू, अगर तैस फिरी बनेइं, त अपनो आप पापी बनाताई। 19 अवं त कानूने सेइं कानूनेरे लेइ मेरि जेव, कि परमेशरे लेइ ज़ीई। 20 अवं मसीह सेइं साथी क्रूसे पुड़ चढ़ोरोई, ते हुनी ज़ींतो न राव, पन मसीह मीं मां ज़ींतोए, ते अवं जिसमे मां हुनी ज़ींतोई, त सिर्फ तैस विश्वासे सेइं ज़ींतोई, जै परमेशरेरे मट्टे पुड़े, जैन मीं सेइं प्यार कियो, ते मेरे लेइ अपनि जान दिती। 21 अवं इस गल्लरो इन्कार न केरि कि परमेशर अपने अनुग्रहे सेइं बचाते, किजोकि अगर कानून मन्ने सेइं लोक धर्मी भोथे, त मसीहे मरनेरी कोई ज़रूरत न थी।

3 हे बेसमझ गलातियारे लोकव, केने तुस टरे लाए? तुश्शे त मना तुश्शे सामने यीशु मसीह क्रूसे पुड़ चढ़ो! 2 अवं तुसन सिर्फ ई सवाल पुछनो चाताई, कि तुसेई पवित्र आत्मा कुन कानून मन्ने सेइं हासिल कियो? बिलकुल भी नई, तुसेई खुशखबरी शुनी ते तैस पुड़ विश्वास कियूं ते पवित्र आत्मा हासिल की। 3 कुन तुस एरे बेसमझथ, कि पवित्र आत्मा रेति पुड़ शुरू केरतथ ते जिसमेरे रीति पुड़ खतम केरेले? 4 कुन तुसेई सब दुःख बेफैइदो झैल्ले? अवं उमीद केरताई बेफैइदो नई। 5 एल्हेरेलेइ जै तुसन पवित्र आत्मारु दान बड़ जादे देते ते चमत्कार केरते, कुन तै कानून मन्नेरे वजाई सेइं एन केरते या तुसेई खुशखबरी शुनी ते तैस पुड़ विश्वास कियो? 6 हुनी अब्राहमेरे बारे मां सोचा “अब्राहमे परमेशरे पुड़ विश्वास कियो ते तै तैसेरेलेइ धार्मिकता गनो जेव।” 7 एल्हेरेलेइ तुसन एन ज़ान्नेरी ज़रूरते कि जैना अब्राहमेरो ज़ेरो परमेशरे पुड़ विश्वास केरनेबालेन तैन्ना हकीकति मां तैसेरी बच्चेन। 8 पवित्रशास्त्रे मां बड़ पेइलु इन लिखोरूए, कि परमेशर गैर कौमन विश्वासे सेइं धर्मी बनालो, पेइले अब्राहमे ई खुशखबरी शुनाई, “कि तेरे ज़िरिये सेबभी कौमन बरकत मैलेली।” 9 ते जैना अब्राहमेरो

ज़ेरो परमेशरे पुड़ विश्वास केरतन, परमेशर तैन सेबभन बरकत देते जैना मसीह पुड़ विश्वास केरतन जेन्नेरे तैनी अब्राहमे बरकत दिती। 10 एल्हेरेलेइ जैना लोक सोचतन कि तैना मूसेरो कानून मेन्तां धर्मी बनाए गाले, तैन पुड़ परमेशरेरी लानते, किजोकि मूसेरे कानूने मां लिखोरूए, “कि जै कोई कानूने मां लिखोरे सब कानूनेरे मुताबिक न चले, तैस पुड़ परमेशरेरी लानते।” 11 ई गल साफे, कि मूसेरे कानून सेइं परमेशरे कां कोई मैन्हु धर्मी न भोए, “किजोकि जै मैन्हु परमेशरे पुड़ विश्वास केरते, परमेशर तैस धर्मी ठहराते ते तैस हमेशारी ज़िन्दगी मैलतीए।” 12 पन मूसेरे कानूनेरो विश्वासे सेइं कोई वासतो नई; पन “जै तैन मन्नेलो, तै तैन मन्ने सेइं ज़ींतो रालो।” 13 मसीहे जै इश्शे लेइ लानती बनो, तैने अस कीमत देइतां कानूनेरे लानती करां छुटाए किजोकि पवित्रशास्त्रे मां लिखोरूए, “जै कोई क्रूसे पुड़ टंगो गालो तै लानतीए।” 14 मसीहे एन एल्हेरेलेइ कियूं कि गैर कौमां तैसेरे ज़िरिये तैना सैरी बरकतां हासिल केरन, जैन केरो वादो परमेशरे अब्राहम सेइं कियोरो थियो, ते मसीह पुड़ विश्वास केरने सेइं अस पवित्र आत्मा हासिल केरम, जेसेरो वादो तैने कियोरोए। 15 हे ढ़लाव ते बेइन्व, अवं आम ज़िन्दगीरे मिसाल देने लोरोई, जैखन दूई मैन्हु केरो करार जै पक्को भोते, त न कोई तैस टालते ते न तैस मां किछ बढ़ाते। 16 ते सारे वादे परमेशरे अब्राहमे ते तैसेरे खानदाने दिते; पवित्रशास्त्र इन न ज़ोए, “कि वंशां,” कि बड़ां केरे बारे मां ज़ोवं, पन एक्की मैनेरे बारे मां ज़ोवं “कि तेरु वंश इने, ते तै मसीहे।” 17 मेरे ज़ोनेरो मतलब ई आए, परमेशरे अब्राहमे सेइं करार केरनेरां बाद 430 सालन पत्ती मूसे कानून दितो (ताके तैस करारे पक्को केरे), पन अस न ज़ोई बटन कि परमेशरेरो करार टलुटो, तैए करार पक्कोए, तैए तैस पूरो केरेलो। 18 किजोकि परमेशर असन अपनि बरकत एल्हेरेलेइ न दे कि अस मूसेरे कानूनेरे मुताबिक चलतम, पन तै एल्हेरेलेइ देते कि तैनी वादो कियोरोए, परमेशरे अपने अनुग्रहे सेइं अब्राहमे बरकत दिती, किजोकि तैनी पेइलो वादो कियोरो थियो। 19 तैखन, फिरी कानूनेरो कुन मकसद थियो? तैन त पापां केरे वजाई सेइं बाद मां दितू, ताके तैसेरे वंश मसीहेरे एजने तगर राए, जैस सेइं वादो कियोरो थियो, परमेशरे स्वर्गदूतां केरे ज़िरिये मूसे कानून दितो, जै परमेशर ते लोकां केरि बिचवाई केरनेबालो थियो। 20 परमेशरे एप्पू अब्राहमे सेइं वादो कियो। एल्हेरेलेइ हुनी बिचवाई केरनेबालेरी कोई ज़रूरत नई। 21 कुन कानून परमेशरेरे वादां केरे खलाफे? नई, कधी नई! किजोकि अगर एरो कानून दितो गाथो जै हमेशारी ज़िन्दगी देइ बटेथो, त सच्चे धार्मिकता कानून मन्ने सेइं भोथी। 22 पन पवित्रशास्त्रे ज़ोते दुनियारे सब लोक पापेरे अधीन आन, ताके तै वादो जेसेरी बुनीयाद यीशु मसीह पुड़ विश्वास केरनोए, तैस पुड़ विश्वास केरनेबालां केरे लेइ पूरो भोए। 23 पन इस करां पेइले कि लोक मसीह पुड़ विश्वास केरन, मसीहेरे एजने करां पेइले अस यहूदी कैदे मां थिये कानून इश्शी रखवाली केरतो

थियो। ते तैस विश्वास एजने तगर जै बांदो भोनेबालो थियो, अस तैसेरे बन्धने मां रहम। 24 एल्हेरेलेइ कानून मसीह तगर पुजानेरे लेइ असन बत हिरानेबालो ते स्मभालने बालो भोव, कि अस यीशु मसीह पुइ विश्वास केरने सेइं परमेशेरे सामने धर्मी भोम। 25 पन जैखन मसीह अव ते असेई विश्वास कियूं, त असन ज़रूरत न पेई, कि कानून बत हिराए ते मदत केरे। 26 किजोकि तुस सब विश्वास केरने सेइं जै मसीह यीशु पुडे, परमेशेरे बच्चेथ। 27 ते तुसन मरां जेजेई मसीह मां अक भोनेरे लेइ बपतिस्मो नीयो, तुसेई मसीहेरी नर्वीं ज़िन्दगी तेन्चरे लाई जेन्चरे लिगडां लातन। 28 हुनी मसीह मां कोई फर्क नई, चाए कोई यहूदीए या गैर यहूदीए, गुलामे या आज़ाद। कोई फर्क नई मड़े या कुआन्शे, अस यीशु मसीह मां सब बराबर आम। 29 किजोकि तुस मसीह सेइं साथी अक आथ, त अब्राहमेरे बच्चेथ, ते परमेशेरे वादेरे मुताबिक बरकतां केरे वारस भी आथ।

4 अवं मिसाल देइतां ज़ोताई, कि वारस ज़ांतगर बच्चोए, अगर ते सेबभी चीज़ां केरो मालिके, फिरी भी तैस त कने गुलामे मां कोई फर्क नई। 2 पन बाजी केरे ठहरावेर वक्ते तगर सुमालने बालां ते भेन्डैरी केरे हेरगेशी मां रहते। 3 तेन्चरे अस भी जैखन बच्चां केरे जेरे थिये, त दुनियारे रीति रूवाजां ते कानूनेरे गुलाम थिये। 4 पन जैखन ठीक वक्त अव, त परमेशेरे अपनू मटू दुनिया मां भेजू, जैस एककी कुआन्शां ज़र्म दित्तू, तैन यहूदन मां ज़र्म ते तैनी कानून मन्यो। 5 ताके तैन छुटाए ज़ैना मूसेरे कानूनेरे अधीन थिये, ते असन तैसेरे बच्चे भोनेरो अधिकार मैल्ले। 6 ते तुस ज़ैना बच्चेथ, एल्हेरेलेइ परमेशेरे मट्टेरी आत्मा इश्शे दिले मां भेजोरीए, जै आत्मा, “हे बैपू, हे बाजी,” ज़ोती। 7 एल्हेरेलेइ हुनी तू गुलाम नई, पन परमेशेरो बच्चोस, ते जैखन परमेशेरो बच्चोस, त तीं तैन सब मैलेलू जेसेरो वादो परमेशेरे अपने बच्चन देनेरो वादो कियोरोए। 8 जैखन तुस परमेशर न थिये ज़ानते, त तुसन तैन केरे गुलाम थिये, ज़ैना हकीकति मां ईश्वर अर्थी नई। 9 पन हुनी तुश्शो रिश्तो परमेशर सेइं आए, ते तुसेई तै ज़ानो बल्के परमेशेरे अस कबूल किये, ते तैन कमज़ोर ते निक्केमी पेइली गल्लां केरे पासे किजो गातथ, कुन तुस तैन केरे दुबारा गुलाम भोने चातथ? 10 मीं शुनेरूए कि तुस गैर कौमां केरे विश्वासी, यहूदी केरे दिहाइन ते महीन ते खास वक्ते ते सालां केरे तिहारन मन्तथ, इन सोचतां कि परमेशर खुश भोते। 11 अवं तुश्शू एन केरनेरे वजाई सेइं परेशान आई, कि एरु न भोए, कि जै मेहनत मीं तुश्शे लेइ कियोरीए तै बेफैइदी भोए। 12 हे ढ़लाव ते बेइनव, अवं तुसन कां बिनती केरताई, तुस अपने आपे यहूदी केरे कानूने करां आज़ाद केरा, किजोकि मीं अपनो आप आज़ाद कियोरोए जेन्चरे तुस गैर कौमेरे लोक पेइले आज़ाद थिये, तुस पेइले मेरे सामने बड़े रोड़े थी। 13 तुसन याद भोलू, जैखन अवं पेइली बार खुशखबरी शनाने तुसन कां अव त अवं बिमार थियो। 14 ते मेरी जिसमानी हालत जै तुश्शे आज़मैइशरी वजा थी, तुसेई अवं घटिया न समझो ते तुसेई

दूर न कढो बल्के एन्चरे कबूल कियो जेन्चरे परमेशेरो दूत या यीशु मसीह एप्पू। 15 ते तुश्शी तै खुशी मनानी कोरां जेई? अवं सच्चे ज़ोई बटताई, तुस मेरे लेइ सब किछ बलिदान केरनेरे लेइ तियार थिये, इडी तगर कि अपनि एछछी भी। 16 ते कुन तुसन सेइं सच ज़ोनेरे वजाई सेइं अवं तुश्शो बैरी भोरोई। 17 तैना झूठे उस्ताद तुसन दोस्त बनानो त चातन, पन रोड़ी नीती सेइं नई, बल्के तुसन अलग केरने चातन, कि तुस तैन केरे चेले बना। 18 जोशे मां भोनू रोडूए, कि रोड़ी गल्लन मां हर वक्त दोस्त बनानेरी कोशिश की गाए, सिर्फ तैस वक्ते नई जैखन अवं तुसन सेइं साथी राताई। 19 हे मेरे बच्चव, ज़ांतगर तुसन मां मसीहेरू रूप न बने, तांतगर अवं तुश्शे लेइ ज़र्म देने बैली कुआन्शे जेरे तकलीफी मां राताई। 20 अवं त चाताई कि हुनी तुसन कां एइतां मिट्टी ज़बाना गल केरि, किजोकि मेरी समझी मां न एज्जे कि अवं तुसन सेइं कुन केरि। 21 तुस ज़ैना मूसेरे कानूनेरे अधीन भोने चातथ, मीं ज़ोतथ, कुन कानूनेरी गल्लां शुन्नेरे लेइ तियार नई? 22 तैस मां इन लिखेरूए, कि अब्राहमेरां दूई मट्टां थियां; अक गुलाम कुआन्शरू, ते अक जै आज़ाद थी तैसेरू। 23 पन ज़ैन गुलाम कुआन्शरू भोव, तैन आम बच्चां केरू जेरू ज़र्मू, ते ज़ैन आज़ाद कुआन्शरू भोव, तैन परमेशेरे वादेरे मुताबिक ज़र्मू। 24 इना दूई कुआन्शां परमेशेरे दूई करारां केरे रूपे मां कम केरतिन। पेइली कुआन्श हाजिरा सीनै पहाड़े हिराती जैड़ी लोकन कानून मैल्लो, ज़ैन तैन गुलाम बनातू थियूं। 25 हाजिरा मना अरबेरू सीनै पहाड़ेरी जेरी आए, जेसेरी तुलना मौजूद यरूशलेम सेइं केरोतीए, किजोकि तैन अज़ अपने बच्चन यानी अपने लोकन समेत गुलैमी मांए। 26 पन बेयूं यरूशलेम अब्राहमेरे कुआन्श सारारू जेरूए, ते तैसेरे बच्चे गुलाम नई। इन यरूशलेम इश्शे लेइ इश्शे अम्मारू जेरू आए ज़ैसां विश्वास कियो। 27 किजोकि पवित्रशास्त्र ज़ोते, “हे बाँझ, तीं ज़ैसां कथे बच्चे नई ज़ावरे, खुश भो, तीं जैस बच्चो ज़ानेरी तकलीफ नई भोरी; आवाज़ उच्चि केर ते जयजयकार केर, किजोकि शेरोरारी औलाद सुहागनी करां भी जादे।” 28 हे ढ़लाव ते बेइनव, तुस अब्राहमेरे मट्टे इसहाकेरे जेरे आथ, ज़ैन परमेशेरे वादेरे मुताबिक ज़र्मू, अस भी परमेशेरे वादेरे मुताबिक तैसेरे बच्चे बने। 29 ते जेन्चरे तैस वक्ते जै बच्चो आम बच्चां केरो जेरो ज़मोरो थियो, तैस सतातो थियो जै परमेशेरे आत्मा रे मुताबिक ज़मोरो थियो, तेन्चरे अज़ भी अस तैन करां सताव झैल्लतम ज़ैना कानून मेन्तां परमेशेरे सामने धर्मी भोनू चातन। 30 पन पवित्रशास्त्र कुन ज़ोते? “गुलाम कुआन्शी ते तैसेरे मट्टे कढ, किजोकि गुलाम कुआन्शरू मट्टू आज़ादेरे मट्टे साथी वारस न भोलू।” 31 एल्हेरेलेइ हे ढ़लाव ते बेइनव, अस गुलाम कुआन्शरे बच्चे नई, जै कानूने, बल्के आज़ाद कुआन्शरां बच्चेम, जै विश्वासे।

5 मसीहे अस आज़ाद कियोरेम हुनी असन गुलामेरू जेरू यहूदी केरू कानून मन्नेरी ज़रूरत नई, अपने एस ऐज़ेदी मां बनोरे राथ, ते दुबारा अपने आपे कानून मन्नेरे गुलाम भोनेरे लेइ न

देथ। 2 हेरा, अवं पौलुस तुसन सेइं ज़ोताई, अगर परमेशरे सामने धर्मी भोनेरे लेइ खतनो कराले, फिरी जैन मसीहे कियोरू तैसेरो तुसन कोई फैइदो न भोलो। 3 फिरी भी अवं हर एककी सेइं ज़ोताई जै इस उमीदी सेइं खतनो कराते कि परमेशरे सामने धर्मी भोए, तैस कानूनेरो हर हुक्म मन्यो पेनोए। 4 तुस ज़ैना कानून मेन्तां धर्मी भोने चातथ, तुसेईं अपनो आप मसीह करां अलग कियो ते परमेशरे अनुग्रह कबूल केरने करां इन्कार कियो। 5 अवं इन ज़ोई बटताई, किजोकि असन पवित्र आत्मा रे तरफां पूरो भरोसो कि परमेशर असन धर्मी कबूल केरेलो किजोकि अस मसीह पुड़ विश्वास केरतम। 6 ते मसीह यीशु मां न खतनो, न बगैर खतनो किछ कम्मोए, पन सिर्फ विश्वास जै प्यारे सेइं अस्सर केरते। 7 तुस त रोड़ी दौड़ लोरे थिये दौड़ने, तुस केनि रोके, कि सच्चे न मन्यथ। 8 एरी शिखर तुसन परमेशरे नई दित्तोरी ज़ैने तुस अपने बच्चे भोनेरे लेइ कुजोरेथ। 9 झूठी शिक्षा थोड़े ज़ेरे खमीरेरी ज़ेरी ज़ैन सारे सोनोरे अट्टे खमीर केरते। 10 अवं प्रभु पुड़ भरोसो रखताई, कि तुसन झूठी शिक्षा पुड़ विश्वास केरने करां दूर रखे; पन जै तुसन परेशान केरते, ते कोई कि न भोए परमेशर तैस सज़ा देलो। 11 पन हे ढूलाव ते बेइनव, अगर अवं लोकन प्रचार केरतो भोथो कि खतनो केरनो ज़रूरीए, त स्ताव न गाथो। अगर अवं ई प्रचार न केरतो राथो कि मुक्ति सिर्फ मसीहेरे क्रूसे सेइं, त फिरी केन्ची ठोकर न लगेथी। 12 रोडू भोथू कि ज़ैना तुसन टपलातन, तैना अपनो अंग कतेथे। 13 हे ढूलाव ते बेइनव, तुस आज़ाद भोनेरे लेइ कुजोरेथ पन एरु न भोए, कि ई आज़ादी जिसमानी कम्मां केरे लेइ मौको बने, बल्के प्यारे सेइं एककी होरेरे सेवक बना। 14 किजोकि सारो कानून इस्से एककी गल्ली मां पूरो भोइ गाते, “कि तू अपने पड़ोसी सेइं अपनो ज़ेरो प्यार केरा।” 15 पन अगर तुस एककी होरि सेइं लटते ते तंग केरते राथ, त खबरदार राथ, एककी होरेरी बरबादी केरेले। 16 पन अवं ज़ोताई, पवित्र आत्मा रे चलाने सेइं चलेले, त तुस जिसमेरी खुवैइशां कधी पूरी न केरेले। 17 किजोकि जिसम पवित्र आत्मा रे खलाफे, ते पवित्र आत्मा जिसमेरे खलाफ खुवैइश केरते, ते इना एककी होरेरे दुश्मन आन; एल्हेरेलेइ ज़ैन तुस केरनू चातथ तैन न केरि बटथ। 18 ते अगर तुस पवित्र आत्मा रे चलाने सेइं चलतथ त कानूनेरे अधीन न राए। 19 जिसमेरां कम्मां बांदन, मतलब बदमाशी, गंदा कम्मां, चपलूसी। 20 मूरती केरि पूजा, टूनी, बैर, लड़ाई, जलन, सरक, खलाफत, फसाद, विधर्म। 21 नफरत, नशो केरनो, नाज़, ते इन केरे ज़ेरां होरां भी कम्मां आन, ज़ैन केरे बारे मां अवं तुसन पेड़लू ज़ोताई, जेन्चरे पेड़लू भी ज़ोवरूए, कि एरां कम्मां केरनेबाले परमेशरेरे राज़ेरे वारस नई भोने। 22 पन पवित्र आत्मा रो फल प्यार, आनन्द, शान्ति, सबर, ते दया, भलाई, विश्वास, 23 नम्रता, ते बरदाश केरनू; एरां कम्मां केरे खलाफ कोई कानून नई। 24 ते ज़ैना मसीह यीशु मां आन, तैनेई जिसम तैसेरे खुवैइशन सेइं साथी क्रूसे पुड़ चाढ़ोरोए। 25 अगर

पवित्र आत्मां असन नर्वीं ज़िन्दगी दित्तोरीए, त पवित्र आत्मा रे मुताबिक चलम भी। 26 अस घमण्ड न केरम, अस एककी होरि न सरकाम, ते एककी होरि सेइं न जलन केरम।

6 हे ढूलाव ते बेइनव, अगर तुसन पतो चले कि केन्चे कोई पाप कियोरोए, त तुस ज़ैना पवित्र आत्मा रे चलाने सेइं चलतथ, तैस बड़े नेरमी सेइं वापस धार्मिकतारे बत्तां वापस एजनेरी लेइ मदत केरा, ते अपनो भी खियाल रखा, कि तुस भी तैस्से अज़मैइशी मां न पेथ। 2 तुस एककी होरेरी मुशकलन मां मदत केरा, ते एन्चरे मसीहेरो कानून पूरो केरा। 3 अगर कोई अपने आपे खास मैन्हु समझे ते तै सच्चे न भोए, त तै अपने आपे धोखो देते। 4 पन हर कोई अपने कम्मे परखे, ते तैखन तैस होरि केरे बारे मां नई पन अपने बारे मां घमण्ड केरनेरो मौको भोलो। 5 किजोकि हर कोई मैन्हु अपनो भार छूलो। 6 ज़ैन वचनेरी शिक्षा मैलतीए, तैना सब रोड़ी चीज़न मां शिखालेबाले शामिल रखन। 7 धोखो न खाथ, परमेशर ठाठन मां न उड़ाव गाए, किजोकि मैन्हु ज़ैन किछ बेते, तैन्ने कतेलो। 8 किजोकि ज़ै अपने जिसमेरे लेइ बेते, ते जिसमे सेइं विनाशरी फसल कतेलो; ते ज़ै आत्मा रे लेइ बेते, ते आत्मा सेइं हमेशारी ज़िन्दगरी फसल कतेलो। (aiōnios g166) 9 अस रोड़ां कम्मां केरने मां हिम्मत न हारम, किजोकि अगर अस हार न मनमेले त परमेशर अपने वक्ते पुड़ असन इनाम देलो। 10 एल्हेरेलेइ ज़ैडी तगर मौको मल्ले सेबन सेइं भलाई केरा; खास केरतां मसीही लोकन सेइं। 11 हेरा, मीं केत्रे बड़े-बड़े लफसन मां तुसन अपने हथ्थे सेइं लिखोरूए। 12 जेत्रे लोक यहूदन खुश केरने चातन तैना तुसन खतनो कराने लेइ ज़ोतन। तैना एन केरतन कि लोक प्रचार केरनेरे लेइ तैन न स्तान कि परमेशर लोकन सिर्फ एल्हेरेलेइ बचाते कि तैना विश्वास केरतन कि मसीह क्रूसे पुड़ मरोए। 13 किजोकि खतनो करानेबाले एप्पू भी सेबमी कानूने पुड़ न चलन, पन तैना चातन तुस खतनो कराथ, ताके तैना होरि यहूदी केरे सामने घमण्ड केरनेरे काबल भोन, कि तुसेईं तैन केरे वजाई सेइं खतनो कियोरोए। 14 पन मेरे लेइ इने, अगर अवं घमण्ड केरि त सिर्फ इश्शे प्रभु यीशु मसीह पुड़ जै इश्शे लेइ क्रूसे पुड़ मरो। किजोकि तैसेरे मरने सेइं अवं हुनी दुनियारे चीज़ां केरि इच्छां केरो गुलाम न राव, ते तैन मीं पुड़ राज़ केरनेरी कोई शक्ति नई। 15 किजोकि न खतनो, ते न खतनो न भोनो ज़रूरीए, पन ज़रूरी इने, कि परमेशरे तुस पवित्र आत्मा रे कम्मरे ज़िरिये अक नर्वीं इन्सान बनोरेथ। 16 परमेशर तैन सेबन अपनि शान्ति देलो ते तैन बरकत देलो ज़ैना इस नियमं मन्तन, तैना परमेशरेरे लोक आन। 17 अग्रोवं जो कोई मीं दुख न दे, किजोकि मेरे जानी पुड़ ज़ैना दाग आन तैना हिरातन कि अवं यीशु मसीहेरो दास आई। 18 हे ढूलाव ते बेइनव, इश्शे प्रभु यीशु मसीहेरो अनुग्रह तुसन पुड़ भोए। आमीन।

इफिसियों

1 अवं पौलुस परमेशरेरी मेर्जी सेइं यीशु मसीहेरो प्रेरित आई।

अवं तुसन जैना परमेशरेरी लोक आथ ते इफिसुस नगरे मां रातथ ई चिट्ठी लिखने लोरोई। 2 इश्शे बाजी परमेशर ते प्रभु यीशु मसीह करां तुसन अनुग्रह ते शान्ति मैलती राए। 3 इश्शे प्रभु यीशु मसीहेरे परमेशर ते कने बाजी केरि बड़याई भोए, इश्शो रिश्तो मसीह सेइं भोनेरे वजाई सेइं तैने असन हर लिहाजे सेइं तैना आत्मिक बरकतां दित्तोरिन, जैना बरकतां स्वर्गोरां एइतिन। 4 जेन्चरे तैने अस दुनिया बनानेरे पेइली मसीह मां चुने, कि अस तैसेरी नज़री मां प्यारे मां पवित्र ते बेइलज़ाम भोम। 5 किजोकि परमेशरे असन सेइं प्यार कियो, तैनी बड़े पेइले ई फैसलो कियोरो थियो कि तै असन यीशु मसीहेरे ज़िरिये अपने बच्चां केरे रूपे मां गोद ने, किजोकि तै इन केरनू चातो थियो। 6 अस परमेशरेरे अनुग्रहेरे लेइ तैसेरी बड़याई केरतम, जै तैने असन मुफते मां दित्तो, किजोकि इश्शो रिश्तो तैसेरे टलारे मट्टे सेइं आए। 7 परमेशरेरे बड़े अनुग्रहेरे मुताबिक मसीहेरे खूने बगाने सेइं असन छुटकारो मैल्लो, मतलब इश्शे पाप माफ़ भोए। 8 जै तैनी सारे ज्ञान ते समझ सेइं साथी असन पुड़ बड़ो जादे कियो। 9 कि तैने अपनि मेरज़ो भेद, अपने रोड़े इरादेरे मुताबिक असन पुड़ बांदो कियो, जै तैने पूरो केरनो थापोरो थियो। 10 परमेशरेरे ठहरावरे वक्ते पुड़ तै स्वर्ग ते थेरतरी चीज़न साथी आनेलो ते मसीह तैस पुड़ राज़ करालो। 11 मसीह सेइं इश्शो रिश्तो भोनेरे वजाई सेइं परमेशरे अस चुने, तैन हासिल केरनेरे लेइ जेसेरो वादे तैने असन देनेरे लेइ कियोरो थियो। इन बिलकुल तेन्चरे भोव जेन्चरे तैनी बड़े पेइलू पूरू केरनू थापेरू थियूं ते इच्छा कियोरी थी। 12 अस यहूदी पेइले लोक आम जैनेई मसीह पुड़ उमीद रखोरि थी, ते अस चुने जे, ताके परमेशरेरे महिमारी स्तुति केरि बटम। 13 ते तुस भी मसीह सेइं शामिल भोए ज़ैखन तुसेईं सच्चू वचन शुनू, जै खुशखेबरां तुश्शे लेइ मुक्ति आनी, ज़ैखन तुसेईं विश्वास कियो परमेशरे तुसन पुड़ अपनि छाप लाई, ई छाप पवित्र आत्मा आए, जै तैनी असन दित्तो, जेसेरो वादो तैनी कियोरो थियो। 14 पवित्र आत्मा भी छुटकारेरे सैयरो जेरो आए, जै पक्कू केरते कि परमेशरे असन तै विरासत देलो जेसेरो तैनी वादो कियोरोए, ते तैनी अस अपने लोकां केरे रूपे मां धिनोरेम, ताके तैसेरे महिमारी बड़याई भोए। 15 एल्हेरेलेइ, जेइसेरू मीं शुनेरूए कि तुस प्रभु यीशु पुड़ विश्वास केरतथ ते परमेशरेरे सेब्बी लोकन सेइं प्यार केरतथ, 16 तुश्शे लेइ परमेशरेरू शुक्र केरनू न शैरी, ते अपने प्रार्थनान मां तुसन याद केरताई। 17 अवं प्रार्थना केरताई कि परमेशर, इश्शे प्रभु यीशु मसीहेरे महिमा बाले बाजी, तुसन पवित्र आत्मा दे, तै तुसन अक्लमन्द बनालो ते परमेशरे तुसन पुड़ बांदो केरेलो, ताके तुस तैस पिशैनी बटथ। 18 अवं ई भी प्रार्थना केरताई कि तै तुश्शे मने खोलेलो, कि तुस बुझथ कि इश्शे कुजानेरी कुन

उमीद आए, ते केत्री महान ते महिमा बैली बरकतां केरे लेइ परमेशरे अपने लोकन जो वादो कियोरोए। 19 ते तैसेरी शक्ति इश्शे लेइ जैना अस विश्वास केरतम, केत्री महाने, तैसेरी शेक्ते कम्मरे मुताबिक, 20 जैन तैनी मसीहेरे बारे मां कियूं, कि तैस मुड़न मरां जीते केरतां स्वर्ग मां अपने देइने पासे बिशालो। 21 तैड़ी ते हर किसमेरी हकौमत, ते अधिकार, ते शक्ति, ते प्रभुता, ते तैसेरी पदवी हर एक्के अधिकैरी करां तै महान आए, जैना न सिर्फ़ इस जहानी मां, पन एजनेबाले जहानी मां भी आए। (aiōn g165) 22 ते परमेशरे सब किछ मसीहेरे अधिकारे मां कियूं, तैनी सेब्बी चीज़न पुड़ अधिकारी बनेइतां कलीसिया दित्तो। 23 कलीसिया मसीहेरी जान आए, ते तैसेरी भरपूरी जै सेब्बन मां सब किछ पूरू केरतीए।

2 बीतोरे वक्ते मां परमेशरेरे तरफां तुसन कां नर्वीं ज़िन्दगी न थी; तुस अपने पाप ते बुरे कम्मां केरे वजाई मरोरे लोकां केरे जेरे थियो। 2 तैस वक्ते तुस दुनियारे रीति पुड़ चलते थिये, ते तुस अम्बरेरे दुष्ट आत्मा केरे अधिकैरी मुताबिक चलते थी, जेसेरी आत्मा हेजु भी परमेशरेरे हुक्म न मन्नेबाले लोकां केरे मन्न मां कम केरती। (aiōn g165) 3 एन मां अस भी सब पेइले अपने जिसमेरे खुबैइशन मां दिहाड़े कटते थी, ते जिसम, ते मनेरी मर्जी पूरी केरते थी, ते होरि लोकां केरे जेरे स्भाव सेइं बुरे थिये ते परमेशरेरे सज़ारे अधीन थिये। 4 पन परमेशर जै बड़ो दया केरनेबालोए; अपने तैस बड़े प्यारे सेइं, जैस सेइं तैने असन सेइं प्यार कियो। 5 ज़ैखन अस पापां केरे वजाई सेइं मरे लोकां केरे जेरे थिये, तैनी असन ज़िन्दगी दित्ती ज़ैखन तैनी मसीह मुड़न मरां जीतो कियो, परमेशरेरे अनुग्रहे सेइं तुसन मुक्ति मैलोरीए। 6 किजोकि तैनी अस मसीह सेइं साथी मुड़न मरां जीते किये, ते स्वर्गे ठैरन मां तैस सेइं साथी बिशाले। 7 परमेशरे एन कियूं कि एजनेबाले वक्ते मां दुनियारे लोकन हिराए कि तैसेरो अनुग्रह केत्रो महान आए। ई अनुग्रह इश्शे लेइ हिराव, तैने इश्शे लेइ एन कियूं जैना अस यीशु मसीह मां आम। (aiōn g165) 8 किजोकि विश्वासेरे ज़िरिये परमेशरेरे अनुग्रहे सेइं तुसन मुक्ति मैलोरीए, ते तुसेईं अपनो आपे एप्पू नई बच्चावरो बल्के परमेशरेरे दाने सेइं तुस बचोरेथ। 9 ते भले कम्मन सेइं नई, एरू न भोए कि कोई घमण्ड केरे। 10 किजोकि अस परमेशरेरे बनोरेम; ते मसीह यीशु मां तैन भले कम्मां केरे लेइ पैदा कियोरेम, जैना परमेशरे पेइले इश्शे केरनेरे लेइ तियार करां। 11 एल्हेरेलेइ याद केरा, कि तुस जैना ज़रमनेरे गैर कोमरेथ, ते खतनो कियो लोक तुसन जो बगैर खतने बाले ज़ोतन। 12 तुस लोक तैस वक्ते मसीह न थिये ज्ञानते, ते तुस परमेशरेरे चुनोरे इस्पाएली लोक न थिये, ते तुस तैन रोड़ी चीज़न मां हिस्सेदार न थिये जैन केरो वादो परमेशरे यहूदी लोकन सेइं कियोरो थियो, ते न उमीद ते दुनियाई मां परमेशरे करां दूर थिये। 13 पन अक वक्त थियो कि तुस परमेशरे करां दूर थिये, पन हुनी यीशु मसीह मां तैसेरे खून सेइं नेड़े आनोरेथ। 14 किजोकि मसीहे इश्शो मेले कराव, तैने यहूदी ते

गैर यहूदी दुइये अक केरे, ते अलग केरनेवाली दिवार जै मझाटे किजोकि मसीह पुड़ इश्शो विश्वासे, तैसेरे वजाई सेइं अस थी, डोली। 15 मसीहरे क्रूसेरे मौतरी वजाई सेइं, तैनी कानूनेरे परमेशेरी मोजूदगी मां हिम्मत ते भरोसे सेइं साथी एज्जी सारे नियम पूरे तरीके सेइं खतम किये। मसीहरो एरो केरनेरो बटतम। 13 एल्हेरेलेइ अवं बिनती केरताई कि जैना दुःख तुशशे मकसद ई थियो कि दूई टोली केरि अक नव्वी टोली बनाए, जै लेइ मीं पुड़ लोरेन एजने, तैन केरे वजाई सेइं दिलेरी न शैरी, तैस सेइं जुड़ोरी भोए। 16 मसीहरे क्रूसेरी मौतरे जिरिये, तैनी दूई किजोकि इन सब तुशशे फैइंदरे लेइ आए। 14 एल्हेरेलेइ अवं टोली अक की, ते परमेशेरे सेइं तैन केरो मेल कराव, एन्धरे तैस बाजी परमेशेरे कां जैधू केरे भारे प्रार्थना केरताई, 15 तैए यहूदी ते गैर यहूदी केरि दुश्मनी खतम की। 17 ते मसीहे एइतां आए जै स्वर्ग ते धेरती पुड़ रानेवाले विश्वासी लोकां केरो बाजी। तुस गैर कौमरे लोक जैना परमेशेरे करां दूर थिये, ते यहूदी जैना 16 कि तै अपने महिमारे धनेरे मुताबिक तुसन इन दान दे, कि तैसेरे नेडे थिये, दुइयन मेल मिलापेरी खुशखबरी शुनाई। 18 तुस तैसेरी आत्माई सेइं अपनो एनत्रीयां मैन्हु मां शक्ति हासिल केरतां मजबूत भोते गाथ। 17 ते विश्वासे सेइं मसीह तुशशे दिले जिरिये बाजी परमेशेरे कां एज्जी बटतम। 19 एल्हेरेलेइ तुस गैर मां राए, कि तुस प्यारे मां जील छेड़तां ते मुनीयाद छेड़तां, 18 कौमां केरे लोक परदेशी ते मुसाफर न राए, पन परमेशेरे लोकां सब पवित्र लोकन सेइं रोड़्यारे समझनेरी शक्ति हासिल केरा; केरू झुण्ड, ते परमेशेरे घरानेरे भोए। 20 तुस इमारतरे जेरेंथ कि तैसेरी चौड़ाई, ते लमबाई, ते ऊँचाई, ते दुघार केत्रोए। 19 ते जेसेरी बुनीयाद प्रेरित ते नेबी आन ते यीशु मसीह एप्पू तैसेरे अवं प्रार्थना केरताई कि तुस मसीहरे तैस प्यारे सेमझी बटतथ कूनेरो घोड़े। 21 जैस मां सारी इमारत साथी मिलतां प्रभु मां जै समझी करां बेइरे, कि तुस परमेशेरी भरपूरी सेइं भरोते अक मन्दर बनती गातीए। 22 तुस गैर कौमरे विश्वासी लोक भी गाथ। 20 हुनी जै एरो शक्ति बालोए, जै इश्शी बिनती ते समझी परमेशेरे होरि लोकन सेइं साथी शामिल किये जे, किजोकि करां बडू जादे कम केरि बटते, ते तैस शेक्तेरे मुताबिक असन मां तुस मसीह सेइं साथी अक भोरेथ। ताके तुस अक घर बनथ कम केरते, 21 कलीसिया मां, ते मसीह यीशु मां, तैसेरी महिमा जैडी परमेशेरो आत्मा रहते। पीड़ी करां पीड़ी तगर हमेशा भोती राए। आमीन। (aiōn g165)

3 किजोकि परमेशेरे तुशशे गैर कौमां केरे लेइ इन कियोरू, अवं पौलुस तुशशे लेइ प्रार्थना केरताई, अवं कैदे मां आई, 4 अवं जै प्रभुएरी सेवा केरनेरे वजाई सेइं कैदे मां आई, तुसन किजोकि अवं तुशशे लेइ यीशु मसीहरी सेवा केरताई। 2 पक्कू कां बिनती केरताई, कि जेन्धरे परमेशेरे तुस अपने लोक तुसेईं शुनेरूए, परमेशेरे अपने अनुग्रहेरे जिरिये तुसन खुशखबरी भोनेरे लेइ कुजेवरेथ, तैसेरे मुताबिक जिनंदगी भी जीथ। 2 तुसेईं शुनेरूए, परमेशेरे अपने अनुग्रहेरे जिरिये तुसन खुशखबरी मतलब सैरी दीनतां ते नम्रता सेइं साथी, ते सबर केरतां प्यारे शुन्नेरी लेइ मीं जिमेवारी दितोरीए। 3 परमेशेरो छप्पोरो मकसद सेइं एककी होरेरी झल्लां। 3 इस कम्मे मां अपनि पूरी कोशिश बड़ी पेड़लो छपोतो थियो, हालांकी तैनी मीं पुड़ बांदो कियो, केरा ताके तुस मेल मिलापे सेइं राथ, किजोकि पवित्र आत्मा केरि गल्लां आन जैना अवं तुसन चिट्टेरे जिरिये समझानो जिरिये तुस अक कियोरेथ। 4 अस सारे विश्वासी एककी जानरे चाताई। 4 जैस सेइं तुस पेढ़तां बुझी बटतथ, कि अवं मसीहरो अंगां केरे जेरे आम, ते असन सेबन्धन अक्के पवित्र आत्माए तै भेद कोड़ि तगर समझताई। 5 बीतोरे वक्ते मां परमेशेरे ई भेद मैलोरोए; ते तुसन अक्के उमीद दिती, जैखन तुस परमेशेरे लोकन पुड़ बांदो नई कियोरो, पन हुनी पवित्र आत्माए जिरिये लोक भोनेरे लेइ चुने जे। 5 अक्के प्रभुए जै यीशु मसीहे, जैस अपने पवित्र प्रेरितन ते नेबन पुड़ बांदो कियो। 6 परमेशेरो पुड़ अस सब विश्वास केरतम, ते असेईं सेबन्धन अक्के बपतिस्मो मकसद ई आए, खुशखबरे जिरिये यीशु मसीहे सेइं तैन केरो मैल्लो। 6 ते अक्के परमेशेरे, जै सेबन्धी केरो बाजीए, तैए सेबन्धन रिशतो भोनेरे वजाई सेइं गैर कौमां केरे लोक तैस्से विरासती पुड़ राज़ केरते ते इश्शे दरमियान कम केरते, ते असन सेबन्धन मां हिसेदार भोले, ते तैना तैस्से जानरे अंग आन, जेसेरो वादो मां परमेशेरे यहूदन सेइं कियोरो। 7 परमेशेरे अनुग्रह ते बेड़ि शक्ति लेइ अलग-अलग किसमेरी काबलीत दितोरीए। 8 एल्हेरेलेइ सेइं मीं ते खुशखबरी प्रचार केरनेरो लेइ सेवा केरनेरो खास पवित्रशास्त्र जोते, “जैखन ते उच्चे पुड़ च़ाढ़ो, ते तैने बड़े कैदी अधिकार दितोरोए। 8 चाए अवं परमेशेरे सेबन्धी लोकन मरां एप्पू सेइं साथी ने, ते तैने लोकन बेड़ि बरकतां दिती।” 9 (तैसेरे निकड़े करां निकोड़ोई। परमेशेरे मीं पुड़ अनुग्रह कियो, कि अवं उच्चे च़ढ़नेरो साफ मतलब ई आए, कि मसीह धेरतेरे बुनीयें गैर कौमन खुशखबरी शुनेई बेटि कि मसीह हमेशारी बरकतां केरो ठारन मां ओरो थियो। 10 एल्हेरेलेइ मसीह बुन ओरो थियो, तैए देनेवालोए। 9 अवं इस भेदेरे मकसदेरे बारे ज़ोनेरे लेइ चुनोरोई, आए जै सैरी अम्बरे करां भी उबरो जेव, मसीहे एन एल्हेरेलेइ जै परमेशर हर चीज़ बनानेवालोए तैनी शुरू करां छप्पोरो रखोरो कियूं ताके सब किछ तैसेरे हज़ूरी सेइं भरपूर भोए। 11 ते तै थियो। (aiōn g165) 10 ताके हुनी कलीसियारे जिरिये सेइं, मसीहे ज़ैने (कलीसियाई) जिमेवारी दिती, तैने किछ प्रेरित परमेशेरू बडू ज्ञान, अम्बरेरे तैन प्रधान ते अधिकैरन पुड़ बांदू किछ नबी, किछ खुशखबरी शुनाने वाले, किछ रखवाले ते किछ कियूं गाए। 11 परमेशेरे दुनिया बनानेरे पेड़लो इन्ने थापेरू थियूं उस्ताद चुने। 12 मसीहे अपने लोकन इना जिमेदारी एल्हेरेलेइ ज़ैन तैने इश्शे प्रभु यीशु मसीह मां पूरू कियूं। (aiōn g165) 12 दित्तोरिन, कि कलीसिया ज़ै मसीहरी जाने तरक्की केरे। 13

जैखन कि अस सब विश्वास, ते परमेशरें मट्टेरी पिशानी मां भेरतां ज़िन्दगी जीथ, जेन्चरे मसीहे भी तुसन सेइं प्यार कियो; अक भोम, ते ज्ञातगर अक सिद्ध मैन्हु न भोम ते मसीहें कदेरे अनदाजे तगर न पुजाम। 14 ताके अस अग्रोंव जो बच्चां केरे जेरे न रहम, जैना मैन्हु केरि ठगनेरी गल्लां ते च़लैकी सेइं तैन केरे कोशिशि सेइं खियालां केरि ते शिक्षारी हर एक्की बयाने सेइं उछड़ाए, ते इरां उरां घुमाए गाते भोन। 15 बल्के प्यारे सेइं सत्र जोइतां, सेब्भी गल्लन मां मसीहें जेरे सिद्ध भोथ जै न, बल्के तुसेईं परमेशरें शुक्र कियोरू लोड़े। 5 किजोकि तुस कलीसियारी क्रोड़ी। 16 जैस सेइं सारी जान सेब्भी जोड़ां केरि मदी सेइं साथी मिलतां, ते साथी जुड़तां तैस अस्सरेरे मुताबिक जै सेब्भी हिसन सेइं भोइतां, अपने आपे बढ़ाते, कि तै प्यारे मां तरक्की केरतो राए। 17 एल्हेरेलेइ अव इन ज़ोताई, ते प्रभु मां खबरदार केरताई कि जेन्चरे गैर विश्वासी लोकां केरे लोक अपने मनरे बेकार खियालन पुड़ चलतन, तुस अजेरे बाद तेन केरे जेरे न च़ला। 18 किजोकि तैना बेसमझ भोरेन, ते तै अज्ञानतारी वजाई सेइं ते सखत मनरे वजाई सेइं तैना तैस ज़िन्दगी करां दूर आन जै परमेशर देते। 19 ते तैना बेशर्म भोइतां, एशे मां लेगि जे, कि सेब्भी किसमेरां गन्दां कम्मां शोके सेइं केरन। 20 पन तुसन मसीहेरी एरी शिक्षा नईं मैल्लोरी। 21 बल्के मीं पूरू याकीने कि जैखन तुसेईं यीशुएरे बारे मां अपने उस्तादन करां शुन्तू, त तुसेईं तैन करां सच्ची शिक्षा शिख्वी। 22 कि तुस पेइले चाल चलनेरे पुरानी इन्सानयती जै टपलाने बैली इच्छां केरे मुताबिक भ्रष्ट भोइ गातीए, खोल्ला। 23 इसेरे बदले पवित्र आत्मा तुशे खियालन ते नज़िरियो बदले। 24 परमेशरे तुसन नव्वों स्वभाव दित्तोरोए, जै तैसेरे स्वभावेरे जेरो आए। त तुस नव्वें स्वभावेरे जेरे जीथ। सच्चे तुस धर्मी ते पवित्र भोथ। 25 एल्हेरेलेइ झूठ जॉन शेरतां हर कोई अपने पड़ोसी सेइं सत्र जोए, किजोकि अस एप्पू मामेइं एक्की जानेरे अंग आम। 26 अगर तुस क्रोधे मां भोथ खबरदार राथ, कि पाप न केरथ, दिहाड़ो डुबने तगर तुशे क्रोध मुक्की गाए। 27 ते शैताने मौको न देथ कि तै तुशे अज़मैइश केरे। 28 च़ोरी केरनेबालो फिरी च़ोरी न केरे; बल्के इमानदेरी सेइं अपने हथ्यन सेइं मेहनत केरे; एल्हेरेलेइ जैस ज़रूरत भोए तैस देनेरे लेइ तैस कां किछ भोए। 29 कोई गन्दी गल तुशे ज़बाना न निस्से, पन ज़रूरतरे मुताबिक तैने ज़ोथ, जैन होरि केरे लेइ विश्वासे मां मज़बूती सेइं बढ्नेरी वजा भोए। तैखन जैन तुसेईं ज़ोवं तैन लोकां केरे लेइ रोडू भोलू जैना तुशे शून्तन। 30 ते जैन किछ तुस केरथ तैसेरे वजाई सेइं परमेशरें पवित्र आत्मा दुखी न केरा, जैस सेइं तुसन पुड़ छुटकारेरे दिहाड़े लेइ छाप दित्तोरीए। 31 सेब्भी किसमेरी टलइठार ते प्रकोप, ते क्रोध, सखत गल, ते तुहीन ते सारो बैर-भाव सेइं तुस दूर कियोरथ। 32 ते एक्की होरि पुड़ दया केरा, ते माफ़ केरनेबाले भोथ, ते जेन्चरे परमेशरे मसीह मां तुशे पाप माफ़ किये, तेन्चरे तुस भी एक्की होरेरे पाप माफ़ केरा।

5 एल्हेरेलेइ तुस परमेशरें बच्चेथ जैन सेइं तै प्यार केरते, तैसेरे जेरे बन्नेरी कोशिश केरा। 2 होरि केरे लेइ प्यारे सेइं

भेरतां ज़िन्दगी जीथ, जेन्चरे मसीहे भी तुसन सेइं प्यार कियो; ते इशे लेइ अपनो आप रोड़ी मुशकरे लेइ परमेशरें कां च़ेढ़तां बलिदान केरो। 3 ते जेरू परमेशरें लोकां केरे लेइ ज़रूरीए, तेन्चरे तुसन मां भी बदमाशी, ते कोन्ची किसमेरू बुरू कम न भोए, या लालचरे बारे मां गल भी न भोए। 4 ते न बे शरमी, न बेसरी गल्लां, न मेवजेरी गल्लां, किजोकि इना गल्लां शोभन्न न, बल्के तुसेईं परमेशरें शुक्र कियोरू लोड़े। 5 किजोकि तुस इन ज्ञानतथ, कि कोन्ची बदमाश, या भिट्टो मैन्हु, या लालची मैनेरो जै मूरती पूजा केरनेबालोए, मसीह ते परमेशरें राज़े मां तैसेरो कोई हिस्सो नईं। 6 कोई तुसन ई सल्लाह देइतां धोखो न दे, कि परमेशरे हकीकति मां तैन सज़ा न देलो जैना एरे पाप केरतन। 7 एल्हेरेलेइ तैन केरू साथ न रखा। 8 किजोकि तुस त पेइले आंधरू थी, पन हुनी प्रभु यीशु मां लोआथ, ते लोअरे बच्चां केरे जेरे च़ला। 9 (किजोकि लोअरो फल सेब्भी किसमेरी भलाई, ते धार्मिकता, ते सच्चे)। 10 ते इन तोप्पां कि प्रभु कुन रोडू लगते। 11 ते आंधरेरां ते बेकार कम्मन मां शामिल न भोथ, बल्के लोकन इन हिराथ कि इना कम्मां बुरन। 12 किजोकि गैर विश्वासी लोकां केरां छपोरां कम्मां केरि गल केरनि भी शर्मासी गल आए। 13 जैखन लौ कोन्ची चीज़ी पुड़ चमकती त हर कोई लेइ बटते कि इन केरू, किजोकि जैखन लौ किछ हिराती, त तै चीज़ एप्पू लौ भोइ गातीए। 14 एल्हेरेलेइ एन्चरे ज़ोवं गाते, “हे झुलने बाला उठ ते मुड़दन मरां जीतो भो, ते मसीहेरी लौ तीं पुड़ चमकेली।” 15 एल्हेरेलेइ रोड़े च़ारे हेरा, कि केरि ज़िन्दगी जीने लोरेथ। बेअक्लां केरि जेरे नईं पन अक्लमन्दा केरि जेरे ज़िन्दगी जीथ। 16 ते मौको कीमती समझा, किजोकि दिहाड़े बुरेन। 17 एल्हेरेलेइ बेअक्ल न बना, पन ध्याने सेइं समझा, कि प्रभुएरी तुशे लेइ कुन मर्जी? 18 ते शराब पीने मां मतवाले न भोथ, किजोकि एस सेइं बदचलनी भोतीए, पन पवित्र आत्मा सेइं भरोते राथ। 19 ते एप्पू मामेइं परमेशरें भजन ते स्तुति केरते ते आत्मिक गीत ज़ोथ, ते अपने-अपने मने मां प्रभुएरे लेइ गीत ज़ोथ ते किरतन केरते राथ। 20 ते सदा सेब्भी गल्लां केरे लेइ प्रभु यीशु मसीहें नव्वे सेइं बाजी परमेशरें शुक्र केरते राथ। 21 ते मसीहें डरे सेइं एक्की होरेरे अधीन राथ। 22 हे कुआन्शव, अपने-अपने मुन्शां केरे अधीन राथ, जेन्चरे प्रभुएरे। 23 किजोकि मुन्श त कुआन्शरी क्रोड़ी जेन्चरे मसीह कलीसियारी क्रोड़ी, ते मसीह कलीसियारो मुक्ति देनेबालोए जै तैसेरी जाने। 24 जेन्चरे कलीसिया मसीहें अधीने, तेन्चरे कुआन्शां भी हर गल्ली मां अपने-अपने मुन्शेरे अधीन रान। 25 हे मुन्शव, अपने-अपने कुआन्शन सेइं प्यार केरा, जेन्चरे मसीहे भी कलीसिया सेइं प्यार केरतां अपनो आप तैसेरेलेइ दित्तो। 26 ताके तैस वचनेरे ज़िरिये पैनरे निहाने सेइं शुद्ध केरतां पवित्र बनाए। 27 ते तैस अक एरी महिमा बाली कलीसिया बनेइतां एप्पू कां खड़ी केरे, जैस मां न कोई दाग, न धबो, न कोई एरी चीज़ भोए, बल्के पवित्र ते बेइलज़ाम भोए। 28 एन्चरे मुन्श अपने कुआन्शी सेइं अपने

जानी बराबर प्यार केरे। जै अपने कुआन्शी सेइं प्यार करते, तै जोई बेटि। 20 एल्हेरेलेइ अवं शंगलन सेइं बन्धोरो राजदूतेरो जेरो एप्पू सेइं प्यार करते। 29 किजोकि कोन्चे कधी अपने जानी सेइं सेवा करनेबालोई। प्रार्थना केरा कि जेन्चरे मीं शुनावरू लोड़े, बैर नई रखोरो, बल्के तैसेरी हेरगेश कियोरीए, जेन्चरे मसीहे भी तेन्चरे अवं दिलेरी सेइं खुशखबरी शुनेई बेटि। 21 तुस भी, अवं कलीसियाई सेइं केरते। 30 एल्हेरेलेइ अस मसीहेरें जानरे अंगां जोई बटताई ते कुन केरने लोरोई, इस सेइं बुझा। तुखिकुस जै केरे जेरे आम। 31 जेन्चरे पवित्रशास्त्र जोते “एल्हेरेलेइ मड़द तुसन सब किछ ज़ोलो। तै इश्शो ट्लारो साथीए, ते प्रभु मां अम्मा बाजी शैरतां अपने कुआन्शी सेइं मिलोरो रालो।” 32 ई वफादार सेवके। 22 तै मीं तुसन कां एल्हेरेलेइ भेजोरोए, कि भेद त बड़ोए; पन अवं मसीह ते कलीसियारे बारे मां ज़ोताई। तुस इश्शी हालती ज्ञानतथ, ते तै तुश्शे मन्न मां हिम्मत दे। 23 33 पन तुसन मरां हर कोई अपने कुआन्शी सेइं एप्पू बराबर अवं प्रार्थना केरताई कि इश्शो बाजी परमेशरे ते प्रभु यीशु मसीह प्यार केरे, ते कुआन्श भी अपने मुन्शेरो इज़्जत केरे। तुसन विश्वासी लोकन शान्ति दे, ते तैना तुसन एककी होरि सेइं प्यारे मां ते मसीह पुड़ विश्वासे मां बनोरे रानेरे वजा भोन। 24 जैना इश्शे प्रभु यीशु मसीह सेइं सच्चो प्यार केरतन, तैन सेब्भन पुड़ अनुग्रह भोतो राए।

6 पवित्रशास्त्र जोते, “अपने अम्मा ते बाजी केरि आदर केरा, तैखन तुश्शू भलू भोलू ते दुनियाई मां तुश्शी लम्मी उमर भोली।” ई पेड़लो हुक्मे जैस सेइं परमेशरे वादो कियोरोए, त बच्चव इन तुश्शे लेइ रोड़ू आए, तुस जैना प्रभु यीशु पुड़ विश्वास केरतथ, अपने अम्मा बाजी केरू ज़ोनू मन्ना। 4 ते हे बच्चन बालव, अपने बच्चन न सरकाथ, पन प्रभुएरी शिक्षा ते खबरदारी देइतां, तैन केरि हेरगेश केरा। 5 हे गुलामाव, जैने लोक दुनियारे मुताबिक तुश्शे मालिकन, अपने मनरे सचैई सेइं डरते, ते थरकते, ते जेन्चरे मसीहेरो तेन्चरे तैन केरो भी हुक्म मन्ना। 6 ते मैन्हु खुश केरेने बालां केरि जेरे हिरानेरे लेइ सेवा न केरा, पन मसीहेरे दासां केरे जेरे मने सेइं परमेशरेरी मेज़ीं पुड़ चला। 7 ते तै सेवा मैन्हु केरि नई, पन प्रभुएरी ज़ैनातां केरा। 8 किजोकि तुस ज्ञानतथ, कि जै कोई जेरू रोड़ू कम केरेलो, चाए गुलाम भोए, चाए आज्ञाद; तैस प्रभु करां तेरहु इनाम मैलेलू। 9 एन्चरे हे मालिकव, तुस भी धेमकी शैरतां अपने नौकरन सेइं रोड़ो बर्ताव केरा, किजोकि तुस ज्ञानतथ, कि तैन केरो ते तुश्शो दुइयां केरो मालिक स्वर्गें मांए, ते तै केन्चेरी तरफदारी न केरे। 10 आखरी मां तुस प्रभुएरी शक्ति बाले शेक्ति मां मज़बूत बना। 11 परमेशरेरे सारे हथियार बन्धा; ताके तुस शैतानेरे सारे मन्सूबां केरो मुकाबलो केरि बटतथ। 12 किजोकि इश्शी ई लड़ाई, खुने या मांसे सेइं यानी मैन्हु केरे खलाफ नई, बल्के प्रधान्न सेइं, ते अधिकैरन सेइं, ते इस दुनियारे आंधरेरे हाकिमन सेइं ए, ते तैस दुष्टेरे आत्मिक फौजन सेइं ए जैना आसमाने मां आन। (aiōn g165) 13 एल्हेरेलेइ परमेशरेरे सारे हथियार बन्धा, ताके तुस जेइस बुरे दिहाइन एजन त तुस सामनो केरि बटतथ, ते सब किछ पूरू केरतां मज़बूत राथ। 14 परमेशरेरे सच्च्य़ाई पटकेरी जेरि अपने कमरी सेइं बन्धा, ते धार्मिकतारी झिलम लेइतां, 15 ते पवन्न मां मेलेरे खुशखबरी शुनानेरे तियैरारे बूट लाथ। 16 ते तैन सेब्भन सेइं साथी विश्वासेरी ढाल धिन्तां मज़बूत भोथ जैस सेइं तुस तैस शैतानेरे सब ज़लते तीर हिशेई बटथ। 17 ते मुक्तरो टोप, ते आत्माारी तलवार ज़ैन परमेशेरू वचने, नेथ। 18 ते हर वक्त ते हर किसमे सेइं जै पवित्र आत्मा चलाने सेइं प्रार्थना ते बिनती केरते राथ, ते बींझे राथ, कि सब परमेशरेरे लोकां केरे लेइ लगातार बिनती केरा। 19 ते मेरे लेइ भी, कि मीं वचन शुनानेरे वक्त हिम्मत भोए, कि अवं दिलेरी सेइं खुशखबरारो भेद

फिलिप्पियों

1 अवं पौलुस, त कने तीमुथियुस, यीशु मसीहेरे दास आम। इश्शे तरफां सेबभी पवित्र लोकां केरां नंवां, जैना मसीह यीशु मां भोइतां फिलिप्पी नगरे मां रातन, रखवालन ते सेवकन समेत, 2 इश्शे बाजी परमेशर ते प्रभु यीशु मसीहे करां तुसन अनुग्रह ते शान्ति मैलती रा। 3 अवं जैखन-जैखन तुसन याद केरताई, तैखन-तैखन अपने परमेशरेरु शुक्र केरताई। 4 ते जैखन भी तुश्शे सेबभी केरे लेइ बिनती केरताई, ते हमेशा आनन्दे सेइं प्रार्थना केरताई। 5 किजोकि तुस पेइले दिहैडे करां अज तगर यीशु मसीहेरी खुशखबरी फैलाने मां मीं सेइं साथी शामिल रावेरथ। 6 ते मीं इस गल्लरो भरोसोए, कि परमेशरे तुसन मां रोडे कम्मरी शुरुआत कियोरीए, तैए तैस कम्मे यीशु मसीहेरे वापस एजनेरे दिहाडे तगर पूरू केरेलो। 7 इन जेइजे, कि अवं तुसन सेबभी केरे लेइ एरू सोची, किजोकि तुस मेरे मने मां बस्सोरेथ, ते मेरे कैदे मां खुशखबारे लेइ जुवाब ते सबूत देने मां तुस सब मीं सेइं साथी अनुग्रहे मां मीं साथिथ, 8 इस मां परमेशर मेरो गवाहे, कि अवं यीशु मसीहेरो जेरो प्यार केरतां तुश्शे सेबभी केरू लालच केरताई। 9 ते अवं ई प्रार्थना केरताई, कि तुश्शो प्यार ज्ञान ते सेबभी किसमेरो जमीर सेइं हारे भी बढते गाथ। 10 इडी तगर तुस रोडी करां रोडी गल्लां टलाएरी बुझा, ते मसीहेरे दिहाडे तगर सच्चे बनोरे राथ; ते ठोकर न खाथ। 11 ते तैस धार्मिकतारे फले सेइं जै यीशु मसीहेरे जिरिये भोते, भरोते गाथ जैस सेइं परमेशरेरी महिमा ते बड्याई भोती रा। 12 हे ढ्वाव ते बेइनव, अवं सन्न जोताई, कि तुस इन ज्ञाना, कि मीं पुइ जै बीतोरीए, तैस सेइं खुशखबारी बडोतरी भी भोइ। 13 इडी तगर कि महाराजेरी सारी फौज ते बाकी सारे लोकन मां इन बांदू भोव कि अवं मसीहेरे लेइ कैद मां आई। 14 ते प्रभु यीशु मां जैना ढ्वाव आन, तैन मरां बडे मेरे कैद भोनेरे वजाई सेइं आन, तैना हिम्मत केरतां परमेशरेरो वचन बेधड़क भोइतां ते दिलेरी सेइं शुनानेरी कोशिश केरतन। 15 किछ लोक त जलन ते लडैई सेइं मसीहेरो प्रचार केरतन ते किछ लोक सच्चे दिले सेइं। 16 किछ त इन सेमझतां कि अवं खुशखबारे लेइ जुवाब देने लेइ ठेरावरोई प्यारे सेइं प्रचार केरताई। 17 पन तैना हारे लोक साफ दिले सेइं नई पन जलनी सेइं मसीहेरो प्रचार केरतन, इन सेमझतां कि मेरे कैद मां मेरे लेइ मुसीबत बधान। 18 त कुन भोव? सिर्फ इन, कि हर बतां चाए बुरे खियाले सेइं, चाए सचैई सेइं, मसीहेरे बारे मां खुशखबरी प्रचार भोतीए, ते अवं इस सेइं खुश आई, ते खुश भी रेइलो। 19 किजोकि अवं ज्ञानताई, कि तुश्शी प्रार्थनाई सेइं, ते यीशु मसीहेरी आत्मार दाने सेइं इसेरो नितीजो मेरी मुक्ति भोली। 20 अवं त दिले सेइं इन चाताई, ते ई उमीद रखताई, कि अवं कोन्ची गल्ली मां न छिथोई, बल्के जेन्चरे मेरी बडी दिलेरी सेइं मसीहेरी बड्याई मेरे जिसमे सेइं भोती राई, तेन्चरे हुना भी भोए चाए अवं जीतो रेइ या मेरी। 21 किजोकि मेरे लेइ जीतू रानू

मसीहे, ते मरनू फैइदोए। 22 पन अगर जिसमे मां जीतू रानू मेरे कम्मरे लेइ फैइदेमदे त अवं न जैनी, कि केस चुनी। 23 किजोकि मीं दुइयां केरे मझाटे चुने मां मुशकिल भोने लोरीए। अवं मरनू चाताई ताके स्वर्ग मां मसीह साथी रेइ बेदि, किजोकि इन बडू जरूरीए। 24 पन तुश्शी मद्दत केरनेरे लेइ मेरू जीतू रानू बडू जरूरीए। 25 एल्हेरेलेइ कि मीं इलहेरो भरोसोए ते अवं ज्ञानताई कि अवं जीतो रानोई, बल्के तुसन सेबभन सेइं साथी रानोई जैस सेइं अवं तुश्शी मद्दत केरि, कि विश्वास मां मजबूत भोथ, ते इस मां खुश राथ। 26 जैखन अवं तुसन कां दुबारा एज्जी, तुसन कां जादे वजा भोली यीशु मसीह पुइ घमण्ड केरनेरी एल्हेरेलेइ जैन किछ ते मेरे जिरिये केरने लोरोए। 27 सिर्फ एतू केरा कि तुश्शो चालचलन मसीहेरे खुशखबारे काबल भोए। चाए अवं तुसन एइतां हेरी, चाए न एज्जी, तुश्शे बारे मां इन शुनी, कि तुस अक मन भोइतां बनोरे रातथ, ते अकोट्टे भोइतां खुशखबारे विश्वासेरे लेइ मेहनत केरते रातथ। 28 ते कोन्ची गल्ली मां खलाफत केरनेबालन करां न डराथ। ई तैन केरे लेइ बरबाद भोनेरो साफ निशाने, पन तुश्शे लेइ मुक्तरो, ते इन परमेशरेरे तरफां आए। 29 किजोकि मसीहेरे वजाई सेइं तुसन पुइ ई अनुग्रह भोव कि न सिर्फ तैस पुइ विश्वास केरा पन तैसेरेलेइ दुःख भी झैल्लां। 30 ते तुसन तेन्चरे मुसीबत केरनीए, जेन्चरे तुसेईं मीं करां केरते लोरीए, ते हुना भी शुन्तन, कि अवं तेन्चरे केरताई।

2 अगर मसीह मां किछ तसल्ली ते प्यारे सेइं हिम्मत ते आत्मा मीजूदगी, ते किछ दर्द ते दयाए। 2 ते मेरो ई आनन्द पूरो केरा कि अक्के मन राथ ते अक्के प्यार, ते अक्के खियाल, ते अक्के सोच रखा। 3 खुदगरज या झूठी बड्यैयरे लेइ किछ न केरा पन नर्म भोइतां एक्की होरि एप्पू करां रोडो समझा। 4 तुसन मरां हर कोई सिर्फ अपने भलैइयरे लेइ न सोचे, बल्के होरि केरि भलैइयरे लेइ भी सोचे। 5 जेन्चरे यीशु मसीहेरो सुभाव थियो तेन्चरे तुश्शो भी भोए। 6 जैने परमेशरेरे बराबर भोइतां भी परमेशरेरे बराबर भोने अपने कब्जे मां रखनेरी चीज न समझू। 7 बल्के अपनो आप खाली केरो, ते गुलामेरू रूप धारण केरू, ते मैनु केरे जेरो बनो। 8 ते मैनेरे रूपे मां बांदो केरतां दीन केरो, ते इडी तगर हुक्म मन्ने बालो राव, कि मौत, हाँ, क्रूसेरे मौत भी झैल्ली। 9 एल्हेरेलेइ परमेशरे तै बडो महान भी केरो, ते तैस तैन नवं दितू जैन सेबभी नंवन करां बडूए। 10 कि स्वर्ग मां ते थेरती पुइ ते थेरतलरे बुने; तैना सब यीशुएरे नंवे पुइ जैथूए टेकन। 11 ते बाजी परमेशरेरी महिमारे लेइ हर अक जिभ मन्ने कि यीशु मसीह प्रभुए। 12 ते हे मेरे ट्वाख, जेन्चरे तुस सदा हुक्म मन्ने ओरेथ, तेन्चरे हुना भी न सिर्फ मीं सेइं साथी रेइतां पन खास केरतां जैखन अवं दूर भोताई फिरी भी डरते राथ ते थरकते अपने मुक्तू कम पूरू केरते गाथ। 13 किजोकि परमेशर जै तुसन मां कम केरते, ते तुसन इच्छा ते शक्ति तैन केरनेरे लेइ देते, जैस सेइं ते खुश भोते। 14 त सब कम्मां बगैर शकैइतां ते बगैर बेसी सेइं केरा। 15 ताके तुस बेइलजाम ते शरीफ भोइतां टारे ते

ढीठ लोकन मां परमेशरे बेइलज़ाम बच्चे बना, जैन मां तुस फैइदेरी थी तैना मीं मसीहेरे खातर नुकसान सैमझोरिन। 8 जिन्दगरो वचन घिन्तां दुनियाई मां बलते दीयां केरे जेरे लेइहोते रातथ, 16 कि मसीहेरे वापस एजनेरे दिहाड़े घमण्ड केरनेरी वजा भोए, कि न मेरी दौड़-धूप ते न मेरी मेहनत बेकार भोए। 17 अगर मीं तुशे विश्वासरे बलिदाने या सेवारे लेइ अपनो खून भी बगानो पे, त फिरी भी अवं खुश आई, ते तुसन सेब्वी साथी खुश आई। 18 तेन्चरे तुस भी खुश भोथ, ते मीं साथी आनन्द केरा। 19 मीं प्रभु यीशु मां उमीदे, कि अवं तीमथियुसे तुसन कां जल्दी भेजेलो, ताके तुशो हाल शुन्तां मीं शान्ति मैल्ले। 20 किजोकि मीं कां एरे जेरे सुभावरो कोई नई, जै साफ दिले सेइं तुशु फिक्क केरे। 21 किजोकि सब अपने फैइदो तोपतन, न कि यीशु मसीहे। 22 पन तुसेईं ते परखो ते पिशानो भी, कि जेन्चरे मट्टू बाजी साथी केरते, तेन्चरे तैनी मीं सेइं साथी खुशखबरी फैलाने मां मीं सेइं साथी मेहनत केरि। 23 ते मीं उमीदे, कि जेखन मीं पतो चलेलो कि मेरी कुन हालत भोली, तैखन अवं तैस लूशी भेजेलो। 24 ते मीं प्रभु मां भरोसोए, कि अवं एण्णू भी जल्दी एज्जेलो। 25 पन मीं इपफ्रुदीतुस जै मेरो द्वालाए, ते मद्दतगार, ते साथी योधो ते तुशो दूते, ते ज़रूरी गल्लन मां मेरी सेवा टेल केरनेबालोए, तुसन कां भेज्जो ज़रूरी समझो। 26 किजोकि तैसेरो मन तुसन सेब्वन मां लगगोरो थियो। एल्हेरेलेइ बे चैन रातो थियो किजोकि तुसेईं तैसेरे बिमरारो हाल शुनोरो थियो। 27 ते ते सच्चे बिमार त भोरो थियो, इड़ी तगर कि मरने पुड़ थियो, परमेशरे तैस पुड़ दया की; ते सिर्फ तैस्से पुड़ नई, पन मीं पुड़ भी, कि मीं दुःखे पुड़ दुख न भोए। 28 एल्हेरेलेइ अवं तैस भेज्जनेरी होरि भी कोशिश केरि, तुस फिरी तैस सेइं मिलतां खुश भोइयथ ते मेरो भी दुःख घटे। 29 एल्हेरेलेइ तुस प्रभु मां बड़े आनन्दे सेइं तैस सेइं मुलाकात केरा, ते एरे जेरे लोकां केरि आदर केरा। 30 किजोकि तैए मसीहेरे कम्मरे लेइ अपनि जान खतरे मां छेड़तां मौतरे नेड़ो पुजोरो थियो, ताके जै घाटो तुशे तरफां मेरी सेवा मां भोव, तैस ते पूरो केरे।

3 हे मेरे द्वालाव ते बेइनव, प्रभु मां आनन्दित राथ, तैना गल्लां तुसन बार-बार लिखने मां मीं त कोई कष्ट न भोए, ते इस मां तुशु सलामतीए। 2 तैन बुरां कम्मां केरनेबाले लोकन करां हुशार राथ, जैना खुवार कुतरां केरे जेरे खाने बालां आन। 3 किजोकि खतने बाले त असां आम जैना परमेशरेरे आत्मारो चलाने सेइं चलतम ते आराधना केरतम ते मसीह यीशु पुड़ घमण्ड केरतम ते जिसमे पुड़ भरोसो न रखम। 4 पन अवं त जिसमे पुड़ भरोसो रेख्खी बटताई अगर कोन्ची होरि जिसमे पुड़ भरोसो रखनेरो वचार भोए, त अवं तैस करां भी जादे रेख्खी बटताई। 5 अठोवं दिहाड़े मेरो खतनो भोव, इसाएल केरे कुटमे ते बिन्यामीनेरे गोत्रे मरां आई; इब्रैनी केरो इब्रानी; कानूनेरे बारे मां अगर कोई जोए त फरीसी। 6 जोशेरे बारे मां अगर कोई जोए त कलीसियाई सताने बालो; ते अगर कानूनेरे धार्मिकतारे बारे मां कोई जोए त बेइलज़ाम। 7 पन जैना-जैना गल्लां मेरे

फैइदेरी थी तैना मीं मसीहेरे खातर नुकसान सैमझोरिन। 8 बल्के मीं अपने प्रभु यीशु मसीहेरे पिशानारी बड़वैयरे वजाई सेइं अवं सब गल्लां नुकसान समझताई, जेसेरे वजाई सेइं मीं बेड़ि चीजां केरो नुकसान उठाव, ते तैन कूड़ो समझताई, जैस सेइं अवं मसीह हासिल केरि। 9 ते तैस मां भोइ, न कि एपनी तैस धार्मिता सेइं, जै मूसेरे कानूने सेइं ए, बल्के तैस धार्मिकता सेइं जै परमेशरेरे तरफां मसीह पुड़ विश्वास केरने सेइं भोतीए। 10 ते अवं तैस ते तैसेरे जींती भोनेरी शक्ति, ते तैस साथी दुखन मां शामिल भोई, ते तैसेरी मौतरी बराबरी हासिल केरि। 11 ताके अवं कोन्ची रीति सेइं मुइदन मरां जींते भोनेरे पदे तगर पुजो। 12 ई मतलब नई, कि मीं हासिल केरू, या अवं सिद्ध भोइ जेव, पन तैस चीजीं हासिल केरनेरे लेइ दौड़ने लोरोई, जेसेरे लेइ मसीह यीशुए अवं द्वालावरो थियो। 13 हे द्वालाव ते बेइनव, मेरू इन गुमान नई कि मीं द्वालाव, पन सिर्फ अक कम केरताई, कि जैना गल्लां पत्रोवं रेइ तैन बिसरतां, अग्री गल्लां केरे पासे गाताई। 14 निशानेरे पासे दौड़तो चलताई, ताके मीं तैन इनाम मैल्ले, जेसेरे लेइ परमेशरे अवं मसीह यीशु मां बा कुजेवरोई। 15 असन मरां जेरे सिद्धन, ईए विचार रखा, ते अगर कोन्ची गल्ली मां तुशो होरो खियाल भोए त परमेशर तैस भी तुसन पुड़ बांदो केरेलो। 16 एल्हेरेलेइ जैड़ी तगर पुजोरेम, तैसेरे मुताबिक चलम। 17 हे द्वालाव ते बेइनव, तुस सब मिलतां मेरी जेरि चाल चला, ते तैन केरि पिशान रखा, जैना इस रीति पुड़ चलतन जेसेरी मिसाल तुस असन मां हेरतथ। 18 किजोकि बड़े एरी चाल चलतन, जैन केरि चर्चा मीं तुसन सेइं बार-बार की ते अज्ज भी लेरां देइ-देइ ज़ोताई, कि तैना अपने चालचलन सेइं मसीहेरे क्रूसेरे बैरिन। 19 तैन केरो अन्त विनाशे, तैन केरो ईश्वर पेदे, तैना एपनी शरमरी गल्लन पुड़ घमण्ड केरतन, ज़मीनारी गल्लन पुड़ मन लातन। 20 पन इशुओ मुखल स्वर्गे, ते अस एक्की मुक्ति देनेबाले प्रभु यीशु मसीह स्वर्गोरां बलगने लोरेम। 21 तैए एपनी शेक्ति सेइं तैस अस्सेरे मुताबिक तैना सब चीज़न अपने वशे मां केरि बटते, इशुओ कमज़ोर जिसमेरू रूप बदलतां, अपने महिमारो जिसमेरे मुताबिक बनालो।

4 एल्हेरेलेइ हे मेरे द्वाले द्वालाव ते बेइनव अवं तुसन सेइं प्यार केरताई, जैन मां मेरो दिल लगगोरो रहते जै मेरो आनन्द ते ताज भोए, हे द्वाले द्वालाव ते बेइनव, प्रभु मां एन्चरे मज़बूत राथ। 2 अवं यूओदियारे छंदे केरताई, ते सुन्तुखेरे भी, कि तैना प्रभु मां अक मन रान। 3 ते हे सच्चे मद्दतगार अवं तीं कां भी बिनती केरताई, कि तू तैन कुआन्शां केरि मद्दत केर, किजोकि तैनेई मीं सेइं साथी खुशखबरी फैलाने मां, क्लेमैस ते मेरे तैन मद्दत केरनेबालन समेत मेहनत की, जैन करां नंवां जिन्दगरे किताबी मां लिखोरन। 4 प्रभु मां सदा आनन्दित राथ; अवं फिरी ज़ोताई, आनन्दित राथ। 5 तुशु नरमी सेब्वी मैन् पुड़ बांदी भोए, प्रभु नेड़ोए। 6 कोन्ची भी गल्लारी फिक्क न केरा, पन हर एक्की गल्ली मां तुशु दखुवास, प्रार्थना बिनती

सेइं शुक्रे साथी परमेशरे कां हाज़र भोन। 7 तैखन परमेशरेरी शान्ति, ज़ै समझी करां बिलकुल बेइरे, तुशशे दिलन ते तुशशे खियालन मसीह यीशु मां बिलकुल मैफूज़ रखेली। 8 आखरी मां, हे मेरे ढूलाव ते बेइनव, ज़ैना-ज़ैना गल्लां सख्खीन, ते ज़ैना-ज़ैना आदरारे काबलन, ते ज़ैना-ज़ैना गल्लां पवित्रन, ते ज़ैना-ज़ैना गल्लां रोड़िन, ते ज़ैना-ज़ैना गल्लां मने रोड़ी लेगतिन, ते ज़ैना-ज़ैना गुण ते ज़ैना-ज़ैना गल्लां तरीफेरी, तैन पुड़ धयान केरा। 9 ज़ैना गल्लां तुसेईं मीं करां शिखी, ते कबूल की, ते शुनी ते मीं हेरी, तैन केरो हुक्म मन्ना तैखन परमेशर ज़ै शान्ति देनेबालोए तुसन साथी भोलो। 10 अवं प्रभु मां बड़ो खुश आई कि हुनी एत्रे दिहाड़न पत्ती तुसन मेरे बारे मां फिरी खियाल भोव; याकीन्न तुशशे शुरुआती मां इस एरो खियाल थियो, पन तुसन मौको न मैल्लो। 11 इन नई कि अवं अपनि कम्मेरे वजाई सेइं ज़ोताई; किजोकि मीं इन्ने शिखोरूए कि ज़ैस हालती मां आई, तैस्से मां राज़ी भोई। 12 अवं निकडू भोनू भी ज़ानताई ते बडू भोनू भी ज़ानताई, ते मीं हर एक्की गल्ली ते सेब्भी हालतन मां रज़नू, ढूलुखुनू ते बधनू घटनू शिखोरूए। 13 ज़ै मीं ताकत देते तैस मां अवं सब किछ केरि बटताई। 14 फिरी भी तुसेईं रोडू कियूं, कि मेरे दुखे मां मीं साथी भोए। 15 ते हे फिलिप्पियों, तुस एप्पू भी ज़ानतथ, कि खुशखबरी प्रचारेरे शुरुआती मां ज़ैखन अवं मकिदुनिया अग्रोवं जेव, तैखन मीं तुस शारे ते कोन्ची होरि मेनडलारे लोकेईं लेने देनेरे बारे मां मद्दत न की। 16 एन्चरे ज़ैखन अवं थिस्सलुनीके नगरे मां थियो; तैखन भी तुसेईं मेरी घटी पूरी केरनेरे लेइ एक्की बार नई बल्के काई बार किछ भेज़ेरू थियूं। 17 इन नई कि अवं दान चाताई पन अवं एरो फल चाताई, ज़ै तुशशे फैइदेरे लेइ बड़तो गाए। 18 मीं कां सब किछे, बल्के बडू जादे, ज़ैन तुसेईं इपफुदीतुसेरे हथ्ये भेज़ेरू थियूं, तैन मेलतां रज़ोरोई, तैन त खुशबू ते कबूल केरनेरे काबल बलिदाने, ज़ैन परमेशरे पसंदे। 19 ते मेरो परमेशर भी अपने तैस धनेरे मुताबिक ज़ैन महिमा सेइं यीशु मसीह मांए, तुशशी हर अक ज़रूरत पूरी केरेलो। 20 इश्शो परमेशर ते बाजी एरी महिमा हमेशा भोती राए। आमीन। (aiōn g165) 21 हर अक पवित्र मैन्हु ज़ै यीशु मसीह मांए तैस जो नमस्कार ज़ोथ। ज़ै ढूला मीं साथीए तुसन नमस्कार ज़ोते। 22 सब पवित्र लोकन, खास केरतां ज़ैना महाराज़ेरे घरानेरेन तुसन नमस्कार ज़ोतन। 23 इश्शे प्रभु यीशु मसीहेरो अनुग्रह तुशशी आत्माई सेइं साथी राए।

कुलुस्सियो

1 अवं पौलुस ई चिट्ठी लिखने लोरोई, अवं परमेशेरी मेज्जी सेइं मसीह यीशुएरो प्रेरित आई, ते विश्वासी द्वाला तीमुथियुस भी मीं साथी आए। 2 मसीह मां तैन पवित्र ते विश्वासी द्वालां केरे न्वंवे ज़ैना कुल्लुसे नगरे मां रातन। इश्शे बाजी परमेशेरे तुसन अनुग्रह ते शान्ति देतो राए। 3 अस ज़ैखन तुशे लेइ प्रार्थना केरतम त अपने प्रभु यीशु मसीहेरे बाजी, परमेशेरू शुक्र केरतम। 4 किजोकि असेईं शुनोरूए, कि मसीह यीशु पुइ तुशो विश्वासे, ते तुस सेबभी पवित्र लोकन सेइं तुस प्यार केरतथ। 5 तैस उमीद कियोरी चीज़ारे वजाई सेइं ज़ै तुशे लेइ स्वर्ग मां रखोरीए, ज़ेसेरे बारे मां तुसेईं तैस खुशखेबारे सच्चे वचने सेइं शुनोरूए, ज़ै तुसन कां पुजोरोए। 6 ते ज़ेन्चरे दुनियाई मां भी फल आनते, ते बद्धतो गाते; मतलब ज़ैस दिहैदी करां देतू तुसेईं तै शुनू, ते सचैई सेइं परमेशेरो अनुग्रह पिशानो, तुसन मां भी एरू केरि बटते। 7 तैसेरी शिक्षा तुसेईं इश्शे दलारे मदतगार इपफ्रास करां हासिल की, ज़ै इश्शे लेइ मसीहेरो वफादार सेवके। 8 तैने तुशे प्यारेरे बारे जोवं ज़ै होरि लोकां केरे लेइ आए, ज़ै पवित्र आत्मा मांए तुसन दितोरोए। 9 एल्लेरेलेइ ज़ैस दिहैदी करां इन शुनू, त असेईं हमेशा तुशे लेइ प्रार्थना की, कि परमेशेरी आत्मा तुसन अक्ल ते मसझ दे ज़ैस सेइं तुस तैसेरी मर्जी पूरे तरीके सेइं सेमझी बटेले। 10 ताके तुस तेरही ज़िन्दगी जीथ ज़ेरे प्रभुएरे लोकन जीयोरी लोडे, ते तुस प्रभुए हर बत्तां खुश केरथ, ताके तुस लगातार हर किसमेरी भलाई केरते राथ, ते परमेशेरी पिशानी मां बद्धते गाथ। 11 अवं प्रार्थना केरताई कि परमेशर अपनि महिमारे शेक्ते इस्तेमाल केरनेरे ज़िरिये तुसन मजबूत केरे, ताके तुस आनन्दे ते सबरी सेइं दुख झैल्ली बटतथ। 12 बाजी परमेशेरू शुक्र केरते राथ, ज़ैने अस इस काबल बनाए कि स्वर्गे राज्जे मां तैसेरे अपने लोकन सेइं साथी विरासती मां हिसेदार भोम। 13 किजोकि तैने अस शैतानेरे राज्जे मरां छुटेइतां अपने दलारे मट्टेरे राज्जे मां आने 14 परमेशेरे अपने मट्टेरे बलिदाने सेइं असन पापां केरि माफ़ी दिती (यानी शैतानेरे राज्जे करां आज़ाद कियो)। 15 परमेशेरे त कोई न लेईं बटे, पन ज़ैखन तैसेरू मट्टू मैनु बनू त तैनी परमेशर लोकन पुइ बांदो कियो, ज़ैन किछ परमेशेरे बनाव तैस पुइ तैस कां सेबभना जादे अधिकार आए। 16 किजोकि ई तै (मसीह) थियो ज़ैने सब किछ बनानेरे वक्ते परमेशेरे सेइं कम कियू, चाए अम्बरे पुइ भोन या धेरती पुइ भोन, लेवरी भोन या आलेई, कुन तखत भोन, या रियासतां, कुन हकौमतां भोन या अधिकार, सैरी चीज़ां तैस्से सेइं ते तैसेरेलेइ बनेइ। 17 ते मसीह सेबभी चीज़ां बनाने करां पेइलो थियो, ते सब चीज़ां तैस मां बनोरी रैतिन। 18 तैए कलीसियोरो प्रधाने ज़ै तैसेरी जाने; तैए पेइलोए ते मुइदन मरां जीतीं भोने बालन मरां पेइलोए कि सेबभी गल्लन मां तैए प्रधान भोए। 19 किजोकि बाजी परमेशर इस्से मां खुश भोते कि मसीह

मां तैसेरे सारे सुभाव वास केरतन। 20 परमेशेरे फैसलो कियो कि अपने मट्टे भेजे, ज़ैने अपनो खून बगाव ते कूसे पुइ अपनि जान दिती। परमेशेरे सेबभी चीज़न सेइं मेल मलाप केरनेरे लेइ एन कियू। एन्चरे तैनी मसीहेरे ज़िरिये सेइं सेबभी चीज़ां केरो मेल मिलाप एप्पू साथी कियो, चाए तैना धेरतरी भोन, चाए स्वर्गेरी भोन। 21 ते तुस ज़ैना पेइले परमेशेरे करां दूर थिये, ते बुरे कम्मां सेइं मने सेइं बैरी थी। 22 फिरी भी परमेशर अपने मट्टे यीशुएरे मैनु बन्ने सेइं ते कूसे पुइ मौतरे ज़ियरीए तुशो मेल कराव, ताके तुसन एप्पू कां पवित्र ते बे दाग ते बेइलज़ाम हज़ार केरे। 23 पन तुस मसीह पुइ विश्वास केरनेरे मां बुनीयादे ज़ेरे मजबूत राथ, ते तैस खुशखेबारे उमीद पुइ ज़ै तुसेईं शुनोरी एन शारथ, ज़ेसेरो प्रचार अम्बरे करां बुन सैरी सष्टि मां कियो जेव; ते ज़ैस मां अवं पौलुस सेवक बनो। 24 हुनी अवं तैन दुखन सेइं खुश आई, ज़ैना तुशे लेइ झैल्लताई, ते मसीहेरी दुखां केरि घटी तैसेरे जानारे लेइ, मतलब कलीसियारे लेइ, अपने जिसमे मां पूरी केरताई। 25 ज़ेसेरो अवं परमेशेरे इंतज़ामेरे मुताबिक सेवक बनो, ज़ै तुशे लेइ मीं सोंफो, ताके अवं परमेशेरू वचन पूरो-पूरो प्रचार केरि। 26 मतलब तैस भेदे ज़ै ज़माना ते पीड़न करां छप्पोरो थियो, पन हुनी तैसेरे तैन पवित्र लोकन पुइ बांदो भोरोए। (aiōn g165) 27 ज़ैन पुइ परमेशेरे बांदो केरनो चाव, कि तैन ज्ञान भोए होरि कौमन मां तैस भेदेरी महिमारी कीमत कुने ते तै ईए, कि मसीह ज़ै महिमारी उमीदे तुसन मां रहते। 28 ज़ेसेरो प्रचार केरतां अस हर एक्की मैनु ज़ोतम ते सारे ज्ञाने सेइं हर एक्की मैनु शिखालतम, कि अस हर एक्की मैनु मसीह कां सिद्ध केरतां पेश केरम। 29 ते एल्लेरेलेइ अवं तैसेरी शेक्ते मुताबिक ज़ै मीं मां शेक्ति सेइं साथी अस्सर केरतीए तन मन लेइतां मेहनत भी केरतम।

2 अवं चाताई कि तुस ज्ञानथ, कि तुशे ते तैन केरे ज़ैना लौदीकिया नगरे मां आन, ते तैन सेबभी केरे लेइ ज़ैनेई अवं नई लोरोई कि अवं केन्चरे मेहनत केरताई। 2 ताके तैन केरे मन्न मां शान्ति भोए ते तैना प्यारे सेइं एप्पू मांमेई बनोरे रान, ते तैस पूरी समझरू धन हासिल केरन, बाजी परमेशेरे भेदे मतलब मसीह पिशानन्। 3 ज़ैस मां समझरे ते ज्ञानेरे सारे भण्डार छपोरेन। 4 इन अवं एल्लेरेलेइ ज़ोताई, कि कोई मैनु तुसन लालच देने बैली चीज़ी सेइं धोखो न दे। 5 किजोकि अवं अगर जिसमेरे लिहाजे सेइं दूराई, फिरी भी आत्मिक लिहाजे सेइं नेडो आई, ते तुशे रीति सेइं तुशरी हालती ते तुशे विश्वासे ज़ै मसीह यीशु मां मजबूती हेरतां खुश भोव। 6 ते ज़ेन्चरे तुसेईं मसीह यीशु अपनो प्रभु कबूल कियोरोए, तेन्चरे तैस मां चलते भी राथ। 7 ते तैस मां ज़ील छुडते राथ ते बद्धते राथ; ते ज़ेन्चरे तुस शिखालोरेथ तेन्चरे विश्वासे मां मजबूत भोते गाथ, ते खूब शुक्र केरते राथ। 8 खबरदार राथ कि तुसन कोई तैसेरे ज्ञाने ते धोखे सेइं शिकार न केरे, ज़ैन मैनु केरू रुवाज़ेरे ते दुनियारी पेइली शिक्षारे मुताबिके पन मसीहेरे नई। 9 किजोकि तैस मां

ईश्वरत्वरी सारी भरपूरी जानी मां एइतां वास केरती। 10 ते खोलोरीए। 10 ते नव्वीं इन्सानयत लोरीए जै अपने बनाने बालेरे
तुस तैस मां भरोरेथ जै सैरी हकोमती ते अधिकारेरी क्रोड़ी। 11 तैस्से मां तुश्शो एरो खतनो भोरोए, जै हाथेरो नई, मतलब
मसीहेरोए खतनो, जैस सेइं तुश्शी पुरानी इन्सानयत अलग की
गातीए। 12 ते तैस्से सेइं साथी बपतिस्मे मां दबे जे, ते तैस्से मां
परमेशेरी शक्ति पुड़ विश्वास केरतां, जैने तै मुड़दन मरां जीतो
कियो, तुस भी तैस सेइं साथी जीते कियो। 13 ते तैने तुस भी,
जैना अपने पापन, ते अपने जिसमेरे खतनेरे हालती मां फटरे
थी, तैस सेइं साथी जीते भी केरे, ते इश्शे सब पाप माफ़ केरे।
14 ते विधि केरो तै लेख जै इश्शे नंवे पुड़ ते इश्शे खलाफ थियो
मटाव; ते तैस क्रूसे पुड़ कील देइतां दूर केरो। 15 ते तैने प्रधान
ते अधिकैरन हारेइतां तैन केरो खुल्लो मुखुल्लो तमाशो बनावं
ते क्रूसे सेइं जयजयकार भी केरू। 16 एल्लेहेलेइ खानू पीनू
या तिहार या नव्वीं चॉदनी, या आरामेरे दिहाड़ां केरे बारे मां
तुश्शो कोई फैसलो न केरो। 17 किजोकि सब एजने बैली गल्लां
केरि छावे, पन असली चीजां मसीहेरिन। 18 कोई मैनु दीनता
ते स्वर्गदूतां केरि पूजा पसंद केरतां तुश्शी दौड़रे इनामे करां
दूर न रखे। एरो मैनु लेवहरी गल्लां मां लगगोरो रहते ते एपनी
जिसमानी समझी पुड़ बेफैइदो फुलते। 19 ते तैस क्रोड़ी टलेइतां
न रखन जै मसीह आए ते जैस सेइं सारो जिसम जोड़न ते पठां
केरे हफाजती सेइं ते एक्की सेइं साथी जुड़तां, परमेशेरे तरफां
बढ़तो गाते। 20 जैखन कि तुस मसीह सेइं साथी दुनियारे पेड़ली
शिक्षाई सेइं मरोरेथ, त फिरी तैन केरे जेरे जैना दुनियाई मां
जिन्दगी बीतातन मैनु केरे हुकम ते शिक्षा सेइं, 21 ते एरी शिक्षा
मां किजो रातथ कि इस सेइं नई हुरनु, एन नई खानू, ते तैस
सेइं हथ नई लानो? 22 (किजोकि इना सब चीजां कम्मे मां
आनते-आनते नाश भोड़ गेली)। 23 इन गल्लन मां एपनी मेज़री
मुताबिक अपनि बनेवरी भेक्ति सेइं, ते दीनता, ते जिसमानी
कोशिश सेइं ज्ञानेरु कम त आए, पन जिसमानी खुवैइशन रोकने
मां इन सेइं किछ भी फैइदो न भोए।

3 ते जैखन तुस मसीह सेइं साथी जीतो कियो, त स्वर्गेरे चीजां
केरे तोपी मां राथ, जैड़ी मसीह मौजूदे ते परमेशेरे देइने
पासे बिशोरोए। 2 थेरते नई पन स्वर्गेरे चीजन पुड़ ध्यान लाथ।
3 किजोकि तुस त मरे, ते तुश्शी जिन्दगी मसीह सेइं साथी
परमेशेरे मां छपोरूए। 4 जैखन मसीह जै इश्शी जिन्दगीए, बांदो
भोलो, तैखन तुस भी तैस सेइं साथी महिमा साथी बांदे कियो
गाले। 5 एल्लेहेलेइ अपने तैन अंगन मैरी देथ, जैना थेरती पुड़
आन, मतलब बदमाशी, गन्दगी, बुरे खियाल, बुरी खुवैइश ते
लालचे जैन मूरी पूजने बराबरे। 6 इन केरे वजाई सेइं परमेशेरो
क्रोध हुकम न मन्ने बालन पुड़ एइते। 7 ते तुस भी, जैखन इन
बुरेइन मां जिन्दगी बीताते थी, त इन केरे मुताबिक ज़लते भी
थी। 8 पन हुनी तुस भी इन सेब्धन मतलब क्रोध, सरक, बैर,
तुहीन, गैई देनी इना सब गल्लां शारा। 9 एक्की होरि सेइं झूठ
न जोथ किजोकि तुसेईं पुरानी इन्सानयत तैसेरे कम्मन समेत

4 हे मालिकव, अपने-अपने गुलामन सेइं साथी इन्साफ ते
ठीक-ठीक बताव केरा, इन समझतां कि स्वर्गे मां तुश्शो
भी अक मालिके। 2 प्रार्थना मां लगगोरो राथ, ते शुक्र सेइं
साथी हुशार राथ। 3 साथी इश्शे लेइ भी प्रार्थना केरते राथ, कि
परमेशर इश्शे लेइ शुनानेरे लेइ एरी बत खोल्ले, कि अस मसीहेरे
तैस भेदेरे बारे मां जोई बटम जेसेरे लेइ अवं कैदे मां आई। 4 ते
तैस बांदो केरि, जेन्चरे मीं कियो लोड़े। 5 वक्त कीमती सेमझतां
बेइरन साथी सैमझाईरी सेइं बताव केरा। 6 तुश्शो वचन सदा
अनुग्रहे सेइं ते एरो लूनों भोए, कि तुसन हर एक्की मैनु रोड़ेगारे
जुवाब देनो एज्जे। 7 टलारे ढूला ते वफादार सेवक, तुखिकुसे जै
प्रभु मां मेरो मददगार, तै मेरी सेब्धी गल्लन मां तुसन ज़ोलो।
8 तै मीं एल्लेहेलेइ तुसन कां भेजो, कि तुसन इश्शी हालतरो

पतो भोए ते तै तुश्शे दिलन शान्ति दे। 9 ते तैस सेइं साथी उनेसिमुस भी भेजो जै वफादार ते टूलारो ढूलाए ते तुसन मरांए, ते तुसन इड़ी तगर सैरी गल्लां ज़ोले। 10 अरिस्तर्खुस जै मीं सेइं साथी कैदीए, ते मरकुस जै बरनबासेरो ढूलाए लगते। (जेसेरे बारे मां तुसन हुक्म मैल्लोरो थियो कि अगर तै तुसन कां एज्जे, त तैस सेइं रोड़ेचारे बर्ताव केरथ) 11 ते यीशु जै जो यूस्तुस ज़ोतन, तै तुसन नमस्कार ज़ोते। खतनो केरें लोकन मां सिर्फ ईए परमेशरेरे राज़े लेइ मद्दतगार ते मेरे शैनतरी वजा राए। 12 इपफ्रास जै तुसन मरांए, ते मसीह यीशुएरो दासे, तुसन जो नमस्कार ज़ोते ते सदा तुश्शे लेइ प्रार्थना केरते, ताके तुस सिद्ध भोइतां पूरे विश्वास सेइं साथी परमेशरेरे मेर्जी पुड़ मज़बूत राथ। 13 अवं तैसेरो गवाह आई, कि तै तुश्शे लेइ ते लौदीकिया ते हियरापुलिस बालां केरे लेइ बड़ी कोशिश केरतो रहते। 14 टूलारे तबीब लूका ते देमासेरू तुसन नमस्कार। 15 लौदीकिया नगरेरे ढूलान ते नुमफास ते तैन केरे घरेरे कलीसियान जो नमस्कार ज़ोथ। 16 ते ज़ैखन ई चिट्ठी तुश्शे इड़ी पढ़ी गाए, त एरू केरनू कि लौदीकियारे कलीसिया मां भी पढ़ी गाए, ते तै चिट्ठी जै लौदीकियारां एज्जे तैस तुस भी पेड़थ। 17 फिरी अरखिप्पुसे सेइं ज़ोइयथ कि जै सेवा प्रभु मां तीं सोंफी, तैस बड़े हुशैरी सेइं पूरी केरथ। 18 अवं पौलुस अपने हथ्थन सेइं नमस्कार लिखताई। मेरी शंगलन याद रखा; तुसन पुड़ अनुग्रह भोतो राए। आमीन।

1 थिस्सलुनीकियों

1 अवं पौलुस ई चिट्ठी लिखताई। सिलवानुस ते तीमुथियुस भी मीं सेई साथी आन, थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, तैन अनुग्रह ते शान्ति मैलती राए। 2 अस अपने प्रार्थनान मां तुसन याद केरतम, ते सदा तुश्शी सेबमी केरे लेइ परमेशेरू शुक्र केरतम। 3 ते अपने बाजी परमेशेरें सामने तुश्शां कम्मां, जैना तुस विश्वासेरे वजाई सेई केरतथ, ते बड़ी मेहनतरां कम्मां जैन सेई पतो चलते तुस होरन सेई प्यार केरतथ, ते इश्शे प्रभु यीशु मसीहरे वापस एजनेरे उमीदरे लेइ मुसीबतन मां सबर केरतथ, अस लगातार याद केरतम। 4 ते हे ढूलाव, ते परमेशेरें ढूलारे लोकव, अस ज्ञानतम, कि तुस परमेशेरें अपने लोक भोनेरे लेइ चुनोरेथ। 5 किजोकि यीशु मसीहरे बारे मां खुशखबरी तुसन कां न सिर्फ लफसन मां पुजी बल्के पवित्र आत्मा रे शक्ति सेई, ते बड़े याकीने सेई साथी पुजी, जेन्चरे तुस ज्ञानतथ, कि अस तुश्शे लेइ तुसन मां केरहे बनोरे थिये। 6 ते तुस बड़े दुखे मां पवित्र आत्मा रे आनन्दे सेई साथी वचने मेन्तां इश्शे ते प्रभुएरी चाल चलने लाए। 7 इडी तगर कि मकिदुनिया ते अखाया इलाकां केरे सेबमी विश्वासी लोकां केरे लेइ तुस अक नमूनो बने। 8 किजोकि तुश्शे इट्ठां न सिर्फ मकिदुनिया ते अखाया इलाकन मां प्रभुएरू वचन शुनावं, पन तुश्शे विश्वासेरी जै परमेशेरें पुड़, हर ठैरी जैडी अस जे चर्चा फेलोरीए, कि असन तुश्शे बारे मां ज़ोनेरी ज़रूरत नई। 9 किजोकि तैना एप्पू होरन ज़ोतन कि ज़ैखन अस तुसन कां आए त कुन भोवं। तुस मूरतन करां दूर भोइतां परमेशेरें पासे फिरे, ताके ज़ीते ते सच्चे परमेशेरें सेवा केरतथ, 10 ते तैसेरू मट्ट स्वर्गें वापस एजने बलगते राथ, जैन तैने मुड़दन मरां ज़ीतो कियूं, मतलब यीशुए, जै असन एजनेबाले परमेशेरें प्रकोपे करां बचाते।

2 हे ढूलाव, तुस एप्पू ज्ञानतथ कि इश्शू तुसन कां एजनू बेफेइदू न भोवं। 2 बल्के तुस एप्पू ज्ञानतथ, कि असेई पेइले फिलिप्पी नगरे मां दुख झल्लने ते मुसीबत झल्लने पुड़ भी इश्शे परमेशेरें असन दिलेरी दिती, कि अस परमेशेरें खुशखबरी बड़ी खलाफत भोंते भी तुसन शुनाम। 3 किजोकि इश्शी शिक्षा न टपलाने सेई ते न धोखे सेई, ते न बुरे मकसदे सेई आए। 4 पन जेन्चरे परमेशेरें अस इस काबल बनेइतां असन खुशखबरी सोंफी, अस तेन्चरे बियांन केरतम, ते मैन्न नई, बल्के परमेशेरें खुश केरनेरे लेइ शिक्षा देतम, जै इश्शे मन्न परखते। 5 तुस ज्ञानतथ, कि असेई कथी चपलूसारी गल्लां नई कियोरी, ते न लालचरे लेइ बहानो केरते थी, परमेशर इस गल्लरो गवाहे। 6 ते असन मसीहरे प्रेरित भोनेरे वजाई सेई तुसन करां मदत नेनेरो अधिकार थियो। फिर भी अस मैन्न करां आदर न थिये चाते, ते न तुसन करां, न होरि कोन्वी करां। 7 पन जेन्चरे अम्मा अपने मट्ठां केरि हेरगेश केरतीए, तेन्चरे असेई भी तुसन मां रेइतां

नरमी हिराई। 8 ते तेन्चरे अस तुश्शू लालच केरते, न सिर्फ परमेशेरें खुशखबरी, पन अपने-अपने प्राण भी तुसन देनेरे लेइ तियार थिये, एल्हेरेलेइ तुस इश्शे बड़े ढूलारे भोइ जोरे थिये। 9 किजोकि, हे ढूलाव, तुस इश्शी मेहनत ते कष्टे याद रखतथ, कि असेई एल्हेरेलेइ रात दिहैडी कारोबार केरतां तुसन मां परमेशेरें खुशखबरी प्रचार की, कि तुसन मरां कोन्वी पुड़ भार न भोए। 10 तुस एप्पू गवाह आथ, ते परमेशर भी गवाहे, कि तुसन जैना विश्वास केरतथ, अस केरी पवित्रता, ते धार्मिकता ते बेइलजामे सेई राए। 11 तुसन पतोए, कि जेन्चरे बाजी अपने बच्चन सेई बर्ताव केरते, तेन्चरे अस भी तुसन मरां हर केन्वी शिक्षा देते, ते दिलासो देते, ते समझते थिये। 12 कि तुस एरी जिन्दगी जीथ जैस सेई परमेशर खुश भोए, जै तुसन अपने राज्जे ते महिमा मां कुजाते। 13 अस भी परमेशेरें शुक्र लगातार केरतम, कि जैखन इश्शे ज़िरिये परमेशेरें खुशखबरी तुसन कां पुजी जै असेई प्रचार की, त तुसेई तै मैन्हु केरि नई, बल्के परमेशेरें वचन सेमझतां (ते सच्चे इन परमेशेरें वचन आए) कबूल की, ते तै वचन तुसन मां जैना मसीह पुड़ विश्वास केरतथ कम केरते। 14 एल्हेरेलेइ तुस, हे ढूलाव, परमेशेरें तैन कलीसियां केरि जेरि चाल चलने लाए, जैना यहूदिया मां यीशु मसीह मां आन, किजोकि तुसन भी अपने लोकन करां एरो दुःख मैल्लो, जेन्चरे तैन यहूदन करां मैल्लोरो थियो। 15 जैनेई प्रभु यीशु ते नबी भी मारे, ते अस सताए, ते परमेशर तैन सेई खुश नई, ते तैना सेबमी मैन्हु केरि खलाफत केरतन। 16 ते तैना गैर कौमन सेई तैन केरे मुक्करे लेइ गल्लां केरने लेइ असन रोकतन। तैना पापे पुड़ पाप केरतन ज़ांतगर परमेशर तैन सज़ा न दे, ते हुनी परमेशेरें तैन पक्को सज़ा देनेबालोए। 17 हे ढूलाव, जैखन अस थोड़े चिरेरे लेइ मने मां नई बल्के बांदे मां तुसन करां अलग भोरे थी, ते असेई बड़े लालच सेई तुसन हेरनेरी बड़ी जादे कोशिश की। 18 एल्हेरेलेइ (मतलब मीं पौलुसे) एक्की बार नई बल्के बार-बार तुसन कां एजनू चाव, पन शैतान अस तुसन कां एजनेरे लेइ रोके। 19 भला इश्शी उमीद, या आनन्द, या बड़ीवैयरू ताज कौन आए? इन तुस भोले जैखन प्रभु यीशु वापस एज्जेलो 20 इश्शी बड़याई ते आनन्द तुस आथ।

3 एल्हेरेलेइ जैखन असेई जादे न बेलगी बटु त असेई इन ठहराव कि अस एथेंस नगरे मां अकैल्ले रेइ गाम। 2 ते असेई तीमुथियुस जै मसीहरे खुशखबरी मां इश्शो ढूलाए, ते परमेशेरें सेवके, एल्हेरेलेइ तुसन कां भेजो, कि तै तुसन विश्वासे मां मज़बूत केरे ते तुश्शी हिम्मत बधाए। 3 कि कोई इन दुखां केरे वजाई सेई न घबराए, किजोकि तुस एप्पू रोड़े चारे ज्ञानतथ परमेशेरें फैसलो कियोरोए, कि अस सताए गानेम। 4 किजोकि पेइले भी, जैखन अस तुसन कां थिये, त तुसन सेई ज़ोते थी, कि अस सताए गानेम, ते तुस ज्ञानतथ एरू भोवं भी। 5 एल्हेरेलेइ जैखन मीं करां होरू न बेलगोव, त तुश्शे विश्वासेरो हाल ज़ान्नेरे लेइ तीमुथियुस भेजो, किजोकि अवं डरों थियो

कि एरू न भोए, कि अज़माने बाले (शैताने) तुस अज़माए त नई, ते तुसन कोन्ची चीज़ारो घाटो न भोलो। 13 हे ढूलाव, अस न, कि इश्शी मेहनत बेकार त न भोड़। 6 पन तीमुथियुसे ज़ै न चातम, कि तुस तैन केरे बारे मां अनज़ान राथ ज़ैना विश्वासी तुसन करां इश्शे इडी अव, ते तुश्शे विश्वासेरे ते प्यारेरे बारे मां मरैन अनज़ान राथ, एरू न भोए, कि तुस होरि केरे ज़ेरे शोग खुशखबरी शुनाई। ते ई गल भी शुनाई, कि तुस सदा प्यारे सेइं असन याद केरतथ, ते असन हेरेनेरी इच्छा रखतथ, ज़ेन्चरे अस भी तुसन हेरेनेरी इच्छा रखतम। 7 एल्हेरेलेइ हे ढूलाव, अपनि सारी तंगी, ते मुसीबतन मां तुश्शे विश्वासे सेइं असन शान्ति मैल्ली। 8 तुश्शो प्रभु पुड़ मज़बूत विश्वासे इश्शे लेइ अक नव्वे ज़िन्दगरे साँसेरो ज़ेरोए। 9 ते ज़ेरो आनन्द असन तुश्शे वजाई सेइं अपने परमेशरेरे सामने, तैसेरे बदले मां अस कोस तरीके सेइं परमेशरेरु शुक्र केरम। 10 अस रात दिहाड़ी बड़ी प्रार्थना केरते रातम, कि तुसन सेइं दुबारां मिलम, ते तुश्शी मद्दत केरम कि तुस होरि जादे मज़बूती सेइं प्रभु यीशु पुड़ विश्वास केरथ। 11 ते अस प्रार्थना केरतम कि इश्शो बाजी परमेशर ते इश्शे प्रभु यीशु, बत खोल्ले कि अस तुसन कां एज्जी बटम। 12 ते प्रभु एरू केरे, कि ज़ेन्चरे अस तुसन सेइं प्यार केरतम; तेन्चरे तुश्शो प्यार एण्पू मांमेइं, ते सेब्भी मैन्न सेइं बधे, ते तरक्की केरतो रा। 13 ताके ते तुश्शे मन्न मज़बूत केरे, कि ज़ैखन इश्शो प्रभु यीशु अपने सब पवित्र लोकन सेइं साथी एज्जे, त ते इश्शे बाजी परमेशरेरे सामने तुश्शे मन्न पवित्रता मां बेइलज़ाम ठहरालो।

4 आखर, हे ढूलाव अस तुसन कां बिनती केरतम, ते तुसन प्रभु यीशु मां समझातम, कि ज़ेन्चरे तुसेईं इश्शो ज़ेरो चाल चलन रख्खो, ते परमेशर खुश केरनो शिखोरोए, ते ज़ेन्चरे तुस चलतथ भी, तेन्चरे तुस अग्रोव बढ़ते राथ। 2 किजोकि तुस ज्ञानतथ, कि इना हदायतां असन प्रभु यीशु करां मैलोरिन। 3 परमेशर चाते, कि तुस पवित्र बना, मतलब बदमाशी केरने करां बचोरे राथ। 4 ते तुसन मरां हर केन्चे ज्ञानेरु लोड़े कि केन्चरां अपने कुआन्शी सेइं पवित्रता ते आदरी सेइं ज़िन्दगी जीयोरी लोड़े। 5 ते इन कम खुवैइशी सेइं नई, ते न गैर कौमां केरे ज़ेरे, ज़ैना परमेशरे न पिशानन्। 6 कि इस गल्ली मां कोई अपने विश्वासी ढूलाए न ठगे, ते न तैस पुड़ हकोमत चलाए; किजोकि प्रभु इन सब गल्लां केरि सज़ा देलो, ज़ेन्चरे कि असेईं पेड़लू तुसन सेइं ज़ोरु थियूं, ते खबरदारी भी दित्तोरी थी। 7 किजोकि परमेशरे अस अशुद्ध ज़िन्दगी जीनेरे लेइ नई, पन पवित्र ज़िन्दगी जीनेरे लेइ कुजवरेम। 8 एल्हेरेलेइ ज़ै कोई इना हदायतां केरो इन्कार केरते, ते मैन्हु केरो नई, पन परमेशरेरो इन्कार केरते, ज़ै अपनो पवित्र आत्मा तुसन देते। 9 पन विश्वासी भाईचारेरे प्यारेरे बारे मां तुसन किछ लिखनेरी ज़रूरत नई, एण्पू मांमेइं प्यार रखनो तुसेईं परमेशरे करां एण्पू शिखोरोए। 10 ते सारे मकिदुनिया इलाकेरे सेब्भी ढूलान सेइं साथी एरू केरतथ भी, पन हे ढूलाव, अस तुसन कां छन्दे केरतम कि होरे भी बढ़ते गाथ। 11 ते ज़ेन्चरे असेईं तुसन हुक्म दित्तो, तेन्चरे तुस होरन सेइं लड़ाई न केरा, ते अपनू कम केरा त कने अपने लेइ कमाई केरा। 12 ते एन्चरां तैना भी तुश्शी आदर केरेले ज़ैना विश्वासी

नई, ते तुसन कोन्ची चीज़ारो घाटो न भोलो। 13 हे ढूलाव, अस न, कि इश्शी मेहनत बेकार त न भोड़। 6 पन तीमुथियुसे ज़ै न चातम, कि तुस तैन केरे बारे मां अनज़ान राथ ज़ैना विश्वासी मरैन अनज़ान राथ, एरू न भोए, कि तुस होरि केरे ज़ेरे शोग केरथ, ज़ैन मरैनरां पत्ती उमीद नई। 14 किजोकि अगर अस विश्वास केरतम, कि यीशु मरो, ते जीतो भोव, त तेन्चरे परमेशर तैन भी ज़ैना यीशु पुड़ विश्वास केरतां मरे, परमेशर तैन भी यीशु सेइं साथी वापस आनेलो। 15 किजोकि अस प्रभु यीशुएरे वचनेरे मुताबिक तुसन सेइं इन ज़ोतम, कि अस ज़ैना जीतिम, ते प्रभुएरे वापस एजने तगर बंचोरे रामेले, त ज़ैना विश्वासी मरौरैन पेड़ले तैस सेइं मिलमेले, फिरी अस मिलमेले। 16 किजोकि प्रभु यीशु एण्पू स्वर्गरां एज्जेलो; ते ज़ोरे सेइं हुक्म देलो, तैस वक्ते प्रधान दूतेरी आवाज़ शुनोली, ते परमेशरेरी महिमारो नड़शिनगो बजो गालो, ते ज़ैना मसीह पुड़ विश्वास केरनेबाले मां मरैन, तैना पेड़ले जीते भोनेन। 17 तैखन अस ज़ैना जीति बचोरे रहमेले, ते तैन सेइं साथी बिदलारी पुड़ निते गानेम, कि अम्बरे मां प्रभु सेइं मिलमेले, ते तेइसेरां बाद अस सदा प्रभु सेइं साथी रानेम। 18 एल्हेरेलेइ इन्ने गल्लन सेइं एक्की होरि तस्सली देते राथ।

5 हे ढूलाव ते बेइनव, इसेरी ज़रूरत नई, कि वक्तन ते कालां केरे बारे ज़ेइस प्रभु यीशु वापस एज्जेलो तुसन किछ लिखू गाए। 2 किजोकि तुस एण्पू रोड़े चारे ज्ञानतथ, ते ज़ेन्चरे चोर राती एइते, तेन्चरे प्रभुएरु दुबारां एज्जेलो भोलू। 3 ज़ैखन लोक ज़ोले, “कि शान्तिए, ते कोई डर नई,” त तैन पुड़ अकदम विनाश एज्जेलो, ज़ेन्चरे दोर्जीती पुड़ तकलीफ; ते तैना तैस मुसीबती करां न बचेले। 4 पन हे ढूलाव ते बेइनव, तुस त (आत्मिक) आंधरे मां नई, कि तै दिहाड़ी पुसन पुड़ चोरेरी ज़ेरे एज्जे। 5 किजोकि तुस सब लोअरे बच्चे आथ, ते दीसारे बच्चे आथ, अस न रातेरम, न आंधारेरेम। 6 एल्हेरेलेइ अस होरि केरे ज़ेरे झुलोरे न रहम, पन बीड़ो रहम ते हुशार रहम। 7 किजोकि ज़ैना झुलोरे रातन, तैना राती झूलतन, ते ज़ैना नशे मां रातन, तैना राती नशे मां भोतन। 8 पन अस त दीसेरेम, विश्वास ते प्यार लेइतां कि इश्शी हिफाज़त भोए ज़ेन्चरे झिलम सिपाहेरी हिफाज़त केरतीए, ते मुक्तेर उमीद लेइतां ज़ेन्चरे सिपाही टोप लाते, खबरदार रहम। 9 किजोकि परमेशरे अस सज़ारे ते क्रोधेरे लेइ नई, पन एल्हेरेलेइ चुनोरेम कि अस अपने प्रभु यीशु मसीहरे ज़िरिये सेइं मुक्ति हासिल केरम। 10 यीशु मसीह इश्शे लेइ एल्हेरेलेइ मरो, कि अस चाए बीड़ो भोम, या झुलोरे भोम, सब मिलतां तैस सेइं साथी जीमा। 11 एल्हेरेलेइ एक्की होरि हिम्मत देथ, ते एक्की होरेरी तरक्की भोनेरी ज़िरियो बना, लगातार, तुस एरू केरतथ भी। 12 ते ढूलाव, अस तुसन सेइं बिनती केरतम, कि ज़ैना तुश्शे लेइ बड़ी मेहनत केरतन, ते प्रभु मां तुश्शी अगवाई केरनेबाले आम, ते ज़ैना तुसन सलाह देतन, तैन केरि आदर केरा। 13 ते ज़ैना कम्मां तैनेई तुश्शे लेइ कियां तैन केरे वजाई सेइं तैन केरि आदर ते तैन सेइं बड़ो प्यार केरा, ते एण्पू मांमेइं मेल मालपे सेइं राथ। 14 हे ढूलाव ते बेइनव,

अस तुसन कां मिनत केरतम, कि ज़ैना आलसी आन, तैन खबरदार केरा, ज़ैन केरि हिम्मत घटे तैन हिम्मत देथ, तैन केरि मद्दत केरा ज़ैना (आत्मिकता) मां कमज़ोरन, सेब्भी केरे लेइ बरदाशत केरनू हिराथ। 15 इस गल्लारू ध्यान रख्खा, कि कोई कोन्ची सेइं बुरीयीयैरे बदले बुराई न केरे, पन सदा भलाई केरनेरे लेइ तियार राथ, एप्पू मांमेइं ते सेब्भन सेइं भी भलाई केरनेरी कोशिश केरा। 16 सदा खुश राथ। 17 लगातार प्रार्थना केरते राथ। 18 हर हाले मां शुक्र केरा, किजोकि तुश्शे लेइ मसीह यीशु मां परमेशेरी ईए मर्जीए। 19 पवित्र आत्मा केरम्मन ज़ैना लोकां केरे ज़िन्दगी मां भोतन तैन न रोका। 20 भविष्यवैनी केरो इन्कार न केरा। 21 सब गल्लां परखा, ज़ैना रोड़ी भोन तैन अपनाथ। 22 सेब्भी किसमेरी बुरैई करां बच्चोरे राथ। 23 शान्ति देनेबालो परमेशेरे एप्पू तुसन पूरे तरीके सेइं पवित्र केरे; ते तुश्शी आत्मा ते प्राण ते जिसम इश्शे प्रभु यीशु मसीहेरे दुबारां एजने तगर पूरे, ते बेइलज़ाम ते सुरक्षित रान। 24 तुश्शो कुजाने बालो वफादारे, तै एरू केरेलो। 25 हे ढ़लाव, इश्शे लेइ प्रार्थना केरा। 26 सेब्भी विश्वासी ढ़लान मसीहेरे प्यारे सेइं नमस्कार केरा। 27 अवं तुसन प्रभुएरी कसम देताई, कि ई चिट्ठी सेब्भी विश्वासी ढ़लान पेढ़तां शुनाई गाए। 28 इश्शे प्रभु यीशु मसीहेरो अनुग्रह तुसन पुड़ भोतो राए।

2 थिस्सलुनीकियों

1 अवं पौलुस ई चिट्ठी लिखने लोरोई। सिलवानुस ते तीमुथियुस भी मीं सेईं साथी आन। थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, 2 अस प्रार्थना केरतम कि इश्शे बाजी परमेशर ते प्रभु यीशु मसीह तुसन अनुग्रह ते शान्ति दे। 3 हे ढूलाव ते बेइनव, तुश्शे बारे मां असेईं हर वक्त परमेशेरू शुक्र कियेरू लोड़े, ते इन इश्शे लेइ ठीक भी आए। एल्हेरेलेइ कि तुश्शो यीशु मसीह पुड़ विश्वास बड़ो बढतो गाते, त कने तुश्शो एक्की होरि सेईं प्यार केरनो भी बड़ो बढने लोरोए। 4 ई वजा आए, कि अस एप्पू परमेशेरें कलीसियान मां, तुश्शे बारे मां घमण्ड केरतम, चाए तुसन पुड़ मुसीबत या दुःख भी एज्जन, फिरी भी तुस सबरी सेईं झैलतथ, ते तुस यीशु मसीह पुड़ विश्वास केरते रातथ। 5 परमेशर अपनो इन्साफ हिरानेरे लेइ ई स्ताव इस्तेमाल केरेलो, कि तुस परमेशेरें राज्ञेरे काबल भोथ, जेसेरे लेइ तुस दुःख भी झैलतथ। 6 परमेशरे हमेशा ठीक तरीके सेईं इन्साफे केरते, कि जैना तुसन दुःख देतन, तैन बदले मां दुःख दे। 7 तुस जैना दुःख झैलतथ, परमेशर तुसन आराम देलो ते असन भी। इन तेइस भोलू जेइस प्रभु यीशु अपने शक्तिबाले स्वर्गदूतन सेईं साथी बेलति अगारे लप्पी सेईं साथी स्वर्गें एज्जेलो। 8 ते जैना लोक परमेशरे न पिशानन त कने इश्शे प्रभु यीशुएरे खुशखबरी न मन्न, तैन ते सज़ा देलो। 9 तैना प्रभुए करां हमेशारे लेइ अलग भोले, ते तैसेरे महान शक्तेरि हिस्सेदार न भोले। ते तैन हमेशारी सज़ा देइतां नाश केरेलो। (aiōnios g166) 10 इना गल्लां तेइस भोली जेइस यीशु अपने लोकन करां आदर हासिल केरनेरे लेइ वापस एज्जेलो, ते जैना लोक तैस पुड़ विश्वास केरतन तैना हैरान भोले। तुस भी तैन्ने लोकन मरां भोले, किजोकि जै सन्देश असेईं तैसेरे बारे मां तुसन शुनव तुसेईं तैस पुड़ विश्वास कियो। 11 एल्हेरेलेइ अस लगातार तुश्शे लेइ प्रार्थना भी केरतम, कि परमेशर तुसन इस काबल बनाए, जेरि जिन्दगी जीनेरे लेइ तुस कुजवरे तेन्चरे तुस जीथ। ते तै तुसन अपने शक्ति सेईं इस काबल बनालो कि तुस जैना रोड़ू केरथ ते जैन तुस केरनू चाथ, ते जैन कम तुस अपने विश्वासे सेईं केरतथ पूरू केरथ। 12 एन्चरे इश्शे प्रभु यीशु मसीहरे नब्बेरी तुश्शे जिरिये बडीयाईं भोली। ते तैसेरे जिरिये तुसन आदर मैलेली। इन सब किछ इश्शे परमेशर त कने प्रभु यीशु मसीहरे अनुग्रहे सेईं भोलू।

2 हे ढूलाव ते बेइनव, असन कां प्रभु यीशु मसीहरे वापस एजनेरे बारे मां ज़ोनेरे लेइ किछ आए। ते वक्त एज्जेलो जेइस अस तैस सेईं साथी मिलमेले। 2 इन सोचतां तुस परेशान न भोथ या तुश्शो दिल न घबराए कि प्रभुएरी दिहाड़ी पेइली ओरिए। किछ ज़ोई बटतन कि इन भविष्यवाणी मां या सन्देशे मां या चिट्ठी मां तैन कां ओरू थियूं। 3 लोक जैना इस बारे मां झूठी गल्लां ज़ोतन तैन पुड़ विश्वास न केरा। किजोकि यीशु

मसीहरे वापस एजनेरे पेइले, ते वक्त एज्जेलो जेइस बड़े लोक परमेशेरें खलाफ भोले, ते फिरी अधर्मी मैन्हु बांदो भोले। तै, तै आए ज़ै नाश भोनेरे लेइ ठहरावरोए। 4 तै अधर्मी मैन्हु परमेशेरें खलाफत केरेलो, ते तैन सब किछ जैन लोक देबते सेमझतां आराधना केरतन, तै इन ज़ोलो ई अवं इन सेबन करां महान आई। इड़ी तगर कि तै परमेशेरें मन्दरे मां बिश्तां अपनो आपे जो परमेशर ज़ोलो। 5 इन न बिसरा, कि मीं बड़े बार इन गल्लां केरे बारे मां ज़ोरू, ज़ैखन अवं तुसन सेईं साथी थियो। 6 हुन्ना तै अधर्मी मैन्हु बांदो नई भोरो किजोकि कोई आए ज़ैने ते रोकरोए, कि तै अपने वक्ते पुड़ बांदो भोए। 7 किजोकि अधर्मी चीज़ां केरि शक्ति इस दुनियाईं मां पेइली छेपतां कम केरने लोरीए, पन अक आए ज़ै तैस रोकते। ते तै तैस रोकतो रालो ज़ां तगर तै दूर न कियो गाए। 8 तैठां बाद तै दुष्ट मैन्हु एज्जेलो, पन बांदे मां ज़ैखन प्रभु यीशु एज्जेलो, त तैस दुष्ट मैन्हु अपने ऐशेरे फुकी सेईं ते एजनेरी महिमाईं सेईं मारेलो। 9 तै दुष्ट मैन्हु, शैतानेरे शक्ति सेईं एज्जेलो। तै हर किसमेरे झूठे चमत्कार ते निशान, ते बडां-बडां कम्मां केरेलो, ताके लोक सोचन कि तै परमेशरे ज़ै एन केरते। 10 ते तै हर किसमेरां बुरां कम्मां केरेलो, ते तैन धोखो देलो जैना परमेशरे नाश केरनेन। किजोकि तैनेईं तैस सच्चे पुड़ विश्वास केरने करां इन्कार कियो, जैस सेईं तैन मुक्ति मैल्लेथी। 11 एल्हेरेलेइ परमेशर तैन मां अक धोखो देनेबाली आत्मा भेजेलो जै तैन सच्चे करां दूर केरेली, ताके तैना झूठे पुड़ विश्वास केरन जैन तै दुष्ट मैन्हु तैन सेईं ज़ोलो। 12 परमेशर तैन सेबनी लोकन सज़ा देलो जैनेईं यीशु मसीहरे सच्चे सन्देशे पुड़ विश्वास न कियो, पन पाप केरने सेईं खुश भोए। 13 हे ढूलाव ते बेइनव, असेईं तुश्शे लेइ परमेशेरू शुक्र कियेरू लोड़े। किजोकि परमेशर तुसन सेईं प्यार केरते, तैन तुस दुनिया बनाने करां पेइले चुने, कि पवित्र आत्मारे पवित्र बनाते, ते यीशु मसीहरे बारे मां ज़ै सच्चे सन्देशे तैस पुड़ विश्वास केरतां परमेशर तुसन मुक्ति दे। 14 ज़ै खुशखबरी असेईं प्रचार की परमेशरे ते इस्तेमाल की, कि तुसन बचानेरे लेइ कुजाए, तुस इश्शे प्रभु यीशु मसीहरी महिमाईं मां शामिल भोथ। 15 एल्हेरेलेइ, ढूलाव ते बेइनव, ज़ै शिक्षा असेईं तुसन दिती, ज़ैखन असेईं तुसन सेईं गल्लां की त कने चिट्ठी केरे जिरिये, तैस पुड़ तुस लगातार विश्वास केरते राथ। 16 अस प्रार्थना केरतम इश्शो प्रभु यीशु मसीह एप्पू, ते इश्शो बाजी परमेशर ज़ैने असन सेईं प्यार कियो, ते ज़ैने अपने अनुग्रहे सेईं असन हमेशारो होसलो ते पक्की उमीद दिती, (aiōnios g166) 17 तैना तुसन होसलो देन, ते तुसन मज़बूत केरन ताके तुस लगातार भलाई केरथ ते ज़ैन ज़ोथ तैन रोड़ू भोए।

3 आखरी मां हे ढूलाव ते बेइनव, इश्शे लेइ प्रार्थना केरते राथ, कि अस प्रभु यीशुएरू वचन होरि भी बड़े रैन शुनेईं बटम, ते ज़ैना शुन्न त तैना तेन्चरे मनन जेन्चरे तुसेईं मन्नू। 2 ते ई भी प्रार्थना केरा कि परमेशर असन बुरे ते दुष्ट लोकां केरे जिरिये नुकसान पुजाने करां बनेइतां रख्खे, किजोकि बड़े लोक

जैनेई प्रभु यीशुएरी खुशखबरी शुनी, ते तैनेई इस पुड़ विश्वास न कियो। 3 पन तुस प्रभु पुड़ पूरो भरोसो केरि बटतथ, तैए तुसन मजबूत केरेलो, ते दुष्टे करां यानी शैताने करां बघालो, ताके तै तुसन कोई नुकसान न पुजेई बटे। 4 ते असन प्रभु मां तुसन पुड़ भरोसोए, कि जैन किछ असेई तुसन केरनेरे लेइ ज़ोरूए, तुस तेन्चरे केरते ओरेथ ते एजनेबाले वक्ते मां केरते राले। 5 अस प्रार्थना केरतम, कि प्रभु यीशु मसीह तुसन इन समझनेरे काबल बनाए कि परमेशर तुस सेइं केत्रो प्यार केरते, ते बरदाश केरा जेन्चरे मसीहे बरदाश कियूं। 6 हे ढ़लाव ते बेइनव, अस प्रभु यीशु मसीहेरे दित्तोरे अधिकार सेइं तुसन ई हुक्म देतम, कि तुसन मरां हर कोई एरे ढ़लान ते बेइनन सेइं साथ न रखखे, जैना आलसी आन त कने जै शिक्षा असेई तुसन दित्ती तैस न मन्न। 7 किजोकि तुस एण्पू रोड़े चारे ज्ञानतथ, कि तुसेई तेन्चरे ज़िन्दगी ज़ीयोरी लोड़े जेन्चरे असेई ज़ी, ज़ैखन अस तुसन सेइं साथी थिये, अस आलसी न थिये पन कम केरते थिये। 8 असेई कोन्चेरी रोटी मुफ्त न खाइ, पन अस मेहनत ते कष्टे सेइं रात दिहैडी कारोबार केरते थिये, कि अस अपने ज़रूरतां केरे लेइ तुसन पुड़ निर्भर न भोम। 9 असेई बड़ी मेहनत की, एल्हेरेलेइ नई कि असन अधिकार नई, कि तुसन हुक्म देम कि तुस इश्शी ज़रूरतां पूरी केरा। पन एल्हेरेलेइ कि असेई अपनो आप तुश्शे लेइ मिसाल बनाई ताके तुस इश्शे ज़ेरि ज़िन्दगी ज़ीथ। 10 ज़ैखन अस तुसन सेइं साथी थिये तैखन असेई तुसन हुक्म दित्तोरो थियो, कि अगर कोई कम केरने करां इन्कार केरे त तैस रोटी भी न देथ। 11 इश्शे शुन्ने मां ओरू आए कि तुसन मां बड़े लोक एरे आन जैना आलसी ज़िन्दगी ज़ीतन। तेना एण्पू कम न केरन, पन होरि केरे कम्मन मां दखल देतन। 12 एरे लोकन अस प्रभु यीशु मसीहेरे दित्तोरे अधिकारे सेइं हुक्म देतम ते समझातम, कि चुपचाप कम केरतां अपनि ज़िन्दगी ज़ीनेरे लेइ कमाई केरन। 13 ते तुस, ढ़लाव ते बेइनव, भलाई केरने मां हिम्मत न हारा। 14 अगर कोई इश्शी इस चिट्टेरे सन्देशे न मन्ने, त सेबभी केरे सामने तैसेरी पिशान केरा, ते तैस सेइं साथ न रखखा, ताके तै छिथोए; 15 फिरी भी तैस सेइं दुश्मनेरो ज़ेरो बताव न केरा, पन तैस सेइं विश्वासी सैथेरो ज़ेरो बताव केरतां तैस खबरदार केरा, कि ज़ेरू तैने कियूं तैन न केरे। 16 हुनी अवं प्रार्थना केरताई प्रभु ज़ै शान्ति देनेबालोए, तुसन हर वक्त हर किसमे सेइं शान्ति देतो राए, ते प्रभु लगातार तुसन सेबभन सेइं साथी भोए। 17 अवं पौलुस अपने हस्थे सेइं नमस्कार लिखताई, इन मेरू सबूते, अवं चिट्ठी केरे आखरी मां एन्चरे लिखताई, ताके हर एक्की पतो ज़ले कि ई चिट्ठी मेरे तरफां आए। 18 इश्शे प्रभु यीशु मसीहेरो अनुग्रह तुसन सेबभन पुड़ भोतो राए।

1 तीमुथियुस

1 अवं पौलुस ई चिट्ठी लिखने लोरोई। अवं इशशे मुक्ति देनेबाले परमेशरे ते यीशु मसीहेरे अधिकारे सेइं प्रेरित आई, जैस पुड़ इशशी उमीदे। 2 अवं ई चिट्ठी तीमुथियुसे जो लिखने लोरोई। हे तीमुथियुस तू मेरे मट्टे जेरू आस, किजोकि जेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इशशे बाजी परमेशर ते प्रभु यीशु मसीह तीं अनुग्रह, दया त कने शान्ति देतो राए। 3 हे तीमुथियुस जेन्चरे तू ज्ञानतस, इफिसुस नगरे मां किछ एरे लोक आन जैना गलत शिक्षा देतन। तैना लगातार झूठी कहैनी शिखालतन ते पूर्वजां केरे नव्वां केरे बारे मां शिखालतन। ज़ैखन अवं इफिसुस नगरेमां मकिदुनिया इलाके जो गानेरे लेइ तियार थियो, त मीं तीं ज़ोरू थियूं कि इफिसुस नगरे मां रा ते तैन ज़ो, कि एरी ज़ेर शिक्षा न देतन, ज़ैखन तैना एरी ज़ेर शिक्षा देतन त लोक तैन केरे बारे मां बेंस केरतन। नितीजो ई आए, जैन कम परमेशरे दितोरूप, शिखालनेबाले तैन नई लौ केरने जैन सिर्फ परमेशरे पुड़ रेखतां भोड़ सकते। 5 मेरो हुक्म देनेरो मकसद ई आए, कि तुस एक्की होरि सेइं साफ दिले ते रोड़े ज़मीरे, ते सच्चे विश्वासे सेइं प्यार केरा। 6 झूठी शिक्षा देनेबालेई इन सैरी गल्लां केरनि बंद की ते सिर्फ बेकार बेंस केरतन। 7 ते शास्त्री बन्नु चातन, पन जैना गल्लां तैना होरन शिखालतन ते जैन केरो दावो केरतन तैन एप्पू भी न समझन। 8 अस ज्ञानतम, कि अगर लोक मूसेरे कानूने सही तरीके सेइं शिखालन त तेन रोडू आए। 9 तुस ज्ञानतम मूसेरो कानून धर्मी मैनेरे लेइ नई। पन तैन केरे लेइ आए, जैना परमेशरे कानूनेरो इन्कार केरन ते तैस न मनन, ते जैना परमेशरेरी आराधना न केरन ते जैना लगातार पाप केरतन, ते जैना अशुद्ध आन, ते परमेशरेरी आदर न केरन, ते जैना अपने अम्मा बाजी ते होरि केरे कातलिन। 10 ते कने बदमाशी केरनेबालां, मड़द मड़दन सेइं जिसमानी रिश्तो रखनेबालां, नौकर बेचबालां, झूठ ज़ोने बालां, ते झूठी कसम खाने बालां, ते इन केरे अलावा रोड़ी शिक्षारी खलाफ कम केरनेबालां केरे लेइ आए। 11 ई शिक्षा महान परमेशरेरी महिमारे खुशखबारे मुताबिके, ई परमेशरे मीं होरन शुनानेरे लेइ दितोरीए। 12 अवं अपने प्रभु मसीह यीशुएरु शुक केरताई जैने मीं शक्ति दित्ती, तैने अवं वफादार सेमझतां मीं अपनी सेवा दित्ती। 13 विश्वासी बन्ने करां पेड़लो अवं यीशुएरे बारे मां तुहीन केरनेबालो ते विश्वासी लोकन सताने बालो, ते तैन नुकसान पुजाने बालो थियो। पन परमेशरे मीं पुड़ अपनी दया हिराई, किजोकि मीं हेजू यीशु पुड़ विश्वास न थियो कियोरो ते अवं न थियो ज्ञानतो कि कुन लोरोई केरने। 14 ते इशशे प्रभुए अपनी बड़ो अनुग्रह लगातार हिराव। ते तैनी विश्वास ते प्यार दित्तो, किजोकि अवं तैस सेइं साथी अक भोरो थियो। 15 ई गल सच्चे, ते हर किसमे सेइं मन्ने काबल, कि मसीह यीशु असन पापी लोकन मुक्ति देने इस दुनियाई मां अव, जैन मरां सेबभना

जादे पापी अवं आई। 16 पन परमेशरे मीं पुड़ दया की, एन तैने एल्हेरेलेइ कियूं, कि मेरे ज़िरिये, ज़ैने मैने होरन करां जादे बुराई की, यीशु मसीह तैस पुड़ अपनी पूरी बरदाशत हिरैई बटे, चाए मीं जैन भी कियोरू थियूं। तैने एन कियूं ताके बादे मां होरे लोक विश्वास केरन ते हमेशारी ज़िन्दगी हासिल केरन। (aiōnios g166) 17 हुनी हमेशारो राज़ो, जै सदा ज़ीतोए ते आलाए महान परमेशरेरी आदर, ते महिमा सदा भोती राए। आमीन। (aiōn g165) 18 हे मट्ठां तीमुथियुस, अवं इन्ना हदायतां देने लोरोई: अवं तीं तैना गल्लां याद केरताई जैना बीतोरे वक्ते मां नेबेई तीं ज़ोरी थी। तू तैन गल्लां केरो इस्तेमाल हाथियारां केरो ज़ेरो तैन केरे खलाफ लड़नेरे लेइ केर, जैना झूठी शिक्षा देतन। 19 तू मसीह पुड़ लगातार विश्वास केर ते अपनो ज़मीर भी साफ रख। किछ लोकेई अपने साफ ज़मीरिरो इन्कार कियोरोए तैसेरो नितीजो ई भोव कि तैनेई यीशु पुड़ विश्वास केरनो शारो। 20 तैने मां हुमिनयुस ते सिकन्दरे, जैना मीं शैतानेरी शक्ति मां देइतां तैन सज़ा दित्तोरीए, एस सेइं तैना इन शिखले कि परमेशरेरी तुहीन केरनि बंद केरन।

2 हुनी अवं सेबभन करां बेद्धतां इन ज़ोताई, कि बिनती, ते प्रार्थनां, ते दरखुवासां, सेबभी मैनु केरे लेइ की गान। 2 राज़ां ते सेबभी उच्चे पदे बालां केरा लेइ प्रार्थना केरा, ताके तैना असन सुखे ते बगैर खतरे सेइं ज़ीने देन ते अस परमेशरेरी आराधना केरि बटतम ते होरि लोकन सेइं रोड़ो बताव केरि बटम। 3 इन इशशे मुक्ति देनेबाले परमेशरे रोडू लगते ते पसंद एइते। 4 तै इन चाते, कि सेबभी मैनु मुक्ति मैल्ले; ते तैना सच्चेरे ज्ञाने ज्ञानन। 5 किजोकि सिर्फ अक्के परमेशरे, ते अक मैनु आए जै परमेशर ते लोकां केरो बिचवाई कराने बालो, ते तै मैनु यीशु मसीह आए। 6 सेबभी लोकन पाप ते मौतरी शक्ति करां छुटकारो देनेरे लेइ मसीहे अपनी आप बलिदान कियो। तैसेरे मौतरे ज़िरिये परमेशरे ठीक वक्ते पुड़ सबूत दित्तू कि तै सेबभी लोकन बचानो चाते। 7 ई वजा आए, परमेशरे अवं खुशखबरी प्रचार केरनेबालो ते प्रेरित भोनेरे लेइ चुनो। तैने अवं गैर कौमन विश्वासेरो सच्चे सन्देश शिखालनेरे लेइ चुनो। अवं झूठ नई लोरो ज़ोने बलके सच ज़ोने लोरोई। 8 अवं चाताई, कि हर ठैरी सभान मां मड़द परमेशरेरे लेइ समर्पित हथ खड़े केरतां बगैर सरकां ते बगैर बेंसी सेइं प्रार्थना केरन। 9 तेन्चरे मसीही कुआन्शां भी इज़्जतदार लिगड़ां लेइतां, ते अपनी आप रोड़ेचारे सजेइतां, न कि अलग-अलग किसमे सेइं दोग बाने, ते सोन्ने, ते मोती, ते कीमती लिगड़न सेइं। 10 बलके इसरे बदले तैनेई होरि केरे लेइ रोड़ां कम्मां केरतां अपनी आप खूबसूत लोड़े बनावरो, किजोकि परमेशरेरी भक्ति केरनेबैली कुआन्शन इन शोभा देते। 11 ज़ैखन होरे लोक विश्वासी लोकन शिखालन त सेबभी कुआन्शेई चुपचाप ते आदरी सेइं शुन्तां शिखोरु लोड़े। 12 अवं अज़ाज़त न देई कि कुआन्शां मड़दन शिखालन ते तैन पुड़ अधिकार रखन। ज़ैखन तुस आराधना केरनेरे लेइ अकोट्टे भोथ

त कुआन्शेई चुप लोड़े रावरू। 13 अवं इन एल्हेरेलेइ ज़ोताई किजोकि परमेशरे पेड़लो आदम बनाव, तैसेरे पत्नी हव्वा बनाई। 14 होरि वजा ई आए कि कुआन्शां सप्पे करां धोखो खाव न कि आदमे, एन्चरां हव्वा परमेशरेरो हुक्म टलोड़ो। 15 फिरी भी कुआन्शा बच्चे ज़रमने सेइ परमेशरेरो करां मुक्ति हासिल केरेली, अगर मसीह पुड़ लगातार विश्वास केरती राए, ते होरि लोकन सेइ प्यार केरती राए, ते शुद्ध त कने रोड़े तरीके सेइ बताव केरे।

3 ई गल सच्चे, कि ज़ै कलीसियाई मां अगवो भनो चाते, त तै आदरारे पदेरी इच्छा रखते। 2 ते इन ज़रूरीए कि अगवो बेइलज़ाम भोए, ते तैसेरी अक कुआन्शा लोड़े, ते ते अपने आपे पुड़ कैबू करनेबालो, समझदेरी सेइ ज़िनेबालो भोए, इज़्जतदार भोए, ते ट्लाहना केरि आदर केरनेरे लेइ तियार रानेबालो भोए, ते होरि लोकन परमेशरेरो सन्देश रोड़े चारे शिखालनेरे काबल भोए। 3 तै शराबी या मार-पीट केरनेबालो न लोड़े, बल्के दया केरनेबालो लोड़े, ते लड़ाई न केरनेबालो लोड़े ते पेइसां केरे लालची न भोए। 4 तै अपने घरेरो रोड़े चारे च़लानेबालो ते बन्दो बसत केरनेबालो लोड़े, ते तैनी अपने बचन शिखालोरू लोड़े कि तैना हर गल्ली मां इज़्जती सेइ तैसेरी मनन। 5 ज़ैखन अगर कोई अपने घरेरो बन्दो बसत केरनो न ज़ानतो भोए, त तै परमेशरेरी कलीसियारी हेरगेश केन्चरे केरेलो? 6 तै नंक्वो विश्वासी न लोड़े, एरू न भोए अभिमान केरे ते तैस शैतानेरी ज़ेरि तैस सज़ा मैल्ले। 7 ते ज़ैना लोक विश्वासी नई तैनेई भी तैसेरे बारे मां इन जोरू लोड़े कि ए रोड़ो मैन्हु आए। ताके एरू न भोए कि तै घटिया भोए ते शैतानेरे ज़ाले मां फंसे। 8 तेन्चरे सेवक भी तेरेहे लोड़न ज़ैन केरि लोक आदर केरन। ईमानदार लोड़न, ते पीने बाले न भोन, ते एरे मैन्हु न भोन ज़ैना पेइसां केरे लेइ किछ भी केरि बटतन। 9 पन तैन केरे ज़मीर साफ लोड़न ते ज़ै शिक्षा परमेशरे बांदी कियोरीए, तैस पुड़ लगातार विश्वास केरनेबाले लोड़न। 10 ज़ैखन कलीसियारे सेवक चुने गान त पेइलू तैन केरू चालचलन परखू गाए, कि तैन मां रोड़े गुण आन, ते केन्ची तैन मां कोई गलती न लेइहोए, त फिरी सेवकेरू कम केरन। 11 एन्चरे कलीसियाई मां सेवा केरनेबालां केरि कुआन्शां भी आदरारे काबल भोन, होरन बदनाम केरनेबैली न लोड़न, पन शांत सुभावे बैली, ते सेबभी गल्लन मां ईमानदार भोन। 12 कलीसियारो सेवक अपने कुआन्शरे लेइ वफादार लोड़े, ते बच्चां ते अपने घरेरे सारे लोकां केरो रोड़ो चारे हेरगेश केरनेबालो लोड़े। 13 किजोकि ज़ैना सेवकेरू कम रोड़े चारे केरतन, तैना लोकां केरि नज़री मां इज़्जतदार भोतन। ते तैना अपने तैस विश्वासेरे बारे मां ज़ै यीशु मसीहे पुड़े बड़े दिलेरी सेइ ज़ोतन। 14 अवं तीं कां जल्दी एजनेरी उमीद रखने पुड़ भी इना गल्लां एल्हेरेलेइ लिखताई। 15 अगर मीं एजने मां च़िर लगे, त तू ज़ानस, कि लोकेई परमेशरेरे टब्बरेरे होरि लोकन सेइ केन्चरे बताव कियोरो लोड़े। इन टब्बर तैना लोकन सेइ बनोरू, ज़ैना यीशु पुड़ विश्वास केरतन ते ज़ींते परमेशरेरे कलीसियारेन। इना विश्वासी सच्ची

शिक्षाई मज़बूती सेइ मन्तन ते सम्भालतन जेन्चरे बुनीयाद ते खम्बे इमारती सम्भालतन ते मज़बूत केरते। 16 ते इस मां शक नई, अस पूरे याकीन सेइ ज़ोई बटतम, ज़ैना शिक्षां परमेशरे बैदी की एना बिलकुल सच्ची आन, मतलब, मसीह मैनेरे रूपे मां बांदो भोव, पवित्र आत्मा तै हर कम्मे मां धर्मी ठहराव, स्वर्गदूतेई ते लाव, लोकेई तैसेरे बारे मां कौमन मां प्रचार कियो, सारे दुनियाई मरां लोकेई तैस पुड़ विश्वास कियो, परमेशरे तै उबरे स्वर्गें जो नीयो।

4 पन पवित्र आत्मा साफ ज़ोते, कि आखरी वक्ते मां किछ लोक मसीही शिक्षाई पुड़ विश्वास केरनो बन्द केरेले। तैना दुष्ट आत्मान कबूल केरेले, तैना तैन बुरी बत्ती च़लैली, त कने तैना लोक दुष्ट आत्मां केरि झूठी शिक्षाई पुड़ विश्वास केरेले। 2 इन तैना झूठे पाखंडी लोक आन, ज़ैना इन झूठी शिक्षान शिखालतन, तैन केरो ज़मीर ज़ै रोड़े ते बुरे मां फैसलो केरते मरों आए ते जेन्चरे तात्ते लोहे सेइ तै फुकोरोए। 3 एरे लोक इन शिखालतन कि इला नई बनानो ते खानेरी किछ चीज़ां न लोड़न खेवरी, पन परमेशरे इन खानेरी चीज़ां विश्वासी लोकां केरे खानेरे लेइ बनोरिन ज़ैना सच्ची शिक्षा ज़ानतन कि प्रार्थना केरतां खारू लोड़े। 4 किजोकि परमेशरेरी बनेवरी हर चीज़ रोड़ीए। अस परमेशरेरू शुक्र केरतां सब किछ खेइ बटतम। 5 किजोकि परमेशरेरे वचने, ते प्रार्थनाई सेइ शुद्ध भोते। 6 अगर तू ढ़लान ते बेइन लगातार इन्ना गल्लां याद करातो रालो, ज़ैन केरि हदायत मीं तीं दितोरीए त कने विश्वासेरे सन्देशे ते तैस रोड़ी शिक्षाई सेइ ज़ैस मां तू मज़बूत बनावरोस ज़ै तू मन्तो ओरोस। त तू यीशु मसीहेरो रोड़ो सेवक भोलो। 7 पन बनेवरी कहैनी ते बेकार कहैनी केरे वजाई सेइ वक्त बरबाद न केर ज़ैन सेइ परमेशरेरी आदर न भोए। पन तू लगातार परमेशरेरी आदर केरनेबाली ज़िन्दगी ज़ीनी शिखाल। 8 किजोकि जिसमानी वर्जिशी सेइ जानी फैइदो भोते, पन भेक्तेरे लेइ तियारी बड़ी रोड़ीए किजोकि इस वक्तेरी ते एजनेबाले वक्तेरी ज़िन्दगरो फैइदो इस्से मां आए जेसेरो वादो परमेशरे कियोरोए। 9 ते ई गल सज़, ते हर तरीके सेइ मन्चरे काबल। 10 किजोकि अस मेहनत ते कोशिश एल्हेरेलेइ केरतम, किजोकि इश्शी उमीद तैस ज़ींते परमेशरे पुड़े। ज़ै सेबभी लोकां केरो, ते खास केरतां विश्वास केरनेबालन मुक्ति देनेबालोए। 11 विश्वासी लोकन इना गल्लां शिखाल ते तैन ई हुक्म दे कि तैना इन मनन। 12 तू एन्चरे बताव केर कि कोई भी तेरी अनादर न केरे किजोकि तू जवान आस। पन तू विश्वासी लोकां केरे लेइ इन सैरी गल्लन मां अक मिसाल बन, गलबाती मां, होरन सेइ बताव केरने मां, ते होरन सेइ प्यार केरने मां, ते यीशु मसीह पुड़ विश्वास केरने मां, ते बेइलज़ाम ज़िन्दगी ज़ीने मां ताके लोक भी एन्चरां केरन। 13 ज़ांतगर अवं न एज्जी, तांतगर ज़ैखन विश्वासी लोक अकोट्टे भोतन ज़ोरे सेइ पढ़ने मां, ते तैन केरो होसलो बद्ध ते पवित्रशास्त्रेरो मतलब शिखाल। 14 इस गल्ली याद रख ज़ैखन बुजुर्गां केरे एककी

टोलां तीं पुड हथ रखोरे थिये, परमेशरे तैन अक सन्देश दित्तो कि तैस वरदानेरे बारे मां ज़ोन ज़ै तैने तीं दित्तोरी। तैस वरदानेरे नज़र अनदाज़ न केर। 15 तैन गल्लन सोचतो रा, ते तैन मां अपनू ध्यान लेइतां रख, एन्चरे हर कोई हेरी बटेलो कि तू विश्वासे मां बढने लोरोस। 16 इस गल्लरू ध्यान रख कि तू केन्चरे ज़ीतस ते केन्चरे शिखालतस। इसेरो नितीजो ई भोलो कि परमेशरे इन्साफे मां तेरे ज़िरिये तीं ते तेरे शुन्नेबालन बचालो।

5 बुढे मैन्हु न झिड़क पन तैस एन्चरे आदरी सेइं सल्लाह दे जेन्चरे अपने बाजी, एप्पू करां निकड़े मैन्हु एन्चरे सल्लाह दे जेन्चरे अपने निकड़े ढ़लाए। 2 बुढी कुआन्शन सेइं एन्चरे बर्ताव केर जेन्चरे अम्मा सेइं, ते जवान कुआन्शन सेइं एन्चरे बर्ताव केर जेन्चरे अपने बेइनी सेइं। इन साफ दिले सेइं केर। 3 तैन विधवां केरि आदर केरा, ज़ैन केरो कोई हेरगेश केरनेबालो नई तैन केरू ध्यान रख्खा। 4 ते अगर कोन्ची विधवांरां मट्ठां या पोट्लड़ां या थियोडां भोन, ते तैन पेइलू अपने घरेरे लोकां केरू ध्यान रख्खा तैन परमेशरी भक्ति केरनि शिखोरी लोड़े। ते तैना एन केरतां अपने अम्मा-बाजी ते दादा देदी केरू हक देन, किजोकि इन परमेशरे पसंद एइते। 5 ज़ै विधवा आए ते तैसेरो ध्यान रखनेबालो कोई नई, ते परमेशरे पुड उमीद रखतीए, ते रात दिहैडी बिनती ते प्रार्थनाई मां परमेशरे करां मदत मगतीए। 6 पन ज़ैना विधवां अपनो सारो वक्त एशे मां बितातिन तैना जिसमानी रूपे सेइं त ज़ीतिन पन आत्मिक रूपे सेइं मेरीन। 7 इन गल्लां केरो भी हुक्म दे कि तैना बेइलज़ाम रान। 8 पन अगर कोई अपने रिश्तेदारां केरि ते खास केरतां अपने घरानेरू ध्यान न रख्खे, ते तै विश्वासे करां मुकरोरोए, ते ज़ै विश्वास न केरे तैस करां बुरो बनोरोए। 9 तैस्से विधवांरू नवं लिखू गाए, ज़ै शठ सालन करां घट न भोए, ते अपने मुन्शे सेइं वफादार रावरी भोए। 10 ते होरे लोक तैसेरे बारे मां ज़ानते भोन कि तैसां हमेशा रोड़ां कम्मां कियोरन। जेन्चरे कि, तैसां बच्चे रोड़े च़ारे पाले, ते तैना विश्वासी लोक अपने घरे मां आने, ज़ैना सफरे मां थिये, जेन्चरे होरि लोकां केरि सेवा कियोरी भोए, ते तैन लोकां केरि मदत कियोरी भोए ज़ैना मुसीबती मां थिये, ते ज़ैसां हर किसमेरां रोड़ां कम्मां कियोरां भोन। 11 पन जवान विधवां केरां नंवां न लिख, किजोकि ज़ैखन तैन केरि जिसमानी इच्छा तैस वादे करां शक्ति बाली भोती, ज़ै तैनेई विधवा रेइतां मसीहेरी सेवा केरनेरे लेइ कियोरोए, त तैना इला बनानो चैतिन। 12 दुबारां इला केरतां तैना दोषी भोतिन, किजोकि तैनेई अपनो पेइलो वादो बरकरार नई रखोरो। 13 एन्चरे तैना घरे-घरे फिरतां आलसी भोनु शिखतिन, ते सिर्फ आलसी नई, पन होरि केरे खलाफ गल्लां केरतिन, ते होरि केरे कम्पन मां दखल देतिन, ते तैना गल्लां ज़ोतिन ज़ैना न लोइन ज़ोरी। 14 एल्हेरेलेइ अव इन चाताई, कि जवान विधवां इला बनान; ते तैन बच्चे भोन ते घरबार सुमालन, ते दुश्मन् बदनाम केरनेरो मौको न देन। 15 किजोकि किछ जवान विधवां कुआन्शेई परमेशरे करां दूर

भोइतां शैताने पत्ती चलनू शुरू कियोरू। 16 अगर कोन्ची विश्वास केरनेबालेरी टब्बरे मां विधवां भोन, त तैए तैन केरि मदत केरे न तैन केरि ज़िमेवारी कलीसियाई पुड भोए। तैखन कलीसिया तैस विधवारी मदत केरि बटते जेसेरो कोई न भोए। 17 ज़ै बुजुर्ग रोड़े च़ारे कम केरते तै आदर हासिल केरनेरे ते बराबर तनखाएरे काबले, खास केरतां तैना ज़ैना परमेशरेरू वचन शुनाने, ते शिखालने मां बड़ी मेहनत केरतन। 18 किजोकि पवित्रशास्त्र मां इन लिखोरूए, “कि तू जोटलोरे दांतेरू आशी न बेन्थाँ,” किजोकि, “मज़दूर अपने मज़दूरां हकदारि।” 19 कोई दोष कोन्ची बुजुर्गे लव गाए, त ज़ांतगर दूई या जादे लोक न ज़ोन कि असेई ए पाप केरतो लावरोए, तांतगर न शुन। 20 ज़ैना लोक पाप केरतन तैन सेबभी विश्वासी लोकां केरे सामने झिड़क, ताके होरे विश्वासी लोक भी डरन। 21 परमेशर ते मसीह यीशु, ते चुनोरे स्वर्गदूत हाज़र सेमझतां अव तीं हादयत देताई, ध्यान राए कि तू केन्चरो इन्साफ जल्दी न केरस, ते कोन्चेरी तरफदारी न केर। 22 कलीसियारो बुजुर्ग चुनेरे बारे मां जल्दी कथे नई केरनि। ते होरि केरे पापन मां शामिल न भो, अपनो आप पवित्र बनोरो रख। 23 अग्रोव जो पानी न पी, पन अपने पेटेरे ते अपने बार-बार बिमार भोनेरे लेइ थोड़ो-थोड़ो दाछारो रस भी कम्मे मां आन। 24 अव ज़ोताई कि जल्दी बुजुर्ग नई चुने, किजोकि किछ लोक खुले आम पाप केरतन, इन्साफे करां पेइले भी तैना विश्वासी लोकां केरे सामने दोषी आन। हांलाकि होरि लोकां केरे पाप बांदे न भोन पन बादे मां पिशाने गातन। 25 एन्चरे ज़ैखन लोक रोड़ां कम्मां केरतन, त तैन होरि विश्वासी केरे ज़िरिये हेरू गाते। अगर तैना तैन एककी बारे साफ च़ारे लेई बटन, आखर तैना तैन पिशानेले।

6 ज़ैना विश्वासी लोक गुलाम आन, तैनेई हर तरीके सेइं अपने मालिकां केरि आदर कियोरी लोड़े ताके होरे लोक परमेशरी ते इश्शे शिक्कारी तुहीन न केरन। 2 ते ज़ैना मालिक विश्वासी भोन, त तैन केरू मसीह पुड विश्वास केरनेरे वजाई सेइं तैन केरि बराबर इज़्जत की गाए, बल्के तैन केरे लेइ होरू भी जादे कम कियोरू लोड़े। किजोकि इस सेइं फैइदो नेनेबाले विश्वासी आन ते तैना गुलाम तैन सेइं प्यार केरतन, इन गल्लां केरि शिक्षा दे ते इन होसलो दे कि तैना इन सब केरन। 3 किछ लोक इश्शे शिक्कारी खलाफत केरि बटतन, पन इना यीशु मसीहेरी रोड़ी शिक्षां आन। इना शिक्षां भेक्करी ज़िन्दगी बढेतिन। 4 ज़ै कोई अलग शिखालते तै अभिमानी ते तै किछ न समझे। एरे ज़ेरे मैन्हु गैर ज़रूरी मुद्दां ते लफसां केरो मतलब ज़ान्नेरे लेइ होरन सेइं बेंस ते तर्क केरतन। ज़ैन केरो नितीजो जलन, ते लड़ाई ते तुहीनरी गल्लां, ते बुरी-बुरी शक, 5 ते मैन्नु मां बेफैइदी लड़ेई पैदा भोतिन, ते ज़ैन केरे मन बुरे शक्की सेइं भेरोरेन, ते तैना लगातार होरन सेइं बेंस केरतन, ते तैना सेझी न बटथ कि सच कुने, तैना समझतन परमेशरे बारे मां शिक्षा देनी कमाई केरनेरो ज़िरियोए। 6 पन इश्शे इन लेइ इन रोड़ कि अस तैन केरम ज़ैस सेइं परमेशर

खुश भोए ते जैन परमेश्वर असन देते तैस सेइं अस राज्ञी भोम। किछ लोकेईं इन झूठू ज्ञान कबूल कियोरूए, एन्चरे केरनेरे सेइं
 7 ते न असेईं दुनियाईं मां किछ आनोरू, ते न किछ नेही बटम। तैनेईं मसीहेरे सच्चरी शिक्षान पुड़ विश्वास केरनो शारो। परमेश्वरो
 8 ते अगर असन कां किछ खाने पीने ते लाने जो भोए, ते इस्से अनुग्रह तुसन सेबन पुड़ भोतो राए।
 मां खुश रहम। 9 पन जै धनी भोनो चाए, तैना इन सब पाप
 केरतां बड़े आसान तरीके सेइं धोखो खातन, जेन्चरे जानवर
 ज़ाले मां फसतन तेन्चरे तैना फसतन। तैना इन केरनू चातन
 जैन तैन केरे लेइ बेवकूफी ते खतरोए, ते एरी इच्छां तैन बरबाद
 ते नाश केरनेरे पासे नेतिन। 10 किजोकि पेइंसां केरू लालच
 सेबनी किसमेरे बुरेइं अरू वजाए, किछ लोकेईं बले-बले मसीह
 पुड़ विश्वास केरनो शारो किजोकि तैना धनी भोनू चाते थिये, ते
 तैनेईं तैस मैनेरो ज़ेरो बड़े तरीकन सेइं दुःख झैल्लो जै अपने
 आपे कोन्ची हथियारे सेइं ज़खमी केरते। 11 पन हे तीमुथियुस,
 तू परमेश्वरो मैनुस, तीं इन गल्लां न लोड़न कियोरी, सिर्फ जैन
 ठीके तैन केरनेरे लेइ हर किसमे सेइं कोशिश केर। एरी ज़िन्दगी
 ज़ी ज़ैस सेइं परमेश्वरेरी आदर भोती, मसीह पुड़ भरोसो केर,
 होरि लोकन सेइं प्यार केर, मुश्किल वक्ते मां हिम्मत रख, ते
 होरि लोकन सेइं नेरमी सेइं बर्ताव केर। 12 जेन्चरे अक रोड़ो
 सिपाई जंगी मां लड़ेईं मां हार न मन्ने, तेन्चरे तू भी परमेश्वरे पुड़
 भरोसो रखने मां ते तैसेरी गल मन्ने मां हार न मन्ने। ते तैस
 हमेशारी ज़िन्दगी मज़बूती सेइं ठेमां रख, जेसेरे लेइ तू परमेश्वरे
 कुजावरोस, ते जेसेरे बारे मां तीं बड़े लोकां केरे सामने दिलेरी
 सेइं ज़ोरू थियू कि तू मसीह पुड़ विश्वास केरतस। (aiōnios g166)
 13 अवं तीं परमेश्वरे सामने जै सेबन ज़िन्दगी देते, ते मसीह
 यीशुएरे सामने ज़ोताईं, जैन पुन्तियुस पिलातुसेरे सामने रोड़ी
 गवाही दित्ती, ई हुक्म देताईं। 14 जैन किछ परमेश्वरे तीं केरनेरे
 लेइ हुक्म दित्तोरो तैन सब किछ पूरू केर, ताके यीशु मसीह
 ज़ांतगर वापस न एज्जे तीं पुड़ कोई दोष न लेईं बटे तू कुन
 गलत केरने लोरोस। 15 सिर्फ परमेश्वर तै राज़ोए जै बड़यैयरे
 काबले, तै महान राज़ो ते महान प्रभुए, तैए मसीहे सही वक्ते पुड़
 बांदो केरेलो। 16 सिर्फ तैए हमेशा ज़ांतो रहते, ते तै तैस महिमा
 बैली लोईं मां रहते ज़ैस कां कोई न एज्जी बटे। तैसेरी आदर ते
 शक्ति हमेशा राली। आमीन। (aiōnios g166) 17 इस दुनियारे
 दौलतमंदन हुक्म दे, कि तैना घमण्डी न भोन ते चंचल धने पुड़
 उमीद न रखन, पन परमेश्वरे पुड़ जै इश्शे सुखेरे लेइ बडू हछछू
 देते। (aiōn g165) 18 ते तैन ज़ो कि तैना अपने पेइंसे रोड़ें कम्मां
 केरे लेइ इस्तेमाल केरन ते भलाई केरने मां दौलतमंद बनन ते
 हमेशा तियार रान होरन खुल्ले दिले सेइं देनेरे लेइ ज़ो। 19 एन्चरे
 केरने सेइं तैना अपना रोड़ें कम्मां खज़ानेरे ज़ेरे जमा केरेले,
 ज़ैना तैन केरे लेइ एजनेबाले वक्ते स्वर्गें मां मज़बूत मुनीयादरां
 ज़ेरां भोलां। ते तैना तै सच्चरी ज़िन्दगी हासिल केरेले जै हमेशारे
 लेइ आए। 20 हे तीमुथियुस इस गल्ली पुड़ ध्यान दे कि जैन
 परमेश्वरे तीं केरनेरे लेइ दित्तोरूए तैन्ने केर। दुष्ट ते बेकार गल्लन
 करां ते तैन शिक्षान करां बैचता रा, ज़ैना परमेश्वरेरी सच्चरी शिक्षां
 केरि खलाफत केरतन, तैस तैना ज्ञान ज़ोतन पन तैन गलते। 21

2 तीमुथियुस

1 अवं पौलुस ई चिट्ठी लिखने लोरोई। परमेशरे अवं यीशु मसीहो प्रेरित भोनेरे लेइ चुनो, ताके अवं इस सन्देशो प्रचार केरि कि परमेशरे यीशु मसीह पुइ विश्वास केरनेरे जिरिये वादो कियो कि हमेशारी ज़िन्दगी देलो। **2** अवं ई चिट्ठी तीमुथियुसे लिखने लोरोई, जैन मेरे मठेरू जेरूए, हे तीमुथियुस अवं प्रार्थना केरताई बाजी परमेशर ते इश्शे प्रभु यीशु मसीह तीं अनुग्रह ते दया ते शान्ति देतो राए। **3** जैस परमेशरेरी सेवा अवं अपने दादे पड़दादां केरे रिति पुइ शुद्ध ज़मीरे सेइं केरताई, तैसेरू शुक्र भोए, कि अवं अपनी प्रार्थनान मां तीं रात दिहैड़ी याद रखताई। **4** मीं यादे ज़ैखन अस अलग भोने लोरे थिये तैखन तू केन्चरे लेरां देने लोरो थियो, ते तीं सेइं मिलनेरी बड़ी इच्छा रखताई कि ज़ैखन मिली त अवं आनन्द सेइं भरी गेइ। **5** ते अवं तेरे अम्मा यूनिके ते तेरी नानी लोइसेरो तै सच्चे विश्वास याद केरताई। तेरो विश्वास भी तेरहो आए, ते मीं याकीने तीं मां भी आए। **6** एल्हेरेलेइ अवं तीं याद कराताई, कि तू परमेशरे तैस वरदाने जैन मेरे हथ रखने सेइं तीं मैल्लोरू थियूं चमका। **7** किजोकि परमेशर अस डरपोक नई बनावे बल्के तैसेरो आत्मा इश्शे दिलन मज़बूत केरते, ते मदत केरते कि अस होरि लोकन सेइं प्यार केरम ते ताके आपे कैबू मां रखम। **8** एल्हेरेलेइ होरि लोकन प्रभु यीशुएरे बारे मां ज़ोने करां शरमा ते एल्हेरेलेइ शरमा कि अवं प्रभुएरी सेवा केरनेरे लेइ कैदे मां आई। बल्के तू परमेशरे तैस शक्ति इस्तेमाल केर ते मीं सेइं साथी खुशखबरे लेइ दुःख झल्लने मां शामिल भो। **9** परमेशरे असन मुक्ति दिती, ते अस पवित्र ज़िन्दगी जीनेरे लेइ कुजाए, तैने अस एल्हेरेलेइ नई कुजवरे कि असेईं रोड़ां कम्मां कियां, किजोकि दुनिया बनाने करां पेड़लो परमेशरेरो ई मकसद थियो कि ते यीशु मसीह इश्शे लेइ इस दुनिया मां भेजतां असन पुइ अनुग्रह हिराए। (aiōnios g166) **10** पन हुनी इश्शे मुक्ति देनेबाले यीशु मसीह ओरोए ते तैनी अपनो अनुग्रह हिरावरोए। तैने मौतरी शक्ति नाश की, तैने असन खुशखबरे जिरिये हमेशारे ज़िन्दगीरि बत हिराई। **11** इस खुशखबरे लेइ परमेशरे अवं प्रचारक ते प्रेरित ते शिक्षा देनेबालो चुनो। **12** एल्हेरेलेइ अवं कैदखाने मां दुःख भी झैल्लने लोरोई, पन शरमेई न, किजोकि अवं मसीहे ज्ञानताई जैस पुइ मीं विश्वास कियोरोए, ते मीं याकीने, कि जैन मसीहे दितोरू जांतगर तै वापस न एज्जे तांतगर तै तैसेरी रखवाली केरि बटते। **13** जैना रोड़ी शिक्षां तीं मीं करां शुनोरिन तैन तू मिसालरे रूपे मां रख, इन तू विश्वासे ते प्यारे सेइं साथी केर, किजोकि तू मसीह यीशु सेइं साथी अक भोरोस। **14** ते तैस सच्चेरी रखवाली केर, जैन पवित्र आत्मा जिरिये सेइं तीं सोंफेरू, जै असन मां रहते। **15** तू ज्ञानतस, कि आसिया इलाकेरे बड़े विश्वासी लोक जैनेईं अवं शारोरोई, जैन मां फूगिलुस ते हिरमुगिनेसे भी अवं शारो। **16** उनैसिफूरुसेरे घराने पुइ प्रभु दया केरे, किजोकि तै बड़े बार मीं कां अव ते मीं

होसलो दितो, ते मीं सेइं कैदखाने मां एज्जेरे लेइ न शरमाव। **17** पन ज़ैखन तै रोम नगरे मां अव, त बड़े कोशिश सेइं तोप्तां मीं सेइं मुलाकात केरि। **18** प्रभु इन्साफेरे दिहाड़े अपनि महान दया उनैसिफूरुसे पुइ हिराए। तू एप्पू रोड़े चारे ज्ञानतस कि इफिसुस नगरे मां तैनी मेरी केत्री मदत की।

2 एल्हेरेलेइ हे मेरे मठ्ठां तीमुथियुस, तू अपने आपे मज़बूत केर इन जैनतां कि परमेशरे तीं अनुग्रह दितोरू, जै सिर्फ यीशु मसीह सेइं अक भोइतां मैलते। **2** तीं बड़े लोकां केरे सामने जै मसीहेरे सन्देशी शिक्षा मीं करां शुनोरिन। एल्हेरेलेइ अवं चाताई कि तैए सन्देश तू होरि विश्वासी लोकन शिखाल, जैना वफादार भोन ते होरन शिखालनेरे काबल भोन। **3** बिलकुल तेन्चरे जेन्चरे अक सिपाही जंगरे मैदाने मुश्किल हालातन मां सबरी सेइं झैल्लते, तेन्चरे तू भी मुश्किल हालातन मां सबरी सेइं दुःख झैल्ल जेन्चरे अस यीशु मसीहेरे लेइ झैल्लतम। **4** अक सिपाही ज़ैखन फौजी मां नौकरी केरते त तै होरि किसमेरू कम न केरे, किजोकि तै अपने भरती केरनेबाले खुश केरनू चाते। **5** फिरी आखाड़े मां घुल्लने बालो अगर कानूनेरे मुताबिक न घुल्ले त तैस ताज न मैल्ले। **6** जै ज़मीनदार मेहनत केरते, फसलरे पेड़ले हिस्सेरो हकदार तैए भोते। **7** जैन अवं ज़ोताई, तैस पुइ ध्यान दे, ते प्रभु तीं सेबभी गल्लां केरि समझा देलो। **8** लगातार याद रख कि यीशु मसीह कौने, तै दाऊदेरे खानदेनी मरां आए, ते परमेशरे तै मुइदन मरां ज़ींतो कियो ते ईए खुशखबरी अवं लोकन शुनाताई। **9** अवं खुशखबरी शुनाताई एल्हेरेलेइ अवं मुजरामेरो ज़ेरो दुःख झैल्लताई, इड़ी तगर कि कैदे मां आई, पन कोई भी लोकन परमेशेरू वचन प्रचार केरने करां न रोकी बटे। **10** एल्हेरेलेइ अवं तैन लोकां केरे फैइदेरे लेइ दुःख झल्लताई जैना परमेशरे चुनोरिन, ताके तैना भी यीशु मसीह पुइ विश्वास केरतां मुक्ति हासिल केरन ते हमेशारी महिमा हासिल केरन। (aiōnios g166) **11** ई गल सच्चे, कि अगर अस तैस सेइं साथी मरे त तैस साथी ज़ींते भी भोमेले। **12** अगर अस तैसेरे वजाई सेइं दुःख झैल्लते रहले, त तैस सेइं साथी राजां केरू जेरू अस भी राज केरमेले, अगर अस तैसेरो इन्कार केरमेले कि अस तैस न ज्ञानम, त तै भी इश्शो इन्कार केरेलो। **13** अगर अस मसीह सेइं साथी वफादार न भोम, त तै फिरी भी वफादार बनोरो रालो, किजोकि तै अपने रूबावेरे खलाफ न गेइ बटे। **14** जैना गल्लां मीं तीं सेइं ज़ोरिन तैन तू अपने लोकन बिसरने न दे, ते प्रभुए गवाह रेखतां तैन खबरदार केर, कि लफसन पुइ बेंस न केरन, जैस सेइं किछ फैइदो न भोए, बल्के शुन्ने बालां केरो बड़ो नुकसान भोते। **15** बड़ी मेहनत केर ताके तू परमेशरेरे सामने कबूल भोनेरे काबल भोस, तू एरे मैनेरो ज़ेरो भोनेरी कोशिश केर जै अपने कम्मे सेइं वजाई सेइं शरमिनदा न भोए, ते जै सच्चे सन्देश ठीक तरीके सेइं शिखालतो भोए। **16** पन बेकार ते बेवकूफ गल्लन करां दूर राए, किजोकि एरी गल्लां परमेशरे करां दूर केरतिन। **17** ते तैन केरि गल्लां मैनेरे शड़ोरे ज़खेमेरी

जेरि फैलतां लोकां केरे विश्वासे नाश केरतिन। ते हुमिनयुस ते सच्चरे सन्देशेरे खलाफत केरतन जेन्चरे यन्नेस ते यम्बेसे मूसेरी फिलेतुस तैन केरे जेरे आन। 18 तेनेई सच पुड़ विश्वास केरनो खलाफत कियोरी थी। तैन केरे मन बुरेन ते तैन केरो मसीह पुड़ बंद कियो। तैना ज़ोतन परमेशेरे पेड़ले मरे विश्वासी लोक हमेशेरी विश्वास सच्चो नई। 9 तैन केरि कामयाबी सिर्फ थोड़े वक्तेरीए, जिन्दगरे लेड़ जीते कियोरेन। एसोरो नितिजो ई भोते कि किछ किजोकि जेन्चरे लोकेई यन्नेस ते यम्बेस पिशानोरे थिये कि लोक मसीहेरी शिक्षाई पुड़ विश्वास केरनो बंद केरतन। 19 तैना बेवकूफन। तेन्चरे हर कोई इन भी पिशानेलो कि इना भी परमेशेरे लोक पक्की मुनीयादारे जेरे आन जै हिल्ले न। इस मुनीयादी पुड़ एरे लफस लिखोरेन: “प्रभु ज्ञानते तेसेरे लोक कौन आन, ते इन भी कि जैना प्रभुएरी आराधना केरतन तेनेई ते एवं कुन विश्वास केरताई। तू ज्ञानतस एवं सबर केरतो बुरां कम्मां केरनां बंद कियोरां लोड़न।” 20 एक्की अमीर घरे मां किछ सोन्नेरे ते चैदरां भांडां भोतन ते लेकड़ारां ते मितरां भोतन। माघां भांडां खास मौके पुड़ इस्तेमाल केरनेरे लेड़ भोतन ते सस्तां रोज़ इस्तेमाल केरनेरे लेड़ भोतन। 21 तेन्चरे विश्वासी लोक जैना अपनो आप एन सैरी बुरी चीज़न करां अलग केरे त तै कीमती भांडेरो जेरो भोलो जैन खास मौके पुड़ इस्तेमाल कियूं गाते, जेसेरी जिन्दगी पवित्र भोली त तै अपने मालिकेरे इस्तेमाल भोनेरे काबल भोलो। 22 जवैनीर खुवैइशन करां दूर रा, ते जैना मैन्हु शुद्ध मन सेइ प्रभुएरु नवं घिन्तन, तैन सेइ साथी धार्मिकता, प्यार, ते मेल मलापेरो पीछो केर। 23 एवं फिरी ज़ोताई तू अपनो आप बेवकूफी, ते बेफैइदी गल्लन करां दूर रा, किजोकि तू ज्ञानतस, कि तैन सेइ लड़ाई भोतिन। 24 ते परमेशेरो दास लड़ाको न लोड़े, पन सेबन्न दया केरनेबालो ते परमेशेरे वचनेरी रोड़े चारे शिक्षा देनेबालो, ते जैना लोक तैसेरे खलाफ भोन तैन सेइ सबर केरनेबालो लोड़े। 25 ते जैना लोक तैसेरी खलाफत केरन तैन बड़े नेरमी सेइ शिखालेनेबालो लोड़े, भोड़ सकते परमेशर तैन लोकां केरि मदत केरे कि तैना मन फिरान, ते मसीहेरी सच्च्वाई पिशानन 26 ते एरे लोक दुबारां फिरी साफ तरीके सेइ सोचनेरे काबल भोले ते शैतानेरे धोखे करां जै ज़ालेरे जेरोए बचले। शैताने तैना फासवरे थिये कि जैन तै चाते तैना तैन करां कराए।

3 ध्यान दे एवं हुन्ना कुन ज़ोने लोरोई, कि दुनियारे आखरी दिहाड़न मां बुरो वक्त एजनीए। 2 किजोकि लोक सिर्फ अपने आपे सेइ प्यार केरेले, दौलतरे लालची, बड़कां मारनेबाले, अभिमानी, होरन बेइज़्ज केरनेबाले, अम्मा-बैपू केरू ज़ोंनू न शुन्ने बाले, होरि केरू शुक्र न केरनेबाले, अपवित्र, 3 होरन सेइ प्यार न केरनेबाले, माफ़ न केरनेबाले, दोष लाने बाले, अपनि इच्छान पुड़ कैबू न केरनेबाले, सखत, सच्चे सेइ नफरत केरनेबाले। 4 धोखो देनेबाले, ढीठ, ते अभिमानी ते परमेशेरे नई बल्के एशेरे चानेबाले भोले 5 तैना भेक्करू रूप त बनाले पन तैस शक्ति न मन्नेले जै तैन भक्त बनाथी, एरे जेरे लोकन सेइ संगती न रेखां। 6 एन्ने मां तैना लोकन, जैना लोकां केरे घरन मां गेड़तां बेवकूफ कुआन्शन अपने वशे मां केरतन, जैन केरे मन पापे सेइ देबोड़तां हर किसमेरी खुवैइशन मां आन। 7 ते हमेशा नर्वी-नर्वी गल्लां त शिखती रैतिन, पन तैना मसीहेरी सच्च्वाई शिक्षाई कथे न सेमझी बटन। 8 इना झूठे उस्ताद मसीहेरे

4 ज़ेखन मसीह यीशु राज़ेरो जेरो राज़ केरने एज्जेलो त तै जीति ते जैना मरैन, लोकां केरो इन्साफ केरेलो, एवं तीं परमेशेरे ते मसीहे गवाह रेखतां हुकम देताई। 2 कि तू परमेशेरेरू वचन प्रचार केर, वक्त बे वक्ते तियार रा, तू लोकन जैना बुरां कम्मां तेनेई कियां हिरा, तैन केरे पापां केरे लेड़ तैन झिड़क पन तैन होसलो भी दे ते तैन सबरी सेइ शिखाल। 3 किजोकि एरो वक्त एजनीए, कि लोक रोड़ी शिक्षा न शुन्नी चाले, पन तैना अपने मेर्जी पुड़ चलनू चाले ते तैना अपने लेड़ बड़े उस्ताद तोप्पेले जैना तैन सेइ तैन ज़ोन जैन तैना शुन्नु चातन। 4 तैना तैन करां शुन्नु न चाले जैना परमेशेरेरू सच्चू वचन शुनातन पन तैना झूठी कहनी शुन्नी चाले (जैना मैन्हु केरि बनेवरिन)। 5 पन तू अपनो आप कैबू मां रख चाए किछ भी की न भोए, इस मां तीं जैना भी दुःख भी झैल्लेने पेन त झाल, खुशखबरी शुनानेरे लेड़ बड़ी प्रचार केर, ते जैन कम परमेशेरे तीं केरनेरे लेड़ दितोरो तैन पूरे केर। 6 एवं इना हुकम तीं देताई किजोकि मेरी जिन्दगी ते परमेशेरे लेड़ कम खतम भोवरूए किजोकि एवं ज्ञानताई एवं जल्दी मरेलो। 7 मीं जंगी मां रोड़ी सिपेहेरे जेरे जै लड़ाई केरने मां कथी हार

न मन्ने, तू भी मसीहेरे लेइ बड़ी मेहनत केरनि कथे हिम्मत न हार, मीं तैन कम पूरू कियूं जैन मसीह यीशुए मीं केरनेरे लेइ दितोरू थियूं, मीं वफादेरी सेइं खुशखबरी प्रचार की। 8 हुनी, प्रभुएरे मेरे लेइ स्वर्गे मां इनाम रखेरू किजोकि मीं तैस खुश केरनेबाली जिन्दगी जीयोरीए। प्रभु जै धर्मी इन्साफ केरनेबालोए मीं इन इनाम तेइस देलो जेइस ते वापस इन्साफ केरनेरे लेइ एज्जेलो। पन इन इनाम सिर्फ मेरे लेइ नई, पन तैन सेबभी केरे लेइ भी आए, जैना तैसेरे एजनेरी बड़ी इच्छा रखतन। 9 मीं कां जल्दी एजनेरी कोशिश केर। 10 किजोकि देमासे इस दुनियारी चीजन सेइं प्यार केरतां अवं शारो, ते तै थिस्सलुनीके नगरे जो चलो जेव, ते क्रैसकेंस गलातिया इलाके जो जेव ते तीतुस दलमतिया इलाके जो चलो जेव। (aiōn g165) 11 सिर्फ लूका मीं सेइं साथीए, जैखन तू एजस त मरकुसे भी एप्पू सेइं साथी एना, किजोकि तै इड़ी मेरे मदत केरनेरे काबले। 12 तुखिकुस मीं इफिसुस नगरे जो भेजोरोए। 13 जैखन तू एजस त तै चोगो एना जै मीं त्रोआस नगरे मां मरकुसेरे घरे रखोरोए। ते मेरे चर्मपत्र भी एना, खास केरतां तै जै छेल्ली केरे खेडू सेइं बनोरोए। 14 सिकन्दर ताम्बेरू कम केरनेबाले मीं बड़े बारे दुःख दितोरोए, प्रभु तैस तैसेरे बुरे कर्मां केरे मुताबिक बदलो देलो। 15 तू भी तैस करां खबरदार रा, किजोकि तैने इश्शे शिक्षारी बड़ी खलाफत की जै मसीहेरे बारे मां आए। 16 जैखन पेइले बार अवं आदालती मां अपनो आप बचाव केरनेरे लेइ जोरो थियो त कोई भी मीं सेइं साथी न थियो। पन तैना सारे मीं शैरतां चले जे, परमेशर इन तैन केरे खलाफ न गने। अवं प्रार्थना केरताई परमेशर तैन हछु माफ़ केरे। 17 पन प्रभु मेरो मदतगार राव, तैने मीं हिम्मत दिती, ते अवं यीशु मसीहेरी खुशखबरी शूनानेरे काबल भोव कि सारे गैर कौमां केरे लोक शुन्न, ते तैने अवं मौती करां एन्चरे बचाव जेन्चरे शेरे करां। 18 ते प्रभु मीं हर एक्की बुरे हमले करां बचालो ते अपने स्वर्गेरे राज्जे मां हफाजती सेइं पुजालो, सारे महिमा हमेशा-हमेशा परमेशेरी भोती राए। आमीन। (aiōn g165) 19 मेरू नमस्कार प्रिस्का ते तैसेरे घरे बाले अक्विला ते कने उनेसिफुरुसेरे घराने दे। 20 इरास्तुस कुरिन्थुस नगरे मां रावरोए, ते त्रुफिमस मीं मीलेतुस नगरे मां बिमार शारोरोए। 21 हीवतड़ेरे पेइले एजनेरी कोशिश केर, ते यूबूलुस ते पूदेस ते लीनुस ते क्लौदिया, ते इठेरे सारे विश्वासी लोकेई नमस्कार भेजेरू आए। 22 अवं प्रार्थना केरताई प्रभु तीं सेइं साथी भोए, ते तैसेरो अनुग्रह तुसन सेबन पुड़ भोतो राए।

तीतुस

1 अवं पौलुस ई चिट्ठी लिखने लोरोई। अवं परमेशरेरो दास ते यीशु मसीहेरो प्रेरित आई। अवं परमेशरेरे चुनोरे लोकां केरे विश्वास मजबूत केनेरे लेइ ते तैन केरि मद्दत केनेरे लेइ चुनोरोई, कि तैना यीशु मसीहेरी सच्ची शिक्षा ज्ञानन ताके तैना एरी जिन्दगी ज़िन ज़ैस सेइं परमेशर खुश भोए। **2** तैसेरो नितीजो ई भोए कि तैना परमेशरेरे सेइं हमेशा रानेरी उमीद रखन, परमेशर ज़ै कद्दे झूठ न ज़ोए, तैने दुनिया बनाने करां पेड़लो वादो कियोरो थियो, कि तैसेरे लोक हमेशा लेइ जीयेले। (aiōnios g166) **3** ते हुनी परमेशरे ठीक वक्ते पुड़ ई खुशखबरी असन पुड़ बांदी की ज़ै अस सेबभन प्रचार केरतम। इश्शे मुक्ति देनेबाले परमेशरे ई ज़िमेवारी मीं दितोरीए ते तैसेरेलेइ इन कम केनेरे लेइ मीं हुक्म दितोरोए। **4** अवं ई चिट्ठी तीतुसे जो लिखने लोरोई। तू मेरे मट्टे ज़ेरू आस, किजोकि ज़ेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इश्शो बाजी परमेशर ते इश्शो मुक्ति देनेबालो प्रभु यीशु मसीह तीं अनुग्रह त कने शान्ति देतो राए। **5** मीं तू एल्हेरेलेइ क्रेते टैपू मां शारोरो थियो, ताके तू तैड़ी इश्शु कम पूरू केरस, ते होरि नगरन मां बुजुर्ग चुन ज़ेन्चरे तीं केनेरो हुक्म दितोरो थियो। **6** लीडर बेइलज़ाम लोड़े ते अपने कुआन्शी सेइं वफादार लोड़े, ज़ैन केरे बच्चे विश्वासी भोन ते बुरो बताव केनेबाले न भोन ते तैना अपने अम्मा बाजी केरो हुक्म मन्नेबाले भोन। **7** किजोकि रखवालो परमेशरेरो भण्डारी भोने वजाई सेइं बेइलज़ाम लोड़े, न अपनि च़लानेबालो, न सेरकलो, न शराबी, न लडाकी, ते न पेइसां केरो लालची लोड़े। **8** पन मेहमानां केरि आदर केनेबालो, होरि केरि भलाई केनेबालो, अपने आपे पुड़ कैबू केनेबालो, धरमात्मा, पवित्र ते अपने इच्छान कैबू केनेबालो लोड़े। **9** ते तै यीशु मसीहेरे तैस सन्देशे पुड़ ज़ै भरोसेरे काबले मज़बूती सेइं विश्वास केनेबालो लोड़े, ज़ै असेईं तैस शिखालोरोए। ताके तै होरन सही शिक्षाई मन्नेरे लेइ होसलो देइ बटे ते ज़ैना गलत भोन तैन सुधैरी बटे। **10** अवं इन एल्हेरेलेइ ज़ोताई, किजोकि बड़े लोक सही शिक्षारी खलाफ केरेले, ज़ैना बेकार गल्लां शिखालतन ते होरन धोखो देतन। इन खास केरतां किछ यहूदी केरे लेइ सच्च आप ज़ैना विश्वासी बनोरेन (इना तैना लोकन ज़ैना चातन कि सारे मसीही लोक यहूदी केरे कानूने मनन, खास केरतां खतनेरे कानूने)। **11** एन लोकन शिखालनेरी अज़ाज़त न दे, किजोकि ज़ैखन तैना इन गल्लन शिखालतन, ज़ैना तैनेईं शिखैलोरी लोड़न, त तै सारे टब्बरां केरे विश्वासे बरबाद केरतन। तैना इन एल्हेरेलेइ केरतन कि पेइसो कमेई बटन। **12** अक मैन्हु क्रेत टैपेरो आए ज़ैस जो तैना अक्लमन्द ज़ोतन तैने ज़ोरूए, “क्रेतेरे लोक हमेशा झूठे, जंगली जानवरों केरो ज़ेरो बताव केनेबाले, तैना आलसी ते हमेशा अदंग खानेबाले भोतन।” **13** इन गल्लां क्रेतेरे लोकां केरे बारे मां सच्ची आन। एल्हेरेलेइ तैन खबरदार केर, कि तैना यीशु

मसीहेरी शिक्षाई पुड़ विश्वास केरन। **14** ते यहूदी केरि बनोवरी कहैनी ते ज़ैना लोक सच्चे करां दूर भोरेन तैन केरे हुक्म शुन्ने बंद केरा। **15** ज़ैन लोकां केरे मने मां पापी खियाल नई तैन केरे लेइ रीतरे मुताबिक सब किछ शुद्धे। पन तैन लोकां केरे लेइ ज़ैना बुरेन ते यीशु मसीह पुड़ विश्वास न केरन तैन केरे लेइ किछ भी शुद्ध नई ज़ैन तैना केरतन। **16** तैना झूठे उस्ताद ज़ोतन कि अस परमेशरे ज़ानतम, पन तैन केरां कम्मां साफ तरीके सेइं हिरातन कि तैना तैस न ज़ानन, किजोकि परमेशर तैन सेइं नफरत केरते ते तैना हुक्म न मन्नेबालेन, ते किछ भी रोड़ू केनेरे काबल नई।

2 पन हे तीतुस तू विश्वासी लोकन तैन शिखाल ज़ैन यीशु मसीहेरे बारे मां सही शिक्षा रे मुताबिक ठीके। **2** बुद्धे मड़दन शिखाल कि अपने आपे पुड़ कैबू केनेबाले बनन, ते तैनेईं एरो बताव केरन कि लोक तैन केरि आदर केरन, ते समझादैरी सेइं बताव केनेबाले भोन। ते तैना परमेशरेरे पुड़ मज़बूती सेइं विश्वास केनेबाले बनन, होरन सेइं प्यार केनेबाले ते सबर केनेबाले बनन। **3** एन्चरे बुद्धी कुआन्शन शिखाल कि एरी जिन्दगी ज़िन ज़ैस सेइं परमेशरेरी आदर भोए। तैना होरन पुड़ दोष लाने बैली, ते पीने बैली नई, पन ते तैन ज़ो कि तैन होरन तैन शिखालन ज़ैन रोड़ूए। **4** ताके तैना जवान कुआन्शां केरे लेइ मिसाल भोन ते तैन शिखालनेरे काबल भोन कि अपने मुन्शन ते बचन सेइं केन्चरे प्यार केरन। **5** ते तैना अपने आपे कैबू केनेबैली, अपने मुन्शां केरे लेइ वफादार, ते घरेरो कारोबार केनेबैली, भलाई केनेबैली ते अपने-अपने मुन्शां केरे अधीन राने बैली भोन, ताके परमेशरेरे वचनेरी तुहीन न भोए। **6** एन्चरे जवान मड़दन भी अक्लमन्द भोइतां ज़ीनेरे लेइ समझा। **7** हर गल्ली मां तू हमेशा अपनो आप अक मिसाल बना, ताके तैन भी एन्चरे केरन। ज़ैखन तू परमेशरेरे बारे मां शिखालस त रोड़े मकसदे सेइं शिखाल। एन्चरे लोक तेरी आदर केरेले। **8** ते ज़ैन सच्चे तैन शिखाल ते ज़ेसेरी आलोचना न भोए, ताके तेरे दुश्मन छिथोन, किजोकि फिरी कोई बुराई नई भोनी ज़ेसेरी तैना खलाफ केरि बटन। **9** ज़ैना विश्वासी गुलाम आन तैन शिखाल कि हमेशा अपने मालिकां केरि गल मनन। तैन ज़ो कि तैन केरन ज़ैस सेइं तैन केरे मालिक खुश भोन ते कम्मेरे बारे मां शिकायत न केरन। **10** घोरी न केरन, पन इन साबत केरन कि तैना हमेशा ईमानदारन, ताके लोक तैन केरे रोड़े बतवि हेरन ते ज़ैन तैना केरतन तैन लोकां केरे लेइ, इश्शे मुक्ति देनेबाले परमेशरेरो सन्देश शुन्नेरी वजा भोली। **11** किजोकि परमेशरे सेबभी लोकन मुक्ति देनेरे लेइ अक बत देइतां अपनो अनुग्रह हिराव। **12** परमेशर अपने अनुग्रहेरे ज़िरिये असन शिखालते, परमेशर असन शिखालते कि अस तेरहो बताव न केरम ज़ैस सेइं तै खुश भोए। ज़ेन्चरे गैर विश्वासी चीज़ां केरू लालच केरतन तुस एरू न केरा, तुस ज़ांतगर इस दुनियाई मां आथ, अक्लमन्द ते धर्मी लोकां केरो ज़ेरो ते एरो ज़ेरो बताव केरा ज़ैस सेइं परमेशर खुश भोते। (aiōn g165) **13** अस तैस अनोखी दिहैड़ी उमीदी

मां रातम, कि जेइस इश्शो महान परमेशर ते मुक्ति देनेबाले मद्दत भोली कि तैना एक्की मकसदे सेइं ज़िन्दगी ज़िंन। 15 सारे यीशु मसीह महिमाई सेइं साथी वापस एज्जेलो। 14 एने यीशु विश्वासी लोक ज़ैना मीं सेइं साथी आन तीजो नमस्कार ज़ोतन। मसीहे अपनो आप इश्शे लेइ बलिदान कियो ताके असन पापेरे इश्शे विश्वासी सैथी लोकन ज़ैना असन सेइं प्यार केरतन तैन शक्ति करां छुटकारो दे, ताके अस शुद्ध भोम ते तैसेरे अपने नमस्कार। अवं प्रार्थना केरताई प्रभु तुसन सेब्भन पुड़ अनुग्रह लोक बनम ज़ैना रोड़ां केरतन। 15 इना गल्लां शिखाल ते अपनो केरतो राए। पूरो अधिकार इस्तेमाल केर, ते अपने शुन्नेबालन होसलो दे ते झिड़क दे। कोई तीं घटया न समझे।

3 विश्वासी लोकन याद करा, कि हाकिमां ते अधिकैरी केरे अधीन रान, ते तैन केरो हुक्म मन्न, ते हमेशा रोड़ो केरनेरे लेइ तियार रान। 2 कोन्ची बदनाम न केरन, लड़ाके न भोन, पन नर्म सुभावरे भोन, ते सेब्भी मैनन् सेइं साथी बेड़ि नेरमी सेइं रान। 3 किजोकि अस भी पेड़ले बेअक्ल ते हुक्म न मन्नेबाले थिये ते लोकेई असन धोखो दित्तोरो थियो। बड़े खुवैइशां ते एशेरे केरनेरे गुलाम थिये, इश्शी ज़िन्दगी दुष्टे ते जलनी सेइं भरोरी थी ते एक्की होरि सेइं नफरत केरते थिये। 4 पन फिर भी इश्शे मुक्ति देनेबाले परमेशरेरे असन लोकन पुड़ दया ते प्यार हिराव। 5 तैने अस इश्शे पापां केरि सज़ाई करां बचाए एल्हेरेलेइ नई कि असेईं रोड़ां कम्मां कियोरां थियां, पन तैसेरे दयारे वजाई सेइं। तैन इश्शे पाप धोइतां असन नंवू ज़र्म दित्तू ते पवित्र आत्मा देनेरे ज़िरिये असन नर्वीं ज़िन्दगी दित्ती। 6 परमेशर पवित्र असन मुफते मां दित्तो कि इश्शे ज़िन्दगी मां शक्ति सेइं कम केरे, किजोकि यीशु मसीह इश्शो मुक्ति देनेबालो बन्नेरे लेइ इश्शे पापां केरे लेइ मरो। 7 परमेशरे इन कियू ताके तै अपने अनुग्रहे सेइं अपने नज़री मां धर्मी बनाए, ताके अस तैसेरे बच्चे बनम ते पूरे तरीके सेइं हमेशा तैस सेइं साथी रानेरे उमीदी सेइं केरम। (aiōnios g166) 8 ई गल सज़े, अवं चाताई कि तू इन शिक्षान पुड़ ज़ोर दे ताके सब ज़ैना परमेशरे पुड़ भरोसो रखतन तै अपनो आप रोड़ू केरनेरे लेइ सॉफिले, इना शिक्षां सेब्भी केरे लेइ रोड़ी ते फैइदामंद आन। 9 पन बेवकूफी बेंस ते पूर्वजां केरे नव्वां केरे बारे मां, ते लड़ाई ते तैन ते मूसेरे कानूनेरे बारे मां लड़ाई करां दूर रा, किजोकि तैन सब बेकार ते बेफैइदू आए। 10 ज़ैना लोक कलीसियाई मां फिरके बनानेरी वजा बनतन, कम से कम दूई बार तैन खबरदार केर कि तैना एन न केरन, तैट्ठां बाद अपनो वक्त तैन पत्ती बर्बाद न केर। 11 तुस ज़रूर ज़ैनी बटतथ एरो ज़ेरो मैन्हु ज़ैनी बुज़झतां गलत बत्तां च़लते, ते तैन अपना बुरां कम्मां इन साबत केरतन कि तैना पापिन। 12 अवं अरतिमास या तुखिकुसे तुसन कां भेजनेरे लेइ बिस्तार बनाने लोरोई, ज़ैखन तैन मरां अक तीं कां पुज़ते त निकुपुलिस नगरे मां मीं सेइं मिलनेरी पूरी कोशिश केर, किजोकि मीं तैड़ीए हिवतड़ो कटनो थापोरोए। 13 ज़ैखन जेनास शास्त्री ते अपुल्लोस तैट्ठां गानेरे लेइ तियार भोन त ज़ेन्नू भोइ बटे तैन केरि मद्दत केर, ताके तैन कोन्ची भी चीज़री घटी न भोए। 14 सिर्फ इन नई, बल्के तू विश्वासी लोकन शिक्षा देतो रा, कि तैना रोड़ां कम्मां केरन ताके तैन लोकां केरि मद्दत केरन ज़ैन ज़रूरत आए। इस सेइं तैन केरि

फिलेमोन

1 अवं पौलुस ई चिट्ठी लिखने लोरोई। अवं कैदे मां आई किजोकि अवं यीशु मसीहेरे बारे मां प्रचार करताई। हे फिलेमोन तीं इश्शे ढूला तीमुथियुस ते मेरे तरफां नमस्कार। तू इश्शो ढूलारो दोस्तस आस ते जेन्चरे अस मसीहेरे लेइ कम केरतम तेन्चरे तू भी केरतस। 2 अवं इश्शी विश्वासी बेइन अफफिया ते इश्शे सैथी अरखिप्पुस जै सिपेहेरे जेरो प्रभुएरी सेबा करते, ते तैन कलीसियारे लोक जैना तेरे घरे मां अकोट्टे भोतन, तैन भी लिखने लोरोई, 3 अवं प्रार्थना करताई, इश्शे बाजी परमेशर ते प्रभु यीशु मसीह तुसन पुड़ अनुग्रह केरे ते तुसन शान्ति दे। 4 अवं जैखन भी तेरे लेइ प्रार्थना करताई, तेरे लेइ अवं परमेशरेरु शुक्र करताई। 5 किजोकि मीं प्रभु यीशु मां तेरे विश्वासेरे बारे मां ते परमेशरेरे लोकां केरे लेइ तेरे प्यारे बारे मां शुनू। 6 अवं प्रार्थना करताई तेरी संगती जै विश्वासी लोकन सेइं साथीए, तुश्शे तैन रोड़ि चीजां केरे ज्ञानेरे जिरिये जैना परमेशरे दित्तोरिन बढ्दती गाए। इन मसीहेरे महिमारे लेइ भोतू राए। 7 किजोकि हे ढूला, अवं तेरे प्यारे सेइं जै तू मीं केरतस बड़ो खुश आई, ते मीं बड़ो होसलो भोव, एल्हेरेलेइ कि तेरे प्यारेरे जिरिये होरि परमेशरेरे लोकन भी होसलो मैल्लो। 8 अवं तीं किछ केरनेरे लेइ पुछताई जैन तीं कियोरू लोड़े। अवं मसीहेरो दित्तोरे अधिकारे इस्तेमाल केरतां इन केरनेरे लेइ हुक्म देइ बटतो थियो, पन अवं न केरेलो। इसेरे बदले मां, अवं बल्हे चारे ज़ोताई कि तू इन केर, किजोकि अस एक्की होरि सेइं ते परमेशरेरे लोकन सेइं प्यार केरतम। अवं पौलुस हुनी सियाने मैनेरे रूपे मां तीं पुछतई, अवं लोकेई कैदे मां बंद कियोरोई किजोकि अवं यीशु मसीहेरी सेवा करताई। 10 अवं उनेसिमुसेरे लेइ मिनत करताई जैन मेरे लेइ मट्टेरू जेरूए। तैन मसीह मां मेरू मट्टू इड़ी कैदखाने मां बनू। 11 ते बीतारे वक्ते मां तेरे लेइ केन्ची कम्मरो न थियो, पन हुनी तेरे त कने मेरे दुइयां केरे बड़े कम्मरोए। 12 अवं उनेसिमुसे तीं कां वापस भेजने लोरोई, तैस सेइं अवं पूरे दिले सेइं प्यार करताई। 13 अवं ज्ञांतगर खुशखबरी प्रचार केरनेरे वजाई कैदखाने मां आई तांतगर तैस अपनि मदत केरनेरे लेइ इड़ी एप्पू सेइं साथी रखनो चातो थियो। ताके तै तेरे ठैरी मेरी मदत केरे, किजोकि अवं ज्ञानताई तू मेरी मदत केरनि चातस। 14 पन मीं तेरी मेर्जी बगैर किछ भी केरनू न चाव, अवं चाताई तू ई मेरी मदत केर, किजोकि तू इन केरनेरे लेइ खुश आस ते एल्हेरेलेइ नई कि अवं इन केरनेरे लेइ दबाव बनाने लोरोई। 15 शैइद परमेशरे उनेसिमुस एल्हेरेलेइ तीं करां नश्शने दित्तो, ताके तै मसीह पुड़ विश्वास केरे, ते तैसेरो नितीजो ई भोए कि तै हमेशा तीं सेइं साथी राए। (aiōnios g166) 16 पन हुनी ते तेरो गुलाम नई, बल्के गुलामे करां भी बेद्धतां आए। तै हुनी तेरो ढूलारो विश्वासी ढूला आए। अवं तैस सेइं बड़ो प्यार करताई, पन तीं तैस अपने गुलामेरे रूपे मां होरो भी प्यार कियोरो लोड़े किजोकि तै मसीह मां अक ढूलाए।

17 अगर तू मीं शामिल समझतस, त जैखन उनेसिमुस वापस तीं कां एज्जे त तैस एन्चरे कबूल केर जेन्चरे मीं। 18 ते अगर तैने किछ तेरो नुकसान कियोरोए, या तेरे किछ पेइंसां केरो कर्जो भोए त अवं तैसेरे बदले देइलो। 19 अवं पौलुस अपने पेइलू ज्ञानतस, अगर मीं तेरी मदत न भोथी कियोरी त तीं अपने आपे सेइं न भोथू मैलोरू, मेरो कर्जो जै तीं पुड़े तै तेरी अपनि जिन्दगी आए। 20 हे मेरे ढूलारे दोस्त, साथी विश्वासी भोनेरे वजाई सेइं इन मेरे लेइ केर ते मसीह मां मीं खुश केर। 21 मीं ई चिट्ठी लिखोरीए, किजोकि मीं याकीन कि जैन केरनेरे लेइ ज़ोरू तैन तू केरेलो। हकीकति मां अवं ज्ञानताई तू तैस करां भी बड़ जादे केरेलो, जैन केरनेरे लेइ मीं ज़ोरूए। 22 ते अक होरि गल, तू अपने घरे मां मेरे लेइ अक कमरो तियार केर। किजोकि मीं उमीदे परमेशर तुश्शे प्रार्थनां केरो जुवाब देलो ते तीं कां फिरी एजने देलो। 23 इपफ्रास, जै यीशु मसीहेरी खुशखबरी प्रचार केरनेरे वजाई सेइं मीं साथी कैदीए तै तीं नमस्कार ज़ोते। 24 ते मरकुस ते अरिस्तर्खुस ते देमास ते लूका जैना प्रभुएरू कम मीं सेइं साथी केरतन तींजो नमस्कार ज़ोतन। 25 इश्शे प्रभु यीशु मसीहेरो अनुग्रह तुसन पुड़ भोतो राए। आमीन।

इब्रानियों

1 परमेश्वरे बड़े पेड़ले इश्शे दादे पड़दादन सेइं बड़े बारे ते अलग-अलग किसमे सेइं नेबी केरे ज़िरिये गल्लां की। **2** पन इन आखरी दिहाइन मां परमेश्वरे असन सेइं अपने मट्टेरे ज़िरिये गल्लां की, ज़ैन तेनी सैरी चीज़ां केरू बारस ठहराव ते तैसेरे ज़िरिये परमेश्वरे सारी स्रष्टि बनाई। (aiōn g165) **3** मट्टू परमेश्वरेरी महिमारू प्रकाश आए, ते तैन हर किसमे सेइं परमेश्वरेरू ज़ेरू आए, तैन्ने सैरी चीज़न अपने शेक्तेर वचनेरे ज़िरिये सेइं संभालते, तैन्ने लोकन पापन करां शुद्ध केरतां स्वर्ग मां परमेश्वरेरी महिमा मां देइने पासे बिश्वू। **4** एन केरने सेइं परमेश्वरे मट्टू, स्वर्गदूतन करां महान कियूं, ते ज़ैन नवं तैस दित्तू जेवं तैन स्वर्गदूतन करां महान आए। **5** किजोकि परमेश्वरे स्वर्गदूतन मरां कोन्ची सेइं कथे नईं ज़ोरू, “तू मेरू मट्टू आस; अज़ अवं इन बांदू केरताई तू मेरू मट्टू आस” ते फिरी परमेश्वरे केन्ची स्वर्गदूते सेइं इन नईं ज़ोरू, “अवं तैसेरो बाजी भोड़लो, ते तैन मेरू मट्टू भोलू” **6** ते फिरी परमेश्वरे अपने पेड़ले मट्टे दुनियाई मां भेजनें करां पेड़लू, इन ज़ोवं, “परमेश्वरे सब स्वर्गदूत तैस कां मथ्यो टेकन।” **7** परमेश्वर स्वर्गदूतां केरे बारे मां इन ज़ोते, “तै अपने स्वर्गदूतन हवारे ज़ेरे बनाते, ते अपने सेवकन अगारे लपारे ज़ेरे बनाते।” **8** पन परमेश्वरे अपने मट्टेरे बारे मां ज़ोते, ‘हे परमेश्वर तेरू राज़ सदा रालू, ते तू इन्साफे सेइं राज़ केरेलो। (aiōn g165) **9** ज़ैन रोड़ए तैस केरने सेइं तू प्यार केरतस ते ज़ैन गलते तैन केरने सेइं नफरत केरतस; एल्हेरेलेइ तेरे परमेश्वरे तू चुनोरोस ते तेरे सैथन करां जादे तीं आदर ते आनन्द दित्तोरोए।’ **10** ते पवित्रशास्त्र इन भी ज़ोते, ‘हे प्रभु, तीं शुरू मां दुनियारी रचना की,’ ते ज़ैन किछ अम्बरे मां आए तैन तीं बनावं। **11** तैन सब किछ खतम भोड़ गानूए; पन तू हमेशा रालो; ते तैन सब किछ लिगड़ां केरू ज़ेरू पुरानू भोड़ गालू। **12** ते तू तैन चादरारू ज़ेरो बनालो, ते तैन लिगड़ां केरू ज़ेरू बेदलोई गालू; पन तू कथे न बेदलोस; ते तेरी ज़िन्दगी कथी खतम न भोली। **13** ते परमेश्वरे स्वर्गदूतन मरां केस सेइं किताली ज़ोवं, ‘तू मेरे देइने पासे आदरारे ठैरी बिश,’ ते अवं तेरे दुश्मन तेरे अधीन केरेलो।” **14** तैना सब स्वर्गदूत सिर्फ परमेश्वरेरे सेवक आन; परमेश्वरे तैना तैन लोकां केरि हिफाज़त केरनेरे लेइ भेजोरेन ज़ैन मुक्ति मैलोरीए।

2 एल्हेरेलेइ, ज़ैना गल्लां असेईं शुनोरिन, तैन पुड़ असेईं होरो भी मन लेइतां ध्यान कियेरू लोड़े, कोस्कोई एरू न भोए, कि असां टेपलोइतां तैन करां दूर चले गाम। **2** किजोकि ज़ैन वचन परमेश्वरे स्वर्गदूतां केरे ज़िरिये ज़ोरू थियूं, तैन सच्चू साबत भोवं, ते हर एककी पाप केरनेबाले ते हुक्म न मन्नेबाले सज़ा मैल्ली। **3** त असन भी सज़ा मैलेली, अगर अस एनी महान मुक्ति करां बे खबर राए त। ज़ेसेरे बारे मां पेड़ले प्रभुए एप्पू ज़ोरूए, ते ज़ैन चेलेई एन प्रभु करां शुनोरू थियूं तैन केरे ज़िरिये असन याकीन भोवं कि एन सच्चू आए। **4** परमेश्वरे भी निशान

ते चमत्कार ते बड़ों-बड़ों कम्मां केरे ज़िरिये ते अपने मेरज़रे मुताबिक लोकन पवित्र आत्मारें ज़िरिये वरदान देइतां इन साबत कियूं। **5** परमेश्वरे एजने बैली दुनिया ज़ेसेरे बारे मां अस ज़ोने लोरेम, स्वर्गदूत केरे अधीन मां न की पन प्रभु यीशुएरे अधीन की। **6** बल्के पवित्रशास्त्रे मां कोस्कोई केन्चे परमेश्वरे सेइं एन ज़ोरूए, “मैन्हु कुन चीजे, ज़ेसेरे बारे मां तू सोचतस? या इन्सान कोने, कि तू तैसेरी फिक्र केरतस? **7** तीं तै शक्ति मां किछ वक्तेरे लेइ स्वर्गदूतन करां थोड़ो ज़ेरो घट कियो, ते तीं तैस राज़ेरी ज़ेरि महिमा ते आदर दित्तोरीए, ते तैस अपने हथ्यां केरे कम्मन पुड़ अधिकार दित्तो। **8** तीं तैस सेबभी चीज़न पुड़ अधिकार दित्तोरोए,” ज़ैखन सब किछ तैसेरे अधिकारे मां कियूं, ते किछ भी बाकी न रखवू, ज़ैन तैसेरे अधीन न भोए। पन असां हुन्ना तगर सैरी चीज़ां तैसेरे अधिकारे मां न लहम। **9** पन असां यीशु लहतम, ज़ै स्वर्गदूतन करां किछ वक्तेरे लेइ निकड़ो कियोरो थियो, ताके तै परमेश्वरेरे अनुग्रहे सेइं सेबभी केरे लेइ अपनि जान दे। किजोकि यीशुए दुख बरदाश कियो ते मरो, ते हुनी अस ज़ानतम कि तैस महिमा ते आदर दित्तोरीए। **10** परमेश्वरे सब किछ बनाव, ते तै सब किछ अपने लेइ सुमेलतां रखते। परमेश्वरे ठीक कियूं ज़ैन तेनी दुखेरे ज़िरिये यीशु सिद्ध कियो, ताके तै बड़े लोकन महिमा मां पुजाए। किजोकि यीशु ही आए ज़ै असन मुक्तेरे पासे नेते। **11** किजोकि पवित्र केरनेबालेरो ते पवित्र भोने बालां केरो बाजी अक्के, एल्हेरेलेइ यीशु तैन जो ढूला बेइन ज़ोने करां न शरमाए। **12** पन मसीह परमेश्वरे सेइं ज़ोते, “अवं अपने लोकन इन ज़ोएलो कि तीं मेरे लेइ इन कियोरूए ते तैन केरे सभाई मां तेरे नव्वेरू गीत ज़ोड़लो।” **13** ते फिरी तै ज़ोते, “अवं तैस पुड़ भरोसो रेखेलो।” ते फिरी तै ज़ोते, “अवं तैन लोकन सेइं साथी भोनोई, ज़ैना परमेश्वरे मीं दित्तोरेन।” **14** किजोकि जेन्चरे परमेश्वरेरे बच्चे, मैन्हु आन, तेन्चरे यीशु भी तैन केरो ज़ेरो मैन्हु बनो। परमेश्वरे एन एल्हेरेलेइ कियूं ताके तैसेरे मौतरे ज़िरिये शैताने बरबाद केरे ज़ेस कां मौतरो अधिकार थियो। **15** ते एन्चरे तेनी तैना आज़ाद किये ज़ैना मौतरे डरे सेइं सैरी उमरी गुलामेरे ज़ेरे ज़ीते थिये। **16** किजोकि प्रभु यीशु स्वर्गदूतां केरि नईं बल्के अब्राहमेरे वंशरी मदत केरते। **17** एल्हेरेलेइ यीशु मसीहे हर गल्ली मां मैन्हु केरो ज़ेरो बनू ज़रूरी थियूं, ताके सेबभी केरे पापां केरे बलिदानेरे लेइ परमेश्वरेरे सामने दया केरनेबालो ते ईमानदार महायाजक बने। **18** किजोकि यीशुएरी अज़मैइश कीजेई ते तेनी एप्पू दुःख झेल्लोरोए, एल्हेरेलेइ तै तैन लोकां केरि मदत केरि बटते, ज़ैना आज़मैइशरो सामनो केरतन।

3 एल्हेरेलेइ हे विश्वासी ढूलाव ते बेइनव, तुस परमेश्वरे स्वर्ग मां तैस सेइं शामिल भोनेरे लेइ कुजोरेथ। एल्हेरेलेइ प्रभु यीशुएरे बारे मां ध्यान देथ ज़ै इश्शे लेइ परमेश्वरेरी बिस्तार आन्ने बालो दूत ते महायाजक आए ज़ेसेरो अस इकरार केरतम। **2** यीशु परमेश्वरेरे लेइ वफादार थियो, ज़ैनी ते ठहरावरो थियो, जेन्चरे मूसा भी परमेश्वरेरे लोकां केरि सेवाई मां वफादार थियो। **3**

किजोकि घर बनानेबालो घरे करां जादे इज्जतरे काबल समझो गाते, तेन्नेरी यीशु भी मूसा करां जादे इज्जतरे काबल समझो जेव। 4 किजोकि हर घरेरो कोई न कोई बनानेबालो जरूर भोते, पन जैनी सब किछ बनावं तै परमेशरे। 5 मूसा त परमेशरेरो सेवक भोने सेइं परमेशरेरे घरेरे लोकन मां वफादार राव। ताके तैना गल्लां केरि बटे, जैना परमेशर एजनेबाले वक्ते मां ज़ोनेबालो थियो। 6 पन मसीह मट्टू भोनेरे वजाई सेइं परमेशरेरे लोकां केरू मुखतियारे, ते असां तैसेरे लोकम, शर्त एने कि असां तैस दिलेरी ते उमीदी मज़बूत रखम, जैस पुड़ असां भरोसो केरतम। 7 बस्सा पवित्र आत्मा जोते, “अगर अज़ तुस परमेशरेरी आवाज़ शुनथ। 8 त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ, ज़ैखन तैनेई परमेशरेरे खलाफ खलाफत की, ते ज़ेन्नेरे तैस दिहाड़े तुशे दादे पड़दादेई ज़ेइस तैना सुनसान ठैरी मां थिये, तैनेई परमेशरेरी अज़मैश की। 9 तैड़ी तुशे दादे-पड़दादे 40 सालन तगर मेरां महान कम्मां हेरनेरे बाद भी, अवं चनोती देइतां अज़माव। 10 एल्हेरेलेइ अवं तैस वक्तेरे लोकन पुड़ क्रोधे भोव, ते मां ज़ोवं, तैना हमेशा मेरो इन्कार केरतन, ते ज़ेन केरनेरो मां हुक्म दित्तोए तैन केरने करां इन्कार केरतन। 11 एल्हेरेलेइ मां एपनी सरकी मां कसम खाइ, कि तैना तैस ठैरी कथे दाखल न भोले ज़ैड़ी अवं तैन आराम देथो।” 12 हे ढूलाव ते बेइनव खबरदार राथ, तुसन मरां केन्चेरो दिल एत्रो बुरो ते बेईमान न भोए, कि ज़ै तैस ज़ीते परमेशरे करां दूर केरे। 13 पन ज़ांतगर तै दिहाड़ी ज़ैस जो अज़ ज़ोतन, रोज़ एक्की होरि हिम्मत देते राथ, एरु न भोए कि तुसन मरां कोई पापेरे धोखे मां एइतां परमेशरेरे लेइ सखत दिल न भोइ गाए। 14 किजोकि अगर असां अपने पेइले विश्वासे पुड़ अपने मौती तगर लगातार मज़बूत रातम, त अस अकोट्टू कम केरने मां मसीह सेइं साथी जुड़तम। 15 ज़ेन्नेरे पवित्रशास्त्रे मां लिखोरूए, “अगर अज़ तुस तैसेरी आवाज़ शुनथ त तुस अपने दिले सखत न केरा, त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ, ज़ैखन तैनेई परमेशरेरे खलाफ खलाफत की।” 16 तैना लोक कौन थिये, ज़ैनेई परमेशरेरी आवाज़ शुन्तां भी तैसेरे खलाफ खलाफत की? तैना सब लोक तैना थिये ज़ैना मूसेरे ज़िरिये मिस्स मुलखे मरां निसोरे थिये। 17 तैना कौन लोक थिये, ज़ैन सेइं परमेशर 40 सालन तगर क्रोधे राव? तैना लोक तैना थिये, ज़ैन ज़ैनेई पाप कियो ते मेरतां तैन केरि लाशां सुनसान ठैरी मां रेइ जेई। 18 ज़ैखन परमेशरे क्रोधे मां कसम खाइ, कि तैना तैस ठैरी कथे दाखल न भोले ज़ैड़ी अवं तैन आराम देथो, हकीकति मां तै तैन केरे बारे मां ज़ोतो थियो ज़ैनेई हुक्म न थियो मन्नोरो। 19 बस्सा, असन हुनी पतो लगे, कि तैना विश्वास न केरनेरी वजाई सेइं तैड़ी दाखल न भोइ सके।

4 एल्हेरेलेइ ज़ैखन परमेशरेरो ए वादोए कि असां तैस आरामे मां दाखल भोइ सकतम, ते असेई खबरदार राहेरू लोड़ते, ताके कोस्कोई एरु न भोए, कि तुसन मरां कोई तैस मां दाखल

भोने करां एरो रेइ गाए। 2 किजोकि ज़ेन्नेरे असेई यीशु मसीहेरी खुशखबरी शुनी, तेन्नेरे इसाएली लोकेई भी आरामेरे ठैरी दाखल भोनेरी खुशखबरी शुनोरी थी। पन तैनेई तैस पुड़ विश्वास न कियो, एल्हेरेलेइ ते सन्देश तैन केरे लेइ बेफैइदो भोव। 3 पन असेई ज़ैनेई विश्वास कियो, परमेशरेरे तैस वादो कियोरे आरामे मां दाखल भोतम, ज़ेन्नेरे परमेशरे ज़ोरू थियू, “मीं अपने क्रोधे मां कसम खाइ, कि तैना तैस ठैरी कथे दाखल न भोले ज़ैड़ी अवं तैन आराम देथो।” परमेशरे एन एल्हेरेलेइ नई ज़ोरू, किजोकि हेजू तगर आरामेरी ठार तियार न थी, पन तै ठार दुनिया बनानेरे वक्ते करां तै तियार आए। 4 किजोकि परमेशरे सत्तोवं दिहाड़े बारें मां पवित्रशास्त्रे मां एन्नेरे ज़ोरू आए, “परमेशरे अपना सब कम्मां खतम केरतां सत्तोवं दिहाड़े आराम कियो।” 5 ते अस भी इन पढ़तम कि तैनी बादे मां ज़ोवं, “एना मेरे आरामेरे ठैरी कथी दाखल न भोले।” 6 तैना इसाएलेरे लोक ज़ैनेई पेइली ई खुशखबरी त शुनी, पन आरामेरे ठैरी दाखल भोने मां कामयाब न भोए, किजोकि तैनेई परमेशरेरे हुक्म न मन्ने। पन हुन्ना भी किछ लोकां केरे लेइ आरामेरे ठैरी दाखल भोनेरे लेइ मौको आए। 7 एल्हेरेलेइ परमेशरे कोई होरो वक्ते अपने आरामेरे ठैरी मां दाखल भोनेरे लेइ ठहरावरो, तै वक्त अज़ आए, इश्शे दादे पड़दादेई खलाफ केरनेरे बड़े सालना बाद परमेशरे दाऊदेरे ज़िरिये ज़ोवं, ज़ेन्नेरे तैने ज़ोवं “अगर अज़ तुस तैसेरी आवाज़ शुनथ, त अपनो दिल सखत न केरा।” 8 अगर यहोशूए तैना लोक आरामे मां दाखल करावरे भोथे त बादे मां परमेशरे होरि दिहाड़े बारे मां गल न थी केरनि। 9 एल्हेरेलेइ परमेशरे लोकां केरे लेइ एरी ठार तियार आए ज़ैड़ी तैना पूरे तरीके सेइं आराम केरि बटतन। तैना तेन्नेरे आराम केरेले ज़ेन्नेरे परमेशरे सत्तोवं दिहाड़े आराम कियोरो थियो। 10 किजोकि ज़ै कोई परमेशरेरे आरामे मां दाखल भोते त तै परमेशरेरो ज़ेरो अपने कम्मन पूरे केरतां आराम केरते। 11 एल्हेरेलेइ एज्जा अस भी तैस आरामेरी ठैरी मां दाखल भोनेरी कोशिश केरम, ताके कोई भी मैन्हु इसाएली लोकां केरे ज़ेरो हुक्म न मेन्तां तैस आरामेरी ठैरी दाखल भोने करां रेइ न गाए। 12 किजोकि परमेशरेरू वचन ज़ाँतू ते शक्ति बालू आए, ते हर दूई धारण बैली तलवारी करां भी जादे तिख्खू आए। ते तैन प्राण ते आत्माई गहराई तगर चीरते, ज़ेन्नेरे तिख्खी तलवार जोइन ते हेदी केरे अन्नीयां मासे वारां पार चिरतां निसतीए ते दिलेरे खियाल ते मैनेरो इरादो भी ज़ानते। 13 दुनियारी कोई भी चीज़ परमेशरेरी नज़री करां छप्पोरी नई, बल्के तैसेरे सामने सब चीज़ां खुल्ली ते बेदिन, ते असेई तैस, ज़ैन किछ भी अपने पूरे ज़िन्दगी मां कियोरू तैसेरो हिसाब देनो पेनोए। 14 बस्सा, एज्जा अस अपने विश्वासे पुड़ मज़बूत रहम। किजोकि इश्शो अक महान महायाजके, ज़ै स्वर्गे मां जोरोए, यानी परमेशरेरू मट्टू यीशु। 15 किजोकि इश्शो महायाजक इश्शी सैरी कमज़ोरी समझते। किजोकि शैताने तै सेब्वी गल्लन मां इश्शो ज़ेरो अज़माव, पन तैनी कोई पाप न

कियो। 16 एल्हेरेलेइ एज्जा असां दिलेरी सेइं, अनुग्रह देनेबाले परमेशरेरे तखतेरे सामने च़लम, ताके तै असन पुइ अनुग्रह ते दया केरे ते ज़रूरतरे मौके तै इश्शे मदत केरे।

5 परमेशरे हर महायाजक इसाएली लोकन मरां चुनो, ते परमेशरे महायाजक, लोकां केरि तरफां अपनि सेवा केराने लेइ ठहराए, ताके तैना लोकां केरे मैफरे लेइ च़दतल ते पापां केरू बलिदान चाढ़न। 2 किजोकि अक याजक एप्पू बेड़ि गल्लन मां कमज़ोरे, एल्हेरेलेइ तै बेसमझ, ते टेपलोरे लोकन नेरमी सेइं बताव केरि बटते। 3 किजोकि तै एप्पू कमज़ोरे, एल्हेरेलेइ तैस न सिर्फ़ लोकां केरे पापां केरे लेइ, बल्के अपने पापां केरे लेइ भी बलिदान चाढ़नेरि ज़रूरत भोतीए। 4 कोई मैन्हु अपने लेइ महायाजकेरी पदवी अपने आपे सेइं हासिल न केरि सखे, ज़ांतगर तै हारूनो ज़ेरो परमेशरेरी तरफां कुजाव न गाए। 5 तेन्चरे मसीहे भी महायाजक बेनतां अपनि आदर न की, बल्के परमेशरे तैस आदर दिती ज़ैखन तैने ज़ोवं, “तू मेरू मट्टू आस, अज़ अवं इन बांदू केरताई तू मेरू मट्टू आस।” 6 एल्हेरेलेइ परमेशर फिरी एक्की होरि ठैरी ज़ोते, “तू मेलिकिसिदकेरो ज़ेरो हमेशारे लेइ याजक आस।” (aiōn g165) 7 यीशुए एक्की मैनेरी ज़ेरि ज़िन्दगी गुज़ारनेरे दिहाइन मां फुकैरी-फुकैरी ते लेरां देइ-देइ परमेशरे कां प्रार्थना ते बिनती की, ज़ै तैस मौती करां बचेइ सकतो थियो, ते परमेशरेरे लेइ तैसेरे भक्तेरे वजाई सेइं परमेशरे तैसेरी फरयाद शुनी। 8 ते परमेशरेरू मट्टू भोइतां भी तैनी दुख झैल्लतां हुकम मननो शिखो। 9 ज़ैखन तैनी तैन सब कियू ज़ैन तैनी कियेरू लोइतू थियू, त तै तैन केरे लेइ हमेशारे लेइ मुक्तेरो ज़िरयो बनो, ज़ैना तैसेरे हुकम मन्तन। (aiōnios g166) 10 ते तैस परमेशरेरी तरफां मेलिकिसिदकेरी ज़ेरि महायाजकेरी पदवी मैल्ली। 11 असन कां इस बारे मां ज़ोनेरे लेइ बडू किछ आए, पन तुसन समझानू मुश्किले, किजोकि तुस समझाने मां सुसतथ। 12 द्रासले मां अज़ तगर तुस गुरु बनोरे लोइते थिये, किजोकि तुसन विश्वास कियोरे बडू च़िर भोरूए। पन हुन्ना त ज़रूरत इस गल्लरीए कि कोई मैन्हु तुसन परमेशरेरे वचनेरी शुरुआतरी गल्लां दुबारां शिखाले। तुस तैन बच्चां केरे ज़ेरेथ ज़ैन हेजू दुइ पीतन ते शुरी रोटी न खेइ बटन। 13 ज़ै दुइ पीते, तै हेजू बच्चो भोते, किजोकि तैस नई पतो सही कुने ते गलत कुने। 14 पन शुरी रोटी तैन केरे लेइ भोचे ज़ैना विश्वास मां बड्डेन, ते अपने तजरबे सेइं इस काबल भोरें, कि रोइ ते बुरे मां फ़क सेमझी सखन।

6 एल्हेरेलेइ एज्जा अस मसीहेरे बारे मां शुरुआतरी शिक्षारी गल्लां बार-बार दोरहानेरे बगैर अस सिधतारे पासे च़लते रहम। ते मौतरे पासे नेनेबाले कम्मन करां मन फिराम ते परमेशरे पुइ विश्वास केरनो, 2 बपतिस्मे ते हथ रखनेरी शिक्षारे बारे मां, ते मुइदां केरे ज़ीते भोनेरे बारे, ते हमेशारे इन्साफेरे बारे मां दुबारा गल न केरम। (aiōnios g166) 3 एज्जा अस परिपक्व

विश्वासी बनम! अगर परमेशर अज़ाज़त दे त असां इन केरमेले। 4 ज़ैना लोक अपने विश्वास शारतन तैन फिरी मनफिरानेरे पासे केन्चरे आने गान? तैनी एक्की बारे परमेशरेरी सच्चाई पिशानोरी थी, ते तैन स्वर्गां वरदाना मैलोरां थियां ते तैनेई होरन सेइं साथी पवित्र आत्मा हासिल कियोरो थियो। 5 तैनेई मैसूस कियोरू थियू कि परमेशरेरू वचन रोडू आए, ते तैनेई एजनेबाले ज़मानेरी शक्ति मैसूस कियोरी थी। (aiōn g165) 6 ते हुनी तैनेई अपनो विश्वासे शारोरो! एल्हेरेलेइ तैन मनफिरानेरे पासे आनू मुशकिले, किजोकि तैना एप्पू परमेशरेरे मट्टे फिरी कूसे पुइ चाढ़ने लोरेन! ते लोकां केरे सामने तैसेरी बेइज़ी केरने लोरेन। 7 ज़ैन लोकन रोड़ी शिक्षा मैलोरीए तैना तैस ज़मीनेरे ज़ेरे आन ज़ैस पुइ झैड़ी लगगी रातीए। अगर ज़मीन रोड़ीए त ज़िमदारेरे लेइ रोड़ी फसल देचे, ते तैस परमेशरेरी तरफां बरकत मैलचे। 8 होरे लोक तैस ज़मीनेरे ज़ेरे आन ज़ैस मां कंटे ते झैल्लां लगतन ते तै कोन्ची कम्मरी नई। ते परमेशर तैस ज़मीनी फिटकार देनेबालोए ते आखरी मां तैस अग्गी मां बरबाद केरेलो। 9 हे मेरे ट़लारे ढ़लाव ते बेइनव, हालांकी असां एरी गल्लां ज़ोतम फिर भी अस विश्वास केरतम कि एन तुश्शे लेइ नई। इश्शो भरोसोए कि तुस रोड़ी गल्लां केरे लेइ आथ ज़ैना मुक्तेरे ज़िरिये इइतिन। 10 किजोकि परमेशर बेइनसाफ नई कि ज़ै तुश्शू कम ते प्यार बिसरी गाए, ज़ै तुसेई तैसेरे लोकां केरि सेवा केरनेरे ज़िरिये तैसेरेलेइ हिरावरोए। ते परमेशर याद केरेलो कि तुस हेजू भी तैन केरि मदत केरने लोरेथ। 11 इश्शी इच्छा ई आए कि तुस ज़ांतगर ज़ीतेथ रोडो बताव केरते राथ, इन पक्कू केरनेरे लेइ कि तुश्शी उमीद सच़ भोली। 12 तैखन तुस आलसी न बनेले। पन तुस तैन केरे ज़ेरे च़ललेले ज़ैना अपने विश्वास ते सबरारे वजाई सेइं परमेशरेरे वादां केरे बारस भोले। 13 ज़ैखन परमेशरे अब्राहमे सेइं वादो कियोरो थियो त कसम केरनेरे लेइ तैस करां बड्डो कोई न थियो, एल्हेरेलेइ तैनी अपनि ही कसम कमाइतां ज़ोवं, 14 “अवं तीं सच्चे बरकत देइलो, ते तेरू वंश बेशुमार बेधेइलो।” 15 एल्हेरेलेइ अब्राहम तैन वादन हासिल केरनेरे लेइ सबरी सेइं इंतज़ार केरतो राव। 16 मैन्हु त एप्पू करां बडां केरे नव्वेरी कसम केरतन ते एन्चरे तैन हर मसलेरो हल कसम केरतां खतम भोते। 17 एल्हेरेलेइ परमेशरे भी कसम खाइ, एन केरने सेइं तैनी तैन लोकन ज़ैन सेइं वादो कियोरो थियो, इन हिरानू चाऊ कि ज़ै वादो तैनी कियोरोए तै पूरो केरेलो। 18 त इड़ी दूई गल्लां आन तैसेरो वादो ते तैसेरी कसम, ज़ैना कथे न बेदलोने ते तैन केरे बारे मां परमेशर कथे झूठ न ज़ोए। एल्हेरेलेइ अस ज़ैना तैसेरे सहारे मां ओरेम त ज़ै उमीद असन दितीरीए, तैस मां अस बनोरे रहम, ते अस बडे जादे जोशे मां आम। 19 इश्शी उमीद प्राणा केरे लेइ पक्की आए तै टेली न बटे ते ई असन परमेशरे करां भटकने न दे, बल्के ई असन परमेशरेरे मन्दरे मां महा पवित्र ठैरी पुजातीए। 20 ज़ैड़ी यीशु इश्शे लेइ मेलिकिसिदक महायाजकेरो

ज़ेरो हमेशा रो महायाजक बेनतां इश्शे लेइ बत हिराने बालेरो ज़ेरो दाखल भोव। (aiōn g165)

7 ई मेलिकिसिदक शालेमेरो राज़ो ते परमप्रधान परमेशरेरो याजक थियो, ज़ैखन अब्राहम राज़न मैरतां वापस ओरो थियो, त मेलिकिसिदके तैस सेइं मिलतां तैसेरी बड़ी आदर की ते तैस बरकत दिती। 2 अब्राहमे तैस तैन सेबभी चीजां केरो दशोवं हिस्सो दित्तो ज़ैना तैनी कब्जो केरतां ऐनोरी थी। मेलिकिसिदकेरो नंवेरो मतलब धार्मिकतारो राज़ो आए, ते शालेमेरो मतलब शैन्तरो राज़ो। 3 तैसेरो न कोई बाजी, न अम्मा, न तैसेरु कोई वंशे, न तैसेरी ज़रमनेरे बारे मां न तैसेरे मरनेरे बारे मां लिखोरूए। ते परमेशरेरे मट्टेरो ज़ेरोए ते हमेशारे लेइ याजक बनोरो रहते। 4 पन हुनी इस पुइ ध्यान देथ मेलिकिसिदक केत्रो महान थियो। ज़ैस पूर्वज अब्राहमे कब्जो कियोरी चीजां केरो दशोवं हिस्सो दित्तो। 5 मूसेरे कानूनेरे मुताबिक ज़ैना लेवेरे खानदाने मरां थिये यानी ज़ैना याजक ठहराए गातन, तैन हुक्म दित्तो जोरोए कि तैना इस्राएली लोकन यानी अपने लोकन करां दशोवं हिस्सो नेन, हालांकी तैना भी अब्राहमेरी वंशे मरां आन। 6 पन मेलिकिसिदके ज़ै लेवी केरे वंशे मरां न थियो फिरी भी अब्राहमे करां दशोवं हिस्सो नीयो, ते तैस बरकत दिती ज़ैस सेइं परमेशरे वादो कियो थियो। 7 अस पक्कू ज़ानतम कि ज़ै बरकत देते ते बरकत मैलने बाले करां महान आए। 8 ते याजक ज़ैना दशोवं हिस्सो नेतन तैना तैन मैन्हु आन ज़ैना मरतन, पन मेलिकिसिदक एन करां भी महान आए, किजोकि पवित्रशास्त्र ज़ोते कि ते जीतो आए। 9 बल्के अस ज़ोई सकतम कि लेवी भी ज़ै दशोवं हिस्सो नेते, अब्राहमेरे ज़िरिये मेलिकिसिदक जो दशोवं हिस्सो दित्तो। 10 एल्हेरेलेइ कि ज़ैस मौके मेलिकिसिदके लेवेरे पूर्वज अब्राहमे सेइं मुलाकत की, तैस मौके लेवी ज़रमोरो भी न थियो। 11 इना लेवी याजकेरे आधारे पुइ कानून इस्राएली लोकन दित्तोरो थियो, अगर लेवी ते याजकेरु कम ठीक थियूं, त अलग किसमेरे याजकेरु बांदू भोनु ज़रूरी न थियूं, ज़ै मेलिकिसिदकेरो ज़ेरो आए। पन हारूनेरो ज़ेरो नई। 12 किजोकि ज़ैखन याजकेरी पदवी बेदलोतीए त कानूनेरु बेदलोनु भी ज़रूरीए। 13 असां इना सैरी गल्लां मसीहरे बारे मां ज़ोने लोरेम ज़ै होरि गोत्रे मरां आए, ते तैस गोत्रे मरां केन्चे बलिदान केरनेरे ठैरी याजकेरी सेवा नई कियोरी। 14 किजोकि इन अस ज़ानतम, कि इश्शो प्रभु यहूदारे गोत्रे मरां थियो। ते मूसा एस गोत्रे मरां याजकेरे पेदवरे बारे मां कोई गल नई कियोरी। 15 मेलिकिसिदकेरो ज़ेरो अक होरो भी याजक एजने सेइं इन होरु भी साफ भोते। 16 किजोकि यीशु कानूनेरे हुक्मेरे मुताबिक याजक लोइतो थियो, पन तै नाश न भोनेबैली ज़िन्दगरे शेक्ते ज़िरिये महायाजक बनो। 17 किजोकि तैसेरे बारे मां परमेशर पवित्रशास्त्रे मां इ गवाही देते, “कि तू मेलिकिसिदकेरे ज़ेरो हमेशारे लेइ याजक आस।” (aiōn g165)

18 एन्चरे मूसेरो कानून कमज़ोर ते बेफल भोनेरे वजाई सेइं हुनी कम न केरि बटे। 19 (किजोकि मूसेरे कानूने कोई गल्ली सिद्ध

न केरि बटी) पन हुनी असन कां अक रोड़ी उमीदे ज़ेसेरे ज़िरिये सेइं असां परमेशरेरे सामने एज्जी बटतम। 20 ते परमेशरे भी तैस वक्ते कसम खाइ ज़ैखन तैनी यीशु महायाजक बनाव। 21 किजोकि होरे याजक त बगैर कसमा याजक बनाव, पन ज़ैखन यीशु, परमेशरेरी तरफां याजक बनाव त तैनी ज़ोवं, “अवं, प्रभु कसम खाताई, कि तू हमेशा याजक रालो ते अवं अपने मने कथी न बेदलेलो।” (aiōn g165) 22 एल्हेरेलेइ यीशु ज़मानत देते कि पुरानो करार नव्वे करारे करां रोड़ी भोलो। 23 ते अक फर्के, किजोकि पेइले बड़े याजक बेनतां आए, पन तैना सब मरे ते तैनेई लगातार याजकेरु कम न केरि बटु। 24 पन यीशु आखरी तगर रानेबालो याजके ते एल्हेरेलेइ तैसेरी ठैरी होरो कोई याजक न रख्खो गाए। (aiōn g165) 25 एल्हेरेलेइ ज़ैना लोक यीशुएरे ज़िरिये सेइं परमेशरे कां एइतन, यीशु तैन पूरी-पूरी मुक्ति देइ बटते, किजोकि ते तैन केरे लेइ बिनती केरनेरे लेइ हमेशा जीतोए। 26 एल्हेरेलेइ असन एरे ज़ेरो महायाजक ज़रूरी थी, ज़ै इश्शे ज़रूरतन पूरी केरे, ज़ै पवित्र, निष्कपट ते शुद्ध, ते पैपन करां अलग भोए ते ज़ै परमेशरे स्वर्ग जो नेवरो भोए। 27 ते होरि महायाजक केरु ज़ेरु यीशु ज़रूरी नई, कि पेइले अपने पापां केरे लेइ ते फिरी अपने लोकां केरे पापां केरे लेइ रोज़ बलिदानां च़ाढ़े, किजोकि यीशुए सेबभी लोकां केरे पापां केरे लेइ एककी बार अपनो आप बलिदान केरतां एरु बलिदान च़ाढ़ू ज़ैन हमेशारे लेइ आए। 28 किजोकि मूसेरो कानून त तैन मैन्हु महायाजक भोनेरे लेइ ठहराते ज़ैना सिद्ध नई, पन मूसेरे कानूनेरे बाद परमेशरे कसम खेइतां अपनू मट्ट ठहराव ते तैसेरु मट्टू हमेशारे लेइ सिद्ध महायाजक बनोरोए। (aiōn g165)

8 ज़ैना गल्लां हुन्ना अस ज़ोने लोरेम तैन मरां सेभना बट्टी गल ई आए कि इश्शे एरो महायाजक, ज़ै स्वर्ग मां परमेशरेरे महिमा बाले तख्तेरे देइने पासे बिशोरोए। 2 ते ज़ै तैस महा पवित्र ठैरी ते तैस सच्चे तेम्बु मां सेवा केरते, ज़ै केन्चे मैने नई बल्के परमेशरे खेइो कियोरोए। 3 किजोकि हर महायाजक पापां केरे मैफरे लेइ च़ढतल ते बलिदान च़ाढ़नेरे लेइ ठहराव गाते, एल्हेरेलेइ ज़रूरी आए, कि इश्शे महायाजके (यीशु) कां भी किछ च़ाढ़नेरे लेइ भोए। 4 ते अगर यीशु दुनियाई मां भोथो त कथे कोई याजक न थियो भोनी, किजोकि इड़ी मूसेरे कानूनेरे मुताबिक च़ढतल च़ाढ़नेरे लेइ याजक आन। 5 इना याजक ज़ैना कम केरतन, तैना सिर्फ स्वर्गेरी चीज़ां केरि नकल ते सैयोए, पन ज़ैना चीज़ां स्वर्ग मां आन। एल्हेरेलेइ ज़ैखन मूसा तेम्बु बनानेरी तियेरी मां थियो, त परमेशरे तैस हदैइयत दिती, “हेर ज़ै नमूनो मीं तीं पहाड़े पुइ हिरावरो थियो तैसेरे हिसाबे सेइं तू सैरी चीज़ां बना।” 6 पन हुनी ज़ै महायाजकेरी सेवा यीशु दित्तोरी ते पुराने याजकेरे सेवाई करां बड़ी बट्टीए, किजोकि ते ज़ैना गल्लां केरि बिचवाई केरते तैना पुराने करारे करां भी उच्ची आन, ते वादन पुइ तैसेरी बुनियादे। 7 किजोकि अगर पेइले करारे मां कोई खामी न भोथी त होरो करार केरनेरी कोई ज़रूरत न थी भोनी।

8 पन परमेशर लोकन पुड़ दोष लेइतां ज़ोते, “तक्का प्रभु ज़ोते कि तै दिहाड़ी एज्जी राहोरीए, इस्राएलरे लोक ते यहूदारे लोकन सेइं साथी नव्वो करार केरेलो। 9 ए तैस करारेरो ज़ेरो न भोलो ज़ै मीं तैन केरे दादे पड़दादन सेइं तैस दिहाड़े कियोरो थियो। ज़ैखन मीं मिसे मरां तैन कढनेरे लेइ तैन केरो हथ ठमोरो थियो, किजोकि प्रभु ज़ोते कि तैना मेरे तैस करारेरे मुताबिक वफादार न राए, एल्हेरेलेइ मीं भी तैन केरे पासे कोई ध्यान न दित्तू। 10 प्रभु ज़ोते कि ज़ै करार अवं इस्राएलरे लोकन सेइं तैस मौके केरेलो तै ईए, कि अवं अपने कानून तैन केरे मन्न मां छुडेलो, ते तैन केरे दिलन मां लिखेलो, ते अवं तैन केरो परमेशर भोलो ते तैना मेरे लोक भोलो। 11 ते केन्वी ए ज़रूरत न भोली कि अपने पुड़ोसन, या अपने रिशतेदारन ए शिक्षा दे कि प्रभु पिशाना, किजोकि निकड़े करां बड़े तगर सब मीं पिशानेले। 12 एल्हेरेलेइ अवं तैन केरे अधर्म माफ़ केरेलो, ते तैन केरे पापन फिरी कथे याद न केरेलो।” 13 ज़ैखन परमेशरे नव्वो करारे कमाव त पेड़लो करारे पुरानो बनाव, ते ज़ै चीज़ पुरानी ते कमज़ोर भोती तै जल्दी खतम भोतीए।

9 पेड़ले करारेरे मुताबिक भी परमेशरेरी आराधना केरनेरे नियम थिये; ते आराधना केरनेरे लेइ मैनु केरि बनोरी अक ठार थी। 2 यानी अक तेम्बु बनोरो थियो, ते तैसेरे दूई हिस्से थिये, पेड़ले हिस्से मां अक दीवट (दीयो), मेज़ ते चैदोरी रोटी रेखोरी भोती थी, तैस हिस्से जो पवित्र ठार ज़ोते थिये। 3 ते होरि हिस्से मां पड़दे पतोरं तै ठार थी, तैस हिस्से जो परमपवित्र ठार ज़ोते थिये। 4 एसमां सोन्नेरी तै बलिदान केरनेरी ठार थी ज़ैस पुड़ खुशबूदार चीज़ां बालते थिये, ते च़ेरे पासन सोन्ने सेइं पलेटोरो करारेरो सुंदुख थियो। ते तैस सुंदुखे मां मन्ने सेइं भेरतां अक सोन्नेरू भांड थियू, ते कने हारूनेरी तै सोटी थी ज़ैस पुड़ पट्लां लगगोरां थियां ते दूई घोड़ां केरि सलेटां थी, ज़ैन पुड़ दश हुक्म लिखोरे थिये। 5 एस सुंदुखेरे बेइयें पासे महिमा बाले करूब बनोरे थिये, ज़ैना परमेशरेरी मौजूदगी हिराते थिये। तैना अपने-अपने फंगन सेइं तैस ठैरी सैयो केरि रावरे थिये, ज़ैड़ी पाप माफ़ कियोरे थिये। पन हुनी इन गल्लन रोड़े च़ारे ज़ोनेरो वक्त नई। 6 एना सब चीज़ां एस तरीके सेइं तियार केरनेरे बाद, याजक तेम्बेरे तैस पेड़ले हिस्से मां रोज़ गाते, ताके सेवारू कम पूरू केरन। 7 पन परमपवित्र ठैरी मां सिर्फ़ महायाजक साले मां सिर्फ़ एककी बार गाते। ते तै भी खून घिन्तां ताके अपनि ते अपने लोकां केरे पापां केरे लेइ बलिदान च़ाढ़े, ज़ैना तैनेई अनज़ाने मां किये। 8 एस नियमें सेइं पवित्र आत्मा इन हिराते, कि ज़ांतगर पेड़लो तेम्बु आए, तांतगर परमपवित्र ठैरी गानेरी बत बंदे। 9 ते इन सब किछ इस वक्तेरे लेइ अक मसाले, एस सेइं एन बांदू भोते कि ज़ै च़ढतल ते बलिदान याजक परमेशरे जो च़ाढ़ते थिये, तैस सेइं आराधना केरनेबालां केरो ज़मीर रोड़ेच़ारे शुद्ध न भोए। 10 तैन केरो तलक सिर्फ़ खाने पीनेरे चीज़ ते अलग-अलग शुद्ध भोनेरे रसमन सेइं भोतो थियो। इन सिर्फ़ जिसमानी रसमां आन,

इन तैखन तगर लागू भोतन ज़ांतगर परमेशरे नव्वों नियाम न बनाए। 11 पन ज़ैखन मसीह इश्शो महायाजक बेनतां अवं, त तै रोड़ी चीज़ां घिन्तां अवं ज़ैना हुन्ना मौजूद आन। तै स्वर्गें मांजो परमेशरेरे हज़ूरी मां जेव। ते तै हज़ूरी एककी महान ते सिद्ध तेम्बेरो ज़ेरि आए, ज़ै मैनु केरे हथ्थां केरे ज़िरिये सेइं नई बनोरो ते न दुनियारो। 12 ज़ैखन मसीह तैस तेम्बु मांमेइं भोइतां पवित्र ठैरी दाखल भोव, त तैनी थावां ते बछड़ां केरो खून नई, बल्के अपनो खूनेरे ज़िरिये एककी फेरे पवित्र ठैरी दाखल भोव ते असन इश्शे पापन करां हमेशारे लेइ छुटकारो दित्तो। (aiōnios g166) 13 किजोकि ज़ैखन थावां ते दांतां केरो खून ते बेछड़ी केरि मांजन अपवित्र लोकन पुड़ छक्के गाने सेइं तैना लोक जिसमानी तरीके पवित्र मन्ने गाते थिये, 14 त मसीहे सनातन आत्मार ज़िरिये सेइं अपनो आप परमेशरे कां बगैर पापेरू बलिदान केरतां च़ाढ़ू, ते तैसेरो खून असन इश्शे ज़मीरेरे तैन कम्मन करां होरो भी जादे पवित्र केरेलो, ज़ैन केरो तलक मौती सेइं ए, ताके अस ज़ींते परमेशरेरी आराधना केरम। (aiōnios g166) 15 एहे वजा आए कि परमेशरे अपने ते दुनिया मज़ाटे मसीह बिचवाई बनेइतां तैसेरे ज़िरिये सेइं अक नव्वो करार बनावरोए, ताके ज़ैना परमेशरेरे कुजोरेन तैना हमेशारी बरकत हासिल केरन ज़ेसेरे लेइ परमेशरे तैना कुजोरेन। किजोकि पेड़ले दित्तोरे करारेरे अधीन कियोरे पापन करां तैन आज़ाद केरनेरे बदले मां मसीह मरोए। (aiōnios g166) 16 किजोकि वसीयतरे सिल्लले मां वसीयत देनेबालेरी मौत साबत भोनी ज़रूरीए। 17 एल्हेरेलेइ वसीयत देनेबालेरे ज़ींते दम्में तगर वसीयत कम्मरी न भोए, पन तैसेरे मरनेरे बाद तै वसीयत पक्की भोतीए। 18 एहे वजा आए कि पेड़लो करार भी खूनेरे बगैर नई कियोरो। 19 एन्चरां ज़ैखन मूसा सैरी लोकन कानूनेरो अक-अक हुक्म शुनाव, त तैनी थावां ते बछड़ां केरो खून पैनी मां मिलाव, ते फिरी लाल उन्ना ते जूफा सेइं एन्तां कानूनेरी किताबी ते सैरी लोकन पुड़ छिड़को। 20 ते ज़ोवं कि, “ए तैस करारेरो खूने ज़ेसेरो हुक्म परमेशरे तुश्शे लेइ दित्तोरोए।” 21 एन्चरे तैनी तेम्बु पुड़ ते आराधना केरनेरी सैरी चीज़न पुड़ खून छिड़को। 22 किजोकि मूसे कानूनेरे मुताबिक लगभग सैरी चीज़ां खूने सेइं पवित्र की गेड़चन, ते ज़ांतगर खून न बगाव गाए, तांतगर पाप भी माफ़ न भोन। 23 त फिरी ए ज़रूरते कि तैना चीज़ां ज़ैना स्वर्गेंरी नकल आन, तैना जानवरां केरे बलिदाने सेइं शुद्ध की गान। पन स्वर्गेंरी चीज़न इन करां भी जादे रोड़े बलिदाने सेइं शुद्ध भोनेरी ज़रूरते। 24 किजोकि मसीह मैनु केरे बनेवरे घरे मां ज़ैन सच़रे पवित्र ठारारी नकले, दाखल नई भोरो, बल्के स्वर्गें मां दाखल भोव ज़ैड़ी तै इश्शे लेइ परमेशरे कां हाज़रे। 25 यहूदी केरो महायाजक पवित्र घरे मां हर साल होरि केरो यानी जानवरां केरो खून नेइतां गाते, पन मसीह अपने आपे बार-बार बलिदान केरनेरे लेइ न गाए। 26 वरना दुनियारे शुरु करां लेइतां हुन्ना तगर तैस बार-बार दुख झेलनो पेथो; पन हुनी जुगेरे आखरी मां ते बांदो भोव, ताके अपने बलिदाने

सेई पाप दूर करे। (aiōn g165) 27 ते जेन्चरे सेइं मैनेरु मरनु ते एककी बार इन्साफेरु भोनू पक्कुए। 28 तेन्चरे सेइं मसीहे भी बडे लोकां केरे पाप सैलतां गानेरे लेइ एककी बार बलिदान भोव, ते दुबारां पापां केरु बलिदान देनेरे लेइ नई, बल्के तैन मुक्ति देनेरे लेइ एज्जेलो, जैना तैसेरे इंतज़ारे मां आन।

10 मूसोरे कानून एजने बैली रोड़ी चीज़ां केरो सिर्फ अक सैयोए, न कि असली रूपे। एल्हेरेलेइ एककी किसमेरां बलिदानां जैना हर साल च़ाढ़ां गातन, तैना परमेशरे कां एजने बालन कथे भी सिद्ध न केरि सखन। 2 अगर केरि सखेथां, त कुन तैन केरु च़ाढ़नू बंद न भोथू? एल्हेरेलेइ अगर आराधना केरनेबाले एककी बारे हमेशारे लेइ पवित्र भोइ गाथे, त तैन केरो ज़मीर तैन पापी न बनाथो। 3 पन तैना बलिदानां तैन लोकन हर साल याद करातन कि तैना पापिन। 4 किजोकि मुमकिन नई, कि दांतां केरो ते थावां केरो खून पापे दूर केरि सके। 5 एल्हेरेलेइ ज़ैखन मसीह दुनियाई मां ओरो थियो, त तैनी परमेशर सेइं ज़ोरु थियू, “तीं बलिदान ते च़ढ़तल न चाई, बल्के तीं मेरे लेइ अक जान तियार की। 6 तू न भस्म भोनेबाले बलिदाने सेइं, ते न पापेरे बलिदाने सेइं खुश भोव।” 7 तैखन मसीहे ज़ोवं, “हे परमेशर, हेर, अवं तेरी इच्छा पूरी केरनेरे लेइ ओरोई, जेन्चरे मेरे बारे मां पवित्रशास्त्रे मां लिखोरूए।” 8 पेइले त तै ज़ोते, न तीं कोई बलिदान ते न कोई च़ढ़तल चाई, ते न भस्म भोनेबालू बलिदान ते न पापेरु बलिदान चाव, ते न तैन सेइं तू खुशी भोव, हालांकी एना बलिदानां मूसोरे कानूनेरे मुताबिक दितां गातन। 9 फिरी तै एन ज़ोते, “हेर, अवं तेरी मर्ज़ी पूरी केरनेरे लेइ ओरोई,” एन्चरे तै पेइले सारे बलिदानन हटाते ताके तैन केरे ठैरी मसीहेरे बलिदाने रखे। 10 परमेशरेरी मर्ज़ी ई थी, कि यीशु मसीहेरे जिसम एककी बार बलिदान भोने सेइं अस हमेशारे लेइ पवित्र भोम। 11 पेइले करारेरे मुताबिक हर याजक बलिदान केरनेरे ठैरी खडे भोइतां रोज़ सेवा केरतन, ते एककी किसमेरां बलिदानां बार-बार च़ाढ़तन, जैना पापे कधी भी दूर न केरि सखन। 12 पन मसीह ज़ै इश्शो महायाजके, इश्शो पापां केरे लेइ एककी बार बलिदान भोइतां परमेशरेरे देइने पासे गेइतां बिश्शी जेव। 13 तैडी तै तैस वक्तेरो इंतज़ार केरने लोरोए, कि परमेशर तैसेरे दुश्मन पूरे तरीके सेइं हाराए। 14 तैनी एककी बलिदाने सेइं जैना लोक पवित्र कियोरेन, तैना हमेशारे लेइ सिद्ध कियोरेन। 15 पवित्र आत्मा भी एस गल्लरी गवाही देते। पेइलू त एन ज़ोते कि 16 “प्रभु ज़ोते, कि ज़ै करार अवं तैन दिहैइना बाद अपने लोकन सेइं केरेलो तै ईए, अवं अपने कानून तैन केरे मन्न मां छेडेलो ते तैन केरे दिलन मां लिखेलो।” 17 ते फिरी एन भी ज़ोते कि, “अवं तैन केरे पाप ते बुरां कम्मां माफ़ केरेलो, ते फिरी कधी याद न केरेलो।” 18 बस्सा, ज़ैखन तैन केरे पापां केरि माफ़ी भोइजेइ, त फिरी पापां केरे लेइ बलिदानेरी ज़रूरत नई। 19 एल्हेरेलेइ ढ़लाव ते बेइनव, असन यीशुएरे खूनेरे ज़िरिये सेइं मन्देरे परमपवित्र ठारी मां

दाखल भोनेरी दिलेरी भोरीए। 20 यीशुए इश्शे लेइ अक नर्वीं ते जिन्दगी देनेबाली बत खोलरोरीए, ज़ै तैनी पड़दे मां यानी अपने जिसमे मां मौतरे ज़िरिये इश्शे लेइ बनाई। 21 ते एल्हेरेलेइ इश्शो एत्रो महान याजक ज़ै परमेशरेरे घरेरो मुखतियारे। 22 त एज्जा अस सच्चे दिले सेइं ते पूरे विश्वासे सेइं, ते एरो ज़मीर ज़ै खूनेरे तेपेई सेइं पापेरे एससे करां पवित्र कियोरे, ते एरो जिसम नेइतां ज़ै साफ पैनी सेइं धोवरोए, परमेशरे कां नेम। 23 ते अस एपनी उमीदरो इकरार रोड़ेचारे टलेइतां रखम, किजोकि ज़ैनी असन सेइं वादो कियोरोए ते सच्चोए। 24 ते असेई इस गल्लारू ध्यान लोडे रखोरु कि अस केन्चरे प्यार ते रोड़ां कम्मां केरे लेइ एककी होरेरी हिम्मत बधाम। 25 ते एककी ठैरी अकोट्टू भोनू न शारम, जेन्चरे होरे लोक केरतन बल्के अस एककी होरि हिम्मत देथ, तुस ज़ैस हिसाबे सेइं परमेशरे दुबारे एजनेरी दिहैड़ी नेइंते लातथ तैस्से हिसाबे सेइं जादे एन गल्लन पुड़ चलते भी राथ। 26 किजोकि अगर अस सच पिशानेरां बाद, ज़ैनी बुझतां पाप केरम त पापां केरे लेइ कोई बलिदान बाकी नई रावरु। 27 हाँ, परमेशरेरे इन्साफ ते भयानक अग ज़ै परमेशरेरे दुश्मन भस्म केरेली तै बाकी आए। 28 ज़ैखन मूसोरे कानून न मन्नेबाले, दूई या ट्लाई मैन्हु केरे गवाही देने सेइं तैस मैन्हु बगैर दया केरतां मौतरी सज़ा दिती गातीए। 29 त तै मैन्हु केत्री सज़ारो लेईक भोलो, ज़ैनी परमेशरेरे मट्टू पावन हैठ ढ़लेन्नु, ते करारेरो खून ज़ैस सेइं तै पवित्र ठहरावरी थियो, तै अपवित्र समझो। ते पवित्र आत्मारी बेइजती की, जेसेरे ज़िरिये असन अनुग्रह मैलते। 30 किजोकि अस ज़ानतम, तैनी ज़ोरु थियू, “बदलो घिन्नो मेरु कम्मे, अवं एप्पू बदलो देइलो।” ते फिरी तैनी एन भी ज़ोवं, “प्रभु अपने लोकां केरि इन्साफ केरेलो।” 31 ज़ींते परमेशरेरे हथ्थन मां गानू बड़ी खतरनाक गल्ले। 32 पन तैना पेइले दिहाड़े याद केरा, ज़ैखन तुसन मसीह पिशानेरी लौ मैल्ली, ते तैसेरे बाद तुसेई बेइ मुशकलातां केरो दैटतां मुकाबलोइ कियो। 33 यानी कथे त तुस लोकां केरे तुहीन केरने सेइं ते मुसीबती सेइं तुस तमाशो बने, ते कधी तुसेई होरे मुसीबत बरदाशत केरते लाए ते तुसेई तैन केरु साथ दितू। 34 किजोकि तुसेई केदन सेइं हमदरदी की, ते अपनो माल भी लुटानो खुशी सेइं कबूल कियो। किजोकि तुस ज़ानते थिये कि अक बड़ी बड्डी खास मलकियत तुसन कां आए ज़ै हमेशारे लेई आए। 35 एल्हेरेलेइ तुस हिम्मत न हरा, किजोकि तैसेरो फल बडो बड्डोए। 36 तुसेई बेइ सब्री सेइं कम कियेरु लोइते, ताके तुस परमेशरेरी मर्ज़ी पूरी केरतां तै चीज़ हासिल केरि सखथ जेसेरो तैनी वादो कियोरोए। 37 किजोकि जेन्चरे पवित्रशास्त्रे मां लिखोरु आए, “हुनी थोडु चिर बाकी आए, कि एजनेबालो एज्जेलो ते चिर न लाएलो। 38 पन मेरे धर्मी लोक मीं पुड़ विश्वासे रखने सेइं ज़ींते राले, अगर तैना मीं पुड़ विश्वास केरने करां पत्रोवं हटन त मेरो दिल तैन पुड़ खुश न भोलो।” 39 पन अस हटने बाले नई, कि परमेशरे पुड़

विश्वास करने करां पत्रोंव हटम ते नाश भोम, बल्के अस विश्वास करनेबाले आम, ताके इशे प्राण बचाए गान।

11 हुनी विश्वास उमीद कियोरी चीजां केरू याकीन, ते अलैई चीजां केरू सबूते। 2 इशे दादे पडदादन भी एरो विश्वास थियो। एल्हेरेलेइ परमेशर तैन पुड़ खुश भोव। 3 विश्वासे सेइं असन पतो लगते कि दुनियारी हर चीज परमेशरे वचने सेइं बनोरीए। एल्हेरेलेइ जैन किछ अस लहतम, तैन लेइहोने बैली चीजन सेइं नई बनोरोए। (aiōn g165) 4 विश्वासे सेइं आदमेरे मट्टे हाबिले अपने बट्टे ढूला केने केरां रोड़ बलिदान परमेशरे लेइ च़ाढू। ज़ेसेरी वजाई सेइं परमेशरे तैसेरू बलिदान कबूल कियू, ते तैसेरे बारे मां गवाही दिती, कि हाबिल धर्मा मैनु आए। हालांकी हाबिल मेरि जोरोए, फिरी भी अस तैसेरे विश्वासेरे ज़िरिये परमेशरे पुड़ भरोसो केरनो शिखतम। 5 विश्वासे सेइं हनोक नव्वेरो मैनु मौती करां पेड़लो जीतो स्वर्ग जो नीयो, ते तैसेरो पतो न च़लो, किजोकि परमेशरे तै स्वर्ग जो नीयोरो थियो, तैसेरे उबरे गाने करां पेड़ले तैसेरे हके मां गवाही दितोरी थी, कि तैनी परमेशर खुश कियो। 6 किजोकि विश्वासेरे बगैर परमेशर खुश केरनो नामुमकिन, बस्सा रोड़ एने कि परमेशरे कां एजने बालन विश्वास कियोरो लोड़े कि परमेशर आए, परमेशर तैन ज़ैना तैस सज़्ज़ेई सेइं तोपतन फल देते। 7 विश्वासे सेइं नूहे तैन गल्लां केरे बारे मां ज़ैना एजनेबाले वक्ते मां भोनी बैली थी, परमेशरे तरफां हुक्म मैलतां परमेशरे प्यारे सेइं तैस पुड़ अमल कियू, ते अक किशती बनाई ज़ैस मां तैसेरू सारू टब्बर बच्चू, एन केरने सेइं तैनी सारी दुनिया मुज़म बनाई ते एप्पू तैस धार्मिकतारो बारस बनो ज़ै विश्वासे सेइं हासिल भोचे। 8 विश्वासे सेइं ज़ैखन परमेशरे अब्राहम, ज़ैस जगाई गाने जो परमेशरे तै कुजोरो थियो, त तै हुक्म मेन्तां तैस जगाई च़लो जेव, ज़ै जगाई बादे मां परमेशर तैस विरासतरो ज़ेरो देनेबालो थियो। हालांकी तै एन भी न थियो ज़ानतो कि अव कोरां च़लोरोई, फिरी भी च़लो जेव। 9 विश्वासेरे ज़िरिये सेइं तै परमेशरे कियोरे वादेरे मुताबिक तैस मुलखे मां परदेशी केरो ज़ेरो तेम्बन मां गेइतां बस्सो। ते तैस सेइं साथी तैसेरू मट्टू इसहाक ते तैसेरू पोदलडू याकूब भी राए, तैन भी परमेशरे करां तैए वादो मैलो ते तैना भी तेम्बन राए। 10 किजोकि अब्राहम तैस नगरेरे इंतज़ारे मां थियो (ज़ैन स्वर्ग मांए) ज़ेसेरी मुनीयाद सदारे लेइ आए, ज़ेसेरो तियार केरनेबालो ते बनानेबालो परमेशरे। 11 विश्वासे सेइं सारा दोजींती भोनेरी ताकत हासिल की, हालांकी तै उमरारे हिसाबे सेइं बच्चो ज़ानेरे काबल न थी राहोरी, सारा एन याकीन थियू कि वादो केरनेबालो परमेशर अपनो वादो पूरो केरेलो। 12 ज़ेइस अब्राहम बड़ो बुड्डो थियो ते बच्चे पैदा केरनेरे काबल न थियो, अम्बरेरे तारां केरे ते समुदरेरी रेतारे बराबर एनू हड्ड वंश पैदा भोव। 13 एन सेबमी लोकेई परमेशरे पुड़ भरोसो कियो ते मेरि जे, ते तैन तै कोई चीज़ न मैल्ली ज़ेसेरो वादो परमेशरे कियोरो थियो, तैनेई समझू कि परमेशर एन एजनेबाले वक्ते मां केरेलो,

ते तैना इन भी समझते थिये, कि तैना ज़मीनी पुड़ परदेशी ते मुसाफर आन। 14 ज़ैना एरी गल्लां ज़ोतन तैन सेइं एन साबत भोते, कि तैना अज़ तगर अपने मुलखेरी तलाशी मां आन। 15 अगर तैना तैस मुलखेरो खियाल रखते भोथे ज़ैस मरां तैना ओरे थिये, त तैना वापस गेइ बटते थिये। 16 पन असलीती मां तैना एककी रोड़े स्वर्गेरे मुलखेरे उमीदी मां थिये, एल्हेरेलेइ परमेशर तैन केरो परमेशर जुवाने सेइं खुश भोव, एल्हेरेलेइ तैनी तैन केरे लेइ अक नगर तियार कियोरोए। 17 विश्वासे सेइं अब्राहमे अपने इम्तिहानेरे मौके अपने मट्टे इसहाकेरू बलिदान देने करां न टलो, ज़ैन तैस परमेशरे वादे कबूल केरने बद मैलोरो थियू, तैस्से अकैल्ले मट्टे बलिदान केरने जो तियार भोइ जेव। 18 हालांकी परमेशरे तैस सेइं ज़ोरू थियू, “कि इसहाकेरे वंश सेइं तेरे वंशेरू नव रालू।” 19 किजोकि अब्राहमे याकीन थियू, कि परमेशरे कां मुड़न जीते केरनेरी शक्ति आए, एल्हेरेलेइ लेइ ज़ेन्चरे परमेशरे इसहाक मुड़न मरां फिरी वापस आनो। 20 विश्वासे सेइं इसहाके अपने दुइये मट्टन याकूबे ते एसावे आशिवाद दितो, कि एजनेबाले वक्ते मां तैना वादे पूरे भोले। 21 विश्वासे सेइं याकूबे मरते वक्ते यूसुफेरे दुइये मट्टन बरकत दितो ते अपने सोटेरे सहारे सेइं परमेशरेरी आराधना की। 22 विश्वासे सेइं यूसुफे मरते बार पूरे याकीन सेइं ज़ोरू थियू, इसाएली लोक मिस्र मुलख शारेले। ते तैन हुक्म दितोरो थियो कि ज़ेइस तैना मिस्र मुलखे मरां निसले त तैना तैसेरी हेडी साथी नेन। 23 विश्वासे सेइं मूसरे हाज बव्वेई तैसेरे जरमनेरां पत्ती द्वाई महीन्न तगर छपेइतां रख्खो, किजोकि तैनेई हेरू कि ते बच्चो खासे, ते तैना राज़ेरो हुक्म टलोड़ने करां न डरे। 24 विश्वासे सेइं मूसा बट्टे भोइतां फ़िरौनेरे कुइयरू मट्टू बन्ने करां इन्कार कमाव। 25 पापेरे थोड़े दिहाड़े आनन्देरी ज़िन्दगी गुज़ारनेरे बजाहे तैनी परमेशरेरे लोकन सेइं साथी मिलतां दुख झैलनो चुनो। 26 तैनी मसीहेरे लेइ दुख झैलनो मिसरे खज़ानन् करां जादे दौलत समझी, किजोकि ते ज़ानतो थियो कि तैस स्वर्ग मां इनाम मैलनूए। 27 विश्वासे सेइं तैनी राज़ेरे सरकरो डर न कियो, बल्के मिस्र मुलख छैडी दितो, एल्हेरेलेइ तैनी समझोरू थियू ज़ेन्चरे तैनी न लेइहोने बाले परमेशरे लाहू। 28 विश्वासे सेइं मूसे इसाएली लोकन हुक्म दितो कि तैना फ़सह तिहारेरी दिहाड़ी बनानी ते गबड़ेरो खून दारन छिड़कन, ताके मौतरो स्वर्गदूत ज़ै परमेशरेरी तरफां भेजोरोए इसाएलेरे पेड़ले मट्टन न मेरी बटे। 29 विश्वासे सेइं इसाएली लोक लाल समुन्द्रे मांमेई एन्चरे लंघे ज़ेन्चरे शुक्कोरी ज़मीनी पुड़मेई पार निस्से, पन ज़ैखन मिसेइं तैङ्गां पार लंघनेरी कोशिश की त तैना डुबतां मेरि जे। 30 किजोकि इसाएली लोकेई परमेशरे पुड़ विश्वास कियो, ते सत दिहैइन तगर यरीहो नगरेरे चक्कर लाए (ज़ेन्चरे परमेशरे ज़ोरू थियू) ते दिवार डुल्ली। 31 विश्वासे सेइं राहाब वेश्या परमेशरेरे हुक्म न मन्ने बालन साथी नाश न भोइ; एल्हेरेलेइ कि तैसां इसाएली जासूस शैन्ति सेइं अपने घरे मां आने ज़ैना छेपतां

यरुहो नगरे हेरने ओरे थिये। 32 हुनी होरू किछ ज़ोनेरी ज़रूरत नई। हुनी मीं कां वक्त नई कि एरे ज़ेरे लोकां केरे बारे मां ज़ोई, ज़ेन्चरे गिदोन, बाराक, शिमशोन, यिफतह, दाऊद, ते शमूएल ते होरे नबी। 33 तैनेई विश्वासे सेइं राज़ां जीतां, ते धार्मिकतारां कम्मां कियां ते वादो कियोरी चीज़ां हासिल की, ते शेरेई तैना न खाए। 34 अग्गां तैना न फुके, ते तलवारी सेइं तैना न मारे जे, ज़ैखन तैना कमज़ोर थिये तैखन तैन ताकतबर बनाए, ते जंगी मां भी बहादर निस्से, ते तैनेई दुश्मना केरि फौज निशानी। 35 विश्वासे सेइं किछ कुआन्शन अपने मुओरे लोक जीतो मैल्ले, किछ मार खाते-खाते मेरि जे। ते तैनेई अपनो विश्वास शारनो न चाव, तैसेरे बदले मां तैनेई कैद रानू मन्ज़ूर कियूं, एल्हेरेलेइ तैना मरनेरां बाद फिरी जीति भोन, ते तैन रोड़ी ज़िन्दगी मैल्ले। 36 किछ लोकां केरो मज़ाक बनाव जेव, किछ लोकन कोड़े बाए, ते किछ शंगलन सेइं बंधे ते कैदखाने मां छुड़े। 37 ते किछन घोड़ेई बेई; ते आरे सेइं चिरे, ते तलवारी सेइं मारे जे। तैना गरीब थिये, तैन दुःख दितो जेव ते तैन सेइं बुरो बर्ताव कियो जेव। तैना भैङ्गां छैल्ली केरि खाड़ी लेइतां इरां उरां नशते थिये। 38 तैना जंगलन ते पहाड़न ते कुदून मां ते धेरतरे खडन मामेइं हंठते थिये। 39 इन बुरु संसार तैन विश्वासी लोकां केरे काबल न थियूं, तैन सेबभी केरे विश्वासेरे वजाई सेइं परमेशर तैन पुड़ खुश भोव, पन तैन, तैन मैल्लू ज़ेसेरो वादो परमेशरे कियोरो थियो। 40 किजोकि परमेशरे कां न सिर्फ तैन केरे लेइ बल्के इश्शे लेइ रोड़ी योजनाए। परमेशरे तैन शुद्ध बनानो चाते, पन सिर्फ असन सेइं साथी।

12 एल्हेरेलेइ ज़ैखन गवाहां केरे एत्रो बड़ो घाने असां घेरोरेम, त अस भी सैरी रकावटां ते तैस पापे दूर केरम ज़ै असन उलझाते, ते तैस दौड़ी ज़ै असेई दौवडनीए बल्हे सेइं दौवडम। 2 एज्जा अस विश्वासे मां पवित्र केरनेबाले यीशु पुड़ नज़र रखम, ज़ैनी तैस खुशारे लेइ ज़ै तैसेरी नज़री मां थियो, बेइज़तरी परवाह न की, बल्के क्रूसेरो दुख झैल्लो ते परमेशरे तखतरे देइने पासे गेइतां बिश्शो। 3 तुस एस गल्ली पुड़ खियाल केरा, कि अपने खलाफत केरनेबाले ज़ैनी पैपी केरि तरफां केत्रो दुख झैलो, ताके बेदिल भोइतां हिम्मत न हैरी। 4 तुसेई पापे सेइं लड़ते-लड़ते हेजू तगर एत्रो मुकाबलो नई कियोरो कि तुसेई अपनो खून बगावरो भोए। 5 ते तुसेई तैन समझानू बिसरी छुड़ू, कि ज़ैस मां तुसन जो मट्ठां ज़ोव, “कि हे मेरे बच्चव परमेशरे हुकमे एरे न समझा। ते ज़ैखन प्रभु तीं झिड़के त शारनेरे ज़ेरे मैसूस न केर। 6 किजोकि ज़ैस सेइं परमेशर प्यार केरते तैस झिड़के भी, ते ज़ैस तै अपनू मट्ठू बनाते तैस सोटेई भी बाते।” 7 ए हदैइत तुश्शे समझनेरे लेइए, एस बल्हे सेइं बरदाशत केरा, परमेशर तुसन अपना मट्ठां सेमझतां बर्ताव केरते, किजोकि तैन कौन ज़ेरू मट्ठूए ज़ैस तैसेरो बाजी समझाए नन्ना? 8 पन अगर तुसन सुधारे न गाथ ज़ैस शामिल त तुस न गैर औलाद भोनेथ न की अपना मट्ठां। 9 एसेरे अलावा ज़ैखन इश्शे जिसमानी बाजी

सुधारते रहते थिये ते अस तैन केरि इज़्ज़त केरते राए, त कुन आत्मां केरो बाजी यानी परमेशरेरी जादे इज़्ज़त न केरम ताके जीते राम। 10 इश्शे जिसमानी बाजी त थोड़े दिहाड़ां केरे लेइ एपनी समझरे मुताबिक असन सुधारते रहते थिये, पन परमेशर इश्शे फैडदेरे लेइ असन सुधारते ताके असां तैसेरी पवित्रतैई मां शामिल भोम। 11 एसमां शक नई कि ज़ैखन केन्ची हदैइत की गाचे त तै खुशी नई, बल्के बडू बुरु बुझते, पन ज़ैखन तै बले-बले पक्को भोइ गाते त तैस बादे मां धर्मी बेनतां चैनरो फल मैलते। 12 बस्सा एपनी कमज़ोर पैखड़न ते कमज़ोर ज़ैन्धु मज़बूत केरा। 13 ते अपने पावन सिधी बतां चलाथ ताके टोंटे टेपलोए न ते तैना बेझोन। 14 सेबन्धन सेइं मेल मिलापे सेइं राथ, ते तै पवित्रताई हासिल केरनेरी हर वक्त कोशिश केरा जेसेरे बगैर कोई प्रभु न लेई सके। 15 खबरदार एरू न भोए कि कोई मैन्हु परमेशरे अनुग्रह करां रेइ गाए, एरू न भोए कि कोई टलितू ज़ील लगगे ते तुसन परेशान केरे ते होरे लोक भी भिटे भोइ गान। 16 ते न कोई मैन्हु तुसन मां बदमाशी केरनेबालो भोए, या एसावेरो ज़ेरो अधर्मी न बने, ज़ैनी एक्की बार रोटी खानेरे लेइ अपने बड़े भोनेरू हक बेचतां छुड़ू। 17 किजोकि तुस ज़ानतथ कि बादे मां ज़ैखन तैनी तै बरकत हासिल केरनेरी कोशिश की, त तैस न मैल्ली, तैस अपनि नियत बदलनेरो मौको न मैलो हालांकी ते लेरां देइ-देइ तैस तोपनेरी कोशिश केरतो राव। 18 तुस तैस पहाड़ कां नेइ नई ओरे, ज़ैस सेइं तुस हुरी सकते थिए, तैन पहाड़ अग्गी सेइं फुकोतू थियूं ते अंधगुबारी ते बड़ी तूफान थियो। 19 तैड़ी नइशिगेरी शोरे ते ज़ोने शुनाने बालेरी एरी आवाज़ शुनोती थी, कि ज़ैखन लोकेई तै आवाज़ शुनी त मिनत केरने लगगे, कि असन सेइं होरि गल्लां न केर। 20 एल्हेरेलेइ कि तैनेई तै हुकम बरदाशत न केरि बटो, “अगर कोई जानवर भी एस पहाड़े सेइं हुरेलो त तै घोड़ेई बैइतां मारो गालो।” 21 ते नज़ारो एत्रो खतरनाक थियो कि मूसे ज़ोव, “अवं डरने ते थरकने लोरोई।” 22 बल्के तुस सिय्योनेरे पहाड़े ते जीति परमेशरेर नगर यानी स्वर्गेर यरूशलमे मां लखेई स्वर्गदूतन कां खुशी मनाने ओरेथ। 23 ते तुस परमेशरेरी पेइले बच्चां केरि सभाई मां ते कलीसियाई मां ओरेथ, एना तैना लोकन ज़ैन केरां नच्चां स्वर्ग मां लिखोरेन, तुस इन्साफ केरनेबाले परमेशरे कां ओरेथ, ते धरमी केरि आत्मन कां ओरेथ, यानी तैन कां ज़ैना सिद्ध कियोरेन। 24 तुस नन्वे करारे बिचवाई केरनेबाले यीशु ते तैसेरे छिड़कोरे खूने कां ओरेथ, ज़ै हाबिलेरे खूने करां रोड़ी गल्लां जोते। 25 खबरदार राथ, तुस परमेशर ज़ै तुसन सेइं गल्लां केरते तैसेरो इन्कार न केरथ, किजोकि ज़ैनेई ज़मीनी पुड़ हदैइत केरनेबालेरो इन्कार कियो त तैना न बन्चे, त अगर अस स्वर्ग हदैइत केरनेबालेरो इन्कार केरमेले त केन्चरे बन्चमेले? 26 तैखन तैसेरी आवाज़ी सेइं धरती हिली जेई पन तैनी ई वादो कियोरोए कि, “एक्की फेरे फिरी अवं सिर्फ ज़मीन नई बल्के अम्बरे भी हिलेइलो।” 27 तैसेरू “एक्की फेरे फिरी” ज़ोने सेइं साफ पतो

लगत की पैदा कियोरी चीज़ां ज़ैना हिलचन तैना खतम भोनिन ताके ज़ैना हिलन नन्ना तैना रैनिन। 28 ज़ैडी असन तैन राज़ मैलने लोरूए ज़ैन हिलनेरू नई त एज्जा अस तैसेरू शुक्र केरम ते हिम्मत केरम कि, अस परमेशेरी आराधना परमेशेरे डरे सेइं केरि बटम ज़ैस सेइं तै खुश भोए। 29 किजोकि इश्शो परमेशर भस्म केरनेबैली अगारो ज़ेरोए।

13 एककी होरि सेइं ढ़ला ते बेइनां केरो ज़ेरो प्यार केरते राथ। 2 बखले लोकां केरि खातरदारी केरा, किजोकि एरू केरने सेइं किछेई अनज़ाने मां स्वर्गदूतां केरि खातरदारी कियोरीए। 3 कैदन याद रखा, मन्ना कि ज़ेन्चरे तुस एप्पू भी तैन सेइं साथी कैद आथ, ते ज़ैन सेइं बुरो बर्ताव भोते तैन भी याद रखा, इन सेमझतां मन्ना कि ज़ेन्चरे तुसन सेइं बुरो बर्ताव भोव। 4 इला बनानो सेबभी लोकन मां इज़्ज़तरी गल समझी गाए, ते कुआन्श ते मड़द एककी होरेरे लेइ वफादार रान, किजोकि परमेशर बदमाशी केरने ते नाजाइज़ रिशते रखनेबालां केरो इन्साफ केरेलो। 5 अपने आपे दौलतरे लालचे करां दूर रखा, ते ज़ेन्चू तुसन कां आए तैस्से मां राज़ी राथ, किजोकि परमेशरे एप्पू एन ज़ोरूए, “अवं तीं करां कथे भी दूर न भोइलो, ते न कथे तीं शैरेलो।” 6 एल्हेरेलेइ अस दिलेरी सेइं ज़ोई सकतम कि, “प्रभु मेरो मद्दत केरनेबालोए, अवं डेरि नन्ना इन्सान मेरू कुन बगैडी सकते?” 7 ज़ैना तुश्शे अगुवे थिये, तैन याद रखा, ज़ैनेई तुसन परमेशेरू बच्चन शुनावरू थियूं, इस गल्ली पुड़ ध्यान देथ, कि तैना केरी ज़िन्दगी गुज़ैरतां च़ले जे, ते ज़ेरो विश्वास तैन थियो तुस भी तैन केरो ज़ेरो विश्वास केरा। 8 यीशु मसीह हीज ते अज़ बल्के हमेशारे लेइ अक्कां ज़ेरोए। (aiōn g165) 9 अलग-अलग किसमां केरि शिक्षाई सेइं न टेपलोथ, रोडू एन्ने कि तुश्शो दिल परमेशेरें अनुग्रहे सेइं मज़बूत राए, न कि एरो परहेज़ेरे खाने सेइं, ज़ेसेरे खाने बालन कोई फैइदो न मैलो। 10 इश्शी अक एरी बलिदान केरनेरी ठारे, तैस मरां तैन खानेरी कोई अज़ाज़त नई ज़ैना तेम्बु मां सेवा केरतन। 11 किजोकि महायाजक ज़ैन जानवरां केरो खून मन्दरे मां परमपवित्र ठैरी मां पापेरे बलिदानेरे लेइ नेतो थियो, तैन केरो बाकी जिसम ज़ैडी इस्राएली लोक रहते थिये तैदुं बेइर फुकते थिये। 12 एल्हेरेलेइ, यीशुए भी लोक एप्पू अपने खूने सेइं पवित्र केरनेरे लेइ यरूशलेम नगरे करां बेइर दुःख झैल्लो ते मरो। 13 एल्हेरेलेइ, एज्जा अस भी यहूदी केरि रसमन शैरतां यीशु पुड़ विश्वास केरम ते तैसेरो ज़ेरो दुःख ते निन्दा झैल्लम। 14 किजोकि ई दुनिया इश्शु हमेशारू घर नई, पन अस एजनेबाले घरेरे इंतज़ारे मां आम ज़ैन एजनेबाले वक्ते मां इश्शू भोलू। 15 एल्हेरेलेइ असां यीशुएरे ज़िरिये परमेशेरें लेइ तारीफरू बलिदान च़ाढ़म, यानी ज़ैखन अस अपने शब्दन सेइं इकरार केरतम कि यीशु इश्शो प्रभु आए। 16 पन भलाई केरनि ते ज़ैन ज़रूरते तैन केरि मद्दत केरा, किजोकि परमेशर एरे ज़ेरे बलिदान सेइं खुश भोते। 17 अपने अगुवां केरो हुक्म मन्ना, ते तैन केरे अधीन राथ, किजोकि तैन केरे ज़िमेदारी कि तैना

प्राणा केरि रखवाली केरन, ते एस कम्मरो तैनेई परमेशरे हिसाब भी देने पेनोए। अगर तुस तैन केरो हुक्म मन्नेले त तैना अपनू कम खुशी सेइं केरेले त तुसन फैइदो भोलो, पन अगर तैस कम तकलीफ बुझेले त तुसन कोई फैइदो न भोलो। 18 इश्शे लेइ प्रार्थना केरते राथ, असन याकीने इश्शो ज़मीर साफे, ते अस हर हिसाबे सेइं नेक नीती सेइं ज़िन्दगी गुज़ारनी चातम। 19 अवं तुसन कां बिनती केरताई कि मेरे लेइ प्रार्थना केरा, कि अवं फिरी लूशी तुसन कां एज्जी सेखी। 20 हुनी शान्ति देनेबालो परमेशर, ज़ैनी भैट्टां केरो महान रखवालो मतलब प्रभु यीशु मसीहे, इश्शे प्रभु हमेशारे करारेरे खूने सेइं मुड़दन मरां ज़ीतो कियो, (aiōnios g166) 21 तुसन हर रोडे कम्मे मां सिद्ध केरे, ज़ैस सेइं तुस तैसेरी मज़ीं पूरी केरथ, ते ज़ैन किछ परमेशरे पसंद एइते तैस यीशु मसीहेरे ज़िरिये असन मां केरे, ते मसीहेरी बड़याई हमेशा-हमेशा भोती राए, आमीन। (aiōn g165) 22 हे ढ़लाव ते बेइनव, अवं तुसन कां बिनती केरताई कि मेरी तुस तैना गल्लां सबरी सेइं शुना, ज़ैना मीं तुश्शे हिम्मत बढ़ानेरे लेइ लिखोरिन, किजोकि ई चिद्दी ज़ै मीं तुसन लिखी बड़ी नई। 23 ताके तुसन पतो लग्गे कि इश्शो विश्वासी ढ़ला तीमुथियुस कैदेरां छुटोरोए, ते अगर ते जल्दी अव, त अस दुइये तुसन सेइं मिलमेले। 24 अपने सेबभी विश्वासी लोकन ते सेबभी पवित्र लोकन जो इश्शु नमस्कार ज़ोथ। इतालिया मुलखेरे विश्वासी लोकेई तुसन जो नमस्कार ज़ोरूए। 25 तुसन सेबभन पुड़ परमेशेरें अनुग्रह भोतो राए, आमीन।

याकूब

1 अवं याकूब, जै परमेशर ते प्रभु यीशु मसीहरे दास आई। अवं तैन 12 यहूदी गोत्रां केरे विश्वासी लोकन जैना तितर बितर भोइतां सारे दुनियाई मां रातन, तैन जो नमस्कार लिखताई। 2 हे मेरे ढूलाव ते बेइनव, जैखन तुसन पुड़ अलग-अलग किसमां केरि अज़मैइशां एज्जन, त एस खुशारी गल समझा, 3 किजोकि तुस ज्ञानतथ, तुशे विश्वासेरे परखे गाने सेइं इन साबत भोते, कि तुस हेजू तगर भी परमेशरे पुड़ भरोसो रखतथ, ते तुस मुशकलन सबरी सेइं झल्लेले। 4 पन मुशकलन मां सबर केरनि शिख्खा, कि तुस आत्मिकता मां मज़बूत ते सिद्ध भोते गाथ, ते तुसन मां कोन्ची रोड़ी गल्लरी घटी न भोए। 5 पन अगर तुसन मरां कोन्ची अक्लारी घटी भोए, त तै परमेशरे करां मगगे, जै बगैर दोष लेइतां सेबनन खुशी सेइं देते, त मगने बाले दिती गाली। 6 पन विश्वासे सेइं मगगे, ते शक न केरे। किजोकि शक केरनेबालो समुन्दरी छेल्ली केरो ज़ेरोए, जैना हवाई सेइं च़लतिन ते उछड़तिन। 7 एरो मैन्हु इन न समझे, कि मीं प्रभु करां किछ मैलेलू। 8 ई मैन्हु दूमनोए ते एपनी सैरी गल्लन मां चंचल आए। 9 गरीब विश्वासी ढूला खुश भोए, किजोकि परमेशरे तैसेरी आदर कियोरीए। 10 ते धनी विश्वासी अपने घटिया हालती पुड़ खुश भोए, किजोकि घासेरे फूड़ोवेंरो ज़ेरो मिटी गातो। 11 दिहाड़ो निसते बड़ी धुप पेतीए, ते घासे शुकाते, ते तैसेरू फूड़ोंव झैड़ी गाते, ते तैसेरी शोभा गाती रहतीए; तेन्चरे दौलतमन्द ढूला भी अपने कम्मन मां मैरी गानेन। 12 धने ते मैन्हु, जै अज़मैइशी मां मज़बूत रहते; किजोकि तै अपने विश्वास साबत केरतां ज़िन्दगरू तैन इनाम हासिल केरेलो, ज़ेसेरो वादो प्रभुए तैन सेइं कियोरोए, जैना तैस सेइं प्यार केरतन। 13 जैखन कोन्चेरी अज़मैइश भोए, त तै इन न जोए, कि मेरी अज़मैइश परमेशरेरी तरफां भोतीए। न बुरी गल्लन सेइं परमेशरेरी अज़मैइश भोइ बटतीए, ते न तै बुरी गल्लन सेइं केन्चेरी अज़मैइश केरते। 14 पन हर कोई अपने खुवैइशन मां खिचोइतां, ते फेसतां अज़मैइशी मां गाते। 15 ते फिरी बुरु केरनेरी खुवैइशरो नितीजो ई भोते, कि मैन्हु बुरी चीजां केरतन, ते आखरी मां तैन हमेशारी सज़ा मैलतीए। 16 हे मेरे ढूलारे ढूलाव ते बेइनव, धोखो न खाथ। 17 किजोकि हर रोडू वरदान, ते हर रोडू दान इशे बाजी परमेशरेरे तरफां आए, जैनी सैरी लोआं (यानी दिहाड़ी चाँदनी, तारे) बनेइं। परमेशर हमेशा अक्कां ज़ेरो आए, तै छावरो ज़ेरो न बेदलो। 18 तैन अपने मेज़ी सेइं असन सच्चेरे वचने ज़िरिये सेइं नर्वीं ज़िन्दगी दिती, ताके अस तैसेरी सन्ननाई मरां फसलारे ज़ेरे पेइले फल भोम। 19 मेरे ढूलारे ढूलाव ते बेइनव, ई गल तुस ज्ञानतथ, एल्हेरेलेइ हर कोई मैन्हु शुन्नेरे लेइ हुशार ते ज़ोने मां पत्रोंव भोए, ते सरकी मां ढिल्लो भोए। 20 किजोकि जैखन मैन्हु सरकी मां भोए त तै धार्मिकतारू कम न केरि बटे जैस सेइं परमेशर खुश भोए। 21 एल्हेरेलेइ सारी गंदगी ते दुष्ट दूर केरतां, तैन परमेशरेरू वचन

नेरमी सेइं कबूल केरे, जैन दिले मां छड़ू जेव, जैन तुशे प्राणन मुक्ति देइ बटते। 22 पन परमेशरेरे वचने पुड़ च़लनेबाला बना, ते सिर्फ शुन्ने बाले नई, जैना अपने आपे धोखो देतन। 23 किजोकि जै परमेशरेरू वचन शुन्ने बालो भोए, ते तैस पुड़ च़लने बालो न भोए, त तै तैस मैनेरो ज़ेरोए, जै अपनू तुतर शीशे मां हेरते। 24 ते तै अपनो आप हेरतां च़लो गाते, ते तैखने बिसरते कि अवं केरो थियो। 25 पन जै मैन्हु कानूने ध्यान सेइं पढ़ते, जै पूरे तरीके सेइं असन आज़ादी देते, सिर्फ शुने न पन तेन्चरे कम केरते, तै अपने कम्मे मां बरकत हासिल केरेलो। 26 अगर कोई अपनो आप भक्त समझे, ते अपनि ज़िभी कैबू मां न रखवे, तै अपने आपे धोखो देते, ते तैसेरी भक्ति बेफ़ैदी आए। 27 इशे बाजी परमेशरेरे नेइं शुद्ध ते रोड़ी भक्ति ई आए, कि बे सहारां ते विधवां केरे मुसीबती मां खबर नी गाए, ते अपनो आप दुनियारे बुरे सुभावरे अस्सरे करां दूर रखम।

2 हे मेरे ढूलाव ते बेइनव, इशो महिमा बालो प्रभु यीशु मसीहरो विश्वास तुसन मां तरफ़दारी सेइं न भोए। 2 अगर अक मैन्हु सोन्नेरे छल्ले ते रोड़ां लिगड़ां लेइतां तुशे झुण्डे मां एज्जे ते अक गरीब भी मेलां लिगड़ां लेइतां एज्जे। 3 ते तुस तैस रोड़े लिगड़न बालेरू तुतर हेरतां ज़ोथ, “तू इड़ी रोड़ी ठैरी बिश,” ते तैस गरीबे सेइं ज़ोथ, “कि तू इड़ी खड़ो रा, या इड़ी तल्ले बिश।” 4 त कुन तुसेईं भेद भाव न कियो, ते बुरे खियाले सेइं इन्साफ़ केरनेबाले न भोए? 5 हे मेरे ढूलारे ढूलाव ते बेइनव शुना, कुन परमेशरे दुनियारे गरीब न चुने, कि विश्वासे मां धनी भोन, ते तैस राज़ज़ेरे बारस भोन, ज़ेसेरो वादो तैन तैन सेइं कियोरोए जैना तैस सेइं प्यार केरतन। 6 पन तुसेईं तैस गरीबेरी बेइज़ती की, कुन धनी लोक तुसन पुड़ जुलम न केरन? ते कुन तैना तुसन आदालतन मां घसीटी-घसीटी न नेन? 7 कुन तैना तैस रोड़े नञ्चरी तुहीन न केरन ज़ेसेरे तुसन जो ज़ोतन? 8 फिरी भी तुस पवित्रशास्त्रेरे इस वचनेरे मुताबिक, कि “तू अपने पड़ोसी सेइं अपनो ज़ेरो प्यार केर,” सच्चे तैस राज़-कानून पूरो केरतथ, त रोडू केरतथ। 9 पन अगर तुस तरफ़दारी केरतथ, त पाप केरतथ; ते मूसेरो कानून तुसन पापी ठहराते। 10 किजोकि अगर कोई मूसेरे सारे कानूने पुड़ च़लते, ते एक्की गल्ली पुड़ न च़ेलि बटो त ते सेबभी गल्लन मां दोषी भोते। 11 एल्हेरेलेइ कि जैने इन ज़ोव, कि “तू बदमाशी न केरां,” तैन इन भी ज़ोव, “तू खून न केरां” एल्हेरेलेइ अगर तीं बदमाशी न की, पन खून कियो फिरी भी तू मूसेरे कानूने पुड़ च़लने बालो न भोव। 12 तुशरी गल्लां ते बर्ताव तैन लोकां केरे ज़ेरो भोए, जैन केरो इन्साफ़ आज़ादी देनेबाले कानूनेरे मुताबिक भोलो। 13 किजोकि जैने दया न की तैसेरो इन्साफ़ बगैर दयाई सेइं भोलो। दया इन्साफ़े करां भारी भोतीए। 14 हे मेरे ढूलाव ते बेइनव, अगर कोई ज़ोए कि मीं यीशु मसीह पुड़ विश्वासे, पन होरि केरे लेइ रोड़ां कम्मां न केरतो भोए, त तैस सेइं कुन फैइदो? कुन एरो विश्वास तैस मुक्ति देइ बटते? 15 अगर कोई विश्वासी ढूला या बेइन भोए जैन

लिगड़ा केरि जरूरत भोए, ते तैन रोज़ खाने जो न भोए। 16 ते तुसन मरां कोई तैन सेइं ज़ोए, “खुशी सेइं गाथ परमेशर तुसन बरकत दे,” तुस गर्म राथ, ते रज़्ज़ा; पन ज़ैना चीज़ां जानरे लेइं जरूरिन तैना तैन न दे, त कुन फैइदो? 17 तेन्चरे विश्वास भी, अगर रोड़े कम्मन सेइं न भोए, त अपने सुभावे मां मर्रोए। 18 बल्के कोई ज़ोई बटते कि, “तीं विश्वासे, ते अवं रोड़ां कम्मां केरताई।” पन अवं ज़ोताई तू अपनो विश्वास मीं रोड़ां कम्मां केरे बगैर हिरा, ते अवं अपनो विश्वास रोड़े कम्मन सेइं तीं हिरालो। 19 तीं विश्वासे कि अक्के परमेशरे, तू रोड़ू केरतस, भूतां भी विश्वास केरतन, ते थरकतन। 20 पन हे निकम्मे मैन्हु तू इन न ज़ानस, कि रोड़े कम्मन बगैर विश्वास मर्रोए। 21 ज़ैखन इश्शे पूर्वज अब्राहमे अपनू मडू इसहाक बलिदान केरनेरे ठैरी पुड़ चाढ़ू, त कुन तै कम्मन सेइं धर्मी न भोव? 22 तीं हेरू कि विश्वासे तैसेरे कम्मन सेइं साथी अस्सर कियोरोए, ते कम्मन सेइं विश्वास सिद्ध भोव। 23 ते पवित्रशास्त्रेरो ई वचन पूरो भोव, “कि अब्राहमे परमेशरे पुड़ विश्वास कियो, ते तै तैसेरेलेइ धार्मिकता गनो जेव,” ते तै परमेशरेरो दोस्त भोव। 24 ते तुसेईं हेरू कि मैन्हु सिर्फ विश्वासे सेइं नई, बल्के कम्मन सेइं भी धर्मी भोते। 25 तेन्चरे राहाब वेश्यां भी ज़ैखन तैसां बिस्तार देनेबाले लोक अपने घरे मां रखे, ते होरि बत्तां वापस भेजे, त कुन कम्मन सेइं धर्मी न भोइ? 26 ते ज़ेन्चरे जान आत्मा बगैर मर्री आए, तेन्चरे विश्वास भी रोड़े कम्मन बगैर मर्रोए।

3 हे मेरे ढ़लाव ते बेइनव, तुसन मरां बड़े परमेशरेरे वचनेरे उस्ताद न भोन, किजोकि तुसन पतोए, कि इश्शो उस्तादां केरो इन्साफ जादे सेखती सेइं भोलो। 2 अस बड़े बार गेलती केरतम, ज़ै ज़ोने मां गलती न केरे, तैए सिद्ध मैनुए, ते सारे जानी कैबू केरते। 3 ज़ैखन अस अपने कैबू मां केरनेरे लेइ घोड़ां केरे ऐशी मां लगाम लातम, त अस तैन केरि सारी जानी भी फेरी सखम। 4 हेरा, पैनेरां जिहाज़ां भी, अगर बडां भोतन, ते तेज़ हवाई सेइं चलां गातन, फिरी भी एककी निकड़ी पतवारी सेइं चलानेबालो अपने मेज़ीं सेइं फिराते। 5 तेन्चरे ज़िभ भी, अगर अक निकड़ो अंगे, ते बेड़ि-बेड़ि घमण्डेरी गल्लां केरती, तक्का, थोड़ी ज़ेरि अग्गी सेइं केत्रे बड़े-बड़े जंगले मां अग लाई गातीए। 6 ज़िभ भी अक अगारी ज़ेरीए, ज़िभ इश्शे जानी मां अक बुरो हिस्सो आए, ते सैरी जानी पुड़ कलंक लातीए, ते ज़िन्दगरी दुनियाई मां अग लातीए, ते नरकेरी अग्गी सेइं बलती रहतीए। (Geenna g1067) 7 हर किसमां केरे जंगली जानवर, चुडोलू, ते पेटेरे भारे बाले जीप जन्तू ते दरियारे जानवर त इन्सानेरे हथ्ये एज्जी बटतन ते ओरे भी आन। 8 पन ज़िभी मैन्न मरां कोई भी कैबू मां न केरि सके, तै अक एरी बलाए ज़ै कथे रुके न, तै सप्पेरे ज़ेहरेरे ज़ेरीए नुकसान देने बालीए। 9 इस्से ज़िभी सेइं अस प्रभु ते बाजी परमेशरेरी तारीफ़ केरतम, ते इस्से सेइं मैन्हु, ज़ै परमेशरेरे रूपे मां बनोरोए श्राप देतम। 10 एककी ऐशी सेइं शुक्र ते श्राप निसतन। हे मेरे ढ़लाव ते बेइनव एरू न लोड़े भोरू।

11 कुन एककी नागे मरां मिट्टू ते लूनू पानी निस्सी बटते? 12 हे मेरे ढ़लाव ते बेइनव, कुन फ़ेगैरो बुटे पुड़ ज़ैतून, या दाछी पुड़ फैगू लेगि बटतन? तेन्चरे लूनो नाग भी मिट्टू पानी न निस्सी बटे। 13 तुसन मरां ज़ानी ते समझदार कौने? ज़ै एरो भोए तै अपने कम्मन रोड़े चाल चलने सेइं तैस नम्रता सेइं साथी बांदो केरे ज़ै ज़ाने सेइं पैदा भोतीए। 14 पन अगर तुस अपने-अपने मने मां सखत जलन, ते खुदगर्ज़ी रखतथ, त बेड़ि-बेड़ि गल्लां न केरथ ते सज़्ज़ेरे खलाफ़ झूठ न ज़ोइयथ। 15 इन ज़ान तैन नई, ज़ैन स्वर्गोरां ओरूए बल्के दुनियारू, ते जिसमानी, ते शैतानीए। 16 एल्हेरेलेइ कि ज़ैड़ी जलन, ते खुदगर्ज़ी भोतीए, तैड़ी फसाद ते हर बुरू कम भोते। 17 पन ज़ैन ज़ान स्वर्गोरां एइते तैन पेड़लू त पवित्र भोते, फिरी मिलनसार, हलीम ते शिखालने बालू, ते दया ते रोड़े कम्मन सेइं ते बगैर तरफदारी ते पाखंडे बगैर भोते। 18 ते मिलाप केराने बालां केरे लेइ धार्मिकतरो फल मेल मलापे सेइं साथी बेव गाते।

4 तुसन मां लड़ाई ते झगड़े कोठां एइतन? कुन तैन खुवैइशन सेइं नई ज़ैना तुश्शे अंगन मां लेइतन? 2 तुस खुवैइशन रखतथ, पन तुसन मैल्ले न, एल्हेरेलेइ तुस खून ते जलन केरतथ, ते किछ हासिल न केरि बटथ तुस झगड़तथ ते लड़तथ; तुसन एल्हेरेलेइ न मैल्ले, कि तुस मगथ न। 3 तुस मगतथ ते मैल्ले न, किजोकि बुरी इच्छा सेइं मगतथ, ताके अपने एशे मां खर्च केरथ। 4 हे बेईमान लोकव, कुन तुस न ज़ानतथ, कि दुनियारी चीज़न सेइं दोस्ती रखनी परमेशरे सेइं बैर केरनोए, ज़ै कोई दुनियारो दोस्त भोनो चाते, तै अपनो आप परमेशरेरो दुश्मन बनाते। 5 कुन तुस इन समझतथ, कि पवित्रशास्त्र बैफ़ेइदू ज़ोते कि, “ज़ै आत्मा तैने असन मां छडी, कुन तै एरी इच्छा केरती, ज़ेसेरो फल जलन भोए?” 6 पन ज़ै अनुग्रह परमेशर देते तै बड़ी मज़बूते, एल्हेरेलेइ पवित्रशास्त्रे मां इन लिखोरूए, “कि परमेशर अभिमान केरनेबालां केरो मुकाबलो केरते, पन दीनन् पुड़ अनुग्रह केरते।” 7 एल्हेरेलेइ परमेशरेरे अधीन भोथ, ते ज़ैन शैतान तुसन करां करानू चाते तैन न केरा, त तै तुसन करां दूर नश्शेलो। 8 परमेशरेरे नेड़े एज्जा, त तै तुश्शे नेड़े एज्जेलो, हे पापी लोकव, अपने ज़िन्दगी करां पाप दूर केरा, ते हे दुमन्ने बाले लोकव अपने मन्न पवित्र केरा। 9 अपने पापां केरे वजाई सेइं दुखी भोथ, ते शोग केरा, ते लेरां देथ, तुश्शी हासी शोगे मां, ते तुश्शी खुशी उदेसी मां बेदलोए। 10 प्रभुपरे सामने नम्र बना, त तै तुसन इज़्ज़त देइतां उच्चे केरेलो। 11 हे ढ़लाव ते बेइनव, एककी होरेरी तुहीन न केरा, ज़ै अपने ढ़लाएरी तुहीन केरते, या अपने ढ़लाए पुड़ दोष लाते, तै मूसेरे कानूनेरी भी तुहीन केरते, ते मूसेरे कानून पुड़ दोष लाते, ते अगर तू कानून पुड़ दोष लातस, त तू कानून पुड़ चलने बालो न भोव, पन तैसेरो हाकिम भोव। 12 मूसेरो कानून देनेबालो ते हाकिम त अक्के, तै परमेशर आए, ज़ैस कां बचावे ते नाश केरनेरी शक्ति आए, तू कौन आस, ज़ै अपने पड़ोसी पुड़ दोष लातस? 13 तुस ज़ैना इन

जोतथ, “कि अज या कालां अस कोन्ची होरि नगर मां गेइतां इश्शो जेरो दुःख सुख झैल्लने बालो मैन्हु थियो, तैने दिले सेइं अक साल बीतामेले, ते बुपार केरतां फैडदो उठामेले।” 14 ते प्रार्थना की, कि झैडी न भोए, ते सड़े द्वाइ साल झैडी न भोइ। इन न ज्ञानथ कि कालां कुन भोलू, शुना, तुश्शी ज़िन्दगी आए 18 फिरी तैने प्रार्थना की, त अम्बरेरां झैडी भोइ, ते धेरीती पुड़ कुन? तुस त भाखेरे ज़ेरेथ, ज़ै थोड़े चिरे लेइहोते, ते फिरी गैइब फसल भोइ। 19 हे मेरे द्वाव ते बेइनव, अगर कोई विश्वासी भोते। 15 एल्हेरेलेइ तुसेई इन ज़ोरू लोड़े, “अगर प्रभु चाए, त परमेशेरी सच्चि शिक्षा मन्नी शारे, ते कोई तैस मनफिरानेरे लेइ अस जीति रहमेले, ते इन या तैन कम भी केरमेले।” 16 पन हुनी मद्दत केरे, 20 त ते इन बुझे, कि ज़ै कोई कोन्ची भटकोरे पैपी तुस अपने अभिमाने पुड़ घमण्ड केरतथ, एरू सब घमण्ड बुरू मनफिरानेरे लेइ मद्दत केरे, त ते एककी प्राणे (मैन्हु) मौती करां भोते। 17 एल्हेरेलेइ ज़ै कोई भलाई केरनि ज्ञानते ते न केरे, बच्चालो, ते परमेशर तैसेरे बड़े पाप भी माफ़ केरेलो। तैसेरेलेइ ई पापे।

5 हे दौलतमंदव विश्वासी लोकव, शुना, तुस अपने एजनेबाले दुखेरे लेइ ज़ोरे-जोरे लेरां देथ। 2 तुश्शू धन नाश भोवं ते तुश्शे लिगड़न खर लगगे। 3 तुश्शे सोन्ने चैदी मोरचो लगगे, ज़ेइस परमेशरे तुश्शो इन्साफ केरेलो त ई मोरचो तुश्शे खलाफ गवाहेरो ज़ेरो भोलो, ते अगगारो ज़ेरो तुश्शू मास फुकेलो, तुसेई आखरी युगे मां धन अकोट्टू कियूं। 4 तक्का, ज़ैन मज़दूरेई तुश्शां ऊडारां कट्टां, तैन केरि ते मज़दूरी ज़ै तुसेई तैन न दिती, चिन्डां मारने लोरीए, ते फसल कटने बालां केरि फरयाद फौजरे परमेशरे शुनोरीए। 5 तुस धेरीती पुड़ एश केरने मां लगगोरो राए, तुसेई सिर्फ अपने सुखेरे लेइ ज़िन्दगी जी, एल्हेरेलेइ तुसेई अपनी आप तैस दिहाड़े लेइ तियार कियोरोए ज़ेइस परमेशर तुश्शो इन्साफ केरेलो। 6 तुसेई धर्मी दोषी बनेइतां मारो, ते तुश्शे सामनो न केरे। 7 ते हे द्वाव ते बेइनव, प्रभुएरे एजने तगर सबरी सेइं बलगा, हेरा, ज़मीनदार कीमती फसलरे कीमती फलेरे उमीदरो पेइली ते आखरी झैडी भोने तगर सबरी सेइं बलगते। 8 तुस भी तेन्चरे सबरी सेइं बलगा, ते अपने दिले मज़बूत केरा, किजोकि प्रभुएरू एजनु नेइए। 9 हे द्वाव ते बेइनव, एककी होरि पुड़ दोष न लाथ ताके तुसन पुड़ भी दोष न लाव गाए, हेरा, हाकिम नेड़े ते एजनेरे लेइ तियारे। 10 हे द्वाव ते बेइनव, ज़ैन नेबेई प्रभुएरे नंवे सेइं गल्लां की, तैन सबर केरनेरो अक नमूनो समझा। 11 हेरा, अस बलगने बालन जो धन ज़ोतम, तुसेई अय्यूबेरे सबरारे बारे मां शुनोरूए, ते प्रभु करां तैसेरो ज़ै प्रतिफल भोव तैने भी बुझू, ज़ैस सेइं प्रभुएरी बड़ी महरबानी ते दया बांदी भोतीए 12 पन हे मेरे द्वाव ते बेइनव, सेबन करां बट्टी गल ईए, कि कसम न खाथ, न स्वर्गोरी न धेरतरी, न होरि कोन्ची चीज़री, पन तुश्शी गल हांपरी हाँ, ते न एरी नां भोए, फिरी परमेशर तुसन सज़ा न देलो। 13 अगर तुसन मां कोई दुखी भोए त ते प्रार्थना केरे, अगर खुश भोए, त परमेशेरां भजना ज़ोए। 14 अगर तुसन मां कोई रोगी भोए, त कलीसियारे बुजुर्गन कुजाए, ते तेना प्रभुएरे नंवे सेइं तैस पुड़ तेल मेलतां तैसेरेलेइ प्रार्थना केरन। 15 ते विश्वासेरी प्रार्थनाई सेइं रोगी बचेलो ते प्रभु तैस बज्झालो, ते अगर तैने पाप कियोरे भोले त परमेशर तैस माफ़ केरेलो। 16 एल्हेरेलेइ तुस एककी होरेरे सामने अपने-अपने पाप मन्ना, ते एककी होरेरे लेइ प्रार्थना केरा, ज़ैस सेइं तुस बेज्झाथ, धर्मी मैनेरे प्रार्थनारे अस्सरे सेइं बडू किछ भोइ बटते। 17 एलिय्याह भी

1 पतरस

1 अवं पतरस यीशु मसीहेरो प्रेरित आई, अवं ई चिट्ठी परमेशरेर चुनोरे लोकां केरे लेइ लिखने लोरोई, जैना परदेशी केरे जेरे पुन्तुस, गलातिया, कप्पदूकिया, आसिया ते बितूनिया इलाकां केरे अलग-अलग नगरन मां तितर-बितर भोइतां रातन। 2 बाजी परमेशरे बडो पेड़लो ई फैसलो कियोरो थियो कि तुस तैसेरे लोक भोथ त कने तै तुसन पवित्र आत्माेर कम्मरे जिरिये पवित्र बनाए। तैने एन एल्हेरेलेइ कियू ताके तुस यीशु मसीहेरी मन्थ ते तैसेरे खूनेरे जिरिये सेइं शुद्ध भोथ। अवं प्रार्थना केरताई कि परमेशर तुसन अनुग्रह ते शान्ति जादे करां जादे दे। 3 इश्शे प्रभु यीशु मसीहेरे बाजी ते परमेशेरु शुक्र भोए, परमेशरे असन पुड़ महान दया केरतां असन नर्वी ज़िन्दगी दिती। किजोकि परमेशरे यीशु मसीह मुड़न मरां ज़िंतो कियो त कने तैने अस पूरी उमीदी सेइं जीनेरे काबल बनोरेम, मतलब असन तैन चीजां हासिल केरनेरी पूरी उमीदे, जैन केरो देनेरो वादो परमेशरे असन सेइं कियोरोए। 4 अस तैस विरासती हासिल केरनेरो इंतज़ार केरने लोरेम जै परमेशरे इश्शे लेइ तियार कियोरीए। कोई भी तैन चीज़न कधी बरबाद न केरि बटे। किछ भी तैस खराब केरि बटे। तैना चीजां कधी भी पुरैनी न भोली ते तैन केरि खूबसूरती कथे न घटेली। परमेशरे इना चीजां तुश्शे लेइ स्वर्ग मां रेखोरिन। 5 परमेशर तुसन अपने महान शेक्तेर जिरिये सेइं सम्भाले, किजोकि तुस यीशु पुड़ विश्वास केरतथ। तै तुसन यीशु मसीहेरे वापस एजने तगर सम्भलतां रखेलो। तेइस तुस ज़ानेले कि परमेशरे तुस पापे करां ते मौती करां पूरे तरीके सेइं बचावरेथ। 6 तुसेईं इन सेबमी चीजां केरे बारे मां खुश भोरू लोड़े, चाए हुना किछ वक्तेरे लेइ अलग-अलग किसमेरी मुसीबतां तुसन दुखी केरतिन। 7 इन मुसीबतां केरो मकसद ई आए कि इन बांदू भोए कि तुस सच्चे परमेशरे पुड़ विश्वास केरतथ। तुश्शो यीशु मसीह पुड़ विश्वास केरनो सोनने करां भी जादे कीमतीए। जेन्चरे नाश भोनेबालू सोनू अग्गी सेइं परखू ते शुद्ध कियू गाते, तेन्चरे अगर तुश्शो विश्वास अगारे जेरे अज़मैशन सेइं परखनेरे बाद भी मज़बूत रहते त जेइस यीशु मसीह फिरी एज्जेलो, परमेशर तुसन जो शाबाश ज़ोलो, महिमा ते आदर देलो। 8 तुसेईं यीशु मसीह कथे नईं लवरो, पन फिरी भी तुस तैस सेइं प्यार केरतथ। तुस हुना तैस न लाथ पन तुस तैस पुड़ विश्वास केरतथ। एसेरो नितीजो ई आए, कि तुस बड़े खुश आथ। तुस एत्रे खुश आथ कि लफज़न मां बियांन न केरोए। 9 तुस एल्हेरेलेइ खुश आथ किजोकि परमेशर तुश्शे प्राण पापेरे सज़ाई करां बचाने लोरोए। इन यीशु मसीह मां तुश्शे विश्वासेरू इनामे। 10 ई मुक्ति किछ एरी थी जेसेरे बारे मां नबी बडू ज़ाननू चाते थिये। तैनेईं ज़ोवं केन्चरे परमेशर तुसन पुड़ अनुग्रह केरतां बचालो जेसेरे काबल तुस न थिये, तैनेईं बड़ी जांच पड़ताल की, कि तैन जुवाब मैल्ले। 11 मसीहेरो आत्मा तैन मां थियो ते तैन सेइं ज़ोने लोरो थियो

कि मसीहे केन्चरे दुःख झैल्लेलो ते तैटां बाद तैस महान आदर दिती गाली। एल्हेरेलेइ तैना इन खोज केरतां तोपने लगे कि सच्चे मसीह कौन भोलो ते इन केइस भोलू। 12 पन परमेशरे इन अपने गल्लां ज़ोनेबालन सेइं ज़ोवं, कि तैन केरो सन्देश तैन केरे अपने आपेरे लेइ नईं, पन तुश्शे लेइ आए। तै सन्देश यीशु मसीहेरे बारे मां खुशखबरी आए, जै तुसेईं इस वक्त शुनी। परमेशरे स्वर्गरां पवित्र आत्मा भेजो कि लोकां केरि मदत केरे कि तैना तुसन खुशखबरी शुनान। इन सब एत्रे हैरान केरनेबालू ए कि स्वर्गदूत भी इन हेरनेरी बड़ी इच्छा रखतन। 13 एल्हेरेलेइ अपने मने तियार केरा ते अपने आपे कैबू मां रखबा। तैस मुक्ती उमीद रखबा जै तुसन अनुग्रह सेइं तेइस मैलनी जेइस यीशु मसीह दुबारा इस दुनियाई मां एजोनोए। 14 परमेशरे मन्ना किजोकि तुस तैसेरे बच्चेथ। बुरां कम्मां न केरा जैना तुस बुरी इच्छाई सेइं केरते थिये जेइस तुस परमेशरेरे सच्चाई न थिये ज़ानते। 15 पन हुनी तुस जैन किछ केरतथ तैस मां पवित्र भोथ, जेन्चरे परमेशर पवित्रे जैने तुस अपने बच्चे भोनेरे लेइ चुनोरेथ। 16 किजोकि पवित्रशास्त्रे मां परमेशरे ज़ोवरू ए “पवित्र बना, किजोकि अवं पवित्र आई।” 17 ज़ैखन तुस प्रार्थना केरतथ तुस परमेशरे जो बाजी ज़ोतथ। पन याद रखबा तै तरफदारी न केरे। एल्हेरेलेइ ज़ैखन तुस इस दुनियाई मां परदेशी केरे जेरे रातथ त तुसेईं तैसेरी बड़ी इज़्ज़त कियोरी लोड़े। 18 किजोकि तुस ज़ानतथ, बीतोरें वक्ते मां तुस बेकार तरीके सेइं जीते थिये जेन्चरे तुश्शे दादे-पड़दादे जीते थिये। पन हुनी तुस बेकार ज़िन्दगी करां छुटावरेथ, तुस नाश भोनेबाले सोनने चैदी सेइं नईं घिन्नोरे, 19 पन मसीहेरे कीमती खूने सेइं घिन्नोरेथ, मसीह जै शुद्ध ते सिद्ध गबडेरो ज़ेरोए। 20 दुनिया बनाने करां पेड़ले परमेशरे इन ठहरावरू थियू कि यीशु मसीह मुक्ति देनेबालो भोलो। पन तै इन आखरी दिहाइन मां इस दुनियाई मां अव ताके तुश्शी मदत केरे। 21 यीशु मसीहे जैन कियू तैसेरे वजाई सेइं तुस हुनी परमेशरे पुड़ विश्वास केरतथ, तैए आए जैने यीशु मसीह मुड़न मरां ज़िंतो कियो ते तैस आदर दिती ताके तुश्शो विश्वास ते उमीद परमेशरे पुड़ भोए। 22 किजोकि तुस सच मन्नेरे जिरिये शुद्ध कियोरेथ, ते हुनी तुसेईं विश्वासी सैथन सेइं इमानदेरी सेइं प्यार कियोरो लोड़े। तुसेईं एक्की होरि सेइं गहराई ते पूरे दिले सेइं प्यार कियोरो लोड़े। 23 किजोकि तुसन परमेशरेरी तरफां नर्वी ज़िन्दगी मैलोरी। तुसेईं ई ज़िन्दगी एरी चीज़ी सेइं नईं हासिल कियोरी जै नाश भोली। पन तैस सेइं जैन हमेशा रालू। मतलब परमेशरेरे जीते ते हमेशा रानेबाले वचने सेइं मैलोरीए। (aiōn g165) 24 किजोकि पवित्रशास्त्र ज़ोते “सारे लोक घासेरे जेरे आन ते तैन केरि शोभा जंगली फूडोंवेरी जेरीए। घास शुक्की गालो ते फूडोंव झेड़ी गालू। 25 पन प्रभुएरू वचन सदा बनोरू रालू, ते वचन मसीहेरे बारे मां खुशखबरी जैन तुसन शुनव जेवं।” (aiōn g165)

2 एल्हेरेलेइ सब किसमेरो बुरो सलूख केरनो शारा। होरन धोखो न देथ, पाखंड न केरा। ते होरन सेइं जलन न केरा। होरि केरे बारे मां बुरी गल्लां न जोथ। 2 जेन्चरे नंचे ज़मोरि बच्चे अपने अम्मार खालिस दुद्धेरी इच्छा रखतन, तेन्चरे तुस भी परमेशेरू वचन शिखनेरे लेइ इच्छा रख्खा जैस सेइं तुस आत्मिक तरीके सेइं मज़बूत बनेले। फिरी आखरी मां परमेशर तुसन दुनियारी बुरी चीज़न करां पूरे तरीके सेइं बग़ालो। 3 जेन्चरे पवित्रशास्त्र ज़ोते, “तुसेईं तजरबे सेइं ज़ानेरू कि प्रभु भलो आए।” 4 तुस प्रभु यीशु कां ओरेथ। तै खास घोड़े ज़ेरोए ज़ै घरेरे बुनियादी मां लोरोए, पन तै ज़ींतो घोड़े। बड़े लोकेईं तै रद कियो, पन परमेशरे तै चुनो ते बड़ो कीमती मन्नो। जेन्चरे लोक घोड़न सेइं घर बनातन, तेन्चरे परमेशर तुसन एककी एरे झुण्डे मां शामिल भोनेरी वजा बनाने लोरोए, जैस मां परमेशरेरो आत्मा रहते, ताके तुस जैन यीशु मसीहे इश्शे लेइ कियोरू तैसेरे वजाईं सेइं याजक बना, जैना बलिदाना चाढ़तन, तुस भी तैन केरां ज़ेरां रोड़ां कम्मां केरथ जैन सेइं परमेशर खुश भोते। 6 एल्हेरेलेइ जेन्चरे परमेशर पवित्रशास्त्रे मां ज़ोते, “तक्का, अव अक मैन्हु सिय्योन नगरे मां रखने लोरोईं। जै कूनेरो खास ते चुनोरो घोड़े, तै अक कीमती घोड़ेरो ज़ेरो जै मुनीयादी मां रख्खोरोए। ते ज़ै तैस पुड़ विश्वास केरेलो ते कोन्वी भी तरीके सेइं शरमिनदो न भोलो।” 7 तुस जैना यीशु मसीह पुड़ विश्वास केरतथ ई घोड़ तुश्शे लेइ बड़ो कीमतीए। पन पवित्रशास्त्र तैन लोकां केरे बारे मां ज़ोते जैना विश्वास न केरन, “जै घोड़ राज़ मिस्त्रेईं इस्तेमाल केरनो न चाव, तैए घरेरे मुनीयादरो खास घोड़ भोव,” 8 ते पवित्रशास्त्र फिरी ज़ोते, “ई घोड़ लोकां केरे बिछड़नेरी वजा भोलो। ई अक चट्टाने ज़ै तैन बिछोड़ेली।” तैना एन्चरे बिछड़तन किजोकि तैना परमेशरेरे सन्देश मन्ने करां इन्कार केरतन। तैन सेइं इन भोनेरे लेइ परमेशर इन थापेरू थियूं। 9 पन तुस तैन केरे ज़ेरे नईं किजोकि तुस परमेशरेरे चुनोरे लोक आथ, परमेशर ज़ै राज़ोए, तुस तैसेरे याजक आथ, तुस एरे लोक आथ ज़ैनेईं अपनो आप परमेशरे सौफोरोए, ते परमेशरेरे अपने लोक आथ। तैने तुस आंधरे मरां बड़े लोईं मां कुजावरेथ, ताके तुस परमेशरेरे महान कम्मां केरे बारे मां एलान केरथ। 10 तुश्शे बारे मां होशे नेबे जैन ज़ोरू तैन सच्चे, “तुस पेड़ले परमेशरेरे लोक न थिये पन हुनी तुस परमेशरेरे लोक आथ। तुस पुड़ पेड़ले परमेशरी दयाईं न थिये ज़ानते पन हुनी ज़ानतथ, किजोकि तैने तुसन पुड़ अपनि दया हिरावरीए।” 11 हे ट्लाराव, तुस इस दुनियाईं मां परदेशी ते मुसाफरां केरे ज़ेरे ज़ीने लोरेथ, अव तुसन खबरदार केरताईं, कि तुस जिसमेरी सैरी पापी खुवैशन करां दूर राथ, किजोकि तैना हमेशा तुश्शे आत्मा खलाफ लेइतिन। 12 जैना लोक परमेशरे पुड़ विश्वास न केरन तैना तुश्शे चेब्रे पासन रहतन, तैना ज़ोले तुस गलत केरने लोरेथ। तुस एरी रोड़ी ज़िन्दगी ज़ीथ कि लोक तुश्शां रोड़ां कम्मां हेरतां तैस दिहाड़े ज़ेइस यीशु मसीह दुबारा एज्जो परमेशरी बडयाईं केरेले। 13 प्रभुएरे इज़्जतेरे खातर,

मैन्हु केरे ठहरावरे हर एककी अधिकारेरे अधीन राथ, किजोकि ई प्रभुएरी इच्छा आए, हकोमत केरनेबालेरे अधीन एल्हेरेलेइ राथ किजोकि तै बड़ो खास अधिकारी आए। 14 ते हाकिमेरे भी अधीन भोथ, किजोकि राज़ो तैस बुरां कम्मां केरनेबालन सज़ा देने लेइ ते रोड़ां कम्मां केरनेबालां केरि तारीफ़ केरनेरे लेइ इस्तेमाल केरते। 15 किजोकि परमेशरी मज़ी ईए, कि तुस रोड़ां कम्मां केरतां तैना बेवकूफ़ लोकन ज़ैना परमेशरे न ज़ानन, तुश्शे खलाफ़ दोष लाने करां रोकथ। 16 हुनी तुस पापेरे गुलाम नईं किजोकि तुस इश्शे प्रभु यीशु मसीहे ज़िरिये आज़ाद कियोरेथ। पन अपनि ई आज़ादी बुरे कम्मां केरे लेइ इस्तेमाल न केरा, पन तुस भला कम्मां केरे ज़िरिये इन हिराथ कि तुस सच्चे परमेशरेरे दास आथ। 17 सेब्भी केरि आदर केरा, अपने विश्वासी साथी लोकन सेइं प्यार केरा, परमेशरे करां डरा, हकोमत केरनेबालेरी इज़्जत केरा। 18 हे घरन मां कम केरनेबाले सेवकव, तुस ज़ैना विश्वासी आथ अपने मालिकां केरे हुक्म मन्ना ते हमेशा तैन केरि आदर केरा। इन न सिर्फ़ दया केरनेबालन सेइं केरा, बल्के ज़ैना दया न केरन तैन सेइं भी। 19 किजोकि अगर अस बग़ैर गलती केरतां दुःख झैल्लतम त अस ज़ानतम कि परमेशरे सब किछ ज़ानते ते परमेशर असन सेइं खुश भोते। 20 किजोकि अगर तुसेईं पाप केरतां मार खाइ त तुश्शी कोई बडयाईं नईं कि तुसेईं सज़ाईं मां सबर की। पन अगर भलाई केरतां दुःख झैलतथ ते सबर केरतथ त इस सेइं परमेशर खुश भोते। 21 परमेशरे तुसन कुजानेरी अक वजा ई भी आए कि तुस तैसेरेलेइ दुःख झैल्ला, मसीह भी तुश्शे लेइ दुःख झैल्लातां तुसन अक मिसाल दिती। तुसेईं भी तेन्चरे कियोरू लोड़े जेन्चरे मसीहे कियूं। 22 पवित्रशास्त्र ज़ोते, तैने कधी पाप नईं कियोरो। तैने कधी झूठ नईं ज़ोवर। 23 ज़ैखन लोकेईं यीशु बेइज़्जत कियो, त तैने तैसेरे बदले मां तैना बेइज़्जत न कियो। ज़ैखन लोकेईं तैस दुःख दितो त तैने बदले मां तैन दुख न दितो, बल्के तैने परमेशरे पुड़ भरोसो कियो कि ते तैसेरी मदत केरे। ते ज़ानतो थियो कि परमेशर हमेशा धार्मिकताईं सेइं लोकां केरो इन्साफ़ केरते। 24 ज़ैखन मसीह मरो, त तैसेरे जानी पुड़ इश्शे पापां केरे लेइ तैस क्रूसे पुड़ सज़ा दिती। तैने एन कियूं कि अस पाप केरनो बंद केरम ते धार्मिकतारी ज़िन्दगी ज़ीनी शुरू केरम। तैसेरे ज़खम ज़ैना तैनी झैल्ले तैन केरे वजाईं सेइं अस बेइज़्जोए। 25 तुस पेड़ले टेपलोरी भैड्डां केरे ज़ेरे थिये, पन हुनी तुस मसीह कां वापस ओरेथ ज़ै तुश्शे प्राणा केरो पुहाल ते रखवालोए।

3 हे कुआन्शव, तुस भी अपने मुश्नां केरे अधीन राथ। एल्हेरेलेइ अगर इन मां कोई एरो भोए ज़ै परमेशरेरे वचने न मनतो भोए, तुश्शे ज़ीनेरे तरीके सेइं तुश्शे बग़ैर ज़ोने तैन केरे विश्वास केरनेरी वजा भोली। तैना तुश्शे रोड़े ते पवित्र बर्ताव हेरतां मसीह पुड़ विश्वास केरेले। 3 ते तुश्शी सजावट दिखावेरी न भोए, मतलब अलग-अलग किसमे दोग बनानो, ते सोन्नेरे गेहने, या किसमां-किसमां केरां लिगड़ां लाना। 4 बल्के तुस अपने गुना

केरे जिरिये अपनो आप खूबसूरत बनाथ जै तुसन करां दूर न गाए, मतलब नेरमी ते शांत स्भाव सेइं जै परमेशरे लेइ बड़ो कीमती आए। 5 ते पेइले जुमाने मां पवित्र कुआन्शां भी, जैना परमेशरे पुइ उमीद रेखती थी, तैना अपनो आप इस तरीके सेइं सजैती ते अपने-अपने मुन्शां केरे अधीन रैती थी। 6 जेन्चरे सारा अब्राहमेरे अधीन रहती थी ते तैस ज़ो मालिक ज़ोती थी, ते तुस भी अगर भलाई केरथ, ते केन्ची किसमेरे फिक्रन सेइं न डरथ त सारारे कुइयां केरि जेरि भोली। 7 तेन्चरे हे मुन्शव, तुस भी समझदेरी सेइं कुआन्शन सेइं ज़िन्दगी बीताथ ते इन याद रख्खा कि तैना तुसन करां कमज़ोरन, एल्हेरे तुसेईं तैन केरि आदर कियोरी लोड़े, किजोकि तुस दुइये तैस वरदानेरे हिसेदार आथ जैन परमेशर तुसन अनुग्रहे सेइं दितोरू आए, ते हमेशारी ज़िन्दगी आए। एरू केरा ताके ज़ैखन तुस प्रार्थना केरथ त परमेशर तुशशी प्रार्थना शुने। 8 आखरी मां अवं तुसन इन ज़ोताई, तुसेईं सैभेईं अक मन भोवरू लोड़े ते एक्की होरि सेइं हमदेरदी केरा ते एक्की होरि सेइं ढ़ला बेइनां केरो ज़ेरो प्यार केरा, ते एक्की होरि पुइ दया केरा, एक्की होरेरे लेइ नर्म बना। 9 बुरैडारे बदले बुराई न केरा, गैई केरे बदले गैई न देथ, पन इसेरे बदले बरकत देथ, किजोकि परमेशरे तुस होरन बरकतां देनेरे लेइ कुजावेथ। अगर तुस इन केरतथ, त परमेशर तुसन भी बरकतां देलो 10 किजोकि पवित्रशास्त्र ज़ोते, “अगर कोई मैनु ज़िन्दगरो आनन्द नेनो चाते, ते रोड़े दिहाड़े हेरेने चाते त तैनी ध्यान लोड़े दितोरू कि बुरी गल्लां न जोए। ते तैनी होरन धोखो न लोड़े दितोरु। 11 ते बुरु केरनू बंद कियोरी लोड़े बल्के तैनी रोडू कियोरू लोड़े। होरन सेइं मेल मिलापे सेइं ज़िनिरे लेइ मेहनत कियोरी लोड़े। 12 किजोकि प्रभु तैन लोकां केरू ध्यान रखते जैना तैन्ने केरतन जैन सही आए, ते ते हमेशा तैन केरि प्रार्थना शुन्नेरे लेइ तियार रहते। पन परमेशर तैन केरे खलाफ कम केरते जैना बुरु केरतन।” 13 अगर तुस हमेशा भलू केरनेरी कोशिश केरथ, त फिरी कोई भी तुसन हकीकति मां नुकसान न पुजेई बटे। 14 अगर अस धार्मिकतारे स्भावरे वजाई सेइं दुःख झैल्लम, त अस सच्चे धन भोले, पन अगर कोई असन डराते त तैस करां डरू न लोड़े ते न घबरावरू लोड़े। 15 पन इसेरे बदले, तुसेईं मसीहेरी आराधना अपने ज़िन्दगरे प्रभुपरे रूपे मां कियोरी लोड़े। ते जै कोई तुसन तुशशे उमीदरे बारे मां किछ पुच्छे जैस मां सारे विश्वासी शामिल आन, त तैस जुवाब देनेरे लेइ हमेशा तियार राथ, पन नेरमी ते आदरी सेइं। 16 हमेशा तैन्ने केरा जैन सही भोए। तैखन अगर लोक तुशशे लेइ बुरु ज़ोले त तैना मसीह सेइं तुशशे रिश्तो भोनेरे वजाई सेइं तुशशे रोड़ो बर्ताव हेरेले त तैना छिथोले। 17 किजोकि इन रोडू आए अगर इश्शां रोड़ां कम्मां केरे वजाई सेइं अस दुःख झैल्लम, अगर इश्शे लेइ परमेशरी इच्छा ई आए। इन इश्शे बुरा कम्मां केरे वजाई सेइं दुःख झैल्लने करां बडू रोडूए। 18 अवं इन ज़ोताई, मसीहे भी इश्शे पापां केरे लेइ दुःख झैल्लो ते मरो। तै एक्की बारे मरो ते तैस दुबारा मरनेरी ज़रूरत नई। तै अक धर्मी

मैनु थियो जै पापी लोकां केरे लेइ मरो ताके तै असन परमेशरे कां आने। तेनेईं तैसेरो जिसम मारो पन तै पवित्र आत्मा रे शेक्ते जिरिये जीतो कियो 19 तैट्ठां बाद तैसेरी आत्मा तैन आत्मान खुशखबरी शुनाने जैई, जैना परमेशरे तैस ठैरी कैद कियोरिन जैड़ी मरें लोकां केरि आत्मा रैती थी। 20 इन तैन मैनु केरि आत्मा आन जैनेईं बड़े पेइले परमेशरेरो हुक्म न थियो मननोरो। ज़ैखन नूह किशती बनाने लोरो थियो, त परमेशरे बड़े सबरी सेइं बलगू कि तैना पापन करां मन फिरान। पन सिर्फ अठ तैस भयानक तूफाने करां बचे। 21 पुराने वक्ते मां तैन केरि मुक्ति हुना इश्शे लेइ ज़ैखन अस बपतिस्मो नेतम मिसाले। जैस पैनी मां अस बपतिस्मो नेतम तैन इश्शे जानरो मैल दूर न केरे, पन ई अक निशान आए कि असेईं परमेशरे करां माफ़ी मगोरीए ताके इश्शो मन असन परेशान न केरे। असन माफ़ी मैल्ली बटतीए किजोकि यीशु मसीह मेरतां जीतो भोवरोए, 22 ते तै स्वर्ग जो जोवरो। तैड़ी हुनी तै परमेशरेरे देइने पासे खास ठैरी, तैड़ी तै सारे स्वर्गदूतन ते अधिकैरन ते शेक्तन पुइ राज़ केरने लोरोए।

4 एल्हेरेलेइ ज़ैखन मसीहे जिसमे मां भोइतां दुःख झैल्लो, त जेन्चरे तैसेरो स्भाव थियो तेन्चरे तुस भी दुःख झैल्लनेरे लेइ तियार भोथ। किजोकि अगर तुस मसीहेरे लेइ दुःख झैल्लनो चातथ त तुसेईं पाप न केरनेरो फैसलो कियो। 2 नितीजो ई भोलो, कि तै मैनु बाकी अपनि ज़िन्दगी मैनु केरे पापी खुवैइशां केरे मुताबिक इस दुनियाई मां न ज़ीयोले पन तै तैन्ने केरेलो जैन परमेशर तैस करां करानो चाते। 3 किजोकि बीतोरे वक्ते मां तुस गैर विश्वासी लोकां केरे ज़ेरे आनन्द केरने मां वक्त बर्बाद केरते थिये, ते तुस अपनि ज़िन्दगी एश केरने मां, बुरी खुवैइशन मां, ते तैन केरे तिहारन मां, शराब पीने मां ते नाचे मां, ते तैन केरि मूरती केरि पूजाई मां जैन सेइं परमेशर नफरत केरते बीताते थिये। 4 एल्हेरेलेइ तुशशे पुराने दोस्त हैरान भोतन, ज़ैखन तुस तैन केरे बुरी गल्लन मां जैना तैन केरतन शामिल न भोथ, तांए तैना तुशशे बारे बुरु-भलू ज़ोतन। 5 पन एक्की दिहाड़े तेनेईं ज़रूर परमेशरेरे सामने इन्साफेरे लेइ खडू भोनु पेनुए। ते परमेशर तैन मरां हर एक्की जैन तैनेईं इस थेतली पुइ कियोरू तैसेरे बारे मां पुछेलो। परमेशर जींते ते मुइदां केरो इन्साफ केरेलो। 6 ईए वजा आए कि मुइदन भी मसीहेरे बारे मां खुशखबरी शुनाई। तैन केरे जिसम भी एन्चरे मरे जेन्चरे सारे मैनु मरतन। पन हुनी तैना आत्माई मां परमेशरेरे सेइं साथी हमेशा ज़ीइले। 7 सेबभी गल्लां केरो अन्त जल्दी भोने बालोए, एल्हेरेलेइ साफ तरीके सेइं सोचा ते अपने आपे पुइ कैबू केरा ताके तुस प्रार्थना केरी सकतथ। 8 सेबभन करां रोड़ी गल ईए, कि एक्की होरि सेइं ईमादेरी सेइं प्यार केरा, किजोकि अगर तुस लोकन सेइं प्यार केरेले त तुस तैन केरि गेलती भी माफ़ केरनेरे लेइ तियार भोले। 9 ज़ैखन लोक तुशशे घरन मां एजन त बगैर कोन्ची शिकायतां तैन केरू स्वागत केरा। 10 हर एक्की परमेशरे करां वरदान मैलोए ते तैनी तैन वरदान होरि केरि मद्दत केरनेरे लेइ

इस्तेमाल कियोरू लोड़े। तैनेई तैना काई किसमां केरां वरदानां इस्तेमाल कियोरां लोड़न जैना परमेशरेरे अपने अनुग्रहे सेइं दितोरन। 11 अगर तुसन कां प्रचार करेनेरू वरदाने त तुसेई परमेशेरू वचन प्रचार कियोरू लोड़े। अगर तुसन कां होरि लोकां केरि मदत करेनेरू वरदाने त तैस शक्ति सेइं केरा जै परमेशरे तुसन दितोरीए। फिरी सब किछ जैन तुस केरेले तैस सेइं यीशु मसीहरे ज़िरिये परमेशरेरी महिमा भोली। सारी महिमा ते शक्ति हमेशा-हमेशा तैसेरीए। आमीन। (aiōn g165) 12 दुलारव, जैना दुःख तुस झैल्लने लोरेथ तेन केरे बारे मां हैरान न भोथ किजोकि तुस मसीहरे आथ। पन इना चीजां इन हिरानेरे लेइ भोनेरे लोरिन कि तुस सच्चे परमेशरे पुड़ विश्वास केरतथ की नई। एल्हेरेलेइ इन न सोचा कि तुसन सेइं नव्वीं गल भोने लोरीए। 13 पन इसेरे बारे मां खुश भोथ, कि जैना दुःख मसीहरे मैल्ले तुस भी तैन मां शामिल भोए। एल्हेरेलेइ जैखन मसीह दुबारा एज्जेलो त सेबमी लोकन पुड़ अपनि महिमा बांटी केरेलो, त तुस बड़े खुश भोले। 14 फिरी अगर मसीहरे नव्वेरे लेइ तुशशी तुहीन भोतीए, त तुस धन आथ। किजोकि परमेशरेरे महिमा बालो आत्मा तुसन मां रहते। 15 तुसन मरां कोई मैन्हु खूनी ते चोर, या कुकर्मी भोने, या होरि केरे कम्मन मां दखल देनेरे वजाई सेइं दुख न झैल्ले। 16 पन अगर मसीही भोने सेइं दुःख झैल्लतथ त शरमाए न, पन इस गल्लेरे लेइ परमेशरेरी बडीयाई केरे किजोकि तुस विश्वासी आथ। 17 किजोकि इन्साफोरे वक्त ओरोए, ते तै इश्शो विश्वासी लोकां केरो इन्साफ पेड़लो केरेलो, तैन डरानेबैली गल्लां केरे बारे मां सोचा जैना तैन सेइं भोनिन, जैना खुशखबरी पुड़ विश्वास न केरन जै परमेशरेरे तरफां एडतीए। 18 जेन्चरे पवित्रशास्त्र ज़ोते, “अगर धर्मी मैनेरे लेइ मुक्ति हासिल केरनि बडी मुशकलीए, त बुरे ते पापी मैन्हु पक्के नाश भोनेन!” 19 एल्हेरेलेइ जैना परमेशरेरी मेरज़रे मुताबिक दुःख झैल्लतन, तैनेई तैस पुड़ लगातार भरोसो कियोरो लोड़े जैने तैना बनाए। परमेशर हमेशा तैन केरते जैन केरनेरो वादो तैनी कियोरोए ते तै लगातार तैन केरेलो जैन रोड़ूए।

5 अवं साथी बुजुर्गन सेइं इन ज़ोनू चाताई किजोकि अवं तुशशो ज़ेरो आई। मीं एप्पू तैना दुःख हेरोरेन जैना मसीहरे बड़े पेड़ले झैल्ले। जैखन तै दुबारां एज्जेलो, त अवं तैसेरे महिमा मां शामिल भोनीई। अवं तुशशो साथी बुजुर्ग भोने सेइं तुसन कां ई बिनती केरताई, 2 जेन्चरे पुहाल अपनि भैड्ठां हेरतन, तुस भी तेन्चरे हर एककेरी हेरगेश केरा, जैना परमेशरे तुशशे रखवैली मां रखोरेन। इन अपने मेज़ीं सेइं केरा किजोकि परमेशर इन चाते। तुस इन एल्हेरेलेइ न केरा कि तुसन पुड़ दबाव बनाव गाते। ते इन कम एल्हेरेलेइ न केरा कि तुस कमाई केरनि चाथ, पन इस इच्छाई सेइं केरा कि तुस परमेशरेरी ते लोकां केरि सेवा केरनि चातथ। 3 ते जैना लोक तुसन सोंफे तैन पुड़ हकोमत न केरा, बल्के तैन केरे लेइ रोड़ी मिसालां बना। 4 ते जैखन यीशु मसीह जै इश्शो प्रधान पुहालेरो ज़ेरोए, वापस एज्जेलो त तै तुसन तैन

इनाम देलो ज़ेसेरी शोभा कथे खतम न भोली। 5 तेन्चरे हे जवान लोकव, तुस भी बुजुर्गां केरे अधीन राथ, तुस सारे एककी होरेरी मदत बड़े नर्म स्भावे सेइं केरा। किजोकि कोई पवित्रशास्त्रे मां पेढ़ी बटते “परमेशर घमण्ड करेनेबालां केरि खलाफ केरते, पन तै तैन केरे लेइ रोड़ो आए जैना दीन आन।” 6 एल्हेरेलेइ अपनो आप परमेशरे कां दीन बनाथ तै तुशशी हफाज़त केरनेरे लेइ शक्ति बालोए, जैस सेइं तै तुसन ठीक वक्ते पुड़ आदर दे। 7 परमेशरे अपने परेशैनी ते फिकरां केरे बारे मां ज़ोथ, किजोकि तैस तुशशू ध्यान आए। 8 खबरदार राथ, ते बींझे राथ, किजोकि तुशशो दुश्मन शैतान तुसन पुड़ हमलो केरनेरे लेइ तियारे, कि तुस परमेशरे मन्नु शारा। तै गर्जनेबाले शेरे ज़ेरो तोपने लोरो कि केस मारे ते खाए। 9 तुस विश्वासे मां मज़बूत भोइता तैसेरो मुकाबलो केरा, तैन विश्वासी लोकन याद रख्खा जैना दुनियारे अलग-अलग ठैरन मां आन, तैना भी तुशशो ज़ेरो दुःख झैल्लने लोरेन। 10 हुनी परमेशर जै सारे अनुग्रहे सेइं भेरतां, तैने अस हमेशारी महिमा मां शामिल भोनेरे लेइ चुनोरेम किजोकि इश्शो रिश्तो यीशु मसीह सेइं आए। थोड़े वक्तेरे दुःख झैल्लनेरे बाद परमेशर तुसन सही बनालो ताके तुसन मां कोई गलती न राए, तै तुशशे दिलन मज़बूत केरेलो ताके तुस मज़बूती सेइं तैस पुड़ विश्वास केरथ। (aiōnios g166) 11 तै शक्ति सेइं हमेशा राज़ केरेलो। आमीन। (aiōn g165) 12 मीं सिलवानुसेरे मदती सेइं ई निकड़ी ज़ेरि चिट्ठी लिखी ते तुसन जो भेज़ी, अवं तैस ज्ञानताई तै मसीह मां वफादार ढ़ला आए, मेरे लिखनेरो मकसद ई आए कि तुशशो होसलो बधेई ते याकीन दूवेई कि जै तजरबो तुस केरने लोरोरेथ ते सच्चे परमेशरेरे अनुग्रहेरो अक हिस्सो ए, इस अनुग्रहे मां मज़बूती सेइं बनोरे राथ। 13 बाबेल नगरेरे विश्वासी जैना परमेशरे चुनोरेन ठीक तेन्चरे जेन्चरे तुस चुनोरेथ, तैना तुसन जो नमस्कार ज़ोतन। मरकुस जै मेरे मट्टेरो ज़ेरोए तुसन जो नमस्कार ज़ोते। 14 मसीहरे प्यारे सेइं एककी होरि जो नमस्कार केरा। अवं प्रार्थना केरताई परमेशर तुसन सेबभन जैन केरो रिश्तो मसीह सेइं साथी शान्ति दे।

2 पतरस

1 अवं शमौन पतरस, यीशु मसीहेरो दास ते प्रेरित आई, अवं तुशशे सेव्भी केरे लेइ लिखने लोरोई, तुस भी तैस कीमती विश्वासे मां शामलथ जै अस केरतम, ई विश्वास असन यीशु मसीह, इशशे परमेशर ते मुक्ति देनेबाले जिरिये दित्तो जेव, जै असन धर्मी बनाते। 2 अवं प्रार्थना केरताई जेन्चरे तुस परमेशरे ते प्रभु यीशुए ज्ञाने मां बद्धते गाथ, परमेशरे तुसन अनुग्रह ते शान्ति जादे करां जादे दे। 3 परमेशर अपने शेक्ति सेइं असन तैन सब दितोरु जैन असन परमेशरे खुश केरनेरी जिन्दगी जीनेरे लेइ लोइते। इन भोइ बटते किजोकि अस परमेशरे ज्ञानतम कि तैने अस अपने महिमा ते अपने रोड़े गुना केरे मुताबिक तैसेरे लोक भोनेरे लेइ कुजोरेम। 4 इन सेव्भी केरे जिरिये परमेशरे असन महान ते कीमती वरदानां दितोरन जैन केरो तैनी वादो कियोरो थियो, इन वरदानां इस्तेमाल केरतां अस दुनियारी बुरी इच्छान करां बेची बटतम, जैना लोकन नाश केरतिन, ते अस परमेशरे स्भावे मां शामिल भोइ बटतम। 5 एल्हेरेलेइ तुसेई न सिर्फ यीशु पुइ विश्वास कियोरो लोड़े, बल्के होरि केरे लेइ भलाई केरनेरे लेइ सखत मेहनत भी कियोरी लोड़े, तुसेई न सिर्फ तैन कियोरु लोड़े जैन रोडू भोए, बल्के तुसेई एरे लोक बनोरु लोड़े जैना ज्ञातन समझदैरी सेइं केन्चरे बर्ताव केरतन, 6 तुसेई सिर्फ इन न लोड़े ज्ञानोरु कि समझदैरी सेइं केन्चरे बर्ताव केरतन, पन तुसेई अपनो आप कैबू भी कियोरो लोड़े, तुसेई न सिर्फ अपनो आप कैबू मां लोड़े कियोरो, बल्के मुसीबत मां सबर भी कियोरी लोड़े, तुसेई न सिर्फ मुसीबत मां सबर कियोरी लोड़े बल्के तुसेई एरी जिन्दगी भी जीयोरी लोड़े जैस सेइं परमेशर खुश भोए। 7 तुसेई न सिर्फ एरी जिन्दगी जीयोरी लोड़े जैस सेइं परमेशर खुश भोए, बल्के तुसेई एक्की होरि विश्वासी लोकन सेइं अपने टब्बरे लोकां केरो जेरो प्यार भी कियोरो लोड़े, तुसेई एक्की होरि सेइं न सिर्फ अपने टब्बरे लोकां केरो जेरो प्यार कियोरो लोड़े बल्के तुसेई सैरी लोकन सेइं प्यार कियोरो लोड़े। 8 अगर तुस एन्चरे जीले त तुस इशशे प्रभु यीशु मसीह ज्ञानेले ते तुस इस्तेमाल भोनेबाले ते फलदार भोले। 9 पन अगर कोन्ची मां इना गुण न भोन त तै एरे मैनेरो जेरोए जै कानोए, ते तैने बिसरोरुए कि परमेशरे ते तैसेरे पुराने पापन करां साफ कियोरोए। 10 एल्हेरेलेइ हे ढूलाव ते बेइनव, एन्चरे कम केरनेरे लेइ होरि जादे मेहनत केरा, जैस सेइं तुस अपनो आप साबत केरा कि परमेशरे तुस हकीकति मां तैस पत्ती चलनेरे लेइ चुनोरेथ ते तैसेरे लोक भोनेरे लेइ चुनोरेथ। अगर तुस इना गुणा केरे मुताबिक केरेले त तुस कथी मसीह पुइ भरोसो केरनो न शारेले। 11 ते परमेशर भी तुसन तैस राज़े मां बड़े जोशे सेइं कबूल केरेलो जैड़ी यीशु मसीहे, जै इशशे प्रभु ते इशशो मुक्ति देनेबालोए, तै राज़ेरो जेरो हमेशा राज़ केरेलो। (aiōnios g166) 12 चाए तुस इना सैरी गल्लां ज्ञानतथ, ते सच्ची शिक्षा तैस मां तुस मजबूती सेइं बनोरे रातथ,

जै लोकेईं तुसन शिखालोरी, अवं तैन केरे बारे मां लगातार याद किराइलो। 13 अवं ज्ञानताई ज्ञातगर अवं जीतोई, तैन केरे बारे मां लगातार तुसन ज़ोनू सही आए, ताके तुस तैन न बिसरथ। 14 किजोकि अवं ज्ञानताई, अवं जल्दी मरनोई, किजोकि इशशे प्रभु यीशु मसीहे मीं एल्हेरे बारे मां साफ ज़ोरुए। 15 एल्हेरेलेइ अवं इना गल्लां केरे बारे मां जोनेरी बड़ी कोशिश केरताई, ताके तुस मेरे मरनेरां पत्ती इना सैरी गल्लां याद केरि बटथ। 16 जैखन असेईं प्रेरितेईं तुसन अपने प्रभु यीशु मसीहेरी शक्ति ते एजनेरी खबर शुनावरी थी, त असेईं चलैकी सेइं बनेवरी कहैनी न ज़ोई बल्के असेईं मसीहेरी तैस महिमारे बारे मां ज़ोव जै असेईं अपने एछेईं सेइं लाई। 17 जैखन अस तैस सेइं साथी पवित्र पहाड़े पुइ थिये जैखन बाजी परमेशरे तैस आदर ते महिमा दित्ती। तैस वक्ते परमेशरे करां तैस महान महिमाईं मरां आवाज़ आई, “इन मेरु ट्लारु मट्टए जैस सेइं अवं खुश आई।” असेईं एप्पू ई आवाज़ स्वर्गोरां शुनी। 18 अस नेबी केरु वचन भी ज्ञानतम, जैन तैनेईं मसीहेरे बारे मां ज़ोव तैन बिलकुल सच्चे, तैना इस बारे मां पक्कू केरतन जैन असेईं तुसन तैसेरे वापस एजनेरे बारे मां शिखालू। तुसेईं तैना गल्लां ध्याने सेइं शुनोरी लोइन, जेन्चरे दीयो आंधरे मां बलते ते लोकन सही बत्तां गानेरे लेइ मदत केरते, इन वचन तुशशी इन ज्ञानेरे लेइ मदत केरेलू कि सन्न कुने। 19 तुसेईं तैन वचन रोड़े चारे शुनोरे लोइन ज्ञातगर इशशो प्रभु यीशु मसीह वापस न एज्जे। तैसेरु एज्जु एरु भोलू जेन्चरे नन्वे दिहैड़ी लौ भोली, ते तै झोड़े तारेरो जेरो भोली। तैस वक्त तैसेरी लौ तुशशे दिलन मां चमकेली त कने तुसन पुइ परमेशरे बांदी केरेली। 20 पन इन ज़रूरी कि तुस नेबी केरु वचन जैन तुस पवित्रशास्त्रे मां पढतथ, तैन वचन तैन केरे अपने खियाल नई। 21 किजोकि कोई भी भविष्यवाणी मैनु केरे मेज़ीं सेइं न भोइ, पन भक्त लोक पवित्र आत्मा अगवैईं सेइं परमेशरे तरफां सन्देश ज़ोते थिये।

2 ते जेन्चरे बड़े पेइले इस्राएली लोकन मां झूठे नबी थिये, तेन्चरे तुसन मां भी झूठे उस्ताद भोले। तैना बल्हे चारे तुसन मां एज्जेले ते परमेशरे बारे मां नाश केरनेबालू झूठ ज़ोले। इड़ी तगर तैना मसीहेरो इन्कार केरेले कि तै प्रभु नई जैन तैना पापन करां आज़ाद किये। एन्चरे केरने सेइं तैना एप्पू पुइ विनाश आनेले। 2 परमेशरे बड़े लोक तैन इन झूठे उस्तादां केरे बुरे कम्मां केरि नकल केरेले, ते तैन बुरां कम्मां केरे वजाईं सेइं सच्चे बतारे खलाफ बुरी गल्लां ज़ोले। 3 इना उस्ताद बड़े लालची भोले ते तैना तुसन बनेवरी कहैनी शुनेइतां तुसन थोखो देले, ताके तुसन करां पेइंसो हासिल केरन। परमेशरे बड़े पेइले ई फैसलो कियोरो कि तैन सज़ा दे ते तै इन केरनेरे लेइ तियार भी आए, तैसेरे एजने मां किछ भी चिर नई, ते तैन केरो विनाश बलगतोए। तै पक्को तैन नाश केरेलो। 4 तुस ज्ञानतथ बड़े पेइले किछ स्वर्गदूतेईं परमेशरेरो हुक्म न मन्यो, जैन तेनेईं किंयू तैसेरेलेइ परमेशरे तैन सज़ा दित्ती। तैने तैना नरके मां छुट्टे,

ते तैस दिहैड़ी तगर आंधरे मां कैद किये जांतगर ते तैन केरो इन्साफ न केरे ते तैन सज़ा न दे। (Tartarog 5020) 5 तुस इन भी ज्ञानतथ जैना लोक बड़े पेड़ले इस दुनियाई मां जीते थिये तैनेई परमेशरे डर न मननो, परमेशरे तैन केरां बुरां कम्मां नज़रानदाज न कियां। बल्के तैनी पानी भेजतां तैन सज़ा दिती जैस मां सारी धरती छप्पी ते तैना सारे नाश भोए। पन तैन तैन मरां नूहे समेत अठ लोक बचाए, जैने धार्मिकतारो प्रचार कियो। 6 परमेशरे सदोम ते अमोरा नगरन सज़ा दिती, तैना भस्म भोइतां मांज़न बना, एन केरतां परमेशरे लोक खबरदार किये, कि जैना तैसेरे हुक्म न मनन तैन सेइं भी एरू भोलू। 7 पन सदोम ते अमोरा नगरन नाश केरने करां पेड़ले तैन धर्मी लूत नगरे करां बेइर कढो ते बचाव। लूत तैन लोकन सेइं खुश न थियो किजोकि तैना कोई भी कानून न थिये मन्ते ते बेशर्म कम्मां केरते थिये। 8 (लूत धर्मी मैन्हु थियो, पन तै रोज़ तैन बुरे लोकन मां रातो थियो, एल्हेरेलेइ जैन बुरी गल्लां तै शुनतो थियो ते हेरतो थियो तैन सेइं तैसेरो रोड़ो दिल बड़ो दुखी भोतो थियो)। 9 इन सैरी गल्लां जैना परमेशरे कियोरिन इन हिरैतिन कि प्रभु परमेशर अपने धर्मी लोकन तैन केरे मुसीबतरे वक्त तैन सम्भालेलो, ते इन्साफेरे दिहाड़े तगर बुरे लोकन सज़ा देतो रालो। 10 परमेशर तैन झूठे उस्तादन पक्की सज़ा देलो, जैना इना गल्लां अपने गलत ते बुरी खवैइशन सेइं केरतन, ते तैना परमेशरेरे अधिकारे जै तैन पुड़े घटया समझतन, ते तैना ठीठ ते घमण्डी आन। तैना स्वर्गे प्राणेरी केरे बारे मां बुरू ज़ोने करां न डरन। 11 स्वर्गदूतां केरे बारे मां सोचा, तैना तैन झूठे उस्तादन करां बड़े शक्ति बालेन। तैना ज़ैखन इन झूठे उस्तादन पुड़ परमेशरेरी हज़ूरी मां दोष लातन, त गलत ज़बान इस्तेमाल न केरतन। 12 पन इना झूठे उस्ताद जंगली जानवरां केरे ज़ेरन, इना जानवर न ज्ञानन केन्चरे सोचोरू लोड़े तैन केरो मकसद सिर्फ़ टलानू ते मारनू भोते। इन लोक भी जैन तैन केरे मने मां एइते तैन केरतन, ते जैन गल्लन न समझन तैन केरे बारे मां बुरू ज़ोतन, तैना पक्के नाश भोनेन। 13 तैन नाश भोनू तैन केरे कियोरे नुकसानेरो इनामे। तैन भर दूपार्न एश केरनो रोड़ो लगते, तैना तुसन मां कलंक ते दाग आन। इड़ी तगर कि तैना तुसन सेइं धामन मां खातन-पीतन फिरी भी धोखो देने मां खुश भोतन। 14 तैना ज़ैस कुआन्शी भी लातन तैस सेइं बदमाशी केरनि चातन। तैना पाप केरने लेइ मीके तोपने कधी न शारन। तैना तैन लोकन धोखो देतन जैना मसीह पुड़ मज़बूती सेइं विश्वास न केरन ते तैन पापे मां नेतन। तैन केरि जादे करां जादे बुरी इच्छां केरे वजाई सेइं परमेशर तैन सज़ा देलो। 15 तैनेई सही केरनू बंद कियोरूप, ते तैनेई तेन्चरे बुरां कम्मां केरनां शुरू कियां जेन्चरे बड़े पेड़ले बओरेरे मट्टे बिलामे कियोरां थियां। तैनेई बुरी चीज़ां केरतां पेइसे कमाने पसंद किये। 16 परमेशरे ते तैसेरे बुरेइरे लेइ डांटो ज़े तैनी कियोरी थी, तैसेरे गेथां मैन्हु केरि भाषाई मां गल की ते नबी गलत केरने करां रोको। 17 इन झूठे उस्ताद शुक्कोरे खूआं केरे ज़ेरे बेकार आन,

ते तैना बेफैइदी बिदलारे ज़ेरे आन, ज़ैस झड़ी भोने करां पेड़ले हवा दूर उडारती। परमेशरे तैन केरे लेइ एरी ठार तियार कियोरी ज़े बिलकुल आंधरीए। 18 ज़ैखन तैना लोकन शिखालतन त तैना बेकार ते घमण्डी लफज़ इस्तेमाल केरतन, तैना लोकन ज़ोतन कि तैना बेइज़ज़त चीज़ां केरि बटतन जैना तैन केरे जिसम केरने चातन, तैना लोकन धोखो देइतां पाप करातन जैना इस किसमेरी बुरी ज़िन्दगी करां बज़ोरेन। 19 तैना तैन लोकन सेइं ई वादो केरतन अगर तैना तैन केरि मनन, त तैना ज़ैन चातन तैन केरि बटतन, किजोकि तैन केरो कोई मालिक नई। पन इन सच्चे, तैन एप्पू भी अपने बुरे रूवाज़ां केरे गुलामन, किजोकि ज़े कोई चीज़ केरनेरो आदी त तैस केरनेरो गुलाम बनते। 20 ज़ैखन लोकेई यीशु मसीह तैन केरो प्रभु ते मुक्ति देनेबालोए पिशानो, त तैना दुनियारे बुरेई करां छुटोरे थिये। पन तैना फिरी तैन बुरी चीज़ां केरने मां शामिल भोए ते तैना बुरी चीज़ां तैन कैबू केरतिन, ते तैन केरि आखरी हालत पेड़ली हालती करां भी बुरी भोइ। 21 ज़ोनेरो मतलब ई आए, किजोकि ज़ैन लोकेई मसीहे पुड़ विश्वास केरनो शारो, परमेशर तैन, तैन लोकन करां जादे सज़ा देलो, जैनेई कथे विश्वास नई कियोरो, तैन लोकां केरे लेइ रोड़ू भोथू कि तैना कधी न ज़ांनेथे कि धार्मिकतारी ज़िन्दगी केन्चरे ज़ीतन। हुनी तैना ज्ञानतन कि सही कुन आए, पन तैना परमेशरेरे हुक्मन न मनन जैना असेई प्रेरितेई शिखालोरेन। 22 ज़ैन तैनेई कियूं तैन केरे लेइ इना दुई कहावत ठीक आन, “तैना कुत्रां केरे ज़ेरे आन ज़ैना उलटी केरतां फिरी खातन, ते तैना निहावरे सूर्रां केरे ज़ेरे आन ज़ैना फिरी चिकरी मां गातन।”

3 हे टलारव, अवं दुइयोवं चिट्ठी लिखने लोरोई, अवं दुइये चिट्ठन मां तुसन किछ गल्लां याद करेइतां होसलो देनेरी कोशिश केरने लोरोई। ज़ैना तुसेई पेड़ली शिखोरिन ताके तुस सही तरीके सेइं सोचथ। 2 अवं इन एल्हेरेलेइ लोरोई केरने, कि अवं तुसन तैना गल्लां याद करैनी चाताई ज़ैना बड़े पेड़ले नेबेई ज़ोरिन ते इश्शे प्रभु ते मुक्ति देनेबाले यीशु मसीहेरी शिक्षा आन। ज़ैना प्रेरित तुसन कां आए तैनेई तुसन शिखैलोरिन। 3 सेबभन करां खास गल ई आए, कि तुस ज्ञानत, कि आखरी दिहाइन मां मसीहेरे वापस एजने करां पेड़ले, लोक तुश्शो मज़ाक बनाने कि तुस विश्वास केरतथ कि मसीह दुबारा वापस एजनोए, तैना आदी भोनेरे वजाई सेइं एना बुरी चीज़ां केरेले ज़ैन सेइं तैना खुश भोतन। 4 तैना ज़ोले, “तैसेरो एजनेरो वादो सच नई, तै बिलकुल भी नई एजनो! किजोकि ज़ैना शुरूआती मां इश्शे मसीही बुजुर्ग थिये तैना सब मरे, पन किछ भी बेदलोवं। सब किछ तेरहु आए, जेन्चरे दुनिया बनानेरे वक्ते करां थियूं।” 5 तैना एन एल्हेरेलेइ ज़ोतन किजोकि तैना इन बिस्सरनू चातन, कि बड़े पेड़ले अम्बर ते धरती परमेशरेरे हुक्मे सेइं बनाव जेव। तैन्ने धरती पैनी मरां कढी ते पैनी करां अलग की। 6 फिरी तैनी पैनेरो इस्तेमाल कियो कि पुरानी दुनिया बड़े तूफाने सेइं नाश केरे। 7 पन परमेशरे अम्बर ते धरती तैस्से हुक्मेरे ज़िरिये

रखोरेन, ताके तैन अग्गी सेइं नाश केरे। तै तैन तैस दिहैड़ी तगर रखेलो जेइस तै तैन लोकां केरो इन्साफ केरेलो ते नाश केरेलो जैना तैसेरी आदर न केरन। 8 हे ट्लारव, जैना गल्लां अवं हुन्ना ज़ोने लोरोई तैन नज़रानदाज़ न केरा, कि प्रभुएरी नज़री मां अक दिहाड़ी हज़ार सालन बराबरे ते हज़ार साल एक्की दिहैड़रे बराबर आन (तैना तैसेरेलेइ अक्कां ज़ेरे आन)। 9 किछ लोक सोचतन कि प्रभु अपनो वापस एजनेरो वादे पूरे केरने मां ज़िर लोरो लाने। पन परमेशर एन्चरे ज़िर नई लाने लोरो, बल्के इसेरे बदले तै तुसन सेइं सब्र लोरो केरने। किजोकि तै न चाए कोई भी नाश भोए। पन तै चाते कि हर कोई अपनो मन बदले त कने गलत केरनू शारे ते तैस कां एज्जे। 10 पन मसीह पक्को वापस एज्जेलो, तै अचानक एज्जेलो ज़ेन्चरे घोर अचानक एइते। तैस वक्त अम्बर मां गज़नेरी ज़ेरि शोर भोली, ते अम्बर गायब भोइ गालू। सब किछ ज़ैन अम्बरे मां आए, दिहाड़ो, चाँदनी, तारे सब अग्गी सेइं बिलकुल नाश भोलू, तैस दिहाड़े परमेशर इन्साफ केरनेरे लेइ तैन सब किछ बांदू केरेलो ज़ैन लोकेई इस दुनियाई मां कियोरूए। 11 एल्हेरेलेइ कि परमेशर इना सैरी चीज़ां पेक्की नाश केरेलो ज़ेन्चरे मीं ज़ोवं, एल्हेरेलेइ तुसेई पवित्र ज़िन्दगी ज़ीयोरी लोड़े ते अपनो आप परमेशरे सॉफोरो लोड़े। 12 ज़ेन्चरे तुस तैस दिहैड़ी बलगने लोरेथ जेइस परमेशर दुनियारो इन्साफ केरने एज्जेलो, ते बड़ी कोशिश केरा कि तै दिहाड़ी जल्दी एजनेरे लेइ। तैस दिहाड़े परमेशर अम्बरे अग्गी सेइं फुकेलो ते नाश केरेलो त कने अम्बरेरी सैरी चीज़ां अगारे गेरमी सेइं गेलेली। 13 पन अस विश्वासी नंवे अम्बरे ते नंवे धेरती बलगने लोरेम जेसेरो वादो परमेशरे कियोरो, ज़ैड़ी लोक परमेशरेरे इच्छाई सेइं ज़ीयेले। 14 एल्हेरेलेइ, हे ट्लारव, ज़ेन्चरे तुस तैस दिहैड़ी बलगने लोरेथ जेइस परमेशर इस दुनियारो इन्साफ केरेलो, त तुस पूरी कोशिश केरा कि तुस शैन्ति सेइं परमेशरेरे नज़री मां शुद्ध ते बेइलज़ाम भोथ। 15 ते इश्शे प्रभुएरे सबरारे बारे मां सोचा तैने तुसन मौको दित्तो, कि तुस एजनेबाले इन्साफे करां बघथ। इन इश्शे ट्लारे विश्वासी सैथे पौलुसे भी तुश्शे लेइ तैस समझारे मुताबिक अपने चिट्ठी मां लिखोरू ज़ै परमेशरे तैस दित्तोरीए। 16 तैने अपने सैरी चिट्ठन मां ज़ैना तैने विश्वासी लोकन जो लिखी, इना सैरी गल्लां तुसन लिखी। पन किछ तैसेरी लिखोरी गल्लां समझनी मुश्किल आन। तैन लोकां केरे लेइ ज़ैनेई रोड़े चारे नई पढ़ोरू ज़ैन इस बारे मां पक्को पतो नई कि तैना कुन विश्वास केरतन, तैना गलत तरीके सेइं इन मुश्किल गल्लां केरे मतलब कढतन, ज़ेन्चरे तैना पवित्रशास्त्रेरी किछ गल्लां केरो गलत तरीके मतलब समझातन। एन्चरे केरने सेइं तैना अपनो आप इस काबल बनातन कि परमेशर तैन नाश केरे। 17 एल्हेरेलेइ, हे ट्लारव तुस पेइले ज़ानतथ कि इना गल्लां भोनिन, एल्हेरेलेइ तुस हुशार राथ ताके ज़ैना लोक कानूने न मनन तैना तुसन झूठ ज़ोइतां थोखो न देन, ते तुस सेछ्नी गल्लन विश्वास केरनो शारथ। 18 पन तुस इश्शे प्रभु ते मुक्ति देनेबाले

यीशु मसीहरे अनुग्रह ते ज़ाने मां बढ़ते गाथ। तैसेरी महिमा हुन्ना भी भोए, ते हमेशा भोती राए। आमीन। (aion g165)

1 यूहन्ना

1 अस तैस एककी वचनेरे (मैनेरे) बारे मां लिखने लोरेम जै ज़िन्दगरी वचन आए, जै शुरू करां थियो, जै असेई शुनो, ते जै अपनि एछछेई सेइ लाव, बल्के जै असेई ध्याने सेइ लाव, ते तैस सेइ अपने हथ लाए। 2 (ई ज़िन्दगी बांदी भोइ, ते असेई लाई, ते अस तैसेरी गवाही देतम, ते तुसन तैस हमेशारी ज़िन्दगरी खबर शुनातम, जै बाजी सेइ साथी थी, ते असन पुड़ बांदी भोइ।) (aiōnios g166) 3 जैन किछ असेई यीशुएरे बारे हेरू ते शुनू तैसेरी खबर तुसन भी देतम, एल्हेरेलेइ कि तुस भी असन सेइ साथी शामलथ, ते इश्शी ई शामलीत बाजी सेइ साथी, ते तैसेरे मट्टे यीशु मसीह सेइ साथीए। 4 ते इना गल्लां अस एल्हेरेलेइ लिखतम, कि इश्शी खुशी पूरी भोए। 5 जै खबर असेई प्रभु यीशु करां शुनी, ते तुसन शुनातम, तै ईए; कि परमेशर लोअरो ज़ेरो शुद्धे, ते तैस मां किछ भी आंधरू (बुराई) नई। 6 अगर अस ज़ोम, कि तैस सेइ साथी इश्शी शामलीते, ते फिरी आंधरे मां चलतम, त अस झूठेम, ते सच्चे पुड़ न चलम। 7 पन अगर ज़ेन्चरे परमेशर लोई मांए, तेन्चरे अस भी लोई मां जीम, त एककी होरि सेइ शामिल रातम ते तैसेरे मट्टे यीशु मसीहो खून असन सेबभी पापन करां शुद्ध करते। 8 अगर अस ज़ोम, कि असन मां कोई पाप नई, त अपने आपे धोखो देतम, ते असन मां सच्चे नई। 9 अगर अस अपने पाप मन्तम, त तै इश्शे पाप माफ़ करेने, ते असन सेबभी अधर्म करां शुद्ध करेने मां वफादार ते धर्मीए। 10 अगर अस ज़ोम कि असेई पाप नई कियोरो, त परमेशरे झूठो ठहरातम, ते तैसेरू वचन असेई कधी कबूल नई कियोरू।

2 हे मेरे दलारे बच्चव, अवं इना गल्लां तुसन एल्हेरेलेइ लिखताई, कि तुस पाप न केरा, ते अगर कोई पाप केरे, त बाजी परमेशरे कां इश्शो अक मद्दतगारे, मतलब धर्मी यीशु मसीह। 2 तै इश्शे पापां केरो छुटकारे लेइ बलिदान भोव, ते सिर्फ इश्शे लेइ नई, बल्के सैरी दुनियारे पापां केरे लेइ भी। 3 अगर अस तैसेरे हुक्मन मन्तम, त इस सेइ अस समझे गाले कि अस तैस ज्ञानतम। 4 जै कोई इन ज़ोते, “कि अवं तैस ज्ञानताई,” ते तैसेरे हुक्मन न मन्ने, तै झूठोए, ते तैस मां सच नई। 5 पन जै कोई तैसेरे वचने पुड़ चलते, ते तैस मां सच्चे परमेशरे प्यार सिद्ध भोरोए, असन इस सेइ पतो चलते, कि अस तैस मां आम। 6 जै कोई इन ज़ोते, कि अवं तैस मां बनोरो राताई, त तैनी तेन्चरे ज़ीयोरू लोइ जेन्चरे यीशु मसीहे ज़ीयोरूए। 7 दलारव, अवं तुसन कोई नव्वो हुक्म न लिखी, पन तैए पुरानो हुक्म जै पेड़लो तुसन मैल्लो; ई पुरानो हुक्म तैन वचने, ज़ैखन तुसेई मसीह पुड़ विश्वास कियूं। 8 फिरी भी अवं तुश्शे लेइ नव्वो हुक्म लिखताई, किजोकि एन सच आए, जैन मसीह मां ते तुसन मां भी लेइहोव, किजोकि अन्धकार मिटतो गाते ते सच्चेरी लौ हुनी चमकने लोरीए। 9 जै इन ज़ोते, कि अवं लोई मां आई ते

विश्वासी दूलाए सेइ बैर रखते, ते हेजू तगर आंधरे मां आए। 10 जै कोई अपने दूलाए सेइ प्यार केरते, तै लोई मांए, तैसेरेलेइ पाप केरनेरे लेइ कोई वजा नई। 11 पन जै कोई अपने दूलाए सेइ बैर रखते, तै आंधरे मांए, ते तै आंधरे मां चलते; ते न ज्ञाने, कि कोरां गाते, किजोकि आंधरे तैसेरी एछछी कैनी केरिन। 12 हे बच्चाव अवं तुसन एल्हेरेलेइ लिखताई, कि यीशु मसीहेरे नव्वे सेइ तुश्शे पाप माफ़ भोए। 13 हे बुजुर्गव अवं तुसन एल्हेरेलेइ लिखताई, कि जै शुरू करां आए तुस तैस ज्ञानथ, हे जवानव, अवं तुसन एल्हेरेलेइ लिखताई कि तुसेई तैस शैताने पुड़ जीत हासिल केरीए, हे बच्चाव अवं तुसन एल्हेरेलेइ लिखताई कि तुसेई बाजी परमेशर पिशानो। 14 हे बाजव, अवं तुसन एल्हेरेलेइ लिखताई, कि जै पेड़लोए तुसेई पिशानो, हे जवानव, अवं तुसन एल्हेरेलेइ लिखताई, कि तुस मज़बूतथ, ते परमेशेरू वचन तुसन मां बनोरू रहते, ते तुस शैताने करां जीतोरेथ। 15 तुस न दुनियाई सेइ ते न दुनियारी चीज़न सेइ प्यार केरा, अगर कोई दुनियाई सेइ प्यार केरते, त तैस मां बाजी परमेशरे प्यार नई। 16 किजोकि जैन किछ दुनियाई मां आए, मतलब जिसमेरी खुवैइश, ते एछछी केरि खुवैइश ते ज़िन्दगरू घमण्ड, तैन बाजी परमेशरे तरफां नई पन दुनियारे तरफां। 17 दुनिया ते तैसेरी खुवैइश दुइये मिटती गैतिन, पन जै परमेशरे मेज़ी पुड़ चलते, तै सदा बनोरो रालो। (aiōn g165) 18 हे बच्चव, ई आखरी वक्ते कि मसीह वापस एजोनोए, ते जेन्चरे तुसेई शुनोरूए, कि मसीहेरी खलाफत केरनेबालो एजनेबालोए, तैसेरे मुताबिक हुना भी बड़े मसीहेरी खलाफत केरनेबाले उठोरन, इस सेइ अस ज्ञानतम, कि ई आखरी वक्ते कि मसीह वापस एजोनोए। 19 तैना मसीहेरी खलाफत केरनेबाले लोक निस्से त असने मरां, पन तैना असन मरां न थिये, किजोकि अगर असन मरां भोथे, त असन सेइ साथी राथे, पन निस्से एल्हेरेलेइ कि इन बांदू भोए कि तैना सब असन मरां नई। 20 पन मसीहेरे ज़िरिये तुसन पवित्र आत्मा दित्तोरोए, तैसेरे वजाई सेइ तुस सब सच ज्ञानतथ। 21 मीं तुसन एल्हेरेलेइ नई लिखोरू, कि तुस सच्चे न ज्ञानथ, पन एल्हेरेलेइ, कि तैस ज्ञानतथ, ते एल्हेरेलेइ कोई झूठ, सच्चेरे पासेरां नई। 22 झूठो कौने? सिर्फ तै, जै यीशुएरू मसीह भोनेरो इन्कार केरते, ते मसीहेरी खलाफत केरनेबालो तैए आए, जै बाजी परमेशरेरी ते कने मट्टेरो यानी यीशुएरो इन्कार केरते। 23 जै मट्टेरो इन्कार केरते तैस कां बाजी परमेशर भी नई, जै मट्टे मन्ते, तैस कां बाजी परमेशर भी आए। 24 ज़ैखन तुसेई यीशु मसीह पुड़ विश्वास कियूं, तुसेई जै सच्ची शिक्षा शुरू करां शुनोरोए, तैए तुसन मां बनोरी राए, त तुस भी मट्टे मां, ते बाजी परमेशरे मां बनोरे राले। 25 ते जेसेरो वादो परमेशरे कियोरोए, तै हमेशारी ज़िन्दगीए। (aiōnios g166) 26 मीं इना गल्लां तुसन तैन करां खबरदार रानेरे लेइ लिखी, जैना लोक तुसन झूठी शिक्षारे ज़िरिये टपलातन। 27 ते तुश्शू तैन अभिषेक, जैन तैसेरे तरफां केरूए, तुसन मां बनोरू रहते; ते तुसन एल्हेरी ज़रूरत नई, कि

कोई तुसन शिखाले। बल्के जेन्चरे तैन अभिषेक जैन तैसेरे तरफां कियोरूप, तुसन सब गल्लां शिखालते, ते इन सच्चरे, ते झूठ नई, ते जेन्चरे तैन तुसन शिखालोरूप, तेन्चरे तुस तैस मां बनोरे रातथ। 28 हे बच्चव, तैस मां बनोरे राथ, कि जैखन इन बांदू भोए, त असन दिलेरी भोए ते अस तैसेरे एजने पुड़ तैसेरे सामने शरमिनदे न भोम। 29 अगर तुस ज्ञानतथ, कि मसीह धर्मीए, त इन भी ज्ञानतथ, कि जैना धार्मिकतारां कम्मां केरतन, तैना परमेशरे बच्चेन।

3 हेरा बाजे परमेशरे असन सेइं केरो प्यार कियो, कि असन जो परमेशरे बच्चे जोन, ते अस अहम भी, एल्हेरेलेइ दुनियारे लोकेई अस न पिशाने कि अस परमेशरे बच्चेम, किजोकि तैनेई बाजी परमेशर भी न पिशानो। 2 हे दलारव, हुनी अस परमेशरे बच्चेम, ते हेजू तगर इन बांदू नई भोरू, कि अस केरे भोनेम! इन ज्ञानतम, कि जैखन यीशु मसीह बांदो भोलो त अस भी तैसेरे जेरे भोमेले, किजोकि तैस तेरहे लहमेले जेरो तै आए। 3 ते जै कोई भी मसीह पुड़ ई उमीद रखते, तै अपनो आप तेरहो पवित्र करते, जेरो मसीह पवित्र आए। 4 जै लगातार पाप केरतो रहते, तै मूसेरे कानूनरो इन्कार केरते, ते पाप त कानूनरो इन्कार केरनो। 5 ते तुस ज्ञानतथ, कि यीशु मसीह एल्हेरेलेइ अव, कि पापन दूर केरे, ते तैस मां पाप नई। 6 जै तैस मां बनोरो रहते, तै लगातार पाप न केरे, जै लगातार पाप केरते, तै न समझे कि मसीह कौन आए, ते न तैसेरो तैस सेइं रिशतोए। 7 दलारे बच्चव, केन्चरे धोखे मां न एजाथ, जै धार्मिकारां कम्मां केरते, तैए मसीहेरो जेरो धर्मीए। 8 जै कोई लगातार पाप केरते, तै शैतानेरे तरफांए, किजोकि शैतान शुरुआती करां पाप केरतो ओरोए, परमेशरे मूठ एल्हेरेलेइ अव, कि शैतानेरे कम्मन खतम केरे। 9 जैना परमेशरे बच्चेन तैना लगातार पाप न केरन, किजोकि परमेशरे सुभाव तैन मां बनोरू रहते, ते तैना पाप केरि न सकन, किजोकि तैना परमेशरे बच्चेन। 10 इस्से सेइं परमेशरे बच्चे, ते शैतानेरे बच्चे पिशैनोतन, जैना धार्मिकता कम्मां न केरन, तैना परमेशरे सेइं नई, ते न तै जै अपने दूलाए सेइं प्यार न केरे। 11 जै खबर तुसेईं पेइली शुनी, तै ईए, कि अस एक्की होरि सेइं प्यार रखम। 12 ते आदमेरे मट्टेरे कैनेरे जेरे न बनम, जै तैस शैताने सेइं थियो, ते जैने अपनो दूला मारो, ते तै कोस वजाई सेइं मारो! एल्हेरेलेइ कि तैसेरां कम्मां बुरां थियां, ते तैसेरे दूलाएरां कम्मां रोड़ां थियां। 13 हे दूलाव, अगर दुनियारे लोक तुसन सेइं बैर केरते त हैरान न भोथ। 14 अस ज्ञानतम, कि अस मौती करां पार भोइतां जिन्दगी मां पुजोरेम, किजोकि अस दूलान सेइं प्यार रखतम। जै प्यार न रखे, तै मौतरे हालती मां। 15 जै अपने दूलाए सेइं बैर केरते, तै खूनी आए, ते तुस ज्ञानतथ, कि कोन्वी खूनी मां हमेशारी जिन्दगी न राए। (aiōnios g166) 16 असेईं प्यार इस्से सेइं ज्ञानो, कि यीशु मसीहे इश्शे लेइ अपने प्राण दिते, एल्हेरेलेइ इश्शो भी दूलां केरे लेइ प्राण देने फर्जे। 17 पन जैस कां दुनियारी जेइदाद भोए, त तै अपने दूलाए

जैस ज़रूरत भोए, तैस हेरतां तैस पुड़ तरस खानो न चाए, त तैस मां परमेशरे प्यार केन्चरे बनोरो रेइ बटते? 18 हे दलारे बच्चव, अस सिर्फ वचन ते जुबानी सेइं नई, पन कम्मन ते सच्चरे सेइं भी प्यार केरम। 19 जैखन अस होरन सेइं प्यार केरमेले एस्से सेइं अस ज्ञानमेले, कि अस सच्चरेम, ते जैस गल्ली मां इश्शो ज़मीर असन दोष लाए, तैसेरे बारे मां अस तैसेरे सामने अपने-अपने मने याकीन देइ बटमेले। 20 किजोकि परमेशर इश्शे मने करां बट्टोए, ते सब किछ ज्ञानते। 21 हे दलारव, अगर इश्शो मन असन दोष न दे, त असन परमेशरे सामने दिलेरी भोतीए। 22 ते जैन किछ अस मगतम, तैन असन तैस करां मैलते, किजोकि अस तैसेरे हुक्म मन्तम, ते जैन तैस पसंदे तैन केरतम। 23 ते तैसेरो हुक्म ईए कि अस तैसेरे मट्टे यीशु मसीहेरे नव्वे पुड़ विश्वास केरम ते जेन्चरे तैन असन हुक्म दित्तो तैसेरे मुताबिक एक्की होरि सेइं प्यार केरम। 24 ते जैना परमेशरेरो हुक्म मन्तन, तैना परमेशरे मां, ते परमेशर तैन मां बनोरो रहते, ते इस्से सेइं, मतलब तैस पवित्र आत्मा सेइं जै तैन असन दित्तोरोए, अस ज्ञानतम, कि तै असन मां बनोरो रहते।

4 हे दलारव, हर एक्की मैनेरू याकीन न केरा जै दावो केरते कि परमेशरे आत्मा तैस मां आए, बल्के आत्मां अजमाथ कि तै परमेशरे तरफांए कि नई; किजोकि बड़े झूठे नबी दुनियाई मां निसरेन। 2 परमेशरे आत्मा तुस इस रीति सेइं पिशैनी बटतथ, कि जै आत्मा इन मन्ने, कि यीशु मसीह जिसमे मां ओरोए तै परमेशरे तरफांए। 3 ते जै आत्मा यीशु न मन्ने, तै परमेशरे तरफां नई, ते तैए मसीहेरी खलाफत केरनेबाली आत्माए, जेसेरे बारे मां तुसेईं शुनोरू, कि तै एजने बालीए, ते अज भी दुनियाई मां आए। 4 हे दलारे बच्चव, तुस परमेशरे लोक आथ, ते तुसेईं तैन झूठन पुड़ जीत हासिल कियोरीए, किजोकि पवित्र आत्मा शक्ति जै तुसन मांए तै शैतानेरे शक्ति करां बट्टी, जै दुनियाई पुड़ राज केरते। 5 तैना झूठे नबी दुनियारेन, एल्हेरेलेइ तैना दुनियारी गल्लां ज़ोतन, ते दुनियारे लोक तैन केरि शुन्तन। 6 अस परमेशरेम, जै परमेशरे ज्ञानते, तै इश्शी शुन्ते, जै परमेशरे न ज्ञाने तै इश्शी न शुने, एल्हेरेलेइ अस तैस आत्माई जै सच्च ज़ोतीए ते जै आत्मा झूठ ज़ोतीए पिशानतम। 7 हे दलारव, अस एक्की होरि सेइं प्यार केरम; किजोकि प्यार परमेशरे करां आए, जै कोई प्यार केरते, तै परमेशरे बच्चोए, ते परमेशरे ज्ञानते। 8 जै होरन सेइं प्यार न केरे, तै परमेशरे न ज्ञाने, किजोकि परमेशर प्यारे। 9 जै प्यार परमेशरे असन सेइं केरते, ते इस सेइं बांदो भोव, कि परमेशरे अपनू अकैल्लू मट्टे दुनियाई मां भेजू, कि तैस पुड़ विश्वास केरने सेइं असन हमेशारी जिन्दगी मैल्ले। 10 प्यार इस सेइं नई कि असेईं परमेशरे सेइं प्यार कियो, पन इस मां आए, कि तैन असन सेइं प्यार केरो, ते इश्शे पापां केरे छुटकारे लेइ अपनू मट्टे भेजू। 11 हे दलारव, जैखन परमेशरे असन सेइं एरो प्यार कियो, त असेईं भी एक्की होरि सेइं प्यार कियोरो लोडे। 12 परमेशर कधी केन्चे नई लवरो; अगर अस एप्पू मांमेइं

प्यार रखम, त परमेश्वर असन मां बनो रहते; ते तैसेरो प्यार असन मां सिद्ध भोरोए। 13 इस सेइं अस ज्ञानतम, कि अस परमेश्वर मां बनो रातम, ते परमेश्वर असन मां, किजोकि तैने असन अपने आत्माई मरां दित्ती। 14 ते असेई हेरू भी, ते गवाही भी देतम, कि बाजी परमेश्वर, मट्टू दुनियाई मां मुक्ति देनेबालो केरतां भेजोरोए। 15 जै इन मन्ते, कि यीशु परमेश्वरू मट्टूए, परमेश्वर तैस मां बनोरो रहते, ते तै परमेश्वर मांए। 16 ते जै प्यार परमेश्वर असन सेइं केरते, तै असेई ज्ञानो, ते असन तैस पुड़ विश्वास, परमेश्वर प्यारे, जै प्यारे मां बनोरो रहते, ते परमेश्वर तैस मां बनोरो रहते। 17 इस सेइं प्यार असन मां सिद्ध भोव, कि असन इन्साफेरे दिहैदी दिलेरी भोए, किजोकि जेरो तै आए, तेरे अस भी दुनिया मां अहम। 18 प्यारे मां डर न भोए, बल्के सिद्ध प्यार डरे दूर केरते, किजोकि डरेरो रिश्तो सजाई सेइं भोते, ते जै डरते, तै प्यार मां सिद्ध नई। 19 अस परमेश्वर सेइं ते होरन सेइं एल्हेरेलेइ प्यार केरतम, कि पेड़लो परमेश्वर असन सेइं प्यार कियो। 20 अगर कोई जोए कि, “अवं परमेश्वर सेइं प्यार केरताई,” पन अपने ढूलाए सेइं बैर रखे, तै झूठोए, किजोकि जै विश्वासी ढूलाए सेइं जै तेने लोरोए प्यार न केरे, त परमेश्वर सेइं भी जै तेने लवरो नई, प्यार न केरि सके। 21 ते तैस करां असन ई हुक्म मैलते, कि जै अपने परमेश्वर सेइं प्यार केरते, तै विश्वासी ढूलाए सेइं भी प्यार केरते।

5 जेसेरो ई विश्वास कि यीशु ही मसीहे, तै परमेश्वररो बच्चोए, ते जै परमेश्वर सेइं प्यार केरते, तै तैस सेइं भी प्यार केरते, जैना परमेश्वररे बच्चेन। 2 जैखन अस परमेश्वर सेइं प्यार केरतम, ते तैसेरे हुक्मन मन्तम, त इस सेइं अस ज्ञानतम, कि अस परमेश्वररे बच्चेन सेइं प्यार केरतम। 3 अस परमेश्वररे हुक्म मेन्तां तैस प्यार हिरातम, ते तैसेरे हुक्म मुश्कलन नई। 4 किजोकि जै परमेश्वररो बच्चोए, तै दुनियाई पुड़ जीत हासिल केरते, ते तै जीत जैस सेइं दुनियाई पुड़ जीत हासिल केरतम तै इश्शो विश्वास। 5 दुनियाई पुड़ जीत हासिल केरनेबालो कौने, सिर्फ तै जेसेरो ई विश्वास, कि यीशु, परमेश्वरू मट्टूए। 6 ईए तैए, जै पैनी ते खूनेरे जिरिये ओरो थियो; मतलब यीशु मसीह, तै न सिर्फ पैनी सेइं, बल्के पैनी ते खूने दुइयां केरे जिरिये ओरो थियो। ते ई आत्मा जै गवाही देतीए, किजोकि तै सच्चे। 7 ते गवाही देनेबाले टूलाई आन 8 आत्मा, ते पानी, ते खून, ते टूलेइयां केरि एककी गल्ली पुड़े गवाही देतन। 9 जैखन अस मैन्हु केरि गवाही मन्तम, त परमेश्वररी गवाही त तैस करां भी बट्टीए, कि तैने अपने मट्टेरे बारे मां गवाही दित्ती। 10 जै परमेश्वररे मट्टे पुड़ विश्वास केरते, तै अपने आपे मां ई गवाही रखते, जैने परमेश्वर पुड़ विश्वास न कियू, तैने तै झूठो ठहराव, किजोकि तैने तैस गवाही पुड़ विश्वास न कियो, जै परमेश्वर अपने मट्टेरे बारे मां दित्तोरीए। 11 ते तै गवाही ईए, कि परमेश्वर असन हमेशारी ज़िन्दगी दित्ती, ते ई ज़िन्दगी तैसेरे मट्टे मांए। (aiōnios g166) 12 जेसेरो रिश्तो मट्टे सेइं आए तैस कां ज़िन्दगीए, ते जेसेरो

रिश्तो परमेश्वररे मट्टे सेइं नई, तैस कां हमेशारी ज़िन्दगी भी नई। 13 मीं तुसन, जै परमेश्वररे मट्टेरे नञ्वे पुड़ विश्वास केरतो भोए, एल्हेरेलेइ लिखताई, कि तुसन पतो लग्गे, कि हमेशारी ज़िन्दगी तुश्शीए। (aiōnios g166) 14 ते असन परमेश्वररे सामने ई दिलेरी भोतीए, तै ईए; कि अगर अस तैसेरे मेज्जी सेइं किछ मगतम, त तै इश्शी शुनते। 15 ते अगर अस ज्ञानतम, कि जैने किछ अस परमेश्वर करं मगतम, तेन असन मैलते। 16 अगर कोई विश्वासी ढूलाए कोई एरो पाप केरतो लाए, जेसेरो नितीजो मौत न भोए, त बिनती केरे, ते परमेश्वर तैसेरेलेइ, जैने एरो पाप कियोरोए जेसेरो नितीजो मौत नई, ज़िन्दगी देलो। पाप एरो भी भोतेए जेसेरो नितीजो मौते, एसेरे बारे मां अवं प्रार्थना केरनेरे बारे मां न जोई। 17 सेल्भी किसमेरी बुराई त पापे पन एरो भी पापे, जैरेरो नितीजो मौत नई। 18 अस ज्ञानतम, कि जैना परमेश्वररे बच्चेन, तैना लगातार पाप न केरन, पन परमेश्वरू मट्टू यीशु तैस बच्चाते, ते शैतान तैसेरू किछ न केरि सके। 19 अस ज्ञानतम, कि अस परमेश्वर सेइं अहम, ते सारी दुनिया तैस शैतानेरे कब्जे मां आए। 20 ते इन भी ज्ञानतम, कि परमेश्वरू मट्टू यीशु मसीह इस दुनियाई मां ओरूए, ते तैने असन समझ दित्तोरीए, कि अस सच्चे परमेश्वर पिशानम, ते अस तैस मां जै सच्चे मां आए, मतलब तैसेरे मट्टे यीशु मसीह मां बनोरे रातम, सच्चे परमेश्वर ते हमेशारी ज़िन्दगी ईए। (aiōnios g166) 21 हे बच्चव, हर अक तैस चीजी करां दूर राथ, जै तुश्शे दिले मां परमेश्वररी ठार नेतीए।

2 यूहन्ना

1 अवं यूहन्ना कलीसियारो बुजुर्ग, तैस बेइन ते तैसेरे बच्चन जैना परमेशरे चुनोरेन ई चिट्ठी लिखने लोरोई। जैन सेइं अवं सच्चो प्यार करताई। सिर्फ अवं नईं पन तैना सारे जैना सच्चे ज्ञानतन तुसन सेइं प्यार करतन। 2 अस तुसन सेइं प्यार करतम किजोकि अस सच्चरी शिक्षाई पुड़ विश्वास करतम, ते अस तैस शिक्षाई हमेशारे लेइ मन्ते राले। (aiōn g165) 3 बाजी परमेशर ते तैसेरे मट्टू यीशु मसीह असन अनुग्रह, दया, शान्ति देन। इना सब इशे लेइ आए अस जैना सच्चे मन्तम ते एक्की होरि सेइं प्यारे करतम। 4 अवं बड़ो खुश भोव, जैखन मीं तेरे किछ बच्चां केरे बारे मां शुनू कि तैना परमेशरिरे बत्तां चलने लोरेन, तैना तैन्ने केरने लोरेन जैन इशे बाजी परमेशरे असन केरनेरे लेइ ज़ोरुए। 5 हुनी हे बेइन, अवं तीं कां मिनत करताई, असेईं एक्की होरि सेइं प्यार कियोरो लोड़े, ई अक नंवो हुक्म नईं पन अक आदेशे जै अस तैस वक्ते करां ज्ञानतम, जेइसेरू असेईं यीशु मसीह पत्ती चलनू शुरू कियोरुए। 6 सच्चो प्यार ई आए जैखन अस परमेशरिरे हुक्म मन्तम। जेइसेरू तुसेईं यीशु मसीह पत्ती चलनू शुरू कियोरू तेइसेरू तुसेईं शुनेरू कि परमेशरे हुक्म दित्तोरो, कि हमेशा एक्की होरि सेइं प्यार कियो लोड़े। 7 अवं इन एल्हेरेलेइ ज़ोताई, किजोकि बड़े लोक जैना होरि लोकन झूठी शिक्षारे जिरिये धोखो देतन। तैना दुनियारे अलग-अलग ठैरन मां ज़ोरेन। तैना ज़ोतन यीशु मसीह मैनेरे रूपे मां नईं ओरो, अगर कोई मैन्हु एन्चरे ज़ोते, त तै मसीहेरो खलाफत केरनेबालोए जै हमेशा लोकन धोखो देते। 8 एल्हेरेलेइ तू अपने बारे मां खबरदार रा कि तैना लोक तीं धोखो न देन। जै मेहनत परमेशरिरे सेवारे लेइ तीं की तै बेफैइदी न भोए, पन तुस तैना सैरी बरकतां हासिल केरेलो जैना देनेरो वादो परमेशरे तुसन सेइं कियोरोए। 9 अगर कोई मैन्हु मसीहेरी शिक्षाई पुड़ लगातार न चले पन तैस मां होरू किछ ज़ोड़ते त तैसेरो रिश्तो परमेशरे सेइं साथी नईं, तैस कां परमेशर नईं। पन अगर कोई मसीहेरी शिक्षाई मां बनोरो रहते, तैसेरो रिश्तो बाजी परमेशर ते तैसेरे मट्टे यीशु मसीह सेइं भी आए। 10 अगर कोई तुशे सभाई कां एज्जे, ते मसीहेरे बारे मां ईए शिक्षा न दे, त तैस न अपने घरे मां एज्जेने देथ, ते न तैस नमस्कार करतां होसलो न देथ। 11 किजोकि जै कोई एरे मैन्हु जो नमस्कार केरते, तै तैसेरे बुरे कम्मन मां शामिल भोते। 12 बेड़ि गल्लां आन जैना अवं तुसन सेइं ज़ोनी चाताई, पन अवं तैना एन्चरे चिट्ठी मां लिखनी न चैई। पन मीं उमीदे कि अवं तुसन कां एज्जेलो ते अस आमने-सामने भोड़तां गल्लां केरमेले, तैखन अस पूरे तरीके सेइं खुश भोले। 13 तेरी चुनोरी बेइनारे बच्चे इड़ी जैना परमेशरिरे चुनोरेन नमस्कार ज़ोतन।

3 यूहन्ना

1 अवं यूहन्ना कलीसियारो बुजुर्ग आई, हे ट्लारे गयुसे अवं तींजो ई चिट्ठी लिखने लोरोई। अवं सच्चरे तीं सेइं प्यार केरताई। 2 मेरे ट्लारे दोस्त, मेरी प्रार्थना ई आए, कि जेन्चरे तू आत्मिक तरक्की केरि रवरोस, तेन्चरे तू सेबभी गल्लन मां तरक्की केरतो रास, ते तेरी जान भी राजी राए। 3 किजोकि किछ विश्वासी लोकेई मीं सेइं एइतां ज़ोवं, कि तू केन्चरे सच्चरे मुताबिक ज़ीने लोरोस त अवं बड़ो खुश भोव। 4 ज़ैखन भी अवं शुनताई कि तैना, ज़ैना मेरे बच्चां केरे ज़ेरे आन तैना सच्चरे मुताबिक ज़ीतन, तैखन अवं बड़ो खुश भोताई। 5 हे ट्लारा, तीं इश्शे विश्वासी सैथी केरि मदत केरनेरे लेइ वफादेरी सेइं बड़ किछ कियोरूए, इड़ी तगर ज़ैन तू ज़ानस भी न तैन केरि भी मदत केरतस। 6 इन मरां किछ लोकेई इट्टेरी कलीसियारे विश्वासी लोकन सेइं ज़ोवं, कि तुस अपने मसीही लोकन सेइं केत्रो जादे प्यार केरतथ। हुनी अवं तीं ज़ोताई ज़ैना इना लोक तीं करां गान त तीं तैन केरि मदत केरती रावरी लोइ किजोकि एस सेइं परमेशर खुश भोते। 7 किजोकि इना लोक मसीहेरू वचन प्रचार केरनेरे लेइ सफर केरतन, ते गैर विश्वासी लोकन करां किछ मदत न नेन। 8 एल्हेरेलेइ असेई तैन केरि आदर-खातर कियोरी लोइ, ताके अस भी तैन सेइं साथी सच्च प्रचार केरनेरे कम्मे मां शामिल भोम। 9 मीं तुश्शे नगरेरे कलीसियारे लोकन पेइले चिट्ठी लिखोरी थी, पन दियुत्रिफेस मेरे हदायतन कबूल केरने करां इन्कार केरते, किजोकि तै हमेशा अपनो आप कलीसियारो लीडर बनानो चाते। 10 एल्हेरेलेइ अगर अवं एज्जेलो, त कलीसियारे लोकां केरे सामने ज़ैन तै केरि रावरोए ज़ोइलो। तै इश्शे खलाफ बुरी-बुरी गल्लां ज़ोइतां झूठे दोष लाते, ते एत्रू नई तै एप्पू प्रचार केरनेबालन कबूल न केरे, ते ज़ैना तैन कबूल केरने चातन, तैन भी ठाकते ते कलीसिया मरां कढतन। 11 हे ट्लारा, तैन लोकां केरि नकल न केरा ज़ैना बुरां कम्मां केरन, पन तैन लोकां केरू ज़ेरू बन्नेरी कोशिश केरा ज़ैना भला कम्मां केरतन। ज़ैखन कोई भला कम्मां केरते तैस सेइं साबत भोते कि तै परमेशरेरो बच्चोए, अगर कोई बुराई केरते तैस सेइं साबत भोते कि तै परमेशर न ज़ाने। 12 कलीसियारो सारे मैन्हु दिमेत्रियुसेरे बारे मां ज़ोतन कि तै रोड़ो मैन्हु आए, किजोकि तै सच्चरे मुताबिक ज़ीते ते अस भी ज़ोतम कि तै अक रोड़ो मैन्हु आए, ते तू ज़ानतस अस सच्च ज़ोतम। 13 बेड़ि गल्लां आन ज़ैना अवं तीं सेइं ज़ोनी चाताई, पन अवं तैना एन्चरे चिट्ठे ज़िरिये न लिखनी चैई। 14 पन मीं उमीदे कि अवं तीं सेइं जल्दी मुलाकत केरेलो, तैखन अस आमने-सामने गल्लां केरमेले। अवं प्रार्थना केरताई परमेशर तीं शान्ति दे, इट्टेरे मसीही दोस्त तींजो नमस्कार ज़ोतन, एट्टेरे दोस्तन अकैल्ले-अकैल्ले मां गेइतां मेरू नमस्कार ज़ोइयां।

यहूदा

1 अवं यहूदा यीशु मसीहेरो सेवक ते कने याकूबेरो निकडो ढूला आई। अवं यहूदा ई चिट्ठी तुसन लोकन लिखने लोरोई, जैना परमेशरे कुजवरेथ कि तैस पुड़ विश्वास केरथ। बाजी परमेशर तुसन सेइं प्यार केरते ते यीशु मसीहेरे जिरिये तुस सुरक्षित आथ। 2 अवं प्रार्थना केरताई कि परमेशर तुसन दया ते शान्ति ते प्यार जादे करां जादे दे। 3 हे दलारव, अवं लिखनेरे लेइ हर मुमकिन कोशिश केरि रावरो थियो तैस (मुक्करे) नंवे ज़िन्दगरे बारे मां जै यीशु मसीहेरे जिरिये परमेशरे तरफां मैलतीए, जैस मां अस शामिल आमा। पन हुना अवं इन ज़रूरी समझताई कि तुसन इस चिट्ठेरे जिरिये होलसो देई, ताके तुस मसीही विश्वास बनोरो रखनेरे लेइ बड़ी मेहनत केरि बटथ, परमेशरे ई विश्वास अपने सेबभी लोकां केरे लेइ एककी बार दितोरोए, ते ई न बेदलोए। 4 किछ लोक जैना यीशु मसीह पुड़ विश्वास केरनेरो दिखावो केरतन तैना तुशे कलीसियान मां शामिल भोरेन। तैना परमेशरेरी आदर ते तैना ई गलत शिक्षा देतन, कि परमेशरे इशे पाप माफ़ कियोरेन ते अस अधर्मी ज़िन्दगी जी बटतम। तैना यीशु मसीहेरो इन्कार केरतन, जै इशो अक्के मालिक ते प्रभुए। बड़े पेड़ले पवित्रशास्त्र ज़ोते, परमेशरे एरे ज़ेरे लोकन सज़ा देलो। 5 पन अगर तुसेई सब गल्लां एककी बार जैनोरिन, फिरी भी अवं तुसन इना गल्लां याद करैनी चाताई, कि प्रभुए इसाएली लोक गुलैमी मरां आज़ाद किये, ते मिस्र मुलखे मरां कठे पन बादे मां तैने तैना मारे ज़ैनेई सुनसान ठारी मां तैस पुड़ विश्वास न कियो। 6 तुसेई तैन स्वर्गदूतां केरे बारे मां सोचोरू लोड़े जैना अपने पदे पुड़ खुश न थिये, जै परमेशरे तैन दितोरो थियो, पन तैनेई स्वर्गू घर शारू; परमेशरे तैना कधी न टलुटेन बैली शंगलन सेइं बेंधतां बुन आंधरे मां तैस महान दिहैड़ी तगर रखोरेन, जेइस ते तैन दोषी बनालो। (aidios g126) 7 इना इसाएली ते स्वर्गदूतां केरू जेरू इन भी याद रख्खा कि सदोम ते अमोरा नगरां ते कने आसेपासेरे नगरां केरे रानेबाले लोकन सेइं कुन भोवं। लोक अधर्मी भोए ते हर किसमेरी बदमाशी केरनेबाले थिये। एल्हेरेलेइ परमेशरे तैना अगारे जिरिये भस्म किये। जैन तैन सेइं भोवं ई तैन झूठे उस्तादां केरे लेइ खबरदारी आए कि तैन भी हमेशारे अगारे जिरिये सज़ा मैललीए। (aiōnios g166) 8 तेन्चरे इना अधर्मी लोक ई दावो केरतन कि परमेशरे दशनि मां ज़ोवरू अधर्मी ज़िन्दगी जीतां तैना अपनो जिसम अशुद्ध केरि बटतन, ते कोन्ची भी एणू पुड़ अधिकार रखनेरी अज़ाज़त न देन ते तैना महिमा बाले स्वर्गदूतां केरे बारे मां बुरी गल्लां ज़ोतन। 9 पन इड़ी तगर कि प्रधान स्वर्गदूत मीकाईल इन अधर्मी लोकां केरू जेरू न कियूं। जैखन शैतान ते मीकाईल मूसा नेबेरी लाश दबनेरे अधिकारेरे बारे मां बेंस भोइ, त मीकाईल स्वर्गदूते कां इन लोकन करां जादे अधिकार भोनेरे बावजूद भी तैने शैताने बुरी गल्लां ज़ोइतां दोषी न ठहराव, इसेरे बदले तैने इन ज़ोवं, कि

“प्रभु तीं डॉटि।” 10 पन इना लोक तैन चीज़ां केरे खलाफ गलत ज़बान इस्तेमाल केरतन जैन तैना न समझन। ते जैन चीज़न तैना समझतन तैन लैट्टे जानवरां केरे ज़ेरे केरतन, एना चीज़ां केरतां तैना अपनो आप नाश केरतन। 11 तैन पुड़ अफ़सोस! किजोकि तैना आदमेरे मट्टे कैनेरो ज़ेरो बुरो सलूख केरतन, जैन अपनो ढूला मारो। तैना जल्दी ज़ेन्चरे बिलामे पेइंसो कमानेरे लेइ लोकन करां पाप कराव तैनेई भी तैए गलती की, ते ज़ेन्चरे करोह नाश कियो किजोकि तैने (मूसेरे खलाफ) खलाफत की, तेन्चरे तैना लोक भी नाश किये गाले किजोकि तैना भी प्रभुएरे खलाफ खलाफत केरने लोरेन। 12 जैखन इना लोक धामन मां खातन जैना तुस प्रभुएरो प्यार याद केरनेरे लेइ बनातथ, त तैना समुन्दरेरी छेपेरी शफ़ड़ां केरे ज़ेरे खतरनाक आन, जैना तुसन डोबनेरी वजा बेनि बटतन। तैना तैन बेशर्म पुहालां केरे ज़ेरे आन जैना सिर्फ़ अपनो खियाल रखतन। तैना बगैर पैने बिदलारारे ज़ेरेन जैन हवा उडारतीए, तैना शोरे बेफल बट्टां केरे ज़ेरे आन. जैना ज़ीलना उखड़ोरेन ते दुइये तरीकेई सेइं मरैन। 13 ज़ेन्चरे समुन्दरेरी मज़बूत छेल्ली गंदी शैफ़म एनतिन, तेन्चरे इना लोक बेशर्म कम्मां केरतन। तैना किछ तारां केरे ज़ेरे आन जैना सिद्धे बत्तां न चलन, तैना सही बत न हिरान। प्रभुए तैन केरे लेइ अक ठार रखोरि जै पूरे तरीके सेइं आंधरीए ज़ैड़ी तैनेई हमेशारे लेइ रानू पेनू। (aiōn g165) 14 ते हनोक जै आदमेरे सतोवं पीड़ी मरां थियो, तैने इन अधर्मी लोकां केरे बारे मां भविष्यद्वाणी की। तैने ज़ोवं “हेरा, प्रभु अपने बेशुमार पवित्र स्वर्गदूतन सेइं साथी एज्जेलो। 15 कि सेबभी लोकां केरो इन्साफ़ केरे, ते तैन केरे सेबभी बुरां कम्मां केरे बारे मां जैना तैनेई परमेशरेरे खलाफ कियोरेन ते सेरी बुरी गल्लां जैना तैनेई तैसेरे खलाफ कियोरेन तैन केरे बारे मां तैन दोषी बनालो।” 16 इना लोक हमेशा परमेशरेरे खलाफ ज़ोतन ते होरि केरि गेलती कढतन। तैना अपने मनरे मेरज़रे मुताबिक लगातार बुरां कम्मां केरतन। तैना अपने बारे मां घमण्ड केरतन ते अपने फैइदेरे लेइ होरि केरि चापलूसी केरतन। 17 पन हे दलारव, तुस तैन गल्लन याद रखा; जैना गल्लां इशे प्रभु यीशु मसीहेरे प्रेरितेई पेइली ज़ोरिन। 18 तैना तुसन सेइं ज़ोते थिये, “कि आखरी दिहाइन मां एरे लोक भोले जैना प्रभु ते तैसेरे लोकां केरो मज़ाक बनाले। 19 इना तैना लोक आन जैन केरि ज़िन्दगी तैन केरे बुरी इच्छा केरे कैबू मां आए।” 20 पन हे दलारव, तुस तैन गल्लन याद रखा; जैना गल्लां इशे प्रभु यीशु मसीहेरे प्रेरितेई पेइली ज़ोरिन। 21 तुसेई लगातार इन जैनतां ज़ीयोरू लोड़े कि परमेशर तुसन सेइं प्यार केरते, ज़ेन्चरे तुस बलगने लोरेथ जेइस इशो प्रभु यीशु मसीह अपने दयाई मां तुसन हमेशारी ज़िन्दगी देलो। (aiōnios g166) 22 तैन लोकन पुड़ दया केरा जैन

नई पतो कि तैना कोस शिक्षाई पुड़ विश्वास केरन। 23 किछ होरे लोक जैन तुस ज्ञानतथ कि नरके मां चलोरेन। तैन जल्दी खिचतां हमेशारी अग्गी मरां बचाथ। हेजू भी होरन पुड़ दया केरा। हांलाकि, ध्यान देथ तैस्से पापे दुबारा न केरा। तुस तैन केरे पापन सेइं अजमैइशी मां न पेथ, ते तैना पाप केरनेरे जिरिये अपनो आप दागदार न केरा। 24 परमेशर तुशशी हफाजत केरनेरे बाले ताके तुस पापेरी जिनंदगी जीतां धोखो न खाथ। तै महिमा बालो परमेशर तुसन एप्पू कां आन्नेरे ते तुसन बेकसूर ते खुशी सेइं भरनेरे काबले। 25 तैए अक परमेशरे जैने यीशु मसीहेरे जिरिये असन मुक्ति दिती, इश्शो प्रभु यीशु लोकन परमेशरेरी आदर केरने ते तैसेरी बडयाई केरनेरी वजा बनाते। ताके तैना इस गल्ली पिशानन कि तैस कां शुरू करां हुन्ना ते हमेशारे लेइ शक्ति ते अधिकार आए। आमीन। (aiōn g165)

प्रकाशित वाक्य

1 यीशु मसीहेरो प्रकाशितवाक्य, जै परमेशरे तैस एल्हेरेलेइ दितो कि तै अपने सेवकन तैना गल्लां हिराए, जैन केरु जल्दी भोनू ज़रूरीए। यीशु मसीहे अपनो स्वर्गदूत भेजतां तैसेरे ज़िरिये अपने दास यूहन्ना इना गल्लां जोई, 2 अवं यूहन्ना तैन सब लिखने लोरोई जैन मीं लवं, अवं इस मां परमेशेरु वचन ते यीशु मसीहेरी सच्ची शिक्षारी गल्लां लिखने लोरोई जैना तैनी मीं सेइं जोई। 3 परमेशर तैन सेबभी लोकन बरकत देलो जैना इस भविष्यवैनेर वचने पढ़तन, ते कने जैना शुन्तन ते इस मां लिखोरी गल्लन मन्तन, किजोकि इन गल्लां पूरी भोनेरो वक्त नेड़ो ओरोए। 4 अवं यूहन्ना आसिया इलाकेरे सत कलीसियान जो लिखने लोरोई। परमेशरे जै आए ते जै हमेशा थियो, ते जै एजनेबालो आए; ते तैन सत आत्मां केरे तरफां जैना तैसेरे तखतरे सामनेन तुसन अनुग्रह ते शान्ति मैलती राए। 5 ते यीशु मसीहेरे तरफां, जै वफादार गवाह ते मुड़दन मरां जीतो भोने बालन मरां पेड़लोए त कने धेरतरे राजां केरो प्रधाने तुसन अनुग्रह ते शान्ति मैलती राए। यीशु मसीहे असन सेइं प्यार कियो, त कने तैन अपने खुने सेइं अस पापन करां छुटाए। 6 तैन अस अक राजा ते अपने बाजी परमेशेरी सेवा केरनेरे लेइ याजक भी बनाए; तैसेरी महिमा ते हकोमत हमेशा भोती राए। आमीन। (aiōn g165) 7 हेरा, मसीह बिदलारी सेइं साथी एजनेबालोए, ते हर कोई तैस लाएलो, बल्के जैना लोक तैसेरे मौतरे लेइ ज़िमेवार थिये, तैना भी तैस लाएले, ते धेरतरे सारे लोक ज़ोरे-ज़ोरे सेइं लेरां देले। हाँ इन भोलू आमीन। 8 प्रभु-परमेशर जोते, “अव्वं अलफा ते ओमेगा आई, (मतलब पेड़लो ते आखर) अवं तै आई, जै आए, जै हमेशा थियो, ते जै एजने बालोई, ते बड़ो शक्ति बालोई।” तै इन जोते, 9 अवं यूहन्ना तुश्शो विश्वासी ढ़ला, ते कने यीशु मसीहेरे लेइ दुःखन मां, परमेशेरे राज़े मां, ते सबरी मां तुसन सेइं साथी शामिल। अवं पतमुस नव्वेरे टैपू पुड़ परमेशेरु वचन शुनानेरे त कने यीशुएरी गवाही देनेरे वजाई सेइं कैद थियो। 10 हफतेरे पेड़ले दिहाड़े पवित्र आत्मां अवं अपने केबू मां कियो, मीं एप्पू पत्र अक आवाज़ इन जोते शुनी। तै आवाज़ नडशिगेरी उच्ची आवज़री ज़ेरि थी। 11 “जैन किछ तू लातस, तैस किताबी मां लिखतां सत नगरां केरे कलीसियान कां भेज, मतलब इफिसुस, स्मुरना, पिरगमुन, थुआतीरा, सरदीस, फिलदिलफिया ते लौदीकिया नगरन मां आन।” 12 तैखन जै मीं सेइं गल्लां केरने लोरो थियो तैस हेरनेरे लेइ तक्कू; ते पत्रोवं फिरतां मीं सोन्नेरे सत दीवट लाए। 13 ते तैन दीवटां केरे मझाटे मड़देरो ज़ेरो कोई लाव, तैन पवन तगर लम्मो चोगो लोरो थियो, ते तैसेरे छैती पुड़ सोन्नेरो पटको बंधोरो थियो। 14 तैसेरे दोगे पुड़ तैसेरे बाल छिती उन्नी या हिवेरे ज़ेरे थिये। तैसेरी एछछी अगारे लपारी ज़ेरि बेलती थी। 15 ते तैसेरे पाव भेड़ी मां गर्म कियोरे पितलरे ज़ेरे चमकते

थिये, ते ज़ैखन तैन गल की तैसेरी आवाज़ बड़े ज़ोरे सेइं थी, जेन्चरे बड़े दरियां केरि ज़ेरि जैना बड़े ज़ोरे सेइं चलतन। 16 ते तै अपने देइने हथ्थे मां सत तारे घिन्तां थियो, ते तैसेरे मुखे सेइं दूई धारण बाली तलवार निसती थी, तैसेरु तुतर एरु चमकतू थियूं, जेन्चरे दिहाड़ो भर-दुपारेई चमकते। 17 ज़ैखन मीं तै लव, त तैसेरे पावन पुड़ मुड़देरो ज़ेरो पेव, ते तैन मीं पुड़ अपनो देइने हथ रखतां इन जोवं, “डर न, अवं पेड़लो त कने आखरी आई।” 18 ते जीतो भी अवं आई, अवं एककी बार मरों थियो, पन हुनी अवं जीतोई ते अवं हमेशा जीतो रानोई। मीं मौती पुड़ ते पाताले पुड़ जै मरें लोकां केरि ठारे अधिकारे। (aiōn g165, Hadēs g86) 19 एल्हेरेलेइ जैना गल्लां तीं हेरी ते जैना गल्लां भोइ रेवरिन, ते जैना इठां बाद भोने बैलिन, तैना सब लिख।” 20 मतलब तैन सत तारां केरो भेद जैना तीं मेरे देइने हथ्थे मां लोरे थिये, ते तैन सत सोन्नेरे दीवटां केरो भेद, ते सत तारे सत कलीसियां केरे स्वर्गदूतन, ते तैना सत दीवट सत कलीसियान।

2 तैन मीं सेइं इन भी जोवं: “इफिसुस नगरेरे कलीसियारे स्वर्गदूते जो ई सन्देश लिख कि, ‘अवं तै आई जै सते तारे अपने देइने हथ्थे मां घिन्तां फिरताई, ते सोन्नेरे सत दीवटां केरे मझाटे फिरताई, अवं इन जोताई: 2 अवं तेरां कम्मां, तेरी मेहनत, ते तेरु सबर ज्ञानताई। ते इन भी, कि तू बुरे लोकन बर्दाश न केरि बटस; त कने तैन जैना अपनो आप प्रेरित ज़ोतन पन आन नई, तैना तीं परखे ते तैना झूठे निरसे। 3 अवं इन भी ज्ञानताई मेरे नव्वेरे खातर तीं सबरी सेइं दुःख झैल्ले ते तीं मेरी सेवा केरिन न शारी। 4 पन मीं तेरे खलाफ इन ज़ोनूए कि ज़ेरो प्यार तीं मीं सेइं विश्वास केरनेरे वक्ते मां कियोरो थियो इस वक्ते मां न केरस। 5 याद रख तू बिछड़ने करां पेड़लो कोड़ि थियो। तू पाप केरने करां मनफिरा ते तेरही ज़िन्दगी ज़ी ज़ेरि पेड़लो विश्वास केरनेरे वक्ते जीतो थियो। अगर तू मन न फिरालो त अवं तीं कां एइतां तेरु दीवट तैस ठारारां पुटेलो। 6 पन हाँ तीं मां ई गल त आए, कि तू नीकुलइयां केरे कम्मन सेइं नफरत केरतस, जैन सेइं अवं भी नफरत केरताई। 7 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन जोते, जै जीत हासिल केरे, अवं तैस, ज़िन्दगरे बुटे मरां फल खानेरे लेइ देइलो जै ज़िन्दगी देते, जै परमेशेरे स्वर्ग लोके मां।” 8 तैन मीं सेइं इन भी जोवं, “स्मुरना नगरेरे कलीसियारे स्वर्गदूते जो ई सन्देश लिख, ‘जै पेड़लो ते आखरीए; जै मरों थियो ते हुनी जीतो भोरोए, ते इन जोते: 9 अवं ज्ञानताई कि तू स्तव गातस ते तू गरीब आस, पन आत्मिक गल्लन मां तू धनी आस। अवं इन भी ज्ञानताई कि जैना लोक ज़ोतन कि तैना परमेशेरे चुनोरे (यहूदी) लोकन, पन तैना असलीती मां नई। तैना तुश्शे बारे मां बुरी गल्लां ज़ोतन, पन हकीकति मां तैन केरो रिश्तो एरे टोली सेइं आए जै शैतानेरी। 10 जैना दुःख तीं झैल्लेने पेनेन तैन करां न डर। शैतान तुसन मरां किछ लोकन टलुइतां कैद करालो ताके तैना परखे गान। ते तुसन दश दिहाड़न तगर

बड़ी दुःख झैल्लनो भोलो। पन मीं पुड़ विश्वास केरनो न शार, चाए जान भी देनी पे, किजोकि अवं तेरे जीतरे लेइ हमेशारे जिन्दगुरू इनाम देइलो। 11 जै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन जोते, जै जीते, तैस दुइयोवं मौती सेइं नुकसान न पुजेलो।” 12 तैने मीं सेइं इन भी ज़ोवं, “पिगामुन नगरेरे कलीसियारे स्वर्गदूते जो ई सन्देश लिख, ‘अवं तै आईं जैस कां दूई धारण बाली तिख्खी तलवारे, अवं इन ज़ोताई: 13 अवं इन ज्ञानताई, कि तू तैड़ी रातस जैड़ी शैतान राज़ करते, तू मीं सेइं साथी ईमानदार राव, त कने तू मीं पुड़ विश्वास केरनो कथे न शारस। तीं इड़ी तगर विश्वास कियो जेइस मेरो वफादार गवाह अन्तिपास तैनेई तैस ठैरी मारो, जैड़ी शैतान राज़ करते। 14 पन मीं तेरे खलाफ किछ गल्लां ज़ोनिन, किजोकि तू तैन केरि खलाफत न केरस जैना तुशे कलीसियाई मां झूठी शिक्षा देतन तेन्चरे जैन बिलामे बीतोरे वक्ते मां शिखालू। बिलामे बालाक राज़े शिखालू कि इस्राएली लोकां केरि अज़मैइश केरे ताके तैना पाप केरन। तैने शिखालू कि तैना मूरतन पुड़ बलिदान कियोरी चीज़ां खान ते बदमाशी केरन। 15 तेन्चरे तुसन मां किछ लोक एरे आन जैना नीकुलइयां केरि शिक्षा मन्तन। 16 ते मनफिरा, नई त अवं तीं कां जल्दी एजतां तैन लोकन सेइं तैस तलवारी सेइं लेइलो जै मेरे ऐशेरां निसतीए। 17 जै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन जोते; जैना लोक जीत हासिल केरन, तैन अवं छपोरो मन्ने मरां देइलो, त कने अवं तैन अक छितो घोड़ भी देइलो; तैस घोड़े पुड़ अक नवं लिखोरू भोलू, जैस तैसेरे हासिल केरनेबालेरी अलावा होरो कोई न ज़ानेलो।” 18 तैने मीं सेइं इन भी ज़ोवं, “थुआतीरा नगरेरे कलीसियारे स्वर्गदूते जो ई सन्देश लिख कि, ‘अवं परमेशेरू मट्टू जेसेरी एछछी अगारी ज़ेरिन, त कने जेसेरे पाव कीमती पीतलारे ज़ेरिन, अवं इन ज़ोताई: 19 अवं तेरे कम्मन, तेरे प्यारे, विश्वास, सेवा त कने सबरी ज्ञानताई, ते इन भी ज्ञानताई, कि तेरां आखरी कम्मां पेइले कम्मन करां बद्धतन। 20 पन मीं तेरे खलाफ इन ज़ोनूए, कि तू तै कुआन्श इजेबेल राने देतस; जै अपनो आप नबिन ज़ोतीए, ते मेरे दासन बदमाशी केरने त कने मूरतन कां चाढ़ोरू खानू शिखलतां टपलातीए। 21 मीं तैस मनफिरानेरे लेइ मौको दितो, पन तैसा अपने बदमाशी केरने करां मन न फिरानो चाव। 22 हेरा, एल्हेरेलेइ अवं तैस बिमार केरेलो; ते जै तैस सेइं बदमाशी केरेलो अगर तैना भी तैन कम्मन करां मन न फिराले, त तैन बड़े मुसीबती मां छेडेलो। 23 ते अवं तैसेरे बच्चन मैरेलो; ते तैखन सब कलीसियां बुझेली कि दिल त कने मनरो परखने बालो अवं आईं; ते अवं तुसन मां हर एक्की तैसेरे कम्मां केरे मुताबिक बदलो देइलो। 24 पन तुस थुआतीरा नगरेरे बाकी लोकन सेइं, जैना तैस शिक्षाई न मन्न्, जैन गल्लन जो तैना शैतानेरी दुगी गल्लां ज़ोतन न ज़ानन, इन ज़ोताई, कि अवं तुसन पुड़ होरो बोझ न रेख्खी। 25 पन हाँ, जैन तींकांए तैस मेरे एजने

तर ठेमतां रख। 26 जैना लोक जीत हासिल केरन, ते जै मेरे इच्छारे मुताबिक आखरी तगर केरतो राए, अवं तैस सैरी कौमां केरे लोकन पुड़ अधिकार देइलो। 27 अवं तैस तेरहो अधिकार राज़ केरनेरे लेइ देइलो जेरो मेरे बाजे मीं दितोरोए। तैन केरू राज़ लोहेरू जेरू मज़बूत भोलू जैन टलुटे न, ते तैन केरे दुश्मन मितरे भाण्डां केरे जेरे चूर-चूर भोले। 28 अवं तैन केरि जीत हिरानेरे लेइ तैन झेझेरो तारो भी देइलो। 29 जै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन जोते।”

3 तैने मीं सेइं इन भी ज़ोवं, “सरदीस नगरेरे कलीसियारे स्वर्गदूते जो ई सन्देश लिख कि, ‘जैस कां परमेशेरी सत आत्मान ते सत तारेन, ते इन ज़ोते कि अवं तेरे कम्मन ज्ञानताई, कि तींझो जीतो ज़ोतन, पन तू आस मर्रो। 2 एल्हेरेलेइ बींझो रा, ते तैन चीज़न जैना रेवरिन, ते जैना मिटने बैलिन, तैन मज़बूत केर; किजोकि मीं तू केन्ची चीज़ी मां अपने परमेशरे कां पूरो न लव। 3 याद केर, कि तीं केरि शिक्षा मैलोरी थी तीं ते शुनोरी थी, ते तैस मनतो रा ते कने मनफिरा, ते अगर तू बींझो न रालो, त अवं चोरेरो जेरो एज्जेलो ते तू कथे न ज़ानेलो, कि अवं कोस घेड़ी तीं पुड़ एज्जेलो। 4 पन सरदीस नगरे मां तुसन मां किछ लोक एरे आन, जैनेई अपनो आप पापे सेइं अशुद्ध नई कियोरो, तैना छित्तां लिगड़ां लेइतां मीं सेइं साथी चलेले किजोकि तैना इस काबलन। 5 जैना जीत हासिल केरेले तैन इस्से तरीके सेइं तैन केरां जेरां छित्तां लिगड़ां लुवां गालां। अवं तैन केरू नवं तैस किताबी मरां हटेइलो जैस मां परमेशरे तैन केरां नव्वां लिखोरन जैना हमेशारी जिन्दगी हासिल केरेले। अवं तैन केरू नवं अपने बाजी ते अपने स्वर्गदूतां केरे सामने एलान केरेलो। 6 जै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन जोते।” 7 तैने मीं सेइं इन भी ज़ोवं, “फिलदिलफिया नगरेरे कलीसियारे स्वर्गदूते जो इन लिख, ‘अवं तै आईं जै पवित्र ते सच्चे, ते जैस कां दाऊदेरी चाबीए, जेसेरे खोल्लेरे कोई बंद न केरि सके ते जेसेरे बंद केरें कोई खोल्लेरे न सके, तै इन ज़ोते: 8 अवं तेरे कम्मन ज्ञानताई, हेर, मीं तेरे सामने अक बत खोललोरीए, जैस कोई बंद न केरि सके कि तेरी शक्ति थोड़ीए, ते तीं मेरू वचन मनोरूए, ते मेरे नव्वेरो इन्कार नई कियोरो। 9 हेर, जैन लोकां केरो रिश्तो शैतानेरी टोली सेइं आए, तैना ज़ोतन कि तैना यहूदी आन, पन आन नई, बल्के झूठ ज़ोतन हेर, अवं एरू केरेलो, तैना तीं कां एइतां झुकेले, ते इन ज़ानेले, कि अवं तीं सेइं प्यार केरताई। 10 जैखन तू दुःख झैल्लतो थियो तीं सबरी सेइं मेरो सन्देश मन्नो। एल्हेरेलेइ अवं भी तीं बड़े अज़मैइशरे वक्ते बत्रेइलो, जै थेरतली पुड़ रानेबालन पुड़ परखनेरे लेइ सारे दुनियाई पुड़ एजने बालीए। 11 अवं जल्दी एजने बालोई; जैन किछ तींकांए, तैस ठेमतां रख, कि कोई तेरू ताज न थसोड़े। 12 जै जीत हासिल केरे, तै जेन्चरे अक खम्भो घरे मज़बूत रखते, तेन्चरे तै भी परमेशेरें मन्दरे मां हमेशा रालो; ते अवं अपने परमेशेरू नवं, ते अपने परमेशेरें नगर, मतलब

नंवे यरूशलेमेरु नवं, जैन नगर स्वर्ग पुड़ां एजने बालूप ते अपनू नंवं नवं तैस पुड़ लिखेले। 13 जै समझून चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।” 14 तैने मीं सेइं इन भी ज़ोवं “लौदीकिया नगररे कलीसियारे स्वर्गदूते जो ई सन्देश लिख कि, ‘जै आमीन, वफादारे, ते सच्चो गवाह आए, ते परमेशरेरी स्रष्टिरी वजाए, तै इन ज़ोते। 15 कि अवं तेरे कम्मन ज्ञानताई, कि तू तैस पैनेरो ज़ेरोस ज़ैन न ठंढू ए ते न गर्म, रोडू भोथू कि तू ठंडो भोथो या फिरी गर्म, यानी तू मीं पुरो विश्वास केरेथो या बिलकुल न केरेथो। 16 एल्हेरेलेइ तू निघोस, ते न ठंडोस ते न त्तओस, पन तू अध्ये मने सेइं मीं पुड़ विश्वास केरतस, एल्हेरेलेइ अवं तीं रद केरनेबालो आई। 17 तू ज़ैन ज़ोतस, कि अवं धनी, ते धनी भोरोई, ते मीं केन्ची चीज़री घटी नई, ते इन न ज्ञानस, कि तू बदकिसमत ते तुच्छ ते कंगाल ते कानो, ते नगोस। 18 एल्हेरेलेइ अवं तीं सलाह देताई, कि अग्गी मां तौरू सोनू मीं करां ने, कि धनी भोस; ते छितां लिगड़ां ने, कि तीं अपने नगरे पनेरी शर्म न भोए; ते अपने एछछी केरे लानेरे लेइ कजल ने, कि तू लास। 19 अवं ज़ैन-ज़ैन सेइं प्यार केरताई, तैन शिखालताई ते सज़ा देताई ताके तैना रोडे बनन। एल्हेरेलेइ भलाई केरने मां लगोरो रा, ते पापन करां मनफिरा। 20 हेर, तेरे दिले मां एजनेरे लेइ अवं ज़ेन्चरे कोई घेरू दार गुडकाते अवं तेन्चरे आई; अगर तू मेरी आवाज़ शुन्तां अपनो दिल खोल्लस, त अवं अन्तर एज्जेलो ते अस एप्पू मांमेइं संगती केरमेले। 21 जै जीते, अवं तैस एप्पू सेइं साथी अपने तखते पुड़ बिशलेलो, ज़ेन्चरे अवं भी जीत हासिल केरतां अपने बाजी केरे तखते पुड़ बिशरोरो। 22 जै समझून चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।”

4 इना गल्लां हेरनेरां पत्ती, मीं स्वर्ग मां अक दार खुल्लोरू लाव। ते मीं सेइं कोई गल्लां केरने लाव ई तैए थियो ज़ेने मीं सेइं पेइली गल्लां की, तैसेरी आवाज़ नडशिनगरे ज़ेरि थी। तैने मीं सेइं ज़ोवं, “इडी बा एई: अवं तीं तैना गल्लां हिरेइलो, ज़ैन केरू इन गल्लां केरे पत्ती पूरू भोनु ज़रूरीए।” 2 अकदम पवित्र आत्मां अवं अपने केबू मां कियो; ते मीं स्वर्ग मां अक तखत लाव ते तैस तखते पुड़ कोई बिशोरो लाव। 3 ते ज़ै तैस तखते पुड़ बिशोरो थियो, तै यशब ते मानिक कीमती घोड़ां केरो ज़ेरो लेइहोतो थियो। ते तैस तखते चेरे पासन भुज्जल्लैठ थी, ज़ै मरकत घोड़ेरी ज़ेरि लेइहोती थी। 4 तैस तखतेरे चेरे पासन चोब्ही तखत थिये; ते तैन तखतन पुड़ चोब्ही बुजुर्ग छितां लिगड़ां लेइतां बिशोरे थिये, ते तैन केरे दोगन पुड़ सोननेरां ताजां थियां। 5 ते तैस तखते मां बिजली ते गुड़ने ते तखतेरे सामने अगारे सत दीवट बलने लोरे थिये, इन परमेशरेरे सत आत्मा आन। 6 ते तैस तखतेरे सामने शीशेरो साफ समुन्द्र थियो ज़ै बरफारो ज़ेरो थियो, ते तखतेरे मझाटे ते तखतेरे चेरे पासन प्राणी थिये, तैन केरे सैरे जानी पुड़ एछछी-एछछी थी। 7 पेइलो प्राणी शेररो ज़ेरो थियो, ते दुइयोवं प्राणी दतितो ज़ेरो, ट्लेइयोवं

प्राणी मैनेरो ज़ेरो थियो, ते चेवरोवं प्राणी उडरने बाले उकाबेरो ज़ेरो थियो। 8 ते चेरे परेणी केरां शा-शा फंगां थियां ते तैन पुड़ एछछी थी इडी तगर कि फंगन अन्तर भी एछछी थी, तैना रात दिहाडी बगैर आरामे इन ज़ोते रातन, “पवित्र, पवित्र, प्रभु-परमेशर, सर्वशक्तिमान, जै थियो, जै आए, ते जै एजनेबालोए।” 9 जै तखते पुड़ बिशोरो ज़ै हमेशा-हमेशा जीतोए, तैना प्राणी तैसेरी महिमा ते आदर ते शुक्र केरेले, (aiōn g165) 10 ज़ैखन चोब्ही बुजुर्ग तखतन पुड़ बिशने बाले कां मथ्यो टेकेले, ते तैसेरी आराधना केरेले। ते तैना अपना-अपना ताजां तखतेरे सामने इन ज़ोइतां रखेले: (aiōn g165) 11 “हे इश्शे प्रभु-परमेशर, तींए सैरी चीज़ां बनेइ। तेरे मेज़ी सेइं सब चीज़ां बनेइ जेई ते वजूदे मां एई। एल्हेरेलेइ तूए महिमा, आदर ते शेक्तेरे काबलस।”

5 जै तखते पुड़ बिशोरो थियो, मीं तैसेरे देइने हथ्ये मां अक किताब लाई, ज़ै अन्त्रमेई त कने बेइरमेई लिखोरी थी, ते तै सत मोहरां लेइतां बन्द कियोरी थी। 2 फिरी मीं अक ताकतबर स्वर्गदूत लाव, ज़ै ज़ोरे ज़ोरे सेइं ई प्रचार केरतो थियो। “इस किताबारो खोल्लने ते इसेरी मोहरां ट्लोइनेरे काबल कौने?” 3 पन न स्वर्ग मां, न धरती पुड़ न धरतारे बुन कोई तैस किताबी खोल्लने या तैस पुड़ नज़र केरनेरे काबल मैलो। 4 ते अवं ज़ोरे-ज़ोरे सेइं लेरां देने लव, किजोकि तैस किताबरे खोल्लनेरे या तैस पुड़ नज़र केरनेरे काबल कोई न मैलो। 5 तैखन तैन बुजुर्गन मरां एक्के मीं सेइं ज़ोवं, “लेरां न दे, तक, तै ज़ैस जो यहूदारे गोत्रेरो शेर ज़ोतन, ज़ै दाऊद राजेरे खानदाने मरांए तैने तै किताबी खोल्लनेरे ते सत्ते मोहरां ट्लोइनेरे लेइ शैतान हारावरोए।” 6 तैखन मीं तखत ते चेरे प्राणी त कने तैन बुजुर्गां केरे मझाटे अक मारोरू गबडू लाव। तैसेरां सत शिन्गां ते सत एछछी थी; इना परमेशरेरी सते आत्मान, ज़ैना सैरी धरतली पुड़ भेजोरिन। 7 गबडे अगगर एइतां ज़ै तखते पुड़ बिशोरो थियो तैसेरे देइने हथ्ये मरां तै किताब नेही। 8 ते ज़ैखन तैन किताब नेही, त तै चेरे प्राणी ते चोब्ही बुजुर्ग तैस गबडेरे सामने झुके; ते हर केन्चरे हथ्ये मां बर्बत ते धूपे सेइं भरोरे सोननेरे कटोरे थिये, इना पवित्र लोकां केरि प्रार्थनान। 9 त तैना इन नंवं गीत ज़ोने लगे, “तीं कां अधिकारे कि तू मोहरन ट्लोइस ते इस किताबी खोल्लस, किजोकि तीं मेरतां अपने खूने सेइं परमेशरेरे लेइ हर एककी कुले मरां, हर भाषाई मरां, हर लोकन मरां, ते कौमी मरां लोक घिन्नोरेन।” 10 “तीं तैना राजे बनाए, तीं तैना याजक बनाए ज़ैना इश्शे प्रभु परमेशरेरे लेइ सेवारू कम केरन, ते तैना धरती पुड़ राजां केरू ज़ेरू राज़ केरतन।” 11 मीं दुबारा तक्कू, त मीं बेशुमार स्वर्गदूतां त चेरे प्राणी ते बुजुर्गां केरि आवाज़ शुनी ज़ैना तखतेरे चेरे पासन थिये। 12 तैना ज़ोरे सेइं ज़ोते थी, “मारोरू गबडू समर्थ, धन, ज्ञान, शक्ति, आदर, महिमा, ते कने शुक्तेरे काबले।” 13 फिरी मीं स्वर्ग मां ते धरतली पुड़ त कने धरतलरे बुन, ते समुन्दरेरी सब चीज़ां, ते सब किछ ज़ैन तैन मांए, इन ज़ोते शुनू कि, “जै तखते पुड़ बिशोरोए तैसेरू त कने गबडेरू

शुक्र, आदर, महिमा ते राज्ञ, हमेशा राए।” (aiōn g165) 14 ते चेत्रे प्रेणेई आमीन ज़ोवं, ते बुजुर्गेई मथ्यो टेको।

6 फिरी मीं लाव, कि गबड़े तैन सत मोहरन मरां अक खोल्ली; ते तैन चेत्रे प्रेणेन मरां एक्केरी गुड़नेरी ज़ेरि आवाज़ शुनी कि, “एई।” 2 ते मीं नज़र की, ते अक छितो घोड़ोए, ते तैसेरे सुवारे कां धनक थियूं, ते तैस अक ताज दिचू, ते तै ज़ीतो निस्सो कि होरि भी ज़ीत हासिल केरे। 3 ज़ैखन गबड़े दुइयोवं मोहर खोल्ली, त मीं होरो प्राणी इन ज़ोते शुनू कि, “एई।” 4 फिरी अक होरो घोड़ो निस्सो, ज़ै लाल रंगेरो थियो; ते तैसेरे सुवारे ई अधिकार दितो, कि धेरतली पुड़ां मेल-मिलाप सल्ले, ताके लोक एक्की होरि मारन; ते तैस अक बड़ी तलवार दित्ती। 5 ते ज़ैखन गबड़े ट्लेइयोवं मोहर खोल्ली, त मीं ट्लेइयोवं प्राणी इन ज़ोते शुनू कि, “एई।” ज़ैखन मीं तक्कू त अक कालो घोड़ो निस्सो; 6 ते मीं तैन चेत्रे प्रेणन मरां मैनेरी ज़ेरि ई गल ज़ोते शुनी, कि दीनारो गेहुं, “ते दीनाररे ट्लाई सेर जौ, तेल, ते कने दाछोरो रसेरो नुकसान न केरथा।” 7 ज़ैखन तैन चेत्रोवं मोहर खोल्ली, त मीं चेत्रोवं प्राणी इन ज़ोते शुनो कि, “एई।” 8 ते मीं नज़र की, ते हेरा, अक हेइढलो घोड़ोए; तैसेरे सूवारेरू नवं मौते, ते पाताल तैस पत्ती-पत्तीए, ते तैन ई अधिकार मैल्लो कि धेरती पुड़ रानेबाले लोकन मरां हर चेत्रो मैन्हु मारन, कि तैना तैन तलवारी सेइं मारन, ते ढलुखी सेइं मारन, ते बुरी बिमैरी सेइं मारन, ते तैन जंगली जानवरन सेइं भी मारन। (Hadēs g86) 9 ज़ैखन गबड़े पंचोवं मोहर खोल्ली, त मीं बलिदान केरनेरी ठारी करां बुन आत्मा लेई, ज़ैना परमेशेरें वचनरेरे वजाई सेइं, ते तैस गवाहेरी वजाई सेइं ज़ै तैनेई दित्तोरी थी, कि यीशु मसीह तैन केरो प्रभुए मारोरो थियो। 10 ते तैनेई बड़े ज़ोरे सेइं हक देइतां ज़ोवं, “हे पवित्र, ते सत्त्रे प्रभु; तू केइस तगर इश्शो इन्साफ न केरेलो? ते धेरतलरे रानेबालन सेइं इश्शो खूनेरो बदलो केइस नेलो?” 11 ते तैन सेब्भन छित्तां लिगड़ां दितां, ते तैन सेइं ज़ोवं, कि थोड़े चिरेरे लेइ आराम केरा, ज़ांतगर तुश्शे संगी दास, ते विश्वासी साथी, ज़ैना तुश्शे ज़ेरे मारे गानेन, तैन केरि भी गिनती पूरी न भोए। 12 ज़ैखन गबड़े शेइयोवं मोहर खोल्ली, त मीं हेरू, कि अक बड़ो भुंज़ल अव; ते दिहड़ो कमलेरो ज़ेरो भोव, ते चाँदनी पूरी खूनेरी ज़ेरि भोइ। 13 ते अम्बरे तारे धेरतली पुड़ां झड़े जेन्चरे बड़े तूफाने सेइं फ्रेगरे बुटे मरां कच्छे फल झड़तन। 14 ते अम्बर एरू घिशकू, जेन्चरे बरको पलेटोते ते हर अक पहाड़, ते टैपू, अपने-अपने ठारारां घिशके। 15 ते धेरतलरे राजे, प्रधान, सरदार, धनी ते समर्थ लोक, ते हर अक दास, ते हर अक आज़ाद पहाड़ां केरे कुढन मां, ते शफड़न मां छुप्पे। 16 ते पहाड़न, ते शफड़न सेइं ज़ोने लाए, “कि असन पुड़ झड़ा; ते असन तैसेरे ऐशी सेइं ज़ै तखते पुड़ बिशोरोए ते गबड़रे सरकी करां छुपा। 17 किजोकि ते खतरनाक दिहाड़ी एज्जेली ज़ेइस परमेशार ते गबड़ हर एक्की सज़ा देले, ते कोई भी तैस झैल्लनेरे काबल नई।”

7 इसेरां पत्ती मीं दुनियारे चेत्रे कूनन पुड़ चेत्र स्वर्गदूत खड़े लाए। तैन स्वर्गदूतन दुनियाई मां आफत फैलेइतां नुकसान पुज़ानेरे लेइ परमेशरे करां अधिकार हासिल कियोरो थियो, चाए धेरती पुड़ या समुन्द्रे पुड़। तैनेई दुनियारे चेत्रे कूनन करां हवान ठेमतां रख्खी ताके धेरतली, या समुद्र, या कोन्ची बुटे पुड़, हवां न चले। ते मीं अक होरो स्वर्गदूत पूर्वोरां एइतो लाव। तैस कां अक महोर थी ज़ै हमेशा ज़ीते परमेशेरें तरफां थी। तैन चेत्रे स्वर्गदूतन सेइं ज़ोरे सेइं ज़ोवं: 3 “ज़ांतगर अस अपने परमेशेरें दासां केरे कुपाए पुड़ मोहर न लाम तांतगर तैना आफतां तैन पुड़ न एजन, ते धेरतली, समुन्द्र ते कने बुटन नुकसान न पुज़ान।” 4 ते ज़ैन पुड़ मोहर कीजेई, मीं तैन केरि गिनती शुनी, कि इस्राएलेरी खानदानेरे गोदलन मरां अक लख चुरतैली हज़ारन पुड़ महोर कीजेई। 5 यहूदारे गोदलन मरां 12 हज़ारन पुड़ मोहर लाई, रूबेनेरे गोत्रे मरां 12 हज़ारन पुड़; गादेरे गोत्रे मरां 12 हज़ारन पुड़। 6 अशेरें गोदल्लेरे मरां 12 हज़ारन पुड़; नप्ताल्लेरे गोत्रे मरां 12 हज़ारन पुड़; मनश्शेरे गोत्रे मरां 12 हज़ारन पुड़। 7 शमौनेरे गोत्रे मरां 12 हज़ारन पुड़; लेवेरे गोत्रे मरां 12 हज़ारन पुड़; इस्साकारेरे गोत्रे मरां 12 हज़ारन पुड़। 8 जबूल्लेरे गोत्रे मरां 12 हज़ारन पुड़; यूसुफेरे गोत्रे मरां 12 हज़ारन पुड़, बिन्यामीनेरे गोत्रे मरां 12 हज़ारन पुड़ मोहर लाई जेई। 9 इसेरां पत्ती मीं मैन्हु केरि भीड़ लाई ज़ैस कोई गेनि न थियो बटतो। तैना हर कुले मरां, हर कौमी मरां, ते हर भाषाई मरां ओरे थियो। तैना तखतेरे ते गबड़रे सामने खड़े थियो। तैनेई छित्तां लिगड़ां लोरो थियां, ते सैभेई अपने हथ्यन मां तैसेरे आदरारे निशानेरे रूपां मां खजूरैरी डेलड़ी धिन्तां थियो। 10 ते तैना लोक बड़े ज़ोरे सेइं ज़ोती थियो, “मुक्तेरे लेइ इश्शे परमेशेरू ज़ै तखते पुड़ बिशोरोए, ते गबड़ेरू जयजयकार भोए।” 11 ते सारे स्वर्गदूत ज़ैना तखतेरे चेत्रे पासन ते बुजुर्गां केरे चेत्रे पासन थिये ते चेत्रे प्रेणेई तैनेई मथ्यो टेको, ते परमेशरे कां मथ्यो टेकतां ज़ोवं, 12 “आमीन, इश्शे परमेशेरैरी स्तुति, ते महिमा, ते ज्ञान, ते शुक्र ते आदर, ते समर्थ, ते शक्ति हमेशा बनोरी राए। आमीन।” (aiōn g165) 13 इन गल्लन पुड़ बुजुर्गेन मरां एक्के मीं सेइं ज़ोवं; “इना छित्तां लिगड़ां लेइतां कौन? ते कौट्ठां ओरेन?” 14 मीं तैस सेइं ज़ोवं; “हे मालिक, तूए ज्ञानतस।” तैने मीं सेइं ज़ोवं; “इना तैना आन, ज़ैना तैस बड़े मुसीबती मरां निसारेन; तैनेई अपना लिगड़ां गबड़रे खूने सेइं थोइतां छित्तां केरन, जेसेरो मतलब तैन केरे पाप दूर किये।” 15 “एल्लेरेलेइ तैना परमेशेरें तखतेरे सामनेन, ते तैसेरे मन्दरे मां रात दिहाड़ी तैसेरी सेवा केरतन; ते ज़ै तखते पुड़ बिशोरोए, तै तैन मां रालो ते तैन केरि रक्षा केरेलो। 16 ते तैना फिरी ढलुखोरे ते ट्लिशोरे न भोले: ते तैना दिहाड़े सेइं ते कोन्ची भी गेरमी सेइं न फुकोले। 17 किजोकि गबड़ ज़ैन तखतेरे मझाटे, तैन केरि रखवाली केरेलू; ते तैन लोकन ज़िन्दगरे पैनी कां नेलू, ते परमेशार तैन केरे एछ्छी केरां सब ऐंखरू पुछेलो।”

8 जैखन गबड़े सतोवं मोहर खोल्ली, त स्वर्गें मां अस्थे घंटे तगर खामोशी राई। 2 मीं तैन सत स्वर्गदूत जैना परमेशरें सामने खड़े रहतन, लाए, ते तैन सत नड़शिगे दिते जे। 3 फिरी अक होरो स्वर्गदूत सोन्नेरू धूपदान घिन्तां अव, ते बलिदान केरनेरी ठारी कां जेव; ते तैस बड़ो धूप दितो, कि सेबभी पवित्र लोकां केरि प्रार्थनान सेइं साथी तैस सोन्नेरें बलिदान केरनेरी ठारी पुड़ जै तखतेंरे सामने चढ़ाई। 4 ते तैस धूपेरो तू परमेशरें लोकां केरि प्रार्थनान सेइं साथी स्वर्गदूतां केरे जिरिये परमेशरें सामने पुजो। 5 तैखन स्वर्गदूत धूपदान नेइतां तैस मां बलिदान केरनेरी ठारारी अग भरी, ते धेतली पुड़ छड़ी, ते गुड़नेरी आवाज ते बिजली ते भुंजल भोने लाए। 6 ते तैना सते स्वर्गदूत जैन कां सत नड़शिनगे थिये, बजानेरें लेइ तियार भोए। 7 पेड़ले स्वर्गदूत नड़शिनगां बज्जाव, ते खूने सेइं मिलोरी आण ते अग धेरतली पुड़ शारी; ते धेरतली टलेइन मरां अक हिस्सो फुकोई, ते बुट भी अक तीयाही फुकोए, ते सब नीलो घास भी फुकोव। 8 दुइयोवं स्वर्गदूते नड़शिनगां बज्जाव, त किछ जेन्चरे बड़े पहाड़ेरू जेरू अगी सेइं फुकोतू समुन्द्रे मां शारू; ते समुन्द्र अक तीहाई खून भोव। 9 ते अक तीहाई जानवर जैना समुन्द्रे मां रहते थिये मेरि जे, ते समुन्दरेंरां अक तीहाई जिहाजां तुबा भुआं। 10 टलेइयोवं स्वर्गदूते नड़शिनगो बज्जाव, ते अक बड़ो तारो जै दीयेरो जेरो बलतो थियो, स्वर्गरां टलुटो, ते दरियां केरे एक्की तीहाई पुड़, ते पैन् पुड़ पेव। 11 ते तैस तारेरू नवं नागदौनाए, ते अक तीहाई पानी नागदौनारू जेरू टलिटू भोवं, ते बड़े मैन्हु तैस पैनेरे टलिटू भोने सेइं मेरि जे। 12 चेवरोवं स्वर्गदूते नड़शिनगो बज्जाव, ते दिहाडो अक तीहाई, ते चेंदनरी अक तीहाई ते तारां केरि एक्की तीहाई पुड़ हलचल पेई, इडी तगर कि तैन केरो अक तीहाई हिस्सो आंधरो भोव ते दिहैडरी एक्की तीहाई मां लौ न राई, ते तेन्चरे राती मां भी। 13 जैखन मीं हेरू, त अम्बरे मझामेई अक उकाब उडरते ते ज़ोरे सेइं इन ज़ोते शुनू, “कि तैन ट्लाई स्वर्गदूतां केरे नड़शिनगेरे आवाज़ारे वजाई सेइं जैना बजाने हेजू बाकिन, धेरतली रानेबालन पुड़ अफ़सोस! अफ़सोस! अफ़सोस!”

9 जैखन पंजोंव स्वर्गदूते नड़शिनगो बज्जाव, त मीं स्वर्गेरां धेरतली पुड़ अक तारो झड़तो लाव, ते तैस अथाह कुण्डेरी चाबी दित्ती। (Abyssos g12) 2 तैने अथाह कुण्ड खोल्लू, ते कुण्डे मरां एक्की भेट्तारो जेरो तू निस्सो, ते कुण्डेरे तूए सेइं दिहाडो ते अम्बर आंधरू भोइ जेव। (Abyssos g12) 3 ते तैस तूए मरां धेरतली पुड़ टिट्टां निस्सां, ते तैन धेरतलरे बिच्चू केरि ज़ेरि ताकत दित्ती जेई। 4 ते तैन सेइं ज़ोवं, कि न धेरतलरे घासे, न केन्ची नीलारे, न केन्ची बुटे नुकसान पुजान, सिर्फ तैन मैन् न जैन केरे कुपाए पुड़ परमेशरेंरी मोहर नई। 5 ते तैन मारनेरे लेइ नई, पन पंज महीन तगर लोकन दुःख देनेरो अधिकार दितो, ते तैन केरो दुःख एरो थियो, जेन्चरे बिच्चू केरे डस मारने सेइं मैन् भोते। 6 तैन पंज महीन मां मैन्हु मरनू चाएले, पन तैना न मेरि बटेले। तैना मरनेरी इच्छा रखेले पन तैना कोन्ची भी तरीके सेइं

मरनेरी बत न मैलेली। 7 तैना टिट्टां जंग केरनेरे लेइ तियार घोड़ां केरे ज़ेरां लेइहोतां थियां, तैन केरे दोगन पुड़ सोत्रां ताजां केरू जेरू किछ लेइहोतू थियूं; तैन केरां तुत्रां मैन्हु केरे तुत्रां केरां ज़ेरां थियां। 8 ते तैन केरे बाल कुआन्शां केरे ज़ेरे लम्मे थिये, ते तैन केरे दंत शरां केरे ज़ेरे मज़बूत थिये। 9 ते तैने लोहेरी ज़ेरि झिलम लोरी थी, ते तैन केरे फंगां केरि आवाज़ एरी थी जेन्चरे रथां केरि ते लड़ेई मां दौड़ते बड़े घोड़ां केरि। 10 तैन केरां पूछड़ां बिच्चू केरां ज़ेरां थियां, ते तैन मां डस थियो, ते तैन पंज महीन तगर मैन् दुःख पुजानेरी ताकत थी, तै ताकत तैन केरे पूछड़न मां थी। 11 अथाह कुण्डेरो दूत तैन पुड़ राज़ो थियो, तैसेरू नवं इब्रानी भाषाई मां अबद्दोन, ते यूनानी भाषाई मां अपुल्लहोने, जेसेरो मतलब नाश केरनेबालो। (Abyssos g12) 12 पंज महीन बाद पेड़ली आफत बीती जेई, ते इट्टां पत्ती दूई बल्के दूई करां जादे आफतां एजने बैलिन। 13 जैखन शेइयोवं स्वर्गदूते नड़शिनगो बज्जाव ते ज़ै सोन्नेरे बलिदान केरनेरी ठार परमेशरें सामने, तैसेरे चेन्ने कूनन मरां मीं एरी आवाज़ शुनी। 14 जेन्चरे कोई शेइयोवं स्वर्गदूत सेइं ज़ोने लोरोए ज़ैस कां नड़शिनगो थियो, “कि तैन चेन्ने दूत जैना बड़े दरियाए फराते कां बन्दोरोए, तैन खोल्ले।” 15 तैखन तैना चेन्ने दूत खोल्ले, तेना पेड़ले तियार भोरे थिये, त इस घेड़ी, ते दिहाड़े, ते महीने, ते सालेरे लेइ तैन बलगनेरे लेइ ज़ोरू थियूं, ते हुनी ई वक्त अव, कि तैना दुनियारे लोकन मरां अक तीहाई लोक मारन। 16 ते तैन केरे फौजरी गिनती बी करोड़ थी जैना घोड़न पुड़ सुवार थिये, मीं तैन केरि गिनती शुनी। 17 ते मीं इस दर्शने मां घोड़े ते तैन केरे एरे सुवार लेइहोए, जैन केरि झिल्लमां अगारे ज़ेरि लाल, ते नीले ते हेडले रंगेरे ज़ेरे थी, ते तैन घोड़ां केरि क्रोड़ी शरां केरे क्रोड़ी केरि ज़ेरि थी, ते तैन केरे ऐशेरां अग ते तू ते गन्धक निसती थी। 18 इन टलेइ आफतन सेइं जैना इना आन, अग, तू, ते कने गन्धक, ज़ै तैन घोड़ां केरे ऐशी मरां निसती थी; तैन सेइं अक तीहाई लोक मेरि जे। 19 तैन घोड़ां केरि ताकत तैन केरे ऐशी, ते कने तैन केरे पूछड़न मां थी, किजोकि तैन केरां पूछड़ां सप्पां केरां ज़ेरां थियां, ते तैन केरे पूछड़ां केरि क्रोड़ी भी थी, ते तैने सेइं तैना दुःख भी पुजाते थिये। 20 ते होरे मैन्हु जैना तैन आफतन सेइं न थी मर्रें, ते तैनेई मूरती केरि पुजा केरनि न शारी, जैना तैनेई सोन्ने, पितल, ते कन्ने घोड़, लेकडरे बनेइं। तैना मूरती न लहन, न शुन्न, न चेलि बटन, ते तैनेई भूतां केरि आराधना केरनि भी न शारी। 21 ते तैनेई, खून, टूनो, बदमाशी, ते कने चोरी केरने करां मन न फिराव।

10 फिरी मीं अक होरो ताकतबर स्वर्गदूत बिदलार पलेटतां स्वर्गेरां एइतो लाव, तैसेरे दोगे पुड़ भुन्जल्लैठ थी, ते तैसेरू आशी दिहाड़ेरू जेरू ते तैसेरे पाव अगारे खम्मबेरे ज़ेरे थिये। 2 तैने अपनो देइने पाव समुन्द्रे पुड़ रखवो, ते खिशड़ो धेरतली पुड़ रखवो, ते तैसेरे हस्थे मां अक निकडी किताब खोलोरी थी। 3 तैनी स्वर्गदूते बड़े ज़ोरे सेइं ज़ोवं, तैसेरी आवाज़ शेरें गज़नेरी ज़ेरि थी। ते जैखन तैने ज़ोरे सेइं चिन्ड मारी, त सत

आवाजेंई जुवाब दित्तो, जैन केरि आवाज गुडनेरी जेरि थी। 4 ते ज़ैसेरी तुलना सदोम नगर ते कने मिसे मुखे सेई कियोरीए। 9 ते सब लोकन, कुलन, भाषान ते कने कौमन मरां लोक तैन गवाहां केरि लाशां सड़े ट्लाई दिहाइन तगर हेरते राले। ते तैना लोक तैन केरि लाशन कोन्ची भी दबने न देले। 10 ते धेरतलरे रानेबाले, तैन केरे मारने सेई खुश ते मघन भोले, ते तैन केरे हेरने बालन बड़े डरेले। 11 ते सड़े ट्लाई दिहाइना पत्ती परमेशरेरे तरफां ज़िन्दगरी सांस तैन मां आई, ते तैना खड़े भोए, ते ज़ैनेई तैना दुबारां ज़ींते लाए तैना बड़े डेरि जे। 12 एसेरां बाद, तैन दूई मैनेई स्वर्गेंरां अक ज़ोनेबालो उच्ची आवाजी मां ज़ोते शुनो, “कि इडी बा एज्जा।” ज़ैखन तैन केरे दुश्मन हेरनेरे लोरे थिये तैना तैन केरे सामने बिदलारी पलेटतां स्वर्गें मांजो घले जे। 13 फिरी तैस्से वक्ते यरूशलेम नगरे मां अक बड़ो भुंजल अव, ते नगरेरे इमारतां केरो दशोंव हिस्सो झ़ाड़ो; ते तैस भुंजले सेई 7000 मरे, ते होरे ज़ैना बचोरे थिये तैना बड़े डरे, ते तैनेई स्वर्गेरे परमेशरेरी बडीयाई की। 14 दुइयोवं आफत बीती जेई, हेरा, टलेइयोवं आफत एजने बालीए। 15 ज़ैखन सतोवं स्वर्गदूते नडुशिनो बजव, त मीं स्वर्गें मां बड़ी ज़ोरे सेई आवाज शुनी, “हुनी इस दुनियाई मां कोई राज़ केरनेबालो नई सिर्फ इश्शो प्रभु-परमेशर ते तैसेरो चुनोरो मसीह, ते तै हमेशारे लेइ राज़ केरेलो।” (aiōn g165) 16 ते चोब्ही बुजुर्ग ज़ैना परमेशरेरे सामने अपने-अपने तखते पुड़ बिश्शोरे थिये, परमेशरे कां मथ्यो टेकतां, 17 इन ज़ोने लाए: “हे सर्वशक्तिमान प्रभु-परमेशर, तू ज़ै आस, ते ज़ै थियो, अस तेरू शुक्र केरतम, कि तीं हुन्ना महान शक्ति हिराई, ते तीं धेरी पुड़ राज़ केरनू शुरु कियोरूए। 18 होरि कौमां केरे लोकेई तीं पुड़ क्रोध कियो, ते तेरो प्रकोप अव, ते तै वक्त ओरोए कि मर्रां केरो इन्साफ कियो गाए, ते ई वक्त भी आए, कि तेरे दास नेबन ते सारे लोकन ज़ैना तेरे आदर केरतन ज़ैना कमजोरन ते ज़ैना ताकतबरन तैन तू इनाम देस, ते तैस्से वक्ते तैन नाश केरस ज़ैना धेरतरे नाश भोनेरी वजा थियो।” 19 परमेशरेरू ज़ैन मन्दर स्वर्गें मांए, तैन खोल्लू, ते तैसेरे मन्दरे मां करारेरो सन्दूख लेइहोव, ते बिजली ते आवाज ते गुडने ते भुंजल आए, ते बड़ी-बड़ी आण पेई।

11 फिरी मीं नापनेरे लेइ अक निराठी दित्ती, ते तैन मीं सेई ज़ोवं, “उठ परमेशरेरे मन्दरे ते बलिदान केरनेरी ठार नाप, ते ज़ैना लोक तैडी मेरी आराधना केरने लोरेन तैन गन। 2 पन मन्दरेरे बेइरयों अंगन न नाप, किजोकि एन तैन लोकां केरे लेइ आए ज़ैना मीं पुड़ विश्वास न केरन, ते तैना तैस पवित्र नगर यरूशलेमे 42 महीन तगर तुबा केरेले। 3 तैस वक्ते अव अपने दुइये गवाहन ई अधिकार देइलो, तैना टाट यानी मातमेरां लिगड़ां लेइतां 1260 दिहाइन तगर मेरे सन्देशेरू एलान केरन।” 4 तैना दूई गवाह, ज़ैन केरे बारे मां बड़े पेइले केन्ने ज़ैतूनेरे दूई बुट ते दूई दीवट केरि मिसाल दित्तोरी थी ज़ैना परमेशरेरे सामने रहतन ज़ै धेरतरे लोकां केरो प्रभुए। 5 ते अगर कोई तैन नुकसान पुजानो चाए, त तैन केरे ऐशी मरां अग निस्तां तैन केरे दुश्मन भस्म केरतीए, ते अगर कोई तैन नुकसान पुजानो चाए, त ज़रूर तै इस्से तरीके सेई मारे गाले। 6 परमेशरे तैन अधिकार दित्तोरो, कि तैना सन्देश एलान केरनेरे दौरान अम्बर बंद केरन (यानी झ़डी रोकन)। तैन ई भी अधिकार मैल्लो पानी खूनेरू ज़ेरू लाल बनान, ते इन भी कि ज़ैखन तैना चान धेरतली पुड़ हर किसमेरी आफत एनी बटतन। 7 ते ज़ैखन तैना दूई गवाह परमेशरेरे सन्देशेरू एलान केरतां झाड़ेले, त तैए हैवान जै अथाह कुण्डे मरां निसेलो, तैन सेई लेइतां तैन करां ज़ींतिलो ते तैन मारेलो। (Abyssos g12) 8 ते तैन केरि लाशां तैस महान नगर यरूशलेमेरे सड़की मां राली ज़ैडी तैन केरो प्रभु क्रूस पुड़ चाढ़ोरो थियो,

12 ज़ैखन तैन बीती जेव, त फिरी अम्बरे मां अक बड़ो आजीब निशान लेइहोव। मतलब अक कुआन्श ज़ै चाँदनी पुड़ खड़ी आए ते तैसां ज़ैना लिगड़ां लोरन तैना दिहाड़े ज़ेरां लेइहोतन। ते तैसेरे अपने दोग्गे पुड़ ताज लोरू थियू जैस पुड़ 12 तारे थिये। 2 ते दोजींती भोइ, ते चिन्दां मारती थी; किजोकि तैस बच्चो ज़ानेरी तकलीफ थी। 3 ते अक होरो निशान अम्बरे मां लेइहोव, ते हेरा; अक बड़ो लाल अजगर (यानी शैतान) थियो, तैसेरी सत क्रोडी ते दश शिनाँ थियां, ते तैसेरे दोगन पुड़ सत ताजां थियां। 4 ते तैसेरे पूछड़ां अम्बरे तारां केरि अक तीहाई ज़मीनी पुड़ आनी, ते तै अजगर तैस कुआन्शरे सामने खड़ो भोव ज़ै दोजींती थी, कि ज़ैखन तै बच्चो ज़ाए त तै बच्चे तैस खाए। 5 तैखन तैस कुआन्शां मटू ज़ाऊं, तैन अजगरे न खेइ बटु किजोकि तैन अकदम परमेशरे ते तैसेरे तखते कां आनू जेव। तैन मटू सारी

कौमन पुड़ लोहरे डण्डे सेइं राज़ करेलू। 6 ते ई कुआन्श जंगले तैने हैवाने अपने अधिकार दित्तोरो थियो। ते इन जोइतां कि, जो नश्शी, ज़ैडी परमेशररे तरफां तैसेरेलेइ अक ठार तियार “इस हैवानेरो ज़ेरो कौने? हैवाने सेइं कौने लेडि बटते?” 5 कोयोरी थी, कि तैडी 1260 दिहाइन तगर तैसेरी हेरगेश की परमेशरे तैस हैवाने अज़ाज़त दित्तोरी थी कि अपने अधिकारे पुड़ गाए। 7 फिरी स्वर्ग पुड़ लड़ाई भोड़, मीकाईल ते तैसेरे स्वर्गदूत घमण्ड केरे ते एन्चरे परमेशररे तुहीन केरे। परमेशरे तैस 42 अजगरे सेइं लड़ने लेइ निस्से, ते अजगर ते तैसेरे दूतन सेइं महीन्न तगर ई अधिकार रखने लेइ अज़ाज़त दित्ती। 6 तै हैवान लड़े। 8 अजगरे लड़ाई हारी, ते फिरी तैना स्वर्ग मां न रेइ बटे। परमेशररे तुहीन करने लगो, कि तैसेरे नंवेरे खलाफ, ते ज़ैडी 9 एल्हेरेलेइ तै त तैसेरे दूत धरती पुड़ शारे, तैए बड्डो अजगर, परमेशर रहते ते स्वर्ग मां रानेबाले सेब्भी लोकां केरे खलाफ ई तैए ज़ै बड़े पेड़ले सपेरे रूपे मां बांदो भोरो थियो, ज़ेसेरू तुहीन करने लगो। 7 परमेशरे तैस हैवाने अज़ाज़त दित्तोरी थी, नवं शैतान या दोष लानेबालोए। तैए आए ज़ै दुनियारे लोकन कि परमेशररे लोकन सेइं लड़े, ते तैन करां जीति, ते तैस हर थोखे देने लोरोए। 10 फिरी मीं स्वर्ग मां बड़ी आवाज़ एइती कुले, सारे लोकन, भाषान, त कने कौमन पुड़ अधिकार दित्तो शुनी, “कि हुनी परमेशर अपने लोकन बचालो! हुनी तै अपनि जेव। 8 ते धरती पुड़ रानेबाले सेब्भी लोकेई तैसेरी पूजा की। शक्ति इस्तेमाल करेलो ते राज़ेरू ज़ेरू राज़ करेलो! हुनी तैसेरो सिर्फ तैनेई न की ज़ैन करां नंवां ज़िन्दगरे किताबी मां दुनिया मसीह दुनियाई पुड़ अधिकार रखेलो! किजोकि हुनी शैतान इश्शे बनाने करां पेड़ले लिखोरां थियां। तै किताब गबड़ेरी ज़िन्दगरी परमेशररे हज़ूरी मां खड़ो न रेइ बटेले कि इश्शे साथी सेवकन किताबे ज़ैन बलिदानेरे लेइ मारू ज़ोवं। 9 ज़ै समझून चाते तै पुड़ रात दिहाड़ी दोष लाए। तै स्वर्ग मरां शारो जोरोए। 11 ते ध्याने सेइं शुने। 10 ज़ैना कैद भोनेन, तैना कैद भोले, ज़ैना तैनेई गबड़ेरे खूनेरे वजाई सेइं ते अपने गवाहरे वचनेरे वजाई सेइं, तलवारी सेइं मरेलो, ज़रूरीए तैना तलवारी सेइं मरेले, परमेशररे तैस पुड़ जीत हासिल की, ते तैनेई अपने प्राण टलारे न समझे, लोकां केरि सबर ते विश्वास इस्से मांए। 11 फिरी मीं अक होरो इड़ी तगर की मौतरी भी परवाह न की। 12 ‘एल्हेरेलेइ तुस सब हैवान धरतली पुड़ा निसतो लाव, तैस गबड़ेरे ज़ेरां दूई शिनाँ ज़ैना इड़ी स्वर्ग मां रहने बालेथ खुश भोथ। पन हे धरतली ते थियां, पन ज़ैखन तैने ज़ोवं त तैसेरी आवाज़ अजगरेरे ज़ेरि थी। कने समुन्द्रे मां रानेबालव तुसन पुड़ अफ़सोस! किजोकि शैतान 12 ई दुइयोवं हैवान पेड़ले हैवानेरो सारो अधिकार इस्तेमाल बड़े क्रोधे सेइं तुसन कां एजनेबालोए, किजोकि तै ज़ानते कि करेते। दुइयोवं हैवाने धरती ते तैस पुड़ रानेबालन करां पेड़ले तैसेरो आखरी वक्त एजनेबालो।” 13 ते ज़ैखन अजगरे समझू, हैवानेरी पूजा कराते ज़ेसेरो मारनेबालो ज़खम ठीक भोरो थियो। कि अव ज़मीनी पुड़ जो शारोरो, त तैस कुआन्शी पत्ती दौड़ो 13 दुइयोवं हैवान बड़े-बड़े निशान हिरातो थियो, इड़ी तगर कि ज़ैसां मटू ज़ावरू थियू। 14 पन परमेशरे तैस कुआन्शी उकाबेरां मैन्हु केरे सामने अम्बरेरां ज़मीनी पुड़ अग भेजतो थियो। 14 दूई बड्डा फंगां दित्तां, कि अजगरे करां उडरतां जंगले मां तैस ठैरी दुइयोवं हैवाने परमेशरे अज़ाज़त दित्ती कि तै पेड़ले हैवानेरे पुजे, ज़ैडी सड़े टलाई सालन तगर तैसेरी हेरगेश भोरी थी, ताके सामने चमत्कार हिराए। एन चमत्कारां केरे ज़िरिये तैनी दुनियारे तैडी अजगर न पुजी बटे। 15 फिरी अजगरे तैस कुआन्शी पत्ती सारे लोक टपलाए। तैने तैन पेड़ले हैवानेरी मूरती बनानेरो हुक्म अपने ऐशी सेइं दरियारू ज़ेरू पानी शारू, कि तैस इस दरियाए दित्तो, ज़ै तलवारी सेइं मारोरो थियो पन फिरी जीतो भोरोए। 15 सेइं रूइए। 16 तैस कुआन्शी मद्दत केरनेरे लेइ ज़मीना तैन दुइयोवं हैवाने परमेशरे अज़ाज़त दित्तोरी थी कि तै पेड़ले हैवानेरी पानी पियू ज़ैन तैस अजगरेरे ऐशी मरां निसोरू थियू। 17 ते मूरती बनाए ते तै जीतोए, ताके तैस हैवानेरी मूरती गल्लां केरि अजगर कुआन्शी जो सेरकोव। एल्हेरेलेइ तैने कुआन्शरे औलादी बटे ते ज़ैना तैस हैवानेरी पूजा न केरने तैना मारे गान। 16 दुइयोवं सेइं लड़ाई केरनेरू एलान कियू। तैना लोक ज़ैन परमेशरे हुक्मन हैवाने सारे लोकन सेइं ज़बरदस्ती की, ज़ैना खास आन ते ज़ैना मन्तन, ते यीशुएरी दित्तोरी शिक्षाई पुड़ चलतन। खास नई, अमीर, गरीब, आज़ाद, गुलाम आन, कि तैना पेड़ले हैवानेरे नंवेरी मोहर देइने हथ्ये या कुपाए पुड़ लान। 17 ज़ैस पुड़ छाप मतलब तैस हैवानेरू नवं या तैसेरो नंवेरो अंक भोए, त ज़ैस पुड़ छाप मतलब तैस हैवानेरू नवं या तैसेरो नंवेरो अंक भोए, त तैसेरे अलावा होरो कोई लेन देन न केरि सके। 18 इस समझनेरे लेइ अक्ल ज़रूरीए। ज़ैस अक्ल भोए, तै इस हैवानेरो अंक जमा केरे, किजोकि तै मैनेरो अंके, ते तैसेरो अंक 666 आए।

13 तैखन अजगर जेव, ते समुन्दरे बन्ने पुड़ खड़ो भोव। मीं अक हैवान समुन्द्रे मरां निसतो लाव, तैसेरां दश शिनाँ ते सत क्रोड़ी थी; तैने शिन्नन पुड़ दश राजमुकट ते तैसेरे दोगन पुड़ परमेशररे तुहीनरां नंवां लिखोरां थियां। 2 ज़ै मीं हैवान लाव, तै इलाघेरो ज़ेरो थियो; ते तैसेरे पाव इछेरे पावां केरे ज़ेरे थिये; ते तैसेरू आशी शेररे ऐशेरू ज़ेरू थियू, ते अजगरे तैस हैवाने अपनि शक्ति दित्ती ते राज़ केरनेरे लेइ तैस अधिकार दित्तो। 3 मीं तैस हैवानेरे करोड़न मरां एक्की पुड़ अक एरो ज़खम लाव, जेन्चरे तै मरने पुड़े; फिरी तैसेरो मारनेबालो ज़खम रोड़ो भोव, ते सारे धरतलरे लोक हैरान भोए, ते तैस हैवाने पत्ती चलने लेगे। 4 ते तैन सेब्भी लोकेई तैस अजगरेरी पूजा की, किजोकि

तैने हैवाने अपने अधिकार दित्तोरो थियो। ते इन जोइतां कि, “इस हैवानेरो ज़ेरो कौने? हैवाने सेइं कौने लेडि बटते?” 5 परमेशरे तैस हैवाने अज़ाज़त दित्तोरी थी कि अपने अधिकारे पुड़ घमण्ड केरे ते एन्चरे परमेशररे तुहीन केरे। परमेशरे तैस 42 महीन्न तगर ई अधिकार रखने लेइ अज़ाज़त दित्ती। 6 तै हैवान परमेशररे तुहीन करने लगो, कि तैसेरे नंवेरे खलाफ, ते ज़ैडी 9 एल्हेरेलेइ तै त तैसेरे दूत धरती पुड़ शारे, तैए बड्डो अजगर, परमेशर रहते ते स्वर्ग मां रानेबाले सेब्भी लोकां केरे खलाफ तुहीन करने लगो। 7 परमेशरे तैस हैवाने अज़ाज़त दित्तोरी थी, कि परमेशररे लोकन सेइं लड़े, ते तैन करां जीति, ते तैस हर कुले, सारे लोकन, भाषान, त कने कौमन पुड़ अधिकार दित्तो जेव। 8 ते धरती पुड़ रानेबाले सेब्भी लोकेई तैसेरी पूजा की। सिर्फ तैनेई न की ज़ैन करां नंवां ज़िन्दगरे किताबी मां दुनिया बनाने करां पेड़ले लिखोरां थियां। तै किताब गबड़ेरी ज़िन्दगरी किताबे ज़ैन बलिदानेरे लेइ मारू ज़ोवं। 9 ज़ै समझून चाते तै ध्याने सेइं शुने। 10 ज़ैना कैद भोनेन, तैना कैद भोले, ज़ैना तलवारी सेइं मरेलो, ज़रूरीए तैना तलवारी सेइं मरेले, परमेशररे लोकां केरि सबर ते विश्वास इस्से मांए। 11 फिरी मीं अक होरो हैवान धरतली पुड़ा निसतो लाव, तैस गबड़ेरे ज़ेरां दूई शिनाँ थियां, पन ज़ैखन तैने ज़ोवं त तैसेरी आवाज़ अजगरेरे ज़ेरि थी। 12 ई दुइयोवं हैवान पेड़ले हैवानेरो सारो अधिकार इस्तेमाल करेते। दुइयोवं हैवाने धरती ते तैस पुड़ रानेबालन करां पेड़ले हैवानेरी पूजा कराते ज़ेसेरो मारनेबालो ज़खम ठीक भोरो थियो। 13 दुइयोवं हैवान बड़े-बड़े निशान हिरातो थियो, इड़ी तगर कि मैन्हु केरे सामने अम्बरेरां ज़मीनी पुड़ अग भेजतो थियो। 14 दुइयोवं हैवाने परमेशरे अज़ाज़त दित्ती कि तै पेड़ले हैवानेरे सामने चमत्कार हिराए। एन चमत्कारां केरे ज़िरिये तैनी दुनियारे सारे लोक टपलाए। तैने तैन पेड़ले हैवानेरी मूरती बनानेरो हुक्म दित्तो, ज़ै तलवारी सेइं मारोरो थियो पन फिरी जीतो भोरोए। 15 दुइयोवं हैवाने परमेशरे अज़ाज़त दित्तोरी थी कि तै पेड़ले हैवानेरी मूरती बनाए ते तै जीतोए, ताके तैस हैवानेरी मूरती गल्लां केरि बटे ते ज़ैना तैस हैवानेरी पूजा न केरने तैना मारे गान। 16 दुइयोवं हैवाने सारे लोकन सेइं ज़बरदस्ती की, ज़ैना खास आन ते ज़ैना खास नई, अमीर, गरीब, आज़ाद, गुलाम आन, कि तैना पेड़ले हैवानेरे नंवेरी मोहर देइने हथ्ये या कुपाए पुड़ लान। 17 ज़ैस पुड़ छाप मतलब तैस हैवानेरू नवं या तैसेरो नंवेरो अंक भोए, त तैसेरे अलावा होरो कोई लेन देन न केरि सके। 18 इस समझनेरे लेइ अक्ल ज़रूरीए। ज़ैस अक्ल भोए, तै इस हैवानेरो अंक जमा केरे, किजोकि तै मैनेरो अंके, ते तैसेरो अंक 666 आए।

14 एसेरे बाद, मीं किछ लाऊं, मीं गबडू सिय्योन पहाड़े पुड़ खडू लाऊं। ते तैस सेइं साथी 144000 लोक थिये, ज़ैन केरे कुपाए पुड़ तैसेरू ते कने तैसेरे बाजेरू नवं लिखोरू थियू। 2 ते स्वर्ग मां एरी आवाज़ शुनोई, ज़ै बड़े पैनेरी ते बड़े गुड़नेरी ज़ेरि आवाज़ थी, ते ज़ै आवाज़ मीं शुनी; तै एरी थी जेन्चरे कोई सारंगी बाज़ाने बालो सारंगी बज़ाने लोरोए। 3 144000 लोक

तखतरे सामने, ते प्राणी ते कने बुजुर्गा केरे सामने खडे थिये; तैना अक नंवू गीत ज़ोने लोरे थिये, तैन गीत सिर्फ तैन लोकेई शिखोरू थियूं। तैना लोक इना आन ज़ैना सिर्फ इस दुनियाई मां रानेबाले लोकन मरां परमेशरे छोटरे थिये। 4 इना तैना लोक आन, ज़ैना कुआन्शन सेई अशुद्ध नई भोरे, पन कुवारेन, इना तैना आन, ज़ेरां भी गबडू गाते तैना भी तैस पत्ती च़लतन, इना त परमेशरे लेइ पेइले फल भोनेरे लेइ मैन्न मरां धिने जोरेन। 5 तैनेई कधी झूठ नई जोरू, ते तैना बेइलज़ामन। 6 फिरी मीं अक होरो स्वर्गदूत अम्बरे मझामेई उडरतो लाव ज़ैस कां धेरतली पुड़ रानेबालां केरि हर अक कौम, कुल, ते कने भाषारे लोकन शुनानेरे लेइ हमेशारी खुशखबरी थी ज़ै कथे न बेदलोए। (aiōnios g166) 7 तैने बडे ज़ोरे सेई ज़ोवं, “परमेशरे करां डरा; ते तैसेरी बड़याई केरा; किजोकि तैसेरो इन्साफ केरनेरो वक्त पुजोरोए, ते तैसेरी आराधना केरा, ज़ैने स्वर्ग, धरती, समुन्द्र, पैनेरे नाग बनोरेन।” 8 फिरी तैसेरां पत्ती अक होरो स्वर्गदूत इन ज़ोतो अव, “कि झड़ू, तैन बाबेल नगर झड़ू, तैने सारे कौमन अपनि शराबी पियाई, ज़ेसेरो मतलब ई आए कि तैने सैरी लोकन मूरती केरि पूजा केरनि शिखाली।” 9 फिरी एसेरां पत्ती अक होरो स्वर्गदूत बडे आवाज़ी सेई इन ज़ोतो अव, “कि ज़ै कोई इस हैवाने ते तैसेरी मूरती पूजा केरे, ते अपने कुपाए या अपने हथ्थे पुड़ तैसेरी छाप लाए। 10 परमेशर तैन टलिठी शराबी पियालो ज़ैस मां पानी न भोए मिलावरू ज़ेसेरो मतलब परमेशरे तैन सेई बड़ो क्रोधे मां आए ते तैन पुड़ दया न केरेलो, तैना लोक अग ते गन्धकेरे दुखे मां छडे गाले, ज़ैखन परमेशर तैन सज़ा देतो भोलो त पवित्र स्वर्गदूत गबडू लालू। 11 ते तैन केरे दुखेरो तू सदा उठतो रालो, ते ज़ैना तैस हैवाने ते तैसेरे मूरती पूजा केरेले, ते ज़ैना तैसेरे नंव्वेरी छाप नेतन, तैन रात दिहाड़ी चैन न मैलेलो।” (aiōn g165) 12 एल्हेरेलेइ परमेशरेरे लोकां केरे लेइ ज़रूरी आए कि ज़ैना भी दुःख तैन पुड़ एज्जन तैन सबरी सेई झैल्लन, परमेशर ज़ैन केरनेरो हुक्म तैन दे तैनेई तैन कियोरू लोड़े, ते तैनेई यीशु पुड़ विश्वास केरनो न लोड़े शारोरो। 13 मीं स्वर्गेंरं ई आवाज़ शुनी, “लिख; ज़ैना मुड़दे प्रभु मां मरतन, तैना धन आन।” पवित्र आत्मा पक्कू केरते, “तै ज़ोते, तैन सच्चे। हाँ किजोकि तैना अपने मेहनती करां आराम हासिल केरेले, ते ज़ैन तैनेई कियू तैसेरे बदले तैन इनाम मैलेलू।” 14 फिरी मीं अक छिती बिदलार लाई, ते तैस बिदलारी पुड़ मैनेरू ज़ेरो कोई बिशोरो लाव, तैसेरे दोग़े पुड़ सोन्नेरू ताज ते हथ्थे मां तिखी इलातीए। 15 फिरी अक होरो स्वर्गदूत मन्दरे मरां निस्तां, तैने ज़ै बिदलारी पुड़ बिशोरो थियो, तैस बडे ज़ोरे सेई ज़ोवं, “कि अपनि इलाती च़ला किजोकि कटनेरो वक्त ओरोए।” 16 ते ज़ै बिदलारी पुड़ बिशोरो थियो, तैने धेरतली पुड़ अपनि इलाती लाई, ते धेरतलरी फसल केटोई। 17 फिरी अक होरो स्वर्गदूत तैस मन्दरे मरां निस्सो, ज़ै स्वर्गें मांए, ते तैस कां भी तिखी इलाती थी। 18 फिरी एक्की होरे स्वर्गदूत ज़ैस अग्नी पुड़

अधिकार थियो, बलिदान केरनेरी ठारी मरां निस्सो, ते ज़ैस कां तिखी इलाती थी, तैस सेई ज़ोरे सेई ज़ोवं; “अपने तिखे इलेइती लेइतां धेरतलरी दाछ कटी; किजोकि तैसेरी दाछ पकोरीए।” 19 ते तैने स्वर्गदूत धेरतली पुड़ अपनि इलाती रख्खी, ते धेरतलरे दाछारे फल केटतां, अपने परमेशरे परकोपेरे बडे रसेरे कुण्ड मां छड़ी। 20 ते नगरेरे बेइर तैस रसेरे कुण्डे मां दाछ इलेन्नी, ते रस कुण्ड मरां एत्रो खून निस्सो कि घोड़ां केरे लगामी तगर पुजो, ते 100 कोसे तगर रूडो।

15 फिरी मीं स्वर्गें मां अक बड़ो ते आजीब निशान लाव, मतलब सत स्वर्गदूत ज़ैन कां आखरी सत आफतां थी, किजोकि तैन केरे भोने पुड़ परमेशरेरो क्रोध मुकेलो। 2 तैखन मीं समुन्देरू ज़ेरू किछ लाव ज़ैन शीशेरू ज़ेरू चमकतू थियूं ते अग भी तैस मां मिलोरी थी। मीं तैना लोक भी लाए ज़ैना हैवाने न थिये हैरेई बटोरो, तैन लोकेई हैवान ते तैसेरे मूरती पूजा न थी कियोरी। ते तैन पुड़ तैस हैवानेरे नंव्वेरे अंकेरी महोर न थी लोरोरी। तैना तैस शीशेरे समुन्दरेरे बन्ने पुड़ तै सांरंगी घिन्तां खडे भोए ज़ै परमेशरे तैन दित्तोरी थी। 3 तैना परमेशरेरे दास मूसेरू गीत, ते गबड़ेरू गीत ज़ोते थी, “हे सर्वशक्तिमान प्रभु-परमेशर, ज़ैना कम्मां तीं कियां तैना बड़ा महान ते आजीब आन, तू सेबभी कौमां केरो राज़ोस, तैन सब ज़ैन तीं कियूं तैन सही ते धर्मी आए।” 4 “हे प्रभु, सेबभी लोकेई तेरी आदर की, ते तैना सारे तेरे नंव्वेरी इज्जत केरतन, किजोकि तूए सिर्फ पवित्रस। सैरी कौमां केरे लोक हर राज़ज़न मरां तीं कां एज्जले, तैना तेरी आराधना केरेले किजोकि तेरे धर्मी कम्मां बड़ां मशूर आन।” 5 ज़ैखन तैन लोकेई गीत ज़ोताई खतम कियां, त मीं स्वर्गें मां मन्दर खोलोरू लाव। तैन एरू थियूं ज़ेन्चरे तेबबु। 6 ते तैना सत स्वर्गदूत ज़ैन कां सत आखरी आफतां थी, तैना तैस मन्दरे मरां निस्सो। तैनेई छिन्तां चमकतां लिगड़ां लोरां थियां ते तैनेई अपने छैती पुड़ सोन्नेरी पेटी बेन्धोरी थी। 7 ते तैन च़ेरे प्रैणन मरां एक्के सत्ते स्वर्गदूतन हमेशा ज़ींते रानेबाले परमेशरेरे प्रकोपे सेई भरोरे सत सोन्नेरे कटोरे दित्ते। (aiōn g165) 8 ते परमेशरेरी महिमा, ते तैसेरे शेक्तेरे वजाई सेई मन्दर तूए सेई भरोई जेव, ते ज़ां तगर तैन सत्ते स्वर्गदूतेई सत्ते आफतां खतम की, तांतगर कोई मन्दरे मां न गेइ बटो।

16 तैहुं पत्ती मीं मन्दरे मां कोई ज़ोरे सेई तैन सत स्वर्गदूतन सेई ज़ोतो शुनो कि, “गाथ, परमेशरेरे सज़ारे सत्ते कटोरे दुनियारे लोकन पुड़ उलटाथ।” 2 ते पेइले गेइतां अपनो कटोरे धेरतली पुड़ उलटव। ते तैन मैन्हु केरे ज़ैन पुड़ हैवानेरी छाप थी, ते ज़ैना लोकेई तैसेरी मूरती पूजा केरते थी, एक्की किसमेरे बुरे ते दुःख देनेबालो फोड़े निस्सो। 3 ते दुइयोवें अपनो कटोरो समुन्द्रे पुड़ उलटव, ते तै मुड़दां केरे खूनेरो ज़ेरो बनो, ते समुन्दरेरे सारे जानदार मरे। 4 ते टलेइयोवें स्वर्गदूते अपनो कटोरो दरियान ते पैनेरे नागन पुड़ उलटव, ते सारू पानी खून बनू। 5 ते ज़ैस स्वर्गदूते पैनी पुड़ अधिकारे मीं तै परमेशरे सेई इन ज़ोते शुनो

कि, “हे पवित्र परमेश्वर, तू जै आस, ते हमेशा करां थियो, तीं कां एन्घरे इन्साफ करेनरु हक्के। 6 किजोकि तैनेई तेरे लोक ते तेरे नबी मारे ते तैन केरो खून बगोरो थियो, एल्हेरेलेइ तीं हुना तैन खून पीने जो दित्तो। इन इनामेरे रूपे मां तैन केरे लेइ ठीक आए।” 7 फिरी मीं बलिदान केरनेरी ठारी मरां ई आवाज शुनी कि, “हाँ सर्वशक्तिमान प्रभु-परमेश्वर, तेरो इन्साफ सही ते कने सच्चो आए।” 8 ते च़ेवरोवें स्वर्गदूते अपनो कटोरो दिहाड़े पुड़ उलटव, ते दिहाड़े जादे गर्म भोनेरी अज़ाज़त दित्ती कि तैस सेइं लोक फुकोन। 9 ते लोक तैस बड़े सेके सेइं फुकोए, ते तैना लोक परमेश्वरेरी तुहीन केरने लाए, किजोकि तैए आए जैस कां सैरी आफतन पुड़ अधिकारे। फिरी भी तैन लोकेई अपने पापन करां मन न फिराव, ते फिरी भी तैनेई परमेश्वरेर महिमारा इकरार न कियो। 10 ते पंजोवें स्वर्गदूते अपनो कटोरो तैस हैवानेरे तखते पुड़ उलटव ते तैसेरे सारे राज़े मां आंधरू भोवं। ते लोक दुखे सेइं मरे ते अपनि-अपनि ज़िभ च़ापने लाए। 11 ते अपने दुखे ते फोड़ां केरे वजाई सेइं स्वर्गेर परमेश्वरेरी तुहीन की; ते अपने-अपने कम्मन करां मन न फिरव। 12 शेइयोवं स्वर्गदूते अपनो कटोरो बड़े दरिया फराते पुड़ उलटव ते तैसेरू पानी शुक्की जेव एसेरो नितीजो ई भोव कि पूरबेरे राज़े अपनि फौज घिन्तां पार जे। 13 एसेरां पत्ती मीं ट्लाई भूतां मैन्डू केरे रूपे मां लाए। अक अजगरेरे ऐशी मरां निस्सू, ते अक पेड़ले हैवानेरे ऐशी मरां निस्सू, ते अक दुइयोवं हैवानेरे ऐशी मरां निस्सू, ज़ै जो झूठो सन्देश ज़ोते। 14 इन भूतन कां चमत्कार केरनेरी काबलीत थी ते तैना दुनियारे सारे मुलखां केरे राज़ केरनेबालन अकोट्टे केरने च़ले ताके तैना परमेश्वरे सेइं लड़न, ई तै दिहाड़ी आए जेइस परमेश्वर भूतन नाश केरेलो ते अपने लोकन मुक्ति देलो। 15 तैन भूतेई हकोमत केरनेबाले ते तैन केरि फौज एककी ठैरी अकोट्टी की ज़ैस जो इब्रानी भाषाई मां हर-मगिदोन ज़ोतन। एल्हेरेलेइ यीशुए ज़ोरूए, “इस शुना। मेरू एजून अचानक घोरेरू ज़ेरूए। धने तै मैन्डू ज़ैखन अव एज्जी त तै बीड़ी रहते, ते अपने लिगड़न तियार रखते। फिरी तै नगो न भोलो, ते फिरी तैस लोकन मां गाने सेइं शर्म न भोली।” 17 ते सतोवें स्वर्गदूते अपनो कटोरो हवाई पुड़ उलटव, ते मीं स्वर्ग मां मन्दरे मरां परमेश्वरे तखते पुड़ां ई बड़ी आवाज शुनी कि कोई ज़ोने लोरोए, “सब किछ पूरू भोवं।” 18 फिरी बिजली, ते आवाज, ते गुड़ने लाव, ते अक एत्रो बड्डो भुंजल अव, कि ज़ेइसेरे मैन्डू इस धेरतली पुड़ पैदा भोरोरन, तेइसेरो अज़ तगर एरो भुंजल कधी नई ओरो। 19 ते तैस महान बाबेल नगरेरे ट्लाई टुकड़े भोए, ते दुनियारे कौमां-कौमां केरे सारे नगर बर्बाद भोए। ताके परमेश्वर तै वादो पूरो केरे ज़ै तैने बाबेल नगरेरे लोकन सज़ा देनेरे लेइ कियोरो थियो। ई सज़ा परमेश्वर पक्की देलो। परमेश्वर तैन ट्लीठी शराबी पियालो ज़ैस मां पानी न भोए मिलावरू ज़ेसेरो मतलब परमेश्वरे तैन सेइं बड़ो क्रोधे मां आए ते तैन पुड़ दया न केरेलो। 20 तैस वक्ते हर अक टैपू समुन्दरे मां डुबो; ते कोई भी पहाड़ न राऊं। 21 ते अम्बेरें मैन

पुड़ मन-मन आण पेई, ते एल्हेरेलेइ कि ई आफत बड़ी भारी थी, लोकेई आनहरी आफतरे वजाई सेइं परमेश्वरेरी तुहीन की।

17 ज़ैन सत स्वर्गदूतन कां तैना सत कटोरे थिये, तैन मरां एइतां एक्के मीं सेइं ज़ोवं, “इरां ईई, अव तीं तैस बड़े वेश्यारी सज़ा हिराताई, ज़ै बड़े पैन् पुड़ बिशोरीए। 2 ज़ैस सेइं धेरतलरे राज़ेई बदमाशी की, ते धेरतली पुड़ रानेबाले तैसेरे बदमेश्वरे शराबी सेइं मसत भोरे थियो।” 3 तैखन आत्मा अव अपने कैबू मां कियो ते स्वर्गदूते अव सुनसान ठैरी मांजो नेव। तैड़ी मीं अक कुआन्श हैवाने पुड़ सुवार लाई, ज़ेसेरी सत क्रोड़ी ते दश शिंगां थियां, तैसेरे जान परमेश्वरेरी तुहीन केरनेरे न्वन सेइं ढकोरी थी। 4 तैस कुआन्शां बेंगनी ते लाल लिगड़ां लोरो थियां, ते सोन्नेरे ते कीमती मेनी ते मोतन सेइं सज़ोरी थी, ते तैसेरे हथ्थे मां अक सोन्नेरो कटोरो शराबी सेइं भेरतां थियो, ज़ै भिट्टे कम्मन ते बदमेश्वरे कम्मन हिराते। 5 ते तैसेरे कुपाए पुड़ इन नव लिखोरू थियूं, “भेद-बड़ो बाबेल धेरतलरी वेश्यां ते भिट्टी चीज़ां केरि अम्मा।” 6 ते मीं तै कुआन्श परमेश्वरेरे लोकां केरो खून ते यीशुएरे गुवाहां केरो खून पीने सेइं मसत भोती लाई, ते अव तैन लेइतां हैरान भोव। 7 तैने स्वर्गदूते मीं सेइं ज़ोवं; “तू किजो हैरान भोव? अव तीं सेइं इस कुआन्शरो, ते तैस हैवानेरो भेद ज़ोताई, ज़ैस पुड़ तै सुवारे, ते ज़ेसेरी सत क्रोड़ी ते दश शिनगन। 8 ज़ै हैवान तीं लाव, ई पेड़लो थियो, पन हुनी नई रानो, ते अथाह कुण्डरां निसेलो ते परमेश्वर तैस पूरे तरीके सेइं नाश केरेलो, ते ज़ैना लोक इस दुनियाई मां ज़ीने लोरन ज़ैन केरां नव्वां परमेश्वरे दुनिया बनाने करां पेड़ले ज़िन्दगरे किताबी मां नई लिखोरां, तैना इस हैवान हेरतां हैरान भोले, ई हैवान पेड़लो ज़ींते थियो ते हुनी ज़ींते नई पन फिरी एज्जेलो। (Abyssos g12) 9 इन समझनेरे लेइ ज़ानी मन ज़रूरीए, तैना सत पहाड़न, ज़ैन पुड़ तै कुआन्श राज़ केरतीए। 10 ते तैना सत राज़े भी आन, पंच त मेरि ज़ोरन, ते अक हेजू ए; ते अक आखरी हेजू नई ओरो, पन ज़ैखन तै एज्जेलो त थोड़े घिरेरे लेइ राज़ केरेलो। 11 ते ज़ै हैवान पेड़लो थियो, ते हुना नई, तै एप्पू अठोवं राज़ोए; ते तैन सत्तन मरां पैदा भोव, ते आखरी मां तैस राज़े हमेशारी सज़ा मैलेली। 12 ते ज़ैना दश शिन्गां तीं पेड़लां लां, तैना दश राज़ेन, ज़ैनेई हेजू तगर राज़ शुरु नई कियोरू। तैन दश राज़ेन हैवाने सेइं साथी राज़ केरनेरो अधिकार दित्तो जेव, पन तैन राज़ केरनेरे लेइ थोड़ो वक्त दित्तो। 13 इना सब अक मन भोले, ते तैना अपनि-अपनि शक्ति ते अधिकार तैस हैवान देले। 14 इना गबड़े सेइं लड़ेले, ते गबड़ू तैन पुड़ ज़ींत हासिल केरेलू; किजोकि तै राज़ां केरो राज़ो ते प्रभु केरो प्रभु आए। तैस पत्ती चलने बाले तैना आन ज़ैना परमेश्वरे कुजोरन ते चुनोरन, ते ज़ैना तैस सेइं साथी ईमानदार आन।” 15 फिरी तैने स्वर्गदूते मीं सेइं ज़ोवं, “कि ज़ैन पानी तीं पेड़लू लोरो थियूं, ज़ैस पुड़ ते वेश्या बिशोरी थी, ए दुनियारे सारे कौमन हिराती, ज़ैना बड़े मुलखन मरां ते भाषान मरां आन। 16 तै वक्त एज्जेलो ज़ेइस हैवान दश राज़ेन सेइं ज़ैना तैस सेइं साथी

आन, तैस वेश्याई सेइं बैर रखेले, तैना तैस पुड़ हमलो केरेले ते तैस नग्गी केरेले तैसेरु किछ मास खाले, ते बाकी फुकेले। 17 किजोकि परमेशर तैन केरे मन्न मां इन छडेले, कि तैना तैसेरी मर्जी पूरी केरेले; ते ज्ञातगर परमेशेरु वचन पूरु न भोए, तांतगर अक मन भोइतां अपनू राज हैवाने देन। 18 ते तै कुआन्श, जै तीं लोरीए तैन बड्डू नगरे, जैन धेरतलरे राजन पुड़ राज करेते।”

18 इह्वां पती मीं अक स्वर्गदूत स्वर्गं मरां एइतो लाव। तैस कां बड़ो अधिकार थियो, ते एल्हेरेलेइ तैसेरे बड़े चमकने बाले महिमा सेइं सारी धरतली लौ बनी। 2 तैने ज़ोरे सेइं ज़ोवं, “कि डुल्ली बाबेल नगरी डुल्ली, ते भूतां केरे रानेरी ठार, ते हर एक्की भूतेरो अड्डो, ते हर एक्की दुष्ट ते भिट्टे चड़ोलेवेरो अड्डो बीती जेव। 3 किजोकि तैसेरे बदमैशरे शराबी सेइं सब कौमां मसत भोइ, ते धेरतलरे राजेई तैस सेइं बदमाशी की, ते धेरतलरे बुपारी तैसेरे एशेरे वजाई सेइं अमीर भोइ जे।” 4 फिरी मीं स्वर्गं अक होरि आवाज़ शुनी, “हे मेरे लोकव तुस तैस मरां निस्सा ताके तुस तैसेरे पापन मां शामिल न भोथ, ते तैसेरी आफतन मरां कोई भी तुसन पुड़ न एज्जे। 5 किजोकि तैसारे पाप बड़े आन जेन्चरे कि अगर ढेर लाव गाए त अम्बरे तगर पुजोरेन, ते परमेशरे तैसेरी बुराई नई बिसरोरी जै तैसां कियोरी आए। 6 जेन्चरे तैसां लोकन सेइं कियू तेन्चरे तैस सेइं भी केरा। तैना दुःख जैना तैसां लोकन दिते तैस दुगने देथ, तैसां लोक अपने बुरां कम्मां केरो स्वाद चखनेरे लेइ प्रभावित किये, ते परमेशेरी दुगनी सरक मैसूस केरनेरे लेइ भी बनाई जेई। 7 जेन्नी तैसां अपनि बड़याई की, ते एश किये, तेतरी तैस तकलीफ ते दुःख देथ, किजोकि तै अपने मने मां ज़ोतीए, अव रानई, विधवा नई; अव विधवारे दुखे मां कथे न गेइली। 8 एल्हेरेलेइ तैसेरे घमण्डेरे वजाई सेइं तैस पुड़ अचानक आफतां एज्जेली। अचानक तैस पुड़ बिमारी, दुःख ते कने काल साथी एज्जेले। ते तै अग्गी मां भस्म की गाली, किजोकि प्रभु-परमेशर शक्तिमाने ते तै तैस सज़ा देलो।” 9 ते दुनियारे राजे जैनेई तैस सेइं बदमाशी ते एश कियोरे थिये, जैखन तैना तैसेरे फुकोनेरो तू लाएले ते तैसेरेलेइ ढा छडेले, ते छाती कुटेले। 10 ते तैना डरेले कि तैना भी तैसेरे सज़ाई मां टलेइयोनेन, ते दूर खड़े भोइतां ज़ोले, “हे महान नगरी, बाबेल! हे मज़बूत नगरी, हाय! हाय! एक्की सैइती मां तीं सज़ा मैल्ली।” 11 “ते धेरतलरे बुपारी तैसेरेलेइ लेरां देले ते मिनत केरेले किजोकि हुनी कोई तैन सेइं लेन देन न केरेले। 12 तैन केरु सामान बड़े किसमां केरु थियूं। सोन्नु चाँदी, जुवाहर, मोती। ते मलमल, बैजनी, रेशमी, ते लाल लिगड़ां थियां, ते कने किसमां-किसमां केरि खुशबूदार लकड़ी, ते हथीदंतेरी हर किसमेरी चीज़ां, ते कीमती लकड़ी, पितल, लूह्रां, संगमरमरे किसमां-किसमां केरि चीज़ां, 13 ते दालचीनी, मसाले, धूप, गन्धरस, लोबान, मदिरा, तेल, मैदो, गेहुं, बेछी-दांत, भैङ्गां-छेल्ली, घोड़े, रथ, गुलाम, ते कने मैन्हु केरे प्राण। 14 ते बुपारी तैस सेइं ज़ोले, जैना चीज़ां तीं चैई तैना हुनी न रैली,

जैना खुशबूदार चीज़ां तीं पसंद की, तैना सैरी चीज़ां जैना तीं अपनो जिसम खूबसूरत बनानेरे लेइ इस्तेमाल की, तैना सैरी तीं गवेई ते हुनी तैना न मैल्लन। 15 इन चीज़न सेइं बुपारी जैना तैसेरे वजाई सेइं अमीर भोरे थी, तैसेरे दुखेरे डरे सेइं दूर खड़े भोले, ते लेरां देइतां ते तड़फते ज़ोले, 16 ‘अफ़सोस! अफ़सोस! ई बड़ी नगरी जै मलमल, बैजनी, लाल लिगड़ां लेइतां थी, ते सोन्नु ते जुवाहर ते मोतन सेइं सज़ोरी थी, 17 एक्की सैइती मां तैसेरु एरु धन बरबाद भोवं, ते सब मांझी, ते मुसाफर, ते मल्लाह, ते जेन्ने समुन्द्रे मरां कमाई कमातन तैना सारे दूर खड़े भोए।” 18 जैखन तैना तैस नेगरारे फुकोनेरो तू लाएले ते ज़ोरे सेइं ज़ोले, इस महान नेगरारी ज़ेरि कोई नगरी नई। 19 ते अपने-अपने दोग्गे पुड़ धूड मलेले, ते लेरां देते ते कर लाते चिन्दां मैरातां ज़ोले, “अफ़सोस! अफ़सोस! ई बड़ी नगरी जेसेरी दौलती सेइं समुन्दरेरां सब ज़िहाज़न बाले धनी भोरे थी, एक्की सैइती मां उजड़े। 20 तुस जैना स्वर्गं मां रातथ, ते परमेशेरे लोकव, ते प्रेरितव, ते कने नेबव, जैन तैस सेइं भोवं तैसेरे वजाई सेइं खुश भोथ, किजोकि परमेशरे तैस नेगरारो इन्साफ कियोरो किजोकि तैसां तुसन सेइं बुरु कियोरु थियूं।” 21 फिरी एक्की ताकतबर स्वर्गदूते बड़े चेकारे पाठेरो ज़ेरो अक घोड़ छूवो, ते इन ज़ोइतां समुन्द्रे मां शारो, कि बड़ी नगरी बाबेल एन्चरे बछोड़ी गाली, ते फिरी कथे तैसेरो पतो न मैलेलो। 22 ते सारंगी बजानेबाले, ते गीतां ज़ोनेबाले, ते बेइशोई बजानेबाले, ते नइशिनगं बजानेबालां केरि आवाज़ फिरी तीं मां कधी न शुनोली, ते फिरी केन्ची पेशेरो करीगिर तीं मां न मैलेलो; ते चक्की चलनेरी आवाज़ तीं कथे न शुनोली। 23 ते लोक दीयेरी लौ फिरी तीं मां न बालेले, ते लाड़ेरी ते लैडारी आवाज़ कथे तीं मां न शुनोली; किजोकि तेरे बुपारी धेरतली पुड़ प्रधान थिये, ते तेरे टूने सेइं सब कौमां टेपलोवरी थी। 24 परमेशर बाबेले सज़ा देलो किजोकि सारे नेबी ते परमेशेरे लोकां, ते धेरतली पुड़ सब मारोरां केरो खून तेस्से मांए।

19 ताकतबर स्वर्गदूतेरे ज़ोइतां झाड़नेरां बाद, मीं स्वर्गं मां बड़े लोकां केरि भीड़ उच्चे आवाज़ी मां इन ज़ोते शुनी, “हल्लिलूय्याह! मुक्ति, महिमा, शक्ति इश्शे परमेशेरीए। 2 तैसेरी बड़याई भोए किजोकि तैसेरे सारे फैसले सही ते ठीक आन। तैन मशूर वेश्यारो इन्साफ कियो तैसां दुनियारे लोक पाप केरनेरे लेइ प्रभावित किये। परमेशर तैस बदलो देलो किजोकि तैसारे ज़िरिये परमेशेरे दास मारोरेन।” 3 फिरी दुइयोवं बार तैनेई ज़ोवं, “हल्लिलूय्याह! ते तैसेरे फुकोनेरो तू सदा चलतो रालो।” (aiōn g165) 4 ते चोव्ही बुजुर्गेई ते च़ेरे प्रेणेई परमेशरे कां मस्थो टेको; जै तखते पुड़ बिशोरो थियो, ते ज़ोवं, “आमीन! हल्लिलूय्याह!” 5 ते तैखन मीं ज़ोते शुनो, ते परमेशेरे तखते मरां अक आवाज़ आई, तैन ज़ोवं, “तुस इश्शे परमेशेरे दास आथ जैना तैसेरी आदर केरतथ, कुन निकड़े, कुन बड़े, तुस सब तैसेरी तारीफ़ केरा।” 6 फिरी मीं बड़ी भीड़ारी, ते बड़े पेनेरी

आवाज़ शुनी, ते गुडनेरी ज़ेरि आवाज़ शुनी, “हल्लिलूय्याह! कि प्रभु इश्शो परमेशर, सर्वशक्तिमान राज़ करेते। 7 एज्जा अस खुश ते मगन भोम, ते तैसेरी बडयार्ई केरम; किजोकि गबडेरों इला पुजोरों, ते तैसेरे लैडं अपनो आप तियार केरोए। 8 ते तैस साफ ते चमकदार महीन मतलब मलमल लानेरो अधिकार दितो,” किजोकि तैस महीन मलमलेरो मतलब परमेशरें लोकां केरां धर्मरां कम्मन। 9 ते स्वर्गदूते मीं सेइं ज़ोवं, “इन लिख, कि धन आन तैना, ज़ैना गबडेरें इलाएरे धामी मां कुजोरें।” फिरी तैने मीं सेइं ज़ोवं, “इना गल्लां ज़ैना परमेशरे ज़ोईं सच आना।” 10 ज़ैखन मीं शून्, अवं ज़ै मीं सेइं गल्लां लोरो थियो केरने तैसेरी आराधना केरनेरे लेइ तैस कां झुको तैने मीं सेइं ज़ोवं, “मेरी आराधना न केर, ते परमेशरे ज़ेसैरी आराधना कियोरी लोड़े। अवं भी परमेशरें दास आई, ज़ेन्नरे तू त तेरे विश्वासी साथी आन ज़ैना यीशुएरो अपने प्रभुएरे रूपे मां इकरार केरतन।” ई सच्चाई यीशुए बांदी कियोरी ज़ै लोकन शक्ति देती कि परमेशरें वचनेरू एलान केरन। 11 फिरी मीं स्वर्ग खुल्लू लाव; तैड़ी मेरे सामने छितो घोड़ी थियो; ते तैस पुड़ अक सुवार थियो, ज़ै वफादार, ते झूठ न ज़ोए; ते ज़ैन परमेशरें नज़री मां सही आए तैसेरे मुताबिक इन्साफ ते परमेशरें दुश्मन सेइं लड़ाई केरते। 12 तैसेरे एछ्छी अगारे लपारी ज़ेरि थी, ते तैने बड़ां ताजां लोरो थियां; ते तैसेरू नवं तैस पुड़ लिखोरूए, तैसेरो मतलब सिर्फ तैए ज्ञानतो थियो। 13 तैनी खूने मां डुबोरू लिगड लोरो थियूं, तैसेरू नवं परमेशरें वचने। 14 ते स्वर्गरी फौज छिते घोड़न पुड़ सुवार; ते तैना छिते ते साफ मलमल लेइतां तैस पत्ती पत्तीन। 15 ते कौमी-कौमी मारनेरे लेइ तैसेरे ऐशी मरां अक तिखी तलवार निसतीए, ते तै लोहरे सोटे सेइं तैन पुड़ राज़ केरेलो, ते तै सर्वशक्तिमान परमेशरें बड़े प्रकोपेरी खालिस शराबी सेइं दाछ ढूलेन्चेलो। 16 ते तैसेरां लिगइन ते जंधी पुड़ इन नवं लिखोरूए, “राजां केरो राज़ो ते प्रभु केरो प्रभु।” 17 फिरी मीं अक स्वर्गदूत दिहाड़े पुड़ खड़ी लाव, ते तैने बेड़ी आवाज़ी सेइं अम्बरे मां उडने बाले च़ड़ोलन सेइं ज़ोवं, “एज्जा परमेशरें बड़े धामी मां शामिल भोनेरे लेइ अकोट्टे भोथ। 18 ज़ैस सेइं तुस राजां, प्रधानां, ताकतवर लोकां, घोड़ां ते कने तैन केरे सवारां, आज़ादां, गुलामां, निकड़े, बडे, सेब्भी लोकां केरू मास खाथ।” 19 फिरी मीं हैवान लाव ज़ै समुन्दरे मरां ओरो थियो, ते धरतले राज़े ते कने तैन केरि फौज तैस घोड़े सुवार ते तैसेरी फौजी सेइं लड़नेरे लेइ अकोट्टी लाई। 20 ते तै पेड़लो हैवान ते तैस सेइं साथी तै झूठो नबी ट्वाव, ज़ैने तैसेरे सामने एरे निशान हिरावरो थियो, ज़ेसैरे ज़िरिये तैने तैना सारे लोक टपलाए, ज़ैनेई तैस हैवानेरी छाप नेवरी थी, ते ज़ैना तैसेरी मूतरी पूजा केरते थिये, इन दुइये जींते तैस अगारे झीली मां छड़े ज़े, ज़ै गन्धके सेइं बलतीए। (Limnē Pyr g3041 g4442) 21 ते बाकी लोक तैस घोड़े सवारेरी तलवारी सेइं ज़े तैसेरे ऐशी मरां निससती थी मारे जे; ते चुडोलू तैसेरे मासे सेइं रेज़्जी जेआं।

20 फिरी मीं अक स्वर्गदूत स्वर्गरां एइतो लाव; ज़ेसैरे हथ्थे मां अथाह कुण्डेरी चाबी ते कने अक बड़ी शंगल थी। (Abyssos g12) 2 तैने तै अजगर ट्वाव ज़ै बड़े पेड़ले सप्पेरे रूपे मां लेइहोरो थियो ज़ेसैरू नवं शैतान भी आए। तैने तै ट्वाइतां हज़ार सालेरे लेइ बन्धो। 3 ते तै अथाह कुण्डे मां शैरतां बन्द कियो ते तैस पुड़ मोहर लई; कि तै हज़ार साल पूरे भोने तगर कौमां-कौमां केरे लोकन फिरी न भटकाए; इसेरां पत्ती ज़रूरे, कि थोड़े ज़िरेरे लेइ खोल्लो गाए। (Abyssos g12) 4 फिरी मीं किछ तखत लाए ते ज़ैना लोक तैन पुड़ बिश्शोरें थिये ते तैन राज़ केरनेरो अधिकार दितो; ते तैन केरि आत्मा भी लेई, ज़ैन केरि क्रोड़ी एल्हेरेलेइ केटोरी थी कि तैना यीशु मसीह अपनो प्रभु मन्तन ते परमेशरें वचने पुड़ विश्वास केरतन, ते ज़ैनेई तैस हैवानेरी, ते तैसेरे मूतरी पूजा न थी कियोरी, ते तैसेरी महोर अपने कुपाए ते हथ्थन पुड़ न थी। तैना जींते भोइतां मसीह सेइं साथी हज़ार सालन तगर राज़ केरेले। 5 इना लोक पेड़ले आन ज़ैना जींते किये गाले ते तैना धन ते पवित्र आन। दुइयोवं मौतरी तैन पुड़ कोई शक्ति न भोली। तैना परमेशरें लेइ याजक भोले ते मसीह तैन सेइं साथी हज़ार साल राज़ केरेलो, ज़ांतगर तैना हज़ार साल पूरे न भोन तांतगर होरे मरें लोक जींते न किये गाले। 7 ज़ैखन हज़ार साल खतम भोनेबाले भोले त स्वर्गदूत शैताने तैस ठैरारा हथरां छड़ेलो ज़ैड़ी तै बन्धोरो थियो। 8 ते तैन कौमन ज़ैना सैरी दुनियाई मां आन धोखो देनेरे लेइ निससेलो। तैन कौमन जो गोग ते मागोग ज़ोतन। शैतान तैन तैस ठैरी आनेलो ज़ैड़ी तै तैन सेइं लड़ेलो। तैन केरि गिनती समुन्दरे रेती बराबर भोली। 9 शैतानेरी फौज सारे दुनियाई मां गाली, तैना तैस नगरे घेरेले ज़ैस सेइं परमेशर प्यार केरते ते ज़ैड़ी तैसेरे लोक रहतन, परमेशरें तरफां स्वर्गरां अग तैन सेब्भन भस्म केरेली। 10 ते तैन केरो गुमरा केरनेबालो शैतान अग ते गन्धकेरे समुन्दरे मां शारो गालो, ज़ैस मां तै हैवान ते कने झूठो नबी भी भोली, तैना रात दिहाड़ी हमेशा दुखे मां राले। (aiōn g165, Limnē Pyr g3041 g4442) 11 फिरी मीं अक बड़ो छितो तखत ते ज़ै तैस पुड़ बिश्शोरें थियो लाव, ज़ेसैरे सामनेरां धरती ते अम्बर नश्शू, ते तैन केरे लेइ ठार न मैल्ली। 12 फिरी मीं निकड़े बड़े ज़ैना मरें थिये तखतेरे सामने खड़े लाए, ते किताबां खोल्ली जेई; ते फिरी अक होरि किताब खोल्ली; मतलब ज़िन्दगरी किताब खोल्ली; ते ज़ेन्नरे तैन किताबन मां लिखोरू थियूं, तैन केरे कम्मां केरे मुताबिक मुडदां केरो इन्साफ कियो। 13 ते समुन्द्रे तैना मरें मैन्हु दिते ज़ैना तैस मां थी, ते मौतां ते पाताले ज़ैना तैस मां मरें थिये दिते; ते तैन मरां हर एक्केरो तैन केरे कम्मां केरे मुताबिक इन्साफ कियो। (Hadēs g86) 14 ते मौत ते पाताल भी अगारे समुन्दरे मां शारू, ई अगगारो समुन्दरे त दुइयोवं मौते। (Hadēs g86, Limnē Pyr g3041 g4442) 15 ते ज़ेसैरू भी नवं ज़िन्दगरे किताबी मां लिखोरू न मैल्लू, तै अगारे समुन्दरे मां शारो जेव। (Limnē Pyr g3041 g4442)

21 फिरी मीं नव्वू अम्बर ते नव्वी धेरतली लाई, किजोकि पेड़लू अम्बर, ते पेड़ली धेरतली न थी रावरी, ते समुन्दर भी न राव। 2 फिरी मीं पवित्र नगर नव्वू यरूशलेम स्वर्गों परमेशरे करां एंडतू लाव, ते तैन तैस लैडारू जेरू थियूं, जै अपने लाडेंरे लेइ तियार भोरी भोए। 3 फिरी मीं परमेशरेंरे तखते मरां कोई उच्च्यी आवाज़ी सेइं इन जोते शुनो, “अजेंरां बाद परमेशर मैनन् सेइं साथी रालो, ते तैसेरू घर तैन लोकन मां भोलू, ते तैना तैसेरे लोक भोले, ते परमेशर एण्णू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेले। 4 ते तै तैन लोकां केरे एछड़ी केरां सब ऐंखरू पुछेलो; ते तैडुं पत्ती मौत न राली, ते न दुःख, न मातम, न मुसीबत राली; पेड़ली गल्लां बीती जेई।” 5 जै तखते पुड़ बिशोरो थियो तैने ज़ोवं, “कि तक, अवं सब किछ नव्वू केरताई।” फिरी तैने ज़ोवं, “कि लिख, किजोकि इना वचन विश्वासेरे काबल ते सच्चरे आन।” 6 फिरी तैने मीं सेइं ज़ोवं, “सब किछ पूरू भोवं, अवं अलफा ते ओमेगा, पेड़लो ते आखरी आई, अवं ट्लिशोरे ज़िन्दगरे पैनेरे नागन मरां मुखत देइलो। 7 जै ज़ीत हासिल केरे, तैए इन चीज़ां केरो बारस भोलो; ते अवं तैसेरो परमेशर भोलो, ते तैन मेरू मट्ट भोलू। 8 पन डरपोक, विश्वास न केरनेबाले, भिटे, खूनी, बदमाशी केरनेबाले, जैदू केरने बाले, मूरती केरि पूजा केरनेबाले ते सब झूठां केरो हिस्सो तैस समुन्दरे मां मैलेलो जै अग्गी ते गन्धकी सेइं बलतो रहते, ई दुइयोवं मौते।” (Limnē Pyr g3041 g4442) 9 फिरी तैन सत स्वर्गदूतेई ज़ैनेई सत आखरी आफतन सेइं भरोरे कटोरे मैनन् पुड़ उलटावरे थिये, तैन मरां एक्के मीं कां एइतां ज़ोवं, “इरां एई, तीं अवं लैडे जै जल्दी गबड़े सेइं डुला बनाली हिराताई।” 10 परमेशरेंरे आत्मा अवं अपने केबू मां कियो ते स्वर्गदूते अवं एक्की बड्डे ते उच्चे पहाड़े पुड़ नेव, ते पवित्र नगर यरूशलेम स्वर्गों मरां परमेशरे करां एइतो हिरव। 11 परमेशरी महिमा तैस मां थी, ते तैसेरी लौ बडे कीमती घोड़ा, मतलब बिल्लोरे जेरे यशबे बराबर साफ थी। 12 तैस नगरेरे चेब्रे पासन बड़ी उच्च्यी दिवार थी, ते तैसेरां 12 दारां ते दारन पुड़ 12 स्वर्गदूत थिये; ते तैन पुड़ इस्राएली केरे 12 गोत्रां केरां नव्वां लिखोरां थियां। 13 पूर्वरे पासे ट्लाई दारां, उत्तरेरे पासे ट्लाई दारां, दखिनेरे पासे ट्लाई दारां, ते पशिचमेरे पासे ट्लाई दारां थियां। 14 ते नगरेरे दिवारी 12 मुनीयादां थी, ते तैन पुड़ गबड़ेरे 12 प्रेरितां केरां 12 नव्वां लिखोरां थियां। 15 ते जै मीं सेइं गल्लां केरतो थियो, तैस कां नगर, ते तैसेरे दारन ते तैसेरे दिवारन नापनेरे लेइ अक सोन्नेरो गज़ थियो। 16 ते तैस नगरेरे चेब्रे पास थिये, ते तैसेरी लमबाई चोड़ाइअरे बराबर थी, ते तैने तैस गजे सेइं नगर नापू, त सडे 750 कोस निस्सी, ते तैसेरी लमबाई, ते चौड़ाई, ते ऊँचाई बराबर थी। 17 तैसेरां बाद स्वर्गदूते दिवारी ऊँचाई नापी। तैने एन्चरे नापी जेन्चरे मैन्हु चीज़ां नापतन, ते दिवार 66 मीटर उच्च्यी निस्सी। 18 ते तै दिवार कीमती घोड़न सेइं बनोरी थी जैस जो यशब ज़ोतन,

नगर खालिस सोन्ने सेइं बनोरू थियूं, जैन साफ चमकते शीशेरू जेरू भोए। 19 ते तैस नगरेरी मुनीयादारे घोड़ हर किसमेरी कीमती घोड़न सेइं सज़ावरी थी, पेड़ली मुनीयाद यशबेरी दुइयोवं नीलमणेरी टलेइयोवं लालड़ी, चेवरोवं मरकते, 20 पंचोंव गोदेक, शेइयोवं माणिक्ये, सतोवं पीतमणि, ओठोंव पेरोजे, नावोंव पुखराजे, दशोंव लहसनिए, यारोंव धूप्रकान्त, बारोंव याकूतेरी थी। 21 ते 12 दारां, 12 मोती केरां थियां, अक-अक दार, एक्की-एक्की मोती सेइं बनोरू थियूं, ते नगरेरी सड़क साफ शीशेरी जेरि खालिस सोन्नेरी थी। 22 मीं कोई मन्दर न लाव, किजोकि सर्वशक्तिमान प्रभु-परमेशर, ते गबडू तैड़ी नगरे मां आए। एल्हेरेलेइ मन्दरेरी कोई ज़रूरत नई। 23 ते तैस नगर मां दिहाड़ो ते चैदनेरे लोअरी ज़रूरत नई, किजोकि परमेशरेंरे महिमा सेइं तैस मां लौ भोइ रावरीए, ते कने गबडू तैसेरो दीयोए। 24 ते कौमां-कौमां केरे लोक तैसेरी लोई मां राले, ते धेरतलरे राजे अपनि-अपनि धन दौलत तैस नगरे मां आनेले। 25 तैस नगरेरां दारां सारे दिहैड़ी खुल्लां भोलो ते कधी बंद न भोलां। किजोकि तैड़ी कोई रात न भोली। 26 दुनियारे लोक दुनियारे कौमां केरि सैरी खूबसूत चीज़ां ते धन दौलत तैस नगरे मां आनेले। 27 ते तैस मां कोई भिट्टी चीज़ या गन्दु कम केरनेबालो या झूठ बनानेबालो, केन्ची भी तरीके सेइं अन्तर न गालो; पन सिर्फ तैना लोक जैन केरां नव्वां गबड़ेरे ज़िन्दगरे किताबी मां लिखोरां भोलां।

22 फिरी तैने मीं बिल्लोरेरे जेरो अक चमकतो ज़िन्दगरे पैनेरो दरिया हिराव, जै परमेशरेंरे ते गबड़ेरे तखते करां निस्तां तैस नगरेरी सड़की तगर मझामेई निसतो थियो। 2 ते दरियारे इस पासे ते उस पासे, ज़िन्दगरो बुट थियो, तैस मां 12 किसमां केरे फल लगते थिये, ते तै हर महीने फलतो थियो; ते तैस बुटेरे पट्लान सेइं कौमां-कौमां केरे लोक बेइज़ोते थी। 3 फिरी तैड़ी लानत न भोली ते परमेशर ते गबड़ेरो तखत तैस नगर मां भोलो, ते तैसेरे दास तैसेरी सेवा केरेले। 4 ते तैना परमेशरेंरे आमने सामने लाएले, ते परमेशरेंरू नवं तैन केरे कुपाए पुड़ लिखोरू भोलू। 5 ते फिरी रात न भोली, ते तैन दीयो ते दिहाड़ेरी ज़रूरत न भोली, किजोकि प्रभु-परमेशर तैन लौ देलो, ते तैना हमेशा राज़ केरेले। (aiōn g165) 6 फिरी स्वर्गदूते मीं सेइं ज़ोवं, “इना गल्लां विश्वासेरे काबल ते सच्चरीन, ते प्रभु जै नेबी केरे आत्मा केरो परमेशरे, तैने अपने स्वर्गदूत एल्हेरेलेइ भेजे, कि अपने दासन तैना गल्लां जैन केरू जल्दी भोनु ज़रूरीए हिराए।” 7 “हेर, अवं जल्दी एजने बालोई, परमेशर तैन सेबन्धन बरकत देते जैना इस किताबरे सन्देशे पुड़ ध्यान देतन।” 8 अवं तैए यूहन्ना आई, जै इना गल्लां शुन्तो, ते लहतो थियो, ते ज़ैखन मीं शुनू, ते लाऊं, त जै स्वर्गदूत मीं इना गल्लां हिरातो थियो, अवं तैस कां मथ्यो टेकने लाव। 9 ते तैने मीं सेइं ज़ोवं, “हेर, एरू न केर; किजोकि अवं तेरो, ते तेरे विश्वासी सैथी नेबी ते इस किताबरी गल्लां केरे मन्ने बालां केरो संगी दासाई; परमेशरे कां मथ्यो

टेका।” 10 फिरी तैने मीं सेइं ज़ोवं, “इस किताबरे भविष्यवैनरे गल्लन केरो भेद छुपेइतां न रख, किजोकि वक्त नेड़ोए। 11 ज़ै बुरू केरते, तै बुरू केरतो राए; ते ज़ै भिट्टो, तै भिट्टो बनोरो राए; ते ज़ै धर्मी, तै धर्मी बनोरो राए; ते ज़ै पवित्रे तै पवित्र बनोरो राए।” 12 फिरी प्रभु यीशुए ज़ोवं, “अवं जल्दी एज्जेलो। अवं एज्जी रावरोई ज़ैन लोकेई कियूं तैसेरे मुताबिक इनाम देनेरे लेइ या सज़ा देनेरे लेइ। 13 ‘अवं अलफा ते ओमेगाई, पेइलो ते आखरी, शुरुआत ते अन्त आई।’” 14 थने तै, ज़ै अपना लिगड़ा धोते, किजोकि तैस ज़िन्दगरे बुटे कां एजनेरो अधिकार मैलनोए, ते तै दारां केरे बत्तां गेइतां नगर मां दाखल भोलो। 15 पन कुतरां, जैदू केरनेबाले, बदमाशी केरनेबाले, खून केरनेबाले, मूरती केरि पूज़ा केरनेबाले, हर कोई झूठेरो चाने बालो, ते कने झूठ बनानेबालो बेइर राले। 16 “मीं यीशुए अपने स्वर्गदूत एल्हेरेलेइ भेजो, कि तुसन अगर कलीसिया मां इन गल्लां केरे बारे मां गवाही दे, अवं दाऊदेरू ज़ील, वंश, ते झेझरो चमकतो तारोई।” 17 परमेशरेरी आत्मा ते गबड़ेरी लाड़ी यीशु सेइं ज़ोतिन, “तू ज़रूर एई!” ते शुने बाले भी ज़ोन, “एई!” ज़ै टलिशोरो भोए, तै एज्जे ते ज़ै कोई चाए पानी ने ज़ैन मुफ्ते मां ज़िन्दगी देते। 18 अवं हेर एक्की ज़ै इस किताबरी भविष्यवैनरी गल्लां शुनते गवाही देताई, कि अगर कोई मैन्हु इन गल्लन मरां किछ बधाए, त परमेशर तैना आफतन ज़ैना इस किताबी मां लिखोरिन, तैस देलो। 19 ते अगर कोई इस भविष्यवैनरी किताबरी किछ गल्लां कढे, त परमेशर तैस ज़िन्दगरे बुटे ते पवित्र नगर मरां ज़ेसेरे बारे मां इस किताबी मांए, तैसेरो हिस्सो कढेलो। 20 ज़ै इन गल्लां केरि गवाही देते, ते इन ज़ोते, “हाँ अवं जल्दी एजने बालोई।” आमीन। हे प्रभु यीशु एई! 21 प्रभु यीशुएरो अनुग्रह परमेशरेरे लोकन सेइं साथी राए। आमीन।



फिरी मीं पवित्र नगर नंयू यरूशलेम स्वर्गेरां परमेशरे करां एंडतू लाव, ते तैन तैस लैडारू जेरू थियूं, जै अपने लाडरे लेइ तियार भोरी भोए। फिरी मीं परमेशरेरे तखते मरां कोई उच्ची आवाज़ी सेइं इन ज़ोते शुनो, “अज़ेरां बाद परमेशर मैनन् सेइं साथी रालो, ते तैसेरू घर तैन लोकन मां भोलू, ते तैना तैसेरे लोक भोले, ते परमेशर एण्पू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेले।”

प्रकाशित वाक्य 21:2-3

Reader's Guide

भद्रवाही at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

भद्रवाही at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bhadravahi---Bhadravahi-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियों 10:7
प्रकाशित वाक्य 9:1
प्रकाशित वाक्य 9:2
प्रकाशित वाक्य 9:11
प्रकाशित वाक्य 11:7
प्रकाशित वाक्य 17:8
प्रकाशित वाक्य 20:1
प्रकाशित वाक्य 20:3

aidios

रोमियों 1:20
यहूदा 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

प्रेरितों के काम 3:21
प्रेरितों के काम 15:18
रोमियों 1:25
रोमियों 9:5
रोमियों 11:36
रोमियों 12:2
रोमियों 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलुस्सियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानियों 1:2
इब्रानियों 1:8
इब्रानियों 5:6
इब्रानियों 6:5
इब्रानियों 6:20
इब्रानियों 7:17
इब्रानियों 7:21
इब्रानियों 7:24
इब्रानियों 7:28
इब्रानियों 9:26
इब्रानियों 11:3
इब्रानियों 13:8
इब्रानियों 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यूहन्ना 2:17
2 यूहन्ना 1:2
यहूदा 1:13
यहूदा 1:25
प्रकाशित वाक्य 1:6
प्रकाशित वाक्य 1:18
प्रकाशित वाक्य 4:9
प्रकाशित वाक्य 4:10
प्रकाशित वाक्य 5:13
प्रकाशित वाक्य 7:12
प्रकाशित वाक्य 10:6
प्रकाशित वाक्य 11:15
प्रकाशित वाक्य 14:11
प्रकाशित वाक्य 15:7
प्रकाशित वाक्य 19:3
प्रकाशित वाक्य 20:10
प्रकाशित वाक्य 22:5

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यूहन्ना 3:15
यूहन्ना 3:16
यूहन्ना 3:36
यूहन्ना 4:14
यूहन्ना 4:36
यूहन्ना 5:24
यूहन्ना 5:39
यूहन्ना 6:27
यूहन्ना 6:40
यूहन्ना 6:47
यूहन्ना 6:54
यूहन्ना 6:68

यूहन्ना 10:28
 यूहन्ना 12:25
 यूहन्ना 12:50
 यूहन्ना 17:2
 यूहन्ना 17:3
 प्रेरितों के काम 13:46
 प्रेरितों के काम 13:48
 रोमियों 2:7
 रोमियों 5:21
 रोमियों 6:22
 रोमियों 6:23
 रोमियों 16:25
 रोमियों 16:26
 2 कुरिन्थियों 4:17
 2 कुरिन्थियों 4:18
 2 कुरिन्थियों 5:1
 गलातियों 6:8
 2 थिस्सलुनीकियों 1:9
 2 थिस्सलुनीकियों 2:16
 1 तीमुथियुस 1:16
 1 तीमुथियुस 6:12
 1 तीमुथियुस 6:16
 2 तीमुथियुस 1:9
 2 तीमुथियुस 2:10
 तीतुस 1:2
 तीतुस 3:7
 फिलेमोन 1:15
 इब्रानियों 5:9
 इब्रानियों 6:2
 इब्रानियों 9:12
 इब्रानियों 9:14
 इब्रानियों 9:15
 इब्रानियों 13:20
 1 पतरस 5:10
 2 पतरस 1:11
 1 यूहन्ना 1:2
 1 यूहन्ना 2:25
 1 यूहन्ना 3:15
 1 यूहन्ना 5:11
 1 यूहन्ना 5:13
 1 यूहन्ना 5:20
 यहूदा 1:7
 यहूदा 1:21
 प्रकाशित वाक्य 14:6

eleēse

रोमियों 11:32

Geenna

मत्ती 5:22
 मत्ती 5:29
 मत्ती 5:30
 मत्ती 10:28
 मत्ती 18:9
 मत्ती 23:15
 मत्ती 23:33
 मत्ती 23:33
 मरकुस 9:43

मरकुस 9:45
 मरकुस 9:47
 लूका 12:5
 याकूब 3:6

Hadēs

मत्ती 11:23
 मत्ती 16:18
 लूका 10:15
 लूका 16:23
 प्रेरितों के काम 2:27
 प्रेरितों के काम 2:31
 1 कुरिन्थियों 15:55
 प्रकाशित वाक्य 1:18
 प्रकाशित वाक्य 6:8
 प्रकाशित वाक्य 20:13
 प्रकाशित वाक्य 20:14

Limnē Pyr

प्रकाशित वाक्य 19:20
 प्रकाशित वाक्य 20:10
 प्रकाशित वाक्य 20:14
 प्रकाशित वाक्य 20:15
 प्रकाशित वाक्य 21:8

Sheol

उत्पत्ति 37:35
 उत्पत्ति 42:38
 उत्पत्ति 44:29
 उत्पत्ति 44:31
 गिनती 16:30
 गिनती 16:33
 व्यवस्था विवरण 32:22
 1 शमूएल 2:6
 2 शमूएल 22:6
 1 राजा 2:6
 1 राजा 2:9
 अय्यूब 7:9
 अय्यूब 11:8
 अय्यूब 14:13
 अय्यूब 17:13
 अय्यूब 17:16
 अय्यूब 21:13
 अय्यूब 24:19
 अय्यूब 26:6

भजन संहिता 6:5
 भजन संहिता 9:17
 भजन संहिता 16:10
 भजन संहिता 18:5
 भजन संहिता 30:3
 भजन संहिता 31:17
 भजन संहिता 49:14
 भजन संहिता 49:15
 भजन संहिता 55:15
 भजन संहिता 86:13
 भजन संहिता 88:3
 भजन संहिता 89:48


भजन संहिता 116:3
 भजन संहिता 139:8
 भजन संहिता 141:7
 नीतिवचन 1:12
 नीतिवचन 5:5
 नीतिवचन 7:27
 नीतिवचन 9:18
 नीतिवचन 15:11
 नीतिवचन 15:24
 नीतिवचन 23:14
 नीतिवचन 27:20
 नीतिवचन 30:16
 सभोपदेशक 9:10
 श्रेष्ठगीत 8:6
 यशायाह 5:14
 यशायाह 7:11
 यशायाह 14:9
 यशायाह 14:11
 यशायाह 14:15
 यशायाह 28:15
 यशायाह 28:18
 यशायाह 38:10
 यशायाह 38:18
 यशायाह 57:9
 यहैजकेल 31:15
 यहैजकेल 31:16
 यहैजकेल 31:17
 यहैजकेल 32:21
 यहैजकेल 32:27
 होशे 13:14
 आमोस 9:2
 योना 2:2
 हबक्कूक 2:5

Tartaroō

2 पतरस 2:4

Questioned

None yet noted




विश्वासे सेइं जैखन परमेशरे अब्राहम, जैस जगाई गाने जो परमेशरे तै कुजोरो थियो, तै हुक्म मेन्तां तैस जगाई चलो जेव, जै जगाई बादे मां परमेशर तैस विरासतरो जेरो देनेबालो थियो।
हालांकी तै एन भी न थियो ज्ञानतो कि अवं कोरां चलोरोई, फिरी भी चलो जेव। - इब्रानियों 11:8


Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



किजोकि मैनेरु मछू, यानी अब एस दुनियाई मां एल्लेलेइ नई ओरो कि कोई मेरी सेवा केरे, पन एल्लेलेइ ओरोई कि अब होरि लोकां केरि सेवा केरि त कने बड़े लोकां केरे लेइ अपनि जान बलिदान केरि, ताके तैन अपने पापां केरे सजाई केरां छुटकारो मेल्ले। - मरकुस 10:45



अवं पौलुस यीशु मसीहेरो दास आई, ते प्रेरित भोनेरे लेइ परमेशरे चुनोरोई, ते परमेशरे खुशखबरी प्रचार केनेरे लेइ ठहरावरो आई। - रोमियों 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.



New Heavens and Earth



- | | |
|-------------|---|
| | Christ returns for his people |
| 1956 | Jim Elliot martyrd in Ecuador |
| 1830 | John Williams reaches Polynesia |
| 1731 | Zinzendorf leads Moravian mission |
| 1614 | Japanese kill 40,000 Christians |
| 1572 | Jesuits reach Mexico |
| 1517 | Martin Luther leads Reformation |
| 1455 | Gutenberg prints first Bible |
| 1323 | Franciscans reach Sumatra |
| 1276 | Ramon Llull trains missionaries |
| 1100 | Crusades tarnish the church |
| 1054 | The Great Schism |
| 997 | Adalbert martyrd in Prussia |
| 864 | Bulgarian Prince Boris converts |
| 716 | Boniface reaches Germany |
| 635 | Alopen reaches China |
| 569 | Longinus reaches Alodia / Sudan |
| 432 | Saint Patrick reaches Ireland |
| 397 | Carthage ratifies Bible Canon |
| 341 | Ulfilas reaches Goth / Romania |
| 325 | Niceae proclaims God is Trinity |
| 250 | Denis reaches Paris, France |
| 197 | Tertullian writes Christian literature |
| 70 | Titus destroys the Jewish Temple |
| 61 | Paul imprisoned in Rome, Italy |
| 52 | Thomas reaches Malabar, India |
| 39 | Peter reaches Gentile Cornelius |
| 33 | Holy Spirit empowers the Church |

(Wikipedia, Timeline of Christian missions)

Resurrected 33 A.D.

What are we?			Genesis 1:26 - 2:3		
How are we sinful?			Romans 5:12-19		
Where are we?					
			Innocence		
			Eternity Past	Creation 4004 B.C.	
Who are we?	God	Father	John 10:30	Genesis 1:31 God's perfect fellowship with Adam in The Garden of Eden	
		Son	God's perfect fellowship		
		Holy Spirit			
	Mankind	Living			Genesis 1:31 No Fall No unholy Angels
		Deceased believing			
		Deceased unbelieving			
	Angels	Holy	Genesis 1:1 No Creation No people		
		Imprisoned			
		Fugitive			
		First Beast			
		False Prophet			
		Satan			
Why are we?			Romans 11:25-36, Ephesian 2:7		

Mankind is created in God’s image, male and female He created us

Sin entered the world through Adam and then death through sin

When are we?					
Fallen				Glory	
Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth	
1 Timothy 6:16 Living in unapproachable light				Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City	
John 8:58 Pre-incarnate		John 1:14 Incarnate	Luke 23:43 Paradise		
Psalm 139:7 Everywhere		John 14:17 Living in believers			
Ephesians 2:1-5 Serving the Savior or Satan on Earth					
Luke 16:22 Blessed in Paradise					
Luke 16:23, Revelation 20:5,13 Punished in Hades until the final judgment					
Hebrews 1:14 Serving mankind at God's command					
2 Peter 2:4, Jude 6 Imprisoned in Tartarus				Matthew 25:41 Revelation 20:10 Lake of Fire prepared for the Devil and his Angels	
1 Peter 5:8, Revelation 12:10 Rebelling against Christ Accusing mankind			Revelation 20:13 Thalaasa		
			Revelation 19:20 Lake of Fire		
			Revelation 20:2 Abyss		

For God has bound all over to disobedience in order to show mercy to all

Destiny

भद्रवाही at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



World Nations

एल्फरेडो तुस गाथ ते सरी कौमां केरे लोकन चले बनाथ, ते तैन बाजी, ते महुँरे, ते पवित्र आत्मांरे नब्बे सेंइ बपतिस्मो देश। - मत्ती 28:19

